


Nuevo Testamento en
mixteco



New Testament in Mixtec, Atláhuca (MX:mib:Mixtec,
Atláhuca)

Nuevo Testamento en mixteco

New Testament in Mixtec, Atatláhuca (MX:mib:Mixtec, Atatláhuca)

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 4 Mar 2019 from source files dated 20 Dec 2018
9665e546-39d0-5bd5-8b10-38916a94951f

Contents

SAN MATEO	1
SAN MARCOS	53
SAN LUCAS	85
SAN JUAN	138
HECHOS	178
ROMANOS	225
1 CORINTIOS	245
2 CORINTIOS	263
GÁLATAS	275
EFESIOS	282
FILIPENSES	288
COLOSENSES	293
1 TESALONICENSES	297
2 TESALONICENSES	301
1 TIMOTEO	304
2 TIMOTEO	309
TITO	313
FILEMÓN	316
HEBREOS	318
SANTIAGO	332
1 PEDRO	337
2 PEDRO	343
1 JUAN	346
2 JUAN	351
3 JUAN	352
JUDAS	353
APOCALIPSIS	355

JNUHUN VAHA NI TEE SAN MATEO

Lista ñayuu yucūn jeē ní quiji Jesucristo (Lc. 3.23-38)

¹ Yāha cúu lista ñayuu yucūn jeē ní quiji Jesucristo. Te máá yá ni quiji nuū yucūn rey David, te David ni quiji nuū yucūn Abraham.

² Abraham ni cuu de tátá Isaac, te Isaac ni cuu de tátá Jacob, te Jacob ni cuu de tátá Judá jíin táca ñani i. ³ Te Judá ni cuu de tátá Fares jíin Zara, te náná ndindúú i ni cuu Tamar. Te Fares ni cuu de tátá Esrom, te Esrom ni cuu de tátá Aram. ⁴ Te Aram ni cuu de tátá Aminadab, te Aminadab ni cuu de tátá Naasón, te Naasón ni cuu de tátá Salmón. ⁵ Te Salmón ni cuu de tátá Booz, te náná i ni cuu Rahab. Te Booz ni cuu de tátá Obed, te náná i ni cuu Rut. Te Obed ni cuu de tátá Isaí. ⁶ Te Isaí ni cuu de tátá David, tēe ni cuu rey. Te rey David ni cuu de tátá Salomón, te náná i, xīhna gā ni cuu ña ñasihí Urías.

⁷ Te Salomón ni cuu de tátá Roboam, te Roboam ni cuu de tátá Abías, te Abías ni cuu de tátá Asa. ⁸ Te Asa ni cuu de tátá Josafat, te Josafat ni cuu de tátá Joram, te Joram ni cuu de tátá Uzías. ⁹ Te Uzías ni cuu de tátá Jotam, te Jotam ni cuu de tátá Acáz, te Acáz ni cuu de tátá Ezequías. ¹⁰ Te Ezequías ni cuu de tátá Manasés, te Manasés ni cuu de tátá Amón, te Amón ni cuu de tátá Josías. ¹¹ Te Josías ni cuu de tátá Jeconías jíin táca ñani i, máá tiempo jeē cuángoo ñayuu Israel preso nde ñuu Babilonia.

¹² Te náa cáyucú i yūcuán, te Jeconías ni cuu de tátá Salatiel. Te Salatiel ni cuu de tátá Zorobabel. ¹³ Te Zorobabel ni cuu de tátá Abiud, te Abiud ni cuu de tátá Eliaquim, te Eliaquim ni cuu de tátá Azor. ¹⁴ Te Azor ni cuu de tátá Sadoc, te Sadoc ni cuu de tátá Aquim, te Aquim ni cuu de tátá Eliud. ¹⁵ Te Eliud ni cuu de tátá Eleazar, te Eleazar ni cuu de tátá Matán, te Matán ni cuu de tátá Jacob. ¹⁶ Te Jacob ni cuu de tátá José, tēe ni cuu yíi María. Te María ni cuu ña náná Jesús, Yaā naní Cristo.

¹⁷ Te nde Abraham te nde David ni iyo uxī cuūn yucūn. Te nde David te nde náa cuángoo ñayuu Israel preso ñuu Babilonia ni iyo inga uxī cuūn yucūn. Te nde ná ni jengoo i preso te nde ni cacu Cristo, suni ni iyo inga uxī cuūn yucūn.

Jeē ní cacu Jesucristo (Lc. 2.1-7)

¹⁸ Te jeē ní cacu Jesucristo, súcuan ni cuu: Náná yā María, je ni cundaā jeē quijnáhan ña jíin José. Te nde ná tu quijnáhan ña jíin de, te ni jecūhun séhe ña ni sáha Espíritu Santo. ¹⁹ Te José, tēe quijnáhan ña jíin, chi tēe ndaā cúu de. Te tu ní cúní de cuāha de jnūhun canu ña, chi sa cúní de jeē na jécuiñī sāhi jéē ma quijnáhan de jíin ña. ²⁰ Te níní súcuan nácani ni de, te jíin jéni ni quee-ni ñin ndajéhé maá Jítoho yō Yaā Dios nuū de, te ni cahān yā jíin de:

José, séhe yucūn David, ma yūhu ró cueca ró ñasihí ró María, chi séhe jeē scácu ña, vēji i nde nuū maá Espíritu Santo. ²¹ Te scácu ña ñin séhe yíi. Te snání ró i Jesús, chi máá i cúu Yaā jnama ñayuu nuū cuéchi i, áchí ndajéhé.

²² Súcuan ni cuu tǎcá jniñu yáha, návāha squícu jnūhun Jítoho yō Yaā Dios jeē ni cáhān tēe ni nacani jnūhun ya nde jenahán. Te suhva ni cahān de:

²³ Coó ñin sūchi síhí, te nihīn séhe i,
te scácu i ñin séhe yíi,

te conaní sūchí un Emanuel.

Achí tutu. Te síhví yáha cúní cahān: Yaā Dios ndeé yá jíin yó.

²⁴ Te ni natahū ni José, te ni sáha de nájñūhun ni cahān ndajéhé Jítoho yō jíin de. Te ni jeca de María ni cuu ña ñasihí de. ²⁵ Te tu ní quíxí de jíin ña, chi nde ni scácu ña séhe yíi núú ña. Te ni snaní de i Jesús.

Jeē ní quijicoo tēe mago nuū yā

2

¹ Te ná ni cacu Jesús ini ñuu Belén ndañúu Judea, te tiempo un ndácu rey Herodes jniñu. Yūcuán na te jecu tēe ndíchí jeē cascuáha siquī quími, ni quijicoo de nde jicá, ichi nuū cáne niāndii, te ni jinūcoo de ñuu Jerusalén. ² Te ni cacajñuhún de ñayuu:

¿Ndé nuū íne sūchí jeē ní cacu jeē coo rey ñayuu hebreo? Chi ichi núu cáne niāndii ni cajito ná ñn quími cáhnu jeē cúu seña jeē ní cacu i. Te vējicoo ná chiñúhún ná i, áchí de.

³ Te rey Herodes, ná ni jini de jñuhun yáha, te ni cunéé ni de, nde jíin táca ñayuu ñuu Jerusalén. ⁴ Te ni nastútú de tāca sūtū cácujeñhu jíin tēe cástéén tutu ley Yaā Dios nuū ñayuu. Te ni cajñuhún de tēe un ndé nuū cacu Cristo achí tutu. ⁵ Te ni cacachi nuū de:

Ini ñuu Belén ndañúu Judea. Chi suhva cáhán nuū tutu ni tee tēe ni nacani jñuhun ya nde jenahán:

⁶ Te róhó ñayuu ñuu Belén ndañúu Judá, cújeñhu ga ñuu rō vēsú tāca gá jeē cujeñhu ini Judá.

Chi suu ini ñuu rō quenda ñn Yaā ndacu jniñu, te coto ya ñayuu maá rí Israel, achí Yaā Dios.

Achí tutu.

⁷ Yūcuán na te Herodes ni cana sāhí de tāca tēe ndíchí un jeē naní mago. Te ni cajñuhun yúcún de ndé quívī ní cane quími ún. ⁸ Te ni tají de tēe un quíngoo de ñuu Belén. Te ni cahán de:

Cuángoo ní te cajñuhun yúcún ní ndé nuū íne sūchi lúlí un. Te núu ni nanihín ní i, te quijicoo ní castūhun ní nuū ná, návāha suni máá ná quichiñúhún ná i, áchí rey.

⁹ Te jeē ní cajini de jñuhun ni cahán rey, te cuángoo de. Te máá quími cáhnu jeē ní cajito de ichi núu cáne niāndii, yósnúu núu de cuahán nde ni jinū nuū íne sūchi lúlí un, te yūcuan ní jecuiñī. ¹⁰ Te ná ni cajito de jeē ní jecuiñī quími ún, te yōhyo ni cacusī ni de. ¹¹ Te ni jinūcoo de ni quívicoo de ini vehe, te ni cajito de nuū sūchi lúlí un jíin náná i María. Te ni cajecuiñī yití de nuū i, te ni cachiñúhún de i. Te ni canune de yejnū de, te ni casocō de oro jíin sūje cūtú jíin sūje uvuā nuū i. ¹² Yūcuán na te ni scóto jēni de, ni cachi nuū de jeē ma nuhún de nuū Herodes. Te ñnga ichi cuanuhun de ñuu de.

Jeē ní jinu José cuángoo de nación Egipto

¹³ Te náa cuánuhun tāca tēe mago, te ni scóto jēni José jeē ñn ndajéhé maá Jítoho yō Yaā Dios ni cahán yā jíin de:

Ndocuiñī te cunu ró quíngoo ró jíin sūchi lúlí jíin náná i nde nación Egipto. Te yūcuán coyūcu ró nde castūhun rí nuū rō. Chi Herodes je yajni nanducú de sūchi lúlí jíin jeē cáhni de i. Achí yá.

¹⁴ Te ni natahū ni José. Te cuángoo de jíin sūchi lúlí jíin náná i, te ñuú ní cajica de cuángoo de nación Egipto. ¹⁵ Te ni coyūcú de yūcuan ndé ni jihī Herodes. Te sūcuan ni cuu návāha squícu jñuhun Jítoho yō Yaā Dios jeē ni cáhán tēe ni nacani jñuhun ya nde jenahán: Nde nación Egipto ni cana ri Sēhe ri vēji i, áchí Yaā Dios, achí tutu.

Jeē ní ndacu Herodes jniñu jeē na cúu tāca sūchi yí lúlí

¹⁶ Yūcuán na te Herodes ni jini de jeē sūcuan ni castáhú tēe mago un de, te yōhyo ni quitī ni de. Te ni tají de soldado cuángoo, te ni cajehni tāca sūchi yí lúlí jeē uú cuiyā jíin jeē yiquín gá jeē cáyūcú ini ñuu Belén jíin táca ñuu yajni. Chi je ni cajñuhun yúcún de tāca tēe mago un nasaa tiempo ni cuu jeē ní cacu Jesús. ¹⁷ Te sūcuan ni squícu jñuhun ni cahán Jeremías, tēe ni nacani jñuhun Yaā Dios nde jenahán, chi ni cahán de:

¹⁸ Ini región Ramá ni jini sōho ri jeē cándahyū te cándahyū cohó.

Chi ñahan cácuu yucūn Raquel, cándahyū ña jehē séhe ña, te tu cácuu ña ndusī ni ña, chi ni cajihī i.

Achí tutu.

¹⁹ Yūcuán na te ni jihī Herodes. Te ni scóto jēni José jeē ñn ndajéhé Jítoho yō Yaā Dios ni cahán yā jíin de nuū ndeé de nación Egipto. ²⁰ Te ni cahán yā jíin de:

Ndocuññi te nuhun rō ñuu rō Israel jíin súchi lúli jíin náná i. Chi je ni cajihī tēe cánducú cahni sūchi lúli jíinā nuú. Achí ndajéhé.

²¹ Yūcuán na te ni ndocuññi de, te cuanuhun de nación Israel jíin súchi lúli jíin náná i. ²² Te ni nihīn de jñūhun jeē Arquelao ni nucuññi de nuū tatá de Herodes, te máá de ndácu jniñu región Judea. Te ni yūhú de nuhun de yūcuán. Te ni scóto jēni de jeē na quíhín de región Galilea, te cuangoo de. ²³ Te ni jinū de yūcuán, te ni coyūcú de ñuu naní Nazaret. Súcuan ni cuu návāha squícu jñūhun ni cacahān tēe ni canacani jñūhun Yaā Dios nde jenahán. Chi ni cacachi de jeē cahān ñayuu jeē tēe ñuu Nazaret cúu Jesús.

Jñūhun Juan tēe scuándute

(Mr. 1.1-8; Lc. 3.1-9, 15-17; Jn. 1.19-28)

3

¹ Te ni yāha tiempo, te ni jinū Juan tēe scuándute nde nuū ñūhun téhé ndañúu Judea, nácani de jñūhun suhva:

² Nacani ni rō jijnáhan ró jéé stóo ró cuéchi ró, chi je ni cuyajni Yaā ndeé andiví jéé ndacu ya jniñu nuū rō. Achí de.

³ Te Isaías, tēe ni nacani jñūhun Yaā Dios nde jenahán, suhva ni tee de jñūhun Juan nuū tútu:

Coo ññ tēe cana jee nde nuū ñūhun téhé:

Sátūhva ró máá ró jijnáhan ró, chi quee maá Jítóho yō.

Te sáha ró jniñu ndaā, chi vēji ya, achi de.

Achí Isaías.

⁴ Te sahna ñūhun Juan cúu ixi quití nání camello, te núhñi ññ cinturón ññ chiji de. Te jeē técu de cúu táca ndicuéhyí jíin ndúxi yocō. ⁵ Te ñayuu ñuu Jerusalén jíin táca ñáyuu región Judea jíin ñáyuu yúcu yajni yuyúte Jordán, ni quijicoo i nuū de. ⁶ Te ni canacani ndaā i cuéchi i nuū Yaā Dios, te ni scuándute de i ini yūte Jordán.

⁷ Te ná ni jito de jeē véjicoo cuehē tēe grupo fariseo jíin tēe grupo saduceo nuū scuándute de, te ni cahān de jíin:

Va sēhe coō cácuu ró, chi xeēn rō nájñūhun coō. ¿A cájeni ni rō jeē cuu cunu ró cācu ró núu castigo xeēn jeē quíji? ⁸ Núu súcuan te sáha ró jniñu váha, te súcuan stéén rō jeē ní canacani ndije ni rō jeē stóo ró cuéchi ró. ⁹ Te ma cáni ni rō cahān rō jeē cuu cācu ró síquī jeē cácuu ró yúcūn Abraham. Chi cáhán rī jíin ró jeē cuu sáha Yaā Dios jeē tāca yūū yáha nduu sēhe Abraham jeē candíje vāha, te núu cúní yā. ¹⁰ Te cácuu ró nájñūhun nundēhé jeē tu jéhe ndehē váha. Te vijna je íyó túhva Yaā Dios jeē cuáha ya castigo xeēn, nájñūhun je íyó túhva ññ cāa jeē cahnde nde yoho yujnu. Núu súcuan te sáha ya jíin ró nájñūhun jíin táca yujnu jeē tu cúun ndehē váha, jeē tahndé te cayū nuū ñuhún. ¹¹ Te ruhū chi jíin ndute scuándute ri rohó, te yūcuan cúu jeē steén rō jeē ní canacani ni rō jeē stóo ró cuéchi ró. Te Yaā jeē quíji, chi nájñūhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájñūhun ññuhūn. Te Yaā quíji chi cújéhnu ndasí yá. Chi tú na vé jéhnu cuítí cúu ri nuū yā, ni jeē cuajniñu ri nuū yā vēsú ññ jniñu lúli gá nájñūhun jeē quénehen ri ndijēn yā. ¹² Te sáha ya nájñūhun sáha tēe scánda trigo, chi sásññ ya ñayuu vāha jíin ñáyuu cunéé, nájñūhun cúndoo trigo jeē quénda sññ paja. Te nastútú yá trigo yā ndīvi ini yacā yā. Te paja chi jnaa yā nuū ññuhún jeē ma ndahvá cuítí. Achí Juan.

Jeē ní jendute Jesús

(Mr. 1.9-11; Lc. 3.21-22)

¹³ Yūcuán na te ni quenda Jesús región Galilea, te ni quee yā yūte Jordán nuū íne Juan, návāha scuándute de ya. ¹⁴ Te tu ní cúní Juan scuándute de ya, chi ni cahān de jíin yá:

Sa suhva cánuú jeē scuándute máá ní sññá, ¿te ndese cúu jeē sa nuū ná vēji ní? áchí de.

¹⁵ Te ni cahān Jesús jíin de:

Tuú chi sáha ró, chi súcuan cánuú squícu yó táca jniñu ndácu Yaā Dios, achí yá.

Yūcuán na te ni scuándute de ya. ¹⁶ Te ná ni cuu ni jendute Jesús, te ni quenda ya nuū ndúte. Te ni nune-ni andiví, te ni jito ya jeē cúun Espíritu Yaā Dios vēji, te cáa nájñuhun ñn paloma, te ni quee xinī yā. ¹⁷ Te ichi ándiví ni cahān ñn jñuhun:

Yāha cúu Sēhe ri jeē maní ndasí rí jíin, te yōhyo cúsiñ ni rí jíin, áchí.

Jeē ní jito ndee jexeén Jesús
(Mr. 1.12-13; Lc. 4.1-13)

4

¹ Yūcuán na te ni jinū Jesús nde nuū ññuhun téhé ní sáha Espíritu Santo. Te yūcuán coto ndee jexeén yā, chi cúní jeē sáha ya cuēchi.

² Te ni iyo ndite ni yā uū xico nduú uū xico ñnuú, sáa te jíi yā sōco. ³ Te ni quee maá jexeén jeē cóto ndee un yá, te ni cahān jíin yá:

Núu máa ró cúu Sēhe Yaā Dios, te cahān rō jeē yuū yúcu yáha na ndúu staā caji rō, achí.

⁴ Te ni cahān yā jíin:

Tuú chi yósó núu tútu iñ: Nasūu máni máa jíin stáa cátecu ñayuu, chi suni jíin táca jñuhun cáhān Yaā Dios, achí yá.

⁵ Yūcuán na te cuahān jexeén un jíin yá nde ñnuu iñ Jerusalén. Te ni jeni ya xinī torre templo. ⁶ Te ni cahān jíin yá:

Te núu Sēhe Yaā Dios cúu ró, te síngava ró máa ró nde nuū ññuhun, chi jnama ya rohó. Chi yósó núu tútu:

Tejñíñu ya ndajéhé yā quijicoo coto róhó.

Te cunundee yā rohó jíjnáhan ya,

návāha ma cáchihi ró jéhē rō nuū yuú.

Achí tutu. Achí jexeén.

⁷ Te ni cahān Jesús:

Tuú chi suni yósó núu tútu jeē ma cóto ndee ñayuu Jitoho i Yaā Dios, núu jnama ya i chí tuú, áchí yá.

⁸ Te jexeén un ní jeca tucu ya cuahān jíin yá nde xinī ñn yucu súcún ndasí. Te ni steén tǎcá nación ññ cáhnu ñayiví núu yā, te yōhyo luu cáa ndihí. ⁹ Te ni cahān jíin yá:

Tǎcá ñnuu yáha cuáha ri nuū rō, te núu cuiñi yǎtǎ ró chíñúhún ró ruhū, achí.

¹⁰ Yūcuán na te ni cahān Jesús nuū jexeén:

Satanás, cujiyo quihīn rō, chi yósó núu tútu jeē chíñúhún ñayuu maá Jítoho i Yaā Dios, te nuū maá-ni ya cuajñíñu i. Achí yá.

¹¹ Yūcuán na te ni cujiyo-ni jexeén un cuahān. Te ni quecoo ndajéhé Yaā Dios ni cajejñíñu nuū yā.

Jeē ní quejéé Jesús nácani ya jñuhun región Galilea
(Mr. 1.14-15; Lc. 4.14-15)

¹² Te ná ni nihīn Jesús jñuhun jeē íne Juan vecāa, te cuanuhun yā región Galilea. ¹³ Te tu ní cóndee yā ñnuu Nazaret, chí ni jehēn yā ni condee yā ñnuu Capernaum. Te ñnuu un íne yumar, máa región Zabulón jíin Neftalí. ¹⁴ Te súcuan ni squícu jñuhun ní tee Isaías, tēe ni nacani jñuhun Yaā Dios nde jenahán:

¹⁵ Región Zabulón jíin Neftalí,

ichi jeē yíhi yumar, lado yūte Jordán nuū cáne niāndii,

jíin región Galilea nuū cáyūcú ñayuu tǎcá nación tu jíin jñuhun ya.

¹⁶ Ñayuu ún chí nájñuhun cáyūcú i nuū néē,

te coto i nájñuhun ñn luz cáhnu.

Te ñayuu je yajni naa, nihīn i jñuhun váha ndasí,

suu jñuhun jeē jnama ya anuá i.

Achí Isaías.

¹⁷ Te nde quiví yúcuan ní quejéé Jesús nácani ya jñuhun, te ni cahān yā suhva:

Nacani ni rō jijnáhan ró jéē stóo ró cuéchi ró, chi je ni cuyajni Yaā ndeé andiví jéē ndacu ya jniñu nuū rō, achí yá.

Jeē ní cana ya cuūn tēe jñí chācá
(Mr. 1.16-20; Lc. 5.1-11)

¹⁸ Te jíca Jesús yumar Galilea cuahān yā. Te ni jito ya nuū uú jnáhan ñani. Te ñin de cúu Simón jeē suni nání Pedro, te inga de cúu Andrés. Te tēe cájni chācá cácuu de, te cásinga de ñunu de ini mar. ¹⁹ Te ni cahān yā jíin de:

Condiquin ruhū na quíhín yō, te nasáha ri rohó tēe nihin cuehē ñayuu candíje ruhū, nájnūhun cánihin rō chācá, achí yá.

²⁰ Yūcuán na te ni castóo-ni de ñunu de, te ni candiquin de ya.

²¹ Te ni jica ya jecu gā, te ni jito ya nuū inga uū jnáhan ñani. Te cácuu de Jacobo jíin Juan, sēhe Zebedeo. Te cáyucú de ini barco jíin tátá de Zebedeo, cánachijnñi de ñunu de. Te suni ni cana ya de jeē cóndiquin de ya. ²² Te ni castóo-ni de tátá de jíin barco, te ni candiquin de ya cuango de.

Jeē ni stéén yā nuū cuehē ñayuu
(Lc. 6.17-19)

²³ Te ni jica cuu Jesús ní región Galilea, ni steén yā jnūhun ini tācá vehe ñi jeē cúu sinagoga. Te ni nacani ya jnūhun vāha ndese ndácu Yaā Dios jniñu. Te ni nasávāha ya ñayuu cácuu tācá-ni cuehyí. ²⁴ Te ni jitē núu jnūhun ya cuahān ní región Siria. Te nuū yā ni caquindeca i tāca ñáyuu cácuu, ñayuu cándoho tijni nuū cuehyí, jíin jéē jetú, jíin jéē ñūhun tachí ini, jíin jéē jihí yñí, jíin jéē ni íjin. Te ni nasávāha ya i jíjnáhan i. ²⁵ Te cuehē ñayuu región Galilea jíin Decápolis, jíin ñáyuu ñuu Jerusalén jíin región Judea, jíin tāca ñuu ichi núu cáne niāndii yūte Jordán, ni cacondiquin i ya.

Jeē ní nacani ya jnūhun nde nuū yúcu

5

¹ Te ni jito Jesús nuū ñáyuu cuehē. Te ni caa ya yucu cuahān yā, te ni cucōo ya. Te tēe cáscuáha jíin yá, ni jinūcoo de nuū yā yūcuán. ² Te ni quejéé yá ni steén yā tāca jnūhun yáha nuū de:

Jnūhun yōhyo ndetū
(Lc. 6.20-23)

³ Yōhyo ndetū ñayuu jeē cánacuni i jeē tu íyó váha ánuá i síquī cuéchi i, chi je ni quívicoo i ndaha Yaā andiví jéē ndácu ya jniñu nuū i.

⁴ Yōhyo ndetū ñayuu cácuuñhíyá ni, chí ndusñi ni i sáha Yaā Dios.

⁵ Yōhyo ndetū ñayuu cáhīyo vītá suchí ini, chí ni jejnūhun ya jeē cutahū i ñayiví.

⁶ Yōhyo ndetū ñayuu jeē nájnūhun jeē cájii i sōco cájichí i, súcuan jnáa i sáha i jniñu ndaā, chí máa yá chindéé ñáhán yá i jeē cuu sáha i.

⁷ Yōhyo ndetū ñayuu cákundáhú ni jnáhan, chí suni cundáhú ni Yaā Dios i.

⁸ Yōhyo ndetū ñayuu cáhīyo ndoo ini anuá, chí coto i nuū Yaā Dios.

⁹ Yōhyo ndetū ñayuu cánasamaní jnáhan, chí cahān Yaā Dios jeē sēhe ya cácuu i.

¹⁰ Yōhyo ndetū ñayuu jeē cájito xeēn inga ñayuu i síquī jeē casáha i jniñu ndaā, chí je ni quívicoo i ndaha Yaā andiví jéē ndácu ya jniñu nuū i.

¹¹ Yōhyo ndetū maá ró jijnáhan ró núu cácahān neé i nuū rō jeē síquí ruhū, te coto xeēn i rōhó, te stáú yáhu i rōhó, vēsú tú cuéchi ró. ¹² Na cúsní ni rō jijnáhan ró núu súcuan, te sa víhyá gā cusñi ni rō, chí cáhnu ndasí coo tahū rō nde andiví. Chí suni súcuan ni cajito xeēn i tāca tēe ni canacani jnūhun Yaā Dios jeē ní quijicoo xihna gā vēsú rohó.

Jnūhun yátá síquī ññi jíin síquī luz
(Mr. 9.50; Lc. 14.34-35)

¹³ 'Máá ró jijnáhan ró cájejnínū ró ini ñayīvi nájñūhun jéjnínū ññ nuū cúñu návāha tú tehyū. Te núu ññ ún na náā jeē uhvuá, ¿te ndese nduu uhvuā tucu? Tuá cuajñínū cuiti gā, chi sa cate ñayuu te cueñū i siquī.

¹⁴ 'Máá ró cácuu nájñūhun luz jeē steén ini anuá ñayuu ñayīví. Te cácuu ró nájñūhun ññ nuū íne xinī yúcu, jeē ma cúu quisāhí. ¹⁵ Te ni tu nástññ ñayuu ññ lámpara te chune i chíji cajón, chi sa suhva jéni i nuū sucún, návāha cundijin nuū tāca jéē cáyūcú ini vehe. ¹⁶ Te suni súcuan na steén rō luz maá ró nuū tāca ñáyuu, te suu cúu jeē cúni i jniñū váha cásáha ró, te cahān i jeē yóhyo vāha Yaā cúu Tátá rō jeē ndeé yá andiví.

Jeē ni stéén yā siquī ley Yaā Dios

¹⁷ 'Ma cáni ni rō jijnáhan ró jéē véji ri snāā rī ley jeē ni jéhe Yaā Dios nuū Moisés, jíin jéē snāā rī tāca jñūhun ni cacahān tēe ni canacani jñūhun ya jenahán. Tú véji ri jeē snāā rī, chi sa suhva jeē steén cají rí jñūhun ndíso. ¹⁸ Chi jendaá cahán rī jíin ró jeē núu níní íyó andiví jíin ñáyīví, te ma náā cuiti ni ññ punto ni ññ letra nuū tútu ley yā, chi nde na squícu tācá ndíhi jñūhun jeē cahán. ¹⁹ Núu súcuan te núu ññ ñayuu tu squícu i ññ jñūhun yáha jéē ndácu ley yā, vēsú ññ jñūhun lulí gá cúu, te núu stéén i jeē suni súcuan sáha sava ga ñayuu, núu súcuan te cuu i ñayuu núu ga ichi andiví nuū ndácu Yaā Dios jniñū. Te núu ññ ñayuu squícu i te stéén i jeē squícu ñayuu, yūcuán na te kujéhu i ichi andiví nuū ndácu Yaā Dios jniñū. ²⁰ Chi cáhán rī jíin ró jeē núu tú coo ndaā gā jniñū cásáha ró vēsú jniñū cásáha tēe cástéén tutu ley yā jíin tēe grupo fariseo, te ma quívicoo cuiti rō ndaha Yaā andiví jéē ndacu ya jniñū nuū rō.

Jeē ni stéén yā jeē ma quití ni yō

(Lc. 12.57-59)

²¹ 'Je ni cajini ró jñūhun ni cacahān jíin ñáyuu jenahán, jeē ma cáhni i ndīyi, te na-ni ñayuu núu cahni i ndīyi, te cundaā cuéchi i nuū tāca tóhō, achí. ²² Te ruhū chi cáhán rī jíin ró, vēsú núu máá jéē quití ni ññ ñayuu jíto i jñáhan i, suni cundaā siquī cuéchi i ún. Te núu ññ ñayuu cahān neé i nuū jñáhan i, núu súcuan te cundaā cuéchi i un núu justicia kujéhu ga. Te núu ññ ñayuu cahān i nuū jñáhan i: Róhó jéē canéé íí, achi i, núu súcuan te quívi i nuū ññuhún infierno te núu ma nácani ni i.

²³ 'Jeē yúcuán te núu ni jinū rō nuū altar jíin jéē socó rō nuū Yaā Dios, te núu ni nucūhun ni rō jeē ni sáha ró cuéchi siquī jñáhan ró, ²⁴ núu súcuan te squéndōo ró jéē socó rō ún xiin altar, te xihna gā quihñ rō ndumanī rō jíin jñáhan ró. Yūcuán na te nandicó ró socó rō.

²⁵ 'Te núu ññ ñayuu quihñ i jíin ró nuū tohó jeē cacān i cuéchi siquī rō, núu súcuan te níní cuáhān rō jíin i ichi te sándaā maá ró jíin i, návāha ma squívi i róhó núu juez. Chi juez siáha de róhó núu policía, te chune de róhó vecāa. ²⁶ Te jendaá cahán rī jíin ró jeē ma quénda cuiti rō yūcuán, chi nde chunaa rō ndíhi cuiti xūhun jéē cájicān de.

Jeē ni stéén yā jeē ma cósíquí ndéē jñáhan

²⁷ 'Ni cajini ró jñūhun ni cacahān jenahán jeē ma cósíquí ndéē jñáhan ñayuu. ²⁸ Te ruhū chi cáhán rī jíin ró jeē núu ññ tēe ndéhe de nuū ññ ñahan jeē ndíyo ni de ña, yūcuán na te je ni casíquí ndéē de ñahan ún ini anuá de.

²⁹ 'Núu súcuan te núu tinūu lado váha ró sáha jeē quívi ró cuéchi, vāha ga quenehen ró te scáne ró, návāha tuá sáha ró cuéchi. Chi vāha gā jeē náā ññ tinūu ró vēsú jeē cóo ndíhi yiquí cúñu rō te quihñ rō infierno. ³⁰ Te núu ndaha váha ró sáha jeē quívi ró cuéchi, vāha ga cahnde rō te scáne ró, návāha tuá sáha ró cuéchi. Chi vāha ga jeē náā ññ ndaha ró vēsú jeē cóo ndíhi yiquí cúñu rō te quihñ rō infierno.

Jeē ni stéén yā jeē ma ndusññ jñáhan

(Mt. 19.9; Mr. 10.11-12; Lc. 16.18)

³¹ 'Te suni ni cacahān nde jenahán: Núu ndé ññ cúní stóo ñasihí, te na cuáha acta nuū ña jeē ndusññ jíin ña. ³² Te ruhū chi sa cáhán rī jíin ró jeē núu ññ tēe stóo de ñasihí de,

te núu nasūu jēē tǐjni ni ña, núu súcuan te sáha de jeē casíquí ndéē ña de, chi condee ña jíin inga tēe. Te núu ñin tēe condeca de ñahan ní ndusñin, suni casíquí ndéē de ña.

Jeē ni stéén yā síquī jnúhun jéjnūhun téyí

³³ 'Te suni ni cajini ró jnúhun jeē ni cáhān jíin ñáyuu nde jenahán: Núu ni jejnūhun téyí ró jeē squícu ró, jíto jíinúu Yaā Dios, núu súcuan te cánuú squícu ró jēē ni cáhān teyí ró un, áchí. ³⁴ Te ruhū chi cáhān rī jíin ró jíinánhan ró jeē ní ñin síquī jniñu ma cahán teyí ró nde jíin síhví Yaā Dios, ni ma cahán teyí ró jeē jíto jíinúu yā. Te núu jéjnūhun téyí ró te tú vāha jeē ndácunehen ró andíví ni ñayíví. Chi andíví cúu nuū ín mesa nuū ndácu Yaā Dios jniñu. ³⁵ Te ñayíví cúu nájnūhun teyū nuū ín jehē yā. Te ni ma ndácunehen ró ñuu Jerusalén, chi suu cúu ñuu maá Yáa cúu Rey kujénu. ³⁶ Ni ma cahán rō jeē na cóndee cuēchi síquī rō núu tu squícu ró. Ma cahán rō súcuan, chi ma cúu cuítí sáha ró jēē ni ñin ixi xíní rō nducujíin chí ndujnúu. ³⁷ Chi suhva-ni cahán rō: Cúu, achi rō. Tuú, achi rō. Chi núu chisóó gá rō jnúhun cahán rō, te nuū jexeén vēji.

Jeē ni stéén yā jeē ma cuāha yó jéē ndútahū ñayuu
(Lc. 6.29-30)

³⁸ 'Ni cajini ró jnúhun jeē ni cáhān jíin ñáyuu jenahán: Núu ñin tēe ndahva de tinūu jnáhan de, suni súcuan na ndáhva tinūú de. Te núu ñin tēe stáva de jnúhun jnáhan de, suni súcuan na stáva jnúhun de, áchí. ³⁹ Te ruhū chi sa cáhān rī jíin ró: Ma nácuāha ró jéē ndútahū tēe sáha ndevāha jíin ró. Chi sa núu ndé tēe cani de yíquí núu lado vāha ró, te vāha ga suni cuāha ró inga lado cani de, vēsú jeē nácuāha ró jéē ndútahū de. ⁴⁰ Te núu ndé tēe stáú yáhu de róhó te quénde de camisa rō, suni cuāha ró jnúhun jeē na quíhín de jíin ndé ticāchi ró. ⁴¹ Te núu ndé tēe scáca de róhó jéē condiso ró ndajniñu de ñin kilómetro, te caca ró úu kilómetro jíin de. ⁴² Te na-ni ñayuu núu jíicán i ndajniñu ró, te cuāha ró núu i. Te ñayuu jíicán núu ndajniñu nuū rō, ma sasáhán ró cuāha ró núu i.

Jnúhun jeē cundáhú ni yō ñayuu cájito uhū yohó
(Lc. 6.27-28, 32-36)

⁴³ 'Te suni ni cajini ró jnúhun jeē ni cáhān nde jenahán: Cundáhú ni rō ñayuu cáhīyo maní jíin ró, te coto uhū rō ñayuu cájito uhū rohó, áchí. ⁴⁴ Te ruhū chi sa cáhān rī jíin ró: Cundáhú ni rō ñayuu cájito uhū rohó. Te cacān rō jeē vāha coo ñayuu cácahān ndevāha síquī rō. Te sáha vāha ró jíin ñáyuu cáquítí ni nuū rō. Te cacān tahú rō jehē ñáyuu cácahān neé núu rō te cájito xeēn i róhó. ⁴⁵ Te súcuan stéén rō jeē cácuu ró séhe máá Tátá rō, Yaā ndeé andíví, chi máá yá jéhe niāndii cúndijin nuū ñáyuu cunéé jíin ñáyuu vāha. Te jéhe ya saū nuū ñáyuu casáha jniñu ndaā jíin núu ñáyuu casáha jniñu neé. ⁴⁶ Chi núu íyó mání rō jíin máá-ni ñayuu jeē maní jíin ró, te tú na tahū nihīn rō nuū yā. Chi nde tēe cástútú xúhun renta jeē castáhú, suni súcuan casáha de. ⁴⁷ Te núu mání jnáhan ró cáhān yíñuhún ró jíin, ¿te na vé jeē vāha ga sáha ró núu súcuan? Chi nde ñayuu tu cácañíje Yaā Dios, suni súcuan casáha i. ⁴⁸ Núu súcuan te ndaā na cóo ndíhi jeē sáha ró, nájnūhun íyó ndaā ndíhi jeē sáha Tátá rō, Yaā ndeé andíví.

Jeē ni stéén yā ndese sáha yó jniñu vāha

6

¹ 'Te jeē sáha ró táca jniñu vāha nuū Yaā Dios, coto ró jéē ma sáha ró máá síquī jeē cúni ñayuu te cuajnúhún i róhó. Chi núu súcuan sáha ró, te tú na tahū rō cuāha máá Tátá rō, Yaā ndeé andíví. ² Jeē yúcuu te jeē sáha ró caridad, te ma sáha ró jéē cúni táca ñáyuu, nájnūhun casáha tēe stáhú-ni, cáhīn de nuū cúchitú ñayuu ini táca vehe íi sinagoga jíin núu yáhu. Chi súcuan casáha de návāha cuajnúhún ñayuu de jeē vāha casáha de. Jendaá cahán rī jíin ró jeē tahū de cúu jeē jejnúhún ñayuu de. ³ Te róhó jíinánhan ró, núu casáha ró caridad, te sáha yuhu rō, návāha nde amigo vāha ró tú cuni jeē sáha ró. ⁴ Súcuan na sáha yuhu rō caridad. Te máá Tátá rō jeē jíto ya jeē sáha yuhu rō, ñin quiví te cuāha ya tahū cuu ró.

Jeē ni stéén yā ndese cacān tahú yō
(Lc. 11.2-4)

⁵ Te jeē cájicān tahú rō, te ma sáha ró nájñūhun cásáha tēe stáhú-ni. Chi cánujnahan ni de cuiñi de cacān tahú de nuū iyó chitú ñayuu ini tācá vehe iī sinagoga jíin ró jeē maá yúcuan-ni yáhu, návāha cuni ñayuu te cuajnúhún i de. Jendaá cahán rī jíin ró jeē maá yúcuan-ni cúu tahū jeē nihín de, suu jeē jejnúhún ñayuu de. ⁶ Te róhó jíjnáhan ró, núu cájicān tahú rō, te ndīvi ró ini vehe ró te casi rō yehyí. Te cacān tahú rō nuū maá Tátá rō, Yaā ndeé yuhu jíin ró. Yūcuán na te máá Tátá rō jeē jíto ya jeē súcuan sáha yuhu rō, sáha ya jeē jíicán rō.

⁷ Te jeē cájicān tahú rō, te ma cahán saá-ni ró jnúhun jeē tu cájecūhun ni rō, nájñūhun cásáha ñayuu tu cájini jnúhun Yaā Dios. Chi cájeni ni i jeē núu cuehē jnúhun súcuan cahán i, te saá te cuni sōho ya, te tuú. ⁸ Núu súcuan te ma sáha ró nájñūhun cásáha máá i. Chi máá Tátá rō, je jíin yā na vé cájini ñúhún ró nde ná tu cacān rō nuū yā. ⁹ Núu súcuan te suhva cacān tahú rō:

Tátá maá ná jíjnáhan ná jéē ndeé ní andiví,
níní na cóo yíñúhún ná nuū ní, chi Yaā iī cúu ní.

¹⁰ Te ñúhún ni na jéē yachī quiji quivī ndacu ní jniñu ní ñáyiví yáha.

Te na cóo tācá jniñu nújnahan ni ní,
nájñūhun iyó ini andiví, súcuan na cóo ini ñayiví.

¹¹ Staā jeē cátecu na táca quívī, cuāha ní núu ná vijna.

¹² Te cone cahnu ni ni núu tāca cuéchi cásáha ná núu ní,
nájñūhun cáhine cáhnu ni na núu ñáyuu casáha cuéchi nuū ná.

¹³ Te ma cuáha ni jnúhun jeē coto ndee jexeén sāñá,
chi sa suhva jnama ní sáña núu tāca jéē neé.

Chi máá ní cúu Yaā ndácu jniñu, te jní ní poder,
te yōhoyo luu cújéhnu ní ní cáni. Súcuan na cóo. Amén.

Achi rō jíjnáhan ró.

¹⁴ Chi núu cone cáhnu ni rō nuū ñáyuu casáha cuéchi nuū rō, te suni súcuan cone cáhnu ni maá Tátá rō andiví nuū cuéchi ró. ¹⁵ Te núu ma cóne cáhnu ni rō nuū ñáyuu casáha cuéchi nuū rō, te suni súcuan ma cóne cáhnu ni maá Tátá rō nuū cuéchi ró jíjnáhan ró.

Jeē ni stéén yā síquī jnúhun condite ni

¹⁶ Te núu condite ni rō jeē chiñúhún ró Yaā Dios, te ma sáha ró nájñūhun cásáha tēe stáhú-ni. Chi cásáha de jeē coto xíi de, te súcuan stéén de nuū ñayuu jeē iyó ndite ni de, návāha cuajnúhún i de. Jendaá cahán rī jíin ró jeē maá yúcuan-ni cúu tahū jeē nihín de, suu jeē jejnúhún ñayuu de. ¹⁷ Te máá ró jíjnáhan ró, núu iyó ndite ni rō, te sa chuhun vāha ró xíní rō te nandahá núu rō, ¹⁸ návāha ma cúni ñayuu jeē iyó ndite ni rō. Chi máá-ni Tátá rō jeē ndeé yuhu yā jíin ró, cuni yā, te iin quívī te cuāha ya tahū cuu ró.

Ndese coo cúcá yó nde andiví
(Lc. 12.33-34)

¹⁹ Ma cóndihvī ni rō caya rō ndajniñu cúcá ini ñáyiví yáha, chi quívī tiquíxin, te cáne xehyu, te tívi. Te suni quívicoo ñacuñhá te sácuñhá. ²⁰ Chi sa suhva sáha ró táca jniñu vāha návāha cayā tahū rō nde andiví. Chi yūcuan má quívī tiquíxin ni ma cáne xehyu jeē tívi. Ni ma cúu quívī ñacuñhá sácuñhá. ²¹ Chi nde nuū nihín rō tahū vāha ró, yūcuan cúu nuū cóndihvī ni rō síquī.

Tinūu cúu lámpara yiqui cúñu
(Lc. 11.34-36)

²² Tinūu ró cúu nájñūhun lámpara nuū yiqui cúñu rō. Núu súcuan te núu tinūu ró iyó ndijin, te ní-ni yiqui cúñu rō cóndijin. ²³ Te núu tinūu ró tu iyó ndijin, te ní-ni yiqui cúñu rō iyó nee. Te suni súcuan cúu ánuá rō, chi núu máni jeē jéni néé ni rō, te nacā jeē nee gā iyó ini anuá rō núu súcuan.

Jeē ma cóndihvī ni yō siquī xúhun
(Lc. 16.13)

²⁴ 'Ni ñin mozo ma cúu cuajníñu de nuū uū patrón. Chi quitī ni de nuū ñin te coo mani de jíin ñnga, chí squícu vāha de nuū ñin te sájéē ni de nuū ñnga. Te suni súcuan ma cúu cuajníñu ró núū Yaā Dios te núu máni siquī xúhun ndíhvī ni rō.

Yaā Dios ndíto ya yohó
(Lc. 12.22-31)

²⁵ 'Núu súcuan te cáhán rī jíin ró jijnáhan ró: Ma nácani ndasí ni rō siquī jeē cótecu rō, núu ndese caji rō coho ró, ni siquī sahma, núu ndese cuhun ró. Chi Yaā Dios ni sáha ya jeē técu rō jíin yiquí cúñu rō, te nagā ni cuu jeē ma cuáha ya jeē cáji rō jíin jéē cúhun ró. ²⁶ Condēhe ró ndese cátecu saa, chi tu cátaji tí, ni tu cánastútú tí jeē chuvéha tí, ni tú yacā tí. Te vēsú súcuan te máá Tátá rō andiví scáji yā tí. Te cánuú ndasí gá rō jijnáhan ró vēsú tācá saa ún. ²⁷ ¿Te ndé ñin ró, á cuu scuéhnu ró máá ró sava metro gā, vēsú na nácani ndasí ni rō?

²⁸ ¿Te najehē cánacani ndasí ni rō jeē ma nihín rō sahma? Condēhe jijnáhan ró ndese jéē ita tāca yúcū. Chi tu sájniñu, ni tu táú. ²⁹ Te cáhán rī jíin ró jeē ni rey Salomón, quivī ní ñúhun de sahma váha ndasí, tu ní ñúhun de sahma lúu súcuan nájnūhun ita ún. ³⁰ Te núu súcuan jéhe Yaā Dios sahma lúu ita un jéē jéē vijna te sajnē cayū nuū ñuhún, te nagā ni cuu róhó jijnáhan ró jéē ma sáha ya jeē nihín rō sahma. ¿Te naun tu cácandíje ñihin ró jéē ndíto ya rohó? ³¹ Núu súcuan te ma nácani ndasí ni rō siquī jeē cáji rō, jeē coho ró, jeē cuhun ró. ³² Chi tāca ñáyuu ñayiví jéē tu cácandíje cúu jeē máni siquī jeē yáha cándihvī ni i. Te máá ró jijnáhan ró, chí íyó Tátá rō andiví, te jíin yā jeē cájini ñúhun ró tāca jéē yáha. ³³ Te sa suhva cánuú gá jeē cóndihvī ni rō siquī jniñu jeē ndácu Yaā Dios nuū rō, jíin síquī jeē sáha ró jniñu ndaā jeē nújnahan ni yā. Yūcuán na te sáha ya jeē nihín rō tāca jéē yáha. ³⁴ Núu súcuan te ma nácani ni rō siquī jeē cóo sajnē, chí vijna cúu vijna te sajnē cúu sajnē. Chi cani ni rō siquī jnúndóho jeē iyó ná ñin ná ñin-ni quivī.

Jeē ma cahán yō siquī cuéchi jnáhan yó
(Lc. 6.37-38, 41-42)

7

¹ 'Ma cahán rō siquī ñayuu ndese sáha i, návāha suni ma cahán Yaā Dios cuéchi siquī maá ró jeē casáha ró súcuan. ² Chi nájnūhun cácahān rō siquī cuéchi ñayuu, suni súcuan cahān yā siquī cuéchi ró. Te cūhva jeē cándihvī ni rō siquī i, suni cūhva yúcuan sáha ya jíin ró. ³ Chi cuéchi jnáhan ró cúu nájnūhun jeē íne ñin yāca lúlí tinūú i. ¿Te naun casáha ró cuenta jeē súcuan, te tu casáha ró cuenta cuéchi máá ró jeē cúu nájnūhun jeē íne ñin nduhu tinūu máá ró? ⁴ ¿Te naun cácahān rō jíin jnáhan ró: Na táva rī yāca íne tinūu ró, te tu cánacani ni rō jeē íne ñin nduhu tinūu máá ró? ⁵ Tēe stáhú-ni cácuu ró núu súcuan. Xihna gā tinūu máá ró tava rō nduhu, te yūcuán na te cuu condēhe váha ró jéē táva rō yāca tinūu jnáhan ró.

⁶ 'Ma sáha fuerza rō ñayuu cunéé quívicoo i nuū jnúhun iī yā núu tu cúní i. Chi ndonda i siquī rō nájnūhun ina jeē cáyihí tí rohó. Te ma nácani ró jnúhun ya nuū ñáyuu jeē tu cúní cuítī cuajnúhún. Chi cándāa i nájnūhun quínī jeē jeñú tí siquī perla jeē ndeé yahu ga.

Cacān yō nuū yā te nihīn yō
(Lc. 11.9-13; 6.31)

⁷ 'Cacān rō nuū Yaā Dios, te cuāha ya nuū rō. Te nducú ró tāca jéē váha íyó núu yā, te nihīn rō sáha ya. Te cacān tahu rō nde nihīn rō, nájnūhun sáha ñayuu cahán yehyí nde nune quiví i. ⁸ Chi tāca ñáyuu jicán, cuāha ya nuū i. Te ñayuu nducú, suni nihīn i. Te ñayuu cahán, nune ya ichi nihīn i jeē cúní i.

⁹ ¿Te ndé ñin róhó núu sēhe ró jicán i staā nuū rō, te á cuáha ró ñin yuū nuū i? ¹⁰ ¿Te núu jicán i ñin chācá, te á cuáha ró ñin coō nuū i? Tú cuítī súcuan. ¹¹ Núu súcuan te máá

ró jijnáhan ró, vésú ñayuu iyó cuéchi cácuu ró, te cájini rō cuāha ró jēē váha nuū séhe ró. Te nagā ni cuu máá Tátá rō andiví jēē ma cuáha ya jeē váha nuū ñáyuu jicán nuū yā.

¹² Te nájnūhun cúní rō jeē sáha vāha ñayuu jíin ró, suni súcuan na sáha vāha ró jíin i. Chi tutu ley Moisés súcuan ndácu jniñu, jíin táca tutu tēe ni canacani jnūhun Yaā Dios.

Siquī jeē quívi yó yéhyí túū

(Lc. 13.24)

¹³ Condihvī ni rō quīvicoo ró ndaha Yaā Dios. Chi cúu nájnūhun ñin yéhyí túū. Chi yéhyí jíin ichi jeē cuahán nuū jnahnú ndetū ñayuu, jíté te cáhnu, te cuehē i quīvicoo yūcuán. ¹⁴ Te yéhyí jíin ichi jeē cuahán nuū nihín tahú i cotecu i, chi tuū yehyí te cuññi ichi, te jecu-ni i cánihin i.

Jíin jniñu casáha ñayuu te nácuni yō ndese ñayuu cácuu i

(Lc. 6.43-44)

¹⁵ Te ma cándije cuíti rō tēe stáhú jēē cácahān de jeē jnúhun Yaā Dios cánacani de. Chi nájnūhun lanchi, quití tú xeēn, súcuan casáha de vējicoo de nuū rō. Te ini anuá de chi cácuu de nájnūhun yihī, quití xeén. ¹⁶ Jíin jniñu casáha de te nacuni rō de ndese tēe cácuu de. Chi cúu nájnūhun jeē tu scóyo ró ndehē uva xinī ññu, ni tu scóyo ró higo xinī ññu yóquin. ¹⁷ Te tēcá yujnu váha chi jēhe ndehē váha, te yujnu neé chi cúun ndehē neé. ¹⁸ ññin yujnu váha ma cúun ndehē neé, te ni ññin yujnu neé ma cuáha ndehē váha. ¹⁹ Te tēcá yujnu jeē tu jēhe ndehē váha, chi tahndē te cayū nuū ññuhún. ²⁰ Te suni súcuan cácuu tēe ún, chi jíin jniñu casáha de te nácuni rō ndese tēe cácuu de.

Nasūú ndihī ñayuu quīvicoo andiví

(Lc. 13.25-27)

²¹ Nasūú ndihī ñayuu jeē cahán i Jitoho i ruhū cúu jeē quīvicoo nuū ndácu Tátá rī jniñu nde andiví. Chi quīvicoo máá nene ñayuu jeē squícu jniñu cúní Tátá rī andiví. ²² Te quivī jeē sándaā rī jniñu ñayuu, te cuehē i cahán jíin rí: Jitoho na jijnáhan ná, ni canacani ná jnúhun jíin síhví ní, te ni caquenehen ná táchī jíin síhví ní, te ni casáha ná cuéhē jniñu jéhnu jíin síhví ní jeē náā ni ñayuu sáha. Achi i. ²³ Yūcuán na te cahán rī jíin ñáyuu ún: Tu jíiní cuíti rī rohó. Cujiyo quingoo ró, chi ñayuu casáha jniñu neé cácuu ró, achi rī.

Siquī uú vehe

(Lc. 6.47-49; Mr. 1.22)

²⁴ Núu súcuan te tēe ñáyuu jeē cájini sōho jnūhun cáhán rī te squícu i, cácuu i nájnūhun ñin tēe ni nacani vāha ni, te ni jeni de vehe de siquī cáva. ²⁵ Te ni cuun saū, te ni ndaa yūte, te ni quee tachī xeén, te ni cachundahá vehe ún. Te tu ní cótúú, chi siquī cáva ndéé. ²⁶ Te tēe ñáyuu jeē cájini sōho jnūhun cáhán rī te tu squícu i, cácuu i nájnūhun ñin tēe cánéé jeē ní jeni de vehe de nuū ññti. ²⁷ Te ni cuun saū, te ni quiji ndute ññuhún cuéhē, te ni quee tachī xeén, te ni cachundahá vehe ún. Te ni cotúú-ni, te ni naa ññ-ni. Achí yá jíin i jijnáhan i.

²⁸ Te ná ni jinu ni cahán Jesús tēe jnúhun yáha, te ñayuu cuehē un ní canaa ni i ni cajini i jnūhun ni steén yā. ²⁹ Chi ni steén vāha ya nuū i, chi máá yá cúu jeē ndíso jniñu siquī ndihī. Te tēe cástéén tutu ley Yaā Dios, tu súcuan cástéén de.

Jeē ní nasávāha ya ñin tēe ndóho cuehyī stehyú

(Mr. 1.40-45; Lc. 5.12-16)

8

¹ Te ni nanuu Jesús yucu ún, te cuehē ñayuu cándiquin i ya. ² Te ñin tēe ndóho cuehyī stehyú, ni quee de nuū yā. Te ni jecuiññi yití de nuū yā, te ni cahán de jíin yá:

Jíiní na jēē cuu sáha ní jēē nduvāha ná, te núu cúní ni, áchí de.

³ Te Jesús ni soó yá ndaha ya siquī de, te ni cahán yā:

Cúní rī. Te na nduvāha ró, áchí yá.

Te ná ni cahān yā súcuan, te ni nduvāha-ni tēe ndóho cuehyī stehyú un. ⁴ Yūcuán na te ni cahān Jesús jíin de:

Ma cáchi cuiṭi rō nuū ní ĩn. Chi quisteén rō maá ró nuū sutú, te condahá ró jeē socó rō nuū Yaā Dios, nájnūhun ni ndacu Moisés jniñu jenahán, návāha cuni ñayuu jeē ní nduvāha ró. Achí yá.

Jeē ní nasávāha ya mozo capitán

(Lc. 7.1-10)

⁵ Te ni quívi Jesús ñuu Capernaum. Te ĩn tēe nación Roma jeē cúu capitán, ni quee de nuū yā, te ni cahān ndahú de jíin yá:

⁶ Mozo na cátu i vehe ná, chi ni ĩjin i te ndóho xeēn i, áchí de.

⁷ Te ni cahān Jesús:

Quihīn rī nasávāha ri i núu súcuan, áchí yá.

⁸ Te ni cahān capitán jíin yá:

Tu cújéhnú ná jéē quihīn ni quívi ní vehe ná. Chi máá jéē cahán-ni ní, te na ndúvāha-ni mozo na. ⁹ Chi máá ná suni ndíso jniñu ná ní casáha tēe cácujuhnu ga. Te cújéhnú ná núu táca soldado na. Te núu cáhán na jíin ĩn de jeē na quihīn de, te cuahān de. Te núu cáhán na jíin inga de jeē na quíji de, te quíji de. Te núu ndácu ná ĩn jniñu nuū mozo na, te sáha i. Achí de.

¹⁰ Te jeē ní jini Jesús jnūhun yáha, te ni naa ni yā. Te ni cahān yā jíin ñayuu cándiquīn yā ún:

Jendaá cahán rī jíin ró jeē ni nación yō Israel tu ní níhīn rī ni ĩn ñayuu candíje níhin súcuan, nájnūhun cándíje tēe yáha, vēsú tēe nación tu jíin jnūhun Yaā Dios cúu de. ¹¹ Te cáhán rī jíin ró jeē quíjicoo cuehē ñayuu ichi núu cáne niāndii jíin ichi núu quéē niāndii. Te cucōo i caji i staā jíin Abraham jíin Isaac jíin Jacob nuū ndácu Yaā Dios jniñu nde andiví. ¹² Te sava ñayuu nación Israel jeē maá i quívicoo núu, te sa quenehen ya i quihīn i nuū nēē, chi tu ní cácdíje i. Te yūcuán ndáhyū i te nacayīhí yuhu i jeē ndoho xeēn i. Achí yá.

¹³ Yūcuán na te ni cahān yā jíin tēe cúu capitán:

Cuánuhun vehe ró, chi sáha ri nájnūhun cándíje ró jéē sáha ri.

Te mozo de un ní nduvāha-ni i máá hora un.

Jeē ní nasávāha ya naná chíso Pedro

(Mr. 1.29-31; Lc. 4.38-39)

¹⁴ Te ni jehēn Jesús vehe Pedro. Te ni jito ya naná chíso de jeē catú ña yáhi quíji ña.

¹⁵ Te ni jniñi ya ndaha ña, te ni quenda-ni quíji ún ña. Te ni ndocuiñi ña, te ni sáha ña jeē ní cayejí de jíin yá.

Jeē ní nasávāha ya cuehē ñayuu

(Mr. 1.32-34; Lc. 4.40-41)

¹⁶ Te jeē ní cuaa ni quecoo ñayuu jíin cuehē ñayuu jeē níhun tachī ini i. Te ni quenehen ya tachī un cuángoo jíin jnúhun cáhán-ni ya. Te suni ni nasávāha ya táca ñayuu cácuhū.

¹⁷ Te súcuan ni cuu návāha cundaā jnūhun ni cahān Isaías, tēe ni nacani jnūhun Yaā Dios jenahán: Máá yá ni tejiyo ndinuū cuehyī cándoho yó, áchí Isaías.

Siquī ñayuu jeē cácuñi i condiquīn i ya

(Lc. 9.57-62)

¹⁸ Te ni jito Jesús jeē ní ndicó ndúu cuehē ñayuu yā. Te ni cahān yā jíin tēe cáscuáha jíin yá jeē na yáha de jíin yá inga lado mar. ¹⁹ Te ĩn tēe stēen tutu ley Yaā Dios, ni quee de nuū yā, te ni cahān de:

Maestro, condiquīn na níhīn quihīn yō ndé-ni cúu-ni nuū quihīn ni, áchí de.

²⁰ Te ni cahān Jesús jíin de:

Tāca ñúcuui, íyó yáú cava cáñuhun ti. Te suni saa, iyó táca tī. Te ruhū, Yaā ní nduu tēe, tuú nuū cusú rī, achí yá.

²¹ Te inga tēe ni cahān de jíin yá, te tēe scuáha jíin yá cúu de:

Condetu ní ndé na quíchindūji ná tátá na xíhna gā. Yūcuán na te condiquīn na níhín, áchí de.

²² Te ni cahān Jesús jíin de:

Condiquīn ruhū na quíhín yō. Te stóo tāca ndīyi na chindūji jnāhan ndīyi, chi ndīyi cácuu ñayuu tu cá candíje. Achí yá.

Jeē ní jecuiñī tachī níhin jíin mar ni sáha ya

(Mr. 4.35-41; Lc. 8.22-25)

²³ Yūcuán na te ni quívi Jesús ini barco, te tēe cáscuáha jíin yá ni quívicoo de cuahān de jíin yá. ²⁴ Te nuū mar ni jequīhi ñin tachī níhin, te ni stón da ndute mar, ni quívi ini barco un. Te Jesús chi quíxí yā. ²⁵ Te tēe cáscuáha jíin yá ni castón da de ya, te ni cacahān de:

Jnama ní yóhó, chi je quée yó chíji ndute, áchí de.

²⁶ Te ni cahān yā jíin de:

¿Naun cáyūhú ndasí ró? Te tu cá candíje níhin ró jēe cácu ró sáha ri, achí yá.

Yūcuán na te ni ndocuiñī yā, te ni cahān yā nuū tachí níhin un jíin núū mar. Te ni cuu nayúú í-ni. ²⁷ Te ni canaa ni de jíināhan de, te ni cacahān de:

¿Ndé ñin ga cúu tēe yáha, jēe ndé tachī níhin jíin mar cájetáhú jēe cahán de? áchí de.

Tēe Gadara jēe cándoho tachī

(Mr. 5.1-20; Lc. 8.26-39)

²⁸ Te ni jinū yā ñga lado mar, máa región ñayuu Gadara. Te uū tēe ni quendacoo de nde nuū yíndūji ndīyi, ni quiñahan de ya. Te cáñuhun tachī ini de, te siquī jēe yóhyo xeēn tachī ún, te ni ñin ñayuu tu cúu yāha i ichi yúcuan. ²⁹ Te ni cacana cóhó de ni casáha tachī:

¿Naun vēji ní núū ná, Jesús Sēhe Yaā Dios? ¿A vēji ní yáha jēe stóho ní sáña ndé ná tu quee maá quívī? áchí.

³⁰ Te nde jicá jecu cáhiin cuehē quīñī cájitu tí. ³¹ Te tachī jēe cáñuhun ini tēe un ní cacahān ndahú jíin yá:

Núu quenehen ní sáña, te cuāha ni jnúhun na quívicoo ná ini quīñī cáhiin yūcuán, áchí.

³² Te ni cahān yā jíin:

Cuángoo núu súcuan.

Te ni quendacoo tachī ún ini tēe ún, te ni quívicoo ini quīñī. Te quīñī un ní cajinu tí ni caningava tí ñin yucáva, te ni ndaquīhi tí ndute mar, ni cajihī tí.

³³ Te tēe cándito tí ni cajinu de cuángoo de jēe ní cayūhú de. Te ni najinūcoo de ñuu. Te ni cacastūhún de táca jniñu yúcuan, jíin ndese ni cuu jēe ní quendacoo tachī ini ndíndúú tēe ún. ³⁴ Yūcuán na te ndīvii ñayuu ñuu un, ní quendacoo i cuacondēhé i Jesús. Te ná ni jinūcoo i nuū íne ya, te ni cacahān ndahú i jíin yá jēe na quénda ya región yúcuan quíhín yā.

Jeē ní nasávāha ya ñin tēe ndóho cuehyī ni íjin

(Mr. 2.1-12; Lc. 5.17-26)

9

¹ Yūcuán na te ni ndīvi Jesús ini barco. Te ni nayāha ya cuahān yā ñga lado mar, te ni najinū yā ñuu maá yá. ² Te ni caquindeca ñayuu ñin tēe ndóho cuehyī ni íjin, cátú de nuū ñin camilla. Te ni jini Jesús jēe cá candíje i jēe cúu nasávāha ya tēe ní íjin ún. Te ni cahān yā jíin de:

Na ndúndeyí ni rō séhē, chi je íne cáhnu ni rī nuū tāca cuéchi ró, áchí yá.

³ Yūcuán na te jecu tēe cástéén tutu ley Yaā Dios, ni cajeni ni de siquī yā: Jēe cahán tēe yáha súcuan, chi cáhán de jnúhun ndevāha jēe quítí ni Yaā Dios. ⁴ Te ni jini Jesús jēe súcuan cájeni ni de, te ni cahān yā jíin de:

¿Naun cájeni ni rō jēe cahán ndevāha ri? ⁵ Jēe uú jnúhun yáha, ¿ndé ñin yí gá cáa? ¿A jēe cahán rī jíin tēe cúhú: Je íne cáhnu ni rī nuū tāca cuéchi ró? ¿Chí yí gá jēe cahán rī:

Ndocuiñī te caca ró, chi je ni nduvāha ró, achi rī? ⁶ Te vijna te na stéén rī jeē maá rí, Yaā ní nduu tēe, ndíso jníñu ri ini ñayīvi yáha jéē cóne cáhnu ni rī nuū cuéchi.

Yūcuán na te ni cahān yā jíin tēe ní ĩjin ún:

Ndocuiñī te naquihin ró camilla rō te quinhun rō vehe ró, áchí yá jíin de.

⁷ Yūcuán na te ni ndocuiñī-ni tēe ún, te cuanhun de vehe de. ⁸ Te ná ni cajito ñayuu un jéē súcuan ni sáha ya, te ni cayūhú i. Te ni cacahān i jeē yóhyo vāha Yaā cúu Yaā Dios jeē súcuan ni jēhe ya poder nuū ĩn tēe jeē cúu nasávāha de ñayuu, achí i cájito i Jesús.

Jeē ní cana ya Mateo

(Mr. 2.13-17; Lc. 5.27-32)

⁹ Te ni quenda Jesús yūcuan cuáhān yā. Te ni jito ya nuū ĩn tēe nání Mateo, néne de nuū cutútú xúhun renta. Te ni cahān yā jíin de:

Condiqūn ruhū na quíhín yō.

Te ni ndocuiñī de, te cuahān de jíin yá.

¹⁰ Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jíin inga tēe cásáha cuēchi, suni cáyúcú de cáyeji de staā jíin Jesús jíin tēe cáscuáha jíin yá. ¹¹ Te tēe grupo fariseo, ni cajito de, te ni cacahān de jíin tēe cáscuáha jíin yá:

¿Naun yéji maestro rō jíin tēe cástútú xúhun renta jíin inga tēe cásáha cuēchi? áchí de.

¹² Te ni jini Jesús, te ni cahān yatá yá jíin de:

Ñayuu cáhīyo vāha, tu jíni ñúhún i tēe tájné, chi ñayuu cácuahū cúu jeē jíni ñúhún.

¹³ Cuáhán jíjnáhan ró núu súcuan, te nacani ni rō na vé cúu jeē cahán jnūhun yáha jéē yosó núu tútu i: Cúni rī jeē na cúndáhú ni rō jnáhan ró, nasūu jéē socó rō quitī nuū rī, achí Yaā Dios nde jenahán. Te ruhū nasūu jéē véji ri cana ri ñayuu tú cuēchi, jeē cúu i nájñūhun ñayuu cáhīyo vāha, chi sa suhva véji ri cana ri ñayuu iyó cuéchi, jeē na nácani ni i te stóo i cuēchi i. Achí yá.

Jeē ní cacajñūhún de ya síquī jeē cóndite ni

(Mr. 2.18-22; Lc. 5.33-39)

¹⁴ Yūcuán na te tēe cáscuáha jíin Juan tēe scuándute, ni quecoo de nuū Jesús. Te ni cacahān de jíin yá:

Sāña jíin tēe grupo fariseo, tijni jínu cáhīyo ndite ni na núu Yaā Dios. Te tēe cáscuáha jíin máá ní, ¿naun tu cásáha de súcuan?

¹⁵ Te ni cahān Jesús jíin de:

¿A cuu condite ni de níní jéē iyó rí jíin de? ¿A cuu cucuíhyá ni ñayuu cáhīin vico nándāha, te núu níní néne tēe nándāha? Te quee quivī jeē cújiyo tēe nándāha, te quivī ún chi condite ni i.

¹⁶ Te ni cahān yā uū jnūhun yátá síquī jeē tu quíjnáhan jnūhun jeé jéē steén yā jíin táca jnúhun jenahán. Achí yá:

Ni ĩn tu náchuhun ĩn pedazo sahma jéé núu ĩn sahma túhú. Chi núu súcuan te ndiyi pedazo jeé un, te tahndē gā jeē tuhú un, te nducáhnu ga nuū catáhndé un. ¹⁷ Te suni tu cáchuhun vino jeé ini ññi túhú. Chi núu súcuan te ndatā ññi ún, te naa vino jíin ññi. Chi cánuú jéé chúhun i vino jeé ini ññi jéé, te súcuan te quéndōo vāha ndíndúú. Achí yá.

Jnūhun sēhe síhí Jairo jíin ñahan ní quehé yusáhma ya

(Mr. 5.21-43; Lc. 8.40-56)

¹⁸ Te níní cáhán Jesús táca jnúhun yáha, te ĩn tēe cújéhnú nuū ñáyuu hebreo, ni quee de nuū yā. Te ni jecuiñī yití de nuū yā, te ni cahān de:

Sēhe síhí ná sá ní jihī i. Te núu na quíhín yō soó ní ndaha ní síquī i, te natecu i. Achí de.

¹⁹ Te ni ndocuiñī Jesús, te cuahān yā jíin de, te suni cuango tēe cáscuáha jíin yá. ²⁰ Te mēhñu ñáyuu cuango jíin yá ni quee ĩn ñahan, te je ni cuu uxī uū cuiyā ndóho ña cuehyī ññi. Te ni quee ña ichi yátá yā, te ni quehé ña yusáhma ya. ²¹ Chi ni jeni ni ña: Vēsú maá

sahma ya na níhín rī quehé rí, te nduvāha ri, jéni ni ña. ²² Te ni ndió cóto Jesús, te ni jito ya nuū ña, te ni cahān yā:

Na ndúndeyí ni rō, séhē. Ni candíje ró jéē cuu nasávāha ri rohó, te jeē yúcuan ní nduvāha ró, áchí yá.

Te ni nduvāha ña máá hora un.

²³ Te ná ni jinū Jesús vehe tēe cújéhnú ún, te ni jito ya nuū tēe cácuu músico jeē quíchindūji de i, jíin núu ñáyuu cuehē, cásávaā i. ²⁴ Te ni cahān yā jíin i:

Cujiyo jíjnāhan ró, chi sūchi síhí yáha, tu ní jíhí i chi quíxí-ni i, áchí yá.

Te ni cajecū catá i jeē ni cáhān yā. ²⁵ Te ni quenehen ya ñayuu cuehē ún, te ni quívi ya ini vehe. Te ni jñi ya ndaha sūchi síhí ní jíhí ún, te ni ndocuiñi-ni i. ²⁶ Te ñí región yúcuan ní jítē núu jñūhun jñiñu jéhnú ní sáha ya ún.

Jeē ní nasávāha ya uū tēe cuáá

²⁷ Te ni quenda Jesús yúcuan cuáhān yā. Te uū tēe cuáá cuángoo de yatā yā, cácana jee de:

Máá ní jeē cúu ní Sēhe yucūn David, cundáhú ni ní sáña víi, achí de.

²⁸ Te ná ni jinū yā vehe, te ni jinūcoo tēe cuáá un núu yā. Te ni cahān yā jíin de:

¿A cáandíje ró jéē cúu nanune ri tinūu ró? achí yá.

Te ni cacahān de:

Cáandíje ná, áchí de.

²⁹ Yūcuán na te ni tee ya ndaha ya tinūu de, te ni cahān yā:

Na sáha ri nájnūhun cáandíje ró, áchí yá.

³⁰ Te ni cananune-ni tinūu de. Te Jesús ni cahān níhin ya jíin de:

Ma cáchi cuiti rō nuū ni ñin, áchí yá.

³¹ Te máá de chi ni quendacoo de, te ni cajete-ni de jñūhun ñí región yúcuan jéē súcuan ni sáha ya jíin de.

Jeē ní nasávāha ya ñin tēe ñíhín

³² Te nuū ní quendacoo tēe un cuángoo de, te ni quecoo ñayuu jíin ñin tēe ñíhín, jeē ñúhun tachí ini de. ³³ Te ni quenehen ya tachí un cuáhān. Te tēe ñíhín un ní nacahān de. Te ni canaa ni ñayuu ni cajito i, te ni cacahān i:

Ná tu cuni cuiti yō ni ñin jñiñu súcuan ini ñuu Israel, achí i.

³⁴ Te tēe grupo fariseo chi ni cacahān de:

Tēe yáha chí quenehen de tachí jíin fuerza maá jexeén jeē cújéhnú nuū tachí, achí de.

Jeē cundáhú ni yā ñayuu cuehē

³⁵ Te ni jica cuu Jesús tēcá ñuu jíin rancho, te ni steén yā jñūhun ini tēcá vehe íi sinagoga. Te ni nacani ya jñūhun vāha ndese ndácu Yaā Dios jñiñu. Te ni nasávāha ya ñayuu cácuu na-ni cuehyí cándoho i. ³⁶ Te cundáhú ni yā jíto ya nuū ñáyuu cuehē ún. Chi cándoho i te cácuu níhí ni i, chi cácuu i nájnūhun lanchi jeē tú jito ho tī, chi tu ndíquin i Yaā cúu Jíto ho i. ³⁷ Yūcuán na te ni cahān yā jíin tēe cácuáha jíin yá:

Ñayuu yáha cácuu i nájnūhun trigo jeē tahndé, te ndaā jeē cuehē cúu, te tēe cahnde chí jecu-ni de cúu. ³⁸ Núu súcuan te cacān tahu rō nuū maá Jíto ho rō Yaā Dios jeē na tájí yá cuehē tēe na quíngoo de cahnde de trigo, cúu jeē nácani de jñūhun ya nuū ñáyuu. Achí yá.

Jeē ní nacāji ya uxí uū tēe apóstol

(Mr 3.13-19; Lc. 6.12-16)

10

¹ Yūcuán na te ni cana ya uxí uū tēe jeē scuáha de jíin yá. Te ni jēhe ya poder nuū de jeē quenehen de tachí ini ñayuu, jíin jéē nasávāha de ñayuu cácuu tēcá ndínuu cuehyí.

² Te yáha cúu síhví ndíhúxí uū tēe apóstol un: Tēe ñin cúu Simón jeē suni nání Pedro, jíin ñani de Andrés. Te uū gā de cácuu sēhe Zebedeo, te nání de Jacobo jíin Juan. ³ Yūcuán na te Felipe, Bartolomé, Tomás, Mateo tēe ni stútú xúhun renta, Jacobo sēhe Alfeo, jíin

Lebeo jeē suni nání Tadeo, ⁴ jíin Simón tēe grupo cananista, jíin Judas Iscariote, tēe jeē ní nastúu de ya.

Jeē ní taji yá ndihúxí uū de quinacani de jnūhun

(Mr. 6.7-13; Lc. 9.1-6)

⁵ Te ni taji Jesús ndihúxí uū tēe yáha jeē quíngoo de. Te ni ndacu ya jniñu nuū de ndese sáha de:

Ma quíngoo ró núu ñáyuu jeē násūu ñáyuu hebreo cácuu i, ni ma quívicoo ró táca ñuu ñayuu Samaria. ⁶ Chi nuū maá-ni ñayuu nación yō Israel quíngoo ró, chi cácuu i nájnūhun lanchi jeē ní sana. ⁷ Te jeē quíngoo ró te suhva nacani ró jnūhun: Je ni cuyajni Yaā ndeé andiví jeē ndacu ya jniñu nuū rō, achi rō. ⁸ Te nasávāha ró ñáyuu cándoho cuehyī stehyú jíin ñáyuu cándoho tāca gá cuehyī, te nastécu rō ndīyī te quenehen ró táchī ini ñayuu. Te súcuau-ni ni jēhe ri poder nuū rō jeē sáha ró, te suni súcuau-ni sáha ró jíin i.

⁹ Te ma cóndiso ró xúhun oro, ni xūhun plata, ni centavo cuechí. ¹⁰ Ni ma cóndiso ró ñunu stáá caji rō ichi, ni inga camisa, ni ndijēn, ni vara. Chi siquī jniñu jeē nácani ró jnūhun nuū ñáyuu, te cánuu coto i róhó.

¹¹ Te na-ni ñuu chí rancho núu ni jinūcoo ró, te yūcuán nducú ró ñin ñayuu vāha, te coyūcu ró vehe i nde quíngoo tucu ró. ¹² Te jeē quívī ró vehe ñayuu ún, te cahān rō jeē na quíji jnūhun ndeyí jnūhun sīñ ni nuū i. ¹³ Te núu ñayuu vāha cácuu i, te jnūhun ndeyí ní cahān rō quendōo siquī i. Te núu nasūu ñáyuu vāha cácuu i, te jnūhun ndeyí ní cahān rō ma quéndōo siquī i. ¹⁴ Te núu íyó ñáyuu jeē tu cájetáhú i róhó, ni tu cúní i cuni nahín i jnūhun cahān rō, yūcuán na te quendacoo ró vehe un chí ñuu ún, te scóyo ró tēcachā jehē rō, te súcuau stéén rō jeē iyó cuéchi i jeē tu ní cájetáhú i. ¹⁵ Jendaá cahán rī jíin ró jeē quivī juicio te xeēn gā coo castigo siquī ñuu casáha súcuau vēsú siquī ñuu Sodoma jíin ñuu Gomorra nuū ní casáha ndasí ñáyuu cuēchi.

Jeē coto xeēn ñayuu de jíjnáhan de

¹⁶ Cuni sōho ró, chi táji rí rohó quíngoo ró nájnūhun lanchi mēhñu yíhī. Núu súcuau te coo listo rō nájnūhun coō, te coo vitá ni rō nájnūhun paloma. ¹⁷ Te condito ró máá ró nuū ñáyuu, chi quee quivī jeē quíndeca i róhó núu tohó, te cani i róhó ini tācá vehe ñi sinagoga. ¹⁸ Te suni nde nuū tācá gobernador jíin rey quíndeca i róhó jēé siquí ruhū. Te súcuau te nune ichi jeē nacani ndaā rō jnūhun ri nuū de jíin núu ñáyuu tācá nación jeē tu jíin jnūhun Yaā Dios. ¹⁹ Te núu ni jendeca i róhó núu tāca téé ún, ma nácani ndasí ni rō ndese cahān rō. Chi máá hora un te máá yá steén nuū rō ndese cahān rō. ²⁰ Chi nasūu máá ró cúu jeē cahán, chi Espíritu maá Tátá rō cúu jeē cahán jíin yuhu ró.

²¹ Te sava ñayuu tu cácadíje, nastúu i ñani i jeē na cúu. Te tátá nastúu sēhe. Te sēhe ndonda siquī tátá jíin náná jeē na cúu. ²² Te ndíhi ñayuu quitī ni i nuū rō jeē siquí ruhū. Te ñayuu jeē cuiñi ñihin nde jeē jínu jnūndóho, ñayuu ún chi cācu ánuá i. ²³ Te núu cájito xeēn i róhó ñin ñuu, te cunu ró quíhñ rō inga ñuu. Chi jendaá cahán rī jíin ró jeē ma ndécáva ró caca cuu ró ndíhi nación yō Israel te ndiji-ni máá rí, Yaā ní nduu tēe.

²⁴ ñin tēe scuáha, tu cújéhnu de nuū maestro de. Ni tēe cúu mozo, tu cújéhnu de nuū patrón de. ²⁵ Tēe scuáha chi nájnūhun ndóho maestro de suni súcuau ndóho nahín máá de, te tēe cúu mozo suni ndóho de nájnūhun ndóho patrón de. Núu súcuau te núu ruhū cácahān i jeē Satanás cúu ri, te nagā ni cuu jeē ma cahán i jeē rohó cácuu Satanás.

Jeē ní cachi yā ndé ñin cúu jeē yūhu yó

(Lc. 12.2-9)

²⁶ Núu súcuau te ma yūhu ró coto ró ñáyuu. Chi tāca jnūhun cácahān sáhi i ma quéndōo sáhi cuiñi, chi ndíhi natūu ndijin, te cuni ñayuu. ²⁷ Jnūhun ní cahān rī jíin ró jeē tu ní jíin ñayuu, na nácastūhun cáji ró nuū i. Te jnūhun ní nacani sáhi rí nuū rō, na nácani jee ró yátā tācá vehe. ²⁸ Te ma yūhu ró coto ró ñáyuu cahni yiqui cúñu rō, chi ma cúu cahni i ánuá rō. Chi sa suhva yūhu ró jēé ma stívī ró núu Yaā Dios, chi cuu snáhnú ndetū yā rohó jēé quívī ánuá rō jíin yiqui cúñu rō infierno.

²⁹ Te tācá saa chi tú yahu ndéé tī, chi nde uū tī jeē ìn centavo lulí. Te ni ìn tī tu nínga nuū ñúhun te núu tu jéhe Tátá rō jnūhun, chi ndíto ya tī. ³⁰ Te nagā ni cuu rōhó jíjnáhan rō, chi nde ndíhi ixi xíní rō je ni cahu ya. ³¹ Núu súcuan te ma yūhu ró jíjnáhan rō, chi cánuú ndasí gá rō nuū yā vésú cuehē tācá saa.

Ñayuu jejnúhún Jesucristo nuū inga ñayuu
(Lc. 12.8-9)

³² Te tāca ñáyuu jeē cuajnúhún rúhū nuū inga ñayuu, suni súcuan cuajnúhún rí i nuū Tatá rī, Yāā ndeé andíví. ³³ Te tāca ñáyuu jeē ma cuajnúhún rúhū nuū inga ñayuu, suni súcuan ma cuajnúhún rí i nuū Tatá rī, Yāā ndeé andíví.

Jeē siquí Jesús te cusín ini ñayuu
(Lc. 12.51-53; 14.26-27)

³⁴ Ma cáni ni rō jíjnáhan ró jéē véji ri jeē cóyūcu mání ñayuu ñayíví. Tú véji ri jeē cóyūcu mání ñayuu, chi sa suhva cuajnáhan i jeē siquí ruhū. ³⁵ Chi jeē siquí ruhū te cusín ini sēhe yí jíin tátá, te sēhe síhí jíin náná, te sēhe jēnu jíin náná chísó. ³⁶ Chi tāca ñáyuu candíje ruhū, chi jnáhan vehe i cúu jeē quitī ni nuū i.

³⁷ Te núu ndé ìn ñayuu manī gā i jíin tátá i chí jíin náná i vésú jíin rúhū, nasūu ñáyuu vāha cúu i jeē cóndiquín i ruhū. Te núu ndé ìn ñayuu manī gā i jíin séhe yí i chí jíin séhe síhí i vésú jíin rúhū, te suni nasūu ñáyuu vāha cúu i jeē cóndiquín i ruhū. ³⁸ Te na-ni ñayuu núu tu jéhe i jnūhun ndoho i jnūndóho vésú nde cuu i jeē siquí jeē cóndiquín i ruhū, nasūu ñáyuu vāha cúu i jeē cóndiquín i ruhū. ³⁹ Te núu ndé ñáyuu cúní i cācu i nuū jnūndóho quiji nuū i jeē siquí ruhū, núu súcuan te jnahnū ndetū i níí cáni. Te núu ndé ìn ñayuu vésú na cúu i jeē siquí ruhū, te cotecu i níí cáni.

Jeē iyó táhū yō nuū Yāā Dios
(Mr. 9.41)

⁴⁰ Te ñayuu cuatáhu rōhó jíjnáhan ró, núu súcuan te ruhū cájetáhu i. Te ñayuu cájetáhu rúhū, cájetáhu i Yāā ní tají rúhū véji ri. ⁴¹ Núu na-ni ñayuu cuatáhu i ìn tēe nácani jnūhun Yāā Dios, siquí jeē jíca de jniñu Yāā Dios, núu súcuan te ìnuú-ni coo tahū de nuū Yāā Dios jíin tēe nácani jnūhun Yāā Dios. Te núu na-ni ñayuu cuatáhu i ìn tēe ndaā, siquí jeē tēe ndaā cúu de, núu súcuan te ìnuú-ni coo tahū de nuū Yāā Dios jíin tēe ndaā. ⁴² Te núu ndé ñáyuu cuāha i vésú ìn ñajin ndute mójin coho ìn sūchi yáha, siquí jeē cúu i sūchi cándíje ruhū, ndaā ndíje cúu jeē nihín i tahū i. Achí yá.

Jeē ní tají Juan uū tēe nuū yā
(Lc. 7.18-35)

11

¹ Te ná ni jínu ni ndacu Jesús jniñu nuū ndíhúxí uū tēe cáscuáha jíin yá, te ni quenda ya yūcuan cuáhān yā jeē steén yā te nacani ya jnūhun tācá ñuu región yūcuán.

² Te íne Juan vecā. Te ni nihín de jnūhun tācá jniñu sáha Cristo. Te ni tají de uū tēe cáscuáha jíin de, ³ cuacajnúhún de ya:

¿A máá ní cúu Cristo jeē achí tutu jeē quiji, chí condetu yó inga tēe quiji? áchí de.

⁴ Te ni cahān yā jíin de:

Cuángoo te castūhun ró nuū Juan tācá jniñu cájito ró jíin jnúhun cájini ró. ⁵ Te cachi rō nuū de jeē ñáyuu cuaá cánanune tinūú i, te ñayuu yacuaá cánacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jihí nátecu i sáha rí. Te suni nácani ri jnūhun nuū ñáyuu ndahú jéē jnama Yāā Dios i. ⁶ Te yōhyo ndetū tēe jeē ma nácani yátá ni de jeē ruhū cúu Cristo. Súcuan cachi rō nuū Juan. Achí yá jíin de.

⁷ Te náa cuanuhun ndíndúú tēe ún, te ni quejéé Jesús cahán yā jnūhun Juan jíin ñáyuu:
¿Na vé ni jécondēhe ró jíjnáhan ró nde nuū ñúhun téhé? ¿A ìn tēe jéni ìn jéni uū ni, nájnūhun ite jeē cánda sáha tachí? ⁸ Te núu tuú, ¿te na vé ni jécondēhe ró núu súcuan? ¿A ìn tēe cúní cujéhnū jeē ñúhun sahma lúu? Tuú chí cájini rō jeē tēe cáñuhun sahma lúu, mání ini vehe rey cáyūcú de. ⁹ ¿Te na vé ni jécondēhe ró núu súcuan? ¿A ìn tēe

nácani jnūhun Yaā Dios? Cáhán rī jín ró jeē suu ni jecondēhe ró, te cújéhnū ga Juan yáha vēsú tāca gá tēe ni canacani jnūhun Yaā Dios. ¹⁰ Chi jnūhun Juan cúu jeē ni cáhān Yaā Dios jeē yosó núu tútu i:

Tají rí tēe nacani jnūhun ri cosnūú de ichi núú Cristo, návāha coo tūhva ñayuu jeē jinú yā.

Achí Yaā Dios, achí tutu. ¹¹ Te jendaá cahán rī jín ró jeē ini ñayīvi yáha cújéhnū ga Juan tēe scuándute vēsú tāca gá tēe jeē ni íyo ini ñayīví. Te vēsú súcuan te tāca tēe núu ga ini ñuu nuū ndácu Yaā andíví jniñu, cújéhnū ga de vēsú Juan.

¹² Te nde quivī ní quee Juan tēe scuándute, te nde vijna, chi cánducú ndéyí ñayuu quívicoo i ndaha Yaā andíví jēē ndácu ya jniñu nuū i. Te nde ñayuu xeēn cánducú ndéyí i siquī. ¹³ Chi nde ná tu quiji Juan, te ni íyo máá ley Moisés, te suni ni íyo tāca tēe ni canacani jnūhun Yaā Dios. Te ni cacastūhún de ndese coo jeē ndacu Yaā Dios jniñu. ¹⁴ Te ni cacahān de jeē ndíji Elías. Te núu cáncuni rō cuatáhú ró jnūhun, te jíní rō jeē máá Juan cúu tēe jeē ní cachi tutu jeē quíji, chi cúu de nájnūhun Elías. ¹⁵ Tāca róhó jēē jíní sōho, na chúsóhó ró.

¹⁶ Yāhá cachi rī ñin jnūhun yátá návāha na cúni rō ndese cúu ñayuu tiempo vijna. Cúu i nájnūhun sūchi lúlí cáhiin nuū yáhu cácasíquí i. Te cácana ndee i xinī jnāhan i: ¹⁷ Ni cativí rī scuilí, te tu ní cájita jéhe ró. Te ni cajita ri yaa jeē cuihyá jíta, te tu ní cándahyū rō, achí i. Te nájnūhun cándāa sūchi lúlí un jēē tu ní núnahan ni i ni ñin, súcuan cándāa ró. ¹⁸ Chi ni quiji Juan te cuehē jínu ni íyo ndite ni de, tu ní yéji de ni tu ní jíhi de. Te tu ní cánujnahan ni rō, chi ni cacahān rō jeē ñūhun tachí ini de. ¹⁹ Yūcuán na te ni quee máá rí, Yaā ní nduu tēe, te yéji rī jíhi ri, te tu cánujnahan ni rō, te chísóo jnúhun ró cacahān rō jeē máni máá jēē yéji rī jíhi ri vino. Te quijnāhan ri jín tēe cástútú xúhun renta jín táca gá tēe cásáha cuēchi, áchí ró. Te núu cúndíchí ñin tēe jín jnúhun Yaā Dios, te jín jniñu sáha de te nátūu jeē tēe ndíchí cúu de. Achí yá.

Jeē ní cuxeēn yā nuū sava ñuu ñihni ni
(Lc. 10.13-15)

²⁰ Yūcuán na te ni quejéé yá cuxeēn yā nuū tāca ñuu nuū ni sáha ya cuehē jniñu jéhnū, chi tu ní cáncani ni i jeē stóo i cuēchi i. Te ni cahān yā:

²¹ Nacā jeē xeēn ndoho ró, ñayuu ñuu Corazín. Te nacā jeē xeēn ndoho ró, ñayuu ñuu Betsaida. Chi núu ini ñuu Tiro jín ñuu Sidón ni sáha ri jniñu jéhnū jeē ni sáha ri ini ñuu máá ró, te yachí nacani ni ñayuu ñuu un jēē stóo i cuēchi i núú. Te sáha i seña jeē steén jeē nácani ni i siquī cuēchi i, chi cuhun i sahma jnúú te chuhun i yaā xinī i núú. ²² Núu súcuan te cáhán rī jín ró jeē quivī coo juicio te xeēn gā coo castigo siquī rō jijnāhan ró vēsú jeē ni íyo siquī ñuu Tiro jín ñuu Sidón. ²³ Te róhó ñayuu ñuu Capernaum, ¿á cájeni ni rō jeē cújéhnū ró nájnūhun ñin jeē cáa cuahān ichi ándiví? Tuú chi sa nanuu ró ndé lugar nuū cáyūcu ánuá ndīyí. Chi núu ini ñuu Sodoma ni sáha ri jniñu jéhnū jeē ni sáha ri nuū máá ró, te coo ñuu yúcuan ndé vijna núú. ²⁴ Núu súcuan te cáhán rī jín ró jeē quivī coo juicio te xeēn gā coo castigo siquī rō vēsú jeē ni íyo siquī ñayuu ñuu Sodoma. Achí yá.

Nehen nuū rī ndetātu ró, achí yá
(Lc. 10.21-22)

²⁵ Te suni quivī un ní cahān Jesús:

Na cútahū na núu ni Tátā, Jitoho andíví jín ñayīví. Chi ni jesi ní táca jnúhun ndíchí ní, jeē ma cúni ñayuu ndíchí jín ñayuu tūhva cuenta ñayīvi yáha. Te ni steén ni núu ñayuu cácuu nájnūhun sūchi lúlí. ²⁶ Chi súcuan ni nujnahan ni ni Tátā, achí yá.

²⁷ Te ni cahān gā yā:

Ndivii ni jēhe Tátá rī nuū rī. Te tu cájini ñayuu ndé ñin cúu ruhū, Sēhe Yaā Dios, chi máá-ni Tátá rī cúu jeē jiní yā ruhū. Ni tu cájini ñayuu ndese Yaā cúu máá Tátá, chi máá-ni Sēhe cúu jeē jiní. Te íyó ñayuu jeē cuní máá Sēhe steén yā nuū i ndese Yaā cúu Tátá yā, te máá i suni cuní i. ²⁸ Tāca ró jēē ni cuíta ró jín táca jniñu jín ley jeē yí sáha jín ró,

nehen quivícoo ró ndaha ri, te ndetātu ró sáha ri. ²⁹ Quiví ró núu jniñu ndácu máá rí, te scuáha ró coo ró nájnūhun íyó máá rí. Chi vitá ni rī te suchí ni rī. Te súcuan te ndetātu ró jíin ánuá rō sáha ri. ³⁰ Chi tú yí jēē cuandetū rō nuū rī, ni tú yí jēē squícu ró jniñu ndácu ri. Achí yá.

Jeē ní cataxín de yoco trigo quiví ndetátú
(Mr. 2.23-28; Lc. 6.1-5)

12

¹ Te iin quiví ndetātu ní yáha Jesús cuahān yā nuū cáa trigo. Te tēe cáscuáha jíin yá, cájii de sōco. Te ni quejéé de cátaxín de yoco trigo cáyeji de. ² Te ni cajito tēe grupo fariseo, te ni cacahān de jíin yá:

Condēhé, chi tēe cáscuáha jíin ró casáha de jniñu jeē tu íyó váha sáha yó quiví ndetátú, áchí ley Moisés.

³ Te ni cahān maá yá jíin de:

¿A tu ní cácahu ró tutu ndese ni sáha David, iin quiví jeē ni jíi de sōco jíin tēe cáhiin jíin de? ⁴ Te ni quiví de ini vehe Yaā Dios. Te ni yeji de pan iī jeē yosó ndijin nuū Yaā Dios. Te tú na ley jeē cáji de, ni tēe cáhiin jíin de, chi máá-ni sutū cuu caji. Te vēsú súcuan te tú na cuēchi ní íyo síquī de. ⁵ ¿Te á tu ní cácahu ró tutu ley Moisés, ndese casájniñu sutū ini templo, vēsú quiví ndetātu cúu? Te tú na cuēchi íyó síquī de, vēsú quiví ndetātu casájniñu de jniñu jeē cácuu de sutū. ⁶ Te cáhān rī jíin ró jeē maá rí jeē iyó yáha, cújēhnu ga rī vēsú templo. ⁷ Te tu cájecūhun ni rō jijnáhan ró jnūhun yáha jeē yosó núu tútu iī jeē ni cáhān Yaā Dios: Jeē cuní gā rī cúu jeē cundáhú ni rō jnáhan ró, vēsú jeē socó rō quití nuū rī, achí yá. Te núu jeē ní cajecūhun ni rō jnūhun yáha, te ma cahān rō súcuan síquī tēe jeē tú na cuēchi núu. ⁸ Chi ruhū, Yaā ní nduu tēe, máá rí cúu jeē ndácu jniñu síquī ndese sáha ñayuu quiví ndetátú, áchí yá.

Jeē ní nduvāha tēe ni ichi ndaha
(Mr. 3.1-6; Lc. 6.6-11)

⁹ Yūcuán na te cuahān Jesús, te ni quiví ya ini vehe iī sinagoga. ¹⁰ Te yūcuan íne iin tēe ni ichi iin ndaha de. Te cácuni tēe grupo fariseo jeē nihīn de cuēchi síquī yā, te ni cacajnūhún de ya:

¿A íyó ley jeē cuu nasávāha yó ñayuu huhú quiví ndetátú? áchí de.

¹¹ Te ni cahān yā jíin de:

¿Ndé iin róhó, núu névāha ró iin lanchi, te núu nínga tí ini iin yaū quiví ndetátú, te á tu jéhén rō natava rō tī, chí naún? ¹² ¿Te á tu cánuú ndasí gá iin tēe vēsú iin lanchi? Núu súcuan te vetū-ni sáha yó jniñu váha quiví ndetátú, áchí yá.

¹³ Yūcuán na te ni cahān yā jíin tēe ni ichi ndaha ún:

Scaá ndaha ró.

Te ni scaá de, te ni nduvāha-ni nájnūhun íyó inga. ¹⁴ Yūcuán na te ni quendacoo tēe grupo fariseo, te ni candajnūhún de síquī Jesús, ndese cahni de ya.

Jnūhun Jesús jeē ni cáhān Isaías nde jenahán

¹⁵ Te ni jini Jesús jeē súcuan cájeni ni de, te ni quenda ya yūcuan cuahān yā. Te cuehē ñayuu cándiquīn i ya. Te ni nasávāha ya ndihi ñayuu huhú. ¹⁶ Te ni ndacu ya jniñu nuū i jeē ma stéén i ya. ¹⁷ Te súcuan ni cuu návāha squícu jnūhun ni cahān Yaā Dios síquī Jesús, te ni nacani Isaías jnūhun ya un ndé jenahán:

¹⁸ Yáha cúu mozo rī jeē ní nacāji ri,
te manī rī jíin yá, te cúshī ni rī jíin yá.

Te cuāha ri Espíritu rī coo jíin yá.

Te máá yá sándaā jniñu ñayuu tācá nación.

¹⁹ Ma tejnáhan ya, ni ma cána jee ya,

te ni ma cahān jee ya ichi jeē cúni ñayuu.

²⁰ Ma sáha xeēn yā jíin ñayuu ni cunihin jnūndóho síquī,

ni ma snáa yā ñayuu jeē maá lulí-ni cácaandíje.
Chi cujéhnú ya siquī ndíhi, te ndaā ndacu ya jniñu.

²¹ Te ñayuu tācá nación cocuhun ni i jeē jnáma ya i.
Achí Yaā Dios, achí Isaías nde jenahán.

Jeē ní cacahān de jeē jejniñu ya fuerza Satanás
(Mr. 3.19-30; Lc. 11.14-23; 12.10)

²² Yūcuán na te ni caquindecá i nuū yā ñn tēe cuáá ññhín, chi ñúhun tachí ini de. Te ni nasávāha ya de. Te ni ndundijin tinūú de te ni nacahān de. ²³ Te ndíhi ñayuu cuehē un ní canaa ni i cájito i, te ni cacahān i:

¿A tēe yáha cúu jeē ni cáhān Yaā Dios jeē cacu nuū yucūn David? áchí i.

²⁴ Te tēe grupo fariseo, ni cajini de jeē súcuan cacahān i. Te ni cacahān de:

Tēe yáha ma cúu quenehen de tachí núu jeē tu sáha de jíin fuerza Satanás jeē cujéhnú nuū tachí, áchí de.

²⁵ Te Jesús ni jini yā jeē súcuan cájeni ni de, te ni cahān yā jíin de:

Tācá nación jeē casásñn máá te cájejnáhan máá, núu súcuan te snáa jeē iyó váha máá. Te núu ñn ñuu chí ñn vehe casásñn máá te cájejnáhan máá, te ma cúu ga coyūcu cáhnu. ²⁶ Te suni súcuan Satanás núu quenehen jnáhan tachí, núu súcuan te sásñn máá. ¿Te ndese cuiñi ñhín Satanás jeē ndácu jniñu núu súcuan? ²⁷ Chi cacahān rō jeē jíin fuerza Satanás quenehen ri tachí. Te núu súcuan cúu núú, te ñayuu cascuáha jíin máá ró jijnáhan ró, ¿na jíin fuerza cáquenehen máá i tachí, cájeni ni rō? Núu súcuan te máá i jíjnáhan i cachi jeē ní castívi ndasí suhva ró ni cacahān rō jeē cáquenehen ri tachí jíin fuerza Satanás. ²⁸ Te tuú chi sa jíin Espíritu Yaā Dios cúu jeē quenehen ri tachí. Núu súcuan te je ndéé Yaā Dios mēhñu ró jeē ndácu ya jniñu.

²⁹ ¿Chi ndese cuu quívi ñn tēe ini vehe tēe ndacuí jeē quenehen de ndajniñu de? Chi cánuú jeē xíhna gā cuhni de tēe ndacuí ún, te yūcuán na te cuu quenehen de ndajniñu ún. Te suni súcuan cúu jeē jíhni rī Satanás te quenehen ri tachí.

³⁰ Te ñayuu tu iyó mání jíin rí, núu súcuan te jíto uhū i ruhū. Te ñayuu tu nástútú jíin rí, núu súcuan te sa jéte núu i ñayuu vējicoo nuū rī.

³¹ Jeē yúcuan cáhān rī jíin ró: Iyó modo coo jñuhun cáhnu ni nuū tāca cuéchi casáha ñayuu, jíin núu tāca jñuhun néé cacahān i. Te núu cahān ndevāha i siquī Espíritu Santo, te ma cóne cáhnu ni Yaā Dios nuū i. ³² Te núu na-ni ñayuu cahān i siquī ruhū, Yaā ní nduu tēe, cuu cone cáhnu ni Yaā Dios nuū i. Te núu na-ni ñayuu cahān ndevāha i siquī Espíritu Santo, ma cóne cáhnu ni Yaā Dios nuū i, ni jeē iyó i ñayívi yáha, ni ní tiempo quíji.

Jñuhun yujnu váha jíin yujnu néé
(Lc. 6.43-45)

³³ Núu yujnu váha, te vāha ndehē, te núu yujnu néé, te cánéé ndehē. Chi jíin ndéhē te jíin yō ndese yujnu cúu. Te suni súcuan ñayuu. ³⁴ Va sēhe coō cácuu ró, chí xeēn rō nájñuhun coō. ¿Ndese cuu cahān rō jñuhun vāha, chí ñayuu casáha néé cácuu ró? Chi jniñu jeē jéni ni anuá ñayuu, máni yūcuan cáhān i. ³⁵ Tēe vāha cáhān de jñuhun vāha, chí iyó ndáa anuá de. Te tēe sáha néé cáhān de jñuhun néé, chí cánéé ánuá de. ³⁶ Te cáhān rī jíin ró jeē tācá na-ni jñuhun cacahān ñayuu, nacūaha i cuenta jñuhun un quívi coo juicio. ³⁷ Chi jíin jñuhun ni cahān rō sándaā yā siquī rō, núu jeē quéndōo ndaā rō chí jéé cóndee cuéchi siquī rō. Achí yá.

Jeē ní cajicān ñayuu tu cácaandíje ñn jniñu jéhnú
(Mr. 8.12; Lc. 11.29-32)

³⁸ Yūcuán na te jecu tēe grupo fariseo jíin tēe cástéén tutu ley Yaā Dios, ni cacahān de jíin yá:

Maestro, cácu ni na jéé sáha ní ñn jniñu jéhnú jeē steén núu máá ní cúu Yaā ní tají Yaā Dios, achí de.

³⁹ Te ni cahān yā jíin de:

Ñayuu yáha jeē casáha jniñu néé, tu cájetáhu cuiti i Yaā Dios. Te cájicān i ñn jniñu jéhu jeē steén núu Yaā ní tají Yaā Dios cúu ri. Te tuá na inga jniñu jéhu steén rī nuū i, chi máa-ni jniñu jéhu nájñuhun ni cuu jíin Jonás, tēe ni nacani jñuhun Yaā Dios. ⁴⁰ Chi nájñuhun ni ine Jonás chíji chācá cáhnu unī nduú unī ñuú, suni súcuan ruhū, Yaā ní nduu tēe, cuu rī te cone ri chíji ñuhun unī nduú unī ñuú, te sáá te natecu rī. ⁴¹ Te tāca ñáyuu ñuu Nínive nuū ní nacani Jonás jñuhun, natecu i jíin ñáyuu tiempo yáha, quivī juicio jeē sándaā yā cuēchi, te cahān i cuēchi siquī ñáyuu yáha. Chi máa i ni canacani ni i ni castóo i cuēchi i quivī ní nacani Jonás jñuhun nuū i. Te vijna chi cújéhu ga ruhū Yaā íne yāhá vēsú Jonás, te tu cácdíje ró rúhū. ⁴² Te reina jeē ní cújéhu nación ichi sur, natecu ña jíin ñáyuu tiempo yáha, quivī juicio jeē sándaā yā cuēchi, te cahān ña cuēchi siquī i. Chi nde jicá téyí ní quiji ña ni jini nahín ña jñuhun ndíchí ní cahān rey Salomón. Te vijna chi cújéhu ga ruhū, Yaā íne yāhá vēsú Salomón, te tu cácdíje ró rúhū.

Tachī jeē nastútú jnāhan ndívi ini ñayuu
(Lc. 11.24-26)

⁴³ Núu ni quenda ñn tachī ini ñn tēe tu cácdíje, te jíca cuu nuū ñuhun téhé, ndúcú núu ndétátú, te tu níhín, yūcuán na te jéni ni maá: ⁴⁴ Na quínuhun rī vehe nuū ní quenda ri. Te núu ni ndee tucu, te jíto jeē tēe tu cácdíje ún, cúu de nájñuhun ñn vehe íyú te ni ndundoo. ⁴⁵ Yūcuán na te jéquihin uxā gā tachī neé gá vēsú maá. Te quívicoo ini tēe un jéē cóyūcu yúcuán. Núu súcuan te xeēn gā ndoho tēe un jéē sándíhí vēsú jeē xíhna ñuhún. Te suni súcuan ndoho ñayuu tiempo yáha jeē casáha néé. Achí yá.

Náná yā jíin ñani yā
(Mr. 3.31-35; Lc. 8.19-21)

⁴⁶ Te níni súcuan cáhán yā jíin ñáyuu ún, te ni quee naná yā jíin táca ñani yā, íin ña nuū quéhe, te cúní ña cahān ña jíin yá. ⁴⁷ Te ni cachi ñn tēe nuū yā:

Náná ni jíin táca ñani ni cáhín nuū quéhe, te cácdíje cahān jíin ní, achí de.

⁴⁸ Te ni cahān yā jíin tēe ni cahān súcuan jíin yá:

¿Ndé ñn cúu náná rī, te ndé ñn cácuu ñani rī? Achí yá.

⁴⁹ Te ni steén ndaha yá nde nuū cáyūcu tēe cácuáha jíin yá. Te ni cahān yā:

Suni náná rī jíin ñani rī cácuu tāca jéē yáha. ⁵⁰ Chi tāca ñáyuu casquícu jniñu cúní maá Tátá rī, Yaā ndeé andíví, suu cácuu ñani rī, cuāha ri, náná rī. Achí yá.

Jñuhun yátá síquī tēe jéte trigo
(Mr. 4.1-9; Lc. 8.4-8)

13

¹ Te quivī un ní quenda Jesús vehe cuahān yā, te ni jinū yā ni cucōo ya yumar. ² Te ni cutútú cuéhē ndasí ñayuu nuū yā. Te ni quivī ya ini ñn barco, ni cucōo ya. Te tāca ñáyuu un cáyūcu i yumar. ³ Te jíin jñuhun yátá ni cahān yā cuehē jñuhun nuū i, te súcuan ni cahān yā:

Ñn tēe cate trigo, ni quenda de jeē cáte de. ⁴ Te ná ni quejéé de jéte de, te jecu trigo ni jité yuhíchi. Te ni quecoo saa, ni cayejí tē. ⁵ Te jecu gā trigo ni jité nuū ñuhun yuū, nuū tú cuehē ñuhun. Te yachī-ni ni cane, chi tu cóquin ñuhun. ⁶ Te nuū ní cane niāndii, te ni ichī-ni, te ni casun, chi tu ní níhín nuū quihín yoho. ⁷ Te jecu gā trigo ni jité nuū náne íñu. Te ni jehnu íñu ún, te ni jesí nuū. ⁸ Te jecu ni jité nuū ñuhun váha, te ni jēhe cuehē nuní. Sava ni jēhe ciento jeē ñn ñn, te sava ni jēhe unī xico, te sava ga ni jēhe ocō uxí. ⁹ Tāca róhó jéē jíni sōho, na chúsóhó ró. Achí yá.

Najehē cahán yā máni jñuhun yátá
(Mr. 4.10-12; Lc. 8.9-10)

¹⁰ Yūcuán na te tēe cácuáha jíin yá un ní quecoo de nde nuū yā, te ni cacajnūhún de ya:

¿Najehē cúu jeē máni jñuhun yátá cáhán ni jíin ñáyuu? achí de.

¹¹ Te ni cahān yā jíin de:

Róhó jíjnáhan ró chi sáha ya jeē cájecūhun ni rō jnūhun ni yisāhi yáha, ndese quívicoo ñayuu ndaha Yaā andiví jeē ndacu ya jniñu nuū i. Te ñayuu yáha jéē tu cácandíje, chi ma jécūhun ni i. ¹² Chi ñayuu je jécūhun ni, chi stéén gā yā nuū i, te víhyá gā cuni i. Te ñayuu tu cándíje, sa suhva naa jecu jeē je jíni i ún. ¹³ Jeē yúcuán cáhán rī jnūhun yátá jíni i. Chi vésú cájito i, te quendōo i nájnūhun jeē tú na vé ni cájito i. Te vésú cájini sōho i, te ma jécūhun ni i, te quendōo i nájnūhun jeē tú na vé ni cájini i. ¹⁴ Ñayuu yāhá chi squícu síquī i jnūhun ni cahān Yaā Dios jeē ní nacani Isafas, tēe ni nacani jnūhun nde jenahán:

Vésú cuni nahín ró, te ma jécūhun ni rō,
te vésú coto ró, te ma nácuni rō.

¹⁵ Chi ñayuu yáha yōhyo ni ndunihni ni i,
te yōhyo uhū chusóhó i,
te nájnūhun cájesi i tinūú i,
návāha coo nájnūhun jeē tu cájito i,
ni tu cájini nahín i,
te ni ma jécūhun ni i,
ni ma násāma ini i quívicoo i nuū rī
jeē nasávāha ri anuá i nuū cuéchi i.

Achí Yaā Dios, achí tutu.

¹⁶ Te máá ró jíjnáhan ró, yōhyo ndetū rō, chi cájito ró jíni tñūu ró, te cájini nahín ró jíni sōho ró. ¹⁷ Chi jendaá cahán rī jíni ró jeē cuehē tēe ni canacani jnūhun Yaā Dios jíni cuehē tēe ndaā, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

Jeē ní castūhun cájī yá jnūhun yátá tēe jéte trigo

(Mr. 4.13-20; Lc. 8.11-15)

¹⁸ Núu súcuan te cuni nahín jíjnáhan ró na vé cuní cahān jnūhun yátá tēe jéte trigo: Trigo un cúu jnūhun Yaā Dios. ¹⁹ Te ñayuu cájini sōho jnūhun ndese ndácu Yaā andiví jniñu, núu tu cájecūhun ni i te cácuu i nájnūhun trigo jeē ni jítē yuhíchi. Yūcuán na te quíji jexeén te quénde-ni jnūhun ini anuá i. ²⁰ Te trigo jeē ni jítē nuū ñúhun yuū cúu nájnūhun ñayuu cájini sōho jnūhun, te yachī-ni cájetáhú i te cácusī ni i jíni. ²¹ Te tu cúcutú jnūhun ún ini anuá i, te jecu-ni quivī cájetáhú i. Te núu ni quejéé jnúndóho, chí jító xeēn ñayuu i síquī jnúhun ún, te quejéé nácuni yátá ni i. ²² Te jeē ni jítē nuū náne iñu cúu ñayuu cájini nahín jnúhun, te cándihvī ni i síquī jeē iyó ini ñayiví yáha, te cúní i cucúca i, te stáhú un i cujnēñu i jíni. Te ndihī jeē yáha jési nuū jnúhun ya, te tu íje i jíni jnúhun ya. ²³ Te trigo jeē ni jítē nuū ñúhun váha cúu nájnūhun ñayuu cájini nahín jnúhun, te cájecūhun ni i, te cáhije i jíni jnúhun ya. Te sava i cúu nájnūhun nuní jeē jéhe ciento jeē ñin ñin, te sava ga i jéhe unī xico, te sava ga i jéhe ocō uxī. Achí yá.

Jnūhun yátá síquī ite lasú

²⁴ Te ni cahān yā inga jnūhun yátá jíni de:

Jeē ndácu Yaā andiví jniñu cúu nájnūhun ñin tēe jeē ní jete de trigo váha nuū ñúhun de. ²⁵ Te íyó ñin tēe jító uhū de tēe chíi trigo. Te náa cáquixī tēe chíi trigo jíni táca jnáhan de, te ni jehēn ni jete ndiquin lású nuū trigo de, te cuahān. ²⁶ Te nuū ní cane trigo ún, te ni cane yoco i, te suni súcuan ni jehnu ite lasú un. ²⁷ Yūcuán na te ni jengoo mozo ni cacahān i jíni patrón i: ¿A násūu trigo váha ní jéte ní núu ñúhun ní? ¿Te ndese cúu jeē ní canecoo ite lasú nuū? ²⁸ Te ni cahān de jíni i: ñin tēe jító uhū ruhū ni sáha jeē yáha. Te ni cacahān mozo un jíni de: ¿Núu súcuan te á cúní ni jéē na quíngoo ná te jnūhun ná? áchí i. ²⁹ Te ni cahān de: Tuú, chi núu jnūhun ró lású un te sanaa te jnūhun ró ndé jíni trigo. ³⁰ Váha ga na cuéhnu máá ndé quivī tahndé. Te quivī un cahān rī jíni tēe cahnde jeē xihna gā ite lasú cahnde de, te chucú tútú de návāha cahmu yó. Yūcuán na te trigo chi cahnde de ndiví ini yacā rī, achí de. Achí yá.

Jnūhun yátá síquī ndiquin mostaza

(Mr. 4.30-32; Lc. 13.18-19)

³¹ Te suni ni cahān yā inga jnūhun yátá jéē steén yā ndese ndúcuehē ñayuu ndácu Yaā andiví jniñu nuū:

Ndúcuehē i nájñūhun jéñu ñin ndiquin mostaza jeē ní jequin ñin tēe nuū ñúñun de. ³² Te jendaá jeē ñin ndiquin lúli gá cúu vésú taca gá ndiquin. Te núu ni jehnu, te cúu cáñnu ga vésú taca gá yucū, chi ndúu nájñūhun ñin yujnu. Te quíjicoo saa, te cásáha tí tacā tí chíji ndaha ún. Achí yá.

*Jñūhun yátá síquī levadura
(Lc. 13.20-21)*

³³ Te inga jnūhun yátá ní cahān yā jíin de:
Jeē ndácu Yaā andiví jniñu nuū ñayuu cúu nájñūhun levadura jeē ní quihin ñin ñahan. Te ni saca ña jíin úní kilo harina, nde ni ndaa ndíhi ñujen ni sáha. Achí yá.

*Jeē máni jñūhun yátá cáhán yā jíin i
(Mr. 4.33-34)*

³⁴ Taca jnúñun yáha ní cahān Jesús jíin ñáyuu cuehē ún. Te taca jéē ni steén yā, máni jñūhun yátá ní cahān yā jíin i. ³⁵ Súcuán ni sáha ya návāha squícu jñūhun ni cahān tēe ni nacani jñūhun Yaā Dios nde jenahán:
Cahān rí taca jnúñun yátá jíin ñáyuu,
te cachi rí taca jnúñun yísáhi ndé quiví ní jecōo ñayiví.
Achí tutu, áchí yá.

Jeē ní castūhun cáji yá jñūhun ite lasú

³⁶ Yūcuán na te ni nacuatáhu Jesús nuū ñáyuu. Te ni ndiví ya ini vehe. Te tēe cáscuáha un ní jinūcoo de nuū yā, te ni cacahān de jíin yá:

Nacani cáji ní jñūhun yátá ite lasú nuū ná, áchí de.

³⁷ Te ni cahān yā jíin de:

Jeē jéte trigo vāha un cúu máá rí, Yaā ní nduu tēe. ³⁸ Te ñuhun un cúu ñayiví. Te trigo vāha un cúu ñayuu cáyihí ndaha Yaā Dios jeē ndácu ya jniñu nuū i. Te ite lasú un cúu ñayuu cáyihí ndaha jexeén. ³⁹ Te tēe jíto uhū jeē ní jete lasú un cúu máá jéxeén. Te quiví tahndé cúu quiví jínu ñayiví. Te tēe cahnde un cácuu ndajéhé Yaā Dios. ⁴⁰ Te nájñūhun tahndé ite lasú te cayū nuū ñuhún, súcuán coo quiví jínu ñayiví. ⁴¹ Chi máá rí, Yaā ní nduu tēe, tají rí ndajéhé rí quingoo. Te nastútú yá taca ñáyuu casquíví jñáhan nuū cuéchi, jíin ñáyuu casáha jniñu néé, quenehen ya i mēñū ñáyuu ndácu rí jniñu nuū. ⁴² Te jnaa ya i cayū i nuū ñuhún. Te yūcuán ndáhyū i te nacayihí yuhu i jeē ndoho xeén i. ⁴³ Yūcuán na te ñayuu squícu nuū yā chí ndindéé i nájñūhun niāndii, te coyūcú i nuū ndácu máá Tátá i jniñu. Taca róhó jéē jíni sōho, na chúsóhó ró.

Jñūhun yátá síquī yejnū xūhún jeē yísáhi

⁴⁴ Te jeē ndácu Yaā andiví jniñu nuū ñáyuu, suni cúu nájñūhun ñin yejnū xūhún jeē yísáhi chíji ñin ñuhun. Te ni nanihín ñin tēe, te ni nacasi tucu de síquī. Te jeē cúsi ní de jíin, te ni jehēn de ni xícó ndíhi de jeē névāha de, te ni jeen de ñuhun ún.

Jñūhun yátá síquī perla jeē ndeé yahu

⁴⁵ Te jeē ndácu Yaā andiví jniñu nuū ñáyuu, suni cúu nájñūhun ñin tēe jéen xíco, te ndúcú de perla váha. ⁴⁶ Te ni jini de ñin perla jeē yáhu ndasí, te ni jehēn de ni xícó ndíhi de jeē névāha de, te ni jeen de perla un.

Jñūhun yátá síquī ñunu jñí chācá

⁴⁷ Te jeē ndácu Yaā andiví jniñu nuū ñáyuu, suni cúu nájñūhun ñin ñunu jeē cásingava de ini mar, te quívicoo ndinuū chācá. ⁴⁸ Te núu ni chítú ñunu ún, te cánatava de yundúte. Te cácucoo de cánacáji de chācá. Te chācá váha cájnaa de ini jíca, te chācá tú vāha cáscáne de. ⁴⁹ Te suni súcuán coo quiví jínu ñayiví. Chi quíjicoo ndajéhé yā, te sásín ya ñayuu casáha jniñu néé méñū ñáyuu casáha jniñu váha. ⁵⁰ Te ñayuu cunéé chí jnaa ya i cayū i nuū ñuhún. Te yūcuán ndáhyū i te nacayihí yuhu i jeē ndoho xeén i. Achí yá.

Jnūhun yátá síquī ndajníñu ndéé yahu

⁵¹ Te ni cajnūhun yá de jíjnáhan de:

¿A ní cajecūhun ni rō tāca jnúhun yáha, chí tuú? áchí yá.

Te ni cacahān de jíin yá:

Ni cajecūhun ni ná, áchí de.

⁵² Te ni cahān yā jíin de:

Iyó váha núu súcuan. Te ñin tēe stéén tutu ley Yaā Dios, núu je ni cutūhva de ndese ndácu Yaā andiví jniñu, te cuu stéén de tāca jnúhun síquī ún. Chi cúu de nájnūhun ñin tēe chí vehe. Te ini yejnū de táva de ndajníñu ndéé yahu, sava jeē jeē jíin sava jeē je ni cunahán iyó. Achí yá.

Jeē cuánuhun yā ñuu Nazaret

(Mr. 6.1-6; Lc. 4.16-30)

⁵³ Te ná ni ndíhi ni cahān Jesús tāca jnúhun yátá yáha, te ni quenda ya yūcuan cuáhān yā. ⁵⁴ Te ni najinū yā ñuu yā Nazaret. Te ni steén yā jnūhun ini vehe ñi sinagoga yūcuán. Te ni canaa ni ñayuu cájini nahín i, te ni cacahān i:

¿Ndé nuū ní cutūhva tēe yáha tāca jnúhun ndíhí? ¿Te ndese cúu sáha de tācá jniñu jéñu yāhá? ⁵⁵ Chi sēhe carpintero cúu tēe yáha, te náná de cúu María, te ñani de cácuu Jacobo, José, Simón, jíin Judas. ⁵⁶ Te suni cáyūcu cuáha de jíin yó yāhá. ¿Te ndese jíin de tāca jnúhun yáha núu súcuan? Achí ñayuu.

⁵⁷ Te súcuan ni cacujéē ni i nuū Jesús. Te ni cahān yā jíin i:

Tāca tēe nácani jnūhun Yaā Dios, iyó yíñúhún ñayuu jíin de, te máni ñayuu ñuu maá de jíin ñayuu vehe máá de cúu jeē tu iyó yíñúhún jíin de. Achí yá.

⁵⁸ Te tu ní sáha ya cuehē jniñu jéñu yūcuán, chi tu cácadíje i ya.

Jeē ni jíhí Juan tēe scuándute

(Mr. 6.14-29; Lc. 9.7-9)

14

¹ Te tiempo yúcuán te Herodes, tēe ndácu jniñu región Galilea, ni jini jnūhun de jnūhun Jesús. ² Te ni cahān de jíin ñayuu cáhíin jíin de:

Tēe yúcuán cúu Juan tēe ni scuándute, te ni natecu de. Jeē yúcuán iyó poder de sáha de jniñu jéñu. Achí de.

³ Chi Herodes, je ni ndacu de jniñu jeē na quíví Juan vecāa, jíin jéē na cónuhñi de jíin cadena. Súcuan ni sáha de jeē síquí Herodías, ñasihí ñani de Felipe. ⁴ Chi Juan ni cahān de nuū Herodes:

Tu iyó ley condeca ró ña, áchí de.

⁵ Te jeē yúcuán ní cuni Herodes cahni de Juan. Te yúhú de jeē quití ni ñayuu, chi ndíhi i jéni ndije ni i jeē ñin tēe nácani jnūhun Yaā Dios cúu Juan. ⁶ Te ñin quiví ni sáha Herodes ñin vico quiví ní cacu de. Te sēhe síhí Herodías ni quíví i ni jita jéhé i nuū ñayuu ní cana de ún. Te ni cusí ni Herodes ni sáha i. ⁷ Te ni jejnūhun téyí de jeē cuáha de núu na vé cacān i nuū de. ⁸ Te ni jehēn i ni cajnūhún i náná i na vé cacān i. Te ni ndívi i nuū Herodes, te ni cahān i:

Cuáha ní xíní Juan tēe scuándute, cone nuū ñin cohō, achí i.

⁹ Yūcuán na te rey Herodes ni cucuíhyá ni de. Te síquí jeē ni jéjnūhun téyí de, jíin jéē ní cajini sōho tēe cáyeji staā jíin de, jeē yúcuán ní ndacu de jniñu jeē na cuáha nuū i. ¹⁰ Te ni tají de soldado jeē na quícahnde xíní Juan ini vecāa. ¹¹ Te ni quee soldado un jíin xíní Juan, íne nuū ñin cohō, te ni jēhe nuū súchi síhí un. Te máá i ni jendeca i nuū naná i.

¹² Yūcuán na te ni jengoo tēe cáscuáha jíin Juan, te ni candonehen de yíqui cúñu Juan, te ni cachindūji de. Yūcuán na te ni jengoo de ni cacastūhún de nuū Jesús.

Jeē ni scáji yā uhūn mil tēe

(Mr. 6.30-44; Lc. 9.10-17; Jn. 6.1-14)

¹³ Te ná ni jini Jesús jnūhun, te ni cujiyo ya yūcuan cuáhān yā jín barco, jeē cóne sñn ya ñn lugar nuū tú ñayuu. Te ni cajini ñayuu jeē cuahán yā. Te tācá ñuu ni quendacoo i cájica jéhe i, cuajnahān i ya. ¹⁴ Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, te ni nasávāha ya tāca ñáyuu cácuñū jeē véjicoo i jín. ¹⁵ Te nuū ní ini, te tēe cáscuáha jín yá, ni quecoo de nuū yā, te ni cacahān de:

Je ni ini, te yāhá chi tú na ñayuu yūcu. Núu súcuan te tají ní ñayuu na quíngoo i tācá ñuu, te cuaan i jeē cáji i.

¹⁶ Te ni cahān Jesús jín de:

Tu jíní ñúhún quíngoo i, chi cuāha máá ró jeē cáji i, áchí yá.

¹⁷ Te ni cacahān de jín yá:

Tú na vé cánevāha ná yāha, chi uhūn-ni staā jín úū-ni chācá, áchí de.

¹⁸ Te ni cahān yā jín de:

Cuāha na quíji, áchí yá.

¹⁹ Te ni cahān yā jín ñáyuu un jéē na cúcōo i nuū íte. Te ni quíhin ya ndihúhún staā jín úū chācá un. Te ni ndacoto ya ichi ándiví, te ni nacuatáhú yá. Te ni tahu cuechí yá staā ún, te ni jēhe ya nuū tēe cáscuáha jín yá. Te máá de ni casaja de nuū ñáyuu cuehē ún. ²⁰ Te ndivii i ni cayeji, te ni candutú chíji i. Te ni canastútú de pedazo jeē ní quendōo, te ni chítú úxí uū jīca. ²¹ Te tēe ni cayeji un cúu nájñūhun uhūn mil, te sñn ga cúu ñahan jín súchi lúlí.

Jeē ní jīca jéhe yá nuū mar

(Mr. 6.45-52; Jn. 6.16-21)

²² Yūcuán na te ni cahān-ni Jesús jín tēe cáscuáha jín yá jeē na quívicoo de barco, te cosnū de quíngoo de nde inga lado mar, níní jéē nátaji yá ñayuu un quínungoo i. ²³ Te nuū ní cuu ni nacuatáhú yá nuū i, te máñúhún-ni ya ni caa ya yucu, cuacacān tahu yā. Te ni cuaa, te íne máñúhún yá yūcuán. ²⁴ Te barco un, je ni cuu sava nuū mar cuahān. Te ndute mar un nátundahá níhin barco, chi vēji tachí ichi núú de. ²⁵ Te jeē yínee gā ni quee Jesús nuū de, jīca jéhe yá nuū mar. ²⁶ Te tēe cáscuáha ún, ni cajito de ya jeē jīca ya nuū mar. Te ni candondava de, te ni cacana cóhó de jeē cáyūhú de.

Jíhná cúu, áchí de.

²⁷ Te ni cahān-ni Jesús jín de:

Ndeyí coo ni rō, te ma yūhu ró, chi máá rí cúu, áchí yá.

²⁸ Yūcuán na te ni cahān Pedro jín yá:

Núu máá ní cúu, te cahān ni jín ná jéē na cáca jéhe ná nuū mar te jeē na núú ní, áchí de.

²⁹ Te ni cahān yā:

Nehen núu súcuan, áchí yá.

Te ni quenda Pedro ini barco, te ni jīca de nuū ndute cuahān de nuū Jesús. ³⁰ Te nuū ní jini de jeē níhin yíhi tachí, te ni yūhú de. Te ni quejéé de quée de chíji ndute. Te ni cana cóhó de:

Jnama ní sáña, áchí de.

³¹ Te Jesús ni jñi-ni ya ndaha de. Te ni cahān yā jín de:

Tēe tu cándíje níhin cúu ró. ¿Naun ni nayūhu ró? Achí yá.

³² Te ni quívi ya ini barco un jín de, te ni jecuiñi-ni tachí. ³³ Yūcuán na te tēe cáhiin ini barco un, ni cajecuiñi yítí de nuū yā. Te ni cacahān de:

Jendaá ndije jeē Sēhe Yaā Dios cúu ní, áchí de.

Jeē ní nasávāha ya ñayuu cácuñū región Genesaret

(Mr. 6.53-56)

³⁴ Te ni quenda jíyo ya jín de nuū mar un, ní jinū yā región Genesaret. ³⁵ Te ñayuu yūcuan ní canacuni i ya. Te ni cascáca i jnūhun tācá ndañúu yūcuan jéē ni jínū yā. Te ñayuu ni caquindeca i ñayuu cácuñū nuū yā. ³⁶ Te ni cacahān ndahú i jín yá jeē na quéhé i vēsú yusáhma ya. Te tāca ñáyuu jeē ní caquehé sahma ya, ni canduvāha i.

Siquī ndese cújnehén ñáyuu
(Mr. 7.1-23)

15

¹ Yūcuán na te jecu tē grupo fariseo jíin tēe cástéén tutu ley Yaā Dios, ni quendacoo de ñuu Jerusalén, te ni quecoo de nuū yā. Te ni cacahān de jíin yá:

² Tēe cáscuáha jíin ró, ¿naun cástívi de costumbre jeē ní cajequin ñayuu jenahán? Chi tu ní cáscuicu de costumbre jeē nándahá de nuū yā te caji de staā. Achí de.

³ Te Jesús ni cajñuhun yá de:

Te máá ró jíinahan ró, ¿suni naun cástívi ró jniñu ní ndacu Yaā Dios nuū rō? Chi sa costumbre máá ró cúu jeē casquícu ró. ⁴ Chi ni cahān Yaā Dios: Coó yíñúhún ró jíin tátá rō jíin náná rō. Te núu ndé ñin cahān siquī tátá chí síquī naná, na cúu nahín, áchí Yaā Dios. ⁵ Te máá ró chi cácahān rō jeē cuu cahān ñin tēe jíin tátá de jíin náná de: Ma cúu chindéé ñáhán ná níhín cuáha na jéé caji ni jéé cūhun ní, chi ndíhi jeē névāha ná, je ni socō na núu Yaā Dios. ⁶ Te tēe cahān súcuan, tuá cánuu chindéé ñáhán de tátá de náná de, áchí ró jíinahan ró. Te súcuan cástívi ró jniñu ní ndacu Yaā Dios, jeē siquí costumbre ni cajequin máá ró. ⁷ Tēe stáhú-ni cácuu ró. Ndaā ni nacani Isaías jñuhun siquī rō nde jenahán, yósó núu tútu ñi jeē ni cáhān Yaā Dios:

⁸ Ñayuu yáha chi máá yuhu-ni i cájetáhú i ruhū,
te nasūu ndé jíin ini jíin ánuá i.

⁹ Te cáchiñúhún sáa-ni i ruhū,
chi jñuhun cástéén i cúu jniñu ní candacu tēe,
te nasūu jéé ní ndacu máá rí cúu.

Achí Yaā Dios. Achí yá.

¹⁰ Te ni cana ya ñayuu cuehē ún, te ni cahān yā jíin i:

Cuni sōho vāha jíinahan ró, te chuhun ni rō: ¹¹ Nasūu jéé quívi ini yuhu ñayuu cújnehén i sáha. Chi jñuhun jeē quénda yuhu i, yūcuan cúu jeē cújnehén i sáha, áchí yá.

¹² Yūcuán na te tēe cáscuáha jíin yá, ni quecoo de nuū yā, te ni cacahān de:

¿A jíiní ni jéé ní caquítī ni tēe fariseo jeē ní cajini sōho de jñuhun ni cahān ní? áchí de.

¹³ Te ni cahān máá yá:

Cácuu de nájnūhun yujnu jeē tu ní náchuhun Tátá rī, Yaā ndeé andíví, te ñin quiví te jñuhun ya quihín. ¹⁴ Na quíngoo máá de. Chi cácuu de nájnūhun tēe cuáá cástéén ichi nuū ñnga tēe cuáá. Chi núu ñin tēe cuáá stéén de ichi nuū ñnga tēe cuáá, te ndíndúú de ñinga de xehvā. Achí yá.

¹⁵ Te ni cahān Pedro jíin yá:

Castūhun cájí ní jñuhun yátá yáha nuū na jíinahan ná, áchí de.

¹⁶ Te ni cahān Jesús:

¿Te á suni máá ró ná tu jecūhun ni rō chí naún? ¹⁷ ¿A tu cájecūhun ni rō jeē tāca jéé yéji ñayuu, chi quívi chíji i, te quénda-ni cuahān? ¹⁸ Te jñuhun jeē quénda yuhu ñayuu, chi nde ini anuá i vēji, te yūcuan cúu jeē cújnehén i sáha. ¹⁹ Chi nde ini anuá ñayuu quénda jeē jení néé ni, jeē jéhni ndíyi, jeē casíquí ndéé jnahan, jeē jíca jnéni, jeē sacuíhna, jeē cahán jñuhun stáhú, jeē cahán yāa síquī jnahan. ²⁰ Tāca jéé yáha cúu jeē cújnehén ñayuu sáha. Te núu tu squícu i costumbre jeē nándahá i te caji i staā, tu cúnéhén i sáha. Achí yá.

Ñahan ñnga nación jeē ní candíje ñihin
(Mr. 7.24-30)

²¹ Te ni quenda Jesús yūcuan cuáhān yā región Tiro jíin Sidón. ²² Te ñin ñahan ñuu Canaán, néne ña región Tiro jíin Sidón, te ni quee ña nuū Jesús. Te ni cana jee ña:

Tátā, Sēhe yucūn David, cundáhú ni ni sáña víi. Chi sēhe síhí ná, ñuhun tachí ini i, te yōhyo xeēn ndóho i, áchí ña jíin yá.

²³ Te tu ní cáhán cuíti yā jeē ni cáhān ña. Yūcuán na te ni quecoo tēe cáscuáha jíin yá, te ni cacahān de:

Cahān ni jíin ña na quíhín ña, chi cána jee ña vēji ña yatā yō, achí de.

²⁴ Te ni cahān yā jíin ña:

Nuū maá-ni ñayuu nación Israel ni tají Yaā Dios sãña véji ná, chi cácuu i nájnūhun lanchi, quíti ní sana.

²⁵ Te ñahan ún chi ni quee ña, te ni jecuíñī yītí ña nuū yā, te ni cahān ña:

Tátā, chindéé ñáhán ní sãña víi, achí ña.

²⁶ Te ni cahān yatá yá jíin ña:

Tu íyó váha jeē quénde yō staā sēhe, te cuāha yó núū ína, achí yá.

²⁷ Te ni cahān ña:

Jendaá cahán ni Tátā, te chindéé ñáhán ní sãña vēsú cúu ná nájnūhun ina. Chi suni máá tí cánihín nahín tí pedazo staā cuechí jēe cóyo chíji mesa jitoho tī cáyeji tī, achí ña jíin yá.

²⁸ Yūcuán na te ni cahān Jesús:

Yōhō váha jeē cándíje nihín ní súcuan, nánā. Te na sáha ná jēe cuní ni, achí yá.

Te máá hora un ní nduvāha-ni sēhe síhí ña.

Jeē ní nasávāha ya cuehē ñayuu cácuhū

²⁹ Te ni quenda Jesús cuahān yā yūcuán, te ni yāha ya yumar Galilea. Te ni caa ya ñin yucu, te yūcuan ní cucōo ya. ³⁰ Te cuehē ñayuu ni quecoo i nuū yā, te cándeca i tāca jēe cájica chácuá, jeē cuaá, jeē ñihín, jeē cacúhndú, jíin cuehē gā ñayuu cácuhū. Te ni cajequin i nuū jehé Jesús. Te ni nasávāha ya i jíjnáhan i. ³¹ Te ni canaa ni ñayuu un cájito i jeē nácahān ñayuu ñihín, ndúvāha ñayuu cuhndú, nácaca váha ñayuu chacuá, nánune tinūu ñayuu cuaá. Te ni cacahān i jeē yóhō váha Yaā cúu Yaā Dios ñuu i Israel.

Jeē ni scáji yā cuūn mil tēe

(Mr. 8.1-10)

³² Yūcuán na te ni cana Jesús tēe cáscuáha jíin yá, te ni cahān yā jíin de:

Cúndáhú ni rī ñayuu cuehē yāhá, chi je ni cuu unī quivī cáyūcú i jíin rí, te tuá na vé caji i. Te tu cuní rī natají rí i nuhun ndite i, chi núu súcuan te sava ichi te cuíta íi i. Achí yá.

³³ Te ni cacahān tēe cáscuáha jíin yá:

¿Te ndé nuū nihín yō staā caji ñayuu cuehē yāhá? Chi yāhá tú na ñayuu yúcu, achí de.

³⁴ Te ni cajnūhun yá de:

¿Nasaa staā cánevāha ró?

Te ni cacahān de:

Uxā-ni, jíin jecu chācá lúlí, achí de.

³⁵ Yūcuán na te ni cahān yā jíin ñayuu cuehē un jēe na cúcōo i. ³⁶ Te ni quihin ya ndihúxá staā jíin cháca ún, te ni nacuatáhú yá nuū Yaā Dios. Te ni tahu cuéchí yá, te ni jēhe ya nuū tēe cáscuáha jíin yá, te máá de ni casaja nuū ñayuu. ³⁷ Te ndihí i ni cayeji, te ni candutú chíji i. Yūcuán na te ni canastútú de pedazo jeē ní quendōo, te ni chitú úxā jīca. ³⁸ Te tēe ni cayeji ún, nde cuūn mil de cúu, te sín ga cúu ñahan jíin súchi lúlí.

³⁹ Yūcuán na te ni nacuatáhú yá nuū ñayuu ún, te cuanungoo i. Te ni ndīvi ya ini barco, te cuahān yā región Magdala.

Jeē cájicān de ñin jniñu jéhnū nuū yā

(Mr. 8.11-13; Lc. 12.54-56)

16

¹ Te ni quecoo tēe grupo fariseo jíin tēe grupo saduceo nuū yā. Chi cácuu de coto ndee de ya, te ni cajicān de jeē na sáha ya ñin jniñu jéhnū jeē coo ñin seña ichi ándiví. ² Te máá yá ni cahān yā jíin de:

Núu ni ini, te cacahān rō: Nandii, chi ni nasácuéhé i ándiví, achí ró. ³ Te jenéhen chi cacahān rō: Vijna te cuun saū, chi ni nasácuéhé i ándiví, achí ró. Tēe stáhú-ni cácuu ró.

Chi cájecūhun ni rō ndese stéén seña andiví, te tu cájecūhun ni rō ndese stéén tācá jniñu jéhnū sáha ri tiempo yáha. ⁴ Ñayuu yáha jeē casáha jniñu néé, tu cájetáhu cuiti i Yaā Dios. Te cájicān i jeē sáha ri ñin jniñu jéhnū jeē coo ñin seña andiví. Te tuá na inga jniñu jéhnū stéén rī nuū i, chi máá-ni jniñu jéhnū nájnūhun ni cuu jíin Jonás, tēe ni nacani jnūhun Yaā Dios nde jenahán. Achí yá.

Te ni stóo ya de jíinahan de, te cuahān yā.

Jnūhun levadura tēe fariseo

(Mr. 8.14-21)

⁵ Te tēe cáscuáha jíin yá ni canaa ni de condiso de staā náa cuango de jíin barco inga lado mar. ⁶ Te ni cahān Jesús jíin de:

Coto má candíje ró levadura tēe grupo fariseo jíin tēe grupo saduceo, achí yá.

⁷ Te tēe cáscuáha un ní cacahān maá de:

Va siquī jeē tú na staā ndíso yó, jeē yúcuan cáhān yā súcuan, áchí de.

⁸ Te ni jini Jesús, te ni cahān yā:

¿Najehē cácahān rō jeē ni cáhān rī súcuan siquī jeē tú na staā cándiso ró? Tēe tu cándíje ñihin cácuu ró. ⁹ ¿A ná tu jecūhun ni rō jeē tu ní cáhān rī súcuan siquī jeē tu ndíso ró stáa? ¿A tu cánucūhun ni rō jeē ní tahu cuéchí rí uhūn staā ni cayeji uhūn mil tēe, te nasaa jīca ni canastútú ró jeē ni quéndō? ¹⁰ ¿Te á tu cánucūhun ni rō jeē ní tahu cuéchí rí uxā staā ni cayeji cuūn mil tēe, te nasaa jīca ni canastútú tucu ró? ¹¹ ¿Te najehē tu cájecūhun ni rō jeē násūu síquī staā ni cahān rī jíin ró jeē ni cáhān rī jeē coto má candíje ró levadura tēe fariseo jíin tēe saduceo? Achí yá jíin de.

¹² Yūcuán na te ni cajecūhun ni de jeē tu ní cáhān yā jeē coto de jeē ma cáji de pan jeē yñhi levadura, chi sa suhva ni cahān yatá yá jeē ma cándíje de jnūhun stáhu cástéén tēe fariseo jíin tēe saduceo.

Jeē ni cáhān Pedro jeē Jesús cúu Cristo

(Mr. 8.27-30; Lc. 9.18-21)

¹³ Te nuū ni jíinū Jesús región Cesarea Filipo jíin tēe cáscuáha jíin yá, te ni cajnūhun yá de:

Ruhū, Yaā ní nduu tēe, ¿ndé ñin cúu ri cácahān ñayuu?

¹⁴ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahán. Te sava ga i cácahān jeē Jeremías chí inga tēe ni nacani jnūhun Yaā Dios cúu ní. Achí de.

¹⁵ Te ni cahān yā jíin de:

Te máá ró, ¿ndé ñin cúu ri cácahān rō? achí yá.

¹⁶ Te ni cahān Simón Pedro:

Máá ní cúu Cristo, Yaā ní tají Yaā Dios. Te cúu ní Sēhe Yaā Dios, Yaā técu ní cáni, áchí de.

¹⁷ Te ni cahān Jesús:

Yōhyo ndetū rō, Simón sēhe Jonás, chi nasūú ñin ñayuu ni steén jnūhun yáha nuū rō, chi sa suhva máá Tátá rī, Yaā ndeé andiví, ní steén yā nuū rō. ¹⁸ Te ruhū suni cáhān rī jíin ró jeē maá ró cúu Pedro, jeē cuní cahān: yuū. Te jnūhun ndaā jeē ni cáhān rō jeē maá rí cúu Cristo, suu cúu nájnūhun ñin yuū cáhnu. Te siquī yuū cáhnu yáha sáha ri jeē quítuu vehe, te vehe un cúu ñayuu cácañíje ruhū. Te tu ndé vé cundeyí cuiti siquī i, ni jnūhun xeēn jeē cájihí i, tuá na vé cúu sáha jíin ánuá i. ¹⁹ Te máá ró condiso jniñu ró sáha ró jēe quívicoo ñayuu ndaha Yaā andiví jeē ndacu ya jniñu nuū i. Te tāca jēe cási rō jeē ma sáha ñayuu ini ñayīvi yáha, suni casi jeē cáyūcú nde andiví. Te tāca jēe cuáha ró jnūhun sáha i ini ñayīvi yáha, suni jeē cáyūcú nde andiví cuáha jnūhun. Achí yá.

²⁰ Yūcuán na te ni ndacu ya jniñu nuū tēe cáscuáha jíin yá, jeē ma cáchi de nuū ní ñin ñayuu jeē cúu ya Cristo.

Jeē ní castūhún Jesús jeē cúū yā

(Mr. 8.31-9.1; Lc. 9.22-27)

²¹ Te nde saá ní quejéé Jesús cástūhun cájí yá nuū téé cáscuáha jíín yá jeē jíni ñúhún quihīn yā ñuu Jerusalén. Te tāca téé jéhnū jíín sūtū cácujuhūnū jíín téé cástéén tutu ley, stóho ndasí de ya. Te cahni de ya, te nuū uní quivī te natecu yā, achí yá. ²² Yūcuán na te Pedro, ni cana máñúhún de ya, te ni quejéé de cáhán de nuū yā:

¿Naun cáhán ni súcuan? Chi tu cúní Yaā Dios jeē cuu súcuan. Tu jíni ñúhún cuiti ndoho ní jnundóho yáha, áchí de.

²³ Te ni ndió cóto ya nuū Pedro, te ni cahān yā jíín de:

Cujiyo quihīn rō, chi cáhán rō ná cáhán Satanás. Chi tēe ndúcú stívī rúhū cúu ró. Te tu jéni ni rō nájnūhun jéni ni Yaā Dios, chi sa suhva jéni ni rō nájnūhun cájeni ni ñayuu. Achí yá.

²⁴ Yūcuán na te ni cahān yā jíín téé cáscuáha jíín yá:

Na-ni ñayuu núu cúní i condiquīn i ruhū, na cási i jeē cuní maá i, te na cóndiquīn i ruhū te cuāha i jnūhun ndoho i jnundóho jeē siquí rī, vēsú na cúū i. ²⁵ Chi núu ndé ñáyuu cuní i cācu i nuū jnundóho quiji nuū i jeē siquí ruhū, núu súcuan te jnahnū ndetū i ní cáni. Te núu ndé ñáyuu, vēsú na cúū i jeē siquí ruhū, te cotecu i ní cáni. ²⁶ ¿Chi ndé cuajniñū vēsú na cūndeyí ñáyuu nihīn i ní ñáyiví, te núu quivī i nuū jnahnū ndetū i? Chi tú na jíín cuiti chunaa ñayuu jeē cácu ánuá i. ²⁷ Chi ruhū, Yaā ní nduu tēe, ndiji ri jíín táca ndajéhé rī, te yōhyo luu cujéhnū ri nájnūhun cújéhnū Tátá rī. Yūcuán na te cuāha ri tahū nuū ñin ñin ñayuu núu ndese jniñū ni casáha i. ²⁸ Te jendaá cahán rī jíín ró jeē sava tēe cáhiin yáhá, ma cúū de chi nde cuni de jeē maá rí, Yaā ní nduu tēe, ndácu ri jniñū jíín poder rī.

Jeē tucu ni nduu ya

(Mr. 9.2-13; Lc. 9.28-36)

17

¹ Yūcuán na te nuū iñú quivī te Jesús ni jeca ya Pedro jíín Jacobo jíín Juan ñani Jacobo, cuahān sīn ya jíín de ñin yucu súcún. ² Te yūcuán, tucu ní nduu ya nuū de. Chi ni ndindēe núu yā nájnūhun niāndii. Te sahma ya ni nducuíjín quiyí ndasí, nájnūhun nduva luz. ³ Te ni cajito-ni de jeē Moisés jíín Elías, tēe ni cahīyo jenahán, cándajnūhún de jíín yá. ⁴ Te ni cahān Pedro jíín yá:

Nacā jeē váha jeē cáhiin ná yáha. Te núu cúní ni te na sáha ná únī vehe ramada, ñin cuu máá ní, inga cuu Moisés, te inga cuu Elías, achí de.

⁵ Te níni cáhán gā de, te ni quiji vicō nūhun jēe yaa ndasí, ni jesi-ni nuū de. Te nuū vicó un ní cahān ñin jnūhun:

Yáha cúu Sēhe ri jeē maní ndasí rí jíín, te cúsi ni rī jíín. Na cúní nahín ró jnūhun cáhán yā. Achí.

⁶ Te jeē súcuan ni cajini sōho tēe cáscuáha ún, te ni cajecava ndeyi de, chi yōhyo ni cayūhú de. ⁷ Yūcuán na te ni quee Jesús, te ni soó yá ndaha ya siquí de. Te ni cahān yā: Ndocuñī, te ma yūhu ró jijnáhan ró, áchí yá.

⁸ Te ni candacoto de, te tuá tēe un ní cájito de, chi máá ñin na Jesús.

⁹ Te ni cananuu de jíín yá yucu ún. Te ni ndacu ya jniñū nuū de:

Ma cáchi rō nuū ní ñin jeē súcuan ni cajito ró, chi nde na nátecu maá rí, Yaā ní nduu tēe, achí yá.

¹⁰ Yūcuán na te tēe cáscuáha jíín yá, ni cacajnūhún de ya:

Núu súcuan te tēe cástéén tutu ley Yaā Dios, ¿najehē cácahān de jeē cánuú ndiji Elías xīhna gā, te sáá te quiji Yaā cúu Cristo? achí de.

¹¹ Te ni cahān Jesús jíín de:

Jendaá cúu jeē xīhna gā quiji ñin tēe cuu nájnūhun Elías, te sátūhva de ndihī, áchí tutu.

¹² Te cáhán rī jíín ró jeē jé ni quiji tēe ni cuu nájnūhun Elías, te tu ní jíni ñayuu jeē suu de cúu. Te ni casáha ndevāha ñayuu jíín de ndihī jeē ní cacuu ni maá i. Te suni súcuan stóho i ruhū, Yaā ní nduu tēe. Achí yá.

¹³ Yūcuán na te tēe cáscuáha un, ní cajecūhun ni de jeē cahán yā jeē Juan tēe scuándute, ni cuu de nájñūhun Elías.

Jeē ní nasávāha ya ñin sūchi jíhí yīhí
(Mr. 9.14-29; Lc. 9.37-43)

¹⁴ Te ni najinū yā jíin de nuū ñáyuu cuehē ún. Te ni quee ñin tēe, ni jecuiñī yití de nuū yā, te ni cahān de:

¹⁵ Cundáhú ni ni séhe yí ná, chi yōhyo xeēn ndóho i cuehyī jíhí yīhí. Te je ni cuu cuehē jínu cótúú i nuū ñuhún jíin núu ndúte. ¹⁶ Te ni quindeca ná i nuū tēe cáscuáha jíin ní, te tu ní cúu sávāha de i, áchí de.

¹⁷ Te ni cahān Jesús:

Ñayuu yōhyo ñihni ni cácuu ró chi tu cácandíje ró jēē cuu nduvāha i. ¿Nasaa ga quivī condee rī jíin ró? ¿Te nasaa ga quivī cuandeyí ni rī jíin ró? Cuáquihin sūchí un na quíji i, áchí yá.

¹⁸ Te ni cahān yā nuū tachí, te ni quenda-ni ini sūchí un. Te ni nduvāha-ni i máa hora un.

¹⁹ Yūcuán na te tēe cáscuáha un, ní cacajnūhun sīn de ya:

¿Najehē tu ní cúu quenehen ná tachī un jíjnáhan ná? achí de.

²⁰ Te ni cahān yā:

Siquē jeē tu cácandíje ñihin ró jēē cuu sáha ró. Chi jendaá cahán rī jíin ró, jeē núu candíje ró vēsú ñin tíhí-ni, cūhva nájñūhun ñin ndiquin mostaza, te cuu sáha ró táca-ni jniñu yí. Chi cuu cahān rō jeē na cújiyo yucu yáha quihīn inga lado, te cujiyo-ni. Te tācá-ni jniñu chi cuu sáha ró, te núu candíje ñihin ró jēē cúu. ²¹ Te ñin tachī súcuan chi ma quénda cuiti quihīn, te núu tu cacān tahú rō te coo ndite ni rō. Achí yá.

Jeē ni cáhān tucu ya jeē cúu yā
(Mr. 9.30-32; Lc. 9.43-45)

²² Te jíca cuu Jesús jíin de jíjnáhan de región Galilea, te ni cahān yā jíin de:

Máa rí, Yaā ní nduu tēe, nastúu i ruhū nuū tāca tēe xeēn. ²³ Te cahni de ruhū, te nuū uní quivī te natecu rī, achí yá.

Te ni canducuíhyá ndasí ni de jeē ni cáhān yā jñūhun yáha.

Siquē xúhun cuajniñu ini templo

²⁴ Te ni jinū yā ñuu Capernaum jíin tēe cáscuáha jíin yá. Te tēe cástútú xúhun templo ni quecoo de, te ni cacajnūhún de Pedro:

Te maestro maá ró jíjnáhan ró, ¿á tú cuāha de xūhún cuajniñu ini templo, chí naún? áchí de.

²⁵ Te ni cahān Pedro:

Cuu, áchí de.

Te ná ni quivī de ini vehe, te xīhna gā Jesús ni cahān yā jíin de:

¿Ndese jéni ni rō, Simón? Tāca tēe cácuu rey ini ñayivī yáha, ¿ndé núu cájicān de xūhun renta jíin xúhun cuajniñu ñuu? ¿A núu séhe de chí núu ñáyuu sīn vehe? áchí yá.

²⁶ Te ni cahān Pedro:

Nuū ñáyuu sīn vehe, áchí de.

Te ni cahān Jesús:

Núu súcuan te tú na inga cujéhnu nuū séhe rey jeē cacān xūhún un núu i.

Súcuan ni cahān yā jeē cujéhnu ya cúu ya Sēhe Yaā Dios. Te ni cahān yā:

²⁷ Te na chúnaa yō, návāha tu squítí ni yō de. Núu súcuan te cuáhān ndé yumar, te scāne ró gancho jeē jñí chācá, te tava rō chācá jēē jñí xīhna gā. Te ndica rō yuhu tí, te yūcuan ñihīn rō ñin xūhun jēē cánda chunaa rō jeē cájicān de. Te quindēca ró núu de jeē cúu ruhū jíin rōhó. Achí yá.

Ndé ñáyuu cúu jeē cujéhnu ga
(Mr. 9.33-37; Lc. 9.46-48)

18

¹ Te suni quiv̄i un ní quecoo tēe cáscuáha un núu yā, te ni cacajñuhún de ya:

¿Ndé ñin cújéhnú ga nuū ñáyuu jeē ndácu Yaā andiv̄i jniñu nuū? achí de.

² Te ni cana ya ñin sūchi lúli, te ni jeni ya i mēhñú de. ³ Te ni cahān yā:

Jendaá cahān rī jín ró, núu tú nandió cóo ni rō te cani ni rō nájñuhun ñin sūchi lúli, ma quiv̄i cuiti rō ndaha Yaā andiv̄i jēē ndacu ya jniñu nuū rō. ⁴ Núu súcuan te ñayuu jeē jēni ni i jeē tu cújéhnú i, nájñuhun jēni ni sūchi lúli yáha, suu i cújéhnú ga nuū ñáyuu jeē ndácu Yaā andiv̄i jniñu nuū. ⁵ Te na-ni ñayuu núu jeē siqūi ruhū jetáhú i ñin sūchi lúli nájñuhun sūchi yáha, te ruhū jetáhú i. Achí yá.

Xeēn coo siqūi ñáyuu quiv̄i nuū cuéchi

(Mr. 9.42-48; Lc. 17.1-2)

⁶ Te núu ñin sūchi lúli yáha cándije i ruhū, te núu quiv̄i i cuēchi sáha na-ni ñayuu, te vāha ga núu ni conuhn̄i ñin yōso cáhnu sucūn ñayuu ún, te quēe i chíji ndute mar nuū.

⁷ Nacā xeēn cúu jín ñáyuu ñayiv̄i, chí mání iyó jēē nducú squiv̄i ñayuu nuū cuéchi. Te mání súcuan coo ini ñayiv̄i. Te nacā xeēn ndoho ñayuu jeē squiv̄i jnāhan nuū cuéchi.

⁸ Núu súcuan te núu ndaha ró chí jéhē rō sáha jeē quiv̄i ró cuéchi, vāha ga cahnde rō te scāne ró na quih̄in, návāha tuá sáha ró cuéchi. Chí vāha ga jeē coo chácua ró chí coo tícúhndu ró te quiv̄i ró núu cotecu rō ñí cáni, vēsú jeē cóndee ndindúú ndaha ró jéhē rō te quiv̄i ró núu ñuhún jeē cayú ñí cáni. ⁹ Te núu tinūu ró sáha jeē quiv̄i ró cuéchi, vāha ga tava rō te scāne ró na quih̄in, návāha tuá sáha ró cuéchi. Chí vāha ga jeē coo ñin-ni tinūu ró te quiv̄i ró núu cotecu rō ñí cáni, vēsú jeē cóndee ndindúú tinūu ró te quiv̄i ró núu ñuhún infierno.

Jñuhun yátá síqūi lanchi jeē ní sana

(Lc. 15.3-7)

¹⁰ Coto ma sájēē ni rō nuū ní ñin sūchi lúli yáha. Chí cahān rī jín ró jeē tācá ndajéhé andiv̄i jēē ndíto ya i, níni cáhñin ya nuū maá Tátá rī andiv̄i. ¹¹ Chí ruhū, Yaā ní nduu tēe, vēji rī jeē jnáma rī ñayuu jeē ní sana i nuū Yaā Dios.

¹² ¿Te ndese cájeni ni rō? Núu ñin tēe ndéca de ñin ciento lanchi, te núu sana ñin tí, ¿á tu stóo de cuñ xico xahūn cuñ gā tī yucu, te ndicó de quinanducú de quit̄i ní sana ún?

¹³ Te núu ni nanih̄in de tí, te ndaā jeē yóhyo ga cúsiñi de jín quit̄i ún vēsú jín cúñ xico xahūn cuñ gā quit̄i jeē tu ní sana. ¹⁴ Te suni súcuan máá Tátá rō, Yaā ndeé andiv̄i, tu cúni yā jeē jnahnú ndetū ni ñin sūchi lúli yáha.

Siqūi jeē cóne cáhnu ni yō nuū jnāhan yó

(Lc. 17.3)

¹⁵ Te núu jnāhan ró ní sáha de cuēchi siqūi rō, núu súcuan te castūhun ró nuū mañuhún-ni de jeē ni sáha de cuēchi siqūi rō. Te núu ni jetáhú de jñuhun ni cahān rō jín de, núu súcuan te je ni nduman̄i de jín ró ni sáha ró. ¹⁶ Te núu tu ní jétáhú de jñuhun cáhān rō, te quicāna ró ñin chí úu gā ñayuu quih̄in rō jín núu de, cuu i testigo jín ró, te cundaā cuēchi de te nduman̄i de jín ró. ¹⁷ Te núu tu ní jétáhú tucu de jñuhun cácahān tēe ún, yūcuán na te castūhun ró nuū ñáyuu cácañdije. Te núu tu ní jétáhú tucu de jñuhun cahān ñayuu cácañdije ún, te siáá rō de na cóo de nájñuhun ñin tēe tu cáñdije nuū Yaā Dios chí tēe stútú xuhun renta.

¹⁸ Jendaá cahān rī jín ró jēē tāca jēē cási rō jeē ma sáha ñayuu ini ñayiv̄i yáha, suni casi jeē cáyucú nde andiv̄i. Te tāca jēē cuáha ró jñuhun sáha i ini ñayiv̄i yáha, suni jeē cáyucú nde andiv̄i cuáha jñuhun.

¹⁹ Te suni cáhān rī jín ró, núu uñ jnāhan ró ini ñayiv̄i yáha, inuú cani ni rō siqūi ñin jeē cacán tahu rō, núu súcuan te máá Tátá rī andiv̄i cuáha ya jeē cájicān rō. ²⁰ Chí núu ndé mí ndútútú úu chí ún̄i ñayuu jeē cáchiñuhún i ruhū, te yūcuán íne rī jín i, áchí yá.

²¹ Yūcuán na te ni quee Pedro nuū yā, te ni cajñuhún de ya:

¿Nasaa jínu cone cáhnu ni na núu jnāhan ná jēē sáha de cuēchi siqūi ná? ¿A ndé uxā jínu chí naún? áchí de.

²² Te ni cahān Jesús:

Tu cāhān rī jíin ró jeē maá úxā jínu, chi nde uxā jínu jeē uní xico uxī.

Jnūhun yátá síquī mozo jeē tu ní íne cāhnu ni

²³ 'Núu súcuan te Yaā ndeé andiví, suhva cúu jeē íne cāhnu ni yā nuū ñáyuu ndácu ya jniñu nuū: Cúu nájñūhun ñn rey jeē cuní de sándaā de jíin mozo de jeē cátaū nuū de. ²⁴ Te ni quejéé de sándaā de jíin i. Te ni caquindeca i ñn mozo jeē taú tíjni millón peso nuū de. ²⁵ Te tú na vé névāha mozo un chunaa nuū de. Te ni ndacu de jniñu jeē na cúyāhu mozo un jíin ñasihí jíin séhe jíin táca ndajniñu, te nucūnaa xūhun táu. ²⁶ Yūcuán na te ni jecuiñi yití mozo un, te ni cahān ndahú de jíin patrón de ún: Condetu ní, te na chúnaa ndihí ná xūhun ní, áchí de. ²⁷ Te máá patrón ni cundáhú ni de mozo de. Te ni ine cāhnu ni de jeē taú mozo de ún, te ni siaá de jeē ma chúnaa gā. ²⁸ Te ni quenda mozo un cuāhān de, te ni najnáhan-ni de jíin ñn jnáhan mozo de jeē taú jecu peso nuū de. Te ni jniñ de tēe ún, te ni quitu de sucūn, te ni cahān de: Chunaa jeē taú rō nuū rī, achí de. ²⁹ Te jnáhan mozo de un ní jecuiñi yití núu de, te ni cahān ndahú jíin de: Condetu te na chúnaa ndihí rī xūhun ró, achí. ³⁰ Te máá de tu ní cuní de, chi ni chune de tēe un vecāa nde quiví nachunaa jeē taú nuū de. ³¹ Te tāca jnáhan mozo de ni cajito jeē súcuan ni sáha de, te ni cajnahuhū ndasí ni de. Te cuango de nuū patrón de, te ni cacachi de ndihí ndese ni cuu. ³² Yūcuán na te patrón un ní nacana de mozo un, te ni cahān de jíin: Mozo ndevāha cúu ró. Chi ni ine cāhnu ni rī ndihí jeē taú rō nuū rī, chi ni cahān ndahú ró jíin rí. ³³ Te nájñūhun ni cundáhú ni rī rohó, suni súcuan ni jini ñúhún cundáhú ni rō jnáhan mozo rō nuú, achí de. ³⁴ Te ni quití ndasí ni patrón, te ni ndacu de jniñu jeē na quiví vecāa nde nachunaa ndihí jeē taú nuū de.

³⁵ Te ni jínu ni cahān yā, te áchí yá:

Nájñūhun ni sáha rey un jíin mozo de, suni súcuan sáha máá Tátá rī andiví jíin táca rōhó núu tu cone cāhnu ni rō nuū jnáhan ró nde jíin ini jíin ánuá rō, núu na-ni cuēchi sáha i nuū rō. Achí yá jíin de jíin de.

Siquī jeē ma stóo jnáhan tēe jíin ñahan
(Mr. 10.1-12; Lc. 16.18)

19

¹ Te nuū ní ndihí ni cahān Jesús tāca jnúhun yáha, te ni quenda ya Galilea cuahān yā. Te ni jinū yā región Judea, inga lado yūte Jordán, ichi núu cáne niāndii. ² Te cuehē ñayuu ni candiquin i ya, te yūcuán ní nasávāha ya ñayuu cácuñu.

³ Yūcuán na te ni quecoo jecu tēe grupo fariseo nuū yā, chi cácuñi de coto ndee de ya núu ndese cahān yā. Te ni cacajñuhún de ya:

¿A íyó ley jeē cuu ndusín ñn tēe jíin ñasihí de núu na-ni síquī cúu, chí naún? áchí de.

⁴ Te ni cahān yā:

¿A tu ní cácahu ró tutu i ndese ni sáha Yaā Dios ñayuu nde xihna ñúhún? Chi tēe jíin ñahan ni sáha ya, achí. ⁵ Te suni ni cahān Yaā Dios: Jeē yúcuán cúu jeē stóo tēe tátá de náná de, te quiñáhan de jíin ñasihí de, te ñn na cuu ndindúú de, achí Yaā Dios, achí tutu. ⁶ Núu súcuan te tuá cúu uñ jnáhan de, chi ñn na cúu. Jeē yúcuán tu íyó váha jeē stóo jnáhan, chi jeē ni squíjñahan Yaā Dios cúu, achí yá.

⁷ Te ni cacajñuhún de ya:

Núu súcuan ¿te naun ni ndacu Moisés jniñu jenahán jeē núu stóo ñn tēe ñasihí de, te na cúvāha acta jeē ndusín de jíin ña? áchí de.

⁸ Te ni cahān yā jíin de:

Siquī jeē níhni ni rō jijnáhan ró, jeē yúcuán ní jēhe Moisés jnūhun jeē stóo ró ñasihí ró. Te nde xihna ñúhún chi nasūu súcuan ní cuu. ⁹ Te ruhū chi cāhān rī jíin ró, núu ñn tēe stóo de ñasihí de, te núu nasūu jēe tíjni ni ña, te quiñáhan de jíin inga ñahan, núu súcuan te cásiquí ndéē de ña. Te núu ñn tēe condeca de ñahan ní ndusín, suni cásiquí ndéē de ña, achí yá.

¹⁰ Yūcuán na te ni cacahān tēe cáscuáha jíin yá:

Te núu ma cúu stóo tēe ñasihí de, núu súcuan te vāha ga ma cóndeca de ñahan, áchí de.

¹¹ Te ni cahān yā jíin de:

Jnūhun ni cahān rō yāhá, tu níhín jniñu nuū ndihi tēe, chi máá nene tēe jeē ni sáha Yaā Dios jeē nihín jniñu nuū. ¹² Chi íyó tijni siquī jeē jési jeē ma cóndeca tēe ñahan. Chi sava tēe ni cacacu de jeē ma cúu condeca de ñahan. Te sava ga tēe ni sáha ñayuu jeē ma cúu condeca de ñahan. Te sava ga tēe ni cajeni ni maá de jeē ma cóndeca de ñahan siquī jeē ndihví ni de jíin jniñu jeē ndácu Yaā andiví nuū de. Tēe jeē cúu cuatáhú jnūhun jeē ma cóndeca de ñahan, na cuatáhú de núu súcuan. Achí yá.

Jeē ni jíicān tahu Jesús jehē sūchi lúli

(Mr. 10.13-16; Lc. 18.15-17)

¹³ Yūcuán na te ni quecoo ñayuu jíin sūchi lúli, jēe na sóo yá ndaha ya xinī i te cacān tahu yā jehē i. Te tēe cáscuáha jíin yá, ni cacahān de nuū ñayuu vējicoo jíin i. ¹⁴ Te ni cahān Jesús:

Cuāha jnūhun na quíjicoo sūchi lúli jíinā nuū rī, te ma cási rō jeē quíjicoo i. Chi ñayuu jeē ndió cóo ni i cani ni i nájnūhun sūchi yáha, suu i quívi ndaha Yaā andiví jēe ndacu ya jniñu nuū i, áchí yá.

¹⁵ Te ni soó yá ndaha ya xinī i jíināhan i. Te ni quenda ya yūcuan cuáhān yā.

Jnūhun tēe cúcá

(Mr. 10.17-31; Lc. 18.18-30)

¹⁶ Te ñin tēe suchí ní quee de nuū Jesús, te ni cajnūhún de ya:

Tēe vāha cúu ní Maestro. Te cachi ní, ¿na jniñu vāha sáha ná te nihín tahu na cotecu na ní cáni andiví? áchí de.

¹⁷ Te ni cahān yā jíin de:

¿Naun cáhān rō jeē tēe vāha cúu rí? Tú ni ñin tēe vāha íyó, chi máá ñin-ni Yaā Dios. Te núu cúní rō cotecu rō ní cáni, te squícu ró jniñu ní ndacu ya. Achí yá.

¹⁸ Te ni cahān de:

¿Ndé-ni jniñu cúu núu súcuan?

Te ni cahān yā:

Ma cáhni rō ndīyi. Ma cosíquí ndéē jnāhan ró. Ma sacuíhná ró. Ma sajnūhún ró.

¹⁹ Cuatáhú ró nuū tatá rō nuū naná rō. Te cundáhú ni rō jnāhan ró nájnūhun cundáhú ni rō maá ró, achí yá.

²⁰ Te ni cahān tēe suchí un:

Tācá jniñu yáha je ni squícu ná ndé ná lulí ná. ¿Te na vé cúmanī gā sáha ná núu súcuan?

²¹ Te ni cahān Jesús:

Núu cúní rō squícu ndihi ró, cuáhān te xīco ró ndihi jeē névāha ró, te cuāha ró núu ñayuu ndahú. Te nde andiví cuāha ya jeē ndetū ndasí coo ró. Yūcuán na te quiji ró condiquīn rō ruhū quihín yō, achí yá.

²² Te tēe suchí un, ná ni jini sōho de jnūhun yáha, te ni cucuíhyá ni de te cuahān de, chi cúcá ndasí de.

²³ Yūcuán na te ni cahān Jesús jíin tēe cáscuáha jíin yá:

Jendaá cahān rī jíin ró, tēe cúcá chi yōhyo yí quívicoo de ndaha Yaā andiví jēe ndacu ya jniñu nuū de. ²⁴ Te cáhān tucu rí jíin ró jeē yachī gā yāha ñin camello yaū yutícuí, vēsú jeē quívi ñin ñayuu cucá ndaha Yaā Dios jeē ndacu ya jniñu nuū i, áchí yá.

²⁵ Te tēe cáscuáha jíin yá, yōhyo ni canaa ni de jeē ní cajini de jnūhun yáha, te ni cacajnūhun jnāhan de:

¿Ndé ñayuu cúu jeē cácu núu súcuan?

²⁶ Te ni ndacoto Jesús nuū de, te ni cahān yā:

Ñayuu chi ma cúu squívi i máá i ndaha Yaā Dios, te máá yá chi ndihi-ni cuu sáha ya, achí yá.

²⁷ Yūcuán na te ni cahān Pedro:

Saña jijnáhan ná ní castoo ná ndihi jeē cánevāha ná, te cándiquin na nihín. ¿Te na vé nihín na núu súcuan? áchí de.

²⁸ Te ni cahān Jesús jín de:

Ruhū, Yaā ní nduu tēe, jendaá cahán rī jín ró jijnáhan ró jēē in quivī conene rī mesa ndacu ri jniñu, te yōhyo luu cujéhu ri ini ñayivi jéé. Te quivī ún te máá ró jeē ní cacondiquin rō ruhū, suni coyūcu ró nuū uxí uū mesa ndacu ró jniñu. Te sándaā rō jniñu ndihúxí uū yucūn ñayuu Israel. ²⁹ Te tāca ñayuu jeē ni stoo vehe, chí ñani, chí cuáha, chí tátá, chí náná, chí ñasihí, chí séhe, chí ñuhun, siquī jeē cóndiquin i ruhū, te nanihin i in ciento gā jeē súcuan. Te suni nihin tahu i cotecu i ñí cáni. ³⁰ Te cuehē ñayuu jeē vijna cácuu i nuū, nduu i sandihí. Te ñayuu jeē vijna cácuu i sandihí, nduu i nuū. Achí yá.

Jnūhun yátá síquī tēe casájniñu

20

¹ Te suhva cúu jeē ndácu Yaā andiví jniñu nuū ñayuu: Cúu nájnūhun in tēe chíí ñuhun. Te in nehen ni quenda de, ndúcú de tijni mozo jeē taxín ndéhē uva de. ² Te ni sándaā de jín mozo un jéé chúnaa de in denario jeē quiví. Te ni tají de tēe un cuángoo jeē taxín uva de. ³ Yūcuán na te ni quenda tucu de nájnūhun cahin. Te ni jito de nuū sava ga tēe cáyūcu sáa-ni de nuū yáhu. ⁴ Te ni cahān de jín: Róhó jijnáhan ró, cuángoo taxín ró uva rī, te chunaa vāha ri yāhu ró, áchí de. Te tēe un cuángoo de. ⁵ Te ni quenda tucu de jeē cácuu cahuxí uū jín jéé cácuu cahunī, te suni súcuan ni nihin tucu de mozo. ⁶ Te jeē cácuu cahuhūn ni quenda tucu de. Te ni nihin tucu de jecu gā tēe cáyūcu sáa-ni nuū yáhu. Te ni cahān de jín: ¿Najehē cahin sáa-ni ró yáha ñí ndiáca? áchí de. ⁷ Te ni cacahān tēe ún: Siquī jeē tú ni in ní cána saña jéé sájniñu ná. Te ni cahān de jín tēe ún: Núu súcuan te suni máá ró quingoo ró taxín ró ndehē uva rī, chí chunaa vāha ri yāhu ró, áchí de. ⁸ Te nuū ní ini, te tēe chíí ñuhun ni cahān de jín tēe cújéhu nuū mozo de: Cana xinī tēe casájniñu te chunaa rō yāhu de, te xihna gā tēe ni quívicoo sandihí, te sáa te tēe ni quívicoo xihna ñúhún, áchí de. ⁹ Te ni quecoo tēe jeē ni quívicoo cahuhūn. Te in denario ni caquihin in in de. ¹⁰ Yūcuán na te ni quecoo tēe jeē ni quívicoo xihna ñúhún. Te cájeni ni de jeē cuehē gā quiyāhu de. Te in-ni denario ni caquihin in in de. ¹¹ Te nuū ní caquihin de, te ni caquejéé de cácahān sōó de siquī tēe chíí ñuhun, áchí de: ¹² Máá ná jijnáhan ná, ndiáca ni casájniñu ná, te ni candoho ná jéé jihní. Te tēe yáha jéé ni quívicoo sandihí, chí máá in hora-ni ni casájniñu de. Te inuú-ni ni chiyāhu ní saña jín de, áchí de. ¹³ Te tēe chíí ñuhun ni cahān jín in de: Amigo, nasūu jéé tú vāha sáha ri jín ró. ¿A tu ní sándaā yō jeē in denario quiyāhu ró, chí naún? ¹⁴ Núu súcuan te quihin yāhu ró te quinhun rō. Chí cúní rī jeē tēe ni quívicoo sandihí yáha, inuú quiyāhu de jín máá ró. ¹⁵ ¿Te á tu cuu sáha ri ndese cúní rī jín xúhun máá rí? ¿Te chí cúcuésún ni rō jeē ní chiyāhu vāha ri de jijnáhan de siquī jeē vāha ni rī? áchí de. ¹⁶ Te nájnūhun ni sáha tēe chíí ñuhun, suni súcuan sáha Yaā Dios. Chí ñayuu cácuu sandihí, nduu i nuū. Te ñayuu cácuu nuū, nduu i sandihí. Chí cuehē ñayuu cána ya jeē candíje i ya. Te jecu-ni i cándíje, te nácāji ya maá i jeē ndúu i séhe ya. Achí yá.

Jeē ni cahān tucu Jesús jeē cúu yā

(Mr. 10.32-34; Lc. 18.31-34)

¹⁷ Yūcuán na te ná ni quihin Jesús ichi cuahān yā ñuu Jerusalén, te ni cana sñn ya ndihúxí uū tēe cácuáha jín yá. Te ni cahān yā jín de:

¹⁸ Cuni sōho ró, chí je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujehu jín núu tēe cástéén tutu ley. Te ndonda de siquī rī jeē cúu rī. ¹⁹ Te squívi de ruhū nuū tēe nación Roma jeē cáyúcu Jerusalén cándacu jniñu. Te tāca tēe un sácatā de nuū rī. Te cani de ruhū, te sáa te cahni de ruhū jicā cruz. Te nuū uní quivī te natecu rī. Achí yá.

Jeē ni jícān naná Jacobo jín Juan in favor nuū yā

(Mr. 10.35-45)

²⁰ Yūcuán na te ni quee ñasihí Zebedeo nuū yā jíin séhe ña Jacobo jíin Juan. Te ni jecuiñī yití ña nuū yā, jícan ña ñin favor nuū yā. ²¹ Te ni cajnūhun yá ña:

¿Na vé cuní rō?

Te ni cahān ña:

Cuāha ní jnúhun jeē quivī ndácu ní jniñu te conēne ndindúú séhe ná yáha xiin ní, ñin i lado váha ní, te inga i lado jecó ní, achí ña.

²² Yūcuán na te ni cahān Jesús jíin Jacobo jíin Juan:

Tu cájini rō na vé cúu jeē cájicān rō. ¿A cuu ndoho ró jnúndóho nájnūhun jeē quíji siquī rī? ¿Te á canda ró ndoho xeēn rō nájnūhun ndoho rī? Achí yá.

Te ni cacahān de:

Cuu sáha ná.

²³ Te ni cahān yā jíin de:

Jendaá jeē ndoho ró jnúndóho nájnūhun jeē quíji siquī rī, te ndoho xeēn rō nájnūhun ndoho rī. Te jeē conēne ró lado váha rī jíin lado jecó rí, nasūu rúhū cúu jeē cuáha jnūhun. Chi je íyó túhva cuu tāca tēe jeē ní nacāji Tátá rī, te tēe un níhīn. Achí yá.

²⁴ Te uxī gā tēe cáscuáha jíin yá ní cajini de jnūhun yáha. Te ni caquitī ni de nuū úu ñani ún. ²⁵ Te Jesús ni cana ya de, te ni cahān yā jíin de:

Cájini rō ndese cásaha tēe cácujeñnu nuū ñáyuu tācá nación. Chi cándacu níhīn de jniñu nuū i, te máa de cáchí ndese coo. ²⁶ Te máa ró jijnáhan ró, chi ma sáha ró súcuan. Chi núu ndé ñin ró cúní cujeñnu, sa suhva cuajniñu ró núu jnáhan ró. ²⁷ Te núu ndé ñin ró cúní cuu nuū, sa suhva sáha ró máa ró mozo nuū jnáhan ró. ²⁸ Chi suni súcuan sáha ruhū, Yaā ní nduu tēe, chi nasūu jēe véji rī jeē cuajniñu ñayuu nuū rī, chi sa suhva véji rī jeē cuajniñu rī nuū ñáyuu. Te cuāha rī máa rí cuu rī návāha jnama rī cuehē ñayuu, achí yá.

Jeē ní nasávāha ya uū tēe cuáá

(Mr. 10.46-52; Lc. 18.35-43)

²⁹ Yūcuán na te ni quenda ya jíin de ñuu Jericó. Te cuehē ndasí ñáyuu ni candiquīn i ya. ³⁰ Te yuhíchi un cáyūcu úu tēe cuáá. Te ni cajini de jnūhun jeē yáha Jesús cuahān yā, te ni cacana jee de:

Máa ní jeē cúu ní Séhe yucūn David, cundáhú ni ni sáña, achí de.

³¹ Te ñayuu un ní cacahān i nuū de jeē na cási de yuhu de. Te víhyá gā ni cacana jee de:

Máa ní jeē cúu ní Séhe yucūn David, cundáhú ni ni sáña víi, achí de.

³² Te ni jecuiñī Jesús, te ni cana ya ndindúú tēe cuáá un, te ni cajnūhun yá de:

¿Na vé sáha rī jíin ró cácuñi rō?

³³ Te ni cacahān de jíin yá:

Jeē na ndúndijin tinūu ná cácuñi ná, achí de.

³⁴ Te ni cundáhú ni yā de. Te ni tee ya ndaha ya tinūú de. Te ni candundijin-ni tinūú de. Te ni candiquīn de ya cuango de jíin yá.

Jeē ni quívi Jesús ñuu Jerusalén

(Mr. 11.1-11; Lc. 19.28-40; Jn. 12.12-19)

21

¹ Te nuū cuácuyajni ya ñuu Jerusalén, te ni jinū yā jíin tēe cáscuáha jíin yá ñuu Betfagé, jeē íne jehē yucu Olivos. Te ni tají yá uū tēe cáscuáha jíin yá jeē quíngoo de. ² Te achí yá jíin de:

Cuáhán ñuu lulí íne ichi núú. Te yūcuan níhīn rō ñin burra, núhni tī jíin ñin burro lulí. Te ndají ró tī, quijicoo ró jíin tī nuū rī. ³ Te núu ndé ñin cahān jíin ró, te cachi rō nuū: Máa Jítoho yō jíni ñúhún yá tī, achi rō. Yūcuán na te siáá-ni i tī, quiji ró jíin tī, achí yá.

⁴ Te súcuan ni cuu tācá jniñu yáha návāha squícu jnūhun ni cahān tēe ni nacani jnūhun Yaā Dios nde jenahán, yósó núú tútu:

⁵ Cachi rō nuū ñáyuu ñuu Jerusalén jeē naní ñuu Sión:

Yāhá condēhe ró jeē véji Rey rō.
 Tu sájéhnū ya maá yá, chi máá burra-ni yósó yá,
 jíin burrito, sēhe quití ndíso.
 Achí tutu.

⁶ Yūcuán na te tēe cáscuáha un cuángoo de, te ni casáha de nájñūhun ni ndacu Jesús jniñū nuū de. ⁷ Te ndéca de burra jíin séhe tí, ni ndecoo de nuū yā. Te ni casoó de sahma de siquī tī, te ni jecosō yā tī. ⁸ Te cáhiin cuehē ñayuu, te ni cascáa i sahma i ini ichi. Te sava ga i ni cajehnde ndaha ñúú, te ni cachucun i ini ichi. ⁹ Te ñayuu cuangoo ichi núu jíin ñáyuu cuangoo ichi yátá, cácana jee i:

Yōhyo cújéhnū Yaā cúu Sēhe yucūn rey David. Yōhyo vāha Yaā cúu Yaā jeē véji jíin jniñū máá Jítóho yō Yaā Dios. Te yōhyo cújéhnū máá Yaā Dios. Achí i.

¹⁰ Te nuū ni quívi ya ñuu Jerusalén, te ndíhi ñayuu ñuu un ní cacuvaā i, te cuehē i cájnūhun jnáhan:

¿Ndé tée cúu tēe yáha? áchí i.

¹¹ Te ni cacahān ñayuu vējicoo jíin yá:

Yāha cúu Jesús jeē nácani jñūhun Yaā Dios, jeē véji nde ñuu Nazaret ndañū Galilea. Achí i.

Jeē ní quenehen ya ñayuu ini templo

(Mr. 11.15-19; Lc. 19.45-48; Jn. 2.13-22)

¹² Yūcuán na te ni quívi Jesús ini templo cáhnu Yaā Dios. Te ni quenehen ya tāca ñáyuu cájeen quití te cánaxico núu ñáyuu jeē socō i. Te ni scotúú ndeyi ya tāca mesa tēe cástáyí xūhún, jíin silla tēe cáxico paloma. ¹³ Te áchí yá jíin i:

Yósó núu tútu íi jeē cahán Yaā Dios: Vehe ri chi vehe nuū cájicān tahú cúu, áchí Yaā Dios. Te máá ró jijnáhan ró, chi nájñūhun yaū cava ñacuīhná ni canasáha ró. Achí yá.

¹⁴ Yūcuán na te sava ñayuu cuaá jíin ñáyuu chacuá ni quecoo i nuū yā ini templo un. Te ni nasávāha ya i. ¹⁵ Te sutū cácujehnū jíin tée cástéén tutu ley Yaā Dios, ni cajito de tācá jniñū jéhnū sáha ya, te ni cajini de jeē cácana jee sūchi lúlí ini templo: Yōhyo cújéhnū Yaā cúu Sēhe yucūn rey David, achí i. Te ni caquití ni de. ¹⁶ Te ni cacahān de jíin yá:

¿A tu jíni ró jéē súcuan cácahān sūchi yáha? áchí de.

Te ni cahán Jesús jíin de:

Jíni ri. ¿Te á ná tu cahu ró jéē yosó núu tútu íi jeē suhva cáhán ñin tēe jíin Yaā Dios? Sáha ní jéē tāca sūchi lúlí jíin sūchi cájexin, vāha ndasí cáhán i jeē Yaā cujéhnū cúu Cristo. Achí.

¹⁷ Te ni stóo ya de. Te ni quenda ya ñuu Jerusalén, cuahān yā nde ñuu Betania. Te yūcuan ní ndōo ya jecuáa ún.

Jeē ni cáhān yā nuū yújnu higo

(Mr. 11.12-14, 20-26)

¹⁸ Te jenéhen inga quivī cuanuhun yā ñuu Jerusalén, te jíi yā sōco. ¹⁹ Te ni jito ya ñin nundēhe higo, íin yuhíchi. Te ni jehēn yā jehē. Te tú na ndehē ni níhín yā, chi máá ndaha-ni íin. Te ni cahán yā jíin:

Vijna te ma cúun cuití gā ndehē xiní rō, achí yá.

Te ni ichí-ni yujnu higo ún. ²⁰ Te tēe cáscuáha jíin yá, ni canaa ni de cájito de. Te ni cacajnūhún de ya:

¿Ndese ni sáha ní jéē yachí-ni ni ichí yujnu higo? achí de.

²¹ Te ni cahán yā jíin de:

Jendaá cahán rī jíin ró, núu candíje ró te tú cani siquí ni rō, te cuu sáha ró jniñū jéhnū nájñūhun ni sáha ri jíin yujnu higo. Te nde jniñū jéhnū ga cuu sáha ró, chi nde cuu cahán rō jeē cújiyo yucu yáha, quihín nuū mar, te sáha nájñūhun cahán rō. ²² Te tāca jéē cacán tahú rō jijnáhan ró, te núu candíje ró jéē níhín rō, te níhín rō. Achí yá.

Siqui jeē ndíso jniñu Jesús

(Mr. 11.27-33; Lc. 20.1-8)

²³ Te ni quivi tucu ya ini templo cáhnu. Te níni stéén yā jnūhun, te sutū cácujeñnu jíin táca téé jéñnu jeē cándacu jniñu nuū ñayuu hebreo, ni quecoo de nuū yā. Te ni cacajñuhún de ya:

¿Ndé ní nihin jniñu ró jéé sáha ró jniñu yáha? ¿Te ndé ñin ni tee jniñu siquī rō jeē sáha ró súcuan? Achí de.

²⁴ Te ni cahān Jesús:

Suni ruhū, cajñuhun rí rohó ñin jnūhun jíjnahan ró, te núu cuu stío cuñí rō, yūcuán na te cachi rī nuū rō ndé ní nihin jniñu ri jeē sáha ri jniñu yáha. ²⁵ ¿Ndé ñin ni tee jniñu siquī Juan jeē ni scuándute de? ¿A Yaā Dios chí táca téé? áchí yá jíin de.

Yūcuán na te ni candajñuhun maá de:

Núu cahān yō jeē Yaā Dios ni tee ya jniñu un síquī Juan, te cahān de jíin yó: Núu súcuan ¿te najehē tu ní cácañdije ró de? ²⁶ Te núu cahān yō jeē ñayuu ni catee jniñu un síquī de, te cáyūhu yó ñayuu, chi ndivii i cácañdije i jeē téé ni nacani jnūhun Yaā Dios ni cuu ndije Juan. Achí de cácahān maá de.

²⁷ Te ni cacahān de jíin Jesús:

Tu cájini rī, achí de.

Yūcuán na te ni cahān yā jíin de:

Ni ruhū, suni ma cáchi rī nuū rō ndé ñin ni tee jniñu siquī rī sáha ri jniñu yáha, áchí yá.

Jnūhun yátá síquī uú sēhe yí

²⁸ Te ni cahān gā yā jíin de:

Cuni nahín ró jnūhun yátá yáha: ñin tēe ni iyo uū sēhe yí de. Te ni cahān de jíin ñin i: Sēhē, quihin rō taxín ró ndehē uva rī vijna, áchí de. ²⁹ Te ni cahān i: Ma quihín na, áchí i. Te ni cunúu, te ni nacani ni i, te cuahān i nuū jniñu ún. ³⁰ Te tēe un ní jehēn de nuū ínga sēhe de, te suni súcuan ni cahān de jíin i. Te ni cahān i: Cuu núu súcuan, te quihín na, áchí i. Te tu ní jéhén i. ³¹ ¿Te ndese cájeni ni rō? Jeē ndíndúú i, ¿ndé ñin i ni squícu jniñu cúní tatá i? áchí yá.

Te ni cacahān de:

Sūchi jéé ni cáhān de jíin xíhna gā, achí de.

Te ni cahān Jesús jíin de:

Súcuan cúu, te jendaá cahān rī jíin ró jeē téé cástútú xúhun renta jíin ñahan cájica jnéni, yachí cánacani ni i jeē stóo i cuēchi i te quívicoo i ndaha Yaā Dios jeē ndacu ya jniñu nuū i, te maá ró jíjnahan ró chí ma quívi ró. ³² Chi ni quiji Juan, ni steén de ndese condiquin rō jnūhun ndaā, te tu ní cácañdije ró jnūhun ni cahān de. Te sa suhva tēe cástútú xúhun renta jíin ñahan cájica jnéni, ni cacandije i jnūhun ni cahān de. Te maá ró, vēsú ni cajito ró jéé ní cacandije i, te tu ní cánacani cuiti ni rō jeē candije ró. Achí yá.

Jnūhun yátá síquī tēe néé cásajniñu nuū uva

(Mr. 12.1-12; Lc. 20.9-19)

³³ Cuni sōho ínga jnūhun yátá jíjnahan ró: Ni iyo ñin tēe chíí ñuhun. Te ni nachuhun de cuehē ndehē uva. Te ni jesi de corral, te ni sáha de ñin nuū cúhun ndehē un táxin. Te ni jeni de ñin vehe súcún návāha cuu coto de ní cáhnu.

Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi cuahān jicá de. ³⁴ Te maá tiempo ndutútú uva, te ni tají de jecu mozo cuanuquihin sava uva nuū téé cásajniñu ún. ³⁵ Te tēe un ní cajñi de mozo un. Te ñin i ni cacani de, te ínga i ni cajehni de, te ínga i ni cajēhe de yuū xiní. ³⁶ Te tēe chíí uva ni tají tucu de jecu gā mozo cuango, cuehē gā vēsú jeē xíhna ñuhún. Te suni súcuan ni casáha tēe un jíin ndiñi mozo un.

³⁷ Te jeē sándihí na te ni tají de sēhe de cuahān. Te jéni ni de: Tēe ún chí cuatáhú de jíjnahan de nuū séhe ri. ³⁸ Te tēe cásajniñu ún, núu ní cajito de nuū séhe tēe chíí uva, te ni cacahān maá: Tēe chíí táhū cúu jeē yáha. Na cáhni yō de, te ndōo tahū de cuu yó, áchí. ³⁹ Te ni cajñi de i, te ni caquenehen de i ínga lado, te ni cajehni de i. Achí yá.

⁴⁰ Yūcuán na te ni cajñūhun yá de:

Núu súcuan te núu na quíji tēe chíi uva un, ¿te ndese sáha de jíin tēe cásajniñu ún? áchí yá.

⁴¹ Te ni cacahān de jíin yá:

Ma cundáhu cuiti ni de tāca tēe cásáha jniñu néé un, chi cahni de. Te cuāha de ñūhun cáa uva un núu inga sava tēe sájniñu nuū, cuu sava de ndehē jíin. Te quivī ndutútú ndehē, te tēe ún nacuāha de sava ndehē nuū tēe chíi uva. Achí de.

⁴² Te ni cahān Jesús jíin de:

¿Te á ná tu cahu ró jñūhun yáha jeē yosó núu tútu ii, jeē ruhū cúu nájñūhun ñn yuū? Chi áchí tutu:

Yuū jeē ní casquéhichī tēe cájeni vehe,

yuū yáha nduu jeē quítuu vehe.

Máa Jítóho yō Yaā Dios ni sáha ya súcuan,

te cánaa ni yō jíto yó jniñu yáha.

Achí tutu. ⁴³ Núu súcuan te cáhán rī jíin ró jeē cujiyo-ni jeē ndácu Yaā Dios jniñu nuū rō jijnáhan ró, te nacuāha ya jniñu un núu inga ñayuu jeē squícu váha i jniñu ndácu ya nájñūhun cúní yā. ⁴⁴ Te ñayuu tu cácadíje, ndoho i nájñūhun ndóho ñayuu jeē cotúu síquī yuū te jnáhnú i. Te quivī sándaā Yaā Dios cuēchi, te ñayuu tu cácadíje, ndoho i nájñūhun ndóho ñayuu jeē nínga yuū síquī i te cundihī i sáha. Achí yá.

⁴⁵ Te sutū cácujeñhu jíin tēe grupo fariseo ni cajini sōho de tāca jñūhun yátá ní cahān yā. Te ni cajecūhun ni de jeē síquī maá de cúu jñūhun yátá ní cahān yā síquī tēe cásajniñu nuū uva jíin tēe cájeni vehe. ⁴⁶ Te ni canducú de modo jñi de ya. Te cáyūhú de jeē quítū ni ñayuu, chi cájeni ni i jeē tēe nácani jñūhun Yaā Dios cúu ya.

Jñūhun yátá síquī vico nándāha

22

¹ Yūcuán na te ni cahān tucu Jesús inga jñūhun yátá jíin de jijnáhan de:

² Súcuan cúu jeē ndácu Yaā andiví jniñu nuū ñayuu: Cúu nájñūhun ñn rey jeē sáha de ñn vico jeē nándāha sēhe yí de. ³ Te ni tají de tāca mozo de cuacana ñayuu jeē ni cáhán de jíin jēé quíjicoo. Te ñayuu ún tu ní cáconi i quíjicoo i. ⁴ Te ni tají tucu de jecu gā mozo quingoo, te áchí de jíin: Cahān jíin ñayuu ní cana ri un jēé iyó túhva ndeyu. Chi je ni jehni rī síquī rī jíin táca gá quítū ní nduu, te ndihi je iyó túhva. Nehen jijnáhan ró vico nándāha. Achi rō jíin i. Achí de. ⁵ Te ñayuu ní cana de ún tu ní cásáha i cuenta. Chi ñn i cuahān nuū ítu i, te inga i cuahān nuū jniñu sáha i. ⁶ Te sava ga i ni cajñi i tāca mozo rey, te ni casácatā i nuū, te ni cajehni i. ⁷ Yūcuán na te yōhyo ni quítū ni rey. Te ni tají de soldado de ni jengoo, ni cajehni de ñayuu ní cajehni ndīyí ún, te ni cajehmu de ñuu i. ⁸ Yūcuán na te ni cahān de jíin sava ga mozo de: Ndihi je iyó túhva jeē cóo vico nándāha. Te ñayuu ní cana ri ún, tu iyó váha jeē quíjicoo i chi nasūu ñayuu vāha cácuu i. ⁹ Núu súcuan te cuáhán jijnáhan ró táca núu náquijnáhan calle. Te cana ró núu nasaa ñayuu nihīn rō, na quíjicoo i vico nándāha. Achí de. ¹⁰ Te ni quendacoo mozo un cuángoo tācá ichi. Te ni castútú de ndihi ñayuu ní canihīn de, cúu ñayuu cunéé, cúu ñayuu váha. Te súcuan te ni chitú ñayuu ini vehe nuū iyó vico nándāha.

¹¹ Te ni quiví rey ini vehe jeē cahán de jíin ñayuu ni cutútú. Te ni jito de nuū ñn tēe jeē tu ñūhun sahma jeē ni jéhe de cuhun ñayuu quíjicoo vico nándāha. ¹² Te ni cahān de jíin tēe ún: Amigo, ¿ndese ni quiví ró yáha jēé tu ñūhun ró sahma vico nándāha? áchí de. Te máa tēe ún tu ní cáhán cuiti de. ¹³ Yūcuán na te ni cahān rey jíin tēe cájeni cohō: Jñi de te cuhni rō ndaha de jehē de, te quenehen ró de na quíhín de nuū quéhe nuū néé. Te yūcuan ndáhyū de te nacayíhí yuhu de jeē ndóho xeēn de. Achí rey. ¹⁴ Chi cána Yaā Dios cuehē ñayuu jeē na cándíje i. Te jecu-ni i cándíje, te máa i nácāji ya jeē ndúu i sēhe ya. Achí Jesús.

Siquí xúhun renta

(Mr. 12.13-17; Lc. 20.20-26)

¹⁵ Yūcuán na te cuangoo tēe grupo fariseo. Te ni candajnūhún de núu ndese sáha de návāha cahān yā ìn jnūhun jeē nihín de cuēchi siquī yā. ¹⁶ Te ni catajǎ de jecu tēe cáscuáha jíin máá de jíin tēe grupo Herodes cuangoo de. Te ni cacahān de jíin yá:

Maestro, cájini na jeē tēe cáhán ndaā cúu ní, te stéén ndaā ní ndese squícu ñayuu nuū Yaā Dios. Te tu yúhú ní jeē cahán ni ìn ñayuu siquī ní, chi tu sáha ní cuenta ndese cúu ìn ìn i, chi inuú-ni sáha ní jíin i. ¹⁷ Núu súcuan te cahān ní ndese jéni ni ní: ¿A íyó váha jeē chúnaa yō renta nuū rey nación Roma jeē jnāi nación yō, chí tuú? áchí de.

¹⁸ Te ni jini Jesús jeē cájito ndee de ya. Te ni cahān yā jíin de:

Tēe stáhú-ni cácuu ró. ¿Najehē cájito ndee rō ruhū? ¹⁹ Stéén xūhun jeē jéconaā renta na cóto ri, achí yá.

Te ni castéén de ìn denario nuū yā. ²⁰ Te ni jito ya, te ni cajnūhun yá de:

¿Ndé ìn nuū cúu jeē ndeé nuū xūhun yáha, te ndé síhví cúu jeē ndeé yāhá?

²¹ Te ni cacahān de jíin yá:

Nuū jíin síhví rey un cúu, áchí de.

Yūcuán na te ni cahān yā jíin de:

Núu súcuan te nacuāha ró núu rey un jéē yǎhi cuenta nuū de, te nacuāha ró núu Yaā Dios tāca jéē yǎhi cuenta nuū maá yá, achí yá.

²² Te nuū ní cajini de jeē ndichí ní cahān yā jnūhun yáha, te ni canaa ni de, te ni castóo de ya, te cuangoo de.

Jeē ní cacajnūhún de siquī jeē nátecu ndīyi

(Mr. 12.18-27; Lc. 20.27-40)

²³ Te suni quivī un ní quecoo jecu tēe grupo saduceo nuū yā. Te tēe un cácahān jeē tu nátecu cuiti ndīyi. Te ni cacahān de jíin yá siquī ìn jnūhun, áchí de:

²⁴ Maestro, Moisés ni cahān de jeē núu ìn tēe cuu de, te ndōo ñasihí de, te núu tú sēhe de ní íyo jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuñi nuū ndīyi ñani de. Achí Moisés. ²⁵ Te ñuu na ní íyo uxā ñani. Te tēe núu ní quijnáhan de jíin ñahan. Te ni jihí de. Te jeē tú sēhe de ní íyo, te ni ndōo ñasihí de nuū ñani de. ²⁶ Te tēe ún suni ni jihí de, te tú na sēhe de ní íyo tucu. Te suni súcuan tēe unī, nde jíin ndihúxá de. ²⁷ Te nuū ní ndīhi de ni cajihí, te suni ni jihí ñahan ún. ²⁸ Núu súcuan te quivī nátecu ndīyi, ¿ndé ìn de cuu ña ñasihí de? Chi ndihúxá de ni condeca de ña. Achí de jíin yá.

²⁹ Yūcuán na te ni cahān yā jíin de:

Yōhyo cástívi ró jnūhun siquī jeē tu cájecūhun ni rō jeē cahán tutu ìi, ni tu cájini rō jeē íyó poder Yaā Dios jeē nastécu yā ndīyi. ³⁰ Chi quivī nátecu ndīyi, te tuá na jnūhun quijnáhan tēe jíin ñahan coo. Chi coo i nájñūhun ndajéhé Yaā Dios andiví. ³¹ Te siquī jeē nátecu ndīyi, ¿á tu ní cácahu ró tutu jnūhun jeē cahán Yaā Dios jíin ró? ³² Máá rí cúu Yaā Dios Abraham jíin Isaac jíin Jacob, achí Yaā Dios. Chi vésú je ni cajihí de, te cátecu de nuū íyó máá yá, chí cúu ya Yaā sáha jeē técu ñayuu ní cáni. Achí yá jíin de.

³³ Te ñayuu un ní canaa ni i cájini nahín i jnūhun stéén yā.

Jniñu cánuú ndasí gá jeē ní ndacu Yaā Dios

(Mr. 12.28-34)

³⁴ Yūcuán na te tēe grupo fariseo ni cajini de jeē ní cajesi tēe saduceo yuhu de ni sáha ya. Te ni candutútú de nuū yā. ³⁵ Te ìn de jeē cúu tēe stéén tutu ley Yaā Dios, ni cajnūhún de ya, chí coto ndee de ya cuní de:

³⁶ Maestro, ¿ndé ìn cúu jnūhun ndácu jniñu cánuú ndasí gá nuū tútu ley? achí de.

³⁷ Te ni cahān Jesús jíin de:

Coo manī ndasí ró jíin máá Jítóho rō Yaā Dios, nde jnāā ndasí ró sáha ró ndīhi jeē cúsi ni yā, nde jíin ini jíin ánuá rō, jíin ní jéē níjnūní rō, achí tutu. ³⁸ Yāha cúu jniñu ndácu ya jeē cujéhu ga te cánuú ndasí gá. ³⁹ Te jniñu uū jeē ní ndacu ya, suni súcuan cáhán: Cundáhú ni rō jnāhan ró nájñūhun cundáhú ni rō maá ró. ⁴⁰ Te chíji ndindúú jnūhun yáha

ní quenda ndihi ley jeē ní tee Moisés, jíin ndihi jeē ní castéén tēe ni canacani jnūhun Yaā Dios, achí yá.

Siquī jeē cúu Cristo sēhe yucūn David

(Mr. 12.35-37; Lc. 20.41-44)

⁴¹ Te níní cáyūcu tútú gá tēe fariseo un, te Jesús ni cajnūhun yá de:

⁴² ¿Ndese cájeni ni rō siquī Cristo? ¿Sēhe ndé yúcūn cúu ya?

Te ni cacahān de:

Sēhe yucūn David, achí de.

⁴³ Te ni cahān yā jíin de:

Núu súcuan ¿te ndese cúu jeē David ni cahān de Jitoho de ya, ni sáha Espiritu Santo nde jenahán? Chi ni cahān de:

⁴⁴ Máá Jítoho yō Yaā Dios ni cahān yā jíin Jítoho rī, Yaā quiji:

Cucōo ró lado váha ri nuū cujéhu ró,

te na sáha ri jeē quende rō poder táca jéē cájito uhū rohó.

Achí Yaā Dios. Achí David. ⁴⁵ Te núu sēhe yucūn David cúu Cristo, ¿te ndese cúu jeē ni cahān de jeē Jítoho de cúu ya? áchí yá.

⁴⁶ Te ni ñin de tu ní cúu stió cuíñí cuiti de jnūhun nuū yā. Te nde quivī ún tuá ni ñin de ní chúndeyí ni de cajnūhún de ya.

Jeē ni cahān yā jeē iyó cuéchi de jíjnáhan de

(Mr. 12.38-40; Lc. 11.37-54; 20.45-47)

23

¹ Yūcuán na te ni cahān Jesús jíin ñáyuu jíin tēe cáscuáha jíin yá:

² Tēe cástéén tutu ley Yaā Dios jíin tēe grupo fariseo, cájeni ni de jeē ndíso jníñu de jeē steén de ley jeē ni jéhe ya nuū Moisés. ³ Núu súcuan te cuatáhú ró te squícu ró táca jéē cándacu de nuū rō. Te ma sáha ró nájnūhun cásaá máá de. Chi cácahān-ni de, te tu cáscuácu de. ⁴ Chi suni cástéén de táca ley ni catava maá de jeē yí sáha, te cátee de siquī ñáyuu, te tu cácuñdeyí i squícu i. Te máá de jíjnáhan de, chi ni ñin xiní ndáha de tu cáscánda de jeē squícu de. ⁵ Te máni siquī jeē na cuájnuhún ñáyuu de cúu ndihi jeē casáha de. Chi cánujnahan ni de cuhni de cuehē jnūhun tutu i jneē de jíin ndaha de. Te suni cáscáni ga de yuhvā yusáhma de jeē steén jeē cácujuhnu ga de vésú inga ñayuu. ⁶ Te cánujnahan ni de cucōo de nuū silla yíñuhún gá nuū cáyeji ñayuu vico, jíin silla yíñuhún gá ini vehe i sinagoga. ⁷ Te suni cánujnahan ni de jeē cahán yíñuhún ñáyuu jíin de nuū calle, jíin jéē cahán i maestro jíin de.

⁸ Te máá ró jíjnáhan ró, ma cuáha ró jnúhun jeē cahán ñayuu maestro jíin ró. Chi inuú cácuu ndihi ró jéē cácuu ró hermano, te iyó ñin-ni Maestro rō jeē cúu ruhū, Cristo. ⁹ Te ma chíñuhún ró ni ñin tēe ñayívi yáha jeē cahán rō padre jíin de. Chi iyó ñin-ni Tátá rō jíjnáhan ró, Yaā ndeé andiví. ¹⁰ Te suni ma cuáha ró jnúhun jeē cahán i jitoho jíin ró. Chi iyó ñin-ni Jitoho rō, te suu cúu ruhū, Cristo. ¹¹ Te tēe mēhñu ró jíjnáhan ró jeē jejniñu nuū jnáhan, suu de cúu jeē cujéhu ga. ¹² Chi tēe jeē sajuhnu de máá de, sa ndululí de. Te tēe jeē sálulí de máá de, sa ndujéhu de.

¹³ Nacā xeēn ndoho róhó tēe cástéén tutu ley jíin róhó tēe fariseo, chi tēe stáhú-ni cácuu ró. Chi cájesi rō jeē quívi ñayuu ndaha Yaā andiví jéē ndacu ya jniñu nuū i. Chi tu quívicoo máá ró, ni tu cájēhe ro jnúhun quívicoo ñayuu nducú quívi.

¹⁴ Nacā xeēn ndoho róhó tēe cástéén tutu ley jíin róhó tēe fariseo, chi tēe stáhú-ni cácuu ró. Chi cáquende rō vehe ñahan ní caquendōo ndáhú. Yūcuán na te cájicān tahú nahán ró návāha caní ni ñayuu jeē tú na cuéchi ró. Jeē yúcuan xeēn gā ndoho ró castigo.

¹⁵ Nacā xeēn ndoho róhó tēe cástéén tutu ley jíin róhó tēe fariseo, chi tēe stáhú-ni cácuu ró. Chi ní ñuhun íchi jíin ní mar cájica cuu ró cánducú ró ñin ñayuu scandíje ró sáhān máá ró. Te núu ni candíje i, te cásaá ró jéē vihyá gā cúu cuéchi i jeē quihín i infierno vésú máá ró.

¹⁶ 'Nacā xeēn ndoho ró, chi cácuu ró nájñuhun tēe cuáá jēe steén ichi nuū ñáyuu. Chi cácahān rō: Núu ndé tēe jéjñuhun téyí de, te núu cahān de jeē Yaā Dios jeē ndeé ini templo na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí oro jeē iyó ini templo, na cuáha ya castigo núu ma squícu de, yūcuán na te cánuú squícu nahín de, cácahān rō. ¹⁷ Tēe cánéé tēe cuáá cácuu ró jēe castívi ró jñuhun cácahān rō. ¿Ndé ñin cúu jeē cujéhu ga, á oro un chíí Yaā Dios jeē ndeé ini templo jeē sáhii oro un? ¹⁸ Te suni cácahān rō: Núu ndé tēe jéjñuhun téyí de, te núu cahān de jeē Yaā Dios jeē chíí altar na cuáha ya castigo núu ma squícu de, yūcuán na te tu cánuú squícu de. Te núu cahān de jeē Yaā Dios jeē chíí ndajñíñu jeē cásocō nuū altar, na cuáha ya castigo núu ma squícu de, yūcuán na te cánuú squícu nahín de, cácahān rō. ¹⁹ Tēe cánéé tēe cuáá cácuu ró jēe castívi ró jñuhun cácahān rō. ¿Ndé ñin cúu jeē cujéhu ga, á ndajñíñu yúcu nuū altar, chíí Yaā Dios jeē sáhii yā ndajñíñu ún? ²⁰ Núu súcuan te tēe jéjñuhun téyí, te núu ndácunehen de Yaā Dios jeē chíí altar, núu súcuan te nde jíin ndajñíñu yúcu nuū altar ndácunehen de. ²¹ Te tēe jeē jéjñuhun téyí, te núu ndácunehen de templo, núu súcuan te nde jíin Yaā Dios jeē ndeé ini templo ndácunehen de. ²² Te tēe jéjñuhun téyí, te núu ndácunehen de andíví, núu súcuan te suni ndácunehen de mesa Yaā Dios te nde jíin máá Yaā Dios jeē ndeé nuū mesa un.

²³ 'Nacā xeēn ndoho róhó tēe cástéén tutu ley jíin róhó tēe fariseo, chi tēe stáhú-ni cácuu ró. Chi cásáha ró úxí uxí nuhní tamínú jíin yucū anís jíin yucū comino, te cásocō rō ñin ñin siquī tāca úxí un núu Yaā Dios. Te cástóo ró jñuhun cánuú ndasí gá nuū ley, suu jeē cáca ndaā rō, jíin jēe cundáhú ni rō jnāhan ró, jíin jēe candíje ró. Tāca jēe yáha cánuú sáha ró núu, te suni ma stóo ró jēe socó rō tāca yúcu ún. ²⁴ Cácuu ró nájñuhun tēe cuáá jēe steén ichi nuū ñáyuu. Chi cásquícu ró ñin jeē lulí gá un, te cástóo ró jēe cánuú gá. Te suu cúu nájñuhun jeē cātava rō chūcún ndíhí jeē ñíuhun nuū ndúxi, te cácocó ró ñin quití cáhnu jeē naní camello.

²⁵ 'Nacā xeēn ndoho róhó tēe cástéén tutu ley jíin róhó tēe fariseo, chi tēe stáhú-ni cácuu ró. Chi nájñuhun jeē cánacate ró yátā vaso jíin yátā cohó. Te ichi íni rō chi ñíuhun máni máá jñuhun cuíhná jíin jñuhun ndíyo ni. ²⁶ Tēe cuáá cácuu ró, fariseo. Xíhna gā sáha ró jēe coo ndoo ini anuá rō, te yūcuán na te suni coo ndoo tāca jēe casáha ró jēe cájito ñáyuu nuū.

²⁷ 'Nacā xeēn ndoho róhó tēe cástéén tutu ley jíin róhó tēe fariseo, chi tēe stáhú-ni cácuu ró. Chi cándāa ró nájñuhun vehe ndíyi nuū panteón jeē cáyaa. Chi ichi yátá jíto luu, te ichi íni ñíuhun chitú yiquí ndíyi jíin táca jēe tehyú. ²⁸ Te súcuan cácuu máá ró, chi ichi yátá rō casáha ró jeē tēe ndaā cácuu ró núu ñáyuu. Te ichi íni rō ñíuhun chitú jñuhun stáhú-ni jíin jñuhun néé.

²⁹ 'Nacā xeēn ndoho róhó tēe cástéén tutu ley jíin róhó tēe fariseo, chi tēe stáhú-ni cácuu ró. Chi cásáha ró vehe siquī nuū yíndūji ndíyi jíí rō, tēe ni canacani jñuhun Yaā Dios nde jenahán. Te cásáha luu ró vehe siquī nuū yíndūji tāca tēe ni iyo ndaā. ³⁰ Te cácahān rō: Núu jeē suni yúcu yó tiempo jeē ní cotecu ndíyi jíí yō, te ma squívi nduu yō jíin de jeē cáhni yō tēe ni canacani jñuhun Yaā Dios, achí ró. ³¹ Te súcuan cácahān ndaā rō jeē máá ró cácuu yucūn ñáyuu ni cajehni tēe ni canacani jñuhun ya. ³² Núu súcuan te tāca cuéchi jeē ní casquéjéé ndíyi jíí rō, máni un cásáha ga máá ró.

³³ 'Va sēhe coō cácuu ró, chi xeēn rō nájñuhun coō. ¿Ndese cācu ró jēe ma jnahnú ndetū rō quingoo ró infierno? ³⁴ Núu súcuan te tají rí tāca tēe nacani jñuhun Yaā Dios nuū rō, jíin táca tēe ndíchí jēe castéén jñuhun ya. Te sava de cahni rō, te sava de cata caa ró jicā cruz. Te sava ga de cani ró de ini tācá vehe íi sinagoga, te scúnu ró de quingoo de tācá ñuu. ³⁵ Te súcuan te condee cuéchi siquī máá ró jeē ní cajehni jíí rō tāca tēe ndaā, xíhna gā nde Abel tēe ndaā, te nde Zacarías sēhe Berequías, tēe ni cajehni de ini templo sava mehñu cuarto íi jíin altar. ³⁶ Jendaá cahán rí jíin ró jeē tāca cuéchi yáha condee siquī ñáyuu iyó vijna.

Jeē cucuíhyá ni yā jíto ya ñuu Jerusalén
(Lc. 13.34-35)

³⁷ 'Róhó ñuu Jerusalén, jéhni rō tēe cánacani jnūhun Yaā Dios, te jéhe ro yūū xinī tée tájí Yaā Dios vējicoo nuū rō. Te cuehē jínu ni cuni rī nastútú rí sēhe ró, nájñūhun ndují jéē nastútú tí sēhe tí chíji ndijēn tī, te tu ní cúní rō. ³⁸ Núu súcuan te vijna te stóo uun na ri rohó jíin séhe ró. ³⁹ Chi cáhán rī jíin ró jéē ndé vijna te ma cóto cuiti gā rō nuū rī, chi nde quiji quivī jeē cahán sēhe ró: Yōhyo vāha Yaā cúu Yaā véndiji jíin jniñu máá Jítoho yō Yaā Dios, achi i. Achí yá.

Jeē ní cachi yā jeē náā templo
(Mr. 13.1-2; Lc. 21.5-6)

24

¹ Te ni quenda Jesús ini templo cáhnu cuahān yā. Te ni quecoo tēe cáscuáha jíin yá, te ni cacahān de jíin yá siquī tācá vehe jeē ndejnáhan jeē cúu máá templo un. ² Te ni cahān yā jíin de:

Tāca jéē cájito ró yáha, jendaá cahán rī jíin ró jeē quiji quivī jeē ma cóso jnáhan ga ni ñin yuū, chi ndihi jnanū. Achí yá.

Na seña coo nuū cuácuyajni ndihi ñayiví
(Mr. 13.3-23; Lc. 21.7-24; 17.22-24)

³ Te ni jehēn yā jíin tēe cáscuáha jíin yá nde yucu Olivos, te ni cucōo ya yūcuán. Te ni quecoo de nuū yā, te ni cacajñūhun sñin de ya:

Castūhun ní ndé quivī coo tāca jéē ní cachi ní jéē coo. ¿Te na seña coo núu ni cuyajni quivī ndíji ní jíin jéē jínu ñayiví? áchí de.

⁴ Te ni cahān Jesús:

Coto ró jéē ma stahú ni ñin de róhó. ⁵ Chi quijicoo cuehē tēe jeē stahú jíin sñhví rí. Máá rí cúu Cristo, achi de. Te súcuan stahú de cuehē ñayuu. ⁶ Te nihīn rō jnūhun jeē tāca lado iyó guerra, chí je yajni coo guerra. Te ma yūhu ró, chi cánuú coo súcuan. Te ni ná tu jinū quivī ndihi ñayiví. ⁷ Chi ndonda nación siquī inga nación, te ndonda ñuu siquī inga ñuu jeē cuajnáhan. Te coo jnamā jíin cuéhyī xeēn. Te cháha chúcuan jnāa. ⁸ Te tāca jéē yáha cácuu jnūndóho quejéé xihna ñúhún gá.

⁹ 'Yūcuán na te nastúu i róhó jíin náhan ró jéē stóho i róhó te cahni i róhó. Te ndihi ñayuu quitī ni i nuū rō jeē siquí ruhū. ¹⁰ Te quivī ún chi cuehē ñayuu candíje caca yátá i, te quitī ni i nuū jnáhan i, te nastúu jnáhan i. ¹¹ Te canecoo cuehē tēe stahú, te cahān de jeē jnūhun Yaā Dios cánacani de, te stahú de cuehē ñayuu. ¹² Te nducuehē jniñu néé, te jeē yúcuan cuehē i ma cóo manī gā i. ¹³ Te ñayuu cuiñi nihin jíin jnūhun ri nde quivī jínu, ñayuu ún chi cācu. ¹⁴ Te jnūhun yáha síquī ndese ndácu Yaā Dios jniñu, cuitē núu ní cáhnu ñayiví, návāha cuni ñayuu tācá nación. Yūcuán na te jīnu ñayiví.

¹⁵ 'Te Daniel, tēe ni nacani jnūhun Yaā Dios, ni tee de jnūhun ñin tēe néé jéē quíji. Te róhó jéē cácahu tutu ún, na jécūhun ni rō. Chi ñin quivī te cuni rō jeē sáha ndevāha de jeē stíví de tācá ndajníñu iñi ini templo, te cuiñi de ini lugar iñi. ¹⁶ Te núu cuni rō jeē súcuan cúu, te ñayuu cáyūcú región Judea, na cúnu i caa i yucu quingoo i. ¹⁷ Te ñayuu cáyūcu núu quéhe, ma ndíví i ini vehe jeē quénehen i ndajníñu i, chi cánuú cunu yachī i návāha cācu i. ¹⁸ Te ñayuu cáhīin nuū ítu, ma ndíji i vehe jeē quíhin i sahna i. ¹⁹ Te quivī ún nacā jeē ndahú ñahan cáñuhun sēhe jíin ñahan cándeca yáquín, chi ma cúnihin ña cunu yachī ña. ²⁰ Te cacān tahú rō jeē ma quíji jnūndóho un jéē cunu ró máá tiempo cúun yuhvā ni quivī ndétātú. ²¹ Chi jeē quejéé un te coo cuehē jnūndóho xeēn, jeē ná tu coo súcuan nde quivī ní jecōo ñayiví te nde vijna. Te jeē ndíhi jnūndóho ún te ni ma cóo ga jeē súcuan. ²² Te núu tú nastíyi Yaā Dios tiempo jnūndóho ún, te ni ñin ñayuu ma cácu cuiti i. Te jeē siquí ñayuu cáncandíje jeē ní nacāji ya, jeē yúcuan nastíyi ya tiempo un.

²³ 'Núu súcuan te núu ñin ñayuu cahān jíin ró: Yāhá condēhe ró íne Cristo, chí: Yūcuán condēhe ró íne ya, achi i, te ma candíje ró jéē cahán i. ²⁴ Chi canecoo tēe cástahú jéē achi de jeē Cristo cúu de, chí achi de jeē tēe nácani jnūhun Yaā Dios cúu de. Te sáha de jniñu

jéhnú jeē naa ni ñayuu coto i, návāha stáhú de nde maá ñáyuu ní nacāji ya, te núu na cúu. ²⁵ Je ni castūhun rí nuū rō vijna nde ná tu coo. ²⁶ Núu súcuan te núu cahān ñayuu jíin ró: Cuácondēhe ró, chi nde nuū ñūhun téhé íne ya, achi i, te ma quihín rō condēhe ró. Chí núu cahān i: Nehen condēhe ró, chi ini vehe yāha íne ya, achi i, te ma candíje ró jíjnāhan ró. ²⁷ Chi nájñūhun jeē ndíndēe sáha taja te cúndijin nde ichi núu cáne niāndii jíin ndé ichi núu quée niāndii, suni súcuan coo quivī ndiji ruhū, Yaā ní nduu tēe, chi ndíhi ñayuu coto. ²⁸ Te nájñūhun jeē cutútú téji ndé-ni cúu nuū catú quiti ní jíhi, suni súcuan coo tāca jeē ni cáhān rī ndé-ni cúu-ni nuū cáhiyo ñayuu.

*Ndese coo quivī ndiji Yaā ní nduu tēe
(Mr. 13.24-37; Lc. 21.25-33; 17.26-30, 34-36)*

²⁹ Yūcuán na te núu ni ndíhi tāca jnūndóho quivī ún, te cojnúú níāndii, te yoō ma ndí gā. Te ningoo quimi andiví. Te tāca jeē íin andiví chi quisi i. ³⁰ Yūcuán na te coto ñayuu nuū maá rí, Yaā ní nduu tēe, ndiji ri ichi ándiví. Te ndahyū ñayuu tācá nación ní cáhnu ñayiví. Te coto i nuū ruhū, Yaā ní nduu tēe, ndiji ri jíin vícō andiví, te condiso ri cuehē poder, te yōhyo luu kujéhnú ri. ³¹ Te tají rí ndajéhé rí quingoo, te tiví níhin ya trompeta. Te quinastútú yá ñayuu ní nacāji ri ndicúún lado ñayiví, nde ñin lado ñayiví jíin ndé inga lado.

³² Vijna te scuáha ró ndese sáha mundēhe higo: Núu je ni nane numa, te ni najee ndaha, te cájini rō jeē jé ni cuyajni tiempo jihní. ³³ Te suni súcuan núu ni cajini rō jeē ní quejéé cúu tācá jniñu jeē ni cáhān rī, yūcuán na te na jécūhun ni rō jeē ní cuyajni quivī ndiji ri, te yachí coo. ³⁴ Jendaá cahán rī jíin ró jeē ma cúu ndíhi ñayuu jeē cóto jnūndóho ún, chi nde squícu ndíhi jniñu ún. ³⁵ Andiví jíin ñáyiví chi naa, te tāca jnūhun cáhān rī chi ma náā, chi ndíhi squícu.

³⁶ Te quivī jíin hora jeē ndíji ri, tú ni ñin ñayuu jiní, ni máá ndajéhé cáhiyo andiví, ni máá rí, Sēhe Yaā Dios. Chi máá ñin ni Tátá rī Yaā Dios cúu jeē jiní.

³⁷ Chi nájñūhun ni cuu quivī ni íyo Noé, suni súcuan coo quivī ndiji ruhū, Yaā ní nduu tēe. ³⁸ Chi quivī ún, nde ná tu cuun saū xeén, te cáyeji i cájini i, cánandāha i, te cájēhe i sēhe síhí i jeē nándāha, nde ni jinū quivī jeē ni quiví Noé ini barco cáhnu jeē naní arca. ³⁹ Te tu ní cáccandíje ñayuu jeē cuun saū xeén, te ni cuun, te ni ndaa ndute ni cajihí ndíhi i. Te suni súcuan coo núu na ndíji ruhū, Yaā ní nduu tēe. ⁴⁰ Te quivī ún cone uū tēe sájniñu nuū ítu. Te ñin de naquihin ri, te inga de ndōo. ⁴¹ Te coo uū ñahan jeē ndíco cáhnu, te ñin ña naquihin ri, te inga ña ndōo. Súcuan cuu jeē sava ñayuu naquihin ri te sava i quendōo, chi tu ní cáccandíje i.

⁴² Núu súcuan te ndito na cóo ni rō, chi tu cájini rō na quivī ndiji Jitoho rō. ⁴³ Te na chúhun ni rō jeē cahán jñūhun yátá yáha: Tēe chíí vehe, núu jeē jiní de na hora quiji ñacuíhná, te condito de, te ma cuáha de jñūhun sácuíhná ndajniñu vehe de núu. ⁴⁴ Te róhó jíjnāhan ró, suni súcuan coo tūhva ró, chi máá hora jeē tú na vé cájeni ni rō, te ndiji ruhū, Yaā ní nduu tēe.

*Jñūhun yátá síquī mozo
(Lc. 12.41-48)*

⁴⁵ Núu súcuan te coo ró nájñūhun ñin mozo jeē ndíto xiní te squícu vāha. Te máá patrón ni jeni de mozo un jéé cóto i ñayuu vehe de, návāha scáji i máá hora. ⁴⁶ Te yōhyo ndetū mozo un jéé núu ni ndee patrón, te cuni de jeē súcuan squícu vāha i. ⁴⁷ Jendaá cahán rī jíin ró jeē cani de mozo un jéé cóto i ndíhi ndajniñu de. ⁴⁸ Te núu mozo sáha néé cúu i, te jeni ni i jeē ma ndíji yachí patrón i, ⁴⁹ te quejéé i cani i jñāhan mozo i, te caji i coho i jíin tēe cánajini, ⁵⁰ núu súcuan te ndee-ni patrón quivī jeē tu ndétu i jíin hora jeē tú na vé jeni ni i. ⁵¹ Te stóho xeén de i, te squívi de i nuū cáhiin tēe stáhú-ni. Te yūcuan ndahyū i te nacayihí yuhu i jeē ndoho xeén i. Achí yá.

Jñūhun yátá síquī uxí sūchi síhí

25

¹ Te suhva cúu jeē ndácu Yaā andiví jniñu nuū ñáyuu: Cúu nájñuhun ñin vico nándāha. Te ni iyo uxī sūchi sǎhí jeē ní caquihin i linterna cándaha i, te ni quendacoo i cuajñahan i ñin tēe nandāha. ² Te uhūn i chi tú ndito xinī i, te uhūn i chi ndito xinī i. ³ Te sūchi tú ndito xinī, cándaha i linterna i, te tu cándaha i petróleo jeē náchuhun i. ⁴ Te sūchí ndito xinī, chi cándaha i botella petróleo jíin linterna i. ⁵ Te níni cúcuéé quiji tēe nandāha ún, te ni quee māhná, te ni caquixī ndihí i. ⁶ Te nuū ní cuu sava ñuú, te ni cajini i jeē cácana jee: Je vēji tēe nandāha. Cuángoo quijnahan rō de jíjnáhan ró, áchí. ⁷ Yūcuán na te tāca sūchi sǎhí un ní candonda i, te ni casátūhva i linterna i. ⁸ Te sūchi tú ndito xinī, ni cacahān i jíin sūchí ndito xinī: Cuāha jecu petróleo nuū rī jíjnáhan ró, chi cuandahvā linterna rī, achí i. ⁹ Te ni cacahān sūchí ndito xinī: Ma cúu, chi ma cánda jeē cúu máá rí jíin máá ró. Vāha ga quingoo ró núu cúyāhu, te cuaan ró jēe cúu máá ró. Achí i. ¹⁰ Te níni cuángoo i cuaan i, te ni quee-ni tēe nandāha. Te sūchi cáhiyo tūhva un, ní quivícoo i jíin de vico nándāha de. Te ni ndihyū yehyí. ¹¹ Te ni cunúu, te ni quecoo uhūn gā sūchi sǎhí un. Te ni cacahān i jíin tēe nándāha: Nune ní yéhyí na quívicoo ná, áchí i. ¹² Te ni cahān maá de: ¿Ndé nuū véjicoo ró? Chi tu jíin rī rohó, áchí de. Achí yá.

¹³ Yūcuán na te ni cahān yā:

Núu súcuan te ndito coo ni rō, chi tu cájini rō na quiví na hora ndiji ruhū, Yaā ní nduu tēe. Achí yá.

Jñuhun yátá síquī tēe ní jēhe núu xūhun núu tāca mozo

¹⁴ Te suhva cúu jeē ndácu Yaā andiví jniñu nuū ñáyuu: Cúu nájñuhun ñin tēe jeē quihīn jicá de inga ñuu. Te nde ná tu quihīn de te ni cana de mozo de jíjnáhan, te ni jēhe núu de xūhún de nuū i, jeē na sájniñu i jíin návāha nducuehē.

¹⁵ Te nuū ñin i ni jēhe de uhūn mil xūhun cáa. Te nuū inga i ni jēhe de uū mil. Te nuū inga i ni jēhe de ñin mil. Súcuan ni jēhe de, chi jíin de nasaa canda ñin ñin i sájniñu i jíin. Yūcuán na te ni quihin de ichi cuahān jicá de. ¹⁶ Te mozo jeē ní quihin uhūn mil xūhún, ni sájniñu de jíin. Te ni nihīn de uhūn gā mil síquī. ¹⁷ Te mozo jeē ní quihin uū mil xūhún, suni ni nihīn de uū gā mil síquī. ¹⁸ Te mozo jeē ní quihin ñin mil xūhún, ni jehēn de ni jete de yaū, te ni chisāhí de xūhún patrón de.

¹⁹ Te ni yāha cuehē tiempo, te ni ndee patrón mozo un jíjnáhan. Te ni nandacān de cuenta nuū i. ²⁰ Te ni quee mozo jeē ní quihin uhūn mil xūhún un, te ni nacuāha de xūhún un núu patrón de jíin úhūn gā mil jeē ni nihīn de síquī. Te ni cahān de: Ni jēhe ní úhūn mil nuū ná, te yāha íyó úhūn gā mil jeē ni nihīn na síquī. Achí de. ²¹ Te ni cahān patrón jíin de: Iyó váha núu súcuan. Yōhyo váha mozo cúu ró jēe síquī váha ró. Chi váha ni síquī ró ñin jniñu lúli-ni, te vijna te cuāha ri jniñu jéhnū ndacu ró. Te quiví ró núu cusī ni rō jíin rí. Achí de. ²² Yūcuán na te ni quee mozo jeē ní quihin uū mil xūhún un. Te ni cahān de: Ni jēhe ní uū mil nuū ná, te yāha íyó uū gā mil jeē ni nihīn na síquī. Achí de. ²³ Te ni cahān patrón jíin de: Iyó váha núu súcuan. Yōhyo váha mozo cúu ró jēe síquī váha ró. Chi váha ni síquī ró ñin jniñu lúli-ni, te vijna te cuāha ri jniñu jéhnū ndacu ró. Te quiví ró núu cusī ni rō jíin rí. Achí de. ²⁴ Te ni quee mozo jeē ní quihin ñin mil xūhún un, te ni cahān de jíin patrón: Je jíin na níhín jēe tēe xeēn cúu ní. Chi cuehē gā cuní ni vēsú jeē cúu sáha mozo ni, te cuehē gā nandacān ní vēsú jeē ni jēhe ní. ²⁵ Te jeē yúcuan ní yūhu ná, te ni jehēn na ní chisāhi ná xūhun ní chíji ñuhun. Te yāhá na nacuāha na xūhun ní. Achí de. ²⁶ Te ni cahān patrón jíin de: Mozo cuxí cúu ró te máni jniñu née sáha ró. Chi jéni ni rō jeē cuehē gā cuní rī vēsú jeē cuu sáha mozo rī, te cuehē gā nandacān rī vēsú jeē ni jēhe rī. ²⁷ Núu jeē ni chúne ró xūhun rí nuū banco nuú, te jeē ní ndee rī te naquihin ri xūhun rí nde jíin séhe xūhun núu. Achí de jíin i. ²⁸ Te ni cahān de jíin táca gá mozo de: Núu súcuan te quende rō mil xūhun jíinā nuū i, te cuāha ro núu mozo névāha uxī mil. ²⁹ Chi ñayuu jeē névāha, sa quiji ga nuū i, te coneváha cuehē i. Te ñayuu jeē tu névāha, sa cujiyo-ni vēsú jecu jeē névāha i. ³⁰ Te mozo yāha jēe tu sájniñu váha, quenehen ró i na quíhín i nuū quéhe nuū née. Te yúcuan ndáhyū i te nacayíhí yuhu i jeē ndoho xeēn i. Achí patrón un.

Siqui jeē cóo juicio tãcá naci3n

³¹ Te ni cahãn gã yã:

Ïn quivĩ te ndiji maá Yaã ní nduu tãe, te cuu ya Rey nuũ ñayuu. Te tãcã ndajéhé yã cuiñi ñí xiin ya. Te cuc3o ya mesa nuũ ndãcu ya jniñu, te y3hyo luu cujéhnua ya. ³² Te ndutútú ñayuu tãcã naci3n nuũ yã. Te sásin ya i jijnãhan i, nãjnũhun cúsin lanchi jijn ndixúhú sãha tãe ndíto ti. ³³ Te ñayuu váha jeē cúu nãjnũhun lanchi, chucú yã i lado váha ya. Te ñayuu neé jeē cúu nãjnũhun ndixúhú, chucú yã i lado jecó yã. ³⁴ Yũcuán na te cahãn Rey jijn ñayuu cáhiin lado váha ya: Nacã ndetũ r3 jeē ni sãha Tátã rĩ jijn ró. Nehen quivicoo ró núu ndãcu ró jniñu. Chi nde quivĩ ní jec3o ñayivĩ te je ni sãtũhva ya nuũ ndacu ró jniñu. ³⁵ Chi ni jii rĩ s3co, te ni cajéhe ro jéé ní yeji rĩ. Ni jichĩ rĩ ndute, te ni cajéhe ró jéé ní jihĩ ri. Ni quiji ri nde ñuu jicã, te ni cajéhe núu ró vehe ni nd3o ri. ³⁶ Ni cumani sahma ri, te ni cajéhe ró. Ni cocuhũ rĩ, te ni jecondéhe ró ruhũ. Ni ine ri vecãa, te suni ni jecondéhe ró ruhũ. Súcuan cahãn yã jijn ñayuu cáhiin lado váha ya. ³⁷ Yũcuán na te cahãn ñayuu váha un jijn yã: ¿Na quivĩ ní cajito ná ñihĩn jéé jii ni sóco, te ni cajéhe na jéé ní yeji ní, chí jéé jichĩ ni ndute, te ni cajéhe ná ní jihĩ ní? ³⁸ ¿Te na quivĩ ní cajito ná jéé ní quiji ní ndé ñuu jicã, te ni cajéhe núu ná vehe ni nd3o ní, chí jéé cúmani sahma ní, te ni cajéhe ná? ³⁹ ¿Te na quivĩ ní cajito ná jéé cuhú ni, chí jéé íne ní vecãa, te ni jecondéhe ná ñihĩn? achi i. ⁴⁰ Yũcuán na te cahãn Rey jijn i: Jendaã cahãn rĩ jijn ró jéé ná ni casãha ró súcuan jijn ñn tãcã hermano rĩ jeē cácan díje, vésú ñayuu núu ga cúu i, te nuũ maá rĩ ni casãha ró.

⁴¹ Yũcuán na te suni cahãn Rey jijn ñayuu cáhiin lado jecó yã: Ñayuu jnahnũ ndetũ cácuu ró. Cuijiyo quingoo ró núu ñuhún jeē cayú ñí cáni, nuũ iyó tũhva cone jexeén jijn táca táchĩ jeē cájejniñu nuũ. ⁴² Chi ni jii rĩ s3co, te tu ní cájéhe ro jéé cáji rĩ. Ni jichĩ rĩ ndute, te tu ní cájéhe ro jéé coho ri. ⁴³ Ni quiji ri nde ñuu jicã, te tu ní cájéhe núu ró vehe nd3o ri. Ni cumani sahma ri, te tu ní cájéhe ró. Ni cocuhũ rĩ, ni ine ri vecãa, te tu ní jecondéhe ró ruhũ. Súcuan cahãn yã jijn ñayuu cáhiin lado jecó yã. ⁴⁴ Yũcuán na te cahãn ñayuu un jijn yã: ¿Na quivĩ ní cajito na ñihĩn jéé jii ni sóco, chí jéé jichĩ ni ndute, chí jéé ní quiji ní ndé ñuu jicã, chí jéé cúmani sahma ní, chí jéé cuhú ni, chí jéé íne ní vecãa, te tu ní cájéhe na jéé cúmani nuũ ní? Achi i. ⁴⁵ Yũcuán na te cahãn yã jijn i: Jendaã cahãn rĩ jijn ró, jeē tu ní casãha ró súcuan jijn ni ñn tãcã hermano rĩ jeē cácan díje, vésú ñayuu núu ga cúu i. Núu súcuan te suni nuũ maá rĩ cúu jeē tu ní casãha ró, achi yã. ⁴⁶ Yũcuán na te quingoo ñayuu un núu nd3o i ñí cáni. Te ñayuu váha un quivicoo i nuũ cótecu i ñí cáni. Achĩ Jesús.

Jeé ní casquijnãhan de jnũhun jeé jni de Jesús
(Mr. 14.1-2; Lc. 22.1-2; Jn. 11.45-53)

26

¹ Te nuũ ní ndihĩ ni cahãn Jesús táca jnũhun yãha, te ni cahãn yã jijn tãe cáscuãha jijn yã:

² Je cájini r3 jeē uũ na quivĩ te coo vico pascua. Te ruhũ, Yaã ní nduu tãe, nastúu i ruhũ jeē cúu rĩ jicã cruz, achĩ yã.

³ Yũcuán na te sutũ cácujeñu, jijn tãe cástéén tutu ley, jijn táca tãe jéñu jeē cándacu jniñu nuũ ñayuu hebreo, ni candutútú de ini patio vehe palacio maá sũtũ cujéñu ga jeé nanĩ Caifás. ⁴ Te ni candajnũhún de ndese jni de Jesús jijn jnũhun stãhú, te cahni de ya.

⁵ Te ni cacahãn de:

Ma jniĩ y3 de maá quivĩ víco, chí ndonda ñayuu siquĩ y3, achĩ de.

Jnũhun ñahan jeé ní chuhun perfume xinĩ yã
(Mr. 14.3-9; Jn. 12.1-8)

⁶ Te íne Jesús ñuu Betania vehe Sim3n, tãe ni ndoho cuehyĩ stehyú. ⁷ Te ni quee ñn ñahan nuũ yã, ndãhá ña ñn frasco yuũ luu jeé ñũhun aceite perfume jeé y3hyo yahu ndéé. Te ni chuhun ña xinĩ yã ní ní jéé yéji yã staã. ⁸ Te ni cajito tãe cáscuãha jijn yã, te ni caquitĩ ni de, te ni cacahãn de:

¿Najehē cúu jeē náā saá-ni perfume jíñā? ⁹ Chi cuu xícó yahu yó núú, te cuāha yo xúhun núú ñáyuu ndahú. Achí de.

¹⁰ Te ni jini Jesús jnūhun cácahān de. Te ni cahān yā jíín de:

¿Naun cásáha ró jēē nácani uhū ni ñahan yáha? Chi ñin jniñu váha cúu jeē ni sáha ña jíín rí. ¹¹ Chi níni coyūcu ñáyuu ndahú jíín ró, te ruhū chi tuá condee rī jíín ró. ¹² Chi jeē ní chuhun ña perfume yáha ruhū, suu cúu jeē ni sātūhva ña ruhū nde quivī quíndūji rí. ¹³ Jendaá cahān rī jíín ró jeē ní cáhnu ñayivī ndé-ni cúu nuū cuité jnūhun yáha jēē jnáma rī ñayuu, suni nacani i jnūhun jeē ni sáha ñahan yáha, návāha cocuhun ni ñayuu ña, áchí yá.

Jeē ní nastúu Judas yā

(Mr. 14.10-11; Lc. 22.3-6)

¹⁴ Yūcuán na te ñin jeē ndihúxí uū tēē cáscuáha ún, nání de Judas Iscariote, ni jehēn de nuū sutú cácujuhnu. ¹⁵ Te ni cahān de jíín:

¿Nasaa cuāha ní núú ná, te na nastúu ná de nuū ní? áchí de.

Te ni cajēhe ocō uxī xūhun plata nuū de. ¹⁶ Yūcuán na te nde quivī un ní quejéé de ndúcú de modo ndese nastúu de ya nuū sutú jijnáhan.

Jeē ní jequin yā Cena yā

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Te máá quivī jeē quejéé vico jeē cáyeji ñayuu pan jeē tú na levadura yíhi, te ni quijicoo tēē cáscuáha un núú Jesús. Te ni cacahān de jíín yá:

¿Nde nuū cuní ni jēē quísatūhva ná cuxíni ní vico pascua? áchí de.

¹⁸ Te ni cahān yā:

Cuángoo nde ñuu, vehe tēē jeē jé ni cacahān yō, te cahān rō jíín de: Achí máá Maestro jeē ní cuyajni quivī cuu yā. Te vijna te caji yā vico pascua ini vehe ní jíín tēē cáscuáha jíín yá, achi rō. Achí yá.

¹⁹ Te tēē cáscuáha jíín yá, ni casáha de nájñūhun ni ndacu Jesús jniñu nuū de, te ni casatūhva de jeē cuxíni ya vico pascua.

²⁰ Te jeē cuácuaa, te ni quee yā, te ni cucōo ya mesa jíín ndihúxí uū tēē cáscuáha jíín yá. ²¹ Te níni yéji yā jíín de te ni cahān yā:

Jendaá cahān rī jíín ró jeē ñin rōhó nastúu ruhū vijna, áchí yá.

²² Te ni cacucuíhyá ndasí ni de. Te ná ñin ná ñin de ni cacajñūhún de ya:

¿A sáña cúu? áchí de.

²³ Te ni cahān yā:

Ñin rōhó jēē cáyeji cáhnu jíín rí ñin cohō, suu ró nastúu ruhū. ²⁴ Te ruhū, Yaā ní nduu tēē, jendaá cúu jeē quihín rī cuu rī, nájñūhun yósó jnúhun ri nuū tútu ií. Te nacā xeēn ndoho tēē nastúu ruhū. Váha ga núu tu ní cácu tēē un núú, áchí yá.

²⁵ Yūcuán na te ni cahān Judas, tēē nastúu ya:

¿A sáña cúu, Maestro? áchí de.

Te ni cahān yā jíín de:

Suu ró cúu, áchí yá.

²⁶ Te níni jēē cáyeji de jíín yá, te ni quihin ya pan, te ni nacuatáhu yá, te ni tahu cuéchi yá, te ni jēhe ya nuū tēē cáscuáha jíín yá. Te ni cahān yā:

Caji rō jijnáhan ró, chi yāha cúu yiqui cúñu rī, áchí yá.

²⁷ Yūcuán na te ni quihin ya ñin copa ndūxi uva, te ni nacuatáhu yá, te ni jēhe ya nuū de. Te ni cahān yā:

Coho jijnáhan ró. ²⁸ Chi yāha cúu ñiñ rī jeē cuáha ri jeē cúu contrato jeé, te cati jeē ndundoo cuéchi cuehē ñayuu, te coo jnūhun cáhnu ni nuū cuéchi i. ²⁹ Te cáhán rī jíín ró jeē ndé vijna te ma cóho ga rī ndūxi ndehē uva yāhá, chi nde quiji quivī ndacu Tátá rī jniñu ní ñayiví, te sáa te coho tucu ri jíín ró jijnáhan ró. Achí yá.

Jeē ní cachi yā jeē yūhu Pedro cahān de jeē jíní de ya

(Mr. 14.26-31; Lc. 22.31-34; Jn. 13.36-38)

³⁰ Te ni jita ya ñin yaa ñi jín de jínáhan de. Te ni quenda ya cuahān yā jín de nde yucu Olivos. ³¹ Yūcuán na te ni cahān yā:

Ndivii rō nayūhu ró jeē siquí ruhū jecuāā vijna. Chi suhva je yósó jnúhun ri nuū tútu ñi, ni cahān Yaā Dios: Cuāha ri jnúhun jeē cáhni ñayuu tēe ndíto lanchi, te lanchi un cuítē núu ti jeē yūhu tí, achí. ³² Te jeē nátecu rī, te xīhna ruhū cosnúu rí quihñ rī regiōn Galilea, te sáa te najinūcoo ró, achí yá.

³³ Yūcuán na te ni cahān Pedro:

Vēsú ndíhi de na náyūhú de, te máa ná chi ma náyūhú cuítē ná, achí de jín yá.

³⁴ Te ni cahān yā jín de:

Jendaá cahān rī jín ró jeē jecuāā vijna, nde ná tu cana líhli, te yūhu ró jeē jñi ñayuu rohó, te unī jínu cahān rō jeē tu jíní rō ruhū, achí yá.

³⁵ Te ni cahān Pedro jín yá:

Vēsú núu cuu na jín ní, te ma cahān cuítē na jēe tu jíní na níhín, achí de.

Te suni súcuan ni cacahān ndíhi tēe cáscuáha jín yá.

Jeē ní jícān tahu yā nuū huerto Getsemaní

(Mr. 14.32-42; Lc. 22.39-46)

³⁶ Yūcuán na te ni jinū Jesús jín tēe cáscuáha jín yá ñin lugar nuū naní Getsemaní. Te ni cahān yā jín de:

Yāhá-ni cucōo ró, te na quíhín rī yūcuan cácan tahu rī, achí yá.

³⁷ Te ni jeca ya Pedro jín ndíndúú séhe Zebedeo cuahān yā jín de. Te ni quejéé yá cucuíhyá ndasí ni yā te cúxí ni yā jeē quíji jnúndóho siquí yā. ³⁸ Yūcuán na te ni cahān yā jín de:

Yōhyo cúcuíhyá ni rī, te ndúcú sáha jeē cúu rī. Yāhá condetu ró te condito ró jín rí.

³⁹ Te ni jica ya jecu gā, te ni jecuññi yítí yá ni jequin ya nuū yā nuū ñúhun, te ni jicān tahu yā suhva nuū Yaā Dios:

Tátá maá ná, núu cuu te tejiyo ní jnúndóho yáha jēe ma quíji siquí ná. Te nasūu jēe cuní maá ná, chi jeē cuní maá ní na cóo, achí yá.

⁴⁰ Yūcuán na te ni ndee yā nuū ndínúni tēe cáscuáha jín yá, te ni jito ya jeē cáquixi de. Te ni cahān yā jín Pedro:

¿A tu ní cánda ró condito ró jín rí vēsú ñin hora? ⁴¹ Coó ndito ni rō te cacān tahu rō jeē chindéé ñáhan yá rohó jēe ma sáha ró cuéchi jeē coto ndee jeneé rōhó. Chi cuní ndije ánuá rō squícu vāha ró, te yíquí cúñu rō chi tu fuerza, achí yá.

⁴² Te ni jehēn tucu ya vuelta uū, te suhva ni jicān tahu yā:

Tátá maá ná, te núu ma cúu cujiyo jnúndóho yáha jeē ma ndóho ná, te na cóo jeē cuní maá ní núu súcuan, achí yá.

⁴³ Te ni ndee tucu ya nuū de, te ni jito ya jeē cáquixi tucu de, chi yōhyo cájii de māhná.

⁴⁴ Te ni stóo ya de, te cuahān tucu ya cuacacān tahu yā vuelta unī. Te suni jnúhun yūcuan ní cahān yā. ⁴⁵ Yūcuán na te ni ndee tucu ya nuū de jínáhan de, te ni cahān yā jín de:

Vijna te cusū rō te ndetātu ró. Te je ni quee hora, te ruhū, Yaā ní nduu tēe, natūu ri te jñi tēe cáhīyo cuéchi ruhū. ⁴⁶ Ndocuññi jínáhan ró, chi je vēji tēe nastúu ruhū, te quihñ yō jín de, achí yá.

Jeē ní cajñi de Jesús

(Mr. 14.43-50; Lc. 22.47-53; Jn. 18.2-11)

⁴⁷ Te sá cáhán gā yā súcuan, te ni quee-ni Judas, ñin jnáhan jeē uxí uū tēe cáscuáha jín yá. Te vējicoo cuehē tēe jín de, cándaha de espada jín yujnu. Chi sutū cácujuhnu jín táca tēe jénu cándacu jniñu nuū ñayuu hebreo, ni catají tēe ún. ⁴⁸ Te Judas, tēe nastúu ya ún, je ni jēhe de ñin seña nuū tēe un jínáhan, chi ni achi de:

Tēe jeē téchūhu rí un cúu. Te jñi ró jínáhan ró, achí de.

⁴⁹ Te ni quee-ni de nuū Jesús, te ni cahān de:

Ta ni cuaa, Maestro, achí de.

Te ni techūhú de ya. ⁵⁰ Te ni cahān Jesús jíin de:

Amigo, ¿na jniñu vēji ró? áchí yá.

Yūcuán na te ni jinūcoo tāca gá tēe ún, te ni cajniñ de Jesús.

⁵¹ Te ñin tēe jeē cáhiin jíin Jesús, ni tava de espada de, te ni jehnde de sōho ñin mozo maá sūtū cujéhnū ga. ⁵² Yūcuán na te ni cahān Jesús jíin de:

Nachuvāha espada rō, chi tāca jēē cájejnāhan jíin espada, suni jíin espada cuu. ⁵³ ¿Te á tu cájini rō jeē cuu cacān tahu rī nuū Tatá rī, te vijna ñúhún tají yá víhyá gā uxī uū mil ndajéhé andiví jeē jnama ruhū? ⁵⁴ Te núu sūcuan, ¿te ndese cuu squícu jnūhun cáhán tutu ñi jeē cánuú ndoho ri sūcuan? áchí yá.

⁵⁵ Yūcuán na te ni cahān yā jíin ñáyuu cuehē ún:

¿Te va tēe cuíhná cúu ri jeē véjicoo ró jíin espada jíin yujnu jeē jniñ ró rúhū jeē sūcuan. Tāca quívī ni cucōo ri jíin ró jijnāhan ró ini templo cáhnu, ni steén rī jnūhun, te tu ní cájini ró rúhū. ⁵⁶ Te sūcuan cásáha ró návāha na squícu jeē cahán tutu ñi jeē ní catee tēe ní canacani jnūhun Yaā Dios, achí yá.

Yūcuán na te ndíhi tēe cáscuáha jíin yá, ni castóo de ya, ni cajinu de cuango de.

Jeē ní indichi Jesús nuū junta tēe cácujehnū ga

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Te tēe ni cajniñ Jesús, cuango de jíin yá nuū Caifás, tēe cúu sutū cujéhnū ga. Te yūcuan cáhiin tūtú tēe cástéén tutu ley jíin táca tēe jéhnū cándacu jniñu. ⁵⁸ Te Pedro chi jíca-ni ndíquin de ya, te ni jinū de patio sutū cujéhnū ga. Te ni quívī de ini patio, te ni cucōo de jíin táca policía, návāha coto de ndese coo siquī yā.

⁵⁹ Te sutū cácujehnū jíin táca tēe jéhnū jíin ndíhi tēe cásáha junta cujéhnū ga, ni canducú de tēe cahān jnūhun yáá síquī Jesús, chi cahni de ya cácuñi de. ⁶⁰ Te vēsú ni quecoo cuehē ñáyuu cácahān yaá, te tu ní cánihin de cuēchi siquī yā jeē cahni de ya. Te jeē sándihí te ni quecoo uū testigo jeē cahán yaá síquī yā. ⁶¹ Te áchí:

Tēe yáha ní cahān de jeē cuu canu de templo Yaā Dios, te nuū uní-ni quívī te nucondichi sáha de, áchí.

⁶² Yūcuán na te ni ndocuññi maá sūtū cujéhnū ga, te ni cahān de jíin yá:

¿Naun tu cáhán cuítī rō? ¿A íyó ndáa jeē cácahān tēe yáha síquī rō? Achí de.

⁶³ Te Jesús tu ní cáhán cuítī yā. Te ni cahān maá sūtū cujéhnū ga:

Ndácu ri jniñu nuū rō jeē cahān ndaā rō cuni nahín maá Yaā Dios, Yaā técu. Cachi cají te núu máá ró cúu Cristo, Sēhe Yaā Dios, achí de jíin yá.

⁶⁴ Te ni cahān yā:

Suu ri cúu, nájnūhun cáhán rō. Te na cástūhun rí nuū rō jijnāhan ró jēē tāca quívī jeē quíji te coto ró rúhū, Yaā ní nduu tēe, condee rī lado váha Yaā íyó poder. Te coto ró jēē ndíji ri ichi ándiví jíin vícō. Achí yá.

⁶⁵ Yūcuán na te sutū cujéhnū ga ni jehnde de sahna de jeē quití ndasí ni de, te ni cahān de:

Tēe yáha chi cáhán de jnūhun ndevāha jeē quití ni Yaā Dios, chi sáha de máá de Sēhe Yaā Dios. ¿Ndé jíni ñúhún gá yō testigo núu sūcuan? Chi je ni cajini ró jnūhun ndevāha cáhán de. ⁶⁶ ¿Te ndese cájeni ni rō? achí de.

Te ni cacahān tēe cuehē ún:

Cuēchi cúu jeē cahán de sūcuan, te jíni ñúhún cuu de, áchí.

⁶⁷ Yūcuán na te ni catesihí de nuū yā, te ni cacani de ya. Te sava ga de ni cacatu de nuū yā. ⁶⁸ Te ni cacahān de:

Te núu Cristo cúu ró, te cachi rō ndé ñin cúu jeē ní cani róhó, áchí de.

Jeē ní cachi Pedro jeē tu jíni de ya

(Mr. 14.66-72; Lc. 22.56-62; Jn. 18.15-18, 25-27)

⁶⁹ Te níni jēē sūcuan cúu, te Pedro néne de nuū quéhe ini patio. Te ni quee ñin ñahan jéjniñu vehe ún, te ni cahān ña jíin de:

Róhó chi suni ni jica ró jíin Jesús tēe Galilea, achí ña.

⁷⁰ Te máá de tu ní cáchi de, chi ni cahān de ni cajini ndihi ñayuu:

Tu jíiní rī na jnūhun cáhán rō, achí de.

⁷¹ Te ni quenda de yéhyí núū quéhe, te ni jito inga ñahan nuū de. Te ni cahān ña jíin ñáyuu cáhiin yūcuán:

Tēe yáha chi suni ni jica de jíin Jesús, tēe ñuu Nazaret, achí ña.

⁷² Te inga jíinu tu ní cáchi tucu de, chi sa ni cahān teyí de:

Tu jíiní rī tēe ún, achí de.

⁷³ Te ni cunúu jecu gā, te ñayuu cáhiin yūcuan ní quecoo i nuū Pedro, te ni cacahān i: Jendaá ndije jeē suni jnāhan tēe un cúu ró, chi ndijin cahán rō jeē tēe Galilea cúu ró, achí i.

⁷⁴ Yūcuán na te ni quejéé de cáhán teyí de jeē na cóndee cuēchi siquī de núu tu cáhán ndaā de:

Tu jíiní cuíti rī tēe ún, achí de.

Te ni cana-ni líhli. ⁷⁵ Te ni nucūhun ni de jnūhun ni cahān Jesús jíin de: Nde ná tu cana líhli, te yūhu ró te cahān rō unī jíinu jeē tu jíiní rō ruhū. Te ni quenda de cuahān de, te yōhoyo ni ndahyū de jeē ní cachi de jeē tu jíiní de ya.

Jeē cuángoo de jíin yá nuū Pilato

(Mr. 15.1; Lc. 23.1-2; Jn. 18.28-32)

27

¹ Yūcuán na te ni cundijin. Te tāca sūtū cácujuhnu jíin táca tēe jéhu jeē cándacu jniñu nuū ñáyuu hebreo, ni casquíjnāhan de jnūhun ndese sáha de jeē cuu Jesús. ² Te ni cajihni de ya, te cuángoo de jíin yá nuū Poncio Pilato, tēe cúu gobernador.

Jeē ni jíihī Judas

³ Yūcuán na te Judas, tēe ni nastúu ya un, ní jito de jeē ní cunihin siquī yā jeē cúu yā. Te ni jnahuhū ni de, te ni nacūaha de ocō uxī xūhun plata jeē ni níhin de nuū sūtū cácujuhnu jíin núū tāca tēe jéhu. ⁴ Te ni cahān de jíin:

Cuēchi ni sáha ná jéé ní nastúu ná ñin tēe cuu de, te tú na cuēchi de.

Te máá sūtū un ní cacahān de:

¿Vé jítú ni ruhū? Cuēchi máá ró cúu. Achí de.

⁵ Te ni scāne Judas xūhún un ini templo. Te ni quenda de cuahān de, te ni scuéhne de máá de.

⁶ Te sūtū cácujuhnu ni canastútú de xūhún un, te ni cacahān de:

Ma cúu chuhun yó xūhun yáha ini yejnū nuū cásocō ñayuu, chí xūhun jéē ni jéconā jeē cúu ñin tēe cúu, achí de.

⁷ Yūcuán na te ni casándaā de jeē xūhun yūcuan cuaan de ñuhun jeē naní Lugar Ñuhun Quíxin, návāha yūcuán quindūji ñayuu ñuu jicá. ⁸ Jeē yūcuan cúu jeē ndé vjna nání ñuhun ún Lugar Ñuhun Níñī. ⁹ Te sūcuan ni squícu jnūhun ni cahān Jeremías, tēe ni nacani jnūhun Yaā Dios nde jenahán: Ni caquihin de ndihóco uxī xūhun plata, te sūcuan-ni cúu ñin yāhu jeē ní casáha ñayuu Israel cuenta jeē ndeé yā nuū i. ¹⁰ Te jíin xūhun un ní cajeen de ñuhun quíxin, nájnūhun ni ndacu máá Jítóho yō Yaā Dios jniñu nuū rī. Achí Jeremías.

Jeē ní indichi Jesús nuū Pilato

(Mr. 15.2-5; Lc. 23.3-5; Jn. 18.33-38)

¹¹ Te nuū ní jinūcoo de jíin Jesús nuū gobernador, tēe cúu Pilato, te ni cajnūhún de ya: ¿A máá ró cúu Rey ñayuu hebreo? achí de.

Te ni cahān Jesús:

Suu ri cúu, nájnūhun cáhán rō.

¹² Te sūtū cácujuhnu jíin tēe jéhu cándacu jniñu, ni cacahān de cuēchi siquī yā. Te tú na vé ni cáhán cuíti yā. ¹³ Yūcuán na te ni cahān Pilato jíin yá:

¿A tu jíiní ró jéē cacahān de cuéhē cuēchi siquī rō? achí de.

¹⁴ Te tu ní cáhán cuíti yā ni ñn jñūhun jíin de. Te nahán ní naa ni gobernador jeē tú na vé ni cáhán yā jíin de.

Jeē ní cundaā jeē cúū yā

(Mr. 15.6-20; Lc. 23.13-25; Jn. 18.38-19.16)

¹⁵ Te íyó costumbre gobernador jeē quivī víco un siáá de ñn tēe íne vecāa, núu na-ni tēe cáculi ñayuu. ¹⁶ Te suu quivī un íyó ñn tēe íne vecāa, nání de Barrabás, te je ni jíitē núu jñūhun jeē ni sáha de cuēchi xeēn. ¹⁷ Te nuū ní candutútú ñayuu, te ni cahān Pilato jíin í:

¿Ndé tēe cáculi rō jeē siaá rī vijna: á Barrabás, chí Jesús jeē cúu Cristo, Yaā ní tají Yaā Dios? achí de.

¹⁸ Súcuān ni cahān de chi cúní de siáá de Jesús. Chi je ni jecūhun ni de jeē ní cacucucúsún ni tāca sūtū un cájito de ya, te jeē yúcuān ní quijicoo jíin yá nuū de.

¹⁹ Te níni jēe néne Pilato silla nuū sándaā de jniñu, te ñasíhí de ni tají ña jñūhun nuū de: Ma quívi nduu rō jíin ñáyuu síquī tēe ndaā jíinā, chi yōhyo ni siūhu jéni ruhū cuni jeē síquí de, áchí ña.

²⁰ Te sutū cáculjéñu jíin táca tēe jéñu, ni cascáhán de ñayuu jeē na cáculi i jeē siaá de Barrabás, te na cúū Jesús. ²¹ Yūcuān na te ni cajñūhún tucu gobernador:

Jeē úu de, ¿ndé ñn de cáculi rō jeē siaá rī? achí de.

Te ni cacahān í:

Siáá ni Barrabás, achí í.

²² Te ni cajñūhún Pilato:

Núu súcuān te ¿ndese cáculi rō jeē sáha rí jíin Jesús, tēe cúu Cristo? achí de.

Te ni cacahān ndíhi í:

Cata caa ní de jicā cruz, na cúū de, áchí í.

²³ Yūcuān na te ni cahān Pilato:

¿Na cuēchi ni sáha de núu súcuān? achí de.

Te ñayuu un ní cacana jee ndasí í:

Cata caa ní de jicā cruz, na cúū de, áchí í.

²⁴ Te ni jini Pilato jeē tu cúndeyí de jíin ñáyuu, chi sa víhyá gā cácuvaā í. Te ni ndacu de jniñu jeē na quíji ndute, te ni nandahá de nuū ñáyuu cuehē ún. Te ni cahān de:

Jeē nándahá rí yāha cúu seña jeē tú na cuēchi condee síquī rī jeē cúū tēe vāha yāhā. Chi síquī maá ró jijnáhan ró na cóndee. Achí de.

²⁵ Te ni cacahān ndíhi ñayuu:

Suu síquī maá ná jíin síquī séhe ná na cóndee cuēchi jeē cúū de, áchí í.

²⁶ Yūcuān na te ni siaá de Barrabás. Te ni ndacu de jniñu jeē na cáni tācá soldado un Jesús, jíin jēe cáta caa de ya jicā cruz.

²⁷ Yūcuān na te soldado un cuango de jíin Jesús ini palacio. Te ni cacana de ndíhi jnāhan de ni candutútú núu yā. ²⁸ Te ni caquenehen de sahma ya, te ni cachuhun de ya ñn sahma cuehé jeē cúu sahma rey. ²⁹ Te ni casáha de ñn corona íñu, ni cachuhun de xiní yā. Te ni cachihí de ndaha váha ya ñn yujnu jeē nájnūhun bastón. Te ni casácatā de nuū yā, chí ni cajecuiñí yití de, casáha de jeē chiñúhún de ya.

Nacā jeē váha rey cúu Rey ñayuu hebreo, achí de.

³⁰ Te ni catesíhí de nuū yā. Te ni caquihin de yujnu jeē ní cachihí de ndaha ya, te ni cacani de xiní yā. ³¹ Te nuū ní cuu ni casácatā de nuū yā, te ni catava de sahma cuehé un, te ni canachuhun de ya sahma maá yá. Te cuango de jíin yá jeē cata caa de ya jicā cruz.

Jeē ní cacata caa de ya jicā cruz

(Mr. 15.21-32; Lc. 23.26-43; Jn. 19.17-27)

³² Te nuū ní quendacoo soldado un jíin yá, te ni canajnāhan de jíin ñn tēe ñuu Cirene, nání de Simón. Te ni catejñíñu de tēe un jēe cóndiso de cruz yā.

³³ Te ni jinūcoo de ñn lugar nuū naní Gólgota, jeē cuní cahān Lugar Yiquí Xíní. ³⁴ Te ni cajēhe de vino jeē ni sácā núu jíin ñn jeē uvuá jeē cóho ya. Te nuū ní jito ndee ya, te tu ní cúní yā coho ya.

³⁵ Te nuū ní cuu ni cacata caa de ya jicā cruz, te ni casáha de sorteo jeē siquí ndese nihīn ìn ìn de sahma ya. Te súcuan ni squícu jnūhun ni tee tēe ni nacani jnūhun Yaā Dios jenahán: Ni casáha de sorteo siquī ndese nihīn ìn ìn de sahma ri, achi yā, achí tutu. ³⁶ Yūcuán na te ni cacucōo de yūcuan jéē cóto de nde cuu yā. ³⁷ Te ni catee de ìn jnūhun xinī cruz yā jeē cahán na siquī ni jíhi yā: Yāha cúu Jesús, Rey ñayuu hebreo, achí.

³⁸ Te suni ni cacata caa de uū tēe cuíhná núu uū gā cruz, ìn de lado váha ya, te inga de lado jecó yá. ³⁹ Te ñayuu cáyāha yūcuan cáscuicó i xinī i, te cácahān neé i:

⁴⁰ Róhó chi cáhán rō jeē cánu rō templo cáhnu, te nuū uní quivī te nacani ró. Núu súcuan te jnama ró máá ró vijna. Te núu Sēhe Yaā Dios cúu ró, te nuu ró jicā cruz vii, achí i.

⁴¹ Te sutū cácujuhnu, jíin tēe cástéén tutu ley, jíin tēe grupo fariseo, jíin tēe jéhnu jíjnáhan de, suni súcuan ni cacahān catá de, te achí de cácahān maá de:

⁴² Núu inga ñayuu ni jnama de, ¿te naun tu cúu jnama de máá de vijna? Núu Rey ñayuu Israel cúu de, te na núu de jicā cruz, návāha candíje yó de. ⁴³ Ni candíje de Yaā Dios, te na jnáma ya de vijna te núu cúndáhú ni yā de, chí ni cahān de jeē cúu de Sēhe ya. Achí de jíjnáhan de.

⁴⁴ Te tēe cuíhná jeē cándita caa xiin ya, suni súcuan ni cacahān neé de.

Jeē ni jíhi Jesús

(Mr. 15.33-41; Lc. 23.44-49; Jn. 19.28-30)

⁴⁵ Te nuū ní cuu cahuxī uū, te ni cunee ní cáhnu nde cahunī. ⁴⁶ Te nájnūhun cahunī, te ni cana jee Jesús:

Elí, Elí, ¿lama sabactani? achí yá. Te jnūhun un cúni cahān: Yaā Dios maá ná, Yaā Dios maá ná, ¿naun ni stóo ní sáña?

⁴⁷ Te sava ñayuu cáhiin yūcuan ní cajini i jnūhun ún, te ni cacahān i:

Tēe yáha cána de xinī Elías, tēe ni nacani jnūhun Yaā Dios jenahán, achí i.

⁴⁸ Te ni jinu-ni ìn tēe, ni jequihin de ìn cachī, te ni chundaji de nuū vinagre iyá. Te ni tee de xinī ìn yujnu, te ni tee de yuhu ya jeē coho ya. ⁴⁹ Te sava ga de ni cacahān:

Condetu ró, na cóndēhe yó núu quiji Elías jnama de chí tuú, achí de.

⁵⁰ Te Jesús ni cana jee ya inga júnu, te ni jihī-ni ya. ⁵¹ Te sahma ndíta caa jeē ndihyú cuarto ìi ini templo cáhnu, ni ndatā-ni sava sava nde xinī te nde nuū jehé. Te ni jnáa, te ni catahū sáva toto. ⁵² Te ni cananune yaū nuū yíndūji ndīyī. Te cuehē ndīyī jeē ní cacandíje i Yaā Dios, ni canatecu i. ⁵³ Te nuū ní natecu Jesús, te ni quendacoo i nuū yíndūji i. Te ni ndīvicoo i ini ñuu ìi Jerusalén, te cuehē ñayuu ni cajito nuū i.

⁵⁴ Te ná ni jihī Jesús, te tēe cúu capitán jíin tēe cáhiin jíin de jeē cándito de nde cuu yā, ni cajini de jeē ni jnáa, jíin táca gá jniñu ní cuu. Te yōhyo ni cayūhú de, te ni cacahān de: Jendaá ndije jeē Séhe Yaā Dios cúu tēe yáha, achí de.

⁵⁵ Te yūcuan cáhiin cuehē ñahan, cándēhe jícá ña. Te suu ñahan un ní candiquin ña Jesús nde Galilea, vējicoo ña cájejniñu ña nuū yā. ⁵⁶ Te unī ñahan un cácuu María ñuu Magdala, jíin María naná Jacobo jíin José, jíin naná ndíndúú séhe Zebedeo.

Jeē ní quindūji Jesús

(Mr. 15.42-47; Lc. 23.50-56; Jn. 19.38-42)

⁵⁷ Te nuū ní ini quivī ún, te ni quee ìn tēe cúcá, nání de José, te tēe ñuu Arimatea cúu de. Te suni tēe ni scuáha jíin Jesús cúu de. ⁵⁸ Tēe un ní jehēn de nuū Pilato, te ni jicān de yiquí cúñu Jesús. Te ni ndacu Pilato jniñu jeē na cuáha nuū de. ⁵⁹ Te José ni quihin de yiquí cúñu yā, te ni chusúcún de ìn sahma cuitá íyó ndoo. ⁶⁰ Te névāha de ìn yaū jeē ní caan jeé jicā ìn cava, nuū ná tu quindūji ndīyī. Te yūcuan ní chindūji de ya. Te ni jesi de ìn yuū cáhnu yuhu yáú un, te cuahān de. ⁶¹ Te María ñuu Magdala, jíin inga María, cáyucú ña ichi núu nuū yíndūji ya.

Jeē ní cacondito soldado nuū yíndūji ya

⁶² Te ni cuu t̄acá jniñu yáha máá quiv̄i jeē casátūhva ñayuu jeē quiji quiv̄i ndétātú. Yūcuán na te ni cundijin maá quiv̄i ndétātú. Te sutū cácujuhnu jíin t̄ee grupo fariseo ni jengoo de nuū Pilato. ⁶³ Te ni cacahān de:

Cánucūhun ni na j̄eē nde na t̄ecu t̄ee stáhú néé un te ni cahān de jeē nátecu de nuū uní quiv̄i. ⁶⁴ Núu súcuan te ndacu ní jniñu na coto vāha t̄acá soldado yuhu yáú un nde núu ni yāha uní quiv̄i. Chi núu tuú te sanaa te quijicoo t̄ee ni cascuáha jíin de, te tava cuihná de nd̄iyi ún jecuáā, quingoo de jíin. Yūcuán na te cachi de nuū ñáyuu jeē ní natecu t̄ee ún. Te cáhú gá cuu jnūhun stáhú yúcuan v̄esú jeē x̄ihna ñúhún. Achí de.

⁶⁵ Te ni cahān Pilato:

Yāha cáhiyo soldado. Cuángoo jíin de, te sácutu vāha ró yuhu yáú un, te coto vāha ró, núu ndese vāha ga cuu sáha ró. Achí de.

⁶⁶ Te cuangoo de, te ni casácutu de yuū jeē ndihyú yuhu yáú nuū ȳindūji ya, te ni cast̄in nihin de. Te ni castóo de t̄acá soldado un cándito.

Jeē ní natecu Jesús

(Mr. 16.1-8; Lc. 24.1-12; Jn. 20.1-10)

28

¹ Te ni yāha quiv̄i ndétātú un, te ni cundijin quiv̄i domingo. Te María ñuu Magdala jíin inga María un, ní jecondēhé ña nuū ní ȳindūji Jesús. ² Yūcuán na te ñin sanaa-ni te ni jnāa nihin ndasí. Chi ñin ndajéhé maá Jítóho yō Yaā Dios ni cuun ya ichi ándiví, ni quee ya nuū ní ȳindūji Jesús. Te ni stāa ya yuū ndihyú yuhu yáú un, te ni cucōo ya siquī. ³ Te nd̄indēe núu yā nájñūhun taja, te sahma ñúhún ya yaa quiyi nájñūhun yuhvā volcán. ⁴ Te soldado cándito yúcuan ní quisi i de jeē cáyūhú de cájito de ya. Te ni cacuu nd̄iyi de. ⁵ Te ni cahān ndajéhé jíin nd̄indúú ñahan ún:

Ma yūhu ró, chi jíin rī jeē vécondēhe ró Jesús, Yaā ni jíhī jicā cruz. ⁶ Tuá yā yāhá, chi je ni natecu yā, nájñūhun ni cahān yā. Nehen condēhe ró nuū ní cachindūji de ya. ⁷ Te yachī quingoo ró, te cachi rō nuū t̄ee cáscuáha jíin yá jeē ní natecu yā. Te x̄ihna gā maá yá jinū Galilea, te sáa te najinūcoo de. Te yūcuán coto de nuū yā. Achi rō na cúni de. Je ni castūhun rī nuū rō, achí ndajéhé.

⁸ Te ni quendacoo ña nuū ní ȳindūji ya, te yachī cuangoo ña. Te cáyūhú ña, te suni yōhyo cácusī ni ña. Te ni cajinu ña cuacastūhún ña nuū t̄ee cáscuáha jíin yá. ⁹ Te níni cuángoo ña, te ni quee-ni Jesús nuū ña, te ni cahān yā jíin ña. Te ni quecoo ña nde nuū yā, te ni canundee ña jehē yā, te ni cachiñúhún ña ya. ¹⁰ Te ni cahān yā jíin ña:

Ma yūhu ró jijnáhan ró. Cuángoo te castūhun ró nuū t̄acá hermano rī, t̄ee ni cascuáha jíin rī, jeē na núngoo de nde Galilea, te yūcuán coto de nuū rī. Achí yá.

Jnūhun ní cacahān soldado

¹¹ Te níni cuángoo ña, te sava soldado jeē ní condito ún, cuánungoo de nde ñuu. Te ni cacastūhún de nuū sutú cácujuhnu t̄acá jniñu jeē ní cuu. ¹² Te sutū cácujuhnu ni candutútú de nuū táca t̄ee j̄ehnu cándacu jniñu, te ni casquijnáhan de jnūhun. Yūcuán na te ni cajēhe de cuehē xūhun núu soldado jijnáhan. ¹³ Te ni cacahān de jíin:

Cahān rō jijnáhan ró jeē t̄ee cáscuáha jíin de ni quijicoo jecuáā, te ni catava cuihna nd̄iyi un níni cáquixī rō, achi rō. ¹⁴ Te núu na cúni gobernador jnūhun yáha, te máá rī quiscahán rī de, návāha tú nihin rō castigo jijnáhan ró. Achí de.

¹⁵ Te soldado un ní caquihin de xūhún un, te ni cacachi de nájñūhun ni cacahān jíin de. Te nde vijna chi súcuan cácahān ñayuu hebreo nájñūhun ni cacahān soldado un.

Jeē ní tejníñu ya de nacani de jnūhun

(Mr. 16.14-18; Lc. 24.36-49; Jn. 20.19-23)

¹⁶ Te ndihúxí ñin t̄ee ni cascuáha un cuánungoo de nde Galilea, nde yucu nuū ní cachi Jesús jeē quíngoo de. ¹⁷ Te nuū ní cajito de nuū yā, te ni cachiñúhún de ya. Te sava de tu cácandíje vāha de jeē maá yá cúu. ¹⁸ Te ni quee ya nde nuū de, ni cahān yā jíin de:

Je ni jēhe Tátá rī ndihī poder nuū rī jeē ndácu ri jniñu andiví jíin ñáyiví. ¹⁹Núu súcuan te cuángoo nuū ñáyuu t̄acá nación, te stéén rō jnūhun ri nuū i návāha na cándíje i. Te scuándute ró i jeē ní cacandíje i máá Tátá jíin Séhe jíin Espíritu Santo. ²⁰Te stéén rō nuū i jeē na cuátáhú i t̄acá jniñu ní ndacu ri nuū rō. Te cocuhun ni rō jeē maá rí íne ri jíin ró ní cáni nde quiví jíinu ñáyiví. Achí yá. Te ni cuu. Amén.

JNUHUN VAHA NI TEE SAN MARCOS

Jnūhun Juan tēe scuándute

(Mt. 3.1-12; Lc. 3.1-9, 15-17; Jn. 1.19-28)

¹ Yāha quejéé jnūhun vāha máá Jesucristo Sēhe Yaā Dios, jeē ní quiji ya jeē jnama ya yohó.

² Isaías, tēe ni nacani jnūhun Yaā Dios nde jenahán, súcuan ni tee de jnūhun Juan nuū tútu:

Tají rí tēe nacani jnūhun ri cosnūú de ichi núú rō, nāvāha coo tūhva ñayuu jeē jinú rō, achí Yaā Dios jíin Cristo.

³ Te tēe ún cana jee de nde nuū ñūhun téhé:

Sátūhva ró máá ró jijnáhan ró, chi quee maá Jítóho yō.

Te sáha ró jniñu ndaā, chi vēji ya, achi de.

Achí Isaías. ⁴ Te Juan ni jinū de nde nuū ñūhun téhé, scuándute de ñayuu. Te cáhán de jíin i jeē na nacani ni i jeē stóo i cuēchi i te cuandute i, nāvāha cone cáhnu ni Yaā Dios nuū cuéchi i. ⁵ Te tāca ñáyuu región Judea jíin ñáyuu ñuu Jerusalén, ni quijicoo i nuū de. Te ni canacani ndaā i cuēchi i nuū Yaā Dios, te ni scuándute de i ini yūte Jordán.

⁶ Te sahma ñūhun Juan cúu ixi camello, te núhni ñin cinturón ñiñ chiji de. Te jeē técu de cúu tīca ndicuéhyí jíin ndúxi yocō. ⁷ Te suhva ni nacani de jnūhun:

Quiji máá Yaā cujéhnu ndasí. Chi tú na vé jéhnu cuítī cúu ri nuū yā, ni jeē cuajniñu ri nuū yā vēsú ñin jniñu lúli gá nájñūhun jeē cuíta ndeyi ri ndají rí correa ndijēn yā. ⁸ Te ruhū chi jíin ndute scuándute ri rohó jijnáhan ró, te Yaā ún chi nájñūhun jeē scuándute ya rohó cúu jeē cuáha ya Espiritu Santo condee ini anuá rō, achí Juan.

Jeē ní jendute Jesús

(Mt. 3.13-17; Lc. 3.21-22)

⁹ Te ni cuu jecu quiví, te Jesús ni quenda ya ñuu Nazaret ndañúú Galilea, te Juan ni scuándute de ya ini yūte Jordán. ¹⁰ Te ná ni quenda ya nuū ndúte, te ni jito ya jeē ní nune-ni andiví, te ni cuun Espiritu Santo ni quee xiní yā, te cáa nájñūhun ñin paloma.

¹¹ Te ichi ándiví ní cahān ñin jnūhun:

Máá ró cúu Sēhe ri jeē maní ndasí rí jíin, te yōhyo cúsiñ ni rí jíin ró, achí.

Jeē ní jito ndee jexeén Jesús

(Mt. 4.1-11; Lc. 4.1-13)

¹² Yūcuán na te ni jinū Jesús nde nuū ñūhun téhé ní sáha Espiritu Santo. ¹³ Te uū xico quiví ni condee yā nuū ñūhun téhé un núú ñin quítī yúcu. Te ni jito ndee Satanás yā, chi cúní jeē sáha ya cuēchi. Te nuū ní cujiyo Satanás cuahān, te ni quecoo ndajéhé Yaā Dios, ni cajejniñu nuū yā.

Jeē ní quejéé Jesús nacani ya jnūhun

(Mt. 4.12-17; Lc. 4.14-15)

¹⁴ Yūcuán na te ná ni cachune de Juan vecāa, te ni jinū Jesús región Galilea, nacani ya jnūhun vāha ndese ndácu Yaā Dios jniñu. ¹⁵ Te ni cahān yā:

Je ni jinū quiví, te je ni cuyajni jeē ndácu Yaā Dios jniñu nuū rō. Nacani ni rō jeē stóo ró cuéchi ró jijnáhan ró, te candíje ró jnūhun jeē jnama ya rohó. Achí yá.

Jeē ní cana ya cuūn tēe jniñ chācá

(Mt. 4.18-22; Lc. 5.1-11)

¹⁶ Te jíca Jesús yumar Galilea cuahān yā. Te ni jito ya nuū Simón jíin ñani de Andrés. Te tēe cájniñ chācá cácuu de, te cásiंगा de ñunu de ini mar. ¹⁷ Te ni cahān yā jíin de:

Condiquīn ruhū na quíhín yō, te nasáha ri rohó tēe nihīn cuehē ñayuu candíje ruhū, nájñūhun cánihīn rō chācá, achí yá.

¹⁸ Yūcuán na te ni castóo-ni de ñunu de, te ni candiquīn de ya.

¹⁹ Te ni jica ya jecu gā, te ni jito ya nuū Jacobo jíin ñani de Juan, sēhe Zebedeo, suni cáyūcú de ini barco de, cánachijnñi de ñunu de. ²⁰ Te suni ni cana ya de jeē cóndiquin de ya. Te ni castóo-ni de tátá de Zebedeo ini barco un jíin mozo de, te ni candiquin de ya cuangoo de.

Jeē ní quenehen ya tachī ini ñin tēe
(Lc. 4.31-37)

²¹ Te ni jinū yā jíin de ñuu Capernaum. Te quivī ndétātu ní quivī ya ini vehe i sinagoga, te ni steén yā jnūhun. ²² Te ni cana ni ñayuu ni cajini i jnūhun steén yā. Chi ni steén vāha ya nuū i, chi máá yá cúu jeē ndíso jníñu siquī ndíhi. Te tēe cástéén tutu ley Yaā Dios, tu súcuan cástéén de. ²³ Te ini vehe i sinagoga ñuu un íne ñin tēe jeē ñūhun tachī ini. Te ni cana cóhó de:

²⁴ ¿Naun vēji ní núu na jíjnáhan ná, Jesús ñuu Nazaret? ¿A véji ní jēe snāā ni sáña, chí naún? Je jíni na ndé ñin cúu ní, chí Sēhe i Yaā Dios cúu ní. Achí de.

²⁵ Te Jesús ni cahān xeēn yā jíin táchī ún:

Casi yuhu ró te quenda ró ini de, áchí yá.

²⁶ Te tachī ún xeēn ni jehni yīhí tēe ún. Te ni cana cóhó, te ni quenda ini de cuahān.

²⁷ Te ndíhi ñayuu ni cayūhú i, te cácajnūhun jnáhan i:

¿Na vé cúu jeē yáha? ¿A ñin jnūhun jéé cúu jeē yáha? Chí tēe yáha cújéhnū de jeē ndácu de jniñu nde nuū tachī te quéndacoo, áchí i.

²⁸ Te yachī ni jitē núu jnūhun Jesús cuahān ní cáhnu región Galilea.

Jeē ní nasávāha ya naná chīsó Simón Pedro
(Mt. 8.14-15; Lc. 4.38-39)

²⁹ Te ni quenda ya jíin de jíjnáhan de ini vehe i sinagoga. Te Jesús ni jehēn yā jíin Jacobo jíin Juan nde vehe Simón jíin Andrés. ³⁰ Te naná chīsó Simón, catú ña yíhi quíji ña. Te ni cacastūhún de nuū yā jeē cuhú ña. ³¹ Yūcuán na te ni quindehe ya nuū catú ña, te ni jniñi ya ndaha ña, te ni ndonehen ya ña. Te ni quenda-ni quíji ún ña, te ni sáha ña jeē ní cayejí de jíin yá.

Jeē ní nasávāha ya cuehē ñayuu
(Mt. 8.16-17; Lc. 4.40-41)

³² Te ni quee niāndii te ni cuaa. Te ni quecoo ñayuu jíin táca ñayuu cácu hū jíin jéē ñūhun tachī ini. ³³ Te táca ñayuu ñuu un ní cacutútú i yéhyí un. ³⁴ Te ni nasávāha ya cuehē ñayuu cácu hū tijni nuū cuehyí, te ni quenehen ya cuehē tachī un cuángoo. Te tachī chí je cájini un yá, te tu ní jéhe ya jnūhun jeē cástūhun ndé ñin cúu ya.

Jeē ní nacani ya jnūhun región Galilea
(Lc. 4.42-44)

³⁵ Te nehen ndasí ní ndonda ya, nde yínee gā. Te ni quenda ya cuahān sín ya yatā ñūū nuū tú ñayuu, te yūcuan ní jicān tahu yā. ³⁶ Te Simón jíin tēe cáhiin jíin de, ni jenanducú de ya. ³⁷ Te ni cananihín de ya, te ni cacahān de jíin yá:

Tāca ñayuu cánanducú i níhín, áchí de.

³⁸ Te máá yá ni cahān yā:

Sa suhva na quíhín yō táca gá ñuu íne yajni, návāha suni nacani ri jnūhun nuū i, chí jeē yúcuán ní quee rī. Achí yá.

³⁹ Te súcuan te ni jica cuu ya ní región Galilea, ni nacani ya jnūhun ini vehe i sinagoga táca ñuu, te ni quenehen ya tachī ini ñayuu.

Jeē ní nasávāha ya ñin tēe ndóho cuehyī stehyú
(Mt. 8.1-4; Lc. 5.12-16)

⁴⁰ Te ñin tēe ndóho cuehyī stehyú, ni quee de ni jecuiñi yití de nuū yā, te ni cahān de jíin yá:

Jíni na jeē cuu sáha ní jéē nduvāha ná, te núu cúní ni, áchí de.

⁴¹ Te Jesús ni cundáhú ni yā de, te ni soó yá ndaha ya siquī de, te ni cahān yā:

Cúni rī. Te na nduvāha ró, áchí yá.

⁴² Te ná ni cahān yā súcuan, te ni nduvāha-ni tēe ndóho cuehyī stehyú un. ⁴³ Yūcuán na te nátají yá de quinhun de, te ni cahān nihin ya jíin de:

⁴⁴ Ma cáchi cuítí rō nuū ní ĩn. Chi quisteén rō maá ró nuū sutú, te condahá ró jeē socó rō nuū Yaā Dios siquī jeē ndúndoo ró núu yā, nájnūhun ni ndacu Moisés jniñu jenahán. Te súcuan te cuni ñayuu jeē ní nduvāha ró. Achí yá.

⁴⁵ Te ni quenda de cuahān de, te ni quejé de nácani de jnūhun nuū ndihi ñayuu ndese ni nduvāha de. Te siquī yúcuan tuá ni cúu quīvi Jesús tācá ñuu, chi cúchitú ndasí ñayuu nuū yā. Te ni jica ya yatā tācá ñuu nuū tu cúchitú ñayuu. Te tāca lado ni quijicoo ñayuu nuū yā.

Jeē ní nasávāha ya ĩn tēe ndóho cuehyī ni íjin
(Mt. 9.1-8; Lc. 5.17-26)

2

¹ Te ni cuu jecu quīvī, te ni quīvi tucu Jesús ñuu Capernaum. Te ni cajini ñayuu jeē néne ya vehe. ² Te ni cacutútú-ni cuehē ñayuu, te ni chitú vehe jeē ndé yehyí tuá núne. Te ni nacani ya jnūhun Yaā Dios nuū i. ³ Yūcuán na te ni quecoo cuūn tēe nuū yā, cándiso de ĩn tēe ndóho cuehyī ni íjin. ⁴ Te tu ní cúu quīvicoo de nuū yā siquī jeē chitú ñayuu. Te ni cacoo de siquī véhe, te ni canune de ndaā nuū ĩn ya, te yaū un ní cascúun de tēe cúhú, cáttú de nuū ĩn camilla. ⁵ Te ni jini Jesús jeē cácdíje de jeē cúu nasávāha ya tēe cúhú un. Te ni cahān yā jíin tēe cúhú un:

Séhē, je íne cáhnu ni rī nuū tāca cuéchi ró, áchí yá.

⁶ Te yūcuán cáyúcú jecu tēe cástéén tutu ley Yaā Dios, te tēe un ní cajeni ni de siquī yā: ⁷ ¿Naun cáhán tēe yáha súcuan? Cáhán de jnūhun ndevāha jeē quití ni Yaā Dios, chi nasūu Yáā Dios cúu de jeē cóne cáhnu ni de nuū cuéchi. ⁸ Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha ri? ⁹ Jeē uú jnūhun yáha, ¿ndé ĩn yí gá cáa? ¿A jéē cahán rī jíin tēe cúhú: Je íne cáhnu ni rī nuū tāca cuéchi ró? ¿Chí yí gá jeē cahān rī: Ndocuñī te naquihin ró camilla rō, te caca ró, achi rī? ¹⁰ Te vijna te na stéén rī jeē maá rí, Yaā ní nduu tēe, ndíso jniñu ri ini ñayīvi yáha jéē cóne cáhnu ni rī nuū cuéchi.

Yūcuán na te ni cahān yā jíin tēe ni íjin ún:

¹¹ Cáhán rī jíin ró, ndocuñī te naquihin ró camilla rō, te quinhun rō vehe ró, áchí yá jíin de.

¹² Yūcuán na te ni ndocuñī-ni tēe ún, te ni naquihin de camilla de, te ni quenda de cuahān de, jíto jínúu ndihi ñayuu. Te ndívi i ni canaa ni i cájito i, te ni cacahān i jeē yóhyo vāha Yaā cúu Yaā Dios. Te áchí i:

Ná tu coto cuítí yō ni ĩn jniñu súcuan, áchí i.

Jeē ní cana ya Leví
(Mt. 9.9-13; Lc. 5.27-32)

¹³ Te ni quenda tucu ya cuahān yā nde yumar. Te tāca ñayuu ni jinūcoo i nuū yā, te ni stéén yā jnūhun nuū i. ¹⁴ Yūcuán na te ni yáha ya cuahān yā, te ni jito ya nuū Leví sēhe Alfeo, néne de nuū cutútú xúhun renta. Te ni cahān yā jíin de:

Condiquīn ruhū na quíhín yō.

Te ni ndocuñī de, te cuahān de jíin yá.

¹⁵ Yūcuán na te ni jehēn yā ni yeji yā staā vehe de. Te cuehē tēe cástútú xúhun renta jíin ĩnga tēe cása ha cuéchi, suni cáyúcú de cáyeji de staā jíin Jesús jíin tēe cáscuáha jíin yá, chí íyó cuéhē de jeē cándiquīn de ya. ¹⁶ Te tēe cástéén tutu ley Yaā Dios jíin tēe grupo fariseo, ni cajito de jeē yéji yā staā jíin ndihi tāca tēe ún. Te ni cacahān de jíin tēe cáscuáha jíin yá:

¿Naun yéji maestro rō jíin tēe cástútú xúhun renta jíin ĩnga tēe cása ha cuéchi? áchí de.

¹⁷ Te ni jini Jesús, te ni cahān yā jíin de:

Ñayuu cáhiyo váha, tu jíni ñúhún i tēe tájné, chi ñayuu cácuéhú cúu jeē jíni ñúhún. Te ruhú nasúu jeē véji ri cana ri ñayuu tú cuēchi, jeē cúu i nájnuhun ñayuu cáhiyo váha. Chi sa suhva véji ri cana ri ñayuu cáhiyo cuéchi, jeē na nácani ni i te stóo i cuēchi i. Achí yá.

Jeē ní cacajñuhún de ya siquí jeē cóndite ni
(Mt. 9.14-17; Lc. 5.33-39)

¹⁸ Te ni cuu ñin quiví jeē cáhiyo ndite ni tēe cáscuáha jíin Juan, jíin tēe cáscuáha jíin grupo fariseo. Te ni quecoo jecu tēe, ni cacahán de jíin Jesús:

Tēe cáscuáha jíin Juan jíin jeē cascuáha jíin grupo fariseo, tijni jínu cáhiyo ndite ni de. Te tēe cáscuáha jíin máá ní, ¿naun tu casáha de súcuan?

¹⁹ Te ni cahán Jesús jíin de:

¿A cuu condite ni de níni jeē iyó rí jíin de? ¿A cuu condite ni ñayuu cáhiin vico nándāha, te núu níni néne tēe nándāha? Chi núu néne tēe nándāha, te ma cúu condite ni i. ²⁰ Te quee quiví jeē cújiyo tēe nándāha, te quiví ún chi condite ni i.

²¹ Te ni cahán yā uú jñuhun yátá siquí jeē tu quíjnahan jñuhun jeé jeē steén yā jíin táca jñuhun jenahán. Achí yá:

Ni ñin tu náchuhun ñin pedazo sahma jeé núu ñin sahma túhú. Chi núu súcuan te ndiyi pedazo jeé un, te tahndē gā jeē tuhú un, te nducáhnu ga nuú catáhdé un. ²² Te suni tu cáchuhun vino jeé ini ññi túhú. Chi núu súcuan te vino jeé un ndatá ññi ún, te naa vino jíin ññi. Jeē yúcuan cánuú jeé chúhun i vino jeé ini ññi jeé.

Jeē ní cataxín de yoco trigo quiví ndétátú
(Mt. 12.1-8; Lc. 6.1-5)

²³ Te ñin quiví ndétātu ní yāha Jesús cuahán yā mēhñú nuú cáa trigo. Te tēe cáscuáha jíin yá, cájica de cuahán de, te ni quejé de cataxín de yoco trigo cáyeji de. ²⁴ Yūcuán na te tēe grupo fariseo ni cacahán de jíin yá:

Condēhé. ¿Najehē casáha tēe cáscuáha jíin ró súcuan? Chi achí ley Moisés jeē ma cúu sáha yó ni ñin jniñu quiví ndétátú. Achí de.

²⁵ Te ni cahán máá yá jíin de:

¿A tu ní cácahu cuítí rō tutu ndese ni sáha David, ñin quiví ní cumani jeē cáji de, te ni jíi de sōco jíin tēe cáhiin jíin de? ²⁶ Te ni quiví de ini vehe Yaā Dios. Te Abiatar ni cuu sutū cujéhnu ga. Te ni yeji de pan íi jeē yosó ndijin nuú Yaā Dios. Te tú na ley jeē cáji ni ñin tēe, chi máá-ni sutū cuu caji. Te suni ni jēhe de ni cayejí tēe cáhiin jíin de. Te tú na cuēchi ní íyo siquí de. Achí yá.

²⁷ Te suni ni cahán yā jíin de jíjnahan de:

Tu ní jéconaā ñayuu jeē ndóho i nuú quiví ndétátú, chi ni jeconaā quiví un jeē ndétátú i. ²⁸ Núu súcuan te ruhú, Yaā ní nduu tēe, máá rí cúu jeē ndácu jniñu siquí ndese sáha ñayuu quiví ndétátú, achí yá.

Jeē ní nduvāha tēe ni ichí ndaha
(Mt. 12.9-14; Lc. 6.6-11)

3

¹ Te ni quiví tucu Jesús ini vehe íi sinagoga. Te yūcuan íne ñin tēe ni ichí ñin ndaha de. ² Te tēe grupo fariseo cájito yuhu de ya núu nasávāha ya tēe un quiví ndétátú, návāha nihin de cuēchi siquí yā. ³ Yūcuán na te ni cahán yā jíin tēe ni ichí ndaha ún:

Ndocuññi te condichi rō mēhñu yáha, achí yá.

⁴ Te ni cajñuhun yá de jíjnahan de:

¿Ndese cáhán ley siquí quiví ndétátú? ¿A jeé sáha vāha yó, chí sáha néé yó? ¿A jeé nasávāha yó ñayuu je yajni cuu, chí sáha yó jeé cúu i? achí yá.

Te máá de tú na vé ni cacahán de. ⁵ Te ni quití ni yā ni jito ya nuú de jíjnahan de, te ni cucuíhyá ni yā jeé níhni ni de. Te ni cahán yā jíin tēe ni ichí ndaha:

Scáá ndaha ró.

Te ni scaá de, te ni nduvāha-ni ndaha de. ⁶ Yūcuán na te ni quendacoo tēe grupo fariseo, te ni casquijnáhan de jnūhun jíin tēe grupo Herodes siquī yā, ndese cahni de ya.

Jeē ní quecoo cuehē ñayuu nuū yā yumar

⁷ Te Jesús cuahān yā nde yumar jíin tēe cáscuáha jíin yá. Te cuehē ñayuu región Galilea ni candiquīn i ya. ⁸ Te suni ñayuu región Judea, jíin ñayuu ñuu Jerusalén, jíin ñayuu Idumea, jíin ñayuu ichi núu cáne niāndii yūte Jordán, jíin ñayuu región Tiro jíin Sidón, cuehē ndasí ñayuu ni cajini jnūhun i jniñu jéhnū ni sáha ya, te ni quecoo i nuū yā. ⁹ Te ni cahān yā jíin tēe cáscuáha jíin yá jeē na cóo tūhva ñin barco quīvi ya, návāha ma chitú níhin ñayuu cuehē ún xiin ya. ¹⁰ Chi cuehē ñayuu je ni nasávāha ya, te jeē yúcuan vējicoo cuehē gā ñayuu cándoho tāca núu cuehyī, te chítú níhin i xiin ya jeē quehé i ya cáconi i. ¹¹ Te ñayuu cáñuhun tachī ini, núu ni cajito nuū yā, te cájecuññi yití núu yā, te cácana cóhó:

Máá ní cúu Sēhe Yaā Dios, achí.

¹² Te ni ndacu níhin ya nuū tachí un jeē ma cáhán gā jeē cúu ya Sēhe Yaā Dios.

Jeē ní nacāji ya uxī uū tēe apóstol

(Mt. 10.1-4; Lc. 6.12-16)

¹³ Yūcuán na te ni caa ya cuahān yā ñin yucu. Te ni cana ya tāca tēe jeē cuní maá yá caca jíin yá, te ni quecoo de nuū yā. ¹⁴ Te ni jeni ya uxī uū de jeē cuññi de jíin yá, te tají yá de quingoo de nacani de jnūhun. ¹⁵ Te ni sáha ya jeē cóndiso jniñu de nasávāha de ñayuu cuhú te quenehen de tachī ini ñayuu. ¹⁶ Te yāha cúu ndihúxí uū tēe jeē ní nacāji ya: Simón jeē ní nasnání yá de Pedro. ¹⁷ Te Jacobo jíin ñani de Juan, sēhe Zebedeo. Te ni nasnání yá ndindúú de Boanerges, jeē cuní cahān: Tēe yíhi fuerza nacani jnūhun, nájñuhun yíhi fuerza taja. ¹⁸ Te sava ga de nání de Andrés, Felipe, Bartolomé, Mateo, Tomás, Jacobo sēhe Alfeo, Tadeo, Simón tēe grupo cananista, ¹⁹ jíin Judas Iscariote, tēe jeē ní nastúu de ya.

Jeē ní cacahān ñayuu jeē jeñíñu ya fuerza Satanás

(Mt. 12.22-32; Lc. 11.14-23; 12.10)

Yūcuán na te ni quīvi ya ñin vehe jíin tēe cáscuáha jíin yá un. ²⁰ Te ni ndutútú tucu cuehē ñayuu, te ni tuá ni cúu caji yā staā jíin de. ²¹ Te tāca jnáhan vehe ya ni cajini jnūhun jeē súcuan cúu. Te ni quecoo de venūquihin de ya. Chi cacahān de jeē ní sana xinī yā.

²² Te suni tēe cástéén tutu ley Yaā Dios jeē ní quijicoo nde ñuu Jerusalén, ni cacahān de:

Tēe yáha ñuhun Satanás ini de, jeē kujéhnū nuū tachí. Te jíin fuerza un quénehen de tachí, achí de.

²³ Te ni cana ya de jíjnáhan de, te ni cahān yā ñin jnūhun yátá jíin de:

¿Ndeese cuu quenehen Satanás maá? ²⁴ Chi núu ñin nación sásñin maá te cuajnáhan maá, nación un má cúu ga coyūcu cáhnu. ²⁵ Te núu ñayuu ñin vehe sásñin maá te cuajnáhan maá, ñayuu un má cúu ga coyūcu cáhnu. ²⁶ Te suni súcuan Satanás jíin jnáhan tachí, chi núu sásñin maá te cuajnáhan maá, núu súcuan te ma cóo ga, chi sa suhva naa.

²⁷ Te ni ñin tēe ma cúu quīvi de ini vehe tēe ndacuī jeē quenehen de ndajniñu de. Chi cánuú jeē xíhna gā cuhni de tēe ndacuī ún. Te suni súcuan cúu jeē jíhni rī Satanás te quénehen ri tachí.

²⁸ Te jendaá cahān rī jíin ró jeē iyó modo coo jnūhun cáhnu ni nuū tāca cuéchi cásáha ñayuu, te suni nuū tāca jnúhun néé cacahān i. ²⁹ Te núu cahān ndevāha i siquī Espíritu Santo, te ma cóne cáhnu ni Yaā Dios nuū i, chi sa suhva condee cuéchi siquī i ní cání, achí yá.

³⁰ Súcuan ni cahān yā, chi ni cacahān i jeē quénehen ya tachí jíin fuerza Satanás.

Náná yā jíin ñani yā

(Mt. 12.46-50; Lc. 8.19-21)

³¹ Yūcuán na te ni quee naná yā jíin táca ñani yā. Te íin ña nuū quéhe, te ni tají ña jnūhun cuahān nuū yā jeē cána ña ya. ³² Te ñayuu cáyūcu nń xiin ya, ni cacahān i jíin yá: Náná ni jíin táca ñani ni cáhiin nuū quéhe, te cácu ni cahān jíin ní, áchí i.

³³ Te ni cahān maá yá:

¿Ndé ñn cúu náná rī jíin ñani rī? achí yá.

³⁴ Yūcuán na te ni ndacoto ya nuū ñáyuu cáyūcú xiin ya ún, te ni cahān yā:

Suni náná rī jíin ñani rī cácuu táca ñáyuu yáha. ³⁵ Chi táca ñáyuu casquícú jniñu cúní Yaā Dios, suu cácuu ñani rī, cuāha ri, náná rī, achí yá.

Jnūhun yátá síquī tēe jéte trigo

(Mt. 13.1-9; Lc. 8.4-8)

4

¹ Te yumar ni quejéé tucu Jesús steén yā jnūhun. Te ni cutútú cuéhē ndasí ñáyuu nuū yā, te jeē yúcuán ní quívi ya ni cucōo ya ini ñn barco nuū mar. Te táca ñáyuu un cáyūcú i yumar. ² Te jíin jnūhun yátá ni steén yā cuehē jnūhun nuū i, te súcuan ni cahān yā:

³ Cuni nahín jíjnáhan ró: ñn tēe cate trigo, ni quenda de jeē cáte de. ⁴ Te ná ni quejéé de jéte de, te jecu trigo ni jitē yuhíchi. Te ni quecoo saa, ni cayeji tī. ⁵ Te jecu gā trigo ni jitē nuū ñúhun yuū, nuū tú cuehē ñuhun. Te yachī-ni ni cane, chi tu cóquin ñuhun. ⁶ Te nuū ní cane niāndii, te ni ichī-ni, te ni casun, chi tu ní níhín nuū quihín yoho. ⁷ Te jecu gā trigo ni jitē nuū náne iñu. Te ni jehnu iñu ún, te ni jesi nuū, te tu ní jéhe nunī. ⁸ Te jecu ni jitē nuū ñúhun váha. Te ni cane, te ni jehnu, te ni jēhe cuehē nunī. Sava ni jēhe ocō uxí jeē ñn ñn nunī, te sava ga ni jēhe unī xico, te sava ga ni jēhe ciento. Achí yá.

⁹ Yūcuán na te ni cahān yā jíin de:

Tāca róhó jéé jíni sōho, na chúsóhó ró. Achí yá.

Najehē cahán yā máni jnūhun yátá

(Mt. 13.10-17; Lc. 8.9-10)

¹⁰ Yūcuán na te ni quendōo máa na yā, jíin ndihúxí uū tēe cáscuáha jíin yá, jíin jecu gā ñayuu cáhiin jíin de. Te ni cacajñuhún de ya na vé cuní cahān jnūhun yátá un. ¹¹ Te ni cahān yā jíin de:

Róhó, chi sáha Yaā Dios jeē cájecūhun ni rō jnūhun ni yisāhi yáha, ndese quívicoo ñayuu ndaha ya ndacu ya jniñu nuū i. Te ñayuu jeē cáhiin sñn síquī, chi máni jíin jnūhun yátá cáhán rī táca jnūhun jíin i. ¹² Súcuan cáhán rī návāha vésú cájito i, te quendōo i nájnūhun jeē tú na vé ni cájito i. Te vésú cájini sōho i, te ma jécūhun ni i, te ma násāma ini i quívicoo i nuū rī, te ma cóo jnūhun cáhnu ni nuū cuéchi i, achí yá.

Jeē ní castūhun cájí yá jnūhun yátá tēe jéte trigo

(Mt. 13.18-23; Lc. 8.11-15)

¹³ Te ni cahān gā yā jíin de jíjnáhan de:

Núu tu cájecūhun ni rō jnūhun yátá yáha, ¿te ndese jecūhun ni rō táca gá jnūhun yátá núu súcuan? ¹⁴ Tēe jéte trigo cúu tēe scuíté núu jnūhun Yaā Dios. ¹⁵ Te trigo jeē ni jítē yuhíchi cúu nájnūhun ánuá sava ñayuu. Chi cájini nahín i jnūhun ya, te ná ni cajini i, te quíji-ni Satanás te quēnde-ni jnūhun ini anuá i. ¹⁶ Te trigo jeē ni jítē nuū ñúhun yuū, chi cúu nájnūhun ánuá sava ñayuu cájini nahín jnūhun, te yachī-ni cájetáhu i te cácusñ ni i jíin. ¹⁷ Te tu cúcutú jnūhun ún ini anuá i, te jecu-ni quívi cájetáhu i. Te núu ni quejéé jnúndóho, chí jító xeēn ñayuu i síquī jnúhun ún, te quejéé nácani yátá ni i. ¹⁸ Te jeē ni jítē nuū náne iñu cúu nájnūhun jecu gā ñayuu. Chi vésú ni cajini sōho i, ¹⁹ te cándihvi ni i síquī jeē iyó ini ñayivi yáha. Te cácu ni i cucúcá i, te stáhu un i jeē cutóo ni i síquī táca ndajniñu. Te ndihi jeē yáha cácuñéñu i jíin, te jesi nuū jnúhun ya, te tu íje i jíin jnúhun ya. ²⁰ Te trigo jeē ni jítē nuū ñúhun váha cúu nájnūhun ñayuu cájini nahín jnúhun, te cájetáhu i, te cáhije i jíin jnúhun ya. Te sava i cúu nájnūhun nunī jeē jéhe ocō uxí jeē ñn ñn, te sava i jéhe unī xico, te sava ga i jéhe ciento. Achí yá.

Jnūhun yátá sáquī lámpara
(Lc. 8.16-18)

²¹ Suni ni cahān yā jíin de:

Núu nástíin ñayuu ñin lámpara, ¿a chúne i chíji ñin cajón chí chíji jito? Tuú, chi jéni i nuū sucún návāha cundijin. ²² Te suni súcuan, tu íyó ni ñin jnūhun sāhi jéē ma cúni ñayuu, chi ndíhi tāca jnūhun natūu ndijin te cuni ñayuu. ²³ Tāca róhó jéē jíni sōho, na chúsóhó ró, áchí yá.

²⁴ Te suni ni cahān yā jíin i:

Cuni sōho vāha ró. Chi cūhva jeē chusóhó ró jnūhun Yaā Dios, suni cūhva un cuāha ya nuū rō, te víhyá gā cuāha ya nuū maá ró jeē chusóhó váha ró. ²⁵ Chi ñayuu je jécūhun ni, stéén gā yā nuū i. Te ñayuu tu cándíje, máá jecu jeē jiní i ún, sa suhva naa. Achí yá.

Jnūhun yátá sáquī trigo jeē jéhnū

²⁶ Te ni cahān gā yā:

Súcuan cúu jeē ndácu Yaā Dios jniñu nuū ñayuu: Cúu nájñūhun trigo jeē ní jete ñin tēe. ²⁷ Yūcuán na te quíxí de te ndónnda de, te súcuan jíca quiví cuahān. Te trigo un cáne te jéhnū. Te máá de tu jíni de ndese cúu jeē jéhnū. ²⁸ Chi máá ñuhun sāha jeē jéhnū trigo, xīhna gā yucū, sáá te cáne yoco, yūcuán na te íje máá núní. ²⁹ Te núu ni cuaan trigo un, te quéjéē ñayuu cájehnde i, chi je ni jinū quiví tahndé. Achí yá.

Jnūhun yátá sáquī ndiquin mostaza
(Mt. 13.31-32; Lc. 13.18-19)

³⁰ Te suni ni cahān yā:

Na cáhán rī ñin jnūhun yátá návāha cuni rō ndese ndúcuehē ñayuu jeē ndácu Yaā Dios jniñu nuū. ³¹ Ndúcuehē i nájñūhun jéhnū ñin ndiquin mostaza jeē jéquin i nuū ñūhun. Te yūcuán cúu ñin ndiquin lúli gá vésú tācá ndiquin jeē iyó. ³² Te ná ni jequin i, te cáne te jéhnū ga vésú tāca gá yucū, te cúnáhnū ndaha. Te tācá saa chi sāha tí tacā tí nuū cuándahū xiní ún. Achí yá.

Jeē máni jnūhun yátá cáhán yā jíin i
(Mt. 13.34-35)

³³ Te cuehē jnūhun yátá súcuan ni cahān yā jíin ñayuu, núu nasaa cánda i jecūhun ni i. ³⁴ Te tāca jéē ni stéén yā, máni máá jnūhun yátá ní cahān yā jíin i. Te nuū tēe cáscuáha jíin yá chí ni nacastūhun cájí yá jnūhun ún.

Jeē ní jecuiñī tachī níhin jíin mar ni sāha ya
(Mt. 8.23-27; Lc. 8.22-25)

³⁵ Te jeē cuácuaa quiví ún, te ni cahān yā jíin tēe cáscuáha jíin yá:

Na yáha yó quíhīn yō inga lado mar, achí yá.

³⁶ Te ni casquéndōo de ñayuu cuehē ún, te ni quívicoo de ini barco nuū je íne Jesús, cuango de jíin yá. Te suni cuango jecu gā barco jíin de jíinánhan de. ³⁷ Te ni jecuñi ñin tachī níhin, te ni stónnda ndute mar, te ni quíví ini barco. Te je yajni chitú ndute ini barco. ³⁸ Te Jesús catú yá yatā de ini barco, quíxí yā te yíhi ñin sahma cástíhi xiní yā. Te ni castónnda de ya, te ni cacahān de:

Maestro, ¿á tu sāha ní cuenta jeē quēe yó chíji ndute te cuu yō? achí de.

³⁹ Te ni ndocuñī yā, te ni cahān yā nuū tachí níhin un jíin núu mar:

Jecuñī te nayúu-ni coo ró, achí yá.

Te ni jecuñī tachī, te ni cuu nayúu í-ni. ⁴⁰ Te ni cahān yā jíin de jíinánhan de:

¿Naun cáyūhú ndasí ró? ¿Naun tu cácañíje ró jéē cācu ró sāha rí?

⁴¹ Te yōhyo ni cayūhú de, te ni cacahān de jíin jnánhan de:

¿Ndé ñin ga cúu tēe yáha jéē nde tachí níhin jíin mar cájetáhu jéē cahán de? achí de.

Tēe Gadara jeē ndóho tachī
(Mt. 8.28-34; Lc. 8.26-39)

5

¹ Te ni jinū Jesús jíin de jíinánhan de inga lado mar, región Gadara. ² Te ná ni quenda ya ini barco un, te ìin tēe ñúhun tachī ini, ni quenda de nde nuū yíndūji ndīyi, te ni quee de nuū yā. ³ Tēe un ndéé de nuū yíndūji ndīyi. Te tu jéjníñu jeē jíhni ñayuu de, ni jíin cadena. ⁴ Chi cuehē jíinu ni conuhnī jehē de ndaha de jíin cadena. Te tāca jínu jéhnde de, te sácuéché de. Te tú ni ìin cúndeyí jíin de. ⁵ Te nduú ñuú jíca de yucu jíin núū yíndūji ndīyi, te cána cóhó de, te stújí de máá de jíin yúū. ⁶ Te náa jíca gá vēji Jesús, te ni jito de ya. Te jínu de ni quee de nuū yā, te ni jecuiñī yití de nuū yā. ⁷ Te ni cana cóhó de:

¿Naun vēji ní núū ná, Jesús Sēhe Yaā Dios, Yaā cujéhnu téyí? Cáhán ndahú ná jíin ní, jíin nahín Yaā Dios, ma stóho ní sáña, áchí de.

⁸ Súcuan ni cahān de, chi je ni cahān Jesús:

Táchī, quenda ini tēe yáha quíhīn rō.

⁹ Te ni cajnūhun yá de:

¿Na vé naní ró?

Te ni cahān de:

Legión naní ná, chi cuehē tachī ñúhun ini ná, áchí de.

¹⁰ Te ni cahān ndahú ndasí de jíin yá jeē ma tájí yá tachī quendacoo región ún. ¹¹ Te yajni yucu yúcuan cáhīn cuehē quíñī cájitu tí. ¹² Te tachī jeē ñúhun ini tēe un ní cacahān ndahú jíin yá:

Núu tájí ní sáña, te cuāha ní jnūhun quíñī yūcuán, áchí.

¹³ Te Jesús ni jēhe ya jnūhun. Te ni quendacoo tachī ún ini tēe ún, te ni quíñī ini quíñī, te íyó nájñūhun uū mil tí. Te quíñī un ní cajinu tí ni ñingoo tí ìin yucáva, ni quíñīcoo tí nuū mar. Te ni ndaquíñī tí ndute, ni cajihī tí.

¹⁴ Te tēe cándito tí, ni cajinu de cuangoo de jeē ní cayūhú de. Te ni jinūcoo de ni cacastūhún de nuū ñáyuu ñuu un jíin ñáyuu tāca rancho. Te cuangoo ñayuu un cuácondēhé i na vé ni cuu. ¹⁵ Te ni jinūcoo i nuū íne Jesús, te ni cajito i nuū tēe ni ñuhun cuehē tachī ini. Te néne de, te ñúhun de sahma, te je ni nducájí xíní de. Te ni cayūhú ñáyuu ún. ¹⁶ Te tēe ní cajito, ni canacani de jnūhun nuū ñáyuu, ndese ni nduvāha tēe ni ñuhun tachī ini, jíin ndese ni candoho quíñī ún. ¹⁷ Yūcuán na te ni caquejéé i cácahān ndahú i jíin yá jeē na cújiyo ya región yúcuan quíhīn yā.

¹⁸ Te ni ndīvi ya ini barco. Te tēe ni ñuhun tachī ini un ní cahān ndahú de jíin yá jeē na cuāha ya jnūhun quíhīn de jíin yá. ¹⁹ Te Jesús tu ní jēhe ya jnūhun, chi ni cahān yā jíin de:

Cuánuhun vehe ró núū jnāhan ró, te nacani ró jnūhun nuū i ndese yōhyo jéhnu jniñu ni sáha máá Jítóho rō jíin ró, te ndese ni cundáhú ni yā rohó, áchí yá.

²⁰ Te ni quenda de cuahān de, te ni quejéé de nácani de jnūhun tāca ñuu Decápolis ndese yōhyo jéhnu jniñu ni sáha Jesús jíin de. Te ndīvii ñayuu un ní canaa ni i cájini nahín i.

Jnūhun sēhe śhí Jairo jíin ñahan ní quehé yusáhma ya
(Mt. 9.18-26; Lc. 8.40-56)

²¹ Te ni nayāha tucu Jesús cuanuhun yā inga lado mar jíin barco. Te ni quecoo cuehē ñayuu nuū yā, nuū íne ya yumar. ²² Te ni quee ìin tēe cújéhnu ini vehe ìi sinagoga, naní de Jairo. Te ná ni jito de nuū yā, te ni jecuiñī yití de nuū jehé yā. ²³ Te ni cahān ndahú ndasí de jíin yá:

Sēhe śhí ná je yajni cuu i. Na quíhīn yō vehe ná te soó ní ndaha ní síquī i návāha na ndúvāha i te cotecu i, áchí de.

²⁴ Yūcuán na te cuahān yā jíin de. Te cuehē ñayuu cándiquīn i ya, te ni chitú níhin i xiin ya cuangoo i. ²⁵ Te mēhñu ñáyuu un cuáhān ìin ñahan cúhú, jeē ní cuu uxī uū cuiyā ndóho ña cuehyī níñī. ²⁶ Te yōhyo ni ndoho ña, chi ni jexin ña tāca jéé névāha ña jíin cuéhē tēe tájna, te tu ní jéjníñu jeē ndúvāha ña, chi sa suhva víhyá gā sáha. ²⁷ Te ñahan yáha ná ni nihīn ña jnūhun Jesús, te ni quee ña ichi yátá yā mēhñu ñáyuu cuehē ún, te ni quehé ña yusáhma ya. ²⁸ Chi ni jeni ni ña: Vēsú máá sahma ya na níhīn rī quehé rí, te

nduvāha ri, jéni ni ña. ²⁹ Te ni jecuiñi-ni niñi ña, te ni jini ña jeē ní nduvāha ña cuehyi ún. ³⁰ Te Jesús ni jini yā jeē ní nduvāha ñi ñayuu jín fuerza yā. Te ni ndió cóto ya nuū ñayuu cuehē, te ni cahān yā:

¿Ndé ñi ni quehé sahma ri? Achí yá.

³¹ Te tēe cáscuáha jín yá, ni cacahān de:

Jíto ní jēē ñayuu cuehē yāha ní chitú ñihin i xiin ní te cáquhi i ñhín ní cáni ichi, te cájnūhun ní ndé ñi ni quehé sahma ní.

³² Te máa yá jíto ya cháha chúcuan, cúní yā jeē na cáchi ñayuu ni sáha. ³³ Te ñahan un yúhú ña te quisi i ña, te je jíní ña jeē ní nduvāha ña. Te ni quee ña, te ni jecuiñi yití ña nuū yā, te ni cachi ña ndihi ndese ni cuu jín ña. ³⁴ Te ni cahān yā jín ña:

Séhē, ni candíje ró jēē cuu nasávāha ri rohó, te jeē yúcuan ní nduvāha ró. Cuáhán te na ndúsi ni rō, chi je ni nduvāha ró cuehyi ní ndoho ró, áchí yá.

³⁵ Te níni cáhán gā yā súcuan, te ni quecoo ñayuu cáyucú vehe tēe cújéhu ini vehe ñi sinagoga, te ni cacahān i jín de:

Je ni jihí sēhe síhí ní. Te ma sajnēñu ga ní Maestro, achí i.

³⁶ Te Jesús tu ní sáha ya cuenta jeē súcuan cácahān i, te ni cahān yā jín tēe cújéhu ini vehe ñi sinagoga:

Ma yūhu ró, chí candíje ró jēē nastécu rí i, áchí yá.

³⁷ Te tu ní jéhe ga yā jnūhun condiquin ñayuu yā, chí máa-ni Pedro jín Jacobo, jín Juan ñani Jacobo. ³⁸ Te ni jinū yā vehe tēe cújéhu ini vehe ñi sinagoga, te ni jito ya ñayuu, cácuvaā i, te cándahyū i, te cácana cóhó i. ³⁹ Te ni quivi ya, te ni cahān yā:

¿Najehē yōhyo cásvaā rō te cándahyū rō? Sūchi síhí yáha, tu ní jihí i, chí quixí-ni i, áchí yá.

⁴⁰ Te ni cajecū catá i jeē ni cáhān yā. Te ni quenehen ndihi ya i cuahān i nuū quehe. Te ni cana ya máa-ni tátá jín náná sūchi síhí un, jín tēe cáhín jín yá, te ni quivi ya jín de nuū catú sūchi síhí ní jihí ún. ⁴¹ Te ni jni ya ndaha i, te ni cahān yā jín i:

Talita cumi, achí yá. Te jnūhun un cúní cahān: Síhí, cáhán rí jín ró, ndocuiñi, achí yá.

⁴² Te ni ndocuiñi-ni sūchi síhí un, te ni nacaca i, chí je íyó i uxí uū cuiyā. Te yōhyo ni canaa ni ñayuu cájito i. ⁴³ Te ni ndacu ñihin ya jniñu nuū i jínáhan i jeē ma cáchi cuiti i nuū ni ñi. Te ni cahān yā jeē na cuáha ña jeē cáji sūchi síhí.

Jeē cuánuhun yā ñuu Nazaret

(Mt. 13.53-58; Lc. 4.16-30)

6

¹ Te ni quenda Jesús yūcuán, te cuanuhun yā ñuu yā. Te tēe cáscuáha jín yá cuango de jín yá. ² Te máa quiví ndétatu ní steén yā jnūhun ini vehe ñi sinagoga. Te cuehē ñayuu ni canaa ni i cájini nahín i, te ni cacahān i:

¿Ndé nuū ní cutūhva tēe yáha tāca jnūhun yáha? ¿Te ndese cúu jeē cahān de jnūhun ndíchí yáha jín jēē sáha de jniñu jéhu yáha? ³ Chí tēe yáha cúu carpintero, te sēhe María cúu de, te ñani Jacobo jín José jín Judas jín Simón cúu de. Te suni cáyucu cuáha de jín yó yāhá. Achí i.

Te súcuan ni cacujéē ni i nuū Jesús. ⁴ Te ni cahān yā jín i:

Tāca tēe nácani jnūhun Yaā Dios, íyó yíñuhún ñayuu jín de, chí máni ñayuu ñuu maá de, jín jnáhan de, jín ñayuu vehe de cúu jeē tu íyó yíñuhún jín de. Achí yá.

⁵ Te tu ní cúu sáha ya cuehē jniñu jéhu yūcuán. Chí jecu-ni ñayuu cácuñu ni soó yá ndaha ya siquí i, te ni nasávāha ya i. ⁶ Te náa ni yā jíto ya jeē tu cácañíje ñayuu jínáhan i. Yūcuán na te ni jica cuu ya tācá ñuu yajni, ni steén yā jnūhun.

Jeē ní tají yá ndihúxí uū de cuanacani de jnūhun

(Mt. 10.5-15; Lc. 9.1-6)

⁷ Te ni cana ya ndihúxí uū tēe cáscuáha jín yá, te ni tají yá ndihuū ndihuū de quingo de. Te ni sáha ya jeē cóndiso jniñu de quenehen de tachí ini ñayuu. ⁸ Te ni ndacu ya

jeē tú na vé condiso de jeē cuajníñu de ichi, ni ñunu, ni staā, ni xūhún. Chi máá vara-ni condahá de. ⁹ Te quihí de ndijēn, te ma quihín de jíin úū sahma, áchí yá. ¹⁰ Te suni ni cahān yā jíin de:

Na-ni vehe núu ni quīvicoo ró, te yūcuán coyūcu ró ndé quenda tucu ró quíhīn rō inga ñuu. ¹¹ Te núu ñn ñuu tu cájetáhú i róhó, ni tu cúní i cuni nahín i jnūhun cahān rō, na quéndacoo ró yúcuán, te scóyo ró tícachā jehē rō, te súcuán stéén rō jeē iyó cuéchi i jeē tu ní cájetáhú i. Jendaá cahān rī jíin ró jeē quivī coo juicio te xeēn gā coo castigo siquī ñuu casáha súcuán vēsú siquī ñuu Sodoma jíin ñuu Gomorra nuū ní casáha ndasí ñáyuu cuéchi.

¹² Te ni quendacoo de cuahān de, te ni canacani de jnūhun jeē na nácani ni ñayuu jeē stóo i cuéchi i. ¹³ Te suni ni caquenehen de cuehē tachī ini ñayuu. Te ni cachihí de aceite cuehē ñayuu cácuñu, te ni canduvāha i.

Jeē ni jíhī Juan tēe scuándute

(Mt. 14.1-12; Lc. 9.7-9)

¹⁴ Te rey Herodes ni jini jnūhun de jnūhun Jesús, chi ni jitē núu jnūhun ya ní cáhnu. Te ni cahān de:

Tēe yúcuán cúu Juan tēe ni scuándute, te ni natecu de. Jeē yúcuán íyó poder de sáha de jniñu jéhnu. Achí de.

¹⁵ Te sava ga ñayuu ni cacahān i:

Tēe un cúu Elías jeē ní nacani jnūhun jenahán.

Te sava ga i ni cacahān:

Tuú chi ñn tēe nácani jnūhun Yaā Dios cúu de, nájñūhun tēe ni canacani jnūhun ya nde jenahán, áchí i.

¹⁶ Te ná ni jini Herodes, te ni cahān de:

Tuú chi yúcuán cúu Juan jeē ní ndacu ri jniñu ni tahndē xinī, te ni natecu de núu súcuán, áchí de.

¹⁷ Chi máá Herodes ni ndacu de jniñu jeē na quivī Juan vecāa, jíin jēe na cónuhñi de jíin cadena. Súcuán ni sáha de jeē siquí Herodías, ñasihí ñani de Felipe. Chi Herodes ni quihin de ña jeē cúu tucu ña ñasihí de. ¹⁸ Te Juan ni cahān de nuū Herodes:

Tu íyó ley jeē cóndeca ró ñasihí ñani rō, achí de.

¹⁹ Te jeē yúcuán Herodías ni jito uhū ña Juan, te cúní ña jeē na cúu de, te tu ní níhín ña modo. ²⁰ Chi Herodes yúhú de cahni de Juan, chi jíin de jeē tēe ndaā tēe ndoo cúu Juan. Te jeē yúcuán ní jesí de jeē nducú ña jeē cúu Juan. Te núnjahan ni de jíin nahín de jnūhun cáhán Juan, vēsú tu jécūhun vāha ni de. ²¹ Te ni quee ñn quivī jeē ní cundeyí Herodías. Chi ni sáha Herodes ñn vico quivī ní cacu de, te ni jēhe de jeē ní cacuxíni tēe cándiso jniñu nuū de, jíin tēe cácuu capitán, jíin tēe cácujuhnu región Galilea. ²² Te ni quivī sēhe síhí máá Herodías, ni jita jéhé i nuū chitú un. Te ni cacusñi ni rey Herodes jíin tēe cácuñi jíin de. Te ni cahān de jíin súchi síhí un:

Cacān na vé cuní rō, te cuāha ri nuū rō, achí de.

²³ Te ni cahān teyí de jeē cuáha de núu na vé cuní i cacān i, vēsú nde sava región jeē yñi ndaha de. ²⁴ Te ni quenda i, ni jecajñūhún i náná i:

¿Na vé cacān na núu de? áchí i.

Te ni cahān ña:

Xinī Juan tēe scuándute cacān rō nuū de, áchí ña.

²⁵ Yūcuán na te ni ndīvi-ni i nuū rey, te ni cahān i:

Cúní na jēe vijna ñūhún-ni cuāha ní xinī Juan tēe scuándute, cone nuū ñn cohō, achí i jíin de.

²⁶ Yūcuán na te ni cucuíhyá ndasí ni rey un jeē ní cundeyí Herodías jeē cúu Juan. Te siquī jeē ni jéñūhun téyí de, jíin jēe ní cajini sōho tēe cáyeji staā jíin de, jeē yúcuán tu ní cúní de sásáhán de jeē ni jíicān i. ²⁷ Te ni tají-ni de ñn soldado jeē quíquihin de xinī Juan.

²⁸ Te ni jehēn soldado un vecāa, te ni jehnde de xinī Juan. Te ni quee de jíin xinī Juan, íne nuū ñn cohō. Te ni jēhe de nuū súchi síhí un, te máá i ni jēhe i nuū naná i.

²⁹ Te tēe cáscuáha jíin Juan ni canihin de jnūhun, te ni jengoo de, ni candonehen de yiqui cúnu Juan, te ni cachindūji de.

Jeē ni scáji yā uhūn mil tēe

(Mt. 14.13-21; Lc. 9.10-17; Jn. 6.1-14)

³⁰ Yūcuán na te tēe cácuu apóstol jeē ní tají yá cuangoo nacani jnūhun, ni ndecoo de nuū Jesús. Te ni canacani de nuū yā tācá jniñu ni casáha de, jíin jnūhun ni castéén de.

³¹ Te ni cahān yā jíin de:

Na quíngoo yó ĩn lugar nuū tú ñayuu, te ndetātu yó jecu, achí yá.

Chi cuehē ñayuu cuahān i vēji i nuū yā, te ni tu ní núne ya jeē cáji yā staā jíin de.

³² Yūcuán na te ni quívi ya ĩn barco jíin táca tēe apóstol un, te cuangoo sĩn ya jíin de ĩn lugar nuū tú ñayuu. ³³ Te cuehē ñayuu ni cajito i jeē cuahān yā jíin de, te ni canacuni i jeē maá yá cúu. Te nde tācá ñuu ni quendacoo i, te yachī cuangoo i, te xĩhna gā i ni jinūcoo vēsú maá yá. ³⁴ Te nuū ní quenda Jesús ini barco, te ni jito ya ñayuu cuehē ún. Te ni cundáhú ni yā i, chi cúu i nájnūhun lanchi jeē tú jito ho tĩ. Te ni steén yā cuehē jnūhun nuū i. ³⁵ Te nuū ní ini, te tēe cáscuáha jíin yá, ni quecoo de nuū yā, te ni cacahān de:

Je ni ini, te yāhá chi tú na ñayuu yúcu. ³⁶ Núu súcuan te tají ní ñayuu na quíngoo i tāca rancho jíin ñuu yajni, te cuaan i staā caji i, chi tú na vé cándiso i caji i, achí de.

³⁷ Te ni cahān Jesús jíin de:

Cuāha máá ró jeē cáji i, achí yá.

Te ni cacahān de:

¿Te ndese cuu? Chi ni ma cúu vēsú núu quicuaan ná ndé uū ciento denario staā caji ñayuu, achí de.

³⁸ Te ni cahān yā jíin de:

¿Nasaa staā cánevāha ró? Cuacondēhe, achí yá.

Te nuū ní cajini de, te ni cacahān de:

Uhūn-ni staā jíin úu chācá íyó, achí de.

³⁹ Yūcuán na te ni cahān yā jíin ñayuu jeē na cúcōo sĩn i cuenta grupo nuū íte. ⁴⁰ Te ni cacucōo sĩn ciento ciento i, jíin cincuenta cincuenta i. ⁴¹ Te ni quihin ya ndihúhún staā jíin úu chācá un, te ni ndacoto ya ichi ándiví, te ni nacuatáhú yá. Te ni tahú cuéchí yá staā ún, te ni jēhe ya nuū tēe cáscuáha jíin yá, te máá de ni casaja de nuū ñayuu cuehē ún. Te suni ni jēhe ya ndindúú chācá, ni casaja de nuū i. ⁴² Te ndivii i ni cayeji, te ni candutú chíji i. ⁴³ Yūcuán na te ni canastútú de pedazo staā jíin cháca jéé ní quendōo, te ni chitú úxī uū jica. ⁴⁴ Te tēe ni cayeji, chi uhūn mil de cúu.

Jeē ní jica jéhé yá nuū mar

(Mt. 14.22-27; Jn. 6.16-21)

⁴⁵ Yūcuán na te ni cahān-ni Jesús jíin tēe cáscuáha jíin yá jeē na quívicoo de barco, te cosnúu de yāha de inga lado mar ñuu Betsaida. Te máá yá chi natajé yá ñayuu quinhun i, te sáá te suni quihĩn yā. ⁴⁶ Te nuū ní cuu ni natajé yá i, te ni caa ya yucu cuacacān tahú yā. ⁴⁷ Te jeē ní cuaa, te barco un je ni cuu sava nuū mar cuahān, te máñúhún-ni ya ni quendōo nuū ñūhun íchi. ⁴⁸ Te ni jito ya jeē yóhoyo jnūndóho cáscáca de barco, chi nĩhin vēji tachī ichi núú de. Te jeē yínee gā ni quee ya nuū de, jica jéhé yá nuū mar. Te yāha ya nuū de quihĩn yā nuú. ⁴⁹ Te ni cajito de jeē jica ya nuū mar, te ni cajeni ni de jeē jihná cúu, te ni cacana cóhó de. ⁵⁰ Chi ndĩhi de ni cajito nuū yā, te ni cayūhú ndasí de. Te ni cahān-ni ya jíin de:

Ndeyí coo ni rō, te ma yūhu ró, chi máá rí cúu, achí yá.

⁵¹ Te ni quívi ya ini barco un, te ni jecuñĩ-ni tachī. Te yóhoyo ni canaa ni de cájito de.

⁵² Chi cándāa néé gá jeē níjnūní de, chi ni jíin jniñu jéhnū jeē ní nducuehē staā, tu ní cájecūhun ni de jeē maá yá cúu Yaā ní tají Yaā Dios.

Jeē ní nasávāha ya ñayuu cácuhū región Genesaret

(Mt. 14.34-36)

⁵³ Te ni quenda jíyo ya jíin de nuū mar ún, ní jinū yā región Genesaret. Te yundúte un ní cajihni de barco. ⁵⁴ Te nuū ní quenda ya jíin de ini barco, te ñayuu yúcuán ni canacuni-ni i ya. ⁵⁵ Te yachī ni jengoo i tācá ndañūū yūcuán, te ni caquindeca i ñayuu cácuahū, cáyosó i nuū camilla, vējicoo ñayuu nuū ní jito i íne ya. ⁵⁶ Te ndé-ni cúu-ni núu ni quívi ya, núu ñuu lulí, chí ñuu cáhnu, chí rancho, te cájequin i ñayuu cácuahū yuhíchi, te cácahān ndahú i jíin yá jeē na quéhé i vēsú yusáhma ya. Te tāca ñáyuu jeē ní caquehé sahma ya, ni canduvāha-ni i.

Siquī ndese cújnehén ñayuu
(Mt. 15.1-20)

7

¹ Yūcuán na te tēe grupo fariseo jíin jecu tēe cástéén tutu ley Yaā Dios, ni quendacoo de ñuu Jerusalén, te ni quecoo de nuū Jesús. ² Te tēe un ní cajito de jeē sava tēe cáscuáha jíin Jesús, ni cayeji jnehén de staā, chi tu ní cáscuáha de costumbre jeē nándahá de nuū Yaā Dios. Te ni cacahān siquī de. ³ Chi tēe fariseo jíin ndihī ñayuu hebreo, névāha i costumbre jenahán jeē ma cáji i staā núu tu nandahá váha i xihna gā. ⁴ Te núu ni ndecoo i jeē ni jengoo i nuū yáhu, te tu cáyeji i te núu tu nandahá i. Te íyó cuéhē gā costumbre jenahán jeē casquícu i, nájñuhun jeē ndúndoo taza, tindhō, cohō cáa, jíin jíto. ⁵ Te tēe fariseo jíin tēe cástéén tutu ley Yaā Dios, ni cacajñuhún de ya:

Tēe cáscuáha jíin ró, ¿naun tu cáscuáha de costumbre ñayuu jenahán? Chi sa cáyeji jnehén de staā, achí de.

⁶ Te ni cahān yā jíin de:

Ndaā ni nacani Isaías jñuhun siquī rō jijnáhan ró jéē tēe stáhú-ni cácuu ró. Chi súcuán ni tee de jñuhun ni cahān Yaā Dios nde jenahán:

Ñayuu yáha chi máa yuhu-ni i cájetáhú i ruhū,
te nasūu ndé jíin ini jíin ánuá i.

⁷ Te cáchiñuhún sáa-ni i ruhū,
chi jñuhun cástéén i cúu jniñu ní candacu tēe,
te nasūu jéē ní ndacu máa rí cúu.

Achí Yaā Dios. Achí Isaías. ⁸ Súcuán cácuu ró, chi ni casiáá rō jniñu ní ndacu Yaā Dios nuū rō, te cáscuáha de costumbre jeē ní cajequin ñayuu, jeē ndúndoo tindhō jíin taza. Te cuéhē gā costumbre súcuán cáscuáha ró, achí yá.

⁹ Te suni ni cahān yā:

Casiáá rō jniñu ní ndacu Yaā Dios, návāha squícu ró costumbre ni cajequin máa ró. ¹⁰ Chi Moisés ni cahān de: Coó yíñuhún ró jíin tátá rō jíin náná rō. Te núu ndé ñiñu cahān siquī tátá chí síquī naná, na cúu nahín. Achí Moisés. ¹¹ Te máa ró chi cacahān rō jeē cuu cahān ñiñu tēe jíin tátá de náná de: Ma cúu chindéé ñáhán ná níñiñu cuáha na jéē cáji ni jéē cúhun ní, chi ndihī jeē névāha ná, chí Corbán cúu, achí ró. (Te jñuhun Corbán cuní cahān jeē ni sócō nuū Yaā Dios.) ¹² Te cacahān rō jeē núu súcuán cahān ñiñu tēe, te tuá cánuú chindéé ñáhán de tátá de náná de. ¹³ Te súcuán cástívi ró jniñu ní ndacu Yaā Dios, jeē siquí costumbre ni cajequin ñayuu jenahán vēji. Te cuéhē gā jniñu súcuán cásaáha ró, achí yá.

¹⁴ Te ni cana tucu ya ñayuu cuéhē ún, te ni cahān yā jíin i:

Cuni sōho vāha ró jijnáhan ró, te chuhun ni rō: ¹⁵ Tāca jéē iyó, te núu ni quívi yuhu ñayuu te tu cújnehén i sáha. Chi jeē quénda ini anuá ñayuu, yūcuán cúu jeē cújnehén i sáha. ¹⁶ Tāca róhó jéē jíini sōho, na chúsóhó ró, achí yá.

¹⁷ Te ni stóo ya ñayuu cuéhē ún, te ni quívi ya ini vehe. Te tēe cáscuáha ún, ni cacajñuhún de ya siquī jñuhun yátá yáha jéē ni cahān yā. ¹⁸ Te ni cahān yā jíin de:

¿A máa ró suni ná tu jecūhun ni rō, chí naún? ¿A tu cájini rō jeē tāca jéē quívi ini ñayuu, ma cúu cújnehén i sáha? ¹⁹ Chi tu quívi ini anuá i, chí chíji i quívi, te quénda-ni cuahān, achí yá.

Súcuan ni steén yā jeē tāca jéē yéji ñayuu, tu cújnehén ánuá i sáha. ²⁰ Te ni cahān gā yā:

Jeē quénda ini anuá ñayuu, yūcuan cúu jeē cunjnehén i sáha. ²¹ Chi nde ini anuá ñayuu quénda jeē jéni néé ni, jeē casíquí ndéē jnáhan, jeē jíca jnéni, jeē jéhni ndīyi, ²² jeē sacuíhná, jeē ndiyo ni ndajniñu jnáhan, jeē sáha néé, jeē stahú jnáhan, jeē máni cuēchi sáha, jeē cucuésún ni, jeē cahán yāa síquí jnáhan, jeē sandúxí máá, jeē canéé xíní. ²³ Tācá jniñu néé yáha, máni ini anuá ñayuu quénda, te cújnehén i sáha, áchí yá.

Ñahan inga nación jeē ní candíje nihin
(Mt. 15.21-28)

²⁴ Te ni quenda ya yūcuan cuáhān yā región Tiro jíin Sidón. Te ni quīvi ya ñin vehe, te cúní yā jeē tú ni ñin ñayuu cuni jeē íne ya yūcuán. Te vésú súcuan, te tu ní cúu cone sáhi yá. ²⁵ Te ñin ñahan íyó séhe síhí ña jeē ñúhun tachí ini i, ni nihin-ni ña jnūhun jeē íne ya. Te ni quee ña, te ni jecuíñi yití ña nuū jehé yā. ²⁶ Te ñahan ñuu jicá cúu ña, chí nde Sirofenicia cúu nación ña. Te ni cahān ndahú ña jíin yá jeē na quénehen ya tachí ini séhe síhí ña. ²⁷ Te ni cahān Jesús jíin ña:

Nasūu núu maá ní vēji ná, chí máni nuū ñáyuu cácuu séhe Israel. Chí tu íyó váha jeē quénde yō staā séhe te cuáha yó núu ína, achí yá.

²⁸ Te ni cahān ña:

Jendaá cahán ni Tātā, te chindéé ñáhán ní sáña vésú cúu ná nájñūhun ina. Chí suni máá tí cáhiin tí chíji mesa, cánihin tí staā cuechí jéē cóyo yuhu sūchi lúlí cáyeji tí, achí ña.

²⁹ Yūcuán na te ni cahān yā jíin ña:

Váha ni cahān ní. Cuáhán ní núu súcuan, chí je ni quenda tachí ún ini séhe síhí ní, achí yá.

³⁰ Te ni najinū ña vehe ña, te ni jito ña jeē catú séhe síhí ña nuū jíto, te je ni quenda tachí ún ini i.

Jeē ní nasávāha ya ñin tēe sóhó cásteté

³¹ Te ni quenda tucu ya región Tiro, ni yāha ya Sidón jíin táca ñuu Decápolis, te ni jinū yā mar Galilea. ³² Te ni caquindeca i ñin tēe sóhó cásteté nuū yā, te ni cacahān ndahú i jíin yá jeē na sóo yá ndaha ya síquí de. ³³ Te ni quenehen sñn ya de nuū ñáyuu cuehē ún, te ni chune ya xíní ndáha ya sōho de, te ni tesñhi yá, te ni quehé yá yaá de. ³⁴ Te ni ndacoto ya ichi ándiví, te ni jítū ni yā, te ni cahān yā:

Efata, achí yá, jeē cuní cahān: Nanune.

³⁵ Te ni nanune-ni sōho de, te ni nduvāha yáá de, te ni nacadhān vāha de. ³⁶ Te ni ndacu ya jniñu nuū ñáyuu un jéē ma cáchi i nuū ní ñin. Te vésú ni cahān nihin ya jíin i, te víhyá gā ni cajete i jnūhun. ³⁷ Te yōhyo ni canaa ni i cájito i, te ni cacahān i:

Váha sáha ya tācá jniñu, chí nde tēe cásohó, cánacuni sōho de, te tēe cándāa ññhín, cánacahān vāha de sáha ya, achí i.

Jeē ni scáji yā cuūn mil ñayuu
(Mt. 15.32-39)

8

¹ Te tiempo un ní candutútú cuéhē ndasí ñáyuu, te tuá na vé caji i. Te ni cana Jesús tēe cáscuáha jíin yá, te ni cahān yā:

² Cúndáhú ni rī ñayuu yāhá, chí je ni cuu unī quivī cáyūcú i jíin rí, te tuá na vé caji i.

³ Te núu natajírí i quinhun ndite i vehe i, te cuíta fí i sava ichi, chí íyó sava i jeē jicá véjicoo i, achí yá.

⁴ Te tēe cáscuáha un ní cacahān de:

¿Te ndé nuū nihín yō staā caji i jíjnáhan i? Chí yāhá tú na ñayuu yúcu, achí de.

⁵ Te ni cajñūhun yá de:

¿Nasaa staā cánevāha ró?

Te ni cacahān de:

Uxā-ni, áchí de.

⁶ Yūcuán na te ni cahān yā jíin ñáyuu cuehē un jēē na cūcōo i. Te ni quihin ya ndihúxá staā ún, te ni nacuatáhu yá nuū Yaā Dios. Te ni tahu cuéchí yá, te ni jēhe ya nuū téē cáscuáha jíin yá. Te máá de ni casaja de nuū ñáyuu cuehē ún. ⁷ Te suni cándiso de jecu chācá lúli. Te ni nacuatáhu yá siquī, te ni cahān yā jēē suni saja de jíinánhan de. ⁸ Te ndihi i ni cayejí, te ni candutú chíji i. Yūcuán na te ni canastútú de pedazo jeē ní quendōo, te ni chitú úxā jīca. ⁹ Te tēē ni cayejí un, iyó nájñūhun cuūn mil de. Te ni nacuatáhu yá nuū ñáyuu ún, te cuanungoo i. ¹⁰ Yūcuán na te ni ndīvi-ni ya ini barco jíin téē cáscuáha jíin yá, te cuahān yā región Dalmanuta.

Jeē ní cajicān de ñin jniñu jéhnū nuū yā

(Mt. 16.1-4; Lc. 12.54-56)

¹¹ Yūcuán na te ni quecoo tēē grupo fariseo, te ni caquejéē de stíchí de Jesús. Te cácuni de coto ndee de ya, te ni cajicān de jeē sáha ya ñin jniñu jéhnū jeē coo ñin seña ichi ándiví. ¹² Te ni jitū ni yā siquī jeē tu cácandíje de jíinánhan de, te ni cahān yā:

¿Naun cájicān ñáyuu yáha ñin jniñu jéhnū nuū rí? Jendaá cahán rí jeē ma stéén rí ni ñin jniñu jéhnū nuū ñáyuu yāhá.

¹³ Te ni squéndōo ya de jíinánhan de, te ni ndīvi tucu ya ini barco, te cuahān yā ñinga lado mar.

Jñūhun levadura tēē fariseo

(Mt. 16.5-12)

¹⁴ Te tēē cáscuáha jíin yá ni canaa ni de condiso de jeē cáji de, chi ñin-ni pan cánevāha de ini barco. ¹⁵ Te ni ndacu ya jniñu nuū de:

Coto má candíje ró levadura tēē grupo fariseo jíin levadura Herodes, achí yá.

¹⁶ Te ni cacahān tēē cáscuáha un jíin táca jnánhan de:

Va siquī jeē tú na staā ndíso yó, jeē yúcuan cáhán yā súcuan, áchí de.

¹⁷ Te ni jini Jesús, te ni cahān yā:

¿Najehē cándajnūhun ró jeē ni cáhán rí súcuan siquī jeē tú na staā cándiso ró? ¿A ná tu cuni rō, á ná tu jecūhun ni rō jeē tu ní cáhán rí súcuan siquī jeē tu cándiso ró stāá? ¿A yóhyo uun ni rō candíje ró? ¹⁸ Iyó tñūu ró ¿te á tu cájito ró? Iyó sóho ró ¿te á tu cájini ró? ¿Te á tu cánucūhun ni rō? ¹⁹ Chi ná ni tahu cuéchí rí uhūn staā ni cayejí uhūn mil tēē, ¿te nasaa jīca ni chitú pedazo staā jeē ní canastútú ró? Achí yá.

Te ni cacahān de:

Uxī uū jīca, áchí de.

²⁰ Te suni súcuan ná ni tahu cuéchí rí uxā staā ni cayejí cuūn mil tēē, ¿te nasaa jīca ni chitú pedazo staā jeē ní canastútú ró? Achí yá.

Te ni cacahān de:

Uxā jīca, áchí de.

²¹ Te ni cahān yā jíin de:

Te nde vijna ¿á ná tu jecūhun ni rō jijnánhan ró?

Súcuan ni cahān yatá yá jeē ma cándíje de jñūhun stáhu cástéén tēē ún.

Jeē ní nasávāha ya tēē cuáá ñūu Betsaida

²² Yūcuán na te ni jinū yā jíin de ñūu Betsaida. Te ni caquindecā ñáyuu ñin tēē cuáá núu yā, te ni cacahān ndahú i jíin yá jeē na téē ya ndaha ya nuū de. ²³ Yūcuán na te ni jñiñ ya ndaha tēē cuáá un, te ni quenehen ya de yatā ñūu ún. Te ni tee ya tesīhi yá tñūu de, te ni tee ya ndaha ya siquī. Te ni cajñūhun yá de núu cuu coto de jecu. ²⁴ Te ni ndacoto de, te ni cahān de:

Jító ná ñáyuu jeē cájica i, te tu jító cájí ná, chi ná cáa yujnu cáa i, áchí de.

²⁵ Yūcuán na te ni tee tucu ya ndaha ya siquī tñūu de. Te ni ndacoto vāha de, te ni nduvāha-ni tñūu de, te ni jito cájí de ndīhi-ni. ²⁶ Te ni natajé yá de quinhun de vehe de, te áchí yá:

Ma quívi ró ñūu, ni ma cáchi cuíti rō nuū ní ñin, áchí yá.

Jeē ni cáhān Pedro jeē Jesús cúu Cristo

(Mt. 16.13-20; Lc. 9.18-21)

²⁷ Yūcuán na te Jesús jíin tée cáscuáha jíin yá, cuahān yā tācá ndañúū Cesarea Filipo. Te ichi un ní cajnūhun yá de:

Ruhū, ¿ndé ñn cúu ri cácahān ñayuu?

²⁸ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahán. Te sava ga i cácahān jeē inga tēe ni nacani jnūhun Yaā Dios cúu ní.

²⁹ Yūcuán na te ni cajnūhun yá de:

Te máá ró, ¿ndé ñn cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

³⁰ Te ni ndacu ya jniñu nuū de jíjnáhan de jeē ma cáchi de jnūhun yáha nuū ní ñn ñayuu.

Jeē ní castūhún Jesús jeē cúu yā

(Mt. 16.21-28; Lc. 9.22-27)

³¹ Te ni quejéé yá steén yā nuū de:

Máá rí, Yaā ní nduu tēe, cánuú ndoho xeēn rī. Te tāca tēe jéhnū jíin sūtū cácujehnū jíin tēe cástéén tutu ley, squéhichí de ruhū, te cahni de ruhū. Te nuū uní quivī te natecu rī, achí yá.

³² Te cájí ní cahān yā jnūhun yáha. Yūcuán na te Pedro, ni cana máñúhún de ya, te ni quejéé de cáhān de nuū yā jeē ma cuáha ya jnūhun coo súcuan. ³³ Te máá yá ni ndió cóto ya ni jito ya nuū tēe cáscuáha jíin yá. Te ni cahān yā nuū Pedro:

Cujiyo quihīn rō, chi cáhān rō ná cáhān Satanás. Chi tu jéni ni rō nájnūhun jéni ni Yaā Dios, chi sa suhva jéni ni rō nájnūhun cájeni ni ñayuu, achí yá.

³⁴ Te ni cana ya tēe cáscuáha jíin yá jíin ñáyuu cuehē ún, te ni cahān yā:

Na-ni ñayuu núu cúní i condiquīn i ruhū, na cási i jeē cuní maá i, te na cóndiquīn i ruhū te cuāha i jnūhun ndoho i jnūndóho jeē siquí rī, vēsú na cúu i. ³⁵ Chi núu ndé ñáyuu cuní i cācu i nuū jnūndóho quiji nuū i jeē siquí ruhū, núu súcuan te jnahnū ndetū i ní cáni. Te núu ndé ñáyuu, vēsú na cúu i jeē siquí ruhū jíin síquī jeē scáca i jnūhun jeē jnáma ri ñayuu, núu súcuan te cotecu i ní cáni. ³⁶ ¿Chi ndé cuajníñu vēsú na cúndeyí ñáyuu nihīn i ní ñáyiví, te núu quivī i nuū jnahnū ndetū i? ³⁷ Chi tú na jíin cuítí chunaa ñayuu jeē cácu ánuá i. ³⁸ Te ñayuu yáha tu cácañdeje cuítí i, te máni máá cuéchi cása i. Te núu na-ni ñayuu cúcanu i nuū ñáyuu yáha jeē siquí ruhū, Yaā ní nduu tēe, jíin síquī jnūhun cáhān rī, suni súcuan cucanu rī jeē siquí máá i, quivī ndíji ri jíin táca ndajéhé ndoo ri. Te quivī ún chi yōhyo luu cujéhnū ri nájnūhun cújéhnū Tátá rī. Achí yá.

9

¹ Te suni ni cahān yā jíin de jíjnáhan de:

Jendaá cahān rī jíin ró jeē sava tēe cáhiin yāhá, ma cúu de chi nde cuni de jeē ndácu Yaā Dios jniñu jíin poder yā, achí yá.

Jeē tucu ni nduu ya

(Mt. 17.1-13; Lc. 9.28-36)

² Yūcuán na te nuū iñú quivī te Jesús ni jeca ya Pedro jíin Jacobo jíin Juan, cuahān sīn ya jíin de ñn yucu súcún. Te yūcuán, tucu ni nduu ya nuū de. ³ Te sahma ya ni ndindēé, te ni nducujín quiyi, nájnūhun yuhvā volcán. Te tú ni ñn ñayuu ñayiví yáha cuu nacate jeē ndúquiysi ndasí súcuan. ⁴ Te ni cajito de jeē Elías jíin Moisés cándajnūhún de jíin yá.

⁵ Yūcuán na te ni cahān Pedro jíin Jesús:

Maestro, nacā jeē váha jeē cáhiin na yáha. Te na sáha ná úní vehe ramada, ñn cuu máá ní, inga cuu Moisés, te inga cuu Elías, achí de.

⁶ Chi yōhyo ni cayūhu tēe cáscuáha ún, te Pedro tu ní sáha de cuenta na vé cúu jeē cahán de. ⁷ Te ni quiji vicō nūhun ní jesi-ni nuū de. Te nuū vicó un ní cahān ìn jnūhun: Yāha cúu Sēhe ri jeē maní ndasí rí jíin. Te na cúni nahín ró jnūhun cáhán yā. Achí.

⁸ Te ni candacoto-ni de, te tuá tēe un ní cájito de, chi máá ìn na Jesús.

⁹ Te ni cananuu de jíin yá yucu ún. Te ni ndacu nīhin ya jniñu nuū de jeē ma cáchi de nuū ní ìn jeē súcuan ni cajito de, chi nde na nátecu maá yá, Yaā ní nduu tēe, áchí yá. ¹⁰ Jeē yúcuan ní cachuvāha de tāca jēe ní cuu ún, te cácajnūhun jnāhan de na jnūhun cúu jeē nátecu yā. ¹¹ Te ni cacajnūhún de ya:

Te tēe cástéén tutu ley Yaā Dios, ¿najehē cácahān de jeē cánuú ndiji Elías xīhna gā, te sáá te quiji Yaā cúu Cristo? achí de.

¹² Te ni cahān yā:

Jendaá cúu jeē xīhna gā quiji ìn tēe cúu nájñūhun Elías, te sátūhva de ndihí, áchí tutu. ¿Te ndese cáhán tucu tutu ìi síquī ruhū, Yaā ní nduu tēe? Cáhán jeē ndoho xeēn rī, te sájéé ni i nuū rī. ¹³ Te cáhán rī jíin ró jeē jé ni quiji tēe ni cuu nájñūhun Elías, te ni casáha ndevāha ñayuu jíin de tāca jēe ní cacuu ni maá i, nájñūhun cáhán jnūhun de nuū tútu, áchí yá.

Jeē ní nasávāha ya ìn sūchi ñūhun tachī ini

(Mt. 17.14-21; Lc. 9.37-43)

¹⁴ Te ni najinū yā jíin de nuū sava ga tēe cáscuáha jíin yá, te ni cajito ya ñayuu cuehē ndasí, ni cajicó ndúū i de. Te suni cáhiin tēe cástéén tutu ley Yaā Dios, cátejnāhan jíin de. ¹⁵ Te nuū ní cajito tāca ñayuu un jēe véji ya, te ni canaa ni i. Te cájino i cuango i nuū yā jeē cahān i jíin yá. ¹⁶ Te ni cajñūhun yá i:

¿Na síquī cátejnāhan ró jíin de jíjnāhan de? áchí yá.

¹⁷ Te ni cahān ìn tēe íne yūcuán:

Maestro, vendeca ná séhe ná núū ní, chi ñūhun ìn tachī ini i, te ni cuññhín i ni sáha. ¹⁸ Te ndé-ni cúu nuū íne i, te tachī un scótúú i, te jéhni yīhí-ni i. Te jée tiñū yuhu i, te squíhñi jnūhun i. Te cuacuxíí ndasí i sáha. Te ni cahān ndahú ná jíin tēe cáscuáha jíin ní jeē na quénehen de tachī ún, te tu ní cúu sáha de, áchí de.

¹⁹ Te ni cahān yā jíin de jíjnāhan de:

Ñayuu tu cándíje cuítí cacuu ró. ¿Nasaa ga quivī condee rī jíin ró? ¿Te nasaa ga quivī cuandeyí ni rī jíin ró? Cuáquihin sūchí un, na quiji i, áchí yá.

²⁰ Te ni caquindecas de i nuū yā. Te nuū ní jito tachī un núū yā, te ni jehni yīhí-ni i. Te ni cotúú i, te cónéhén cócáni i, te jée tiñū yuhu i. ²¹ Te Jesús ni cajñūhun yá tatá i:

¿Nasaa cuiyā ni cuu jeē sáha súcuan jíin i?

Te ni cahān de:

Nde lulí i. ²² Te ni cuu cuehē jínu scótúú táchí ún i nuū ñuhún nuū ndúte, jeē cáhni i cúní. Te núu cuu sáha ní, te cundáhú ní ní chindéé ñáhán ní sāña jēe ndúvāha séhe ná, áchí de.

²³ Te ni cahān Jesús jíin de:

Núu cuu cándíje ró jēe sáha ri, chi ñayuu cándíje te cuu tāca jēe cuní i, áchí yá.

²⁴ Te máá tátá sūchí un ní cahān jee de:

Cándíje ná, te chindéé ñáhán ní sāña jēe cándíje nīhin ga ná, áchí de.

²⁵ Te ni jito Jesús jeē ní cutútú cuéhē ñayuu nuū yā. Te ni cahān yā nuū tachí:

Tachí jeē saññhín sásóhó, ruhū ndácu ri jniñu jeē na quénda ró ini sūchi yáha, te ma ndívi ga rō ini i, áchí yá.

²⁶ Yūcuán na te ni cana cóhó táchí ún, te ni jehni yīhí tucu i, te ni quenda cuahān. Te sūchí un ní cuu i nájñūhun ndīyi. Te ni cacahān cuehē ñayuu jeē jé ni jihí i. ²⁷ Te Jesús ni jñi ya ndaha i, te ni ndonehen ya i, te ni nucuiññi-ni i.

²⁸ Yūcuán na te ni quiví ya ini ìn vehe, te tēe cáscuáha jíin yá, ni cacajnūhun sīn de ya:

¿Najehē tu ní cúu quenehen ná tachí un jíjnāhan ná? áchí de.

²⁹ Te ni cahān yā:

ñin tachī súcuan chi ma quénda cuíti te núu tú cacān tahu rō te coo ndite ni rō, achí yá.

Jeē ni cáhān tucu ya jeē cúu yā

(Mt. 17.22-23; Lc. 9.43-45)

³⁰ Te ni quenda ya yūcuan jíin de jíjnáhan de, te ni yāha ya ndañū Galilea cuahān yā. Te tu ní cúni yā jeē cúni ni ñin ñayuu. ³¹ Chi stéén yā nuū téé cáscuáha jíin yá, te áchí yá:

Máá rí, Yaā ní nduu tēe, nastúu i ruhū nuū tāca téé xeēn. Te cahni de ruhū, te núu ni jihī rī, te nuū uní quívi te natecu rī, achí yá.

³² Te tu ní cájecūhun ni de jnūhun yáha, te cáyūhú de cajnūhún de ya siquī jnūhun ni cahān yā.

Ndé ñáyuu cúu jeē kujénu ga

(Mt. 18.1-5; Lc. 9.46-48)

³³ Te ni jinū yā jíin de ñuu Capernaum, te nuū ni quívi ya ini vehe, te ni cajnūhun yá de:

¿Na jnūhun ni candajnūhun ró ichi véji yó? áchí yá.

³⁴ Te tu ní cácahān cuíti de, chi ichi un ní cacahān de siquī núu ndé ñin de cújénu ga.

³⁵ Yūcuán na te ni cucōo ya, te ni cana ya ndihúxí uū de, te ni cahān yā:

Núu ndé ñin ró cúni kujénu ga, na cúu ró téé núu ga nuū tāca jnáhan ró, te cuajniñu ró núu jnáhan ró.

³⁶ Yūcuán na te ni jniñ ya ndaha ñin sūchi lúli, te ni jeni ya i mēhñú de jíjnáhan de. Te ni nundee yā i, te ni cahān yā jíin de:

³⁷ Na-ni ñayuu núu jeē siquī ruhū jetáhu i ñin sūchi lúli nájñūhun sūchi yáha, te ruhū jetáhu i. Te ñayuu jetáhu rúhū, nasūu máá ñin-ni ruhū, chi suni Yaā ní tají rúhū jetáhu i, áchí yá.

Ñayuu tu cáhān siquī yā, ñin i jíin yá

(Mt. 10.42; Lc. 9.49-50)

³⁸ Yūcuán na te ni cahān Juan jíin yá:

Maestro, ni cajito ná ñin tēe jeē jíin síhví ní quénehen de tachī ini ñayuu. Te ni cajesi ná jéé sáha de, chi tu jíca de jíin yó, achí de.

³⁹ Te ni cahān Jesús jíin de:

Ma cási rō jeē sáha de. Chi ni ñin tēe jeē jíin síhví rí sáha de jniñu jénu, ma cúu nacahān de siquī rī. ⁴⁰ Chi tēe tu cáhān siquī yō, ñin de jíin yó. ⁴¹ Te na-ni ñayuu núu jeē siquī ruhū cuāha i vēsú ñin ñajin ndute coho ró, siquī jeē cácañdije ró ruhū, ndaā ndije cúu jeē nihín i tahu i. Achí yá.

Xeēn coo siquī ñáyuu quívi nuū cuéchi

(Mt. 18.6-9; Lc. 17.1-2)

⁴² Te núu ñin sūchi lúli yáha cándije i ruhū, te núu quívi i cuéchi sáha na-ni ñayuu, te vāha ga núu ni conuhnī ñin yōso cáhnu sucūn ñayuu ún, te quēe i chíji ndute mar nuú.

⁴³ Te núu ndaha ró sáha jeē quívi ró cuéchi, vāha ga cahnde rō na quíhín, návāha tuá sáha ró cuéchi. Chi vāha ga jeē cóndee ñin-ni ndaha ró te quívi ró núu cotecu rō ní cáni, vēsú jeē cóndee ndíndúu ndaha ró te quívi ró infierno, nuū cayú ñuhūn jeē ma ndahvá cuíti.

⁴⁴ Te yūcuán chi tu cájihī tindacú, te tu ndahvá cuíti ñuhūn. ⁴⁵ Te núu jehē rō sáha jeē quívi ró cuéchi, suni vāha ga cahnde rō na quíhín, návāha tuá sáha ró cuéchi. Chi vāha ga jeē cóo cúhndu ró te quívi ró núu cotecu rō ní cáni, vēsú jeē cóndee ndíndúu jehē rō te quívi ró infierno, nuū cayú ñuhūn jeē ma ndahvá cuíti. ⁴⁶ Te yūcuán chi tu cájihī tindacú, te tu ndahvá cuíti ñuhūn. ⁴⁷ Te núu tinūu ró sáha jeē quívi ró cuéchi, vāha ga tava ró na quíhín, návāha tuá sáha ró cuéchi. Chi vāha ga jeē quívi ró ñuu nuū ndácu

Yaā Dios jniñu jíin ñin na tinūu ró, vēsú jeē cóndee ndíndúu tinūu ró te quívi ró infierno. ⁴⁸ Te yūcuán chi tu cájihī tindacú, te tu ndahvá cuíti ñuhūn.

⁴⁹ Chi nájñūhun quénda vāha oro sáha ñuhūn, súcuan quénda vāha ñayuu sáha jnūndóho. Te tāca cúñu jeē socó ñayuu nuū yā, cúhuhvuā sáha ññ. ⁵⁰ Vāha íyó ññ, te

núu ññ ún na náa jeē uhvuá, ¿te ndese nduu uhvuā tucu sáha ró? Núu súcuan te cuu ró ñáyuu váha, nájnūhun íyó váha ññ. Te na cóyūcu váha ró jíin jnáhan ró. Achí yá jíin de.

Siquī jeē ma stóo jnáhan tēe jíin ñahan
(Mt. 19.1-12; Lc. 16.18)

10

¹ Te ni quenda ya ñuu Capernaum, te ni jinū yā región Judea, inga lado yūte Jordán, ichi nuū cáne niāndii. Te yūcuan ní cutútú tucu ñayuu nuū yā, te ni steén tucu ya jnūhun nuū i, nájnūhun sáha ya. ² Yūcuán na te jecu tēe grupo fariseo ni quecoo de nuū yā, chí cáconi de coto ndee de ya núu ndese cahān yā. Te ni cacajnūhún de ya núu íyó ley jeē cuu ndusín ññ tēe jíin ñasihí de. ³ Te ni cahān yā jíin de:

¿Na jniñu ni ndacu Moisés nuū rō nde jenahán?

⁴ Te ni cacahān de:

Moisés ni jēhe de jnūhun jeē cúvāha ññ acta jeē ndusín de jíin ña, te ndōo ña, áchí de.

⁵ Te ni cahān Jesús jíin de:

Siquī jeē níhni ni rō jijnáhan ró, jeē yúcuan ní ndacu de jniñu yáha núu rō. ⁶ Te nde xīhna ñúhún, ná ni sáha Yaā Dios ndihí, chí tēe jíin ñahan ni sáha ya. ⁷ Jeē yúcuan cúu jeē stóo tēe tátá de náná de, te quiináhan de jíin ñasihí de. ⁸ Te ññ na cuu ndindúú de, áchí Yaā Dios. Núu súcuan te tuá cúu uū jnáhan de, chí ññ na cúu. ⁹ Jeē yúcuan tu íyó váha jeē stóo jnáhan, chí jeē ni squíjnáhan Yaā Dios cúu, áchí yá.

¹⁰ Te tēe cáscuáha ún nuū ni quívicoo de vehe, te ni cacajnūhún tucu de ya siquī jnúhun ún. ¹¹ Te ni cahān yā jíin de:

Núu ndé tēe stóo de ñasihí de te condeca de inga ñahan, núu súcuan te cásiquí ndé de ñasihí de. ¹² Te núu ññ ñahan stóo ña yñ ña te condeca ña inga tēe, suni cásiquí ndé ña de. Achí yá.

Jeē ni jicān tahu Jesús jehē sūchi lúlí
(Mt. 19.13-15; Lc. 18.15-17)

¹³ Yūcuán na te ni quecoo ñayuu jíin sūchi lúlí, jéē na sóo yá ndaha ya xinī i. Te tēe cáscuáha jíin yá, ni cacahān de nuū ñáyuu vējicoo jíin i. ¹⁴ Te ni jito Jesús, te ni quitī ni yā, te ni cahān yā jíin de:

Cuāha jnūhun na quíjicoo sūchi lúlí jíñā nuū rī, te ma cási rō jeē quíjicoo i. Chí ñayuu jeē ndió cóo ni i cani ni i nájnūhun sūchi yáha, suu i quívi ndaha Yaā andiví jeē ndacu ya jniñu nuū i. ¹⁵ Te jendaá cahān rī jíin ró, núu ññ ñayuu tú cuatáhú i jeē ndacu Yaā Dios jniñu nuū i, nájnūhun jétáhú ññ sūchi lúlí, ma quívi cuitī i ndaha ya, achí yá.

¹⁶ Te ni nundee ya i, te ni soó yá ndaha ya xinī i, te ni jicān tahu yā jehē i jíjnáhan i.

Jnūhun tēe cúcá
(Mt. 19.16-30; Lc. 18.18-30)

¹⁷ Yūcuán na te ni quihin tucu ya ichi cuahān yā. Te jínu ññ tēe ni quee de, te ni jecuiññ yití de nuū yā, ni cajnūhún de ya:

Tēe vāha cúu ní Maestro. Te cachi ní, ¿na jniñu váha sáha ná te nihñn tahu na cotecu na ní cáni andiví? áchí de.

¹⁸ Te ni cahān yā jíin de:

¿Naun cáhān rō jeē tēe vāha cúu rí? Tú ni ññ tēe vāha íyó, chí máa ññ-ni Yaā Dios. ¹⁹ Je jíin rō tēcá jniñu ní ndacu Yaā Dios: Ma cosíquí ndéē jnáhan ró. Ma cáhni rō ndiyí. Ma sacuíhna ró. Ma sajnūhún ró. Ma stahú ró jnáhan ró. Cuatáhú ró nuū tátá rō nuū naná rō. Achí yá.

²⁰ Te ni cahān tēe un jíin yá:

Tēcá jniñu yáha je ni squícu ná ndé ná lúlí ná, Maestro, achí de.

²¹ Yūcuán na te ndáhú jíto ya nuū de jeē cúsiñ ni yā jíin de. Te ni cahān yā:

Ĥin na jniñu cúmanī sáha ró núu súcuan. Cuáhán te xīco ró ndiñi jeē névāha ró, te cuāha ró núu ñáyuu ndahú. Te nde andiví cuāha ya jeē váha ndasí núu rō. Yūcuán na te quiji ró condiquīn rō ruhū, te cuāha ró jnúhun ndoho ró jnúndóho jeē siquí rī, achí yá.

²² Te ná ni jini sōho de jnúhun yáha, te ni jnahuhū ni de, te cúcuíhyá ni de cuahān de, chi cúca ndasí de.

²³ Yūcuán na te Jesús ni ndacoto ya ní xiin ya, te ni cahān yā jíin tée cáscuáha jíin yá: Tēe cúca chi yōhyo yí quívicoo de ndaha Yaā Dios jeē ndacu ya jniñu nuū de, achí yá.

²⁴ Te tēe cáscuáha jíin yá, yōhyo ni canaa ni de jeē ní cajini de jnúhun ni cahān yā. Te ni cahān tucu ya jíin de:

Séhē, ñayuu ténuū xūhún, yōhyo yí quívicoo i ndaha Yaā Dios jeē ndacu ya jniñu nuū i. ²⁵ Yachí gā yāha Ĥin camello yaū yutícuí, vēsú jeē quívi Ĥin ñayuu cucá ndaha Yaā Dios jeē ndacu ya jniñu nuū i, achí yá.

²⁶ Te víhyá gā ni canaa ni de cájini de, te ni cacajnúhun jnáhan de:

¿Ndé ñáyuu cúu jeē cácu núu súcuan?

²⁷ Te ni ndacoto ya nuū de, te ni cahān yā:

Ñayuu chi ma cúu squívi i máá i ndaha Yaā Dios, te máá yá chi cuu sáha ya, chi ndiñi-ni jniñu cuu sáha ya, achí yá.

²⁸ Yūcuán na te ni cahān Pedro jíin yá:

Sāña jíinánhan ná, ní castóo ná ndiñi jeē cánevāha ná, te cándiquīn na níhín, achí de.

²⁹ Te ni cahān Jesús:

Jendaá cahán rī jíin ró jijnánhan ró, núu na-ni ñayuu stóo i vehe, chí ñani, chí cuáha, chí tátá, chí náná, chí ñasiñí, chí séhe, chí ñuhun, jeē siquí ruhū jíin síquī jeē scáca i jnúhun jeē jnáma ri ñayuu, ³⁰ núu súcuan te nanihín i Ĥin ciento gā jeē súcuan vijna, cúu vehe, cúu ñani, cúu cuāha, cúu náná, cúu séhe, cúu ñuhun, te nde jíin jéē cóto xeēn ñayuu i. Te nde inga vida quiji te cotecu i ní cáni. ³¹ Te cuehē ñayuu jeē vijna cácujuhnu, nduu i ñayuu núu ga. Te ñayuu jeē núu ga vijna, chi ndujéhnu i, achí yá.

Jeē ni cahān tucu ya jeē cúu yā

(Mt. 20.17-19; Lc. 18.31-34)

³² Te cáñuhun de ichi jeē cáa cuahān ñuu Jerusalén. Te Jesús yósnúu yá nuū tée cáscuáha ún. Te canaa ni de ni cajini sōho de jnúhun ni cahān yā. Te cáyuhú de cuángoo de jíin yá. Yūcuán na te ni cana sñin tucu ya ndihúxí uū tēe cáscuáha, te ni quejéé yá cástūhún tucu ya nuū de tāca jéē quíji siquí yā. ³³ Achí yá:

Cuni sōho ró, chi je cuángoo yó ñuu Jerusalén vijna, te yūcuán nastúu ñayuu ruhū, Yaā ní nduu tēe, nuū sutú cácujuhnu jíin núu tēe cástéén tutu ley. Te ndonda de siquí rī jeē cúu rī, te squívi de ruhū nuū tēe nación Roma jeē cáyucú Jerusalén cándacu jniñu. ³⁴ Te tāca tēe un sácatā de nuū rī, te cani de ruhū, te tesíhí de nuū rī, te sáá te cahni de ruhū. Te nuū uní quívi te natecu rī, achí yá.

Jeē ni jíicān Jacobo jíin Juan Ĥin favor nuū yā

(Mt. 20.20-28)

³⁵ Yūcuán na te Jacobo jíin Juan, ndindúú séhe Zebedeo, ni quecoo de nuū Jesús, te ni cacahān de:

Maestro, cácuni na jéē sáha ní Ĥin jeē cacán na núu ní, achí de.

³⁶ Te ni cahān yā jíin de:

¿Ndese cácuni rō jeē sáha ri jíin ró? achí yá.

³⁷ Te ni cacahān de:

Cuāha ní jnúhun jeē cónēne ná xiin ní quívi ndujéhnu ní, Ĥin ná lado váha ní, te inga ná lado jecó ní, achí de.

³⁸ Yūcuán na te ni cahān Jesús jíin de:

Tu cájini rō na vé cúu jeē cájicān rō. ¿A cuu ndoho ró jnúndóho nájnūhun jeē quíji siquí rī? ¿Te á canda ró ndoho xeēn rō nájnūhun ndoho rí? achí yá.

³⁹ Te ni cacahān de:

Cuu sáha ná.

Te ni cahān yā jín de:

Jendaá jeē ndoho ró jnúndóho nájnūhun jeē quíji siquī rī, te ndoho xeēn rō nájnūhun ndoho ri. ⁴⁰ Te jeē cónēne ró lado váha ri jín lado jecó rí, nasūu rúhū cúu jeē cuáha jnūhun. Chi je íyó túhva cuu tāca tēe jeē ní nacāji Tátá rī, te tēe un níhīn, achí yá.

⁴¹ Te uxī gā tēe cáscuáha un, ní cajini de jnūhun yáha, te ni caquitī ni de nuū Jacobo jín Juan. ⁴² Te Jesús ni cana ya de, te ni cahān yā jín de:

Cájini rō ndese cásáha tēe cácujuhnu nuū ñáyuu tācá nación. Chi cándacu níhīn de jniñu nuū i, te máa de cáchí ndese coo. ⁴³ Te máa ró jijnáhan ró, chi ma sáha ró súcuan. Chi núu ndé ñin ró cúní cujuhnu, sa suhva cuajniñu ró núu jnáhan ró. ⁴⁴ Te núu ndé ñin ró cúní cuu nuū, sa suhva sáha ró máa ró mozo nuū tāca jnáhan ró. ⁴⁵ Chi suni súcuan sáha ruhū, Yaa ní nduu tēe, chi nasūu jéé véji ri jeē cuajniñu ñayuu nuū rī, chi sa suhva véji ri jeē cuajniñu ri nuū ñáyuu. Te cuáha ri máa rí cuu rī návāha jnama ri cuehē ñayuu, achí yá.

Jeē ní nasávāha ya Bartimeo tēe cuáa

(Mt. 20.29-34; Lc. 18.35-43)

⁴⁶ Yūcuán na te ni jinū yā ñuu Jericó jín tēe cáscuáha jín yá. Te sáa te ni quenda ya yūcuan jín de jín ñáyuu cuehē ndasí. Te Bartimeo tēe cuáa, sēhe Timeo, néne de yuhíchi, jícán de caridad. ⁴⁷ Te ni jini de jnūhun jeē Jesús ñuu Nazaret véji ya. Te ni quejéé de cána jee de:

Jesús Sēhe yucūn David, cundáhú ni ni sáña, achí de.

⁴⁸ Te cuehē ñayuu ni cacahān i nuū de jeē na cásí de yuhu de. Te máa de víhyá gā ni cana jee de:

Máa ní jeē cúu ní Séhe yucūn David, cundáhú ni ni sáña víi, achí de.

⁴⁹ Yūcuán na te ni jecuiñī Jesús, te ni cahān yā:

Cana de na quíji de.

Te ni cacana i tēe cuáa un:

Ndeyí coo ni rō. Ndocuiñī, na quíhīn yō, chi cána ya rohó, achí i jín de.

⁵⁰ Yūcuán na te ni scáne de ticāchí de, te yachī ni ndocuiñī de, te ni jinū de nuū Jesús.

⁵¹ Te ni cahān yā jín de:

¿Na vé cuní rō jeē sáha ri jín ró?

Te máa de ni cahān de:

Maestro, jeē na ndúndijin tinūu ná cuní na, achí de.

⁵² Te ni cahān Jesús jín de:

Cuáhán núu súcuan. Ni candíje ró jeē cuu nasávāha ri rohó, te jeē yūcuan ní nduvāha ró, achí yá.

Te ni ndundijin-ni tinūu de, te ni ndiquīn de Jesús cuahān de jín yá ichi ún.

Jeē ni quívi Jesús ñuu Jerusalén

(Mt. 21.1-11; Lc. 19.28-40; Jn. 12.12-19)

11

¹ Te ni cuyajni ya ñuu Jerusalén, véji ya ñuu Betfagé jín ñuu Betania, jeē íne jehē yucu Olivos. Te ni tají yá uū tēe cáscuáha jín yá jeē quíngoo de. ² Te achí yá jín de:

Cuángoo ñuu lulí íne ichi núu. Te núu ni quívi-ni ró yūcuan, te nihīn rō ñin burro núhñí tī, jeē ní ñin tēe ná tu coso de tī. Te ndají ró tī, quijicoo ró jín tí. ³ Te núu ndé ñin cajnūhún naun cándají ró tī, te cachi rō: Máa Jítoho yō jíní ñúhún yá tī, te yachī natají yá tī ndiji tī, achi rō. Achí yá jín de.

⁴ Te cuángoo de, te ni canihīn de burro un núhñí tī yehyí núu quéhe nuū náquijnáhan ichi. Te ni cándají de tī. ⁵ Te sava ñayuu cáhiin yūcuan ní cacahān jín de:

¿Na vé cúu jeē casáha ró jeē cándají ró burro jínā? achí i.

⁶ Yūcuán na te ni cacahān de nájnūhun ni cachi Jesús. Te ni casiáa i tī vējicoo de jín tí. ⁷ Te ni ndecoo de jín tí nuū Jesús, te ni casoó de sahma de siquī tī, te ni jecosō yá tī.

⁸ Te cuehē ñayuu ni cascáa i sahma i ini ichi. Te sava ga i ni cajehnde i ndaha ñúú, te ni cachucun i ini ichi ún.

⁹ Te ñayuu cuangoo ichi núú jíin ñáyuu cuangoo ichi yátá, cácana jee i:

Yōhyo cújéhnú ya. Yōhyo vāha Yaā cúu Yaā jeē véji jíin jniñu máá Jítóho yō Yaā Dios.

¹⁰ Te yōhyo luu coo, chi je yajni ndacu ya jniñu nájnūhun ni ndacu jíi yō rey David. Te yōhyo cújéhnú máá Yaā Dios. Achí i.

¹¹ Te ni quiví Jesús ñuu Jerusalén, jíin ini templo cáhnu. Te ni jito ya nuū tācá ndajniñu yúcu ní yúcuán. Te ni quenda ya cuahān yā ñuu Betania jíin ndihúxí uū de, chi je ni ini.

Jeē ni cáhān yā nuū yújnu higo

(Mt. 21.18-19)

¹² Te inga quiví ún, nuū ní quenda ya ñuu Betania cuahān yā jíin de, te jíi yā sōco. ¹³ Te nde jicá ni jito ya ñn nundēhe higo jeē ín ndaha. Te ni jecondēhe yá núu sanaa te nihín yā ndehē caji yā. Te tú na vé ni níhín yā, chi máá ndaha-ni ín. Chi nasūu tiempo ndehē cúu. ¹⁴ Yūcuán na te ni cahān yā nuū yujnu ún:

Tuá na ndehē cuun cuítí xiní rō jeē caji ñayuu, achí yá.

Te tēe cáscuáha jíin yá ni cajini de jeē súcuán ni cahān yā.

Jeē ní quenehen ya ñayuu ini templo

(Mt. 21.12-17; Lc. 19.45-48; Jn. 2.13-22)

¹⁵ Te ni najinū yā jíin de ñuu Jerusalén. Te ni quiví ya ini templo cáhnu, te ni quenehen ya ñayuu cájeen quití te cánaxíco núú ñáyuu jeē socō i. Te ni scotúu ndeyí ya tāca mesa tēe cástáyí xūhún, jíin silla tēe cáxíco paloma. ¹⁶ Te tu ní jéhe ya jnūhun jeē yáha ñayuu ini templo jíin ndajniñu ndíso i. ¹⁷ Te ni steén yā jnūhun nuū i, achí yá:

Yósó núu tútu íi jeē cahān Yaā Dios: Vehe ri chi vehe nuū cájicān tahu ñayuu tācá nación cúu, achí yá. Te máá ró jijnáhan ró chi nájnūhun yaū cava ñacuñna ní canasáha ró, achí yá.

¹⁸ Te tēe cástéén tutu ley Yaā Dios jíin sūtū cácujeñnu, ni cajini de jnūhun yáha, te ni quejéé de cánducú de modo ndese cahni de ya. Chi cáyūhú de jeē ndujéñnu ga maá yá vésú maá de, chi tāca ñáyuu yōhyo cácusñi ni cájini i jnūhun steén yā. ¹⁹ Te jeē cuácuaa, te ni quenda ya ñuu Jerusalén cuahān yā.

Jeē ni íchí nundēhe higo

(Mt. 21.20-22)

²⁰ Te jenéhen inga quiví ni nayāha ya jíin de cuahān yā. Te ni cajito de jeē núndēhe higo un je ni ichí nde yoho. ²¹ Yūcuán na te ni nucūhun ni Pedro, te ni cahān de jíin yá:

Maestro, cundēhe ní nundēhe higo jeē ni cáhān ni núu, te vijna je ni ichí caján, achí de.

²² Te ni cahān Jesús jíin de:

Candíje ró jéé sáha Yaā Dios jeē jicán rō. ²³ Chi jendaá cahān rí jíin ró, núu ndé ñáyuu cahān i jeē cújiyo yucu yáha quihín nde nuū mar, te núu tú nacani siquí ni i, chi sa suhva candíje i jeē cóo nájnūhun ni cahān i, yūcuán na te cundaā jeē ni jícān i. ²⁴ Jeē yúcuán cáhān rí jíin ró, tāca jéé cacán tahu rō, te núu candíje ró jéé nihín rō, te nihín rō. ²⁵ Te jeē cájicān tahu rō, te cone cáhnu ni rō nuū ñáyuu casáha cuēchi siquí rō, návāha máá Tátá rō jeē ndeé yá andiví, suni cone cáhnu ni yā nuū cuéchi ró. ²⁶ Chi núu tú cone cáhnu ni rō nuū jnáhan ró, te suni máá Tátá rō jeē ndeé yá andiví, ma cóne cáhnu ni yā nuū cuéchi ró, achí yá.

Siquí jeē ndíso jniñu Jesús

(Mt. 21.23-27; Lc. 20.1-8)

²⁷ Yūcuán na te ni najinū tucu ya ñuu Jerusalén. Te jíca cuu ya ini templo cáhnu. Te sūtū cácujeñnu jíin tēe cástéén tutu ley Yaā Dios jíin tēe jéñnu cándacu jniñu, ni quecoo de nuū yā. ²⁸ Te ni cacajnūhún de ya:

¿Nde ní nihín jniñu ró jéé sáha ró jniñu yáha? ¿Te ndé ñn ni tee jniñu siquí rō jeē sáha ró súcuán? achí de.

²⁹ Te ni cahān Jesús:

Suni ruhū, cajnūhun rí rohó ñn jnūhun jíjnáhan ró. Te núu cuu stíó cuñí rō, yūcuán na te cachi rī nuū rō ndé ní nihīn jniñu ri jeē sáha ri jniñu yáha. ³⁰ ¿Ndé ñn ni tee jniñu siquī Juan jeē ni scuándute de? ¿A Yaā Dios chí táca tée? Cachi nuū rī, achí yá.

³¹ Yūcuán na te ni candajnūhun máá de:

Núu cahān yō jeē Yaā Dios ni tee ya jniñu un síquī Juan, te cahān de jíin yó: Núu súcuan ¿te najehē tu ní cá candíje ró de? ³² Te núu cahān yō jeē ñáyuu ni catee jniñu un síquī de, te quitī ni ñayuu nuū yō, achí de cácahān maá de.

Chi cáyūhú de jeē quitī ni ñayuu, chi ndivii i cá candíje i jeē tée ni nacani jnūhun Yaā Dios ni cuu ndije Juan. ³³ Jeē yúcuan ní cacahān de jíin yá:

Tu cájini rī, achí de.

Yūcuán na te ni cahān Jesús:

Ni ruhū, suni ma cáchi rī nuū rō ndé ñn ni tee jniñu siquī rī sáha ri jniñu yáha, achí yá.

*Jnūhun yátá síquī tēe néé cásájniñu nuū uva
(Mt. 21.33-46; Lc. 20.9-19)*

12

¹ Te ni quejéé yá cahán yā jnūhun yátá jíin de jíjnáhan de:

ñn tēe ni nachuhun de cuehē uva, te ni jesi de corral, te ni sáha de ñn nuū cúhun ndehē un táxīn. Te ni sáha de ñn vehe súcún návāha cuu coto de ní cáhnu.

'Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi cuahān jicá de. ² Te máá tiempo ndutútú uva, te ni tají de ñn mozo de cuanuquīhin sava uva nuū tēe cásájniñu ún. ³ Te tēe un ní cajniñ de mozo un, te ni cacani de i, te ni canatajé de i cuanuhun i súcuan-ni. ⁴ Yūcuán na te tēe chíí uva un ní tají tucu de ñnga mozo cuahān. Te tēe cásájniñu un ní cajēhe de yuū xinī mozo un, te ni castújí de, te ni cacahān ndevāha de nuū. ⁵ Te tēe chíí uva ni tají tucu de ñnga mozo cuahān. Te ni cajehni de i. Te suni súcuan ni tají de cuehē gā mozo cuahān, te sava i ni cacani de, te sava i ni cajehni de.

⁶ Te tēe chíí uva, íyó ñn sēhe de jeē maní ndasí de jíin. Te jeē sándēhí na ni tají de sēhe de un cuahān nuū tēe cásájniñu. Te jéni ni de: Tēe ún chi cuatáhu de jíjnáhan de nuū séhe ri. ⁷ Te tēe cásájniñu un ní cacahān maá: Tēe chíí táhū cúu jeē yáha. Na cáhni yō de, te ndōo tahū de cuu máá yó, achí. ⁸ Te ni cajniñ de i, ni cajehni de i, te ni cascāne de i ñnga lado. Achí yá.

⁹ Yūcuán na te ni cajnūhun yá de:

Núu súcuan ¿te ndese sáha tēe chíí uva un? Ndihi de te cahni de tēe cásájniñu ún, te cuāha de ñn uva un núu ñnga sava tēe sájniñu nuū.

¹⁰ ¿Te á ná tu cahu ró jnúhun yáha jéé yosó núu tútu íi, jeē ruhū cúu nájniñu ñn yuū? Chi achí tutu:

Yuū jeē ní casquéhichí tēe cájeni vehe,

yuū yáha nduu jeē quítuu vehe.

¹¹ Máá Jítoho yō Yaā Dios ni sáha ya súcuan,

te cánaa ni yō jíto yó jniñu yáha.

Achí tutu, achí yá.

¹² Yūcuán na te ni canducú de modo jniñ de ya. Chi ni cajecūhun ni de jeē siquī maá de cúu jnūhun yátá ní cahān yā siquī tēe cásájniñu nuū uva jíin tēe cájeni vehe. Te siquī jeē cáyūhú de jeē quitī ni ñayuu, te ni castóo de ya te cuango de.

Siquī xúhun renta

(Mt. 22.15-22; Lc. 20.20-26)

¹³ Yūcuán na te ni catajé de sava tēe grupo fariseo jíin tēe grupo Herodes cuango de nuū yā, ndúcú de ndese sáha de návāha cahān yā ñn jnūhun jeē nihín de cuēchi siquī yá.

¹⁴ Te ni quecoo de, te ni cacahān de jíin yá:

Maestro, cájini na jéē tée cáhán ndaā cúu ní, te tu yúhú ní jeē cáhán ni ìn ñayuu siquī ní. Chi tu sáha ní cuenta ndese cúu ìn ìn i, chi ìnuú-ni sáha ní jíin i. Te stéén ndaā ní ndese squícu ñayuu nuū Yaā Dios. ¿Te á íyó váha jeē chúnaa yō renta nuū rey nación Roma jeē jnīi nación yō, chí tuú? ¿A chúnaa yō, chí má chúnaa yō? Achí de jíin yá.

¹⁵ Te máá yá jiní yā jeē stahú-ni de, te ni cahān yā jíin de:

¿Najehē cájito ndee rō ruhū? Cuāha ìn xūhún na cóto ri, achí yá.

¹⁶ Te ni cajēhe de xūhún. Te ni jito ya, te ni cajnūhun yá de:

¿Ndé ìn nuū cúu jeē ndeé nuū xūhun yáha, te ndé síhví cúu jeē ndeé yāhá?

Te ni cacahān de jíin yá:

Nuū jíin síhví rey un cúu, áchí de.

¹⁷ Yūcuán na te ni cahān yā jíin de:

Núu súcuan te nacuāha ró núu rey un jéē yíhi cuenta nuū de, te nacuāha ró núu Yaā Dios tāca jéē yíhi cuenta nuū maá yá, achí yá.

Te ni canaa ni de ni cajini de jeē ndichí ní cahān yā.

Jeē ní cacajnūhún de siquī jeē nátecu ndīyi

(Mt. 22.23-33; Lc. 20.27-40)

¹⁸ Yūcuán na te jecu tēe grupo saduceo ni quecoo de nuū yā. Te tēe un cácahān jeē tu nátecu cuiti ndīyi. Te ni cacahān de jíin yá siquī ìn jnūhun, áchí de:

¹⁹ Maestro, Moisés ni tee de nuū tútu jeē cánevāha yó: Núu ìn tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí de, te sēhe de jeē cácu jíin ña nucuññi i nuū ndīyi ñani de, áchí tutu. ²⁰ Núu súcuan te ni íyo uxā ñani. Te tēe núu ní quijnāhan de jíin ñahan. Te ni jihí de, te tú sēhe de ní íyo. ²¹ Te tēe uū ni naquihin de ña, te suni ni jihí de, te tú sēhe de ní íyo. Te suni súcuan tēe unī. ²² Te ndihúxá de ni condeca de ña, te ni ìn de tú sēhe de ní íyo. Te jeē sándñí de te suni ni jihí ñahan ún. ²³ Núu súcuan te núu na nátecu de jíināhan de quiví nátecu ndīyi, ¿te ndé ìn de cuu ña ñasihí de? Chi ndihúxá de ni condeca de ña. Achí de jíin yá.

²⁴ Yūcuán na te ni cahān yā jíin de:

Yōhyo cástívi ró jnūhun siquī jeē tu cájecūhun ni rō jeē cáhán tutu ìi, ni tu cájini rō jeē íyó poder Yaā Dios jeē nastécu yā ndīyi. ²⁵ Chi quiví nátecu ndīyi, te tuá na jnūhun quijnāhan tēe jíin ñahan coo. Chi coo i nájñūhun ndajéhé Yaā Dios andíví. ²⁶ Te siquī jeē nátecu ndīyi, ¿á tu ní cácahu ró tutu ní tee Moisés, ndese ni cahān Yaā Dios jíin de mēhñu yúcū jeē cayú yáñuhūn? Máá rí cúu Yaā Dios Abraham jíin Isaac jíin Jacob, achí yá jíin Moisés. ²⁷ Chi vésú je ni cajihí de, te cátecu de nuū íyó máá yá, chí cúu ya Yaā sáha jeē técu ñayuu níf cáni. Yōhyo cástívi ró jnūhun núu súcuan. Achí yá jíin de.

Jniñu cánuú ndasí gá jeē ní ndacu Yaā Dios

(Mt. 22.34-40)

²⁸ Te ni quee ìn tēe stéén tutu ley Yaā Dios, te ni jini de jeē castíchí jnāhan tēe un jíin Jesús. Te ni jini de jeē váha ni nastió cuñí yā jnūhun. Te ni cajnūhún de ya:

¿Ndé ìn cúu jnūhun ndácu jniñu cánuú ndasí gá nuū tāca gá jniñu ni ndacu ya jenahán? áchí de.

²⁹ Te ni cahān Jesús jíin de:

Yāha cúu jniñu jeē cánuú ndasí gá nuū tāca gá. Achí tutu: Ñayuu Israel, cuni nahín ró. Máá Jítóho yō Yaā Dios, maá ìn-ni ya íyó. ³⁰ Núu súcuan te coo maní ndasí ró jíin máá Jítóho rō Yaā Dios, nde jnāā ndasí ró sáha ró ndíhi jeē cúsiñi ni yā, nde jíin ini jíin ánuá rō, jíin níf jeē níjnūnī rō, jíin níf fuerza rō. Yāha cúu jniñu ndácu ya jeē cánuú ndasí gá. ³¹ Te jniñu uū jeē ní ndacu ya, suni súcuan cáhán: Cundáhú ni rō jnāhan ró nájñūhun cundáhú ni rō maá ró. Tuá ìnga jnūhun ndácu jniñu cánuú gá íyó, chí suu máá jéē yáha-ni. Achí yá jíin de.

³² Yūcuán na te ni cahān tēe stéén tutu ley jíin yá:

Vāha ni cahān ní, Maestro. Chi ndaā chí íyó ìn-ni Yaā Dios, te tuá na ìnga yā íyó. ³³ Te cánuú jéē coo maní ndasí yó jíin yá nde jíin ini jíin ánuá yō, jíin níf jeē níjnūnī yō, jíin níf

fuerza yō, te cundáhu ni yō jnáhan yó nájñuhun cundáhu ni yō maá yó. Te cánuu ndasí gá jeē yáha vēsú jeē cáhmu yó quiti jíin táca gá jeē socó yō nuū yā. Achí de jíin yá.

³⁴ Yūcuán na te ni jini Jesús jeē váha ni stió cuñí de, te ni cahān yā jíin de:

Je yajni cuu quiví ró ndaha Yaā Dios jeē ndacu ya jniñu nuū rō, achí yá.

Yūcuán na te ni ñn ga de, tuá ni chúndeyí ni de cajñuhún de ya.

Siquí jeē cúu Cristo sēhe yucūn David

(Mt. 22.41-46; Lc. 20.41-44)

³⁵ Te stéén Jesús jñuhun ini templo, te ni cahān yā:

¿Ndese cúu jeē cácahān tēe cástéén tutu ley Yaā Dios jeē Cristo cúu sēhe yucūn David?

³⁶ Chi máá David suhva ni cahān de jñuhun ya ni sáha Espíritu Santo nde jenahán:

Máá Jítóho yō Yaā Dios ni cahān yā jíin Jítóho rī, Yaā quiji:

Cucōo ró lado váha ri nuū kujéhu ró,

te na sáha ri jeē quende rō poder táca jéē cájito uhū rohó.

Achí Yaā Dios. Achí David. ³⁷ Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? áchí yá.

Te ñayuu cuehē, cánujnahan ni i cájini nahín i táca jnúhun cáhán yā.

Jeē ni cáhān yā jeē iyó cuéchi de jíinánhan de

(Mt. 23.1-36; Lc. 11.37-54; 20.45-47)

³⁸ Te stéén yā jñuhun, te ni cahān yā jíin i:

Coto má candíje ró táca tēe cástéén tutu ley. Chi cácusī ni de cáñuhun de sahma cáni jeē steén jeē kujéhu de, cájica cuu de jíin. Te cánujnahan ni de jeē cahán yñúhún ñáyuu jíin de ini calle. ³⁹ Te cánujnahan ni de cucōo de nuū silla yñúhún gá ini vehe ñi sinagoga, jíin silla yñúhún gá nuū víco cáyeji ñayuu. ⁴⁰ Te cáquende de vehe ñahan ní caquendōo ndáhu. Te nahán cájicān tahu de návaha cani ni ñayuu jeē tú na cuéchi de. Tēe yáha jíinánhan de chi xeēn gā ndoho de castigo. Achí yá.

Jeē ni sócō ñahan viuda xūhún

(Lc. 21.1-4)

⁴¹ Te ñn quiví néne Jesús ini templo ichi núu táca yéjñu nuū cásocō i xūhún. Te jító ya ndese cáchuhun ñayuu xūhún ini yejñu ún. Te cuehē ñayuu cucá ní cachuhun i cuehē xūhún. ⁴² Te ni quee ñn ñahan viuda jeē ndóho ndáhu. Te ni chuhun ña uū centavo lulí ini yejñu ún. ⁴³ Yūcuán na te ni cana ya tēe cácuáha jíin yá, te ni cahān yā jíin de:

Jendaá cahán rī jíin ró jeē cuehē gā cúu jeē ni sócō ñahan viuda ndahú yáha, vēsú jeē ní casocō táca ñáyuu cucá. ⁴⁴ Chi táca i ni casocō i jeē ni ndóo siquí xuhun cuéhē i. Te ñahan yáha, vēsú ndahú ndóho ña, te ni chuhun ndíhi ña jeē cótecu ña. Achí yá jíin de.

Jeē ní cachi yā jeē náā templo

(Mt. 24.1-2; Lc. 21.5-6)

13

¹ Te ni quenda Jesús ini templo cáhnu, te ñn tēe scuáha jíin yá ni cahān de:

Maestro, condēhe ní ná luu jító táca vehe yáha jéē cúu templo, jíin táca yúu jeē ní cuvāha, áchí de.

² Te ni cahān yā jíin de:

Táca vehe náhnu yáha jéē cájito ró, chi ma cóso jnáhan ga ni ñn yuū, chi ndíhi jnanū. Achí yá.

Na seña coo nuū cuacuyajni ndíhi ñayiví

(Mt. 24.3-28; Lc. 21.7-24; 17.22-24)

³ Te ni jehēn yā jíin de yucu Olivos jeē íne ichi núu templo cáhnu. Te ni cucōo ya yūcuán. Te Pedro jíin Jacobo jíin Juan jíin Andrés ni cacajñuhun sñn de ya:

⁴ Castūhun ní nuū ná, ¿ndé quiví coo táca jéē ní cachi ní jéē coo? ¿Te na seña coo núu cuacuyajni squícu táca jéē ni cáhān ní? áchí de.

⁵ Te ni cahān yā jíin de:

Coto ró jéē ma stahú ni ñin de róhó. ⁶ Chi quijicoo cuehē tēe jeē stahú jíin síhví rí. Máá rí cúu Cristo, achi de. Te súcuan stáhú de cuehē ñayuu.

⁷ Te nihin rō jnūhun jeē tāca lado iyó guerra, chí je yajni coo guerra. Te ma yūhu ró, chí cánuú coo súcuan. Te ni ná tu jinū quiví ndíhi ñayíví. ⁸ Chi ndonda nación siquī inga nación, te ndonda ñuu siquī inga ñuu jeē cuajnáhan. Te cháha chúcuan jnāa, te coo jnamā, te ndonda ñayuu siquī jnáhan i. Te tāca jéē yáha cácuu jnūndóho quejéé xíhna ñúhún gá.

⁹ Te condito ró máá ró, chí nastúu i róhó núu tāca tóhō, te ini tācá vehe i sinagoga cani i róhó. Te quindeca i sava ró núu tācá gobernador jíin núu tāca rey, te cahān i cuēchi siquī rō siquī jeē cácañdije ró rúhū. Te súcuan te cuu nacani ró jnúhun ri nuū de. ¹⁰ Te jíni ñúhún jéé xíhna gā cuitē núu jnūhun nuū tācá nación ndese jnáma ri i, te sáa te ndíhi quiví. ¹¹ Te núu ni cajni de róhó cuángoo de jíin ró nuū tāca tóhō, te ma nácani ni rō xíhna gā ndese stío cuiñí rō nuū de te cācu ró. Chí máá hora un te máá Yaā Dios cuāha ya jnūhun nuū rō ndese cahān rō, te jnūhun ún cahān rō. Chí nasūu máá ró cúu jeē cahān, chí Espíritu Santo cúu jeē cahān. ¹² Te ñani jíin ñani nastúu jnáhan jeē na cúu. Te tátá nastúu sēhe jeē cúu. Te sēhe ndonda siquī tatá jíin náná jeē cahni. ¹³ Te tāca ñayuu quití ni i nuū rō jeē siquí ruhū. Te ñayuu cuiñí nihin jíin jnúhun ri nde quiví jínu, chí cācu i.

¹⁴ Te Daniel, tēe ni nacani jnūhun Yaā Dios, ni tee de jnūhun ñin tēe néé jéé quíji. Te róhó jéé cácahu tutu ún, na jécūhun ni rō. Chí ñin quiví te cuni rō jeē sáha ndevāha de jeē stívi de tācá ndajniñu i ini templo, te cuiñí de nuū tú na ley cuiñí de. Te núu cuni rō jeē súcuan cúu, te ñayuu cáyūcú región Judea, na cúnu i caa i yucu quingoo i. ¹⁵ Te ñayuu cáyūcu núu quehe, ma ndívi i ini vehe jeē quénehen i ndajniñu i, chí cánuú cunu yachí i návāha cācu i. ¹⁶ Te ñayuu cáhīn nuū ítu, ma ndíji i vehe jeē quíhin i sahma i. ¹⁷ Te quiví ún nacā jeē ndahú ñahan cáñuhun sēhe jíin ñahan cándeca yiquín, chí ma cúnihin ña cunu yachí ña. ¹⁸ Te cacān tahu rō jeē ma quíji jnūndóho un jéé cunu ró máá tiempo cúun yuhvā. ¹⁹ Chí jeē quejéé un te coo cuehē jnūndóho xeēn, jeē ná tu coo súcuan nde quiví ní sáha Yaā Dios ñayíví te nde vijna. Te jeē ndíhi jnūndóho ún te ni ma cóo ga jeē súcuan. ²⁰ Te núu tú nastívi máá Jítóho yō Yaā Dios tiempo jnūndóho ún, te ni ñin ñayuu ma cácu cuití i. Te jeē siquí ñayuu cácañdije jeē ní nacāji ya, jeē yúcuu nastívi ya tiempo un.

²¹ Núu súcuan te núu ñin ñayuu cahān jíin ró: Yāhá condēhe ró íne Cristo, chí: Yūcuán condēhe ró íne ya, achi i, te ma candíje ró jéé cahán i. ²² Chí canecoo tēe cástáhú te cahān de jeē Cristo cúu de, chí cáhān de jeē tēe nácani jnūhun Yaā Dios cúu de. Te sáha de jniñu jéhnu jeē naa ni ñayuu coto i, návāha stáhú de nde máá ñayuu ní nacāji ya, te núu na cúu. ²³ Te ndito na cóo ni rō, chí je ni castūhun rí nuū rō vijna nde ná tu coo.

Ndese coo quiví ndiji Yaā ní nduu tēe

(Mt. 24.29-35, 42-44; Lc. 21.25-36)

²⁴ Te quiví ún, núu je ni ndíhi jnūndóho ún, te cujnúu níandii, te yoō ma ndí gā. ²⁵ Te ñingoo quimi ín andíví. Te tāca jéé ín andíví chí quisi i. ²⁶ Yūcuán na te coto ñayuu nuū maá rí, Yaā ní nduu tēe, ndiji ri jíin vícō, te condiso ri cuehē poder, te yōhyo luu cuyéhnu ri. ²⁷ Yūcuán na te tají rí ndajéhé rí quinastútú yá ñayuu ní nacāji ri ndicúún lado ñayíví, nde nuū ndíhi ñayíví te nde nuū ndíhi andíví.

²⁸ Vijna te scuáha ró ndese sáha nundēhe higo: Núu je ni nane numa, te ni najee ndaha, te cájini rō jeē je ni cuyajni tiempo jihni. ²⁹ Te suni súcuan núu ni cajini rō jeē ní quejéé cúu tācá jniñu jeē ni cáhān rí, yūcuán na te na jécūhun ni rō jeē ní cuyajni quiví ndíji ri, te yachí coo. ³⁰ Jendaá cahán rí jíin ró jeē ma cúu ndíhi ñayuu jeē cóto jnūndóho ún, chí nde squícu ndíhi jniñu ún. ³¹ Andíví jíin ñayíví chí naa, te tāca jnúhun cáhān rí chí ma náa, chí ndíhi squícu.

³² Te quiví jíin hora jeē ndíji ri, tú ni ñin ñayuu jiní, ni máá ndajéhé cáhīyo andíví, ni máá rí, Sēhe Yaā Dios. Chí máá ñin ni Tátá rí cúu jeē jiní.

³³ Núu súcuan te na cócuhun ni rō tāca jnúhun yáha, te ndito na cóo ni rō, te cacān tahu rō, chí tu cájini rō na quiví ndiji ri. ³⁴ Chí coo nájñuhun ñin tēe jeē quihín jicá de, te

nde ná tu quenda de vehe de, te ni ndacu de jniñu nuū tāca mozo de ndese sáha ñin ñin de. Te ni ndacu de jniñu nuū tée ndíto yéhyí jéē na cóndito de. ³⁵ Te suni súcuan róho jíjnáhan ró, ndito na cóo ni rō. Chi cúu ri nájñuhun jitohe vehe ún, te tu cájini rō na hora ndiji ri, á jéē cuácuuaa, chí ñuú, chí jéē cána líhli, chí jénéhen. ³⁶ Chi ñin sanaa-ni te ndiji ri, te coto ró jéē ma nánihin rī rohó jéē tu ndíto ró. ³⁷ Te jñuhun cáhán rī jíin ró jíjnáhan ró, suni cáhán rī jíin ndívi ñayuu: Ndito na cóo ni rō jíjnáhan ró. Achí yá.

*Jeē ní casquíjnáhan de jñuhun jeē jñi de Jesús
(Mt. 26.1-5; Lc. 22.1-2; Jn. 11.45-53)*

14

¹ Te cúmanī uū gā quivī te quejéé vico pascua jeē cáyeji ñayuu hebreo pan jeē tú na levadura yíhi. Te sutū cácujeñnu jíin tée cástéén tutu ley, ni canducú de modo ndese jñi de Jesús jíin jñuhun stáhú, te cahni de ya. ² Te ni cacahān de:

Ma jñí yó de máá quivī vico, chi ndonda ñayuu siquī yō, achí de.

*Jñuhun ñahan jeē ní chuhun perfume xinī yā
(Mt. 26.6-13; Jn. 12.1-8)*

³ Te íne Jesús ñuu Betania vehe Simón, tēe ni ndoho cuehyī stehyú. Te níni yéji yā staā, te ni quee ñin ñahan nuū yā, ndáhá ña ñin frasco yuū luu jeē ñuhun aceite perfume, jeē máni ita nardo cúu, te yōhyo yahu ndéé. Te ni tahú ña frasco un, te ni chuhun ña xinī yā. ⁴ Te sava tēe cáhiin yūcuan ní caquitī ni de, te ni cacahān de:

¿Najehē cúu jeē náā saá-ni perfume jíñā? ⁵ Chi cuu xicó yahu yó víhyá gā unī ciento denario, te cuāha yo núu ñáyuu ndahú núu, áchí de.

Te ni cacahān sōó de jíin ña.

⁶ Te ni cahān Jesús:

Ma stáhān rō ña. ¿Naun casáha ró jéē nácani uhū ni ña? Chi ñin jniñu váha cúu jeē ni sáha ña jíin rí. ⁷ Chi níni coyūcu ñáyuu ndahú jíin ró, te núu cácuñi rō te cuu sáha vāha ró jíin i. Te ruhū chi tuá condee rī jíin ró. ⁸ Chi ni sáha ña ndíhi jeē cuu sáha ña jeē maní ña jíin rí. Chi nde ná tu quindūji ri te je ni sátūhva ña ruhū jeē ní chuhun ña perfume ruhū. ⁹ Jendaá cahán rī jíin ró jeē ní cáhnu ñayīvi ndé-ni cúu nuū cuité núu jñuhun jeē jnáma rī ñayuu, suni nacani i jñuhun jeē ni sáha ñahan yáha, návāha cocuhun ni ñayuu ña, áchí yá.

*Jeē ní nastúu Judas yā
(Mt. 26.14-16; Lc. 22.3-6)*

¹⁰ Yūcuán na te Judas Iscariote, ñin jeē ndihúxí uū tēe cáscuáha un, ní jehēn de nuū sutú cácujeñnu, ni sándaā de jíin jéē nastúu de Jesús nuū jíjnáhan. ¹¹ Te nuū ní cajini sōho sutū un jéē cahán de, te ni cacusiñ ni, te ni cajejñuhun jeē cuáha xūhun núu de. Te nde quivī un ní nducú de modo ndese nastúu de ya.

*Jeē ní jequin yā Cena yā
(Mt. 26.17-29; Lc. 22.7-23; Jn. 13.21-30; 1 Co. 11.23-26)*

¹² Te ni quee máá quivī jeē quejéé vico pascua jeē cáyeji ñayuu pan jeē tú na levadura yíhi, te suni quivī un cájehni i londe nájñuhun ni ndacu Yaā Dios jniñu jeē sáha i vico pascua un. Te tēe cáscuáha un ní cacajñuhún de ya:

¿Ndé nuū cuní ni jéē quisátūhva ná cuxíni ní vico pascua? achí de.

¹³ Te ni tají yá uū tēe cáscuáha ún quingoo de, te áchí yá jíin de:

Cuángoo nde ñuu, te yūcuán najnáhan ró jíin ñin tēe ndíso quīyi ndute. Te condiquin rō de quihin rō jíin de. ¹⁴ Te vehe jeē ndívi de, yūcuan cáhān rō jíin tēe chí vehe: Achí máá Maestro: ¿Ndé ñin cúu cuarto vehe ní cuāha núu ní núu cuxíni ya vico pascua jíin tēe cáscuáha jíin yá? achi rō. ¹⁵ Te máá de stéén de ñin cuarto cáhnu nde xinī véhe jeē je íyó túhva. Te yūcuan sátūhva ró jéē cuxíni yó, áchí yá jíin de.

¹⁶ Te cuangoo tēe cáscuáha ún, te ni jinūcoo de ñuu, te ni canihin de nájñuhun ni cahān yā jíin de. Te ni casátūhva de jeē cuxíni ya vico pascua.

¹⁷ Te jeē cuácuua, te ni quee ya jíin ndihúxí uū de. ¹⁸ Te ni cacucōo de mesa cáyeji de staā, te ni cahān yā:

Jendaá cahán rī jíin ró jeē ñn rōhó jéē yéji jíin rí, nastúu ro rúhū, achí yá.

¹⁹ Yūcuán na te ni cacucuíhyá ni de, te ná ñn ná ñn de ni cacajnūhún de ya:

¿A sáña cúu? áchí ñn de.

Te suni súcuan inga de:

¿A sáña cúu? áchí ñn ñn de.

²⁰ Te ni cahān yā jíin de:

Ñn jeē uxí uū rō jeē cáyeji cáhnu jíin rí ñn cohō, suu nastúu ruhū. ²¹ Te ruhū, Yaā ní nduu tēe, jendaá cúu jeē quihín rī cuu rī, nájñūhun yósó jñūhun ri nuū tútu iī. Te nacā xeēn ndoho tēe nastúu ruhū. Vāha ga núu tu ní cácu tēe un núu, áchí yá.

²² Te níni cáyeji de jíin yá, te ni quihin ya pan, te ni nacuatáhu yá, te ni tahu cuéchi yá, te ni jēhe ya nuū tēe cáscuáha jíin yá. Te ni cahān yā:

Caji rō jijnáhan ró, chi yāha cúu yiqui cúñu rī, achí yá.

²³ Yūcuán na te ni quihin ya ñn copa ndūxi uva, te ni nacuatáhu yá, te ni jēhe ya ni cajihí ndihi de. ²⁴ Te ni cahān yā jíin de:

Yāha cúu ññī rī jeē cuáha ri jeē cúu contrato jeé, te cati jeē ndundoo cuēchi cuehē ñayuu. ²⁵ Te jendaá cahán rī jíin ró jeē ndé vijna te ma cóho ga rī ndūxi ndehē uva yāhā, chí nde quiji quivī ndacu Yaā Dios jniñu nñ ñayiví, te sáa te coho tucu ri jíin ró jijnáhan ró. Achí yá.

Jeē ní cachi yā jeē yūhu Pedro cahān de jeē jini de ya

(Mt. 26.30-35; Lc. 22.31-34; Jn. 13.36-38)

²⁶ Te ni jita ya ñn yaa iī jíin de jijnáhan de. Te ni quenda ya cuahān yā jíin de nde yucu Olivos. ²⁷ Yūcuán na te ni cahān yā:

Ndivii rō nayūhu ró jeē siquí ruhū jecuáa vijna. Chi suhva je yósó jñūhun ri nuū tútu iī, ni cahān Yaā Dios: Cuāha ri jñūhun jeē cáhni ñayuu tēe ndíto lanchi, te lanchi un cuítē núu tí jeē yūhu tí, achí. ²⁸ Te jeē nátecu rī, te xīhna ruhū cosnūu rí quihín rī región Galilea, te sáa te najinūcoo ró, áchí yá.

²⁹ Yūcuán na te ni cahān Pedro:

Vēsú ndihí de na náyūhú de, te máa ná chi ma náyūhú cuítē ná, áchí de jíin yá.

³⁰ Te ni cahān yā jíin de:

Jendaá cahán rī jíin ró jeē jecuáa vijna, nde ná tu cana líhli uū jínu, te yūhu ró jeē jññ ñayuu rohó, te uní jínu cahān rō jeē tu jíni rō ruhū, achí yá.

³¹ Te ni cahān teyí de jíin yá:

Vēsú núu cuu na jíin ní, te ma cahán cuítē na jéē tu jíni na níhín, áchí de.

Te suni súcuan ni cacahān ndihí de.

Jeē ni jicān tahu yā nuū huerto Getsemaní

(Mt. 26.36-46; Lc. 22.39-46)

³² Yūcuán na te ni jinū Jesús jíin tēe cáscuáha jíin yá ñn lugar nuū naní Getsemaní. Te ni cahān yā jíin de:

Yāhá-ni cucōo ró, te na quihín rī cacān tahu rī, achí yá.

³³ Te ni jeca ya Pedro jíin Jacobo jíin Juan, cuahān yā jíin de. Te ni quejéé yá cucuíhyá ndasí ni yā te cúxí ni yā jeē quíji jñūndóho siquī yā. ³⁴ Te ni cahān yā jíin de:

Yōhho cúcuíhyá ni rī, te ndúcú sáha jeē cúu rī. Yāhá condetu ró te condito ró, áchí yá.

³⁵ Te ni jica ya jecu gā, te ni jecuiññ yití yá ni jequin ya nuū yā nuū ñūhun. Te ni jicān tahu yā nuū Yaā Dios jeē núu cuu te ma ndóho ya jñūndóho jeē quejéé quiji siquī yā. ³⁶ Te suhva ni cahān yā:

Tátá maá ná, ndihí-ni jniñu cuu sáha máa ní. Te tejiyo ní jñūndóho yāha jéē ma quíji siquī ná. Te nasūu jéē cuní maá ná, chí jeē cuní maá ní na cóo, áchí yá.

³⁷ Te ni ndee yā nuū ndinúní tēe cáscuáha jíin yá, te ni jito ya jeē cáquixí de. Te ni cahān yā jíin Pedro:

Simón, ¿á quíxí rō? ¿A tu ní cánda ró condito ró jíin rí vēsú ñn hora? ³⁸ Coo ndito ni rō te cacān tahu rō jeē chindéé ñáhán yá rohó jeē ma sáha ró cuéchi jeē coto ndee jeneé rohó. Chi cúní ndije ánuá rō squícu vāha ró, te yiquí cúñu rō chi tu fuerza, achí yá.

³⁹ Te ni jehēn tucu ya, ni jicān tahu yā, te suni jñūhun yúcuán ní cahān yā. ⁴⁰ Te ni ndee ya nuū de, te ni jito ya jeē cáquixí tucu de, chi yōhyo cájiī de māhná. Te tuá ni cániñn de jñūhun stío cuñí de nuū yā. ⁴¹ Te ni ndee yā jeē vuelta unī, te ni cahān yā jíin de:

Vijna te cusū rō te ndetātu ró. Te tuú chi je ni cuu, chi je ni quee hora, te ruhū, Yaā ní nduu tēe, natūu ri te jññ tēe cáhiyo cuéchi ruhū. ⁴² Ndocuññ jijnáhan ró, chi je vēji tēe nastúu ruhū, te quihñn yō jíin de. Achí yá.

Jeē ní cajññ de Jesús

(Mt. 26.47-56; Lc. 22.47-53; Jn. 18.2-11)

⁴³ Te sá cáhán gā yā súcuán, te ni quee-ni Judas, ñn jnáhan jeē uxí uū tēe cáscuáha jíin yá. Te vējicoo cuehē tēe jíin de, cándaha de espada jíin yujnu. Chi sutū cácujeñnu jíin tēe cástéén tutu ley jíin tēe jéñnu cándacu jññu, ni catajé de tēe ún. ⁴⁴ Te Judas, tēe nastúu ya ún, je ni jēhe de ñn seña nuū tēe un jijnáhan, chi ni cachi de:

Tēe jeē téchūhu rí un cúu. Te jññ ró jijnáhan ró quihñn rō jíin, te ma siaá cuiti rō, achí de.

⁴⁵ Te ni quee de nde nuū Jesús, te ni cahān de jíin yá:

Maestro, Maestro, achí de.

Te ni techūhú de ya. ⁴⁶ Te tāca gá tēe un ní cajññ de ya, te cuango de jíin yá.

⁴⁷ Te ñn tēe íne jíin yá ni tava de espada de, te ni jehnde de sōho ñn mozo maá sūtū cujeñnu ga. ⁴⁸ Te ni cahān Jesús jíin ñáyyu cuehē ún:

¿Te va tēe cuñná cúu ri jeē véjicoo ró jíin espada jíin yujnu jññ ró rúhū jeē súcuán?

⁴⁹ Tāca quívī ni ine ri jíin ró jijnáhan ró ini templo cáhnu, ni steén rī jñūhun, te tu ní cajññ ró rúhū. Te súcuán cása ha ró návaha na squícu jeē cahān tutu iī, achí yá.

⁵⁰ Yūcuán na te ndihí tēe cáscuáha jíin yá, ni castóo de ya, ni cajinu de cuango de.

Tēe suchí jeē ní jinu

⁵¹ Te ñn tēe suchí, ndíquin de ya cuahān de jíin yá. Te ndí de máá ñn sahma cuitá. Te ni cajññ tēe ún de. ⁵² Te máá sahma cuitá un ní canihñn. Te ni jinu máá ññ-ni de cuahān de.

Jeē ní indichi Jesús nuū junta tēe cácujeñnu ga

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Yūcuán na te ni jinūcoo de jíin Jesús nuū sutū cujeñnu ga. Te tāca sūtū cácujeñnu jíin tēe jéñnu cándacu jññu jíin tēe cástéén tutu ley, ni candutútú de. ⁵⁴ Te Pedro chi jícá-ni ndíquin de ya, te ni jinū de nde ini patio sutū cujeñnu ga. Te ni cucōo de jíin táca policía, násaā de ññhñ.

⁵⁵ Te sutū cácujeñnu jíin ndihí tēe cása ha junta cujeñnu ga, ni canducú de cuéchi siquī Jesús, chi cahni de ya cácuñi de. Te tu ní cániñn de. ⁵⁶ Chi cuehē de ni cacahān yaá siquī yā, te tu ní quijnáhan jñūhun ni cacahān de. ⁵⁷ Yūcuán na te ni candocuññ sava de, te ni catee de cuéchi siquī yā, achí de:

⁵⁸ Máá ná ni cajini ná cáhán de jeē canu de templo yáha jēe ní cuvāha ni casáha tēe, te nuū uní quívī te nacani de ñnga jeē násūu jíin ndaha tēe cuvāha, achí de. Achí jijnáhan.

⁵⁹ Te ni jñūhun yáha tu ní quijnáhan tucu jeē cácahān de siquī yā.

⁶⁰ Yūcuán na te sutū cujeñnu ga ni ndocuññ de nuū ñáyyu cuehē ún, te ni cajññhñ de Jesús:

¿Naun tu cáhán cuiti rō? ¿A íyó ndáā jeē cácahān tēe yáha siquī rō? achí de.

⁶¹ Te máá yá tu ní cáhán cuiti yā, chi tú na vé ni stío cuñí yā. Te sutū cujeñnu ga ni cajññhñ tucu de ya:

¿A máá ró cúu Cristo, Sēhe Yaā vāha jeē cujeñnu? achí de jíin yá.

⁶² Te ni cahān yā:

Suu ri cúu. Te coto ró jéē ruhū, Yaā ní nduu tēe, condee rī lado váha Yaā iyó poder, te ndiji ri ichi ándiví jíin vícō, achí yá.

⁶³ Yūcuán na te sutū cujéhnū ga ni jehnde de sahma de jeē quití ndasí ni de, te ni cahān de:

¿Ndé jíni ñúhún gá yō testigo núu súcuan? ⁶⁴ Chi je ni cajini ró jéē cahán de jnūhun ndevāha jeē quití ni Yaā Dios, chi sáha de máá de Sēhe Yaā Dios. ¿Te ndese cájeni ni rō? Achí de.

Te ndíhi de ni cacahān jeē na cúu yā.

⁶⁵ Te sava de ni catesihí de nuū yā, te ni cajesi de sahma nuū yā, te ni cacani de ya. Te cacahān de jíin yá:

Cachi ndé ñn cúu jeē ní cani rōhó, achí de.

Te tāca tēe policia ni cacani de nuū yā.

Jeē ní cachi Pedro jeē tu jíni de ya

(Mt. 26.69-75; Lc. 22.56-62; Jn. 18.15-18, 25-29)

⁶⁶ Te íne Pedro ini patio ichi chíji nuū cáhiin de jíin Jesús. Te ni quee ñn ñahan jéjníñu vehe sutū cujéhnū ga ún. ⁶⁷ Te ni jito ña nuū de jeē néne de násaā de yuñúhún. Te ni jito vāha ña nuū de, te ni cahān ña:

Róhó chí suni ni jica ró jíin Jesús, tēe ñuu Nazaret, achí ña.

⁶⁸ Te máá de tu ní cáchi de, chí ni cahān de:

Tu jíni rī de, ni tu jíni rī na jnūhun cáhán rō, achí de.

Te ni quenda de yéhyí núu quéhe. Te ni cana-ni líhli. ⁶⁹ Te ñahan jéjníñu un ní jito tucu ña nuū de, te ni quejéé ña cáhán ña jíin ñayuu cáhiin yūcuán:

Tēe yáha suni jnáhan tāca tēe un cúu, achí ña.

⁷⁰ Te máá de tu ní cáchi tucu de. Te ni cunúu jecu gā, te ñayuu cáhiin yūcuan ní cacahān tucu i jíin Pedro:

Jendaá ndije jeē suni jnáhan de cúu ró, chí tēe Galilea cúu ró, te ñnuú-ni cáhán rō jíin de jíjñahan de. Achí i.

⁷¹ Yūcuán na te ni quejéé de cáhán teyí de jeē na cóndee cuēchi siquī de núu tu cáhán ndaā de:

Tu jíni rī tēe un jéē cacahān rō jnūhun de, achí de.

⁷² Yūcuán na te ni cana-ni líhli vuelta uū. Te ni nucūhun ni de jnūhun ni cahān Jesús jíin de: Nde ná tu cana líhli uū jínu, te yūhu ró te cahān rō uní jínu jeē tu jíni rō ruhū. Te ni nacani ni de siquī jnūhun ún, te ni ndahyū de.

Jeē ní indichi Jesús nuū Pilato

(Mt. 27.1-2, 11-14; Lc. 23.1-5; Jn. 18.28-38)

15

¹ Te jeē ní cundijin, te sutū cácujehnū ni candutútú de jíin tēe jéhnū cándacu jniñu, jíin tēe cástéén tutu ley, jíin ndíhi tēe cásáha junta cujéhnū ga, te ni casquíjñahan de jnūhun. Te ni cajihni de Jesús, te cuango de jíin yá nuū Pilato, tēe cúu gobernador. ² Te Pilato ni cajñuhún de ya:

¿A máá ró cúu Rey ñayuu hebreo? achí de.

Te ni cahān yā:

Suu ri cúu, nájnūhun cáhán rō.

³ Te sutū cácujehnū un ní cacahān de cuehē cuēchi siquī yā. ⁴ Te Pilato ni cajñuhún tucu de ya:

¿Naun tu cáhán cuítí rō? ¿A tu jíni ró jéē cuehē cuēchi cacahān de siquī rō? achí de.

⁵ Te tu ní cáhán cuítí yā ni ñn jnūhun jíin de. Te nahán ní naa ni Pilato ndéhé de nuū yā.

Jeē ní cundaā jeē cúu yā

(Mt. 27.15-31; Lc. 23.13-25; Jn. 18.38-19.16)

⁶ Te íyó costumbre Pilato jeē quivī víco un siaá de ìn tēe íne vecāa, núu na-ni tēe cácuñi ñayuu. ⁷ Te íyó ìn tēe nání Barrabás, íne de vecāa jíin táca jnáhan de siquī jeē ní candonda de siquī tohō te ni cajehni de ndīyi. ⁸ Te ni quecoo ñayuu cuehē, te ni cacahān i jíin Pilato jeē na sáha de nájnūhun íyó costumbre de. ⁹ Te ni cahān Pilato jíin i:

¿A tu cácuñi rō jeē siaá rī tēe cúu Rey rohó ñayuu hebreo? achí de.

¹⁰ Súcuñi ni cahān de, chí cúní de siaá de Jesús. Chí je ni jecūhun ni de jeē ní cacucuésún ni tāca sūtū un cájito de ya, te jeē yúcuñi ní quiijicoo jíin yá nuū de. ¹¹ Te sutū cácuñehnu un ní cascáhán de ñayuu cuehē un jéē váha ga na cácuñi i jeē siaá Pilato Barrabás. ¹² Yūcuñi na te ni cajnūhún tucu Pilato:

Núu súcuñi ¿te ndese cácuñi rō jeē sáha rī jíin tēe jeē cacahān rō jeē cúu de Rey rohó ñayuu hebreo? achí de jíin i.

¹³ Te ni cacana jee i:

Cata caa ní de jicā cruz, na cúu de, achí i.

¹⁴ Te ni cahān Pilato:

¿Na cuēchi ni sáha de núu súcuñi?

Te ñayuu un ní cacana jee tucu i:

Cata caa ní de jicā cruz, na cúu de, achí i.

¹⁵ Te Pilato cuní de jeē na cúsiñi ni ñayuu jíin de, te ni siaá de Barrabás. Yūcuñi na te ni ndacu de jniñu jeē na cáni táca soldado Jesús, jíin jéē cata caa de ya jicā cruz.

¹⁶ Yūcuñi na te soldado un cuángoo de jíin yá ini patio palacio, jeē sácata de nuū yā. Te ni canastútú de ndíhi jnáhan de. ¹⁷ Te ni cachuhun de ya ìn sahma cuehé ndíhi jéē cúu sahma rey. Te ni casáha de ìn corona ñu, ni cachuhun de xinī yā. ¹⁸ Yūcuñi na te ni cacana de:

Nacā jeē váha rey cúu Rey ñayuu hebreo, achí de.

¹⁹ Te ni cacani de yujnu xinī yā, te ni catesíhi de nuū yā, te ni cajecuiñi yití de nuū yā, casáha de jeē chiñuhún de ya. ²⁰ Te nuū ní cuu ni casácata de nuū yā, te ni catava de sahma cuehé ndíhi un, te ni canachuhun de ya sahma máa yá. Te ni caquenehen de ya jeē cata caa de ya jicā cruz.

Jeē ní cacata caa de ya jicā cruz

(Mt. 27.32-44; Lc. 23.26-43; Jn. 19.17-27)

²¹ Te ìn tēe nání Simón ñuu Cirene, tēe cúu tátá Alejandro jíin Rufo, vendiji de jeē ni jéhēn de rancho. Te ni yāha de yūcuñi, te ni catejniñu soldado un de jeē cóndiso de cruz yā.

²² Te cuángoo de jíin yá ìn lugar nuū naní Gólgota, jeē cuní cahān Lugar Yiqui Xíní.

²³ Te ni cajēhe de víno jeē ní sácá núu jíin súje uvuā jeē cóho ya, te tu ní jíhi ya. ²⁴ Te ni cacata caa de ya jicā cruz. Te ni casáha de sorteo jeē siquí ndese nihīn ìn ìn de sahma ya.

²⁵ Te cahīn ni cacata caa de ya. ²⁶ Te jnūhun ni catee de xinī cruz cahān na siquī ni jihī yā: Yāha cúu Rey ñayuu hebreo, achí. ²⁷ Te suni ni cacata caa de uū tēe cuíhna núu uū gā cruz, ìn de lado váha ya, te inga de lado jecó yá. ²⁸ Te ni squícu jnūhun cáhán tutu ìi: Ní casquíjnáhan de ya jíin tēe casáha neé, achí.

²⁹ Te ñayuu cáyāha yūcuñi cáscuicó i xinī i, te cacahān neé i:

Jājaān. Róhó chí cáhán rō jeē cánu rō templo cáhnu, te nuū uní quivī te nucondichi sáha ró. ³⁰ Núu súcuñi te jnama ró máa ró, te nuu ró jicā cruz vii, achí i.

³¹ Te suni súcuñi ni cacahān catá sutū cácuñehnu jíin tēe cástéén tutu ley, te achí de cacahān maá de:

Núu inga ñayuu ni jnama de, ¿te naun tu cúu jnama de máa de vijna? ³² Núu na cúní yō jeē Cristo, Rey ñayuu Israel, nuu de jicā cruz vijna, yūcuñi na te candíje yó, achí de jíin náhan de.

Te tēe cándita caa jíin yá, suni súcuñi ni cacahān neé de.

Jeē ni jíhi Jesús

(Mt. 27.45-56; Lc. 23.44-49; Jn. 19.28-30)

³³ Te nuū ní cuu cahuxī uū, te ni cunee nī cáhnu nde cahunī. ³⁴ Te nuū ní cuu cahunī, te ni cana jee Jesús:

Eloi, Eloi, ¿lama sabactani? achí yá. Te jnūhun un cúní cahān: Yaā Dios maá ná, Yaā Dios maá ná, ¿naun ni stóo ní sáña?

³⁵ Te sava ñayuu cáhiin yūcuan, ní cajini i jnūhun ún, te ni cacahān i:

Cuni nahín, chi cána de xinī Elías, tēe ni nacani jnūhun Yaā Dios jenahán, achí i.

³⁶ Te ni jinu ñn tēe, ni jechundaji de cachī nuū vinagre iyá. Te ni tee de xinī ñn yujnu, te ni tee de yuhu ya jeē cóho ya. Te ni cahān de:

Na cóndēhe yó núu quiji Elías nasnúu de, achí de.

³⁷ Te máá Jesús ni cana jee ya, te ni jihī-ni ya. ³⁸ Yūcuán na te sahma ndíta caa jeē ndihyú cuarto ñi ini templo cáhnu, ni ndatā sava sava nde xinī te nde nuū jehé. ³⁹ Te tēe ñuu Roma jeē cúu capitán, índichi de nuū yā, te ni jini de jeē ní cana jee ya te ni jihī yā. Te ni cahān de:

Jendaá ndije jeē Séhe Yaā Dios cúu tēe yáha, achí de.

⁴⁰ Te suni cáhiin sava ñahan, cándēhe jíca ña. Te unī ña cácuu María ñuu Magdala, jíin María naná José jíin Jacobo suchí, jíin ñahan nání Salomé. ⁴¹ Te ñahan yáha ní candiquin ña ya, ni cajejniñu ña nuū yā nde náa jíca ya Galilea. Te suni cáhiin cuehē gā ñahan jeē ni jéngoo jíin yá ñuu Jerusalén.

Jeē ní quindūji Jesús

(Mt. 27.57-61; Lc. 23.50-56; Jn. 19.38-42)

⁴² Te ni ini quivī ún. Te quivī sátūhva cúu, chi sajnē cúu quivī ndétātú. ⁴³ Te ni quee José, tēe ñuu Arimatea. Te cúu de ñn tēe cújéhnu nuū junta cújéhnu ga. Te suni ñúhun ni de jeē quiji quivī jeē ndacu Yaā Dios jniñu. Te tu yúhú de chí ni quivī de nuū Pilato, ni jicān de yiqui cúñu Jesús. ⁴⁴ Te Pilato chi náa ni de jeē yachí ni jihī yā. Te ni cana de capitán, te ni cajnūhún de tēe un núu je ni jihī yā. ⁴⁵ Yūcuán na te ni cucáhnu ni de jeē ni cáhān capitán jíin de, te ni jēhe de jnūhun jeē quihin José yiqui cúñu yā. ⁴⁶ Te José ni jeen de ñn sahma cuitá váha. Te ni snúu de yiqui cúñu yā, te ni chusúcún de sahma ún. Te ni chindūji de ya ini ñn yaū jeē quindūji ndīyi, jeē ní caan jicā ñn cava. Te ni jesi de ñn yuū yuhu yáú un. ⁴⁷ Te María ñuu Magdala, jíin María naná José, ni cajito ña nuū ní cachindūji de ya.

Jeē ní natecu Jesús

(Mt. 28.1-10; Lc. 24.1-12; Jn. 20.1-10)

16

¹ Te ni ini quivī ndétātú, te María ñuu Magdala, jíin María naná Jacobo, jíin Salomé, ni cajeen ña tēcá perfume jeē quíchuhun ña yiqui cúñu yā. ² Te jenéhen quivī domingo, jeē ní cane niāndii, te ni jinūcoo ña nuū ní yindūji ya. ³ Te cácahān ña:

¿Nde níhin yō tēe tejiyo yuū ndihyú yuhu yáú? achí ña.

⁴ Te ni candacoto ña, te ni cajito ña jeē jé ni cujiyo yuū cáhnu un cuáhān. ⁵ Te ni quivícoo ña ini yaū ndīyi. Te ni cajito ña ñn ndajéhé Yaā Dios jeē cáa nájnūhun tēe suchí, néne ya ichi lado váha, ñúhun ya ñn sahma cuijín cáni. Te ni cayūhú ña. ⁶ Te ni cahān yā jíin ña:

Ma yūhu ró jijnáhan ró. Chi vecondēhe ró Jesús ñuu Nazaret, Yaā ni jíhī jicā cruz. Tuá yā yáhá, chi je ni natecu yā. Yáhá condēhé ró nuū ní cachindūji de ya. ⁷ Cuánungoo te cachi rō nuū tēe cáscuáha jíin yá, jíin núu Pedro, jeē xíhna gā maá yá jinū Galilea, te sáa te najinūcoo de. Te yūcuán coto de nuū yā, nájnūhun ni cahān yā jíin de nde saá, achí yá jíin ña.

⁸ Yūcuán na te ñahan un ní quendacoo ña nuū ní yindūji ya, te cájino ña cuangoo ña. Chi quísi i ña jeē cáyūhú ña. Te tu ní cácachi cuíti ña nuū ní ñn, chi cáyūhú ña.

Jeē ní nane Jesús nuū María ñuu Magdala

(Jn. 20. 11-18)

⁹ Te Jesús ni natecu yā jenéhen quiv̄ Domingo. Te x̄hna gā ni nane ndijin yā nuū María ñuu Magdala, ñahan jeē ní quenehen ya uxā tachī ini. ¹⁰ Te cuahān ña cuacastūhún ña nuū tāca téé ni cajica jíin yá jeē ní nane ya nuū ña. Te cácuuíhyá ni de te cándahyū de. ¹¹ Te nuū ní cajini de jnūhun jeē ní jito ña nuū yā jeē técu yā, te tu ní cácdíje de jnūhun cáhán ña.

Jeē ní nane ya nuū uū tēe cáscuáha jíin yá

(Lc. 24.13-35)

¹² Yūcuán na te ni quendacoo uū jnáhan tēe ún, cájica de cuahān de ichi rancho, te s̄in modo ni nane ndijin yā nuū de. ¹³ Te ni canandicó de, ni cacastūhún de nuū tāca gá jnáhan de. Te ni tu ní cácdíje tucu jnáhan de jeē cácahān nd̄indúú de.

Jeē ní tejníñu ya de nacani de jnūhun

(Mt. 28.16-20; Lc. 24.36-49; Jn. 20.19-23)

¹⁴ Te cúcuéé gá te ni nane ndijin yā nuū ndihúxí ñin de jeē cáyūcú de mesa cáyeji de staā. Te ni cahān yā nuū de, chi n̄hni ni de jeē tu cácdíje de jeē cácahān jnáhan de un, jéé ní natecu yā ni cajito de ya. ¹⁵ Te ni cahān yā jíin de:

Cuángoo jíjnáhan ró n̄í ñaȳv̄í, te nacani ró jnúhun ri nuū tāca ñáyuu ndese jnáma ri i. ¹⁶ Te ñayuu candíje te cuandute i, chi cācu i. Te ñayuu tú candíje, chi jnahnū ndetū i. ¹⁷ Te ñayuu candíje, sáha i tācá jniñu jéhnu yáha jeē steén jeē iyó rí jíin i: Jíin s̄hv̄í rí quenehen i tachī ini ñayuu. Te cahān i tijni yuhu jéé. ¹⁸ Te núu ni jniñi sanaa i coō, chí núu ni jhi i veneno, te ma sáha daño jíin i. Te suni soó i ndaha i siqū ñáyuu cácuñu, te nduvāha. Achí yá jíin de.

Jeē ní ndaa ya cuanuhun yā andiv̄í

(Lc. 24.50-53)

¹⁹ Yūcuán na te nuū ní ndih̄i ni cahān maá Jítóho yō jíin de jíjnáhan de, te ni ndaa ya cuanuhun yā andiv̄í, te ni cucōo ya lado váha Yaā Dios nuū cujéhnu ya. ²⁰ Te máá de ni quendacoo de, ni canacani de jnūhun ya tāca lado ndese jnáma ya ñayuu. Te máá Jítóho yō ni chindéé ñáhán yá de. Te ni jēhe ya fuerza jeē sáha de tācá jniñu jéhnu jeē steén jeē iyó ndāa jnūhun cánacani de. Te ni cuu. Amén.

JNUHUN VAHA NI TEE SAN LUCAS

¹ Cuehē tēe ni cajicu de ni catee yúcun de historia Jesús, tācá jniñu jeē ni sáha ya ni cajito yó. ² Te ni catee de tāca jnúhun jeē ní cacastūhun ñáyuu nuū yō, jeē ní cajito i jniñu yúcuan nde ná ni quejéé, te ni canacani i jnúhun ya. ³ Te máá ná, suni ni nanducú yúcun ná tāca jnúhun ya, nde nuū ní quejéé. Te ni jeni ni na jéē suni íyó váha jeē tēe cájí ná tāca jnúhun yáha núu ní, amigo Teófilo. ⁴ Te súcuan te cuni ni jéé iyó ndāā tāca jnúhun jeē ní cacastūhún i nuū ní.

Jeē ní cachi ndajéhé jeē cacu Juan tēe scuándute

⁵ Tiempo jeē ní cuu Herodes rey región Judea, te ni iyo ñin sutū ñáyuu hebreo, naní de Zacarías, te grupo Abías cúu de. Te ñasihí de nání ña Elisabet, te suni sēhe yucūn maá sūtū Aarón cúu ña. ⁶ Te ndindúú de cahīyo ndaā de nuū Yaā Dios, te ndaā vāha cásquicu de jniñu ndácu ley maá Jítóho yō Yaā Dios, cájito tāca ñáyuu. ⁷ Te tú sēhe de íyó, chi ñahan númá cúu Elisabet, te je jéhnú ndindúú de.

⁸ Te ñin quivī te jéjnīñu Zacarías nuū jniñu jeē cúu de sutū nuū Yaā Dios, chi ni quee quivī jeē ndívi grupo de. ⁹ Te ni casáha de sorteo, nájnūhun íyó costumbre sutū. Te ni sáha tocar Zacarías jeē quivī de ini cuarto ñi templo Jítóho yō Yaā Dios, te cahmu de sūje cūtú. ¹⁰ Te hora jeē cayú sūje cūtú, te tāca ñáyuu cuehē cáhiin i fuera, cájicān tahu i. ¹¹ Te ni cane ñin ndajéhé maá Jítóho yō nuū de, ñin ya lado váha altar nuū jéhnú de sūje cūtú. ¹² Te ni cunéé ni Zacarías ni jito de nuū yā, te yōhyo ni yūhú de. ¹³ Te ni cahān ndajéhé un jíin de:

Zacarías, ma yūhu ró, chi je ni chihi Yaā Dios cuenta jeē ni jícān tahu rō. Te ñasihí ró Elisabet, scácu ña ñin sēhe yíí, te snání ró i Juan. ¹⁴ Te yōhyo cusīñi rō. Te cuehē ñáyuu cusīñi ni jeē cácu i. ¹⁵ Chi cujéhnú sēhe ró sáha máá Yaā Dios. Te ma cóho i vino ni ndixi cuíí. Te cunuú máá Espíritu Santo jíin i, nde ná tu cacu i. ¹⁶ Te sáha i jeē cuehē ñáyuu nación rō Israel ndívicoo i nuū Jítóho i Yaā Dios. ¹⁷ Te xīhna gā Juan quiji nacani jnúhun Jítóho yō Jesús, te sáa te quiji ya. Te sáha i nájnūhun ni sáha Elías, tēe ni nacani jnúhun Yaā Dios jenahán, te coneváha i poder jeē nácani i jnúhun, nájnūhun ni coneváha Elías. Te sáha i jeē tāca tátá ndumaní de jíin sēhe de. Te suni sáha i jeē ñáyuu ñihni ni cuatáhu i nuū Yaā Dios, nduu i ñáyuu ndaā. Súcuan sátūhva i ñáyuu návāha candíje i máá Jítóho yō jeē quíji ya. Achí ndajéhé.

¹⁸ Te Zacarías ni cajnúhún de ya:

¿Nde se cucáhnú ni na núu jendaá cúu? Chi tēe jéhnú cúu ná, te suni jéhnú ñasihí ná, achí de.

¹⁹ Te ni cahān ndajéhé un jíin de:

Máá rí cúu Gabriel, te íne ri nuū Yaā Dios, jejnīñu ri nuū yā. Te ni tají yá ruhū vēji ri cahān rī jíin ró, te nácani ri jnúhun vāha yáha núu rō. ²⁰ Te jeē tu ní cándíje ró jnúhun ni cahān rī, te cuñíhín ró, te ma cúu cahān rō, chi nde na cácu sēhe ró. Te squícu nahín jnúhun cáhán rī yāhá, na quée quivī, achí ndajéhé.

²¹ Te ñáyuu cáhiin ichi fuera, cándetu i Zacarías, te cájeni ni i na vé ni cuu jeē cucuée de ini cuarto ñi templo. ²² Te nuū ní quenda de, te tuá ni cúu cahān de jíin i. Te ni cajecūhun ni i jeē ini templo ni jito ndijin de ñin jeē ni stéén yā nuū de. Te máá seña na ni sáha de nuū i, chi ni cuñíhín de.

²³ Te nuū ni jínu quivī ni jejnīñu de ini templo, te cuanuhun de vehe de. ²⁴ Te ni cuu jecu quivī, te ñasihí de Elisabet ni jecūhun sēhe ña. Te ni iyo ña vehe ña uhūn yoō jeē tuá nde ní jéhnú ña. Te jéni ni ña: ²⁵ Súcuan ni sáha máá Jítóho yō jíin rí, te ni tejiyo ya jnúhun jeē cúcanu rī nuū ñáyuu jeē tú sēhe ri, jéni ni ña.

Jeē ní cachi ndajéhé jeē cacu Jesús

²⁶ Te nuū íñú yoō, te ni tají Yaā Dios ndajéhé yā Gabriel, ni jehēn yā ñin ñuu naní Nazaret, ndañúú Galilea. ²⁷ Te ni jehēn yā nuū ñin sūchi sīhí nání María. Te je ni cundaā

jeē quijnáhan ña jíin ñin tēe nání José, te sēhe yucūn rey David cúu de. ²⁸ Te ni quívi ndajéhé un núu ndeé ña, te ni cahān yā:

Tandii, nacā ndetū cúu ró. Chi máá Jítóho yō Yaā Dios iyó yá jíin ró, te ni sáha ya jeē yóhyo ndetū gā cúu ró núu tāca gá ñahan, áchí yá.

²⁹ Te nuū ni jíto ña nuū yā, te ni cunéé ni ña jeē súcuan cáhān yā, te jéni ni ña naun cáhān yā súcuan jíin ña. ³⁰ Te ni cahān gā ndajéhé un jíin ña:

Ma yūhu ró María, chi ni sáha Yaā Dios jeē váha jíin ró. ³¹ Te jecūhun sēhe ró te scácu ró ñin sēhe yíi, te snání ró i Jesús. ³² Te kujéhu i, te conaní i Sēhe Yaā kujéhu téyí. Te máá yá jeē cúu ya Jítóho yō Yaā Dios, sáha ya jeē cuu i rey, nájnūhun jíi i David ni cuu de rey. ³³ Te ní cáni ndacu i jniñu nuū ñáyuu nación Israel. Te ma ndíhi cuiti jeē ndácu i jniñu. Achí ndajéhé.

³⁴ Yūcuán na te ni cajnūhún María:

¿Ndeese coo jeē ni cáhān ní? Chi ná tu coo yíi ná, áchí ña.

³⁵ Te ni cahān ndajéhé un:

Máá Espíritu Santo quiji siquī rō, te poder máá Yaā kujéhu téyí sáha ñin jniñu jéhu jíin ró. Te jeē yúcuán máá súchi íi jeē cácu, quihi cuenta i nuū Yaā Dios, te cahān ñayuu jeē Séhe Yaā Dios cúu i. ³⁶ Te suni cástūhun rí nuū rō jeē jnáhan ró Elisabet, suni scácu ña ñin sēhe vésú je jéhu ña. Te vijna íyó íñu yoō jeē tuá cácahān ñayuu jeē cúu ña ñahan númá. ³⁷ Chi ndíhi-ni cuu sáha Yaā Dios, te tu íyó ni ñin jeē ma cúu sáha ya, achí ndajéhé un.

³⁸ Yūcuán na te ni cahān María:

Cuu núu súcuan, chi sáha ná táca jniñu ndácu Jítóho yō Yaā Dios, te na cóo jíin ná nájnūhun ni cachi ní, áchí ña.

Te máá ndajéhé un cuáhān-ni ya.

Jeē ni jécondēhé María Elisabet

³⁹ Te ni cuu jecu quívi, te yachí cuahān María, ni caa ña yucu cuahān ña ñin ñuu región Judea. ⁴⁰ Te ni jinū ña vehe Zacarías, te ni cahān ña jíin Elisabet. ⁴¹ Te nuū ní jini Elisabet jeē cahān María jíin ña, te súchi ñúhun chíji ña ni canda-ni i. Te ni cunuú Espíritu Santo ini anuá ña. ⁴² Te ni cahān jee ña:

Ni sáha Yaā Dios jeē yóhyo ndetū gā cúu ró núu tāca gá ñahan, jíin jéē yóhyo ndetū sēhe ró. ⁴³ ¿Te ndese cúu jeē ní quee naná máá Jítóho rī nuū rī? Chi tu cújéhu cuiti rī. ⁴⁴ Chi jeē ní jini-ni ri jnūhun ni cahān rō jíin rí, te sūchi ñúhun chíji ri ni canda i jeē cúsiñi ni i. ⁴⁵ Te nacā ndetū rō jeē ní candíje ró, chi squícu nahín tāca jnūhun ni cahān máá Jítóho yō jíin ró. Achí Elisabet.

⁴⁶ Yūcuán na te ni cahān María:

Cáhān rī jeē kujéhu ndasí máá Jítóho yō Yaā Dios,

⁴⁷ te cúsiñi ni rī jíin Yaā Dios, Yaā jnáma ruhū.

⁴⁸ Chi ni sáha ya cuenta ruhū, vésú tu cújéhu ri.

Te na squícu ri jniñu ndácu ya.

Te nde vijna te tāca ñáyuu jeē nácacu, cahān i jeē yóhyo ndetū rī.

⁴⁹ Chi Yaā jniñi ndíhi poder, ni sáha ya jniñu jéhu jíin rí.

Te Yaā ñi ndoo cúu ya.

⁵⁰ Te ní cáni cundáhú ni yā tāca ñáyuu ndíso ñyo nuū yā.

⁵¹ Ni sáha ya jniñu jéhu jíin poder yā,

chi ni scúnu ya ñayuu casándúxi máá,

⁵² te ñayuu cácujeéhu, ni quende ya jeē kujéhu i.

Te ñayuu ndahú chi ni sajeéhu ya i,

⁵³ te ñayuu cájii sōco ni jēhe ya jeē cáji vāha i.

Te ñayuu cucá ní natají yá i súcuan-ni.

⁵⁴ Te ni chindéé ñáhān yá yohó, ñáyuu nación Israel, jeē cácuu yó mozo yā,

te tu náa ni yā jeē cundáhú ni yā yohó.

⁵⁵ Chi súcuan ni jejnūhun ya nuū tāca jíi yō,

nuū Abraham jíin táca yúcūn de jeē cóo nńí cáni.

Achí María.

⁵⁶ Te ni condee ña jíin Elisabet nájñūhun unī yoō. Yūcuán na te cuanuhun ña vehe ña.

Jeē ní cacu Juan tēe scuándute

⁵⁷ Te ni jinū quiṽi jeē scácu Elisabet sēhe ña, te ni scácu ña ĩn sēhe yí. ⁵⁸ Te tāca ñáyuu ndeé yajni jíin ña jíin táca jnáhan ña, ni cajini i jeē yóhoyo ni cundáhú ni Yaā Dios ña, te ni jengoo i ni cacahān i jñūhun sīñ ni jíin ña. ⁵⁹ Yūcuán na te nuū uná quiṽi jeē ní cacu i, te ni jengoo ñáyuu ni sáha i circuncidar sūchi yíquín un. (Te yūcuan cúu ĩn jñunī nuū yíqui cúñu tāca sūchi yí hebreo jeē steén jeē cácuu i ñáyuu Yaā Dios.) Te snání i sūchí un sĥvı́ tátá i Zacarías nuú. ⁶⁰ Te ni cahān naná i:

Ma cúu, chi Juan conaní i, áchí ña.

⁶¹ Te ni cacahān i jíin ña:

¿Te naun? Chi tú ni ĩn jnáhan ró nání súcuan, áchí i.

⁶² Yūcuán na te jíin seña ni cacajñūhún i tátá sūchí un ndese cúní de jeē cónaní i. ⁶³ Te máá de ni jicān ĩn tutu, te ni tee de: Juan conaní i. Te tāca ñáyuu un ní canaa ni i cájito i. ⁶⁴ Te ni nduvāha Zacarías jeē ní cuñĥín de, te ni quejéé de cáhān de jeē yóhoyo vāha Yaā cúu Yaā Dios. ⁶⁵ Te tāca ñáyuu ndeé yajni jíin de, yóhoyo ni canaa ni i. Te nńí yucu región Judea ni jitē núu tāca jnúhun yáha jeē súcuan ni cuu. ⁶⁶ Te tāca ñáyuu jeē ní cajini jñūhun, ni quejéé i cánacani ni i, te cacajñūhun jnáhan i:

¿Ndeese coo na cuéhnu sūchi yáha? áchí i.

Chi máá Jítóho yō yóhoyo ni sáha ya jeē váha jíin i.

Jñūhun luu jeē ní nacani Zacarías

⁶⁷ Te tátá i Zacarías ni cunuú Espíritu Santo jíin de, te ni nacani de jñūhun ni steén Yaā Dios nuū de:

⁶⁸ Yóhoyo vāha Yaā cúu máá Jítóho yō, Yaā Dios yohó ñáyuu Israel, chi ni quiji ya nuū yō jeē cácuu yó ñáyuu yā, te ni jnama ya yohó.

⁶⁹ Te ni jeni ya ĩn Yaā iyó poder jeē jnáma ya yohó, te Yaā ún cacu yucūn mozo yā rey David.

⁷⁰ Chi súcuan ni jejnūhun ya, ni cacahān tāca tée ndoo ánuá jeē ní canacani de jñūhun ya jenahán.

⁷¹ Chi ni cacahān de jeē jnáma ya yohó núu jeē cájito uhū yohó, jíin núu jeē cáquitī ni nuū yō.

⁷² Chi ni cundáhú ni yā tāca jíi yō jijnáhan, te tu ní náā ni yā contrato ĩi yā.

⁷³ Chi suu un ní jejnūhun téyí yá nuū jíi yō Abraham,

⁷⁴ suu jeē jnáma ya yohó núu ñáyuu cájito uhū yohó, návāha cuajníñu yó núu yā, te ma yūhu yó i.

⁷⁵ Te coo ndaā coo ndoo ánuá yō, cuajníñu yó núu yā tāca quiṽi jeē cótecu yō.

⁷⁶ Te róhó sūchi lúlí, cuu ró tée nacani jñūhun Yaā cujéhnu téyí.

Chi cosnūu ró ichi núu máá Jítóho yō, návāha sátūhva ró ñáyuu, te sáá te quiji ya.

⁷⁷ Te castūhun ró nuū ñáyuu máá yá jeē jnáma ya i, jíin jéé cóne cáhnu ni yā nuū tāca cuéchi i.

⁷⁸ Chi Yaā Dios máá yó, vāha ni yā te cundáhú ni yā yohó.

Jeē yúcuan tají yá máá Yaā jeē sáha jeē cundijin ini anuá yō, quiji ya nde andiví,

⁷⁹ návāha jecūhun ni yohó jéé cáyūcu nájñūhun nuū nēē nuū jé yajni cuu yō.

Te chuhun ya yohó ichi nuū cóo ndeyí coo sīñ ni yō.

Achí Zacarías.

⁸⁰ Te sūchi lúlí un ní jehnu i te ni ije i jíin jnúhun ya. Te ni condee i nde nuū ñūhun téhé ndé quiṽi ní quenda ndijin i nuū ñáyuu Israel.

*Jeē ní cacu Jesús
(Mt. 1.18-25)*

2

¹ Te ni cuu jecu quivī, te Augusto, tēe cúu rey, ni ndacu de jniñu jeē coo censo jeē núcosō síhvī ndivii ñayuu ní cáhnu nuū ndácu de jniñu. ² Yāha cúu censo xīhna ñúhún jeē ní casáha de ná ni cuu Cirenio gobernador nación Siria. ³ Te ndivii ñayuu cuanungoo í ná ñuu ná ñuu maá i jeē nácuāha i síhvī i. ⁴ Te suni José ni quenda de ñuu Nazaret, ndañúū Galilea. Te cuanuhun de región Judea, te ni najinū de ñuu Belén, jeē cúu ñuu nuū ní cacu rey David jenahán. Chi sēhe yucūn David cúu de. ⁵ Te ni jehēn de návāha nacuāha de síhvī de jíin María, chi je yajni quijnáhan ña jíin de. Te ñúhun sēhe ña ni sáha Espíritu Santo. ⁶ Te níni cáhiin de yūcuán te ni jinū quivī jeē cácu sēhe ña. ⁷ Te ni scácu ña sēhe yí nūú ña, te ni chusúcun ña i sahma cuitá, te ni jequin ña i ini ñin nundōo nūú yéji quití, chi tuá núne mesón condee ña.

Jeē ní canecoo ndajéhé yā nuū pastor

⁸ Te yajni ñuu Belén cáhiin tēe cácuu pastor, te cándito de lanchi de níni ñuu jecuāa nde yucu ún. ⁹ Te ñin sanaa-ni te ni cane ñin ndajéhé maá Jítóho yō nuū de, te nduva máa Jítóho yō ni ndindēe ní nūú cáhiin de. Te yōhyo ni cayūhú de. ¹⁰ Te ni cahān ndajéhé un jíin de:

Ma yūhu ró jijnáhan ró, chi vēji ri castūhun rí jnūhun vāha nuū rō, te sáha jeē cúsiñ ndasí ni tāca ñáyuu: ¹¹ Chi vijna nde ini ñuu David ni cacu ñin Yaā jnama róhó, te máa Jítóho yō Cristo cúu ya. ¹² Te súcuan nacuni rō sūchi yíquín un, chi ñúsúcun i sahma cuitá te catú i ini ñin nundōo nūú yéji quití. Achí yá.

¹³ Te ñin sanaa-ni te ni canecoo cuehē gā ndajéhé andiví, cáhiin ya jíin ndajéhé un, te cácahān yā jeē yóhyo vāha Yaā cúu Yaā Dios. Te achí yá:

¹⁴ Yōhyo luu cújéhnu Yaā Dios nde nuū sucún.

Te na ndúvāha ni tāca ñáyuu ñayīvi, sáha ya jeē cúsiñ ni yā jíin i.

Achí tāca ndajéhé.

¹⁵ Yūcuán na te cuanungoo ndajéhé un andiví. Te tēe cácuu pastor ni cacahān de jijnáhan de:

Na quíhín yō nde ñuu Belén, te cuni yō na vé ni cuu jeē ní castūhun máa Jítóho yō nuū yō, achí de.

¹⁶ Te yachí cuangoo de, te ni nanihīn de María jíin José jíin sūchi yíquín un, catú i ini nundōo nūú yéji quití. ¹⁷ Te nuū ní cajini de nuū i, te ni canacani de jnūhun jeē ní cachi ndajéhé yā nuū de síquī sūchi yíquín un. ¹⁸ Te ni canaa ni tāca ñáyuu cajini nahín i jnūhun cácahān tēe cácuu pastor. ¹⁹ Te María, ni quendōo tāca jnūhun yáha nuū jeē níjnūnī ña, te nácani ni ña síquī. ²⁰ Te tēe cácuu pastor cuanungoo de, te ni cacahān de jeē yóhyo vāha Yaā cúu Yaā Dios síquī tāca jéē ní cajini sōho de jíin jéē ní cajito de, chi ni síquīcu nahín nájñūhun ni cahān ndajéhé yā jíin de.

Jeē ní castéén de i nuū Yaā Dios ini templo

²¹ Te ni cuu unā quivī jeē ní cacu ya, te ni casáha de circuncidar sūchi yíquín un. Te ni casnání de i Jesús, chi síhvī yúcuan ní cachi ndajéhé yā nuū María nde ná tu jecūhun i.

²² Te ni jīnu quivī jeē casquīcu ña costumbre jeē ndúndoo ña nuū Yaā Dios jijnáhan ña, nájñūhun cáhán ley jeē ní jéhe ya nuū Moisés. Te ni jengoo de jíin i ñuu Jerusalén jeē nácuāha de i nuū maá Jítóho yō Yaā Dios. ²³ Súcuan ni casáha de, chi yósó nūú tútu ley yā: Tāca sūchi yí nūú jéē cácacu, quíhí cuenta i nuū Jítóho yō Yaā Dios, achí tutu. ²⁴ Te suni cuasocō de nájñūhun cáhán ley maá Jítóho yō: Socō rō uū livi chí úū paloma, achí tutu.

²⁵ Te ni iyo ñin tēe nání Simeón, ndéé de ñuu Jerusalén tiempo un. Te tēe ndaā, tēe chíñúhún vāha nuū Yaā Dios cúu de. Te ñúhun ni de jeē quéé maá Yaā jnama ñayuu nación de Israel. Te máa Espíritu Santo íyó yá jíin de. ²⁶ Te je ni castūhun yá nuū de jeē ma cúu cuití de chi nde coto de nuū Cristo jeē tají maá Jítóho yō Yaā Dios. ²⁷ Te ni steén yā nuū de jeē quihín de templo quivī ún. Te suni tátá naná sūchi yíquín Jesús, ni quívicoo de ini templo jíin i, jeē nácuāha de i nuū Yaā Dios nájñūhun cáhán ley Moisés.

²⁸ Te Simeón ni ñunundee de i, te ni cahān de jeē yóhoyo vāha Yaā cúu Yaā Dios, te áchí de:

²⁹ Tātā Yaā Dios, vijna te cuu cuāha ni jnúhun jeē cuu ná, chi je ni cusī ni ná.

Chi je ni squícu ní jnúhun ni jejnūhun ní núū sāña jéē cúu ná mozo ni.

³⁰ Chi ni jito jínúū na núū Yaā jnáma sāña jíjnáhan ná.

³¹ Chi ni jeni ní yá jeē jnáma ya tāca ñáyuu ñayīví.

³² Te máá yá sáha jeē cúndijin ini anuá ñayuu tācá nación, návāha jecūhun ni i siquī ní.

Te sáha ya jeē kujéhnū ñayuu maá ní Israel.

Achí Simeón.

³³ Te José jíin náná i cánaa ni de cájini nahín de jnūhun ni cahān Simeón siquī i. ³⁴ Te ni jicān tahu Simeón jehē de jíjnáhan de, te ni cahān de jíin náná i María:

Sūchi yáha vēji i jeē candíje cuehē ñayuu nación yō Israel, te cācu i jíjnáhan i. Te sava i ma candíje i, te jnahnū ndetū i. Chi cúu i Yaā ní tají Yaā Dios, te sa squéhichí ni cuehē ñayuu i. ³⁵ Te súcuan te quenda ndijin ndese cájeni ni tāca ñáyuu. Te máá ró chi jnahuhū ndasí ni rō coto ró jéē ndóho i. Achí Simeón.

³⁶ Te suni íne ñn ñahan nácani jnūhun Yaā Dios, naní ña Ana. Te sēhe Fanuel, yucūn Aser cúu ña. Te je jéhnū ndasí ña. Te nde ná lulí ña te ni condee ña jíin yī ña uxā cuiyā.

³⁷ Yūcuán na te ni quendō ndáhú ña, te ni cuu cuūn xico cuūn cuiyā ña. Te tu cújiyo ña ini vehe īī, chi jéjníñu ña nuū Jítóho yō Yaā Dios nduú ñuú, te ndite ni ña te jícán tahu ña.

³⁸ Te suni hora un ní quee ña, te ni nacuatáhú ña nuū Yaā Dios. Te ni cahān ña jnūhun sūchi yíquín un jíin tāca ñáyuu Jerusalén jeē cáñuhun ni i jeē quéé Yaā jnama i.

Jeē cuánungoo de ñuu Nazaret

³⁹ Te ni jīnu ni casquícu de tācá jniñu ndácu ley maá Jítóho yō Yaā Dios, te cuanungoo de ñuu de Nazaret, ndañúū Galilea. ⁴⁰ Te sūchi lulí un ní jehnu i, te ni ije i, te ni cundíchí gá i. Te ni sáha Yaā Dios jeē váha ndasí jíin i.

Jeē íne sūchi lulí Jesús ini templo

⁴¹ Te ndijnahan cuiyā jéngoo tátá i náná i ñuu Jerusalén, jeē cúu vico pascua. ⁴² Te nuū ní cuu uxī uū cuiyā i, te cuangoo tucu de Jerusalén, nájñuhun sáha sáha de quivī víco ún. ⁴³ Te ni yáha vico, te cuanungoo de. Te sūchi lulí Jesús, ni quendō i Jerusalén, te tu ní cájini José jíin náná i. ⁴⁴ Te cájeni ni de jeē cuahán i mēhñu ñáyuu cájica ichi ún. Te ni cájica de ñn quivī, te sáa te ni cananducú de i mēhñu tāca jnáhan de jíin ñáyuu cájini jnáhan de jíin. ⁴⁵ Te tu ní cánanihīn de i. Te ni canandicó de cuangoo de Jerusalén, cuananducú de i.

⁴⁶ Te nuū uní quivī te ni cananihīn de i ini templo, néne i mēhñu téé cástéén tutu ley Yaā Dios, te jíni nahín i jeē cácahān de te cájnūhún i de siquī jnúhun ún. ⁴⁷ Te tāca ñáyuu cájini jnūhun cáhán i, cánaa ni cájito jeē váha cájí xínī i te vāha nástió cuñí i jnūhun. ⁴⁸ Te nuū ní cájito tátá i náná i nuū i, te ni canaa ni de. Te ni cahān naná i jíin i:

Séhē, ¿naun ni sáha ró súcuan jíin rí? Chi ruhū jíin tátá rō, yóhoyo ni canacani ni rí cánanducú rí rohó, achí ña.

⁴⁹ Yūcuán na te ni cahān i:

¿Naun cánanducú ní sāña? ¿A tu cájini ni jéé cánuú cocu ná jíin jniñu Tátá na Yaā Dios? Achí i.

⁵⁰ Te tu ní cájecūhun ni tátá i náná i jnūhun ni cahān i.

⁵¹ Yūcuán na te cuanuhun i jíin de jíjnáhan de ñuu Nazaret, te ni jendije i nuū de. Te náná i, ni quendō tāca jnúhun yáha núū jeē níjnūnī ña. ⁵² Te Jesús ni jehnu ga i, te ni cundíchí gá i, te cúsiñ ni Yaā Dios jíin i, te suni súcuan tāca ñáyuu.

Jnūhun Juan tēe scuándute

(Mt. 3.1-12; Mr. 1.1-8; Jn. 1.19-28)

3

¹ Te ni cuu xahūn cuiyā jeē ndácu Tiberio jniñu nń nación. Te Poncio Pilato cúu de gobernador Judea, te Herodes cúu de gobernador Galilea, te ñani de Felipe cúu de gobernador Iturea jíin Traconite, te Lisantias cúu de gobernador Abilinia. ² Te sutū cujéhnū ga cácuu Anás jíin Caifás. Te ni quee jnūhun Yaā Dios nuū Juan sēhe Zacarías, jeē íne de nuū ñūhun téhé. ³ Te ni jica nuu de táca ñuu jeē iyó yajni yūte Jordán. Te cáhán de jíin ñáyuu jeē na nácani ni i jeē stóo i cuēchi i te cuandute i, návāha cone cáhnu ni Yaā Dios nuū cuēchi i. ⁴ Te súcuan ni squícu jnūhun Juan jeē yosó nuū tútu ni tee Isaías, tēe ni nacani jnūhun Yaā Dios nde jenahán:

Coo ñin tēe cana jee nde nuū ñūhun téhé:

Sátūhva ró máá ró jíjnáhan ró, chi quee maá Jítóho yō.

Te sáha ró jniñu ndaā, chi vēji ya.

⁵ Te tāca xéhvā na ndúndaā,

te táca yucu jíin loma na ndúnduhvā,

te na ndúyóhó ichi yácuá, te na ndúlii ichi ndáyí.

Te ndíhi un cúu jeē ndúvāha ndundaā anuá ñayuu nuū yā.

⁶ Te ndíhi i cuni i jeē jnáma Yaā Dios i.

Súcuan cahān Juan, achí tutu.

⁷ Te ni quendacoo cuehē ñayuu, cuahān i nuū de jeē scuándute de i. Te ni cahān de nuū i:

Va sēhe coō cácuu ró, chi xeēn rō nájñūhun coō. ¿A cájeni ni rō jeē cuu cunu ró cācu ró núū castigo xeēn jeē quíji? ⁸ Núu súcuan te sáha ró jniñu váha, te súcuan stéén rō jeē ní nacani ndije ni rō jeē stóo ró cuēchi ró. Te ma cáni ni rō cahān rō jeē cuu cācu ró síquī jeē cácuu ró yúcūn Abraham. Chi cáhán rī jíin ró jeē cuu sáha Yaā Dios jeē tāca yúū yáha nduu sēhe Abraham jeē candíje vāha, te núu cúní yā. ⁹ Te cácuu ró nájñūhun nundēhé jeē tu jéhe ndehē váha. Te vijna je iyó túhva Yaā Dios jeē cuáha ya castigo xeēn, nájñūhun je iyó túhva ñin cāa jeē cahnde nde yoho yujnu. Núu súcuan te sáha ya jíin ró nájñūhun jíin táca yujnu jeē tu cúun ndehē váha, jeē tahndé te cayū nuū ñuhún. Achí de.

¹⁰ Te ñayuu un ní cacajñūhún i de:

¿Te ndese sáha ná núu súcuan? Achí i.

¹¹ Te ni cahān de:

Róhó jéé cánevāha uū sahma, na cuáha ró ñin nuū jeē tu névāha. Te róhó jéé cánevāha jeē yéji, suni súcuan na sáha ró, achí de jíin i.

¹² Te suni jecu tēe cástútú xūhun renta, ni quecoo de jeē cuándute de. Te ni cacajñūhún de Juan:

Maestro, te máá ná, ¿ndese sáha ná jíjnáhan ná?

¹³ Te ni cahān Juan jíin de:

Ma scaá ró cácan rō xūhún, chi máá cúhva-ni jeē ní ndacu jniñu nuū rō, achí de.

¹⁴ Te suni ni cacajñūhún jecu soldado:

Te máá ná, ¿ndese sáha ná jíjnáhan ná? achí de.

Te ni cahān Juan jíin de:

Ma quénde rō ndajñíñu ni ñin jíin jnúhun siúhú ni jíin jnúhun stáú yáhu, te cusí ni rō jíin yáhu ró, achí de.

¹⁵ Te tāca ñáyuu cándetu i jeē quíji Cristo, Yaā jeē tají Yaā Dios, te cájeni ni i jeē sanaa te suu cúu Juan. ¹⁶ Te ni cahān Juan jíin i jíjnáhan i:

Ruhū chi jíin ndute scuándute ri rohó. Te vēji ñin Yaā jeē nájñūhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájñūhun ñuhún. Te cújéhnū ndasí yá, chi tú na vé jéhnū cuítí cúu ri nuū yā, ni jeē cuajñíñu ri nuū yā vésú ñin jniñu lúlí gá nájñūhun jeē ndají rí vésú correa ndijēn yā. ¹⁷ Te sáha ya nájñūhun sáha tēe scánda trigo, chi sásín ya ñayuu vāha jíin ñáyuu cunéé, nájñūhun cúndoo trigo jeē quénda sín paja. Te nastútú yá trigo yā ndívi ini yacā yā. Te paja chi jnaa yā nuū ñuhún jeē ma ndahvá cuítí. Achí Juan.

¹⁸ Te súcuan te jíin cuéhē gā jnūhun ni stihví ni de ñayuu un, ní nacani de jnūhun vāha Yaā Dios nuū i. ¹⁹ Te suni ni cahān xeēn de nuū Herodes, tēe cúu gobernador, chi tēe un ní nacueca de Herodías, ñasihí ñani de Felipe. Te cuehē gā jniñu neé súcuan ni sáha Herodes. ²⁰ Te sa víhyá gā ni sáha de jeē neé gá, chi ni chune de Juan vecāa.

Jeē ní jendute Jesús

(Mt. 3.13-17; Mr. 1.9-11)

²¹ Te nde ná tu quívi Juan vecāa, ná ni ine de ni scuándute de tāca ñayuu, te suni ni scuándute de Jesús. Te jícan tahu yā, te ni nune-ni andiví. ²² Te ni cuun Espiritu Santo ni quee xiní yā, te cáa nájñūhun iin paloma. Te ichi ándiví ní cahān iin jnūhun:

Máa ró cúu Sēhe ri jeē maní ndasí rí jíin, te yōhyo cúsh ni rí jíin ró, achí.

Lista ñayuu yucūn ní quiji Jesucristo

(Mt. 1.1-17)

²³ Te ná ni quejé Jesús steén yā jnūhun, te íyó yá nájñūhun ocō uxī cuiyā. Te cájeni ni ñayuu jeē séhe José cúu ya. Te José ni cuu séhe Elí, ²⁴ te Elí ni cuu séhe Matat, te Matat ni cuu séhe Leví, te Leví ni cuu séhe Melqui, te Melqui ni cuu séhe Jana, te Jana ni cuu séhe José, ²⁵ te José ni cuu séhe Matatías, te Matatías ni cuu séhe Amós, te Amós ni cuu séhe Nahum, te Nahum ni cuu séhe Esli, te Esli ni cuu séhe Nagai, ²⁶ te Nagai ni cuu séhe Maat, te Maat ni cuu séhe Matatías, te Matatías ni cuu séhe Semei, te Semei ni cuu séhe José te José ni cuu séhe Judá, ²⁷ te Judá ni cuu séhe Joana, te Joana ni cuu séhe Resa, te Resa ni cuu séhe Zorobabel, te Zorobabel ni cuu séhe Salatiel, te Salatiel ni cuu séhe Neri, ²⁸ te Neri ni cuu séhe Melqui, te Melqui ni cuu séhe Adi, te Adi ni cuu séhe Cosam, te Cosam ni cuu séhe Elmodam, te Elmodam ni cuu séhe Er, ²⁹ te Er ni cuu séhe Josué, te Josué ni cuu séhe Eliezer, te Eliezer ni cuu séhe Jorim, te Jorim ni cuu séhe Matat, ³⁰ te Matat ni cuu séhe Leví, te Leví ni cuu séhe Simeón, te Simeón ni cuu séhe Judá, te Judá ni cuu séhe José, te José ni cuu séhe Jonán, te Jonán ni cuu séhe Eliaquim, ³¹ te Eliaquim ni cuu séhe Melea, te Melea ni cuu séhe Mainán, te Mainán ni cuu séhe Matata, te Matata ni cuu séhe Natán, ³² te Natán ni cuu séhe David, te David ni cuu séhe Isaí, te Isaí ni cuu séhe Obed, te Obed ni cuu séhe Booz, te Booz ni cuu séhe Salmón, te Salmón ni cuu séhe Naasón, ³³ te Naasón ni cuu séhe Aminadab, te Aminadab ni cuu séhe Aram, te Aram ni cuu séhe Esrom, te Esrom ni cuu séhe Fares, te Fares ni cuu séhe Judá, ³⁴ te Judá ni cuu séhe Jacob, te Jacob ni cuu séhe Isaac, te Isaac ni cuu séhe Abraham, te Abraham ni cuu séhe Taré, te Taré ni cuu séhe Nacor, ³⁵ te Nacor ni cuu séhe Serug, te Serug ni cuu séhe Ragau, te Ragau ni cuu séhe Peleg, te Peleg ni cuu séhe Heber, te Heber ni cuu séhe Sala, ³⁶ te Sala ni cuu séhe Cainán, te Cainán ni cuu séhe Arfaxad, te Arfaxad ni cuu séhe Sem, te Sem ni cuu séhe Noé, te Noé ni cuu séhe Lamec, ³⁷ te Lamec ni cuu séhe Matusalén, te Matusalén ni cuu séhe Enoc, te Enoc ni cuu séhe Jared, te Jared ni cuu séhe Mahalaleel, te Mahalaleel ni cuu séhe Cainán, ³⁸ te Cainán ni cuu séhe Enós, te Enós ni cuu séhe Set, te Set ni cuu séhe Adán, te Adán ni cuu séhe Yaā Dios, chi ni sáha ya de.

Jeē ní jito ndee jexeén Jesús

(Mt. 4.1-11; Mr. 1.12-13)

4

¹ Te Jesús ni cunuú Espiritu Santo ini yā, te ni quenda ya yūte Jordán cuahān yā. Te ni jinū yā nde nuū ñūhun téhé ní sáha Espiritu Santo. ² Te ni ine ya yūcuan úū xico quívi, te ni jito ndee jexeén yā, chi cúní jeē sáha ya cuēchi. Te tāca quívi ún tu ní yéji cuiñi yā, te ná ni yāha quívi ún, te jí yā sōco. ³ Yūcuán na te ni cahān jexeén un jíin yá:

Núu máa ró cúu Sēhe Yaā Dios, te cahān rō jeē yuū yáha na ndúu staā caji rō, achí.

⁴ Te ni cahān Jesús jíin:

Tuú chi yósó núu tútu i: Nasūu máni máa jíin stāā cátecu ñayuu, chi suni jíin táca jnúhun cáhán Yaā Dios, achí yá.

⁵ Yūcuán na te cuahān jexeén un jíin yá nde xiní iin yucu súcún, te iin núnúu-ni ni steén nuū yā tācá nación ní cáhnu ñayívi. ⁶ Te ni cahān jíin yá:

Nuū maá ró cuāha ri jeē kujéhu ró núū ndivii nación yáha, chi yōhyo luu cáa. Chi máá rí jnīi ndīhi, te cuu cuāha ri nuū ndé ñn cúní rī. ⁷ Núu súcuan te núu cuiñi yítí ró chiñúhún ró ruhū, te cuāha ndīhi ri nuū rō. Achí jexeén.

⁸ Te ni cahān Jesús jíin:

Satanás, cujiyo quihīn rō, chi yósó núū tútu jeē chiñúhún ñayuu maá Jítóho i Yaā Dios, te nuū maá-ni ya cuajníñu i. Achí yá.

⁹ Yūcuán na te cuahān jexeén un jíin yá nde ñuu Jerusalén. Te ni jeni ya xinī torre templo. Te ni cahān jíin yá:

Te núu Sēhe Yaā Dios cúu ró, te síngava ró máá ró nde nuū ñúhun, chi jnama ya rohó.

¹⁰ Chi yósó núū tútu:

Tejnīñu ya ndajéhé yā quijicoo coto rōhó.

¹¹ Te cunundee yā rohó jíjnáhan ya, návāha ma cáchihi ró jéhē rō nuū yuú.

Achí tutu. Achí jexeén.

¹² Te ni cahān Jesús:

Tuú chi suni yósó núū tútu jeē ma cóto ndee ñayuu Jítóho i Yaā Dios, núu jnama ya i chí tuú, áchí yá.

¹³ Te tuá ni níhín jexeén modo coto ndee Jesús quivī ún, te ni cujiyo cuahān jecu-ni tiempo.

Jeē ní quejéé Jesús nácani ya jnūhun región Galilea

(Mt. 4.12-17; Mr. 1.14-15)

¹⁴ Te ni cunuú fuerza Espíritu Santo ini Jesús, te cuanuhun yā Galilea. Te ní región yajni yūcuan ní jītē núu jnūhun ya. ¹⁵ Te ni steén yā jnūhun ini tācá vehe ñi sinagoga, te ndīhi ñayuu ni cajejnúhún i ya.

Jeē cuánuhun yā ñuu Nazaret

(Mt. 13.53-58; Mr. 6.1-6)

¹⁶ Te ni najinū yā ñuu Nazaret nuū ní jehnu ya. Te quivī ndétátú ni quivī ya ini vehe ñi sinagoga, nájñuhun sáha sáha ya. Te ni ndocuiñi yā jeē cahu ya tutu ñi. ¹⁷ Te ni cajēhe de tutu ni tee Isaías, tēe ni nacani jnūhun Yaā Dios nde jenahán. Te ni nune ya tutu ún, te ni nanihīn yā nuū yosó jnúhun ni cahu ya:

¹⁸ Espíritu maá Jítóho yō Yaā Dios iyó yá jíin rí,

chi ni tejnīñu ya ruhū jeē nácani ri jnūhun vāha nuū ñáyuu ndahú.

Te ni tají yá ruhū vēji ri jíin jnúhun jeē ndúvāha ni ñayuu cácuquíhyá ni.

Te castūhun rí nuū ñáyuu cáyihī ndaha jexeén jeē coo libre i.

Te sáha ri jeē ndúndijin ini anuá ñayuu tu cájecūhun ni,

te jnama ri ñayuu jeē cándoho i sáha jnáhan i.

¹⁹ Te nacani ri jnūhun jeē ní quee tiempo jeē sáha Jítóho yō Yaā Dios jeē váha ñayuu.

Achí tutu ni cahu ya.

²⁰ Te ni nacasi yā tutu ún, te ni nacūha ya nuū tēe jéjnīñu ini sinagoga, te ni nucōo ya jeē steén yā jnūhun nuū ñáyuu cáhīn ini sinagoga. Te tācá i cájito vāha i nuū yā. ²¹ Te ni quejéé yá cahán yā jíin i:

Vijna te ni squícu jnūhun cáhán tutu ñi yāha ní cajini sōho ró, áchí yá.

²² Te ndivii i ni cacahān jeē váha tēe cúu ya, te cánaa ni i jeē ní cajini i tāca jnúhun luu ni cahān yā. Te ni cacajñuhun jnáhan i:

¿A násūu séhe José cúu tēe yáha?

²³ Te ni cahān yā jíin i:

Jíní vāha ri jeē cájeni ni rō cahān rō jnūhun yátá yáha jíin rí: Tēe tájna, sátájna ró maá ró núu súcuan. Te jnūhun yáha cúní cahān jeē nájñuhun ni nasávāha ri cuehē ñayuu cácuquí ini ñuu Capernaum ni canihīn rō jnūhun, suni súcuan na sáha ri ñuu yō yāhá návāha candíje ró cájeni ni rō. Achí yá jíin i.

²⁴ Te ni cahān gā yā:

Jendaá cahán rī jíin ró, ni ñin tēe nácani jnūhun Yaā Dios, tu cájetáhu ñayuu ñuu maá de nuū de. ²⁵ Te suni jendaá cahán rī jíin ró jeē ni íyo cuehē ñahan ní ndóo ndáhu ini nación yō Israel, tiempo ni cotecu Elías, tēe ni nacani jnūhun Yaā Dios. Te tiempo un tu ní cúun cuítī saū unī cuiyā yosáva, te ni íyo ñin jnamā xeēn ní cáhnu nación. ²⁶ Te tu ní tájí Yaā Dios Elías quihīn de nuū ni ñin ñahan viuda nación yō Israel, chi nuū máá ñin-ni ñahan viuda jeē ndeé ñuu Sarepta ndañū Sidón, ni jehēn de ni jito de jeē ní yeji ña. ²⁷ Te ini nación yō Israel suni ni íyo cuehē tēe ni candoho cuehyī stehyú, tiempo jeē ní cotecu Eliseo, tēe ni nacani jnūhun Yaā Dios. Te ni ñin de tu ní cándije jeē nduvāha de sáha Eliseo, chi sa suhva máñúhún-ni Naamán, tēe nación Siria ni nduvāha. Achí yá.

²⁸ Yūcuán na te tāca ñayuu cáhiin ini sinagoga, yōhyo ni caquitī ni i jnūhun ní cahān yā. ²⁹ Te ni candocuiñī i, te ni caquenehen i ya yatā ñūū ún, cuahān i jíin yá xinī yúcu íne ñuu ún, chi cáconi i chundahá i ya ñinga ya cava ún. ³⁰ Te tu ní cúu sáha i, chi ni yāha-ni ya mēhñú i cuahān yā.

Jeē ní quenehen ya tachī ini ñin tēe

(Mr. 1.21-28)

³¹ Yūcuán na te cuahān Jesús ñuu Capernaum región Galilea. Te quivī ndétātu ní steén yā jnūhun nuū ñayuu. ³² Te ni canaa ni i cájini i jnūhun stéén yā. Chi ni steén vāha ya nuū i, chi jíin vāha máá yá.

³³ Te ini vehe sinagoga un íne ñin tēe jeē ñūhun tachī xeēn ini de. Te tēe un ní cana cóhó de:

³⁴ Cujiyo ní. ¿Naun vēji ní núū na jíináhan ná, Jesús ñuu Nazaret? ¿A véji ní jēe snāā ni sáña, chí naún? Je jíin na ndé ñin cúu ní, chi Sēhe íi Yaā Dios cúu ní. Achí de.

³⁵ Te Jesús ni cahān xeēn yā nuū tachī ún:

Casi yuhu ró te quenda ró ini tēe yáha, áchí yá.

Te ni cotúú-ni tēe un núū tāca ñayuu, ni sáha tachī ún. Te ni quenda ini de cuahān, te tú na vé ni sáha ga jíin de. ³⁶ Te ndíhi ñayuu un ní cayūhú i, te ni cacahān i jíin jnáhan i: ¿Na jnūhun cúu yāha jēe ní cuu súcuan? Chi cújéhnu tēe yáha jēe ndácu ñihin de jniñu nuū tachí, te quéndacoo-ni, áchí i.

³⁷ Te jnūhun ya ni jitē núu cuahān ní cáhnu región yūcuán.

Jeē ní nasávāha ya naná chíso Simón Pedro

(Mt. 8.14-15; Mr. 1.29-31)

³⁸ Yūcuán na te ni quenda Jesús ini vehe íi sinagoga, te cuahān yā te ni jinū yā vehe Simón. Te naná chíso Simón, yíhi xeēn quiji ña, te ni cacahān ndahú de jíin yá jehē ña. ³⁹ Te ni jīta ndeyi ya nuū ña, te ni cahān yā jeē na ndíco quiji ún. Te ni nduvāha-ni ña. Te ni ndocuiñī-ni ña, te ni sáha ña jeē ní yeji yā jíin de.

Jeē ní nasávāha ya cuehē ñayuu

(Mt. 8.16-17; Mr. 1.32-34)

⁴⁰ Te jeē ní quée niāndii, te tāca ñayuu jeē iyó jnáhan i cácuñu ndinuū cuehyī, ni caquindeca i jnáhan i un núū yā. Te ni soó yá ndaha ya siquī ñin ñin i, te súcuan ni nasávāha ya í. ⁴¹ Te suni cuehē ñayuu ni quéndacoo tachī ini i, te cácana cóhó táchí ún:

Máá ní cúu Sēhe Yaā Dios, achí.

Te ni cahān xeēn yā nuū, te tu ní jéhe ya jnūhun jeē cahán gā súcuan, chi cájini jeē maá yá cúu Cristo, Yaā ní tájí Yaā Dios.

Jeē ní nacani ya jnūhun región Galilea

(Mr. 1.35-39)

⁴² Te nuū ní cundijin, te ni quenda ya cuahān sīn ya yatā ñūū nuū tú ñayuu. Te tāca ñayuu cánanducú i ya, te ni jinūcoo i nuū íne ya. Te cástétu i ya jeē tú cujiyo ya nuū i.

⁴³ Te ni cahān yā jíin i:

Suni cánuú jēe nacani ri jnūhun vāha nuū tāca gá ñuu siquī ndese ndácu Yaā Dios jniñu, chi jeē yúcuan ní tájí yá ruhū vēji ri. Achí yá.

⁴⁴ Te ni jica cuu ya ní región Galilea, nácani ya jnūhun ini tācá vehe iī sinagoga.

Jeē ní canihīn de cuehē chācá ni sáha ya
(Mt. 4.18-22; Mr. 1.16-20)

5

¹ Te iin quivī te íne Jesús yumar Genesaret. Te ni quecoo cuehē ñayuu, te ni chitú níhin i nuū yā, chí cācuni i cuni nahín i jnūhun Yaā Dios. ² Te ni jito ya jeē yúcu uū barco yajni yumar. Te tēe cājñi chācá, je ni quendacoo de ini barco, te cánacate de ñunu de. ³ Te ni quivī ya ini iin barco jeē cúu barco Simón. Te ni cahān yā jíin de jeē na scáca yátá de quihīn jecu gā nuū ndúte. Te ni cucōo ya, te nde ini barco un ní steén yā jnūhun nuū ñayuu cuehē jeē yúcu i yundúte un. ⁴ Te nuū ni jínu ni steén yā, te ni cahān yā jíin Simón: Scáca ró barco na quihín yō nde nuū iyó cúnú ndute, te sínga ró ñunu ró jñi ró chāca, áchí yá.

⁵ Te ni cahān Simón:

Maestro, ní niñu ni casínga ná ñunu jeē jñi ná tí, te tu ní níhin cuítí ná ni iin tí. Te jeē cahān maá ní súcuan, te na sínga tucu ná ñunu, áchí de.

⁶ Te ni casínga de, te ni quívicoo cuehē ndasí chāca, nde nducú táhndē ñunu de. ⁷ Te ni cacaja ndahá de nuū jnáhan de cáhiin ini inga barco, na quíjicoo chindéé ñájnañan jíin de. Te ni quecoo de, te ni cascútú ndí de tí ndíndúu barco, te nde je yajni quēe barco.

⁸ Te ni jito Simón Pedro jeē súcuan ni cuu. Te ni jecuíñi yítí de nuū Jesús, te ni cahān de: Cuiyo ní núu ná, chí tēe iyó cuéchi cúu ná, áchí de.

⁹ Chí máá de jíin táca tēe cáhiin jíin de, ni cayūhú de jeē ní canihīn de cuehē chācá un ní sáha ya. ¹⁰ Te suni ni cayūhú Jacobo jíin Juan, ndíndúu séhe Zebedeo, chí tēe chindéé ñájnañan jíin Simón cácuu de. Te ni cahān Jesús jíin Simón:

Ma yūhu ró, chí nde vijna te sáha ri jeē nihīn rō cuehē ñayuu candíje ruhū, nájnūhun ni nihīn rō cuehē chācá. Achí yá.

¹¹ Yūcuán na te nuū ni jínucōo de jíin barco nuū ñūhun íchi, te ni castóo de ndíhi ndajníñu de, te ni candiquín de ya cuango de.

Jeē ní nasávāha ya iin tēe ndóho cuehyī stehyú
(Mt. 8.1-4; Mr. 1.40-45)

¹² Yūcuán na te íne Jesús ini iin ñuu, te ni quee iin tēe ndóho cuehyī stehyú. Te ni jito de nuū Jesús, te ni jecuíñi yítí de ni jequín de nuū de nde nuū ñūhun, te ni cahān ndahú de jíin yá:

Jíni na jēe cuu sáha ní jēe nduvāha ná, te núu cúní ni, áchí de.

¹³ Yūcuán na te ni soó yá ndaha ya síquī de, te ni cahān yā:

Cúní rī. Te na nduvāha ró, áchí yá.

Te ná ni cahān yā súcuan, te ni nduvāha-ni tēe ndóho cuehyī stehyú un. ¹⁴ Te ni ndacu ya jniñu nuū de jeē ma cáchi cuítí de nuū ní iin. Te áchí yá:

Quisteén rō maá ró nuū sutú, te condahá ró jeē socó rō nuū Yaā Dios síquī jeē ndúndoo ró núu yā, nájnūhun ni ndacu Moisés jniñu jenahán. Te súcuan te cuni ñayuu jeē ní nduvāha ró. Achí yá.

¹⁵ Te víhyá gā ni jítē núu jnūhun ya cuahān. Te ni cataca cuehē ñayuu jeē cúní nahín i jnūhun stéén yā, jíin jēe nasávāha ya i nuū tāca cuéhyī cándoho i. ¹⁶ Te máá yá cuahān sñi ya nuū tú ñayuu, te ni jicān tahu yā.

Jeē ní nasávāha ya iin tēe ndóho cuehyī ni íjin
(Mt. 9.1-8; Mr. 2.1-12)

¹⁷ Te iin quivī te stéén yā jnūhun, te jecu tēe grupo fariseo jíin tēe cástéén tutu ley Yaā Dios, cáyucú de yūcuán. Te tēe un ní quecoo de nuū yā jeē véjicoo de tācá ndañū Galilea, jíin ndañū Judea, jíin ñuu Jerusalén. Te poder maá Yaā Dios iyó jíin yá jeē nasávāha ya ñayuu cácuñu. ¹⁸ Yūcuán na te ni quecoo jecu tēe, cándiso de iin tēe ndóho cuehyī ni íjin, cátú de nuū iin camilla. Te cánducú de squíví de tēe ún ini vehe, te caquin de nuū

íne ya. ¹⁹ Te tu ní cániñin de modo quivicoo de jíin téé un, chi cáyucú chitú ñáyuu. Te ni cacoo de siquī véhe, te ni canune de teja. Te ni cascúun de tēe cúhú un jíin camilla de nde nuū íne Jesús mēhñu ñáyuu. ²⁰ Te ni jini Jesús jeē cácañíje de jeē cúu nasávāha ya tēe cúhú un. Te ni cahān yā jíin téé cúhú un:

Róhó, je íne cáhnu ni rī nuū tāca cuéchi ró, áchí yá.

²¹ Yūcuán na te tēe cástéén tutu ley Yaā Dios jíin téé grupo fariseo, ni quejéé de cájeni ni de siquī yā: ¿Ndé ñin cúu tēe yáha jéé cahán de jñūhun ndevāha jeē quití ni Yaā Dios? Chi nasūu Yāā Dios cúu de jeē cóne cáhnu ni de nuū cuéchi.

²² Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha rī? ²³ Jeē uú jñūhun yáha, ¿ndé ñin yí gá cáa? ¿A jéé cahán rī jíin téé cúhú: Je íne cáhnu ni rī nuū tāca cuéchi ró? ¿Chí yí gá jeē cahán rī: Ndocuññi te caca ró, chi je ni nduvāha ró, achi rī? ²⁴ Te vijna te na stéén rī jeē maá rí, Yaā ní nduu tēe, ndíso jñíñu ri ini ñayivi yáha jéé cóne cáhnu ni rī nuū cuéchi.

Yūcuán na te ni cahān yā jíin téé ni íjin ún:

Cáhán rī jíin ró, ndocuññi te naquihin ró camilla rō, te quinhun rō vehe ró, áchí yá jíin de.

²⁵ Te ni ndocuññi-ni tēe ún, jíto jínúū ñayuu. Te ni naquihin de camilla nuū ni cátu de, te cuanhun de vehe de. Te nácuatáhú de nuū Yaā Dios. ²⁶ Te yōhyo ni canaa ni tāca ñáyuu cájito i, te ni cacahān i jeē yōhyo vāha Yaā cúu Yaā Dios. Te suni yōhyo cáyuhú i, te cácahān i:

Vijna te ni cajito yó jniñu jéhnu téyí, áchí i.

Jeē ní cana ya Leví

(Mt. 9.9-13; Mr. 2.13-17)

²⁷ Yūcuán na te ni quenda ya cuahān yā, te ni jito ya nuū ñin tēe stútú xúhun renta, naní de Leví, néne de nuū cutútú xúhun renta. Te ni cahān yā jíin de:

Condiquñ ruhū na quíhín yō.

²⁸ Te ni ndocuññi de, te ni stóo de ndihi ndajniñu de, te cuahān de jíin yá.

²⁹ Yūcuán na te ni sáha Leví ñin vico cáhnu vehe de, jeē cúsiñ ni de jíin Jesús. Te cuehē tēe cástútú xúhun renta jíin sava ga tēe, cáyucú de mesa cáyeji de staā jíin yá. ³⁰ Te tēe grupo fariseo jíin téé cástéén tutu ley Yaā Dios, ni quejéé de cácahān de siquī téé cáscuáha jíin yá, te ni cacajñuhún de:

¿Najehē cáyeji rō cájihí ró jíin téé cástútú xúhun renta jíin téé cásaaha cuēchi? áchí de.

³¹ Te ni cahān Jesús:

Ñayuu cáhiyo vāha, tu jíni ñuhún i tēe tájna, chi ñayuu cácuñú cúu jeē jíni ñuhún.

³² Te ruhū nasūu jéé véji ri cana ri ñayuu tú cuēchi, jeē cúu i nájnūhun ñayuu cáhiyo vāha. Chi sa suhva véji ri cana ri ñayuu cáhiyo cuēchi, jeē na nácani ni i te stóo i cuēchi i. Achí yá.

Jeē ní cacajñuhún de ya siquī jeē cóndite ni

(Mt. 9.14-17; Mr. 2.18-22)

³³ Yūcuán na te ni cacahān de jíin yá:

Tēe cáscuáha jíin Juan, jíin téé cáscuáha jíin grupo fariseo, cuehē jínu cáhiyo ndite ni de te cájicān tahú de. Te tēe cáscuáha jíin máá ní, ¿naun tu cásaaha de súcuan? Chi cáyeji de cájihí de.

³⁴ Te ni cahān yā jíin de:

¿A cuu condite ni de níni jéé iyó rí jíin de? ¿A cuu sáha ró jéé condite ni ñayuu cáhiñ vico nándaaha, te núu níni néne tēe nándaaha? ³⁵ Te quee quiví jeē cújiyo tēe ni nándaaha, te quiví ún chi condite ni i. Achí yá.

³⁶ Te suni ni cahān yā uú jñūhun yátá síquī jeē tu quíjnáhan jñūhun jeé jéé steén yā jíin táca jñūhun jenahán. Achí yá:

Ni ñin ñayuu tu jéhnde i ñin pedazo sahma jéé i, te nachuhun i nuū ñin sahma túhú i. Chi núu súcuan te stívi i sahma jéé i, te suni tu quíjnáhan jeé jeé un jíin jéé tuhú. ³⁷ Te tú

ni ñin chühun vino jeé ini ññi túhú. Chi núu súcuan, te vino jeé un ndatá ññi, te naa vino jíin ññi. ³⁸ Chi cánuú jeé cühun vino jeé ini ññi jéé, te súcuan te quéndōo vāha ndindúú. ³⁹ Te ñayuu cájihu vino áva, tu cúní i coho i jeé jeé, chi jeé áva cúu jeé vāha ga, achí i. Achí yá.

Jeē ní cataxín de yoco trigo quivī ndétātú
(Mt. 12.1-8; Mr. 2.23-28)

6

¹ Te ñin quivī ndétātu ní yāha Jesús cuahān yā mēhñú nuū cáa trigo. Te tēe cáscuáha jíin yá ni cataxín de yoco trigo, te ni caquñin de ini ndaha de, te ni cayejí de. ² Te sava tēe grupo fariseo ni cacajnūhún de:

¿Najehē casáha ró jniñu jeē tu íyó vāha sáha ró quivī ndétātú?

³ Te ni cahān Jesús jíin de:

¿A tu ní cácahu cuítí rō tutu ndese ni sáha David, ñin quivī jeē ni jíi de sōco jíin tēe cáhñin jíin de? ⁴ Te ni quivī de ini vehe Yaā Dios, te ni quihñ de pan ñi jeē yosó ndijin nuū Yaā Dios. Te ni yejí de, te suni ni jēhe de ni cayejí tēe cáhñin jíin de. Te tú na ley jeē cáji ni ñin tēe, chi máá-ni sutū cuu caji. Te vēsú súcuan te tú na cuēchi ní íyo siquī de. Achí yá.

⁵ Te ni cahān gā yā jíin de:

Ruhū, Yaā ní nduu tēe, máá rí cúu jeē ndácu jniñu siquī ndese sáha ñayuu quivī ndétātú, achí yá.

Jeē ní nduvāha tēe ni ichī ndaha
(Mt. 12.9-14; Mr. 3.1-6)

⁶ Te inga quivī ndétātú, suni ni quivī ya ini vehe ñi sinagoga, te ni steén yā jnūhun. Te yūcuan íne ñin tēe ni ichī ndaha vāha de. ⁷ Te tēe cástéén tutu ley jíin tēe grupo fariseo, cájito yuhu de ya núu nasávāha ya tēe un quivī ndétātú, návāha nihñ de cuēchi siquī yā.

⁸ Te máá yá je jíiní yā ndese cájeni ni de. Te ni cahān yā jíin tēe ni ichī ndaha ún:

Ndocuññ, te condichi rō mēhñu yāha, achí yá.

Te ni ndocuññ de, te ni jecondichi de mēhñú. ⁹ Yūcuán na te ni cahān yā jíin de jíināhan de:

Na cájnūhun rí rohó ñin jnūhun: ¿Ndese cáhán ley siquī quivī ndétātú? ¿A jéé sáha vāha yó, chí sáha néé yó? ¿A jéé nasávāha yó ñayuu je yajni cuu, chí sáha yó jéé cúu i? Achí yá.

¹⁰ Te ndéhé yá nuū de jeé cáyūcú de ññi xiin ya. Te ni cahān yā jíin tēe cühú un:

Scáá ndaha ró.

Te ni scaá de, te ni nduvāha-ni ndaha de. ¹¹ Te yōhyo ni caquitñ ni tāca tēe un, te ni quejéé de cándajnūhún de siquī Jesús, ndese cahni de ya.

Jeē ní nacāji ya uxī uū tēe apóstol
(Mt. 10.1-4; Mr. 3.13-19)

¹² Te ni cuu jecu quivī, te ni quenda ya cuacacān tahu yā nde yucu. Te ññi niñu ni jicān tahu yā nuū Yaā Dios. ¹³ Te nuū ní cundijin, te ni cana ya tāca tēe cáscuáha jíin yá. Te ni nacāji ya uxī uū de, te ni cahān yā jeē cuu de apóstol, condiso jniñu de nacani de jnūhun ya. ¹⁴ Te yāha cúu sñhví de jíināhan de: Simón jeē ní nasnání yá de Pedro, jíin ñani de Andrés, te suni Jacobo jíin Juan, Felipe jíin Bartolomé, ¹⁵ Mateo, Tomás, Jacobo sēhe Alfeo, Simón tēe grupo cananista, ¹⁶ Judas ñani Jacobo, jíin Judas Iscariote, tēe jeē ní nastúu de ya.

Jeē ni stéén yā nuū ñáyuu cuehē
(Mt. 4.23-25)

¹⁷ Te ni nanuu ya yucu jíin tāca tēe un jéé cascuáha jíin yá, te ni jecuññ yā ñin nduhvā jíin de. Te cuehē ñayuu ññi región Judea jíin ñuu Jerusalén, jíin ñáyuu yumar ñuu Tiro jíin ñuu Sidón, ni quecoo i jeé cúni nahín i jnūhun stéén yā, jíin jéé ndúvāha i cuehyñ

cándoho i. ¹⁸ Te ñayuu jeē ñúhun tachī ini i, suni ni canduvāha i ni sáha ya. ¹⁹ Te ndivii ñayuu cáculi i quehé i ya, chi súcuan ndúvāha i sáha ya jíin poder yā.

Jñūhun ñayuu yōhyo ndetū jíin ñáyuu jeē xeēn ndoho
(Mt. 5.1-12)

²⁰ Te ni ndacoto ya nuū tēe cáscuáha jíin yá un, te ni cahān yā:

Yōhyo ndetū rohó jēe cándoho ndáhú, chi quivī ró ñuu nuū ndácu Yaā Dios jniñu.

²¹ 'Yōhyo ndetū rohó jēe cájii sōco vijna, chi quiiji quivī jeē ndutú chíji ró.

'Yōhyo ndetū rohó jēe cándahyū rō vijna, chi quiiji quivī jeē cuécú rō.

²² 'Yōhyo ndetū rō te núu cáquitī ni ñayuu nuū rō jeē síquī ruhū, Yaā ní nduu tēe, te cásequéhichī i rōhó, te cácahān neé i nuū rō, te cácahān i jeē ñayuu casáha jniñu neé cácuu ró. ²³ Te na cóo síi ni rō quivī sáha i súcuan, te víhyá gā na cúsi ni rō, chi cáhnu téyí coo tahū rō nde andiví. Chi suni súcuan ni casáha uhū tāca jíi i jíin tēe ni canacani jñūhun Yaā Dios nde jenahán.

²⁴ 'Te nacā jeē xeēn ndoho rōhó ñáyuu cucá, chi vijna-ni cúu jeē cáhiyo síi ni rō.

²⁵ 'Nacā jeē xeēn ndoho rōhó ñáyuu jeē vijna cáhiyo vetū chíji ró, chi quiiji quivī jeē cuu rō sōco.

'Nacā jeē xeēn ndoho rōhó ñáyuu jeē vijna cájecū rō, chi quiiji quivī jeē nducuíhyá ni rō te ndahyū rō.

²⁶ 'Nacā jeē xeēn ndoho tāca ró núu cájejnúhún ñáyuu rohó, chi suni súcuan ni cájejnúhún jíi i tāca tēe ni canacani jñūhun stáhú ndé jenahán.

Jñūhun jeē cundáhú ni yō ñayuu cájito uhū yohó
(Mt. 5.38-48; 7.12)

²⁷ 'Te cáhán rī jíin rōhó jeē cájini sōho: Cundáhú ni rō ñayuu cájito uhū rohó. Te sáha vāha ró jíin ñayuu cáquitī ni nuū rō. ²⁸ Te cacān rō jeē váha coo ñayuu cácahān ndevāha síquī rō. Te cacān tahú rō jehē ñayuu cácahān neé núu rō. ²⁹ Te núu ndé tēe cani de ñin lado yiqui núu rō, te vāha ga suni cuāha ró inga lado cani de, vésú jeē nácuāha ró jēe ndútahū de. Te núu ndé tēe cúní de quende de ticāchi ró, suni cuāha ró jñūhun jeē na quíhín de jíin ndé camisa rō. ³⁰ Te na-ni ñayuu jicán nuū rō, te cuāha ró núu i. Te ñayuu quíhin ndajniñu ró, ma nándacān rō. ³¹ Te nájnūhun cáculi rō jeē sáha vāha ñayuu jíin ró, suni súcuan na sáha vāha ró jíin i.

³² 'Chi núu íyó manī rō jíin máa-ni ñayuu jeē maní jíin ró, ¿te na vé jeē váha ga sáha ró núu súcuan? Chi nde tēe casáha cuēchi, suni manī de jíin tēe manī jíin máa de. ³³ Te núu sáha vāha ró jíin máa-ni ñayuu jeē casáha vāha jíin ró, ¿te na vé jeē váha ga sáha ró núu súcuan? Chi nde tēe casáha cuēchi, suni súcuan casáha de. ³⁴ Te núu cuāha núu ró núu maá-ni ñayuu jeē ñúhun ni rō nacuāha i nuū rō, ¿te na vé jeē váha ga sáha ró núu súcuan? Chi nde tēe casáha cuēchi, suni jéhe núu de nuū tāca gá tēe casáha cuēchi, návāha nanihin tucu de. ³⁵ Núu súcuan te cundáhú ni rō ñayuu cájito uhū rohó, te sáha vāha ró jíin i, te cuāha núu ró núu i. Te ma cuāha ró máa síquī jeē cani ni rō jeē suni nacuāha i nuū rō. Te súcuan te cáhnu coo tahū rō, te stéén rō jeē cácuu ró séhe Yaā kujéhnu téyí. Chi máa yá vāha ni yā jíin ñayuu tu nácuatáhú núu yā jíin ñayuu casáha neé. ³⁶ Núu súcuan te cundáhú ni rō ñayuu, nájnūhun máa Tátá rō cundáhú ni yā i.

Ma cahán yō síquī cuēchi jnáhan yó
(Mt. 7.1-5)

³⁷ 'Ma cahán rō síquī cuēchi ñayuu ndese sáha i, návāha suni ma cahán Yaā Dios cuēchi síquī rō jeē casáha ró súcuan. Ma cahán xeēn rō síquī i jeē tú vāha sáha i, návāha suni ma cahán Yaā Dios súcuan síquī rō. Cone cáhnu ni rō nuū i, te suni cone cáhnu ni yā nuū rō. ³⁸ Cuāha ró núu ñáyuu, te suni súcuan cuāha Yaā Dios nuū rō. Chi vāha ndasí cuáha ya nuū rō, nájnūhun jeē chícuāha váha ya, quisi ya, sánihin ya, te nde scáa ya cuāha ya nuū rō. Chi cūhva jeē cájēhe ró núu ñáyuu, suni cūhva un cuáha ya nuū rō. Achí yá.

³⁹ Te ni cahān yā ñin jñūhun yátá jíin i:

Tēe cástéén jnūhun tú ndaā, cácuu de nájnūhun tēe cuáá. Te ñn tēe cuáá, ¿á cuu stéén de ichi nuū inga tēe cuáá? ¿A tú ningava ndindúú de ini xehvā? ⁴⁰ ñn tēe scuáha, tu cújéhnū de nuū maestro de. Te tēe scuáha ún, núu je ni cutūhva vāha de, te jinū de coo de nájnūhun maestro de.

⁴¹ Te cuēchi jnáhan ró cúu nájnūhun jeē íne ñn yāca lúli tñnūú i. ¿Te naun cásáha ró cuenta jeē súcuan, te tu cásáha ró cuenta cuēchi máá ró jeē cúu nájnūhun jeē íne ñn nduhu tñnūú máá ró? ⁴² ¿Te naun cácahān rō jín jnáhan ró: Condetu, na táva rī yāca íne tñnūú ró, te tu cánacani ni rō jeē íne ñn nduhu tñnūú máá ró? Tēe stáhú-ni cácuu ró núu súcuan. Xihna gā tñnūú máá ró tava rō nduhu, te yūcuán na te cuu condēhe vāha ró jēé táva rō yāca tñnūú jnáhan ró.

Jín jniñu cásáha ñayuu te nácuni yō ndese ñayuu cácuu i
(Mt. 7.17-20; 12.34-35)

⁴³ Tu íyó yujnu vāha jeē jéhe ndehē neé, te ni tu íyó yujnu neé jēé jéhe ndehē vāha. ⁴⁴ Chi jín ndéhē jeē jéhe ñn ñn yujnu, te jíní yō núu yujnu vāha cúu. Chi tu scóyo yó ndehē higo xinī ññu, ni tu scóyo yó ndehē uva xinī yucú zarza. ⁴⁵ Te suni súcuan tēe vāha, cáhán de jnūhun vāha, chi vāha ánuá de. Te tēe sáha neé cáhán de jnūhun neé, chi cánéé ánuá de. Chi modo ndese íyó ánuá ñayuu, máni jeē yúcuan cúu jeē cácahān i.

Siquī uú vehe
(Mt. 7.24-27)

⁴⁶ ¿Najehē cácahān yññuhún ró jín rí: Jitoho ná, áchí ró, te tu cásquicu ró jniñu ndácu rí? ⁴⁷ Tāca ñáyuu vēji nuū rī te jíní sōho jnūhun cáhán rī te squícu, na stéén rī nuū rō ndese cúu i. ⁴⁸ Cúu i nájnūhun ñn tēe jeē ní jeni de vehe de, te ni jete cúnú de nde ni nihín de toto, te ni jeni de siquī. Te nuū ní ndaa yūte, te ni chundahá vehe ún, te tu ní cánda cuiñi sáha, chi siquī toto íñ. ⁴⁹ Te tāca ñáyuu jíní sōho jnūhun cáhán rī, te tu squícu i, cúu i nájnūhun ñn tēe ni jeni de vehe de nuū ññuhun, te tu yítuu jehē. Te nuū ní ndaa yūte, te ni chundahá vehe ún, te ni cotúú-ni, te ni naa íi-ni. Achí yá jín i jínáhan i.

Jeē ní nasávāha ya mozo capitán
(Mt. 8.5-13)

7

¹ Te nuū ni jínu ni cahān yā ni cajini nahín ñáyuu ún, te cuahān yā ññu Capernaum. ² Te ñn tēe nación Roma jeē cúu capitán, íyó ñn mozo de jeē manī ndasí de jín. Te mozo un cúhú i te je yajni cuu i. ³ Te ni jini capitán jnūhun Jesús. Te ni tají de jecu tēe jéhnū cándacu jniñu nuū ñáyuu hebreo, cuangoo de nuū yā jeē cahán ndahú de jín yá jeē na quíji ya sávāha ya mozo de. ⁴ Te ni jinūcoo tēe un núu Jesús, te ni cacahān ndahú ndasí de jín yá:

Chindéé ñáhán ní tēe cúu capitán, chi tēe vāha cúu de. ⁵ Chi manī de jín nación yō, te máá de ni ndacu jniñu ni cuvāha ñn vehe sinagoga cuu yó. Achí de.

⁶ Yūcuán na te cuahān Jesús jín de jínáhan de. Te nuū ní cuyajni ya vehe capitán, te ni tají de jecu amigo de cuajnahān yā. Te ni cacahān de jín yá:

Achí capitán jeē tu cúní de sájneñu de níhín, chi tu cújéhnū de jeē quihín ni quívi ní vehe de. ⁷ Jeē yúcuan tu ní sájéhnū de máá de jeē quíji de nuū ní, áchí de. Te máá jēé cahán-ni ní, te na ndúvāha-ni mozo de, áchí de. ⁸ Chi máá de suni ndíso jniñu de ni casáha tēe cácujeñū ga. Te cújéhnū de nuū tēcá soldado de, áchí de. Te núu cáhán de jín ñn tēe jeē na quíhín de, te cuahān de. Te núu cáhán de jín inga tēe jeē na quíji de, te quíji de. Te núu ndácu de ñn jniñu nuū mozo de, te sáha i, áchí de. Achí táca tēe un jín yá.

⁹ Te jeē ní jini Jesús jnūhun yáha, te ni naa ni yā. Te ni ndió cóto ya ni cahān yā jín ñáyuu cuehē cándiquin yatā yā:

Jendaá cahán rī jíin ró jeē ni nación yō Israel tu ní níhín rī ni ñin ñayuu candíje nīhin súcuan, nájnūhun cándíje tēe ún, vēsú tēe nación tu jíin jnūhun Yaā Dios cúu de. Achí yá.

¹⁰ Te tēe ni tají capitán nuū yā, ni najinūcoo de vehe, te ni cajito de jeē jé ni nduvāha mozo un.

Jeē ní nastécu yā sēhe yí ñahan viuda

¹¹ Yūcuán na te cuahān yā ñin ñuu naní Naín. Te tēe cáscuáha jíin yá, jíin ñayuu cuehē, suni cuango i jíin yá. ¹² Te ná ni cuyajni ya yuñúú ún, te yūcuan ní quendacoo ñayuu jeē quíchindūji i ñin tēe suchí jéē ni jíhī. Te máñúhún-ni i nuū naná i, te ñahan viuda cúu ña. Te cuehē ñayuu ñuu un véjicoo jíin ña. ¹³ Te ná ni jito máá Jítoho yō nuū ña, te ni cundáhú ni yā ña, te ni cahān yā jíin ña:

Ma ndahyú ni, achí yá.

¹⁴ Yūcuán na te ni jinū yā nde nuū ndíyi ún, te ni jniñ ya yejnū, te ni cajecuiñī tēe cándiso ún. Te ni cahān yā jíin súchi ní jihī:

Cahán rī jíin ró, ndocuiñī, achí yá.

¹⁵ Yūcuán na te ni nucōo sūchi ní jihī ún, te ni quejéé i nácahān i. Te ni nacūaha ya i nuū naná i. ¹⁶ Te ndívii ñayuu ni cayūhú i jeē ní cajito i, te ni cacahān i jeē yóhyo vāha Yaā cúu Yaā Dios. Te cácahān i:

Mēhñu yó ni quee ñin tēe cújéhnu nácani jnūhun Yaā Dios.

Te suni cácahān i:

Máá Yaā Dios ni quejéé yá chindéé ñáhán yá ñayuu yā. Achí i.

¹⁷ Te ni jitē núu jnūhun ya ní cáhnu región Judea jíin táca región yajni yūcuán.

Jeē ní tají Juan uū tēe nuū yā

(Mt. 11.2-19)

¹⁸ Te íne Juan vecā, te tēe cáscuáha jíin de ni cacastūhun núu de jeē súcuan ni cuu tācá jniñu yáha. ¹⁹ Te ni cana Juan uū tēe ún, te ni tají de cuango nuū Jesús, návāha cajnūhún de ya núu máá yá cúu ndije Cristo jeē ní cachi Yaā Dios jeē tají yá, chí núu nasūu yá cúu te condetu de inga. ²⁰ Te ni jinūcoo tēe un núu yā, te ni cacahān de:

Juan tēe scuándute ni tají de sãña véjicoo ná cajnūhun ná nihín núu máá ní cúu Cristo jeē achí tutu jeē quíji, chí condetu yó inga tēe quíji. Achí de.

²¹ Te máá hora un ní nasávāha ya cuehē ñayuu cácuñu, jíin ñayuu cándoho cuehyī xeēn, jíin ñayuu ñūhun tachī ini. Te suni cuehē ñayuu cuaá ní ndundijin tinūú i ni sáha ya. ²² Te ni cahān yā jíin de:

Cuángoo te castūhun ró nuū Juan tācá jniñu ni cajito ró jíin jnūhun ni cajini ró. Te cachi rō nuū de jeē ñayuu cuaá cánanune tinūú i, te ñayuu yacuá cánacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jihí nátecu i sáha ri. Te suni nácani ri jnūhun nuū ñayuu ndahú jéē jnama Yaā Dios i. ²³ Te yóhyo ndetū tēe jeē ma nácani yátá ni de jeē ruhū cúu Cristo. Súcuan cachi rō nuū Juan. Achí yá jíin de.

²⁴ Te ná cuanuhun ndindúú tēe ún, te ni quejéé Jesús cahán yā jnūhun Juan jíin ñayuu:

¿Na vé ni jécondēhe ró jijnáhan ró ndé nuū ñūhun téhé? ¿A ñin tēe jéni ñin jéni uū ni, nájnūhun ite jeē cánda sáha tachī? ²⁵ Te núu tuú, ¿te na vé ni jécondēhe ró núu súcuan? ¿A ñin tēe cúni cújéhnu jeē ñūhun sahma lúu? Tuú chí cájini rō jeē tēe cáñuhun sahma lúu te cánducú tāca jéē cúsiñi ni, máni ini vehe rey cáyucú de. ²⁶ ¿Te na vé ni jécondēhe ró núu súcuan? ¿A ñin tēe nácani jnūhun Yaā Dios? Cahán rī jíin ró jeē suu ni jécondēhe ró. Te cújéhnu ga Juan yáha vēsú tāca gá tēe ni canacani jnūhun Yaā Dios. ²⁷ Chi jnūhun Juan cúu jeē ni cáhān Yaā Dios jeē yosó núu tútu i:

Tají rí tēe nacani jnūhun ri cosnūú de ichi núu Cristo, návāha coo tūhva ñayuu jeē jinú yā.

Achí Yaā Dios, achí tutu. ²⁸ Te cáhān rī jíin ró jeē ini ñayīvi yáha cújéhnu ga Juan tēe scuándute vēsú tāca gá tēe jeē ni íyo ini ñayīvi. Te vēsú súcuan te tāca tēe núu ga ini ñuu nuū ndácu Yaā Dios jniñu, cújéhnu ga de vēsú Juan. Achí yá.

²⁹ Te tāca ñáyuu jíin táca tée cástútú xúhun renta, ni cajini i jnūhun cáhán yā, te ni cajetáhú i jeē Yaā ndaā cúu Yaā Dios, chi je ni cajendute i nuū Juan. ³⁰ Te tēe grupo fariseo jíin tēe cástéén tutu ley, ni casquéhichī de jnūhun jeē cuní Yaā Dios sáha ya jeē váha de, chi tu ní cájendute de nuū Juan. ³¹ Te ni cahān gā maá Jítóho yō:

Yāhá cachi rī ñin jnūhun yátá návāha na cúní rō ndese cúu ñayuu tiempo vijna. ³² Cúu i nájñūhun sūchi lúli cáhīn nuū yáhu cácasíquf i. Te cácana ndee i xinī jnáhan i: Ni cativi rī scuilí, te tu ní cájita jéhé ró. Te ni cajita ri yaa jeē cuihyá jíta, te tu ní cándaHyū rō, achí i. Te nájñūhun cándaā sūchi lúli un jéē tu ní núnahān ni i ni ñin, suni súcuan cándaā ró. ³³ Chi ni quiji Juan tēe scuándute, te cuehē jínu ni iyo ndite ni de, tu ní yéji de staā ni tu ní jíhi de vino. Te tu ní cánujnahān ni rō, chi ni cacahān rō jeē ñūhun tachī ini de. ³⁴ Yūcuán na te ni quee máá rí, Yaā ní nduu tēe, te yéji rī jíhi ri, te tu cánujnahān ni rō, te chísóó jnúhun ró cácahān rō jeē máni máá jéē yéji rī jíhi ri vino. Te quíjnāhan ri jíin tēe cástútú xúhun renta jíin táca gá tēe cásaHa cuēchi, achí ró. ³⁵ Te núu cúndíchí ñin tēe jíin jnúhun Yaā Dios, te jíin jniñu sáha de te cájini tāca gá tēe ndíchí jeē ndíchí de. Achí yá.

Jeē íne Jesús vehe Simón tēe fariseo

³⁶ Te ñin tēe fariseo ni cana de Jesús jeē cáji yā staā jíin de. Te ni jinū yā vehe de, te ni cucōo ya mesa jeē cáji yā staā. ³⁷ Yūcuán na te ñin ñahan sáha cuēchi, ndéé ña ñuu yúcuān, te ni jini ña jeē ni jínu Jesús vehe tēe fariseo un, yéji yā staā. Te ni quee ña jíin ñin frasco yuū luu jeē ñūhun chitú aceite perfume. ³⁸ Te ñin yítí ña nuū jehé yā, te ndáhyú ña. Te ni quejéé ña stáji ña jehē yā jíin ndute tñúú ña, te ni nasíchí ña jíin ixi xíní ña. Te ni techūhú ña jehē yā, te ni chuhun ña perfume un. ³⁹ Te tēe fariseo un jeē ní cana de ya, ni jito de jeē súcuan ni sáha ña, te ni jeni ni de: Núu tēe nácani jnūhun Yaā Dios cúu tēe yáha, te cuni de ndese ñahan cúu ñahan yáha jeē quehé ña de, chi ñahan sáha cuēchi cúu ña, jéni ni de. ⁴⁰ Yūcuán na te ni cahān Jesús jíin de:

Simón, cúní rī cahān rī jíin ró ñin jnūhun.

Te ni cahān maá de:

Cahān ní, Maestro.

⁴¹ Te ni cahān Jesús:

Ñin tēe jéhe núu xūhún, ni iyo uū tēe táú nuū de. ñin de ni cotaū uhūn ciento denario, te ñnga de ni cotaū uū xico uxī denario. ⁴² Te tú na vé cánevāha tēe un jéé náchunaa de. Te tēe jéhe núu xūhun ní ine cáhnu ni de nuū ndíndúú tēe ún. Núu súcuan te cachi rō: Jeē ndíndúú tēe ún, ¿ndé ñin de coo maní gā jíin de? Achí yá.

⁴³ Te ni cahān Simón:

Jéni ni na jéé tēe ni cotaū cuehē gā, achí de.

Te ni cahān yā jíin de:

Ndaā cahán rō, achí yá.

⁴⁴ Te jító ya nuū ñahan ún, te ni cahān gā yā jíin Simón:

¿A jító ró na vé sáha ñahan yáha? Jeē ní quee rī vehe ró, te tu ní jéhe ró ndute jeē ndúndoo jehē rī nájñūhun íyó costumbre. Te ñahan yáha ní stáji ña jehē rī jíin ndute tñúú ña, te ni nasíchí ña jíin ixi xíní ña. ⁴⁵ Te tu ní téchūhu ró ruhū nájñūhun íyó costumbre. Te ñahan yáha, nde jeē ni quívi ri vehe ró, tu jécuiñī ña jeē téchūhú ña jehē rī. ⁴⁶ Te tu ní chúhun ró aceite xinī rī nájñūhun íyó costumbre. Te ñahan yáha ní chuhun ña aceite perfume jehē rī. ⁴⁷ Núu súcuan te cáhán rī jíin ró jeē ni stéén ña jeē yóhyo maní ña jíin rí síquī jeē íne cáhnu ni rī nuū tāca cuéchi ña, vésú cuehē cúu. Te núu cone cáhnu ni rī nuū ñin ñayuu iyó jecu-ni cuéchi, te jecu-ni stéén i jeē maní i jíin rí, achí yá.

⁴⁸ Te ni cahān yā jíin ña:

Je íne cáhnu ni rī nuū tāca cuéchi ró, achí yá.

⁴⁹ Yūcuán na te ñayuu cáyeji staā jíin yá, ni quejéé i cácahān maá i:

¿Ndé ñin ga cúu tēe yáha jéé cahán jeē íne cáhnu ni nuū cuéchi? achí i.

⁵⁰ Te Jesús ni cahān gā yā jíin ñahan ún:

Ni candíje ró rúhū, te jeē yúcuān ní jnama ri rohó. Cuáhán te na ndúsñi ni rō. Achí yá.

Jnūhun ñahan ní cajejñiñu nuū yā

8

¹ Yūcuán na te ni cuu jecu quivī, te ni jica cuu Jesús tācá ñuu náhnu jíin ñuu lulí. Te nácani ya jnūhun vāha te cástūhun yá ndese ndácu Yaā Dios jniñu. Te ndihúxí uū tēe cácuu apóstol, cájica de jíin yá. ² Te suni íyó jecu ñahan cájica jíin yá, jeē ní quenehen ya tachī ini sava ña, te ni nasávāha ya sava ña jeē cándoho cuehyī. Te ñin ña cúu María ñuu Magdala, te ini ñahan un ní quenehen ya uxā tachī. ³ Te inga ña cúu Juana, ñasiñí Chuza, tēe ndíso jniñu ini vehe Herodes. Te inga ña cúu Susana, jíin cuéhē gā ñahan jeē cáchindéé ñáhán ña, jéhe ña tāca jéé jíni ñúhún yá jíin de jíjnáhan de.

*Jnūhun yátá síquī tēe jéte trigo**(Mt. 13.1-9; Mr. 4.1-9)*

⁴ Te cuéhē ñayuu tācá ñuu yūcuan ní jinūcoo i nuū Jesús. Te ni cacutútú cuéhē ndasí ñáyuu, te ni cahān yā ñin jnūhun yátá jíin i:

⁵ ñin tēe cate trigo, ni quenda de jeē cáte de. Te ná ni quejéé de jéte de, te jecu trigo ni jité yuhíchi. Te ni cajeñū ñayuu síquī, te ni cajeji saa. ⁶ Te jecu gā ni jité nuū ñúhun yuū. Te ni cane, te ni ichī-ni, chi tú cuéhē cajin. ⁷ Te jecu gā ni jité nuū náne iñu. Te inuú-ni ni canecoo iñu jíin, te ni jesi nuū. ⁸ Te jecu ni jité nuū ñúhun vāha. Te nuū ní jehnu, te ni jéhe cuéhē nuni, chi jeē ñin ñin ni jéhe nde ciento. Achí yá.

Yūcuán na te ni cahān jee ya:

Tāca róhó jéé jíni sōho, na chúsóhó ró, achí yá.

*Najehē cahán yā máni jnūhun yátá**(Mt. 13.10-17; Mr. 10-12)*

⁹ Te tēe cáscuáha jíin yá ni cacajñuhún de ya na vé cuní cahān jnūhun yátá yáha. ¹⁰ Te ni cahān yā:

Róhó jíjnáhan ró, chi sáha Yaā Dios jeē cájecūhun ni rō jnūhun ni yisāhi yáha, ndese quívicoo ñayuu ndaha Yaā Dios jeē ndacu ya jniñu nuū i. Te máni jíin jnúhun yátá cáhán rī jíin sava ga i, návāha vésú cájito i, te quéndōo i nájnūhun jeē tú na vé ni cájito i. Te vésú cájini sōho i, te ma jécūhun ni i.

*Jeē ní castūhun cájī yá jnūhun yátá tēe jéte trigo**(Mt. 13.18-23; Mr. 4.13-20)*

¹¹ Jnūhun yátá yáha cuní cahān: Trigo un cúu jnūhun Yaā Dios. ¹² Te trigo jeē ni jítē yuhíchi cúu nájnūhun ñayuu cájini sōho jnūhun, te quíji-ni jexeén te quénde-ni jnūhun ini anuá i, návāha ma candíje i te ma jnáma ri i. ¹³ Te trigo jeē ni jítē nuū ñúhun yuū cúu nájnūhun ñayuu cájini jnūhun, te cájetáhu i te cácusī ni i jíin. Te tu cúcutú jnúhun ún ini anuá i. Te jecu-ni quivī cácandíje i, te núu ni quejéé jnúndóho, te cájica yátá i. ¹⁴ Te trigo jeē ni jítē nuū náne iñu cúu nájnūhun ñayuu cájini jnūhun, te cuango i te cácuñéñu i jíin jniñu i jíin jéé cuní i cucúcá i te coo sī ni i. Te tu íje i jíin jnúhun ya. ¹⁵ Te trigo jeē ni jítē nuū ñúhun vāha cúu nájnūhun ñayuu cájini nahín jnúhun ya, te cájniñ vāha i, chi íyó vāha íyó ndāā anuá i. Te cáhije i jíin jnúhun ya, chi cácandíje vāha i.

*Jnūhun yátá síquī lámpara**(Mr. 4.21-25)*

¹⁶ Núu nástñin ñayuu ñin lámpara, te tu jési i ni ñin síquī, ni tu jéni i chíji jito. Chi sa suhva jéni i nuū sucún, návāha cundijin nuū ñáyuu quívicoo vehe. ¹⁷ Te suni súcuan tu íyó ni ñin jnūhun sāhi jéé ma cuní ñayuu, chi ndíhi tāca jnúhun cácahān i nane ndijin te cuni ñayuu.

¹⁸ Núu súcuan te na cuní sōho vāha ró, chi ñayuu je jécūhun ni, stéén gā yā nuū i. Te ñayuu tu cándíje, máá jecu jeé jéni ni i jeé jíni i, sa suhva naa. Achí yá.

*Náná yā jíin ñani yā**(Mt. 12.46-50; Mr. 3.31-35)*

¹⁹ Yūcuán na te ni quee naná yā jíin táca ñani yā nuū íne ya. Te tu ní cúu quīvicoo ña nuū yā siquī jeē chitú ñayuu. ²⁰ Te ñin ñayuu ni castūhun núū yā:

Náná ni jíin táca ñani ni cáhīin nuū quehe, te cácuni cahān jíin ní, áchí i.

²¹ Te ni cahān maá yá:

Suni náná rī jíin ñani rī cácuu ñayuu cájini sōho jnūhun Yaā Dios te cásquicu i, áchí yá jíin i.

Jeē ní jecuiñī tachī níhin jíin mar ni sáha ya

(Mt. 8.23-27; Mr. 4.35-41)

²² Te ñin quīvī ni quīvī ya ñin barco jíin tée cáscuáha jíin yá, te ni cahān yā jíin de:

Na yáha yó quīhīn yō inga lado mar.

Te ni cascáca de barco cuangoo de. ²³ Te níni cáscáca de barco, te ni quixī yā. Te ni jequīhi ñin tachī níhin nuū mar, te je yajni chitú ndute ini barco, te ndúcú quee barco.

²⁴ Te ni castóna de ya, te ni cacahān de:

Maestro, Maestro, vijna te quēe yó chíji ndute te naa yō, achí de.

Te ni ndocuiñī-ni ya, te ni cahān yā nuū tachī níhin jíin núū mar. Te ni cajecuiñī-ni, te ni cuu nayúú íi-ni. ²⁵ Te ni cahān yā jíin tée cáscuáha jíin yá:

¿Naun tu cácañíje ró?

Te maá de yōhyo ni cayūhú de, te cánaa ni de, te cácahān de jíin jnáhan de:

¿Ndé ñin ga cúu tēe yáha jéé nde nuū tachí níhin jíin núū ndúte ndácu de jniñu te cájetáhú jéé cahān de? Achí de.

Tēe Gadara jeē ndóho tachī

(Mt. 8.28-34; Mr. 5.1-20)

²⁶ Yūcuán na te ni cane ya jíin de región Galilea, te cuahān yā región Gadara jeē íne inga lado mar Galilea. ²⁷ Te nuū ní nanuu ya nuū ñūhun íchi, te ñin tēe ñuu un ní quee de nuū yā. Te je ni cuu cuehē cuiyā ñūhun cuehē tachī ini de. Te tu ñūhun cuiti de sahma, ni tu ndéé de vehe, chi sa suhva nuū cáyindūji ndīyī ndéé de. ²⁸ Te ná ni jito de nuū Jesús, te ni jecuiñī yití de nuū yā, te ni cana cóhó de:

¿Naun vēji ní núū ná, Jesús Sēhe Yaā cujéhnū téyí? Cáhan ndahú ná jíin ní jeē ma stóho ní sáña, áchí de.

²⁹ Súcuán ni cahān de, chi je ni ndacu ya jniñu nuū tachí un jéé na quéndacoo ini de. Te ni cuu cuehē jínu sáha xeēn tachī jíin de. Te cájihni ñayuu ndaha de jehē de jíin cadena, návāha tú na vé sáha de. Te ndīhi-ni jéhnde de, te jínu de jéhén de nde nuū ñūhun téhé sáha tachī ún. ³⁰ Te Jesús ni cajñūhun yá de:

¿Na vé naní ró?

Te ni cahān de:

Legión naní ná.

Súcuán ni cahān de jeē naní de, chi ñūhun cuehē tachī ini de. ³¹ Te ni cacahān ndahú táchī un jíin yá jeē ma tají yá quīhīn ini tūhnchi cúnú. ³² Te yucu yúcuán cáhīin cuehē quīñī cájitu tī. Te tachī jeē cáñuhun ini tēe un ní cacahān ndahú jíin yá jeē na cuáha ya jñūhun quīvicoo ini quīñī ún. Te ni jēhe ya jñūhun. ³³ Te ni quendacoo tachī ún ini tēe ún, te ni quīvicoo ini quīñī. Te quīñī un ní cajinu tī ni níngoo tī ñin yucáva, ni quīvicoo tī nuū mar, te ni ndaquīhi tī ndute, ni cajihī tī.

³⁴ Te tēe cándito tī ni cajito de jeē súcuán ni cuu, te ni cayūhú de. Te ni cajinu de cuacastūhún de nuū ñayuu ñuu un jíin ñayuu táca rancho. ³⁵ Te cuangoo ñayuu un cuácondēhé i na vé ni cuu. Te ni jinūcoo i nuū íne Jesús. Te ni cajito i nuū tée ní quendacoo tachī ini, néne de nuū jehé Jesús, te ñūhun de sahma, te je ni nducájí xínī de. Te ni cayūhu ñayuu ún. ³⁶ Te tēe ní cajito ni canacani de jñūhun nuū ñayuu, ndese ni nduvāha tēe ni ñuhun tachī ini.

³⁷ Yūcuán na te táca ñayuu ní región Gadara, ni caquejéé i cácahān ndahú i jíin yá jeē na cújiyo ya quīhīn yā, chi yōhyo cáyūhú i. Te ni ndīvī ya ini barco jeē quīñuhun yā. ³⁸ Te tēe jeē ní quendacoo tachī ini, ni cahān ndahú de jíin yá jeē na cuáha ya jñūhun quīhīn de jíin yá. Te Jesús ni cahān yā jeē na quéndōo de, te áchí yá:

³⁹ Cuánuhun vehe ró, te nacani ró jnúhun ndese yōhyo jéhnú jniñu ni sáha Yaā Dios jíin ró, achí yá jíin de.

Te cuahān de, te ni nacani de jnúhun nḥ́ ñuu ún, ndese yōhyo jéhnú jniñu ni sáha Jesús jíin de.

Jnúhun sēhe sḥ́ Jairo jíin ñahan ní quehé yusáhma ya
(Mt. 9.18-26; Mr. 5.21-43)

⁴⁰ Te nuū ní najinū Jesús inga lado mar, te ñayuu un ní cacusiñi ni i jeē ní najinū yā, chi ndihí i cándetu i ya. ⁴¹ Te ni quee ñin tēe cújéhnú ini vehe ñi sinagoga, naní de Jairo. Te ni jecuiñi yití de nuū jehé yā, te ni cahān ndahú de jíin yá jeē na quihín yā jíin de vehe de. ⁴² Chi íyó ñin sēhe sḥ́ de jeē mañúhún-ni i nuū de, te íyó i nájñuhun uxí uū cuiyā. Te sūchí un je yajni cuu i. Te cuahān yā jíin de. Te cuehē ñayuu cándiquin i ya, te ni chitú ñihin i xiin ya cuangoo i.

⁴³ Te mēñu ñayuu un cuahān ñin ñahan cúhú jeē ní cuu uxí uū cuiyā ndóho ña cuehyi ñiñi. Te ni jexin ña tāca jēe névāha ña jíin tēe tájna, te tu ní nduvāha ña sáha ni ñin de.

⁴⁴ Te ni quee ña ichi yátá yā, te ni quehé ña yusáhma ya. Te ni jecuiñi-ni ñiñi ña.

⁴⁵ Yūcuán na te ni cahān Jesús:

¿Ndé ñin ni quehé sahma ri? achí yá.

Te ndivii i ni cacahān jeē tu ní quehé i. Te Pedro jíin tēe cáhiin jíin de, ni cacahān de: Maestro, jíto ní jēe ñayuu cuehē yāha ní chitú ñihin i xiin ní, te cáquñi i ñihín, te cájñuhun ní ndé ñin ni quehé sahma ní.

⁴⁶ Te ni cahān Jesús:

Tuú chi ñin ñayuu ni quehé sahma ri, chi ni jini rī jeē jíin fuerza rī ni nduvāha ñin ñayuu, achí yá.

⁴⁷ Te ni jini ñahan un jēe tu ní cúu coo yuhu jeē ni sáha ña. Te quisi i ña ni quee ña, te ni jecuiñi yití ña nuū jehé yā. Te jíto jínúu tāca ñayuu, te ni cachi cají ña najehē ni quehé ña yusáhma ya, jíin jēe ní nduvāha-ni ña. ⁴⁸ Te ni cahān yā jíin ña:

Séhē, ni candíje ró jēe cuu nasávāha ri rohó, te jeē yúcuan ní nduvāha ró. Cuahán te na ndúsi ni rō, achí yá.

⁴⁹ Te níni cáhán gā yā súcuan, te ni quee ñin tēe vēji vehe Jairo, tēe cújéhnú ini sinagoga, te ni cachi nuū de:

Je ni jihí sēhe sḥ́ ní. Te ma sájnēñu ga ní Maestro, achí de.

⁵⁰ Te ni jini Jesús jnúhun yáha, te ni cahān yā jíin Jairo:

Ma yūhu ró, chi candíje-ni ró, te nastécu rī sēhe ró, achí yá.

⁵¹ Te ni jinū yā vehe, te tu ní jēhe ya jnúhun quivi ñayuu jíin yá, chi máa-ni Pedro jíin Juan jíin Jacobo jíin tátá naná sūchi sḥ́ un. ⁵² Te cácuquíyá ni ndihí ñayuu cáyucú ini vehe, te cándahyū i jehē sūchí un. Te ni cahān yā:

Ma ndahyú rō jijnáhan ró. Tu ní jíhí i, chi quixí-ni i, achí yá.

⁵³ Te ni cajecū catá i jeē ni cáhán yā, chi cájini i jeē ni jíhí sūchi sḥ́ un. ⁵⁴ Yūcuán na te ni jñi ya ndaha i, te ni cahān jee ya jíin i:

Sḥ́, ndocuiñi, achí yá.

⁵⁵ Te ni natecu i, te ni ndocuiñi-ni i. Te ni ndacu ya jniñu jeē na cuáha ña jeē cáji i.

⁵⁶ Te tátá i náná i yōhyo ni canaa ni de cájito de. Te ni ndacu ñihin ya jniñu nuū de jeē ma cáchi de nuū ni ñin jeē súcuan ni cuu.

Jeē ní tají yá ndihúxí uū de cuanacani de jnúhun
(Mt. 10.5-15; Mr. 6.7-13)

9

¹ Te ni nastútú yá ndihúxí uū tēe cáscuáha jíin yá, te ni sáha ya jeē cóndiso jniñu de te coo poder de jeē quénehen de tachí ini ñayuu, jíin jēe nasávāha de ñayuu cácuñu. ² Te ni tají yá de quingoo de jeē nácani de jnúhun ndese ndácu Yaā Dios jniñu, jíin jēe nasávāha de ñayuu cácuñu. ³ Te ni cahān yā jíin de:

Ma cóndiso ró jéē cuajníñu ró ichi, ni vara, ni ñunu, ni staā, ni xūhún. Te quihín rō jíin ñn-ni camisa, te ma cóndiso ró inga. ⁴ Te na-ni vehe núu ni quívicoo ró, te yūcuán coyūcu ró nde quenda tucu ró quíhín rō inga ñuu. ⁵ Te núu ñn ñuu tu cájetáhú i róhó, na quéndacoo ró yūcuán, te scóyo ró tícachā jehē rō, te súcuán stéén rō jeē iyó cuéchi i jeē tu ní cájetáhú i. Achí yá.

⁶ Te ni quendacoo de cuahān de, ni cajica nuu de tācá ñuu, ni canacani de jnūhun jnáma Yaā Dios ñayuu. Te tāca lado ni canasávāha de ñayuu cácuñū.

Jeē ni jíhī Juan tēe scuándute

(Mt. 14.1-12; Mr. 6.14-29)

⁷ Te Herodes, tēe cúu gobernador, ni jini jnūhun de tācá jniñu sáha Jesús. Te ni cunéé ni de, chí cájeni ni sava ñayuu cácahān i jeē Juan ni natecu de. ⁸ Te sava ga i cácahān jeē ní nane Elías, tēe ni nacani jnūhun Yaā Dios nde jenahán. Te sava ga i cácahān jeē inga tēe ni nacani jnūhun ya nde jenahán, ní natecu de. ⁹ Te ni cahān Herodes:

Juan chí ni ndacu ri jniñu ni tahndē xinī. Núu súcuán ¿te ndé tēe cúu tēe yáha jeē jíni jnūhun ri jeē sáha de jniñu jéñu? Achí de.

Te ni nducú Herodes modo coto de nuū Jesús.

Jeē ni scáji yā uhūn mil tēe

(Mt. 14.13-21; Mr. 6.30-44; Jn. 6.1-14)

¹⁰ Te ni ndecoo tēe cácuu apóstol jeē ní tají yá ni canacani jnūhun. Te ni cacachi de nuū yā tācá jniñu ni casáha de. Te ni jeca ya de cuahān sñn ya jíin de ñn lugar nuū tú ñayuu, yajni ñuu Betsaida. ¹¹ Te ni cajini ñayuu, te suni cuangoo i. Te ni jetáhú yá i, te ni nacani ya jnūhun ndese ndácu Yaā Dios jniñu, te ni nasávāha ya ñayuu cácuñū.

¹² Te nuū cuáhini, te ni quecoo ndihúxí uū tēe cáscuáha jíin yá, te ni cacahān de jíin yá:

Tají ní ñayuu cuehē yāhá na quíngoo i tācá ñuu jíin táca rancho yajni yāhá, te nducú i nuū ndóo i te cuaan i jeē cáji i, chí tú na vé iyó yáha, áchí de.

¹³ Te ni cahān yā jíin de:

Cuāha máá ró jeē cáji i, áchí yá.

Te ni cacahān de:

Tú na vé cánevāha ná, chí uhūn-ni staā jíin úū-ni chācá. Te vēsú núu quicuaan ná stāā caji ndihí ñayuu cuehē yáha, te ni ma cúu, áchí de.

¹⁴ Chí íyó nájñūhun uhūn mil tēe. Te ni cahān yā jíin tēe cáscuáha ún:

Cahān jíin ñayuu na cúcōo sñn cincuenta cincuenta i, áchí yá.

¹⁵ Te súcuán ni casáha de, te ni cacucōo ndihí ñayuu. ¹⁶ Te ni quihin ya ndihúhún staā jíin úū chācá un, te ni ndacoto ya ichi ándiví, te ni nacuatáhú yá. Te ni tahu cuéchi yá staā ún, te ni jēhe ya nuū tēe cáscuáha jíin yá, te ni casaja de nuū ñayuu cuehē. ¹⁷ Te ndivii i ni cayeji, te ni candutú chíji i. Te ni canastútú de pedazo staā jeē ní quendōo, te ni chitú úxí uū jīca.

Jeē ní cahān Pedro jeē Jesús cúu Cristo

(Mt. 16.13-19; Mr. 8.27-29)

¹⁸ Te ñn quivī ni cusñn Jesús, jícan tahu yā, te máá-ni tēe cáscuáha un cáhiin de jíin yá. Te ni cajñūhun yá de:

Ruhū, ¿ndé ñn cúu ri cácahān ñayuu? achí yá.

¹⁹ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jnūhun Yaā Dios nde jenahán. Te sava ga i cácahān jeē inga tēe ni nacani jnūhun ya ni natecu de.

²⁰ Yūcuán na te ni cajñūhun yá de:

Te máá ró, ¿ndé ñn cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

Jeē ní castūhún Jesús jeē cúū yā

(Mt. 16.20-28; Mr. 8.30-9.1)

²¹ Yūcuán na te ni ndacu nīhin ya jniñu nuū de jeē ma cáchi de jnūhun yáha núū ní ññayuu. ²² Te ni cahān yā:

Maá rí, Yaā ní nduu tēe, cánuú ndoho xeēn rī. Te tāca tēe jéhnū jíín sūtū cácujehnū jíín tēe cástéén tutu ley, squéhichī de ruhū. Te cahni de ruhū, te nuū uní quivī te natecu rī, achí yá.

²³ Yūcuán na te ni cahān yā jíín ndīhi de:

Na-ni ññayuu núu cúní i condiquīn i ruhū, na cási i jeē cuní maá i, te na condiquīn i ruhū tāca quivī, te cuāha i jnūhun ndoho i jnūndóho jeē siquí rī, vēsú na cúū i. ²⁴ Chi núu ndé ññayuu cuní i cācu i nuū jnūndóho quiiji nuū i jeē siquí ruhū, núu súcuan te jnahnū ndetū i ní cáni. Te núu ndé ññayuu, vēsú na cúū i jeē siquí ruhū, te cotecu i ní cáni. ²⁵ ¿Chi ndé cuajniñu vēsú na cúndeyí ññayuu nīhin i ní ññayiví, te núu squiví i maá i nuū jnahnū ndetū i ní cáni? ²⁶ Chi núu na-ni ññayuu cúcanu i jeē siquí ruhū, Yaā ní nduu tēe, jíín siquí jnūhun cáhān rī, suni súcuan cucanu rī jeē siquí maá i, quivī ndíji ri. Te quivī ún chi yōhyo luu cujéhnū ri, nájnūhun cújéhnū Tátá rī, te suni cácujehnū ndajéhé ndoo ya sáha ya. ²⁷ Te jendaá cahān rī jíín ró jeē sava tēe cáhiin yāhá, ma cúū de chi nde cuni de jeē ndácu Yaā Dios jniñu jíín poder yā. Achí yá.

Jeē tucu ni nduu ya

(Mt. 17.1-8; Mr. 9.2-8)

²⁸ Yūcuán na te nájnūhun nuū uná quivī jeē ni cáhān yā jnūhun yáha, te ni caa ya ññayuu, cuacacān tahu yā. Te Pedro jíín Jacobo jíín Juan cuangoo de jíín yá. ²⁹ Te níni jíicán tahu yā, te tucu ni nduu nuū yā, te sahna ya ni nducujín quiyi, te ndíndē. ³⁰ Yūcuán na te ni canecoo uū tēe, cándajnūhún de jíín yá. Te cúu de Moisés jíín Elías, tēe ni cahīyo jenahán. ³¹ Te luu ndíndē de cáhiin de, te ni cacahān de jíín yá siquí jeē ní cuyajni cuu yā ññuu Jerusalén. ³² Te Pedro jíín tēe cáyūcu jíín de, yōhyo cájii de māhná, te vēsú súcuan te tu ní cáquixi de. Te ni cajito de jeē lúu ndíndē yá jíín ndíndúú tēe cáhiin jíín yá. ³³ Te nuū ní cacujiyo tēe un núu yā, te ni cahān Pedro jíín yá:

Maestro, nacā jeē váha jeē cáhiin ná yáha. Te na sáha ná únī vehe ramada, ññayuu máá ní, inga cuu Moisés, te inga cuu Elías, achí de.

Te tu sáha de cuenta na vé cúu jeē cahān de. ³⁴ Te níni cáhān de súcuan, te ni quee vicō nūhun ní jesi nuū de jíínáhan de. Te ni cayūhú de jeē cáhiin de chíji vicō ún. ³⁵ Te nuū vicó un ní cahān ññayuu:

Yáha cúu Sēhe ri jeē maní ndasí rí jíín. Te na cúní nahín ró jnūhun cáhān yā, achí.

³⁶ Te nuū ni jínu ni cahān jnūhun ún, te maá ññayuu na Jesús íin ya nuū de. Te maá de tu ní cácahān cuiti de, te tāca quivī ún tu ní cácachi de nuū ni ññayuu jeē súcuan ni cajito de.

Jeē ní nasávāha ya ññayuu sūchi ññayuu tachī ini

(Mt. 17.14-21; Mr. 9.14-29)

³⁷ Te inga quivī un ní nanuu ya yucu jíín de. Te cuehē ññayuu ni jejnahan i ya. ³⁸ Te mēhñu ññayuu cuehē un ní cana jee ññayuu tēe:

Maestro, jíicán tahu na núu ni jēe condēhe ní sēhe yíí ná, chi máñuhún i nuū ná. ³⁹ Te máni jeē sáha xeēn tachī jíín i, te cána cóhó i sáha, te jéhnū yíhí i, te jēe tiñū yuhu i. Te yōhyo stóho i, te yōhyo uhū siaá i. ⁴⁰ Te ni cahān ndahú ná jíín tēe cácuáha jíín ní jeē na quénehen te tachī ún, te tu ní cúu sáha de, achí de.

⁴¹ Te ni cahān yā jíín de jíínáhan de:

Ññayuu yōhyo níni ni cácuu ró, chi tu cácuandíje ró jēe cuu nduvāha i. ¿Nasaa ga quivī condee rī jíín ró jeē cuándeyí ni rī jíín ró? Cuáquihin sēhe ró na quíji i, achí yá.

⁴² Te níni véji i nuū yā, te ni cotúu i ni sáha tachī, te ni jehni yíhí i. Te Jesús ni cahān xeēn yā nuū tachí un, te ni nasávāha ya sūchí un, te ni nacuvāha ya i nuū tatá i. ⁴³ Te ndivii ññayuu nahán ní canaa ni i cájito i jeē yōhyo jéhnū jniñu sáha Yaā Dios.

Jeē ni cāhān tucu ya jeē cúu yā
(Mt. 17.22-23; Mr. 9.30-32)

Te níní cánaa ni i cájito i tǎcá jniñu ni sáha Jesús, te ni cahān yā jíin tée cáscuáha jíin yá:

⁴⁴ Chuhun vāha ni rō jnūhun cāhān rī yāhá, te ma náā ni rō, chi ruhū, Yaā ní nduu tēe, nastúu i ruhū quívi ri ndaha tāca tēe xeēn, achí yá.

⁴⁵ Te tu ní cájecūhun ni de jnūhun cāhān yā, chi tu ní cúu cuiti jecūhun ni de. Te ni cayūhú de cajnūhún de ya siquī jnūhun ni cahān yā.

Ndé ñáyuu cúu jeē kujéhu ga
(Mt. 18.1-5; Mr. 9.33-37)

⁴⁶ Yūcuán na te tēe cáscuáha jíin yá ni caquejé de cácahān de siquī núu ndé ñin de kujéhu ga. ⁴⁷ Te Jesús ni jini yā jeē súcuan cájeni ni de. Te ni jniñi ya ndaha ñin sūchi lúlí, te ni jeni ya i xiin ya. ⁴⁸ Te ni cahān yā jíin de:

Na-ni ñayuu núu jeē siquí ruhū jetáhú i sūchi lúlí yáha, te ruhū jetáhú i. Te ñayuu jetáhú rúhū, suni jétáhú i Yaā ní tají rúhū vēji ri. Te ñayuu núu ga mēhñu ró, máá i kujéhu ga, achí yá.

Ñayuu tu cāhān siquī yā, ñin i jíin yá
(Mr. 9.38-40)

⁴⁹ Yūcuán na te ni cahān Juan:

Maestro, ni cajito ná ñin tēe jeē jíin síhví ní quénehen de tachí ini ñayuu. Te ni cajesi na jéē sáha de, chi tu jíca de jíin yó, achí de.

⁵⁰ Te ni cahān Jesús jíin de:

Ma cási rō jeē sáha de, chi tēe tu cāhān siquī yō, ñin de jíin yó, achí yá.

Jeē ni cāhān yā nuū Jacobo jíin Juan

⁵¹ Te ni cuyajni quívi jeē quínuhun yā andívi, te ni tee téyí ni yā jeē quihín yā ñuu Jerusalén. ⁵² Te ni tají yá sava tēe yósnúu de jíin jnūhun jeē jinú yā. Te cuangoo de ñin ñuu Samaria návāha nducú de nuū ndóo ya. ⁵³ Te ñayuu Samaria un tu ní cájēhe i vehe ndóo ya, chi ni cajini i jeē ndé Jerusalén quihín yā. ⁵⁴ Te Jacobo jíin Juan, tēe cáscuáha jíin yá, ni cajini de jeē súcuan cúu, te ni cacahān de jíin yá:

¿A cúní ni jéē ndácu yó jniñu quiñi ñuhūn nde andívi, nájñuhun ni sáha Elías, návāha naa ñayuu yáha? Achí de.

⁵⁵ Yūcuán na te ni ndió cóto Jesús nuū de, te ni cahān yā nuū de:

Tu cájini rō na nuū vēji jnūhun cácahān rō. ⁵⁶ Chi ruhū, Yaā ní nduu tēe, tú vēji ri jeē snáa rī ñayuu, chi sa suhva jeē jnáma ri ñayuu, achí yá.

Yūcuán na te cuahān yā jíin de inga ñuu.

Siquī ñáyuu jeē cácuñi i condiquin i ya
(Mt. 8.19-22)

⁵⁷ Te níní jíca ya ichi jíin de, te ni cahān ñin tēe jíin yá:

Condiquin na níhín quihín yō ndé-ni cúu-ni nuū quihín ni, achí de.

⁵⁸ Te ni cahān Jesús jíin de:

Tāca ñúcuñi, íyó yáū cava cáñuhun ti. Te suni saa, iyó tǎcā tī. Te ruhū, Yaā ní nduu tēe, tú nuū cusú rī, achí yá.

⁵⁹ Te ni cahān yā jíin inga de:

Condiquin ruhū na quihín yō.

Te máá tēe un ní cahān de:

Condetu ní ndé na quíchindūji ná tátá na xíhna gā. Yūcuán na te condiquin na níhín, achí de.

⁶⁰ Te ni cahān Jesús jíin de:

Stóo tāca ndíyi na chindūji jnáhan ndíyi, chi ndíyi cácuu ñayuu tu cácuñi. Te róhó, cuáhān te nacani ró jnūhun ndese ndácu Yaā Dios jniñu, achí yá.

⁶¹ Yūcuán na te suni ni cahān inga de:

Cúni na condiquin na nihin, te cuaha ni jnuhun jeē xihna gā quicahān na jín ñayuu cáyucú vehe ná, áchí de.

⁶² Te ni cahān Jesús jín de:

Núu na-ni tēe quėjé de condiquin de ruhū, te núu máni jeē nácani cuíhyá ni de siquī tāca jéē ni stóo de, núu súcuan te cúu de nájnuhun in tēe jítu jín yátá, te jícó coto de ichi vehe de. Te ma cuajniñu de condiquin de ruhū siquī jniñu ndácu Yaā Dios, achí yá.

Jeē ní tají yá unī xico uxī de

10

¹ Te ná ni cuu tācá jniñu yáha, te máá Jítóho yō ni nacāji ya unī xico uxī gā de. Te ni tají yá ndihuū ndihuū de jeē cósnū de nuū yā, quingoo de tācá ñuu jín táca lugar nuū jé yajni quihin maá yá. ² Te ni cahān yā jín de:

Ñayuu yáha cácuu i nájnuhun trigo jeē tahndé, te ndaā jeē cuehē cúu, te tēe cahnde chi jecu-ni de cúu. Núu súcuan te cacān tahu rō nuū máá Jítóho rō Yaā Dios jeē na tájí yá cuehē tēe na quingoo de cahnde de trigo, cúu jeē nacani de jnuhun ya nuū ñayuu. ³ Te cuángoo jijnáhan ró, te na cástūhun rí nuū rō jeē tají rí rohó quingoo ró nájnuhun londe mēñu yíhī. ⁴ Te ma cóndiso ró ñunu, ni yijni xūhún, ni ndijēn. Te ichi ma cucuéé ró ndajnūhun ró jín ni in. ⁵ Te na-ni vehe núu ni quiví ró, te xihna gā cahān rō: Na quíji jnuhun ndeyí jnuhun sī ni nuū rohó, ñayuu vehe yáha, achi rō. ⁶ Te núu vehe yúcuan íyo ñayuu vāha, te jnuhun ndeyí ní cahān rō jinū siquī i. Te núu tuú, te jnuhun ndeyí ní cahān rō ma jinū siquī i. ⁷ Te suni vehe yúcuan coyūcu ró, te caji rō coho ró jéē cuáha ñayuu nuū rō. Chi siquī jniñu jeē nácani ró jnuhun nuū ñayuu, te cánuú coto i rōhó. Ma quéndō ró tijni vehe, chi in-ni vehe. ⁸ Te na-ni ñuu núu ni quivícoo ró, te núu cuatáhu i rōhó, te caji rō tāca jéē cuáha i nuū rō. ⁹ Te nasávāha ró ñayuu cácuñu ñuu yūcuán. Te cachi rō nuū i: Je ni cuyajni Yaā Dios jeē ndacu ya jniñu nuū rō, achi rō. ¹⁰ Te na-ni ñuu núu ni quivícoo ró, te núu tu ní cájetáhu i rōhó, te quendacoo ró ini calle yūcuán, te cahān rō: ¹¹ Nde ticachā ñuu rō yáha jéē ni jniñu jehē rī, na náscóyo ri jeē cúu seña jeē iyó cuéchi ró jéē tu ní cájetáhu ró. Te na cónahán ró jeē Yaā Dios je ni cuyajni ya jeē ndacu ya jniñu nuū rō nuú. ¹² Te cáhán rī jín ró jeē quiví juicio te xeēn gā coo castigo siquī ñuu casáha súcuan vēsú siquī ñuu Sodoma nuū ní casáha ndasí ñayuu cuéchi.

Jeē ní cuxeēn yā nuū sava ñuu nihni ni
(Mt. 11.20-24)

¹³ Nacā jeē xeēn ndoho ró, ñayuu ñuu Corazín. Te nacā jeē xeēn ndoho ró, ñayuu ñuu Betsaida. Chi núu ini ñuu Tiro jín ñuu Sidón ni sáha ri jniñu jéñu jeē ni sáha ri ini ñuu maá ró, te yachī nacani ni ñayuu ñuu un jéē stóo i cuéchi i núú. Te sáha i seña jeē steén jeē nácani ni i siquī cuéchi i, chi cahun i sahma jnúú te chuhun i yaā xinī i núú. ¹⁴ Núu súcuan te quiví coo juicio te xeēn gā coo castigo siquī rō jijnáhan ró vēsú jeē ni íyo siquī ñuu Tiro jín ñuu Sidón. ¹⁵ Te rōhó ñayuu ñuu Capernaum, ¿á cájeni ni rō jeē cujéñu ró nájnuhun in jeē cá cuahān ichi ándiví? Tuú chi sa nanuu ró ndé lugar nuū cáyucu ánuá ndīyi. Achí yá.

¹⁶ Te ni cahān gā yā jín tēe jeē tají yá quingoo:

Ñayuu chusóhó jnuhun cahān rō, nuū máá rí chusóhó i. Te ñayuu squéhichī rohó, suni ruhū squéhichī i. Te ñayuu squéhichī ruhū, suni squéhichī i Yaā ní tají ruhū vēji ri. Achí yá.

Jeē ní ndecoo tēe ni tají yá

¹⁷ Te ni ndecoo unī xico uxī tēe un, cácusī ni de te cácahān de jín Jesús:

Nde tachī cájetáhu núu na jéē jín síhví ní, chi quéndacoo ini ñayuu, achí de.

¹⁸ Te ni cahān yā jín de:

Súcuan cúu, chi ni jito ri jeē nájnuhun in taja ni ningava Satanás ichi ándiví, chi ni quende rī ndihi poder un. ¹⁹ Te vijna te je ni jēhe ri fuerza nuū rō jeē cueñū rō nájnuhun siquī tāca cóo jín tísuhma, te cundeyí ró siquī tāca fuerza maá jéē jító uhū yohó, te tú

na vé sáha ga jíin ró. ²⁰ Te ma cúsiñ ni rō maá-ni jeē cájetáhu táchī nuū rō, chi sa cusīñ gā ni rō jeē yosó síhví ró nde andiví. Achí yá.

Jeē ní cusīñ ni Jesús

(Mt. 11.25-27; 13.16-17)

²¹ Te suni hora un ní cusīñ ni Jesús, ni sáha Espíritu Santo, te ni cahān yā:

Na cútahū na núu ni Tátā, Jitoho andiví jíin ñáyiví. Chi ni jesi ni táca jnúhun ndichí ní, jeē ma cūni ñayuu ndichí jíin ñáyuu tūhva cuenta ñayiví yáha. Te ni steén ni núu ñáyuu cácuu nájnūhun sūchi lúli. Chi súcuan ni nujnahan ni ni Tátā, achí yá.

²² Te ni cahān gā yā:

Ndivii ni jēhe Tátā rī nuū rī. Te tu cájini ñayuu ndé ñn cúu ruhū, Sēhe Yaā Dios, chi máá-ni Tátā rī cúu jeē jiní yā ruhū. Ni tu cájini ñayuu ndese Yaā cúu máá Tátā, chi máá-ni Sēhe cúu jeē jiní. Te íyó ñáyuu jeē cuní maá Séhe steén yā nuū i ndese Yaā cúu Tátā yā, te máá i suni cuni i. Achí yá.

²³ Yūcuán na te jito ya nuū téé cáscuáha ún, te ni cahān yā jíin máá-ni de:

Yōhyo ndetū ñayuu cájito jniñu jéhnū jeē cájito máá ró. ²⁴ Chi cáhán rī jíin ró jeē cuehē tē ni canacani jnúhun Yaā Dios, jíin táca rey, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

Jnúhun ñn tē vāha ni nación Samaria

²⁵ Yūcuán na te ñn tē steén tutu ley Yaā Dios, ni ndocuiñ de ni jecahān de jíin Jesús, chi cuní de coto ndee de ya. Te ni cajnúhún de:

Maestro, ¿na vé sáha ná te nihīn tahú na cotecu na ní cáni andiví? áchí de.

²⁶ Te ni cahān yā jíin de:

¿Nde yosó núu tútu ley? ¿Nde cáhán cáhu ró? Achí yá.

²⁷ Te máá téé un ní cahān de jeē cáhán nuū tútu:

Coo maní ndasí ró jíin máá Jitoho rō Yaā Dios, nde jnáā ndasí ró sáha ró ndihí jeē cúsiñ ni yā, nde jíin ini jíin ánuá rō, jíin ní fuerza rō, jíin ní jēé níjnūnī rō. Te cundáhu ni rō jnáhan ró nájnūhun cundáhu ni rō maá ró, achí. Achí de.

²⁸ Te ni cahān yā jíin de:

Vāha ni cahān rō. Te núu cuu sáha ró súcuan te nihīn tahú rō cotecu rō ní cáni, áchí yá.

²⁹ Te máá téé un cuní de jeē quéndō ndaā de nuū yā jíin jnúhun ni cajnúhún de, te ni cahān de:

¿Te ndé ñáyuu cácuu jnáhan ná? áchí de.

³⁰ Te ni cahān Jesús:

Ñn tē ni quenda de ñuu Jerusalén, ni cuun de cuahān de ñuu Jericó. Te ichi un ní canecoo ñacuihna núu de, te ni caquende ndihí ndajniñu de, te nde sahma ñúhun de. Te ni cacani ndevāha ún de jeē jé yajni cuu de núu. Te ni castóo ún de, te cuango. ³¹ Te ni cuu jeē ichi un yáha ñn sutū quihīn de, te ni jito de nuū téé ún, te ni síyo-ni de cuahān de. ³² Te suni súcuan ñn tē grupo levita jeē cájejniñu ini templo, vēji de ichi ún, te ni jito de nuū téé ún, te ni yāha jíca-ni de cuahān de. ³³ Te ñn tē nación Samaria, suni vēji de ichi ún, te nuū ní jito de, te ni cundáhu ni de tē ún. ³⁴ Te ni quee de nde nuū catú téé ún, te ni chuhun de aceite jíin vino nuū ni túji tē ún, te ni jihni de sahma nuū. Te ni soó de tē un síquī quiti de, te cuahān de jíin téé un ndé ñn mesón, te ni condito de. ³⁵ Te inga quiví ún, hora jeē quihín de, te ni tava de uū xūhun cáa, ni jēhe de nuū tē chíí mesón. Te ni cahān de: Coto ní téé yáha, te núu caxīn gā ni xūhun ní jíin de, te nuū nándicó ná te nachunaa ná núu ní, áchí de. ³⁶ Núu súcuan ¿te ndese jéni ni rō? Jeē ndinúní téé ún, ¿ndé ñn de ni chihí cuenta jeē jnáhan de cúu tē ni canecoo ñacuihna núu? Achí yá jíin téé steén tutu ley.

³⁷ Te ni cahān de:

Tē jeē ní cundáhu ni tē ni tujī, vēsú tē ñuu jíca cúu de.

Yūcuán na te ni cahān Jesús jíin de:

Cuáhán núu súcuan, te suni súcuan cundáhú ni rō tāca ñáyuu, achí yá.

Jeē ni íne ya vehe Marta jíin María

³⁸ Yūcuán na te ni quihin tucu ya ichi cuahān yā, te ni jinū yā ñn ñuu lulí. Te ñn ñahan nání Marta, ni cana ña ya ni jehēn yā vehe ña. ³⁹ Te Marta, íyó ñn cuhū ña nání María. Te María ni cucōo ña nuū jehé Jesús, jíni nahín ña jnūhun cáhán yā. ⁴⁰ Te Marta chi cúnée máá ña jíin cuéhē jniñu sáha ña. Te ni quee ña nuū yā, te ni cahān ña:

¿A tu sáha ní cuenta jeē cuhū na ní stóo máñúhún ña sãña nuū jniñu? Te cahān ni jíin ña na chindéé ñáhán ña sãñá, achí ña.

⁴¹ Te ni cahān Jesús jíin ña:

Marta, yōhyo ndíhví ni rō jíin cuéhē jniñu, te yōhyo stóho ró máá ró jíin. ⁴² Te íyó ñn-ni jniñu cánuú. Te María chi ni nacāji ña jniñu cánuú, suu jeē ndíhví ni ña siquī jnúhun Yaā Dios, te ma quénehen yó ña nuū ún. Achí yá.

*Jeē ni stéén yā ndese cacān tahú yō
(Mt. 6.9-15; 7.7-11)*

11

¹ Te ñn quiví íne Jesús ñn lugar jicán tahú yā. Te nuū ní ndíhi ni jicān tahú yā, te ñn tēe scuáha jíin yá, ni cahān de:

Stéén ni núū ná ndese cacān tahú na jíinahan ná, nájñūhun ni steén Juan nuū tée ni cascuáha jíin de, achí de.

² Te ni cahān yā jíin de:

Jeē cacān tahú rō, te suhva cahān rō:
Tátá maá ná jíinahan ná jeē ndeé ní andíví,
níní na cóo yñúhún ná nuū ní, chi Yaā ñi cóo ní.
Te ñūhun ni na jēe yachí quiji quiví ndacu ní jniñu ñí ñáyívi yáha.
Te na cóo tācá jniñu nújnahan ni ní,
nájñūhun íyó ini andíví, súcuan na cóo ini ñayíví.
³ Staā jeē cátecu na táca quiví, cuāha ní núū ná vijna.
⁴ Te cone cáhnu ni ni núū tāca cuéchi cásáha ná núū ní,
nájñūhun cáhine cáhnu ni na núū ñáyuu casáha cuéchi nuū ná.
Te ma cuáha ní jnúhun jeē coto ndee jexeén sãñá,
chi sa suhva jnama ní sãña nuū tāca jēe neé.
Achi rō jíinahan ró. Achí yá.

⁵ Te ni cahān gā yā:

Núu ndé ñn róhó íyó ñn amigo rō, te núu quihín rō vehe de sava ñuú te cahān rō jíin de: Amigo, cuāha núu uní staā nuū rí. ⁶ Chi ñn amigo rí jeē jíca de viaje, ni quee de vehe rí, te tú na vé névaha ri jeē cuáha ri caji de. Achi rō. ⁷ Te núu cahān tēe íne ini vehe: Ma stáhān rō ruhū, chi ndíhyú yehyí rí, te je cáquixí sēhe ri jíin rí, te ma cóo ndonda ri jeē cuáha ri nuū rō, achi de. ⁸ Te cáhán rí jíin ró, vēsú ma ndóna de cuāha de nuū rō siquī jeē cóo de amigo rō, te jeē yóhyo stáhān rō de, jeē yúcuan ndonda de cuāha de ndíhi jeē jíni ñúhún ró. ⁹ Núu súcuan te cáhán rí jíin ró jíinahan ró jeē suni súcuan cacān tahú rō nuū Yaā Dios, te cuāha ya nuū rō. Te nducú ró tāca jēe váha íyó núū yā, te nihín rō sáha ya. Te cacān tahú rō nde nihín rō, nájñūhun sáha ñayuu cahán yehyí ndé nune quiví i. ¹⁰ Chi tāca ñáyuu jicán, cuāha ya nuū i. Te ñayuu nducú, suni nihín i. Te ñayuu cahán, nune ya ichi nihín i jeē cuní i.

¹¹ ¿Te ndé ñn ró cóo tátá, te núu sēhe ró jíicán i staā nuū rō, te á cuáha ró ñn yuū nuū i? Te núu jíicán i chácá, ¿te á cuáha ró ñn coō nuū i? ¹² Chí núu jíicán i ñn ndíví, ¿te á cuáha ró ñn tisuhma nuū i? Tú cuiti súcuan. ¹³ Núu súcuan te máá ró jíinahan ró, vēsú ñáyuu iyó cuéchi cácuu ró, te cájini rō cuāha ró jēe váha nuū sēhe ró. Te nagā ni cuu máá Tátá rō andíví jēe ma cuáha ya Espíritu Santo nuū ñáyuu jicán nuū yā. Achí yá.

Jeē ní cacahān de jeē jejniñu ya fuerza Satanás
(Mt. 12.22-30; Mr. 3.19-27)

¹⁴ Te quénehen ya ñin tachī ini ñin tēe, jeē ní cuñhín de ni sáha. Te nuū ní quenda tachī, te ni nacahān tēe ni cuñhín un. Te ni canaa ni ñayuu cájito i. ¹⁵ Te sava ñayuu ún chi ni cacahān i:

Jíin fuerza Satanás jeē cujéhnū nuū tachī, quénehen tēe yáha táca táchī ini ñayuu, achí i.

¹⁶ Te sava ga i cúní i coto ndee i ya, te ni cajicān i jeē sáha ya jeē coo ñin seña ichi ándiví.

¹⁷ Te máá yá jiní yā jeē súcuan cájeni ni i, te ni cahān yā:

Tāca nación jeē sasín máá te cuajnáhan máá, núu súcuan te snāā jeē iyó váha máá. Te núu ñayuu ñin vehe sásín máá te cuajnáhan máá, núu súcuan te ma cúu ga coyūcu cáhnu. ¹⁸ Te suni súcuan Satanás, núu sásín máá jíin jnáhan tachī, ¿te ndese cuiñi ñihin jeē ndácu jniñu núu súcuan? Chi cácahān rō jeē jíin fuerza Satanás quénehen ri tachī ini ñayuu. ¹⁹ Te núu súcuan cúu núu, te ñayuu cascuáha jíin máá ró jijnáhan ró, ¿na jíin fuerza cáquenehen máá i tachī, cájeni ni rō? Núu súcuan te máá i jijnáhan i cachi jeē ní castívi ndasí ró ni cacahān rō jeē cáquenehen ri tachī jíin fuerza Satanás. ²⁰ Te tuú chi sa suhva jíin fuerza Yaā Dios cúu jeē quénehen ri tachī. Núu súcuan te je ndéé Yaā Dios mēhñu ró jéē ndácu ya jniñu.

²¹ Te núu ñin tēe ndacuī, ndíto de vehe de jíin nújijí de, núu súcuan te tú ni ñin ndajniñu de ndoñuhún. ²² Te núu quiji ñnga tēe ndacuī gā, te cundeyí jíin tēe ún, núu súcuan te quende nujijí de jeē ndíto de vehe de, te sáha de ndese cúní maá de jíin ndajniñu jeē quénde de. Te nájnūhun tēe ndacuī gā ún, súcuan cúu máá rí nuū Satanás.

²³ Te ñayuu tu iyó mání jíin rí, núu súcuan te jíto uhū i ruhū. Te ñayuu tu nástútú jíin rí, núu súcuan te sa jéte núu i ñayuu vējicoo nuū rí.

Tachī jeē nastútú jnáhan ndívi ini ñayuu
(Mt. 12.43-45)

²⁴ Núu ni quenda ñin tachī ini ñin tēe tu cándíje, te jíca cuu nuū ñhūhun téhé, ndúcu núu ndétátú, te tu níhín, yūcuán na te jéni ni maá: Na quínuhun rí vehe nuū ní quenda rí. ²⁵ Te núu ni ndee tucu, te jíto jeē tēe tu cándíje un cúu de nájnūhun ñin vehe jeē ní ndundoo. ²⁶ Yūcuán na te jéquiñin uxā gā tachī xeén gā vēsú maá. Te quívicoo ini tēe un jéē cóyūcu yūcuán. Núu súcuan te xeén gā ndoho tēe un jéē sándíhí vēsú jeē xíhna ñhūhun. Achí yá.

Yōhyo ndetū ñayuu cájini nahín jnúhun ya

²⁷ Te níni cáhán yā jnúhun yáha, te ñin ñahan íne mēhñu ñayuu cuehē un, ní cahān jee ña jíin yá:

Yōhyo ndetū ñahan ní scácu níhín te ni scáxin ña níhín, áchí ña.

²⁸ Te ni cahān yā:

Sa suhva yōhyo ga ndetū ñayuu cájini nahín jnúhun Yaā Dios te cásquicu i, áchí yá.

Jeē ní cajicān ñayuu tu cácañdíje ñin jniñu jéhnū
(Mt. 12.38-42; Mr. 8.12)

²⁹ Te ni cataca cuehē gā ñayuu nuū Jesús, te ni quejéé yá cahán yā:

Ñayuu iyó vijna mání cásáha néé i. Te cajicān i ñin jniñu jéhnū jeē steén núu Yaā ní tají Yaā Dios cúu rí. Te tú na ñnga jniñu jéhnū stéén rí nuū i, chi máá-ni jniñu jéhnū nájnūhun ni cuu jíin Jonás, tēe ni nacani jnúhun Yaā Dios nde jenahán. ³⁰ Chi nájnūhun ni cajini ñayuu ñuu Nínive jeē ní cuu ñin jniñu jéhnū jíin Jonás, suni súcuan cuni ñayuu tiempo yáha jeē coo ñin jniñu jéhnū jíin rúhū, Yaā ní nduu tēe, jeē quijnáhan jíin modo ni ndoho Jonás. ³¹ Te reina jeē ní cujéhnū nación ichi sur, natecu ña jíin ñayuu tiempo yáha, quiví juicio jeē sándaā yā cuēchi, te cahān ña cuēchi siquī i. Chi nde jicá téyí ní quiji ña ni jini nahín ña jnúhun ndíchí ní cahān rey Salomón. Te vijna chi cújéhnū ga ruhū, Yaā íne yáhá vēsú Salomón, te tu cácañdíje ró rúhū. ³² Te tāca ñayuu ñuu Nínive nuū ní nacani Jonás jnúhun, natecu i jíin ñayuu tiempo yáha, quiví juicio jeē sándaā yā cuēchi,

te cahān i cuēchi siquī ñáyuu yáha. Chi máá i ni canacani ni i ni castóo i cuēchi i quivī ní nacani Jonás jnūhun nuū i. Te vijna chi cújéhnū ga ruhū, Yaā íne yāhá vēsú Jonás, te tu cácadíje ró rúhū.

Jnūhun yátá síquī lámpara

(Mt. 5.15; 6.22-23)

³³ Núu nástín ñayuu ñn lámpara, tu chísāhí i, ni tu chúne i chíji ñn cajón. Chi sa suhva jéni i nuū sucún, návāha cundijin nuū ñáyuu quívicoo vehe. ³⁴ Te tinūu ró cúu nájñūhun lámpara nuū yiqui cúñu rō. Núu súcuan te núu tinūu ró íyó ndijin, te ní-ni yiqui cúñu rō cúndijin. Te núu tinūu ró tu íyó ndijin, te ní-ni yiqui cúñu rō íyó nee. ³⁵ Te suni súcuan cúu ánuá rō, te coto ró jéē ma cáni neé ni rō, návāha tú coo nee ini anuá rō. ³⁶ Chi núu máni jniñu váha cásáha ró, te tú na jniñu neé cásáha ró, núu súcuan te luz yā cúndijin vāha ini anuá rō, nájñūhun ñn lámpara jeē sáha jeē cúndijin vāha. Achí yá.

Jeē ni cáhān yā jeē íyó cuēchi de jíjnāhan de

(Mt. 23.1-36; Mr. 12.38-40; Lc. 20.45-47)

³⁷ Te nuū ní cuu ni cahān yā, te ñn tēe grupo fariseo ni cana de ya jeē caji yā staā vehe de. Te ni quivī ya, te ni cucōo ya mesa jeē cáji yā staā. ³⁸ Te tēe fariseo un nāā ni de jíto de jeē tu squícu ya costumbre jeē nandahá yá te caji yā staā. ³⁹ Te ni cahān maá jítoho yō jíin de:

Róhó tēe fariseo jíjnāhan ró, chi nájñūhun jeē cánacate ró yátā vaso jíin yátā cohó cúu jeē nandahá ró. Te ichi íni rō chi ñūhun máni máá jnūhun cuíhná jíin jnūhun neé. ⁴⁰ Tēe cánéé cácuu ró. ¿A tu cájini rō jeē Yaā ni sáha yiqui cúñu rō, suni ni sáha ya anuá rō? ⁴¹ Te jeē cájēhe ró caridad nuū ñáyuu ndahú, na sáha ró síquī jeē cundáhú ndije ni rō i. Te súcuan te coo ndaā anuá rō.

⁴² Nacā xeēn ndoho róhó tēe fariseo, chi cásquícu ró tācá jniñu lúli, te tu cásquícu ró jniñu cánuú. Chi cásáha ró úxī uxī nuhni tamīnu jíin ruda jíin táca yucū, te cásocō rō ñn ñn siquī tāca úxī un núu Yaā Dios. Te tu cásáha cuítī rō jniñu ndaā, ni tu cáhiyo manī rō jíin Yaā Dios. Tāca jéē yáha cánuú sáha ró núu, te suni ma stóo ró jéē socó rō tāca yúcu ún.

⁴³ Nacā xeēn ndoho róhó tēe fariseo, chi máni cánujnahan ni rō cucōo ró núu silla yíñúhún gá ini vehe ñi sinagoga. Te cánujnahan ni rō jeē cahán yíñúhún ñáyuu jíin ró nuū calle.

⁴⁴ Te nacā xeēn ndoho róhó tēe cástéén tutu ley Yaā Dios, jíin róhó tēe fariseo, chi tēe stáhú-ni cácuu ró. Chi cándāa ró nájñūhun yaū ndīyi jeē tú ndijin, chi cásnāa rō anuá ñayuu, te tu jíin i jeē súcuan cásáha ró jíin i. Achí yá jíin de.

⁴⁵ Yūcuán na te ni cahān ñn tēe stéén tutu ley:

Maestro, jeē ni cáhān ni táca jnūhun yáha, suni nde siquī maá ná jíjnāhan ná ní cahān ní, achí de jíin yá.

⁴⁶ Te ni cahān yā:

Suni nacā xeēn ndoho róhó tēe cástéén tutu ley. Chi suni cástéén rō tāca ley ni catava maá ró jeē yí sáha, te tu cácuñdeyí ñáyuu squícu i. Te máá ró, chi ni ñn xinī ndáha ró tu cáscānda ró jéē squícu ró.

⁴⁷ Nacā xeēn ndoho ró jíjnāhan ró. Chi cásáha ró vehe siquī nuū yíndūji ndīyi jíi rō, tēe ni canacani jnūhun Yaā Dios nde jenahán. Te suni tāca jíi rō ni cajehni de tēe ún. ⁴⁸ Te jeē casáha ró súcuan cúu jeē cáquijnāhan ró jíin de siquī jniñu ní casáha de. Chi máá de ni cajehni tēe ún, te máá ró cásáha ró vehe ndīyi ún.

⁴⁹ Jeē yúcuán nde jenahán ní cahān Yaā Dios ñn jnūhun ndíchí: Tají rí tāca tēe nacani jnūhun ri jíin táca tēe apóstol quingoo de nuū i. Te sava de cahni i, te sava ga de coto xeēn i, achí Yaā Dios. ⁵⁰ Te súcuan te siquī ñáyuu tiempo yáha na cóndee cuēchi jeē ní cajehni jíi i tēe ni canacani jnūhun Yaā Dios, nde quivī ni jécōo ñayiví te nde vijna, ⁵¹ nde Abel xíhna gā te nde Zacarías, tēe ni cajehni de ini templo sava mēhñu cuarto ñi jíin altar. Núu súcuan te cáhān rí jíin ró jeē siquī ñáyuu tiempo yáha cóndee tāca cuēchi ún.

⁵² 'Nacā xeēn ndoho rōhó jēē castéén tutu ley, chi cájesi rō ichi jeē jécūhun ni ñayuu jnūhun ya. Chi ni máá ró tu cáculi rō jecūhun ni rō, ni tu cájēhe ró jnūhun jeē jecūhun ni ñayuu cáculi. Achí yá.

⁵³ Te jeē ni cáhān yā jnūhun yáha, te tēē castéén tutu ley Yaā Dios jíin tēē fariseo, yōhyo ni caquitī ni de nuū yā. Te ni caquejéé de cástíhí de ya siquī cuehē gā jnūhun.

⁵⁴ Chi yuhu-ni cánducú de núu sanaa te stívi yá jnūhun cahān yā, návāha nihīn de cuēchi siquī yā.

Siquī jnūhun stáhú cácahān tēē fariseo

12

¹ Te níni súcuan cúu, te ni cacutútú cuéhē mil ñayuu, chi nde cájeñū i siquī jehé jnāhan i. Te xīhna gā ni quejéé yá cahān yā jíin tēē cáscuáha jíin yá:

Coto má candíje ró levadura tēē grupo fariseo, chi suu cúu jnūhun stáhú cácahān de. Chi jíitē núu nuū ñayuu, nájnūhun ndécava levadura nuū ñújen pan. ² Chi jnūhun stáhú un má quéndō sāhí cuítī, chi ndihī natūu ndijin, te cuni ñayuu. ³ Núu súcuan te suni máá ró, tāca jnūhun ni cacahān rō jeē tu ní jíin ñayuu, ñin quivī te cuni vāha i. Te tāca jnūhun ni cacahān sāhí ró jeē ndihyū yehyí, ñin quivī te cahān jee ñayuu yatā tācá vehe.

Jeē ní cachi yā ndé ñin cúu jeē yūhu yó

(Mt. 10.28-31)

⁴ 'Cáhān rī jíin ró jijnāhan ró, amigo: Ma yūhu ró coto ró ñayuu cahni yiqui cúñu rō, chi núu ni cajehni i rōhó, te tuá na vé cúu sáha ga i. ⁵ Te na cáchi rī nuū rō ndé ñin yūhu ró coto ró: Jeē yūhu ró coto ró cúu Yaā Dios jeē núu sáha ya jeē cúu rō, te íyó poder yā chune ya rohó infierno. Suu máá yá cúu jeē yūhu ró jeē ma stívi ró nuū yā.

⁶ 'Te tācá saa chi tú yahu ndéé tī, chi nde uhūn tī jeē uú centavo lulí. Te ni ñin tī tu náā ni Yaā Dios jeē tu ndíto ya. ⁷ Te nagā ni cuu rōhó jíjnāhan ró, chi nde ndihī xíní rō je ni cahu ya. Núu súcuan te ma yūhu ró jijnāhan ró, chi cánuú ndasí gá rō nuū yā vésú cuehē tācá saa.

Ñayuu jejnūhún Jesucristo nuū inga ñayuu

(Mt. 10.32-33; 12.32; 10.19-20)

⁸ 'Te cáhān rī jíin ró, tāca ñayuu jeē cuajnūhún rúhū nuū inga ñayuu, suni súcuan ruhū, Yaā ní nduu tēē, cuajnūhún rí i nuū tācá ndajéhé Yaā Dios. ⁹ Te tāca ñayuu jeē ma cuajnūhún rúhū nuū inga ñayuu, suni súcuan ma cuajnūhún rí i nuū tācá ndajéhé Yaā Dios.

¹⁰ 'Te núu ndé ñayuu cahān i siquī ruhū, Yaā ní nduu tēē, cone cáhnu ni Yaā Dios nuū i. Te núu ndé ñayuu cahān ndevāha i siquī Espíritu Santo, ma cóne cáhnu ni Yaā Dios nuū i.

¹¹ 'Te núu cuandeca i rōhó tāca vehe ñi sinagoga nuū tēē cásāndaā cuēchi, jíin núu tēē cácuu tohō, te ma nácani ndasí ni rō ndese stío cuñí rō jnūhun nuū de. ¹² Chi máá hora un te Espíritu Santo steén yā nuū rō ndese cahān rō. Achí yá.

Siquī jeē ma ténuū yō ndajníñu cúcá

¹³ Yūcuán na te ñin tēē íne nuū ñayuu cuehē un ní cahān de jíin Jesús:

Maestro, cahān ni jíin ñani na jéé na táhú sáva de tahū na jíin de, áchí de.

¹⁴ Te ni cahān yā jíin de:

¿Ndé ñin ni jeni ruhū jeē ndacu ri jniñu tahū sáva tahū rō? Achí yá.

¹⁵ Te ni cahān gā yā:

Condito ró máá ró jijnāhan ró jéē ma ndíyo ni rō xūhun jíin táca gá. Chi vésú cuehē ndasí ndajníñu névāha ñin tēē, te nasūu jéé yúcuan sáha jeē quéndō ndetū de, áchí yá.

¹⁶ Yūcuán na te ni cahān yā ñin jnūhun yátá jíin i:

Ni íyo ñin tēē cúcá jeē névāha ñuhun jeē cúu vāha ndasí itu. ¹⁷ Te tēē cúcá un ní nacani ni de: ¿Ndese sáha rí? Chi tuá ndé cahun niñi rí. Achí de. ¹⁸ Te ni jeni ni de: Suhva na sáha rí. Na cánu rī tāca yácā rī, te nasáha rí jeē náhnu ga. Te yūcuán chuvāha ndihī rí niñi rí jíin táca ndajníñu rí. ¹⁹ Yūcuán na te cahān rī jíin ánuá rí: Vijna te cuehē teyí

névāha yó jēē canda cuehē cuiyā. Na ndétātu yó te caji yō coho yó, te na cúsiñ ni yō, ni jeni ni de. ²⁰ Te ni cahān Yaā Dios jíin de: Tēe cánéé cúu ró. Chi jecuāā vijna cuu rō, te tāca jēē ní chuvāha ró, ¿ndé tēe cuu? Achí Yaā Dios jíin de. ²¹ Te súcuan ndoho tāca tēe jeē sacúca de máá de, te tu ndúcu de jeē quendōo ndetū de sáha Yaā Dios. Achí yá.

Yaā Dios ndíto ya yohó

(Mt. 6.25-34)

²² Te ni cahān yā jíin tēe cáscuáha jíin yá:

Núu súcuan te cáhán rī jíin ró: Ma nácani ndasí ni rō siquī jeē cótecu rō, núu ndese caji rō, ni siquī sahma, núu ndese cuhun ró. ²³ Chi Yaā Dios ni sáha ya jeē técu rō jíin yiqui cúñu rō, te nagā ni cuu jeē ma cuáha ya jeē cáji rō jíin jēē cúhun ró. ²⁴ Condēhe ró ndese cátecu quitī cácuu nájñūhun calú, chi tu cátaji tī, ni tu cánastútú tī jeē chūvāha tī, ni tú yacā tī. Te vēsú súcuan te máá Yaā Dios scáji yā tī. Te cánuú ndasí gá rō jijnáhan ró vēsú tāca quitī ún. ²⁵ ¿Te ndé ñin ró, á cuu scuéhnu ró máá ró sava metro gā, vēsú na nácani ndasí ni rō? ²⁶ Te núu ma cúu sáha ró vēsú ñin jniñu lúli súcuan, ¿te najehē cánacani ndasí ni rō siquī jeē cáji rō jíin jēē cuhun ró?

²⁷ Condēhe jijnáhan ró ndese jēe ita tāca yúcū. Chi tu sájniñu, ni tu táú. Te cáhán rī jíin ró jeē ni rey Salomón, quivī ní ñūhun de sahma váha ndasí, tu ní ñūhun de sahma lúu súcuan nájñūhun ita ún. ²⁸ Te núu súcuan jēhe Yaā Dios sahma lúu ita un jēē jēe vijna te sajnē cayū nuū ñuhún, te nagā ni cuu róhó jijnáhan ró jēē ma sáha ya jeē nihín rō sahma. ¿Te naun tu cácandíje nihin ró jēē ndíto ya rohó? ²⁹ Núu súcuan te ma nácani cuíhyá ni rō ndese caji rō ndese coho ró. ³⁰ Chi tāca ñáyuu ñayivī jēē tu cácandíje cúu jeē máni siquī jeē yáha cándihvī ni i. Te máá ró jijnáhan ró, chi íyó Tátá rō andiví, te jíní yā jeē cájini ñūhún ró tāca jēē yáha. ³¹ Te sa suhva cánuú gá jeē cóndihvī ni rō siquī jniñu jeē ndácu Yaā Dios nuū rō. Yūcuán na te sáha ya jeē nihín rō tāca jēē yáha.

Ndese coo cúca yó nde andiví

(Mt. 6.19-21)

³² Ma yūhu ró jijnáhan ró chi cácuu ró nájñūhun lanchi ri. Chi vēsú jecu-ni cácuu ró, te máá Tátá rō cúsiñ ni yā jeē quívicoo ró ñuu nuū ndácu ya jniñu. ³³ Xīco ró jeē cánevāha ró, te cuāha ró xúhun un núu ñáyuu ndahú. Te súcuan caya rō tahū rō nde andiví núu ma cútúhú, nájñūhun jeē chūvāha ró xúhun ini yijni. Chi nde andiví te ma náā jeē váha conevāha ró. Chi yūcuan má quívī ñacuíhná, ni ma cúu stívī tiquíxin. ³⁴ Chi nde nuū nihín rō tahū váha ró, yūcuan cúu nuū cóndihvī ni rō siquī.

Jeē na cóo tūhva yó jēē ndēē yā

³⁵ Coo tūhva ró jijnáhan ró jēē ndēē Jitoho rō, te coo ró nájñūhun mozo jeē nastñin i lámpara i. ³⁶ Chi íyó tūhva i te cándetu i jeē ndēē patrón i jeē cuahán de vico nándāha. Chi núu ni ndee de te cahān de, te nune-ni i yéhyí jijnáhan i. ³⁷ Te yōhyo ndetū mozo un núu ni ndee patrón i, te cuni de jeē cándito i. Jendaá cahán rī jíin ró jeē maá patrón sātūhva de máá de, te scúcōo de i mesa te caní de cohō i. ³⁸ Te vēsú cucuée de ndee de nde sava ñuú, chí jēē nēē gā, te núu cuni de jeē súcuan cándito mozo de, te yōhyo ndetū i jijnáhan i núu súcuan. ³⁹ Te na jécūhun ni rō jeē cahán jñūhun yátá yáha: Tēe chíí vehe, núu ni jini de na hora quiji ñacuíhná, te condito de, te ma cuáha de jñūhun jeē sacuíhná vehe de núu. ⁴⁰ Te suni súcuan coo tūhva ró jijnáhan ró, chi núu tuú, te máá hora jeē tú na vé cájeni ni rō, te ndee ruhū, Yaā ní nduu tēe. Achí yá jíin de.

Jñūhun mozo vāha jíin mozo tu squícu

(Mt. 24.45-51)

⁴¹ Yūcuán na te Pedro ni cajñūhún de ya:

¿A jíin máá-ni ná jijnáhan ná cáhán ni jñūhun yátá yáha, chí suni cáhán ni jíin ndiñi ga ñayuu? achí de.

⁴² Te ni cahān maá Jítoho yō:

Cáhán rī jín ndé-ni ñayuu cúu nájnūhun mozo jeē ndito xinī te squícu vāha. Te máá patrón sáha de jeē condiso jníñu i coto i ñayuu vehe de, návāha scáji i máá hora. ⁴³ Te yōhyo ndetū mozo un jēé núu ni ndee patrón, te cuni de jeē súcuan squícu vāha i. ⁴⁴ Jendaá cahán rī jín ró jeē cani de mozo un jēé cóto i ndīhi ndajníñu de. ⁴⁵ Te núu jéni ni i jeē ma ndíji yachī patrón i, te quejéé i cani i tēe jín ñahan cácuu jnáhan mozo i, te caji i coho i te najīni i, ⁴⁶ núu súcuan te ndee-ni patrón quivī jeē tu ndétu i jín hora jeē tú na vé jéni ni i. Te stóho xeēn de i, te squívī de i ndoho i jín ñáyuu tu cásquícu.

⁴⁷ Te mozo jeē jiní i ndese nújnahan ni patrón i, te núu tu sátūhva i ni tu squícu i jeē cuní de, ndoho xeēn i jín yujnu xíi. ⁴⁸ Te mozo jeē tu jiní i ndese nújnahan ni patrón i, te núu sáha i jniñu jeē cani de i, núu súcuan te cūhva-ni cani de i. Chi ñayuu jeē steén cuehē yā nuū i, suni cuehē nandacān yā nuū i. Te ñayuu jeē cuehē gā jniñu téjníñu ya i, suni cuehē gā nandacān yā nuū i.

Jeē siquí Jesús te cusín ini ñayuu

(Mt. 10.34-36)

⁴⁹ Ni quee rī jeē nájnūhun jeē scuiquín rī ñuhūn ini ñayívī, te suu cúu jeē cusín ini ñayuu jeē siquí ruhū. Te cúní rī jeē yachī coo súcuan, návāha quívīcoo ñayuu ndaha Yaā Dios. ⁵⁰ Te íyó ñn jnūndóho cánuú ndoho ri, te cúcuíhyá ndasí ni rī chi nde jīnu ndoho ri, te ndusī ni rī. ⁵¹ ¿A cájeni ni rō jeē véji ri jeē cóyūcu mánī ñayuu ñayívī? Cáhán rī jín ró jeē tuú, chi sa suhva jeē cusín ini ñayuu jeē siquí ruhū. ⁵² Chi nde vijna te quejéé jēe uhūn ñayuu ñn vehe, sásín máá jíjnahan, unī siquī uú, te uū siquī uní. ⁵³ Chi tátá cusín ini jín séhe yí, te séhe yí jín tátá, te náná jín séhe síhí, te séhe síhí jín náná, te náná chíso jín séhe jēnú, te séhe jēnu jín náná chíso. Achí yá.

Jeē ni cáhān yā siquī seña andívī

(Mt. 16.1-4; Mr. 8.11-13)

⁵⁴ Te suni ni cahān yā jín ñáyuu cuehē ún:

Núu cájito ró jeē náne vicō ichi núu cáne niāndii, te cácahān rō jeē cuun saū, te súcuan cúu. ⁵⁵ Te núu queé tachī véji ichi sur te cácahān rō jeē nandii, te súcuan cúu. ⁵⁶ Tēe stáhú-ni cácuu ró. Chi cájecūhun ni rō ndese stéén seña andívī jín ini ñayívī, ¿te naun tu cájecūhun ni rō ndé ñn cúu ruhū jeē sáha ri tēcá jniñu jéhnū tiempo yáha?

Jeē cóndihvī ni yō jeē ma cóndee cuēchi siquī yō

(Mt. 5.25-26)

⁵⁷ ¿Te najehē tu cánacani ni máá ró ndé ñn cúu jniñu ndaā sáha ró? ⁵⁸ Te núu ñn ñayuu quihīn i jín ró nuū tohó jeē cacán i cuēchi siquī rō, núu súcuan te níní cuáhān rō jín i ichi te condihvī ni rō sándaā rō jín i. Chi núu tuú, te squívī i rōhó núu juez, te juez siáha de rōhó núu policía, te policía chune de rōhó vecāa. ⁵⁹ Te jendaá cahán rī jín ró jeē ma quénda cuiti rō yūcuán chi nde chunaa rō ndīhi cuiti xūhun cájicān de. Te suni súcuan condihvī ni rō cahān ndahú ró jín Yaā Dios, návāha ma ndácunehen ya cuēchi siquī rō. Achí yá jín de.

Jeē cánuú nacani ni yō jeē stóo yó cuéchi yó

13

¹ Te ñn quivī yúcuán ní quecoo jecu tēe, ni canacani de jnūhun nuū yā ndese ni candoho jecu tēe Galilea. Chi ná cájehni de quiti jeē socó de, te ni quecoo mozo Pilato ni cajehni tēe ún. ² Te ni cahān Jesús:

Tēe Galilea un, ¿á cájeni ni rō jeē súcuan ni candoho de siquī jeē xeēn gā ni iyo cuēchi de vēsú tāca gā ñayuu Galilea? ³ Cáhán rī jín ró jeē tuú. Te rōhó jíjnahan ró suni jnahnū ndetū rō núu tú nacani ni rō jeē stóo ró cuéchi ró. ⁴ Te xahūn unī tēe jeē ní cotúú torre Siloé siquī de, te ni cajihī de, ¿á cájeni ni rō jeē ní casáha de cuēchi xeēn gā vēsú tāca gā ñayuu ñnu Jerusalén? ⁵ Cáhán rī jín ró jeē tuú. Te máá ró jíjnahan ró, suni jnahnū ndetū rō núu tú nacani ni rō jeē stóo ró cuéchi ró.

Jnūhun yátá núndēhe higo

⁶ Yūcuán na te ni cahān yā jnūhun yátá yáha jéē steén yā ndese cácuu ñayuu tu squícu jnūhun Yaā Dios:

Cácuu i nájñūhun ñin nundēhe higo jeē íin nuū ñúhun ñin tēe. Te ni jecondēhé de núu íin ndehē xinī, te tú na vé íin. ⁷ Te ni cahān de jíin mozo sájñiñu nuū ñúhun de: Vijna te je íyó únī cuiyā jeē quíji ri nducú rí ndehē xinī yújnu higo yáha, te tú na vé cúun xinī. Núu súcuan te cahnde rō, chi máá jéē sajnēñu nuū ñúhun, áchí de. ⁸ Te ni cahān mozo un jíin de: Stóo ní na cuíñi ñin na cuiyā, te na nástáyā ná jéhē te chuhun ná jéhen. ⁹ Te na cóndēhe yó núu tú cuun ndehē ñnga cuiyā. Te núu tuú, te tahndē, achí mozo. Achí yá.

Jeē ní nasávāha ya ñin ñahan quivī ndétátú

¹⁰ Te ñin quivī ndétátú te stéén Jesús jnūhun ini vehe ñi sinagoga. ¹¹ Te íyó ñin ñahan jeē ní cuu xahūn unī cuiyā cuhú ña. Chi ñin tachī ni sáha jeē jíca tñí ña, te tuá cúu cuiti caca jnuu ña. ¹² Te ni jito Jesús nuū ña, te ni cana ya ña, te ni cahān yā jíin ña:

Vijna te nduvāha ní jéē cuhú ni.

¹³ Te ni soó yá ndaha ya síquī ña, te ni nucuññi jnuu-ni ña, te ni nacuatáhú ña nuū Yaā Dios. ¹⁴ Te tēe cújéñu ini vehe ñi sinagoga, ni quítñi ni de nuū Jesús jeē ní nasávāha ya ñahan un quivī ndétátú. Te ni cahān de jíin ñayuu:

Íñu quivī íyó jéē sájñiñu yó, te tāca quivī ún quijicoo ró nduvāha ró. Te quivī ndétátú chi ma cúu, áchí de.

¹⁵ Yūcuán na te ni cahān maá Jítóho yō jíin de:

Tēe stáhú-ni cácuu ró. Quivī ndétátú ¿á tu cándají ró stiquī rō burro ró jéē quíscóho ró tí ndute? ¹⁶ Te ñahan yáha jéē cúu ña ñin sēhe yucūn Abraham, chi nájñūhun ni conuhnī ña xahūn unī cuiyā ni sáha Satanás. ¿Te á tu íyó váha jeē nájñūhun nandají rí ña nuū cuehyī ndóho ña quivī ndétátú? Achí yá.

¹⁷ Te jeē ni cáhān yā súcuan, te tāca tēe cájito uhū de ya, ni cacucanu de. Te ndíhi ñayuu ún chi ni cacusñi ni i jíto i tācá jniñu jéñu sáha ya.

Jnūhun yátá síquī ndiquin mostaza

(Mt. 13.31-32; Mr. 4.30-32)

¹⁸ Te ni cahān yā:

Na cáhān rī ñin jnūhun yátá návāha cuni rō ndese ndúcuehē ñayuu ndácu Yaā Dios jniñu nuū. ¹⁹ Ndúcuehē i nájñūhun jéñu ñin ndiquin mostaza jeē jéquin ñin tēe nuū ñúhun de, te ndúu nájñūhun ñin yujnu. Te cúu cáhnu, te tācá saa chi cásáha tí tacā tí chíji ndaha ún. Achí yá.

Jnūhun yátá síquī levadura

(Mt. 13.33)

²⁰ Te ni cahān tucu ya:

Súcuan cúu jeē ndúcuehē ñayuu jeē ndácu Yaā Dios jniñu nuū: ²¹ Cúu nájñūhun levadura jeē ní quihin ñin ñahan, te ni saca ña jíin únī kilo harina, te ni ndaa ndíhi ñujen ni sáha. Achí yá.

Siquī jeē quiví yó yéhyí túū

(Mt. 7.13-14, 21-23)

²² Te jíca Jesús jeē cuahán yā ichi ñúu Jerusalén, te yáha ya tācá ñuu náhnu jíin ñuu lulí, te stéén yā jnūhun. ²³ Te ñin ñayuu ni cajñuhún i ya:

¿A jecu-ni ñayuu jnama Yaā Dios, chí naún? Achí i.

Te ni cahān yā jíin i:

²⁴ Condiñvī ni rō quivícoo ró ndaha Yaā Dios. Chi cúu nájñūhun ñin yéhyí túū. Te cáhān rī jíin ró jeē ñin quiví te cuehē ñayuu nducú i quivícoo i, te ma cúu ga. ²⁵ Te quiví ún te sáha ri nájñūhun ñin tēe chíí vehe jeē ndocuññi de te nacasi de yéhyí. Te ichi yátá véhe cuiñi ró jíináhan ró, te scáján ró yéhyí, te cahān rō: Nune ní yéhyí na quivícoo ná. Te cahān de jíin ró: ¿Ndé nuū véjicoo ró? Chi tu jíiní rī rohó, achi de. ²⁶ Yūcuán na te quejéé

ró cahān rō jíin de: Ni cayeji ná ni cajihí ná jíin ní, te ini calle ñuu na ní steén ni jnúhun, achi rō. ²⁷ Te cahān maá de: Cáhán rī jíin ró jeē tu jíin rī rohó ndé chi véjicoo ró. Cujijo quingoo ró, chi ñayuu casáha jniñu néé cácuu ró. Achi de. ²⁸ Te quivícoo ró núu ndahyú rō, te nacayihí yuhu ró jéē ndoho xeēn rō. Te coto ró núu Abraham jíin Isaac jíin Jacob jíin ndíhi tēe ni canacani jnúhun Yaā Dios, cáyūcú de ñuu nuū ndácu ya jniñu. Te rōhó, vésú cácuu ró yúcūn de, te quivícoo ró núu ndoho ró. ²⁹ Te cuehē ñayuu, vésú tu cácuu i yucūn de, te quijicoo i ichi núu cáne niāndii jíin ichi núu quée niāndii, ichi norte jíin ichi sur. Te cucōo i mesa caji i staā ñuu nuū ndácu Yaā Dios jniñu. ³⁰ Te sava ñayuu jeē vijna cácuu i sandíhí, ichi yúcuan nduu i nuū. Te sava ñayuu jeē vijna cácuu i nuū, ichi yúcuan nduu i sandíhí. Achí yá.

Jeē ní cucuíhyá ni yā siquī ñayuu ñuu Jerusalén
(Mt. 23.37-39)

³¹ Te máá quiví un ní quecoo jecu tēe fariseo, te ni cacahān de jíin yá: Cujijo ní quihín ní inga lado, chi cúní Herodes cahni de níhín, áchí de.

³² Te ni cahān yā:

Cuángoo te castūhun ró nuū tēe mañoso un jéē ná tu jinū quiví cuu rī, chi vijna jíin sájnē quenehen ri tachí ini ñayuu, te nasávāha ri ñayuu cácuu. Te isá te jīnu jniñu sáha ri, achi rō. ³³ Chi cánuú jéē cáca ri quihín rī vijna jíin sájnē jíin isá, te jinū rī Jerusalén. Chi tēe cánacani jnúhun Yaā Dios, tu cájihí de inga lado, chi máá-ni ini ñuu Jerusalén cájehni i de. Achí yá.

³⁴ 'Róhó ñuu Jerusalén, jéhni rō tēe cánacani jnúhun Yaā Dios, te jéhe ró yúu xinī tēe tájí Yaā Dios véjicoo nuū rō. Te cuehē jínu ni cuni rī nastútú rí sēhe ró, nájnūhun ndují jéē nastútú tí sēhe tí chíji ndijēn tí, te tu ní cúní rō. ³⁵ Núu súcuan te vijna te stóo uun na ri rohó jíin sēhe ró. Te cáhán rī jíin ró jéē ndé vijna te ma cóto cuítí gā rō nuū rī, chi nde quiji quiví jeē cahán sēhe ró: Yóhyo vāha Yaā cúu Yaā véndiji jíin jniñu máá Jítoho yō Yaā Dios, achi i. Achí yá.

Jeē ní nasávāha ya ñin tēe cúhú cuehyí cuiñi

14

¹ Te ñin quiví ndétātu ní jehēn yā vehe ñin tēe fariseo kujéhnu, ni jecaji yā staā jíin de. Te tāca gá tēe fariseo cájito yuhu de ya núu stívi yá. ² Te yúcuan íne ñin tēe cúhú de cuehyí cuiñi, índichi de nuū yā. ³ Te ni cajnúhun yá tēe cástéén tutu ley Yaā Dios jíin táca tēe fariseo:

¿A íyó ley jeē nasávāha ri ñayuu cácuu quiví ndétātu, chí tuú? áchí yá.

⁴ Te máá de tu ní cacahān cuítí de. Te ni jniñi ya tēe cúhú un, te ni nasávāha ya de, te ni cahān yā jeē na núhun de vehe de. ⁵ Te ni cahān yā jíin de jíjnáhan de:

¿Ndé ñin rōhó núu burro ró chí stíquī rō ñingava tí ini pozo, te á tu yachí natava rō tí vésú quiví ndétātu cúu, chí naún? Achí yá.

⁶ Te tu ní cúu stío cuñí de ni ñin jnúhun nuū yā jeē súcuan ni cahān yā.

Jnúhun siquī ñayuu jéngoo vico

⁷ Te ni jito Jesús jeē tēe ni cataca ún, cánacāji de silla yíñúhún gá nuū mesa cucōo de. Te ni cahān yā jnúhun yáha jíin de:

⁸ Núu ñin tēe cana de jeē quihín rō ñin vico nándāha, te ma cucōo ró lugar nuū yíñúhún gá. Chi núu súcuan te sanaa te je ni cana de ñin tēe cújéhnu ga vésú rohó. ⁹ Te quee tēe ni cana rōhó, te cahān de jíin ró: Ndonga, te na cucōo tēe yáha jíñā. Yūcuán na te cucanu rō jeē quihín rō cucōo ró ndé sandíhí na. ¹⁰ Chi sa suhva núu ni cana ñin tēe rōhó, te cucōo ró ndé lugar sandíhí na. Te núu quee tēe ni cana rōhó, te cahān de jíin ró: Amigo, nehen cucōo ró ñin lugar nuū yíñúhún gá, achi de. Yūcuán na te ñayuu cáyūcu mesa jíin ró coto i jeē sajéhnu de rōhó. ¹¹ Súcuan ni cahān rī jnúhun yáha návāha cuni rō jeē tāca ñayuu jeē sajéhnu i máá i, nuu i sáha Yaā Dios. Te ñayuu jeē snúu i máá i, ndujéhnu i sáha ya. Achí yá.

¹² Te suni ni cahān yā jíin téé ni cana ya yéji yā staā:

Núu sáha ró ñin vico cúsamá chí jéé cuxíni, te ma cána ró ñáyuu cácuu amigo rō, jíin ñani rō, jíin jnáhan ró, jíin ñáyuu cucá. Chí núu súcuan te suni máá i nacana i rōhó, te súcuan nanihín rō jeé ni jéhe ró. ¹³ Chí sa suhva núu sáha ró vico, te cana ró ñáyuu ndahú, ñáyuu cuhndú, ñáyuu chacuá, jíin ñáyuu cuaá. ¹⁴ Te súcuan te quendōo ndetū rō, chí ma cúu nacuāha i nuū rō. Te nihín rō tahū rō quivī nátecu ñáyuu ndaā, achí yá.

Jnūhun yátá síquī vico cúxíni

¹⁵ Te ñin tēe yéji staā jíin yá, ni jini de jnūhun yáha, te ni cahān de jíin yá:

Yōhyo ndetū ñáyuu jeé cáji staā nde ñuu nuū ndácu Yaā Dios jniñu, achí de.

¹⁶ Yūcuán na te ni cahān Jesús ñin jnūhun yátá jéé steén yā jeé cána Yaā Dios ñáyuu quivícoo i ñuu nuū ndácu ya jniñu:

Ñin tēe ni sáha de ñin vico cáhnu cuxíni, te ni tají de mozo ni cana cuehē ñáyuu. ¹⁷ Te máá quívī cuxíni, te ni tají de mozo de cuacana ñáyuu jeé quíjicoo caji staā: Nehen ní jíjnáhan ní, chí je íyó túhva ndíhi, achí mozo. ¹⁸ Te ndíhi i ni cacahān i jeé na cóne cáhnu ni de chí ma quíngoo i. Ñin tēe ni cahān de: Sáa ní jeen ri ñin ñuhun te cánuú quícondēhe rí, te na cóne cáhnu ni de chí ma jeé rī. Achí de. ¹⁹ Te inga de ni cahān: Ni jeen ri uhūn yunta stiquī, te quihín rī coto ndee rī tī, te na cóne cáhnu ni de nuū rī chí ma jeé rī, achí de. ²⁰ Te inga de ni cahān de: Sáa ní quijnáhan ri, te jeé yúcuan ma cúu jeé rī, achí de. ²¹ Te cuanuhun mozo un, te ni castūhún de nuū patrón de ndese ni cacahān ñáyuu. Yūcuán na te ni quitī ni patrón, te ni cahān de jíin mozo de: Yachí quihín rō tāca calle náhnu jíin calle lulí, te cana ró ñáyuu ndahú, ñáyuu cuhndú, ñáyuu chacuá, jíin ñáyuu cuaá, na quíjicoo i vico, achí de. ²² Te ni jehēn mozo, te ni ndee de, te ni cahān de jíin patrón de: Je ni sáha ná jéé ni cáhān ní, te cúmanī gā ñáyuu te chitú vehe ní, achí de. ²³ Te ni cahān tucu patrón: Quihín tucu ró tāca calle jíin ichi, te cana fuerza rō ñáyuu na quíjicoo i, návāha chitú vehe rī. ²⁴ Chí cáhān rī jíin ró jeé ní ñin tēe ni cana ri xíhna ñúhún, ma cuáha cuítī rī jnūhun jeé cuxíni de vehe ri, achí de. Achí yá.

Jnūhun jeé cánuú nacani vāha ni yō te condiquīn yō Cristo

²⁵ Te cuehē ndasí ñáyuu cándiquīn i Jesús cuango i jíin yá, te ni ndió cóto ya nuū i, te ni cahān yā jíin i:

²⁶ Núu na-ni ñáyuu cuní condiquīn ruhū, te núu manī gā i jíin tátá i, náná i, ñasíhí i, sēhe i, ñani i, cuāha i, vēsú jíin rúhū, ma cúu cuu i ñáyuu scuáha jíin rí. Te núu ndíhví gā ni i síquī jeé cóo vāha máá i vēsú jeé cóndiquīn i ruhū, te suni ma cúu tucu. ²⁷ Te na-ni ñáyuu núu tu jéhe i jnūhun ndoho i jnūndóho vēsú nde cuu i jeé síquī jeé cóndiquīn i ruhū, te ma cúu cuu i ñáyuu scuáha jíin rí. ²⁸ Chí núu ndé ñin ró cúní rō sáha ró ñin vehe cáhnu, ¿á tu cánuú jéé xíhna gā cucōo ró te tava rō cuenta núu canda xūhun jéé sínu ró? ²⁹ Chí núu tuú, te núu je ni jequin rō cimientó, te tu cánda xūhun ró sínu ró, yūcuán na te tāca ñáyuu sácatā i coto i rōhó. ³⁰ Te cahān i: Tēe yáha ní quejéé de sáha de vehe, te tu ní cánda de sínu de, achi i. ³¹ Te suni súcuan núu ñin rey quihín de cuajnáhan de jíin inga rey jeé véji síquī de, ¿á tu cánuú jéé xíhna gā cucōo de te nacani ni de núu canda uxī mil soldado jeé cuajnáhan de jíin inga rey jeé véji síquī de jíin ócō mil soldado? ³² Chí núu tú canda de, te níni jíca gá vēji inga rey, te tají de tēe cándiso jniñu, cajnūhún de na vé cuní inga rey jeé cuáha de nuū, te jecuiñi-ni. ³³ Te máá ró jijnáhan ró, suni súcuan cánuú jéé xíhna gā nacani ni rō cahnde ni rō stóo ró ndíhi jeé névāha ró, chí núu tuú te ma cúu cuu ró ñáyuu scuáha jíin rí.

Jnūhun yátá síquī ñiñ

(Mt. 5.13; Mr. 9.50)

³⁴ Te ñáyuu cácandíje cácuu i nájnūhun ñiñ. Vāha íyó ñiñ, te núu ñiñ ún na náā jeé uhvuá, ¿te ndese nduu uhvuá tucu? ³⁵ Tuá cuajniñu cuítī, ni jeé chúhun ñáyuu nuū ítu, ni jeé ndúu jēhen, chí máá cate iñ-ni i. Tāca rōhó jéé jíni sōho, na chúsohó ró. Achí yá.

Jnūhun yátá síquī lanchi ní sana
(Mt. 18.10-14)

15

¹ Te tāca tée cástútú xúhun renta jíin táca gá tēe cásáha cuēchi, ni quecoo de nuū Jesús jeē cuni sōho de jnūhun cáhán yā. ² Te tāca tée grupo fariseo jíin tēe cástéén tutu ley Yaā Dios, ni cacahān de síquī yā:

Tēe yáha jétáhú de tāca tēe cásáha cuēchi te yéji de jíin, áchí de.

³ Te ni cahān yā jnūhun yátá yáha jíin de:

⁴ ¿Ndé ñin ró núu névāha ró ñin ciento lanchi, te núu scuíta ró ñin tī, te á tu stóo ró cúun xico xahūn cuūn gā tī yucu, te quinanducú ró quitī ní sana ún ndé nanihīn rō tī?

⁵ Te núu ni nanihīn rō tī, te coso sūcun ró tī, te cusī ni rō. ⁶ Te núu ni ndee rō vehe ró, te nastútú ró táca amigo ró jíin ñáyuu yúcu yajni jíin ró, te cahān rō jíin i: Na cúsi ni yō, chi ni nanihīn rī lanchi ri jeē ní sana. Achi rō. ⁷ Te cáhán rī jíin ró jeē suni súcuan cúu nde andiví. Chi cúsi gā ni yā jíin ñin ñáyuu iyó cuéchi núu nacani ni i jeē stóo i cuéchi i, vésú jíin cúun xico xahūn cuūn ñáyuu iyó ndáa jeē tuá jíni ñúhún nacani ni i.

Jnūhun yátá síquī ñahan ní scuíta xūhún

⁸ Te núu ñin ñahan névāha ña uxī peso cāa, te núu scuíta ña ñin, ¿á tu nastūn ña lámpara te nastáa ña vehe, te nanducú yúcun ña nde nanihīn ña? ⁹ Te núu ni nanihīn ña, te nastútú ña táca amiga ña jíin ñáyuu yúcu yajni jíin ña, te cahān ña jíin i: Na cúsi ni yō, chi ni nanihīn rī xūhun jéē ni scuíta ri. Achi ña. ¹⁰ Te cáhán rī jíin ró jeē suni súcuan cúsi ni táca ndajéhe Yaā Dios síquī ñin ñáyuu iyó cuéchi núu nacani ni i jeē stóo i cuéchi i. Achi yá.

Jnūhun yátá síquī sūchi ní jéhēn jecó

¹¹ Te ni cahān gā yā:

Ñin tēe ni iyo uū sēhe yí de. ¹² Te tēe suchí gá ni cahān i jíin tátá i: Tátá, tahu sáva ní ndajníñu ní, te cuāha ní sava cuu tahū ná, áchí i. Te ni tahu sáva de tahū ndíndúú i. ¹³ Te ni cuu jecu-ni quiví, te tēe suchí gá un ní stutú ndíhi i ndajníñu i. Te ni quenda i cuahān i ñin ñuu jicá. Te yūcuan ní snáa i tahū i, chi ni jexīn cāhá i. ¹⁴ Te ná ni ndíhi ni jexīn i, te ni quee ñin jnamā xeén ini ñuu ún, te ni quejéé cúmanī jeē cáji i. ¹⁵ Yūcuán na te cuanducú jníñu i nuū ñin tēe ñuu ún. Te ni tají de i cuahān i rancho de jeē cóto i quínī de. ¹⁶ Te cúní i caji i vésú soō ndúchi jeē cáyeji quínī ún, návāha ndutú chíji i. Te ni ñin ñáyuu tú na vé jéhe nuū i. ¹⁷ Yūcuán na te ni quejéé i nácani ni i: Tāca mozo casájniñu vehe tátá rī, iyó cuéhē staā cáyeji i. Te ruhū chi jíi rī sōco yāhá. ¹⁸ Na quínuhun rī nuū tátá rī, te cahān rī jíin de: Tátá, ni sáha ná cuéchi nuū Yaā Dios jíin núu maá ní. ¹⁹ Vijna te nasūu gá tēe vāha cúu ná jéē cónanī ná sēhe ní. Te cuāha ní jnúhun cuu ná nájñuhun ñin mozo ni, achi rī. ²⁰ Yūcuán na te ni naquihin i ichi cuanuhun i vehe tátá i.

Te níní jíca gá vēji i, te ni jito tátá i nuū i, te ni cundáhú ni de i. Te jínu de cuajnahān de i, te ni nundee de sucūn i, te ni techūhú de i. ²¹ Yūcuán na te ni cahān i jíin de: Tátá, ni sáha ná cuéchi nuū Yaā Dios jíin núu maá ní. Vijna te nasūu gá tēe vāha cúu ná jéē cónanī ná sēhe ní. Achi i. ²² Te máá tátá i chi sa ni cahān de jíin táca mozo de: Cuáquihin sahma vāha ga te chuhun ró i. Te chuhun ró ñin xehyu ndaha i, te chihi ró ndíjēn jehē i. ²³ Te quiquihin ró becerro xéhen, te cahni rō tī na cáji yō, chi sáha yó vico. ²⁴ Chi sēhe yí rí yáha, nájñuhun je ni jihí i, te ni natecu i. Chi tu ní jíni rī ndé chi ní jéhēn i, te ni ndee i, áchí de. Te ni caquejéé de cásáha de vico.

²⁵ Te sūchi jévāha, íne i nde rancho, te vëndiji i, te ni cuyajni i yatā véhe. Te ni jini i jeē cúu yaa te cájita jéhe ñáyuu. ²⁶ Te ni cana i ñin mozo, te ni cajñuhún i na vé cúu jeē cúu. ²⁷ Te ni cachi mozo un núu i: Ni ndee ñani rō, te tátá rō ni jehni de becerro xéhen, chi ni ndee vāha i nuū de, áchí mozo. ²⁸ Yūcuán na te ni quitī ni sūchi jévāha, te tu ní cúní i ndívi i. Te ni quenda tátá i, te ni cahān ndahú de jíin i jeē na ndívi i. ²⁹ Te ni cahān i jíin tátá i: Níní sáha ná jniñu ndácu ní, te tu cúnihni cuítī ni na núu ní. Te tu jéhe ní

vēsú ñn lítú núū ná, jeē sáha ná vico caji na jíin táca amigo na. ³⁰ Te ni ndee sēhe ní yáha jeē ni jéxín cāhá i xūhun ní jíin táca ñahan. Te ni jehni ní becerro xéhen caji i, áchí i jíin tátá i. ³¹ Yūcuán na te ni cahān de jíin i: Séhē, róhó chi níni ndéé ró jíin rí, te ndíhi jeē névāha ri chi suni cuenta maá ró cúu. ³² Te vijna chi íyó váha jeē sáha yó vico te cusí ni yō. Chi ñani rō yāhá, nájnūhun ni jihí i, te ni natecu i. Chi tu ní jíiní yō ndé chi ní jéhēn i, te ni ndee i, áchí de. Achí yá.

Jnūhun yátá síquī mozo jeē ni stáhú de patrón de

16

¹ Te suni ni cahān Jesús jíin tée cáscuáha jíin yá:

Ñn tēe cúcá ní ñyo ñn mozo de jeē ndíso jníñu nuū tāca gá mozo. Te ni cacahān jíin patrón un jēē mozo un snāā cāhá ndajníñu de. ² Te ni cana de mozo un, te ni cahān de jíin: ¿Na jnūhun cúu yāha jēē nihín rí síquī rō? Nacuāha cuenta jniñu ndíso ró, chi ma cóndiso jniñu ga rō nuū mozo rí. Achí de. ³ Yūcuán na te jéni ni maá de: ¿Ndese sáha ri vijna? Chi patrón rí quenehen de jniñu ri. Te tú ndacuī rí jeē cáte ri ñuhun, te jeē cacán rí caridad chi cúcanu rí. ⁴ Núu súcuan te jíin rí ñn jeē sáha ri, návāha ñayuu cájeen nuū patrón rí, cuāha i vehe condee rí núu na quée quiví jeē quenehen de jniñu ri. ⁵ Te ni cana de ná ñn ná ñn tēe jeē cátaū nuū patrón de. Te ni cajnūhún de ñn: ¿Nasaa táu rō nuū patrón rí? ⁶ Te ni cahān tēe ún: ñn ciento barril aceite, achí de. Te ni cahān mozo un: Yāhá na cuáha ri lista rō, te cucōo yachí rō, te na sáha ró inga lista jeē uú xico uxí na, achí de. ⁷ Yūcuán na te ni cajnūhún de inga tēe: Te róhó, ¿nasaa táu rō? Te tēe un ní cahān de: ñn ciento cajón trigo, achí de. Te ni cahān de jíin tēe ún: Yāhá na cuáha ri lista rō, te na sáha ró inga lista jeē cuún xico na, achí de. ⁸ Yūcuán na te patrón ni cahān de: Nacā jeē ndichí ní sáha tēe cúnéé un, achí de. Te cáhán rí jíin ró jeē ñayuu ñayívi yáha, ndichí gá casáha i jeē quendōo vāha i nuū jnáhan i, vēsú ñayuu cácadíje nuū Yaā Dios.

⁹ Núu súcuan te cáhán rí jíin ró jeē ndichí gá na sáha ró vēsú jeē ni sáha mozo ndichí un. Chi ini ñayívi yáha nuū yíhi cuēchi, na sáha ró jniñu váha jíin xūhun ró, cuāha ró núu ñayuu ndahú, návāha vēsú núu ni ndíhi xūhun ró ñayívi yáha, te quívicoo ró andiví núu coo vehe ró ní cáni.

¹⁰ Tēe jeē squícu vāha jíin ñn jniñu lúlí-ni, suni squícu vāha de jíin jniñu cáhnu. Te tēe jeē stahú jíin ñn jniñu lúlí-ni, suni stáhú de jíin jniñu cáhnu. ¹¹ Núu súcuan te núu tu squícu vāha ró jíin xūhun jeē iyó ñayívi yáha nuū yíhi cuēchi, te ma cuáha ya jeē váha cuu ró ní cáni andiví. ¹² Te núu tu squícu vāha ró jíin ndajníñu jeē ni jéhe núu ya nuū rō ñayívi yáha, te ma cuáha ya tahū cuu ró ní cáni.

¹³ Ni ñn mozo ma cúu cuajníñu de nuū uū patrón. Chi quití ni de nuū ñn te coo maní de jíin inga, chí squícu vāha de nuū ñn te sájéē ni de nuū inga. Te suni súcuan ma cúu cuajníñu ró núu Yaā Dios te núu máni síquī xūhun ndíhví ni rō, achí yá.

¹⁴ Te tēe fariseo ni casácatā de nuū yā jeē ní cajini de tāca jnúhun cáhán yā, chi tēe cútóo xūhun cácuu de. ¹⁵ Te ni cahān yā jíin de:

Máá ró casáha ró jēē tēe ndaā cácuu ró núu ñayuu. Te Yaā Dios chi jíiní yā ndese cāa ini anuá rō. Chi jniñu cájeni ni ñayuu jeē jniñu jéhnú cúu, te nuū Yaā Dios chi jniñu néé cúu.

Síquī ley Yaā Dios jíin síquī jeē ndácu ya jniñu

¹⁶ Nde ná tu quiji Juan tēe scuándute, te ni ñyo ley jeē ni jéhe Yaā Dios nuū Moisés, te suni ni castéén tāca tēe cánacani jnūhun ya. Yūcuán na te ná ni quiji Juan, te ni quejéé jítē núu jnūhun vāha ndese ndácu Yaā Dios jniñu. Te tāca ñayuu nducú ndéyí i quívicoo i ndaha ya.

¹⁷ Te yí gá cúu jeē náā ñn letra nuū tútu ley yā vēsú jeē náā andiví jíin ñayívi, chi squícu ndíhi jnūhun cáhán.

Síquī jeē ma stóo jnáhan tēe jíin ñahan

(Mt. 19.1-12; Mr. 10.1-12)

¹⁸ Núu ñin tēe stóo de ñasihí de te quijnáhan de jíin inga ñahan, núu súcuan te cásiquí ndéē de ña. Te núu ñin tēe condeca de ñahan ní ndusñin, suni cásiquí ndéē de ña, áchí yá.

Jnūhun tēe cúcá jíin Lázaro

¹⁹ Te ni cahān gā yā:

Ni iyo ñin tēe cúcá, ní ñuhun de sahma lúu váha ndasí. Te ndiquiví ni iyo váha ndasí jēē ní yeji de. ²⁰ Te suni ni iyo ñin tēe ndáhú, nání de Lázaro, néne de yéhyí tēe cúcá un, te níí cáhnu de íin ndíhyi. ²¹ Te máni cúní de jeē ndutú chíji de jíin stáā cuēchi jeē stívi tēe cúcá un. Te quécoo ina te cánayuu ti nuū ndíhyi de. ²² Te ni jihí tēe ndáhú un, te tēcá ndajéhé Yaā Dios cuango ya jíin ánuá de nde andiví nuū néne Abraham. Te suni ni jihí tēe cúcá un, te ni quindūji de. ²³ Te tēe cúcá un xeēn ndóho de íne de lugar nuū cáyūcu ndíyí tu ní cándíje. Te ni ndacoto de, te nde jicá ní jito de nuū Abraham, te néne Lázaro jíin de. ²⁴ Yūcuán na te ni cana cóhó de: Tátā Abraham, cundáhú ni ni sáña, te tají ní Lázaro, na quíchundaji de xiní ndáha de nuū ndúte, te quiji de stáji de yáá ná. Chi xeēn ndóho ná núu yáñuhūn yāhá. Achí de. ²⁵ Te ni cahān Abraham jíin de: Séhē, nucūhun ni rō jeē ni níhīn rō ndíhi jeē váha ná ni cotecu rō, te Lázaro chi sa suhva jnūndóho ni níhīn de. Te vijna je ni ndusñi ni de yāhá, te rōhó chi ndóho ró jíinā. ²⁶ Te suni íyó ñin jeē cunú téyí, íne mēhñu yó jijnáhan yó. Te ñayuu cáhiin yāhá, vēsú cācuni i yāha i jeē i nuū rō, te ma cúu. Te ni ma cúu yāha máá ró quijicoo ró yāha. Achí Abraham. ²⁷ Yūcuán na te ni cahān tēe cúcá: Núu súcuan te cáhán ndahú ná jíin ní, Tátā Abraham, tají ní Lázaro na quíhín de vehe tátá na. ²⁸ Chi íyó úhūn gā ñani ná, te na quícachi de nuū i jeē na nācani ni i te stóo i cuēchi i, návāha ma quívicoo i nuū ndóho ná yāha, áchí de. ²⁹ Te ni cahān Abraham jíin de: Je cánevāha i tutu jeē ní tee Moisés jíin táca tēe ni canacani jnūhun Yaā Dios. Suu yūcuán na chúhun ni i, áchí Abraham. ³⁰ Te ni cahān tucu tēe cúcá: Vēsú súcuan, Tátā Abraham, te núu ñin ñayuu ni jihí quíhīn nuū i, yūcuán na te nacani ni i jeē stóo i cuēchi i, áchí de. ³¹ Te ni cahān Abraham jíin de: Núu tu chúhun ni i jnūhun ni nacani Moisés jíin táca tēe ni canacani jnūhun Yaā Dios, suni ma candíje cuítí i núu natecu ñin ndíyí quíhīn nuū i, áchí de.

*Xeēn coo siquí ñáyuu squíví jnáhan nuū cuéchi
(Mt. 18.6-7, 21-22; Mr. 9.42)*

17

¹ Te ni cahān Jesús jíin tēe cáscuáha jíin yá:

Máni íyó jēē nducú squíví ñayuu nuū cuéchi. Te nacā xeēn ndoho ñayuu jeē squíví jnáhan nuū cuéchi. ² Vāha ga núu ni conuhnī ñin yōso cáhnu sucūn i te quēe i chíji ndute mar, vēsú jeē squíví i ñin sūchi lúlí yáha núu cuéchi. ³ Coto ma sáha ró súcuan jijnáhan ró.

Te núu jnáhan ró sáha de cuéchi siquí rō, te cahān rō nuū de. Te núu nacani ni de, te cone cáhnu ni rō nuū de. ⁴ Te núu uxā jínu jeē ñin quiví sáha de cuéchi siquí rō, te núu uxā jínu nācani ni de te cahān de jíin ró jeē cone cáhnu ni rō chi ma sáha ga de, te cánuú cone cáhnu ni rō nuū de. Achí yá.

Jeē yóhoyo cújéhnū jnūhun cándíje

⁵ Te tēe cácuu apóstol ni cacahān de jíin Jítóho yō:

Sáha ní jēē níhīn ga candíje ná jēē sáha Yaā Dios jeē cájicān na núu yā, achí de.

⁶ Te ni cahān máá Jítóho yō jíin de:

Núu cáncandíje ró vēsú ñin tíhli-ni, nájnūhun ñin ndiquin mostaza jeē tihli-ni cáa, te cuu cahān rō jeē nuyūhndu yáha na quénda te nucondichi nde nuū mar, te coo nájnūhun cahān rō.

Jeē cánuú squícu vāha yó núu yā

⁷ Ndé ñin ró íyó mozo rō jeē jítu de chí ndíto de quítí ndéca ró, te núu ni najinū de vehe ró, te tu cáhán rō jíin de jeē cúcōo de caji de stāā. ⁸ Chi sa suhva cáhán rō: Sáha ró ndeyu cuxíni ri, te caní ró cóhō rī. Te núu ni cuu ni yeji rī ni jihí ri, yūcuán na te caji máá ró

coho ró, cácahān rō. ⁹ Te cácahān rō jeē tu cánuú nacuatáhu ró nuū mozo núu ni sáha de jniñu ní ndacu ró, chi jeē cánuú sáha de cúu. ¹⁰ Te suni súcuan máá ró jijnáhan ró, cácuu ró mozo Yaā Dios. Te núu ni casquícu ró táca jniñu ní ndacu ya nuū rō, te cahān rō: Tu cánuú nacuatáhu yá nuū rī, chi ni sáha ri máá-ni jeē cánuú sáha ri, achi rō. Achí yá.

Jeē ní nasávāha ya uxī tēe ndóho cuehyī stehyú

¹¹ Te jícá Jesús ichi cuahān yā ñuu Jerusalén, te ni yāha ya cuahān yā mēhñú región Samaria jíin Galilea. ¹² Te ni jinū yā ñn ñuu, te uxī tēe ndóho cuehyī stehyú ni quendacoo de vejnahan de ya, te jícá ní cajecuiñī de. ¹³ Te ni cacana jee de:

Jesús, Maestro, cundáhu ni ni sáña, áchí de jíjnáhan de.

¹⁴ Te ni jito Jesús nuū de, te ni cahān yā jíin de:

Cuángoo te stéén rō maá ró nuū tāca sūtū jeē ní canduvāha ró, áchí yá.

Te níni cuángoo de te ni canduvāha-ni de. ¹⁵ Yūcuán na te ñn-ni de ni nandió cóo de nuū Jesús, te cáhán jee de, nácuatáhu de nuū Yaā Dios jeē ní nduvāha de. ¹⁶ Te ni jecuiñī yití de nuū yā, te ni jequin de nuū de nde nuū ññhun, te ni nacuatáhu de nuū yā. Te tēe Samaria cúu de. ¹⁷ Te ni cahān Jesús:

¿A násūú ndihúxí de ni canduvāha? Te ñn gā de, ¿naun tu ní cánandicó de nacuatáhu de? ¹⁸ ¿A máñuhún-ni tēe ñuu jicá yáha cúu jeē ní nandicó de nácuatáhu de nuū Yaā Dios?

¹⁹ Te ni cahān yā jíin tēe ún:

Ndocuiñī quinhun rō. Chi ni candíje ró jéē cuu nasávāha ri rohó, te jeē yúcuan ní nduvāha ró, áchí yá.

Ndese coo quivī jeē ndíji ya ndacu ya jniñu

(Mt. 24.23-28, 36-41)

²⁰ Te tēe fariseo ni cacajñuhún de Jesús ndé quívī quejéé jéē ndácu Yaā Dios jniñu ini ñayví. Te ni cahān yā jíin de:

Ma quéē ndijin jeē ndácu Yaā Dios jniñu. ²¹ Ni ma cúu cahān ñayuu: Yāha íne ya ndácu ya jniñu, chí: Yūcuán íne ya, achi i. Chi je ndácu Yaā Dios jniñu mēhñu ró jijnáhan ró. Achí yá.

²² Yūcuán na te ni cahān yā jíin tēe cáscuáha jíin yá:

Quee tiempo jeē yóhyo cúu ni rō coto ró jéē ndíji ruhū, Yaā ní nduu tēe, te ma cóto ró jíjnáhan ró. ²³ Te cahān ñayuu jíin ró: Yāha íne ya, chí: Yūcuán íne ya, achi i. Te ma quíngoo ró condēhe ró, ni ma cóndiquin rō i. ²⁴ Chi nájnūhun sáha taja jeē ndíndēé ñn lado andíví te cúndijin nde inga lado, suni súcuan cuu quivī ndíji ruhū, Yaā ní nduu tēe, chi ndíhi ñayuu coto. ²⁵ Te jíni ññuhún jéē xíhna gā ndoho xeēn rī, te ñayuu iyó vijna, squéhichí i ruhū. ²⁶ Chi nájnūhun ni cuu quivī ni íyo Noé, suni súcuan cuu quivī ndíji ruhū, Yaā ní nduu tēe. ²⁷ Chi quivī un ní cayejí i, ni cajihí i, ni canandāha i, ni cajēhe i sēhe síhí i jeē nándāha, nde ni jinū quivī jeē ní quíví Noé ini barco cáhnu jeē naní arca. Te ni cuun saū xeén, te ni ndaa ndute ni cajihí ndíhi i. ²⁸ Te suni súcuan ní cuu quivī ni íyo Lot. Ni cayejí i, ni cajihí i, ni cajeen i, ni caxícó i, ni catajé i itu, ni cajeni i vehe. ²⁹ Te quivī jeē ní quenda Lot ini ñuu Sodoma cuahān de, te ni cuun ññuhún jíin azufre ichi ándíví, te ni snáa ndíhi ñayuu. ³⁰ Te suni súcuan coo quivī jeē ndíji ruhū, Yaā ní nduu tēe.

³¹ Te quivī un te ñayuu cáhiin yatā véhe, te ndajñíñu i ññuhún ini vehe, cáhán rī jíin i jeē ma ndívi i naquihin i, chi cánuú cunu yachí i jeē cácu i. Te suni súcuan ñayuu casájñíñu nuū ítu, ma quíñuhun i vehe i jeē quíhín i ndajñíñu i. ³² Te nucūhun ni rō ndese ni ndoho ñasíhí Lot jeē ni jíhí ña. ³³ Te núu ndé ñayuu cuní i cācu i nuū jnúndóho quiñi nuū i jeē síquí ruhū, núu súcuan te jnahnū ndetū i ní cání. Te núu ndé ñayuu, vésú na cúu i jeē síquí ruhū, te cotecu i ní cání.

³⁴ Te cáhán rī jíin ró jeē quivī ndíji ri te quíxí uū tēe ñn jito jecuáa, te ñn de naquihin ri, te inga de ndōo, chi tu ní cándíje de. ³⁵ Te coo uū ñahan jeē ndíco cáhnu, te ñn ña naquihin ri, te inga ña ndōo. ³⁶ Te uū tēe sájñíñu de nuū ítu, te ñn de naquihin ri, te inga de ndōo. Achí yá.

³⁷ Te jeē ní cajini de jnūhun yáha, te ni cacajñūhún de ya:
¿Ndé mí coo súcuan nájñūhun ni cahān ní? Achí de.

Te ni cahān yā jíin de:

Nájñūhun jeē cutútú téji ndé-ni cúu nuū catú quití ní jíhī, suni súcuan coo tāca jēē ni cahān rī ndé-ni cúu-ni nuū cáhiyo ñayuu.

Jñūhun yátá síquī juez jíin ñahan viuda

18

¹ Te ni cahān yā ñin jñūhun yátá jíin de jeē cánuú jeē niní cācān tahu de, te ma ndínuu ni de jíin. ² Te ni cahān yā:

Ni iyo ñin juez ini ñin ñuu. Te ni tu ndíso iyo de nuū Yaā Dios, ni tu yúhú de nuū ní ñin ñayuu. ³ Te suni ñuu un íyó ñin ñahan ní ndóo ndáhú. Te ñahan un jéhén-ni jéhén-ni ña nuū de, jícan ña jeē na sándaā de síquī ñin ñayuu jeē jíto uhū i ña. ⁴ Te cuehē quivī tu ní cúní de sándaā de, te yūcuán na te ni jeni ni de: Vēsú tu ndíso iyo ri nuū Yaā Dios, ni tu yúhú rí nuū ní ñin ñayuu, ⁵ te ñahan viuda yáha, yōhyo stáhān ña ruhū, te jeē yúcuan na sándaā rī síquī ñáyuu jeē jíto uhū i ña. Chi núu tuú, te quejéé rí jnaníní ni rī jeē quíji quíji ña. Achí de. Achí máá Jítóho yō.

⁶ Te ni cahān gā yā:

Súcuan cúu jeē ni cáhān juez, tēe tú ndaā. ⁷ Te Yaā Dios, nasūu súcuan cúu ya, chi sándaā yā síquī jñíñu ñayuu ní nacāji ya jeē nduú ñuú cácahān ndahú i jíin yá. Chi jnama ya i nuū tāca jēē cájito uhū i. ¿Te á cuéé jnama ya i? ⁸ Cáhān rī jíin ró jeē yachī. Te quivī ndíji ruhū, Yaā ní nduu tēe, ¿á níhīn gā rī ñayuu cácañdije níhīn ini ñayiví? Achí yá.

Jñūhun yátá síquī tēe fariseo jíin tēe stútú xúhun renta

⁹ Te suni ni cahān yā jñūhun yátá yáha jíin jecu ñayuu jeē cájeni ni i jeē ñáyuu ndaā cácuu i, te cájeni ni i jeē sava ga ñayuu tu cáhiyo ndaā:

¹⁰ ñin tēe fariseo cuahān de templo jeē cacān tahu de. Te ñin tēe stútú xúhun renta suni cuacacān tahu de templo. ¹¹ Te tēe fariseo, índichi de, te súcuan ni jícan tahu de: Tátā Yaā Dios, na cútahū na núu ní, chi tu cúu ná nájñūhun cándaā sava ga tēe, tēe cuíhná, tēe néé, tēe cásíquī ndéē jñāhan cácuu de. Ni tu cúu ná nájñūhun cáa tēe yúcuan jēe stútú xúhun renta jeē scáa ga de jícan de nuū ñáyuu. ¹² Te uū jínu jeē semana iyó ndite ni na núu ní, te jéhe ná nuū ní ñin ñin síquī tāca úxī ndajníñu níhīn na, achí de. ¹³ Te tēe stútú xúhun renta, ni jecuíñī jicá de nuū templo, ni tu ní chúndeyí ni de jeē ndonehen de nuū de, chi sa suhva ni cani de yīquī jíca de jeē cucuíhyá ni de. Te ni cahān de: Tátā Yaā Dios, cundáhú ni ni sáña, chi tēe íyó cuéchi cúu ná, achí de. ¹⁴ Te cáhān rī jíin ró jeē tēe stútú xúhun renta, ni jetáhú Yaā Dios de, te cuanuhun de vehe de. Te tēe fariseo chi tu ní jétáhú yá de. Chi ñayuu jeē sajhēnu i máá i, sa ndululí i. Te ñayuu jeē sálulí i máá i, sa ndujéhnu i. Achí yá.

Jeē ni jícan tahu Jesús jehē sūchi lúli

(Mt. 19.13-15; Mr. 10.13-16)

¹⁵ Te ni quecoo ñayuu jíin sūchi lúli núu Jesús, jeē na sóo yá ndaha ya xiní i. Te tēe cáscuáha un ní cajini de jeē súcuan cúu, te ni cacahān de nuū ñáyuu vējicoo jíin i. ¹⁶ Te máá Jesús ni cana ya de, te ni cahān yā:

Cuāha jñūhun na quíjicoo sūchi lúli jíñā nuū rī, te ma cási rō jeē quíjicoo i. Chi ñayuu jeē ndió cóo ni i cani ni i nájñūhun sūchi yáha, suu i quívī ndaha Yaā Dios jeē ndacu ya jniñu nuū i. ¹⁷ Te jendaá cahān rī jíin ró, núu ñin ñayuu tú cuatáhú i jeē ndácu Yaā Dios jniñu nuū i, nájñūhun jétáhú ñin sūchi lúli, ma quívī cuítí i ndaha ya, achí yá.

Jñūhun tēe cúca

(Mt. 19.16-30; Mr. 10.17-31)

¹⁸ Te ñin tēe cújéhnu ni cajñūhún de ya:

Tēe vāha cúu ní Maestro. ¿Te na jniñu váha sáha ná te níhīn tahu na cotecu na níí cáni andiví? Achí de.

¹⁹ Te ni cahān Jesús jíin de:

¿Naun cáhán rō jeē tēe vāha cúu ri? Tú ni ìin tēe vāha íyó, chi máá ìin-ni Yaā Dios.

²⁰ Je jíiní rō tācá jniñu ní ndacu Yaā Dios: Ma cosíquí ndéē jnáhan rō. Ma cáhni rō ndīyí. Ma sacuíhná rō. Ma sajnúhún rō. Cuatáhú rō nuū tatá rō nuū naná rō. Achí yá.

²¹ Te ni cahān maá de:

Tācá jniñu yáha je ni squícu ná ndé ná lulí ná, achí de.

²² Te Jesús ni jini ya jnūhun yáha, te ni cahān yā jíin de:

Ìin na jniñu cúmaní sáha rō núu súcuan. Xícó ndīhi jeē névāha rō, te cuāha rō núu ñáyuu ndahú. Te nde andiví cuāha ya jeē vāha ndasí núu rō. Yūcuán na te quiji rō condiquin rō ruhū, achí yá.

²³ Te ná ni jini sōho de jnūhun yáha, te yōhyo ni cucuíhyá ni de, chi cúcá ndasí de. ²⁴ Te jíto Jesús jeē súcuan cúcuíhyá ni de, te ni cahān yā:

Tēe cúcá chi yōhyo yí quívicoo de ndaha Yaā Dios jeē ndacu ya jniñu nuū de. ²⁵ Yachí gā yāha ìin camello yaū yutícuí vēsú jeē quívi ìin ñayuu cucá ndaha Yaā Dios jeē ndacu ya jniñu nuū i, achí yá.

²⁶ Te tēe ní cajini jnūhun yáha, ní cacahān de:

¿Ndé ñáyuu cúu jeē cácu núu súcuan? Achí de.

²⁷ Te ni cahān yā jíin de:

Ñayuu chi ma cúu squívi i máá i ndaha Yaā Dios, te máá yá chi cuu sáha ya, achí yá.

²⁸ Yūcuán na te ni cahān Pedro:

Sāña jíjnáhan ná ní castóo ná ndīhi jeē cánevāha ná, te cándiquin na níhín, achí de.

²⁹ Te máá yá ni cahān yā jíin de:

Jendaá cahán rī jíin rō jíjnáhan rō, núu na-ni ñayuu stóo i vehe, chí tátá, chí ñani, chí ñasihí, chí séhe, jeē siquí jeē scáca i jnūhun jeē ndácu Yaā Dios jniñu nuū ñáyuu, ³⁰ núu súcuan te nanihín cuehē gā i ini ñayívi yáha, te tiempo quiji te cotecu i níí cáni, achí yá.

Jeē ni cahān tucu ya jeē cúu yā

(Mt. 20.17-19; Mr. 10.32-34)

³¹ Te ni cana sñin ya ndihúxí uū tēe cáscuáha jíin yá, te ni cahān yā jíin de:

Vijna je cuángoo yó ñuu Jerusalén. Te yūcuan squícu ndīhi jnūhun ndese ndoho ruhū, Yaā ní nduu tēe, nájñūhun ni catee tēe ni canacani jnūhun Yaā Dios nde jenahán. ³² Chi ñayuu nastúu i ruhū nuū tēe nación Roma jeē cáyūcú Jerusalén cándacu jniñu. Te tēe un sácatā de nuū rī, te cahān neé de nuū rī, te tesíhí de nuū rī. ³³ Te caní de ruhū, te sáá te cahni de ruhū. Te nuū uní quiví te natecu rī. Achí yá.

³⁴ Te máá de tu ní cájecūhun cuiti ni de tāca jnúhun yáha. Chi jnūhun yí cúu, te tu ní cúu jecūhun ni de jeē cahán yā.

Jeē ní nasávāha ya ìin tēe cuáá ñuu Jericó

(Mt. 20.29-34; Mr. 10.46-52)

³⁵ Te ni cuyajni ya cuahān yā ñuu Jericó. Te ìin tēe cuáá néne de yuhíchi, jícan de caridad. ³⁶ Te ni jini sōho de jeē yáha cuehē ñayuu cuangoo i, te ni cajñūhún de naun cuángoo i. ³⁷ Te ni cacahān i jíin de jeē Jesús, tēe ñuu Nazaret, yáha ya cuahān yā.

³⁸ Yūcuán na te ni cana jee de:

Jesús Sēhe yucūn David, cundáhú ni ni sáña, achí de.

³⁹ Te ñayuu cuangoo ichi núu yā, ni cacahān i nuū de jeē na cási de yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ni sáña víi, achí de.

⁴⁰ Yūcuán na te ni jecuíñ Jesús, te ni cahān yā jeē na quindeca i de. Te nuū ní cuyajni de nuū yā, te ni cajñūhun yá de:

⁴¹ ¿Na vé cuní rō jeē sáha ri jíin rō? achí yá.

Te ni cahān de:

Jeē na ndúndijin tinūu ná cuní na, achí de.

⁴² Te ni cahān Jesús jíin de:

Ndundijin tinūu ró núu súcuan. Ni candíje ró jeē cuu nasávāha ri rohó, te jeē yúcuan ní nduvāha ró, áchí yá.

⁴³ Te ni ndundijin-ni tinūú de, te ni ndiquin de ya, te nácuatáhú de nuū Yaā Dios. Te ndihí ñayuu jeē ní cajito i, suni ni cacahān i jeē yóhyo vāha Yaā cúu Yaā Dios.

Jnūhun Zaqueo

19

¹ Te ni quiví Jesús ini ñuu Jericó, te ni yāha-ni ya cuahān yā. ² Te yūcuan íyó ñn tēe cúcá nání de Zaqueo, te cújéhnú de nuū tēe cástútú xūhun renta. ³ Te cúní de coto de návāha cuni de ndé ñn cúu Jesús. Te tu ní cúu, chi cuehē ñayuu cuango i jín yá, te ndiqui-ni cáa de. ⁴ Te jínu de ni cosnūú de. Te ni caa de xiní ñn nuyūhndú návāha coto de nuū yā, chi yūcuan yáha ya quihín yā. ⁵ Te ni jinū yā yūcuán, te ni ndacoto ndaa ya nuū de. Te ni cahān yā:

Zaqueo, yachí nuu ró, chi jíní ñúhún jeē ndóo ri vehe ró vijna, áchí yá.

⁶ Yūcuán na te ni cusí ni de, te yachí ni nanuu de, te ni jeca de ya cuahān de jín yá vehe de. ⁷ Te ni cajito ñayuu jeē súcuan ni cuu, te ni cacahān i síquī yā jeē cuahán yā ndóo ya vehe ñn tēe sáha cuēchi. ⁸ Yūcuán na te ni ndocuiñí Zaqueo, te ni cahān de jín máá Jítoho yō:

Vijna te sava ndihí ndajniñu ná chi cuāha ná núu ñayuu ndahú. Te núu ni scáa ga na ní jicān na xūhun nuū ñayuu, te nacūāha ná úní gā síquī naquihin i, áchí de.

⁹ Te ni cahān Jesús:

Vijna te vehe yáha je ni cācu ñn tēe jeē ma jahnú ndetū de, chi ni candíje de nájñuhun ni candíje jí de Abraham. ¹⁰ Chi ruhū, Yaā ní nduu tēe, ni quiji ri nducú rí ñayuu jeē jahnú ndetū, te jnama ri i, áchí yá.

Jnūhun yátá síquī uxí mozo jín xūhun

¹¹ Te nuū ñayuu ní cajini tāca jnúhun yáha, ní cahān gā Jesús ñn jnūhun yátá jeē steén yā ndese coo quiví ndíji ya. Chi je ni cuyajni ya ñuu Jerusalén, te cájeni ni i jeē vjna ñúhún quejé jeē ndácu ya jniñu sáha Yaā Dios. ¹² Te ni cahān yā:

Ñn tēe cújéhnú cuahān jicá de ñnga nación, návāha nihín jniñu de cuu de rey, te ndiji de ndacu de jniñu. ¹³ Te nde ná tu quihín de, te ni cana de uxí mozo de, te nuū ñn ñn i ni jéhe de ñn xūhun jéē ndeé yahu ndasí. Te ni cahān de jín i: Sájniñu ró jeē na ndúcuehē xūhun yáha jínáhan ró níni jéē quihín rí te ndee rí, achí de. ¹⁴ Te ñayuu nación de cáquití ni i nuū de, te ni cataj i jecu tēe cándiso jniñu cuango yatā de jeē cahān: Tu cánujnahan ni ñayuu nación na jéē cuāha ní jniñu nuū tēe yáha jéē cuu de rey nuū i, áchí. ¹⁵ Te vésú súcuan te ni nihín jniñu de cuu de rey, te vendiji de nación de. Te nuū ní ndee de, te ni ndacu de jniñu jeē na quíjicoo mozo jeē ni jéhe de xūhun núu, návāha na cúní de nasaa ni canihín ñn ñn i síquī. ¹⁶ Te ni quee ñn mozo un núu de, te ni cahān i: ñn xūhun jéē ni jéhe ní núu ná, ni nduu uxí, achí i. ¹⁷ Te ni cahān maá rey: Vāha mozo cúu ró, te vāha ni sáha ró. Chi ni squícu vāha ró jín ñn jniñu lúli-ni, te vijna te sáha ri jeē cujéhnú ró ndacu ró jniñu nuū uxí ñuu jniñi ri, achí de. ¹⁸ Te ni quee ñnga mozo, te ni cahān i: ñn xūhun jéē ni jéhe ní núu ná, ni nduu uhūn, achí i. ¹⁹ Te suni ni cahān de jín mozo un: Róhó, cujéhnú ró ndacu ró jniñu nuū uhún ñuu jniñi ri, achí de. ²⁰ Te ni quee ñnga mozo, ni cahān i: Yāha nácuāha ná xūhun ní, chi ni chuvāha ná ini ñn pañuelo. ²¹ Chi ni yūhu ná nihín, chi tēe xeēn cúu ní. Chi cuehē gā nándacān ní vésú jeē ni jéhe ní, te cuehē gā cúní ni vésú jeē cúu sáha mozo ní, achí de. ²² Yūcuán na te ni cahān rey: Mozo neé cúu ró núu súcuan, te jín jnúhun ni cahān rō te sándaā rí jeē iyó cuéchi ró jéē tu ní sájniñu ró jín xūhun rí. Chi jéni ni rō jeē tēe xeēn cúu ri, te cuehē gā nándacān rí vésú jeē ni jéhe ri, te cuehē gā cúní rí vésú jeē cúu sáha mozo rí. ²³ Núu súcuan ¿te naun tu ní chune ró xūhun rí vésú nuū banco? Te jeē ní ndee rí te naquihin ri xūhun rí nde jín séhe xūhun núu. Achí de. ²⁴ Te ni cahān de jín ñayuu cáhiin yūcuán: Quende xūhun jínā nuū i, te cuāha ró núu mozo jeē névāha uxí, achí de. ²⁵ Te ñayuu un ní cacahān i jín de: Te ndese,

chi je névāha de uxī, achí i. ²⁶ Te ni cahān tucu rey: Cáhán rī jíin ró jeē ñáyuu je névāha, sa quiji ga nuū i, te conevehā cuehē i. Te ñáyuu jeē tu névāha, sa cujiyo-ni vēsú jecu jeē névāha i. ²⁷ Te tēe jeē cájito uhū ruhū, jeē tu ní cánujnahan ni de jeē cuu ri rey nuū de, cuáquihin de na quíjicoo de yāhá. Te cahni rō de coto ri, achí de. Achí Jesús.

Jeē ni quívi Jesús ñuu Jerusalén

(Mt. 21.1-11; Mr. 11.1-11; Jn. 12.12-19)

²⁸ Te nuū ní ndīhi ni cahān yā jnūhun yāha, te ni jica ga yā cuahān yā ñuu Jerusalén. ²⁹ Te nuū ní cuyajni ya ñuu Betfagé jíin ñuu Betania, yajni nuū íne yucu nání yucu Olivos, te ni tají yá uū tēe cáscuáha jíin yá jeē quíngoo de. ³⁰ Te achí yá jíin de:

Cuáhán ñuu lulí íne ichi núú. Te núu ni quívi ró, te nihīn rō ñn burro núhni tī, jeē ní ñn tēe ná tu coso de tī. Te ndají ró tī quiji ró jíin tī. ³¹ Te núu ndé ñn cajnūhún naun cándají ró tī, te cahān rō jíin: Máá Jítóho yō jíni ñúhún yá tī, achí rō. Achí yá.

³² Te cuango tēe ni tají yá, te ni canihīn de tī nájñūhun ni cahān yā jíin de. ³³ Te jeē cándají de tī, te ni cacahān jítóho tī jíin de:

¿Naun cándají ró burro ri? achí.

³⁴ Te ni cacahān de:

Máá Jítóho yō jíni ñúhún yá tī.

³⁵ Te ni ndecoo de jíin tī nuū Jesús. Te ni casoó de sahma de siquī tī, te ni casáha de jeē ní jecosō yā siquī tī. ³⁶ Te ná-ni cuahān yā, sáá cáscáá ñáyuu sahma i ini ichi. ³⁷ Te nuū ní cuyajni ya nuū cúun ichi yucu Olivos, te ndīhi ñáyuu cácdíje jeē cándiquīn i ya, ni caquejéé i cácusī ni i, te cácana jee i jeē yóhyo vāha Yaā cúu Yaā Dios siquī táca jniñu jéhu ni sáha ya ni cajito i. ³⁸ Te achí i:

Yóhyo vāha Yaā cúu Rey jeē véji jíin jniñu máá Jítóho yō Yaā Dios. Te sáha ya jeē cóo maní yō jíin Yaā Dios andíví. Te yóhyo cújéhu Yaā Dios, achí i jíjnáhan i.

³⁹ Yūcuán na te jecu tēe fariseo cáhiin mēhñu ñáyuu cuehē ún, ní cacahān de jíin yá: Maestro, cahān ni núú ñáyuu cándiquīn nihín jéé na cási i yuhu i, achí de.

⁴⁰ Te ni cahān Jesús:

Cáhán rī jíin ró jeē núu ñáyuu yāha na cási i yuhu i, te tāca yúu chi cana jee, achí yá.

⁴¹ Te nuū ní cuyajni ya Jerusalén, te ni jito ya ñuu ún, te ni ndahyū yā siquī. ⁴² Te ni cahān yā:

Róhó ñáyuu Jerusalén, yóhyo ni cuu ni rī jeē na jécūhun ni rō jeē cuu ndumaní rō jíin Yaā Dios sáha ri. Te siquī jeē tu cácdíje ró, te vijna chi ma cúu ga jecūhun ni rō. ⁴³ Chi quee quiví jeē coo jnūndóho, te ñáyuu cájito uhū rohó, cuicó ndúu i ñuu rō, te casi cutú i jíin yúu, te tāca lado ndonda i siquī rō. ⁴⁴ Te ndīhi vehe scótúu i, te cahni i róhó jíjnáhan ró. Te ma stóo i ni ñn vehe jeē cóso jnáhan ga yuū. Chi ni quiji ri nde nuū Yaā Dios jeē jnáma ri rohó, te tu ní cácdíje ró. Achí yá.

Jeē ní quenehen ya ñáyuu ini templo

(Mt. 21.12-17; Mr. 11.15-19; Jn. 2.13-22)

⁴⁵ Te ni quívi ya ini templo cáhnu, te ni quejéé yá quenehen ya tāca ñáyuu cájeen quiti te cánaxico núu ñáyuu jeē socō i. ⁴⁶ Te ni cahān yā jíin i:

Yósó núu tútu ñn jeē cahān Yaā Dios: Vehe ri chi vehe nuū cájicān tahu cúu, achí Yaā Dios. Te máá ró jíjnáhan ró, chi nájñūhun yaū cava ñacuīhna ní canasáha ró, achí yá.

⁴⁷ Te ndiquiví ni steén yā jnūhun ini templo. Te sutū cácdíje nuū tēe cástéén tutu ley Yaā Dios jíin tēe cácdíje nuū ñáyuu ñuu ún, cánducú de modo ndese cahni de ya. ⁴⁸ Te tu cánihin de modo sáha de, chi ndívii ñáyuu yóhyo cájetáhu i cájini nahín i jnūhun cáhán yā.

Siquī jeē ndíso jniñu Jesús

(Mt. 21.23-27; Mr. 11.27-33)

20

¹ Te ñin quiv̄i steén yā jnūhun nuū ñáyuu ini templo, te nácani ya jnūhun jeē jnáma Yaā Dios ñayuu. Te ni quecoo sutū cácujuhnu jíin tée cástéén tutu ley Yaā Dios jíin táca tée jéhu cándacu jniñu. ² Te ni cacahān de:

Castūhún, ¿ndé ní nihīn jniñu ró jēé sáha ró jniñu yáha? ¿Te ndé ñin ni tee jniñu siquī rō jeē sáha ró súcuan? Achí de.

³ Te ni cahān Jesús jíin de:

Suni ruhū cajnūhun rí rohó ñin jnūhun jíjnáhan ró. Castūhun núu rī: ⁴ ¿Nde ñin ni tee jniñu siquī Juan jeē ni scuándute de? ¿A Yaā Dios chí táca tée? Achí yá.

⁵ Yūcuán na te ni candajnūhun máa de:

¿Nde se cahān yō? Núu cahān yō jeē Yaā Dios ni tee ya jniñu un síquī Juan, te cahān de jíin yó: ¿Najehē tu ní cácañdije ró de núu súcuan? ⁶ Te núu cahān yō jeē ñáyuu ni cateo jniñu un síquī de, te ndivii ñayuu cahni i yóhó jíin yūu, chi cácañdije i jeē tée ni nacani jnūhun Yaā Dios ni cuu ndije Juan, achí de cacahān máa de.

⁷ Te ni cacahān de jeē tu cájini de ndé ñin ni tee jniñu siquī Juan jeē ni scuándute de.

⁸ Yūcuán na te ni cahān Jesús:

Ni ruhū, suni ma cáchi rī nuū rō ndé ñin ni tee jniñu siquī rī sáha ri jniñu yáha, áchí yá.

Jnūhun yátá síquī tēe néé cásjniñu nuū uva

(Mt. 21.33-44; Mr. 12.1-11)

⁹ Te ni quejéé Jesús cahān yā jnūhun yátá yáha jíin ñáyuu ún:

Ñin tēe ni nachuhun de cuehē uva nuū ñūhun de. Te ni stóo de nuū sava tēe sájniñu nuū, te cuu sava de ndehē jíin. Te ni tee de ichi jeē cuahān nahán de ñga ñuu. ¹⁰ Te máa tiempo ndutútú uva, te ni tají de ñin mozo cuahān nuū tēe cásjniñu ún, návāha naquihin de sava ndehē uva un. Te tēe un ní cacani de mozo, te ni canatajé de i cuanuhun i súcuan-ni. ¹¹ Te tēe chíí uva ni tají tucu de ñga mozo cuahān. Te tēe cásjniñu ún, suni ni cacahān ndevāha de nuū i, te ni cacani de i, te ni canatajé de i cuanuhun i súcuan-ni. ¹² Te tēe chíí uva ni tají tucu de ñga mozo cuahān. Te tēe cásjniñu ún, suni ni castújé de mozo un, te ni cascúnu de i.

¹³ Yūcuán na te ni cahān tēe chíí uva: ¿Nde se sáha ri? Na tájé rí sēhe ri jeē maní rí jíin, chi sanaa te núu ni cajito de i te coo yíñuhún de nuū i. Achí de. ¹⁴ Te tēe cásjniñu ún, ná ni cajito de jeē véji i, te ni cacahān de: Tēe chíí táhū cúu jeē véji ún. Na cáhni yō de, te ndōo tahū de cuu máa yó, achí. ¹⁵ Te ni caquenehen de i ñga lado, te ni cajehni de i, achí yá.

Te ni cajnūhun yá de:

Núu súcuan ¿te ndese sáha tēe chíí uva jíin tēe cásjniñu ún? ¹⁶ Ndihi de te cahni de tēe un jíjnáhan, te cuāha de ñuhun cáá uva un núu ñga sava tēe sájniñu nuū, achí yá.

Te jeē ní cajini ñayuu jnūhun yáha, te ni cacahān i:

Aī, núu ma cóo cuñti súcuan víi, achí i.

¹⁷ Te ndéhé yá nuū i jíjnáhan i, te ni cahān yā:

Núu súcuan ¿te á cájecūhun ni rō jnūhun yáha jéé yosó núu tútu ñi jeē cúu ri nájnūhun ñin yuū? Chi áchí tutu:

Yuū jeē ní casquéhichī tēe cájeni vehe,

yuū yáha nduu jeē quítuu vehe.

Achí. ¹⁸ Te ñayuu tu cácañdije, ndoho i nájnūhun ndóho ñayuu jeē cotúú siquī yuú te jnáhnú i. Te quiv̄i sándaā Yaā Dios cuēchi, te ñayuu tu cácañdije, ndoho i nájnūhun ndóho ñayuu jeē nínga yuū siquī i te cundihī i sáha. Achí yá.

Siquī xúhun renta

(Mt. 21.45-46; 22.15-22; Mr. 12.12-17)

¹⁹ Yūcuán na te sutū cácujuhnu jíin tēe cástéén tutu ley Yaā Dios, ni cacuni de jniñ de ya máa hora un. Chi ni cajecūhun ni de jeē siquī máa de cúu jnūhun yátá ní cahān yā siquī tēe cásjniñu nuū uva jíin tēe cájeni vehe. Te tu ní cúu, chi cáyūhú de jeē quñti ni

ñayuu. ²⁰ Yūcuán na te ni catajǐ de jecu tēe cuacoto yuhu de ya, te tēe un cásáha-ni de jeē tēe ndaā cácuu de. Te cánducú de sáha de jeē cahán yā ñn jnūhun jeē nihín de cuēchi siquǐ yā, te quindecá de ya nuū tēe cúu gobernador. ²¹ Te ni cacahān de:

Maestro, cájini na jēē cahán vāha ní, te stéén ndaā ní. Te tu sáha ní cuenta ndese cúu ñn ñn ñayuu, chi ñnuú-ni sáha ní jíin i. Te stéén ndaā ní ndese squícu ñayuu nuū Yaā Dios. ²² Núu súcuan te cachi ní: ¿A íyó váha jeē chúnaa yō renta nuū rey nación Roma jeē jnǐi nación yō, chí tuú? áchí de.

²³ Te ni jini yā jeē cácuu de stáhú de ya, te ni cahán yā jíin de:

¿Najehē cájito ndee rō ruhū? ²⁴ Stéén ñn xūhún na cóto ri. ¿Ndé ñn nuū cúu jeē ndee nuū xūhun yáha, te ndé síhvǐ cúu jeē ndeé yāhá? áchí yá.

Te ni cacahān de jíin yá:

Nuū jíin síhvǐ rey un cúu, áchí de.

²⁵ Yūcuán na te ni cahán yā jíin de:

Núu súcuan te nacuāha ró núu rey un jēē yǐhi cuenta nuū de, te nacuāha ró núu Yaā Dios tāca jēē yǐhi cuenta nuū maá yá, achí yá.

²⁶ Te tāca tēe ún tu ní cúu nihín de cuēchi siquǐ yā jíin ni ñn jnūhun cáhán yā, cájito jíinú ñayuu. Chi sa ni canaa ni de jeē ndichí ní stió cuǐñǐ yā jnūhun nuū de, te tuá na vé ni cacahān de.

Jeē ní cacajnūhún de siquǐ jeē nátecu ndǐyi

(Mt. 22.23-33; Mr. 12.18-27)

²⁷ Yūcuán na te jecu tēe grupo saduceo ni quecoo de nuū yā. Te tēe un cacahān jeē tu nátecu cuǐti ndǐyi. Te ni cacahān de jíin yá:

²⁸ Maestro, Moisés ni tee de nuū tútu jeē cánevāha yó: Núu ñn tēe cuu de, te ndōo ñasǐhǐ de, te núu tu ní íyo sēhe de jíin ña, núu súcuan te cánuú jeē ñani de naquihin ñasǐhǐ de, te sēhe de jeē cácu jíin ña nucuiñǐ i nuū ndǐyi ñani de, áchí tutu. ²⁹ Núu súcuan te ni íyo uxā ñani. Te tēe núu ní quijnáhan de jíin ñahan. Te ni jihǐ de, te tú sēhe de ní íyo. ³⁰ Te tēe uū ni naquihin de ña, te suni ni jihǐ de, te tú na sēhe de ní íyo. ³¹ Te tēe unǐ ni naquihin de ña. Te suni súcuan ndihúxá de ni condeca de ña, te ni cajihǐ ndǐhi de, te ni ñn de tú sēhe de ní íyo. ³² Te jeē sándǐhǐ te suni ni jihǐ ñahan ún. ³³ Núu súcuan te núu na nátecu de jíináhan de quivǐ nátecu ndǐyi, ¿te ndé ñn de cuu ña ñasǐhǐ de? Chi ndihúxá de ni condeca de ña. Achí de jíináhan de.

³⁴ Yūcuán na te ni cahán yā jíin de:

Ñayǐvi yáha chi cáquijnáhan tēe jíin ñahan. ³⁵ Te ñayuu vāha jeē natecu i quǐvicoo i andǐví, ma quijnáhan ga i yūcuán, chí tuá na jnūhun quijnáhan tēe jíin ñahan coo. ³⁶ Ni ma cúu cuǐti gā i, chí coo i nájñūhun ndajéhé Yaā Dios. Te sēhe Yaā Dios cuu i, chí je ni canatecu i. ³⁷ Te suni máá Moisés cáhán de jeē nátecu ndǐyi, chí ni tee de nuū tútu ndese ni cahán yā jíin de mēhñu yúcū jeē cayú yáñuhūn. Chi ni cahán de jeē cúu ya Yaā Dios Abraham jíin Isaac jíin Jacob. ³⁸ Te jeē ni cahán de súcuan cúu jeē ní cachi de jeē cátecu tāca ndǐyi. Chi vēsú je ni cajihǐ i, te cátecu i nuū íyó máá yá, chí cúu ya Yaā sáha jeē técu ñayuu níf cáni. Achí yá jíin de.

³⁹ Te jecu tēe cástéén tutu ley Yaā Dios ni cacahān de:

Vāha ni cahán ní Maestro.

⁴⁰ Te tuá ni cáchundeyǐ ni de cajñūhún de ya.

Siquǐ jeē cúu Cristo sēhe yucūn David

(Mt. 22.41-46; Mr. 12.35-37)

⁴¹ Te ni cahán yā jíin de jíináhan de:

¿Ndese cúu jeē cacahān ñayuu jeē Cristo cúu sēhe yucūn David? ⁴² Chi máá David suhva ni cahán de jnūhun ya nuū tútu Salmo:

Máá Jítóho yō Yaā Dios suhva ni cahán yā jíin Jítóho rǐ, Yaā quiiji:

Cucōo ró lado váha ri nuū cujéhnú ró,

⁴³ te na sáha ri jeē quende rō poder tāca jēē cájito uhū rohó.

Achí Yaā Dios. Achí David. ⁴⁴ Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? áchí yá.

Jeē ni cáhān yā jeē iyó cuéchi de jíjnāhan de

(Mt. 23.1-36; Mr. 12.38-40; Lc. 11.37-54)

⁴⁵ Te ni cahān yā jíin tēe cáscuáha jíin yá, te suni ni cajini sōho ndíhi ñayuu:

⁴⁶ Coto má cándíje ró táca tēe cástéén tutu ley. Chi cácusī ni de cáñuhun de sahma cáni jeē steén jeē cujéhnū de, cájica cuu de jíin. Te cánujnahan ni de jeē cahán yíñúhún ñayuu jíin de nuū yáhu. Te cánujnahan ni de cucōo de nuū silla yíñúhún gá ini vehe īi sinagoga, jíin silla yíñúhún gá nuū víco cáyeji ñayuu. ⁴⁷ Te cáquende de vehe ñahan ní caquendōo ndáhú. Te nahán cájicān tahu de návāha cani ni ñayuu jeē tú na cuéchi de. Tēe yáha jíjnāhan de chi xeēn gā ndoho de castigo. Achí yá.

Jeē ni sócō ñahan viuda xūhún

(Mr. 12.41-44)

21

¹ Te ná ni īyo ya ini templo, te jíto ya nuū ñayuu cucá jēe cáchuhun i cuehē xūhún ini tāca yéjnū nuū casocō i. ² Te suni ni jito ya nuū ñin ñahan viuda jeē ndóho ndáhú, te ni chuhun ña uū centavo lulí ini yejnū ún. ³ Te ni cahān yā:

Jendaá cahán rī jíin ró jeē cuehē gā cúu jeē ni sócō ñahan viuda ndahú yáha, vēsú jeē ní casocō tāca gá ñayuu. ⁴ Chi tācá i ni casocō i jeē ni ndóo síquī xúhun cuéhē i. Te ñahan yáha, vēsú ndahú ndóho ña, te ni chuhun ndíhi ña jeē cótecu ña. Achí yá jíin de.

Jeē ní cachi yā jeē náā templo

(Mt. 24.1-2; Mr. 13.1-2)

⁵ Te sava de ni cacahān de jeē luu cáa templo cáhnu, chi ni cuvāha jíin táca yūu luu jíin táca jēe ní casocō ñayuu. Yūcuán na te ni cahān yā:

⁶ Ndíhi jeē cájito ró yáha, quee quívī jeē ma cóso jnāhan ga ni ñin yuū, chi ndíhi jnanū, achí yá.

Na seña coo nuū cuácuyajni ndíhi ñayívī

(Mt. 24.3-28; Mr. 13.3-23)

⁷ Te ni cacajnūhún de ya:

Maestro, ¿ndé quívī coo tāca jēe ní cachi ní jēe coo? ¿Te na seña coo nuū cuácuyajni squícu tāca jēe ni cáhān ní? áchí de.

⁸ Te ni cahān yā:

Coto ró jēe ma stahú i róhó. Chi quijicoo cuehē tēe jeē stahú jíin síhví rí, te cahān de: Máá rí cúu Cristo. Te suni cahān de: Je ni quee quívī ndíhi ñayívī, achi de. Te ma cóndiquīn rō de. ⁹ Te núu nihīn rō jnūhun jeē tāca lado iyó guerra te cándonda ñayuu síquī tohō, te ma yūhu ró, chi cánuú jēe xíhna gā coo súcuan, te ni ma jinú yachī quívī ndíhi ñayívī. Achí yá.

¹⁰ Te ni cahān gā yā:

Ndonda nación síquī inga nación, te ndonda ñuu síquī inga ñuu jeē cuajnáhan. ¹¹ Te cháha chúcuan jnāa téyí, te coo jnamā jíin cuéhyī xeēn. Te coo seña jéhnū ichi ándívī jēe yūhú ndasí ñayuu coto i.

¹² Te nde ná tu coo tācá jniñu yáha, te coto xeēn i róhó, te jni i róhó. Te quindecā i sava ró táca vehe īi sinagoga jeē cahán i cuéchi síquī rō. Te chune i sava ró vecāa. Te quindecā i sava ró núu tāca rey jíin núu tācá gobernador, te cahān i cuéchi síquī rō jeē síquí jeē cácdíje ró rúhū. ¹³ Te jeē súcuan coo, te cuitē núu ga jnūhun rī, chi nacani ndaā rō nuū de jíjnāhan de. ¹⁴ Núu súcuan te cundaā ni rō jeē ma nácani ni rō xíhna gā ndese stío cuíñí rō nuū de te cācu ró. ¹⁵ Chi ruhū cuāha rī jnūhun ndíchí cahān rō, návāha ñayuu jeē cájito uhū rohó, ma cúndeyí i jíin ró ni ma cúu cahān i síquī rō. ¹⁶ Te nde tatá rō, naná rō, ñani rō, jnāhan ró, jíin amigo rō, nastúu i róhó núu ñayuu xeēn. Te cahni i sava ró. ¹⁷ Te tāca ñayuu chi quítī ni i nuū rō jeē síquí ruhū. ¹⁸ Te ni ñin ixi xíní rō

jijnáhan ró ma náā, chi coto ya rohó. ¹⁹ Te núu cuiñi nihin ró jíin jnúhun ri, te cotecu rō ní cāni.

²⁰ Te núu ni cajito ró jéē ní cajicó ndūū soldado ñuu Jerusalén, te na jécūhun ni rō jeē jé yajni naa ñuu ún. ²¹ Yūcuán na te ñayuu cáyūcú región Judea, na cúnu i caa i yucu quingoo i. Te ñayuu cáyūcú Jerusalén, na quéndacoo i quingoo i. Te ñayuu cáhiin nde rancho, ma nándicó i ñuu ún. ²² Chi tāca quívī un cuáha Yaā Dios castigo nuū ñayuu jeē siquí cuéchi i, návāha squícu tāca jnúhun jeē yosó núu tútu. ²³ Te quívī ún nacā jeē ndahú ñahan cáñuhun sēhe jíin ñahan cándeca yiquín, chi ma cúnihīn ña cunu yachī ña. Chi yōhyo xeēn coo jnūndóho ini ñayívī, te quiji castigo xeēn siquí ñayuu yáha. ²⁴ Te sava i cuu nuū guerra, te sava i quingoo preso nde tācá inga nación. Te ñayuu tāca gá nación ndacu nihin i jniñu nuū ñayuu ñuu Jerusalén, nde jinu tiempo jeē jéhe Yaā Dios jnúhun ndacu i jniñu.

Ndese coo quívī ndiji Yaā ní nduu tēe
(Mt. 24.29-35, 42-44; Mr. 13.24-37)

²⁵ Yūcuán na te coo seña nuū níandii jíin núu yoó jíin núu quími. Te ini ñayívī te quiji jnūndóho xeēn siquí ñayuu tācá nación. Te cunéé ni i, te yūhú i jeē níhin xeēn mar te ndóna xeēn ndute mar vēji nuū ññuhun. ²⁶ Te cuu sōó sava ñayuu jeē cáyūhú i cándetu i tāca jnūndóho quiji siquí ñayívī. Te tāca jéē íin andívī chi quísi i. ²⁷ Yūcuán na te coto ñayuu nuū maá rí, Yaā ní nduu tēe, ndiji ri jíin vícō, te condiso ri cuehē poder, te yōhyo luu kujéhu ri. ²⁸ Te núu ni quejéé tāca jniñu yáha, te ndeyí coo ni rō, te cocunuū rō andívī, chi je yajni jnama ya rohó. Achí yá jíin de jíináhan de.

²⁹ Te suni ni cahān yā jnúhun yátá yáha:

Condēhe jíináhan ró ndese sáha nundēhe higo jíin tāca gá yujnu. ³⁰ Núu cájito ró jéē ní quejéé náne numa yújnu ún, te cájini rō jeē jé yajni coo tiempo jihní. ³¹ Te suni súcuan núu ni cajito ró jéē ní quejéé cúu tācá jniñu jeē ni cahān rī, yūcuán na te na jécūhun ni rō jeē ní cuyajni quívī ndacu Yaā Dios jniñu ini ñayívī.

³² Jendaá cahān rī jíin ró jeē ma cúu ndíhi ñayuu tiempo un, chi nde squícu ndíhi jniñu ún. ³³ Andívī jíin ñayívī chi naa, te tāca jnúhun cahān rī chi ma náā, chi ndíhi squícu.

³⁴ Te coto ma stívi ró maá ró jijnáhan ró jéē sáha ró tāca cuéchi, jíin jéē najini ró, jíin jéē kujnéñu ró jíin tāca ndajniñu cotecu rō, návāha tú sanaa ni rō te quee quívī un síquī rō. ³⁵ Chi nájnūhun jeē núu íin trampa, súcuan quee jnūndóho siquí ñayuu cáyūcu ní cáhnu ñayívī. ³⁶ Núu súcuan te ndito coo ni rō, te níni cácan tahu rō, návāha cuu cācu ró núu tāca jnūndóho jeē quíji ún, te cuu cuiñi ró núu ruhū, Yaā ní nduu tēe. Achí yá.

³⁷ Te ndiquívī steén yā jnúhun ini templo, te ndijnahan jecuáa jéndoō ya nde yucu jeē naní Olivos. ³⁸ Te tāca jénéhen quécoo ñayuu nuū yā ini templo jeē cúni sōho i jnúhun steén yā.

Jeē ní casquijnáhan de jnúhun jniñ de Jesús
(Mt. 26.1-5, 14-16; Mr. 14.1-2, 10-11; Jn. 11.45-53)

22

¹ Yūcuán na te ni cuyajni vico pascua jeē cáyeji ñayuu hebreo pan jeē tú na levadura yíhi. ² Te sutū cácujuhú jíin tēe cástéén tutu ley, ni canducú yuhu de modo cahni de Jesús, chi cáyūhú de jeē quítī ni ñayuu.

³ Te ni quívī Satanás ini anuá Judas jeē nastúu de ya. Te suni nání de Iscariote, te cúu de íin jnáhan jeē ndihúxi uū tēe apóstol. ⁴ Te ni jehēn de ni candajnúhún de jíin tāca sūtū cácujuhú jíin tēe cándiso jniñu ini templo, núu ndese nastúu de ya nuū tēe un jíináhan. ⁵ Te tēe un ní cacusiñi ni de, te ni cajejnūhun de jeē cuáha de xūhun núu Judas. ⁶ Te ni jetáhú Judas, te ni nducú de modo ndese nastúu yuhu de ya hora jeē tú na ñayuu iyó.

Jeē ní jequin yā Cena yā
(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Te ni quee maá quívī vico jeē cáyeji ñayuu pan jeē tú na levadura yáhi, te suni quívī un cájehni i londe nájñuhun ni ndacu Yaā Dios jniñu jeē sáha i vico pascua un. ⁸ Te Jesús ni tají yá Pedro jíin Juan quingoo de, te áchí yá jíin de:

Cuángoo te sátūhva ró jéē cuxíni yó vico pascua, achí yá.

⁹ Te ni cacajñuhún de ya:

¿Ndé nuū cumí ni jéē quísátūhva ná? áchí de.

¹⁰ Te ni cahān yā jíin de:

Cuángoo ñuu yūcuán, te núu ni quívicoo ró te najnáhan ró jíin ñin tēe ndíso quíyí ndute. Te condiquín rō de quihín rō jíin de nde vehe nuū ndívi de. ¹¹ Te cahān rō jíin tēe chí vehe ún: Achí máa Maestro: ¿Ndé ñin cúu cuarto vehe ní cuāha núu ní núu cuxíni ya vico pascua jíin tēe cáscuáha jíin yá, achi rō. ¹² Yūcuán na te stéén de ñin cuarto cáhnu nde xinī véhe jeē je íyó túhva, te yūcuan sátūhva ró jéē cuxíni yó, áchí yá.

¹³ Te cuangoo de, te ni canihín de nájñuhun ni cahān yā. Te ni casátūhva de jeē cuxíni ya vico pascua.

¹⁴ Yūcuán na te ni jinū hora jeē cuxíni, te ni quee Jesús, te ni cucōo ya mesa jíin tēe cácuu apóstol. ¹⁵ Te ni cahān yā jíin de:

Yōhyo ni cuu ni rī cuxíni ri jíin ró jijnáhan ró vico pascua yáha, vijna nde ná tu cuu rī. ¹⁶ Chi cáhán rī jíin ró jeē ma cáji cuiti gā rī vico pascua, chi nde quiji quívī ndacu Yaā Dios jniñu ñí ñayíví, te sáa te caji tucu ri, achí yá.

¹⁷ Te ni quihin ya ñin copa ndūxi uva, te ni nacuatáhu yá, te ni cahān yā:

Quihin copa yáha, te coho ró jíin jnáhan ró. ¹⁸ Chi cáhán rī jíin ró jeē ndé vijna te ma cóho ga rī ndūxi uva, chi nde quiji quívī ndacu Yaā Dios jniñu ñí ñayíví, te sáa te coho tucu ri. Achí yá.

¹⁹ Te ni quihin ya pan, te ni nacuatáhu yá, te ni tahu cuéchi yá, te ni jēhe ya nuū de jijnáhan de. Te ni cahān yā:

Yáha cúu yiqui cúñu rī jeē socō rī jeē chunaa rī cuēchi ró jijnáhan ró. Te níní caji rō súcuan jeē cáñuhun ni rō ruhū jeē ni jíhī rī jehē rō. Achí yá.

²⁰ Te suni súcuan ni sáha ya jíin copa ndūxi uva, ná ni cuu ni cuxíni ya. Te ni cahān yā jíin de:

Yáha cúu ñiñī rī jeē cuáha ri jeē cúu contrato jeé, te cati jeē ndundoo cuēchi ró jijnáhan ró.

²¹ Te vijna chi tēe nastúu ruhū, néne de jíin rí nuū mesa yáha. ²² Chi ruhū, Yaā ní nduu tēe, jendaá cúu jeē quihín rī cuu rī nájñuhun je ni sándaā Yaā Dios jeē súcuan coo. Te nacā xeēn ndoho tēe jeē nastúu ruhū, achí yá.

²³ Yūcuán na te ni caquejéé de cacajñuhun jnáhan de ndé ñin de cúu jeē nastúu de ya.

Jeē ní cacahān de siquī ndé ñin de cújéhnu ga

²⁴ Yūcuán na te yōhyo ni cacahān de siquī ndé ñin de cújéhnu ga nuū jnáhan de. ²⁵ Te ni cahān Jesús jíin de:

Rey tācá nación chi cándacu ñihin de jniñu nuū ñayuu cájni de, te cacahān i jeē tēe cása ha vāha cúu jeē cácuje hnu nuū i. ²⁶ Te rōhó jijnáhan ró, ma cóo ró súcuan. Chi núu ndé ñin ró cújé hnu ga, te sa nasáha lulí ró maá ró. Te núu ndé ñin ró ndácu jniñu, te sa nasáha ró máa ró tēe jéjniñu nuū jnáhan. ²⁷ ¿Te ndé ñin cúu jeē cujé hnu ga, á tēe yéji nuū mesa, chí tēe jéni cohō? ¿A násūu tēe jeē yéji nuū mesa cúu jeē cujé hnu ga? Te ruhū násūu súcuan cúu ri, chi ni nasáha ri maá rí nájñuhun tēe jéjniñu nuū rō, chi vēji ri sáha ri jeē nihín tahu rō.

²⁸ Te máa ró cácuu tēe jeē niní cáhiin jíin rí tāca quívī jeē ndóho ri jñundóho. ²⁹ Núu súcuan te nájñuhun ni sáha Tátá rī jeē ndácu ri jniñu, suni súcuan sáha ri jeē ndacu ró jniñu jijnáhan ró. ³⁰ Te caji rō coho ró jíin rí ini ñuu nuū ndacu ri jniñu. Te cucōo ró ñin ñin mesa jeē sándaā rō jniñu ndihúxí uū yucūn Israel. Achí yá.

Jeē ní cachi yā jeē yūhu Pedro cahān de jeē jiní de ya
(Mt. 26.31-35; Mr. 14.27-31; Jn. 13.36-38)

³¹ Te suni ni cahān maá Jítóho yō jíin Simón Pedro:

Simón, cuni sōho ró, chi ni jicān Satanás rohó jíjnáhan ró jéē coto ndee rohó nájnūhun jeē síjin trigo, te stúu ndé ñn ró cácuu nájnūhun paja jeē nayūhu ró, te ndé ñn ró cácuu nájnūhun trigo jeē candíje ñihin ró. ³² Te ni jicān tahú rī jehē rō návāha ma náyūhu ró jeē ma cándíje ga rō. Te jeē nácandíje tucu ró, te sáha ró jéē íje tāca jnáhan ró jíin jnúhun rī. Achí yá.

³³ Te ni cahān de jíin yá:

Je íyó túhva ná quíhñ na jíin ní vecāa te vēsú na cuu na jíin ní, achí de.

³⁴ Te ni cahān yā:

Pedro, cáhán rī jíin ró jeē nde ná tu cana líhli vijna, te yūhu ró jeē jññ ñayuu rohó, te unī jínu cahān rō jeē tu jíin rō ruhū, achí yá.

Jeē ní cuyajni coto ya jnūndóho

³⁵ Yūcuán na te ni cajnūhun yá de jíjnáhan de:

Ná ni tají rí rohó ní jengoo ró jéē tu ní cóndiso ró ñunu ni yijni xūhún ni ndijēn, ¿te á ní íyo ñn jeē ní cumanī nuū rō? Achí yá.

Te ni cacahān de:

Tú ni ñn ní cumanī.

³⁶ Te ni cahān yā:

Nde vijna sa cáhán rī jeē cóndiso ró ñunu ró, te suni yijni xūhún. Te tēe jeē tu névāha espada jeē coto de máá de, na xíco de ticāchí de te na cuáan de. ³⁷ Chi cáhán rī jíin ró jeē quee quivī ndoho yó jnūndóho, chi cánuu squícu jnūhun yáha jéē cahán nuū tútu síquī rī: Sáha ñayuu jíin yá nájnūhun cásáha i jíin tēe sáha cuēchi xeēn, áchí tutu. Chi tāca jnúhun un jéē yosó cáhán síquī rī, chi squícu nahín, áchí yá.

³⁸ Yūcuán na te ni cacahān de:

Yáha íyó úu espada, achí de.

Te ni cahān yā jíin de:

Jíin jéē yáha-ni, áchí yá.

Jeē ni jicān tahú yā nuū huerto Getsemaní

(Mt. 26.36-46; Mr. 14.32-42)

³⁹ Te ni quenda ya cuahān yā yucu Olivos nájnūhun sáha sáha ya. Te tēe cáscuáha jíin yá ni candiquín de ya cuangoo de jíin yá. ⁴⁰ Te nuū ni jínū yā yūcuán, te ni cahān yā jíin de:

Cacān tahú rō jijnáhan ró jéē chindéé ñáhán yá rohó jéē ma sáha ró cuéchi núu coto ndee jeneé róhó, achí yá.

⁴¹ Te ni jica ya jecu, cūhva jeē jicá jínú yuū jeē squíin. Te ni jecuiññ yití yá, te suhva ni jicān tahú yā:

⁴² Tātā, núu cúní ni te tejiyo ní jnūndóho yáha jéē ma quíji síquī ná. Te nasūu jéē cuni maá ná, chi jeē cuni maá ní na cóo, áchí yá.

⁴³ Te ni cane ñn ndajéhé andiví núu yā, te ni jēhe fuerza nuū yā. ⁴⁴ Te cúcuíhyá ndasí ni yā jeē quiji jnūndóho síquī yā, te ni nducú ndéyí gá yā ni jicān tahú yā. Te ni cane jñañū yā, te tóo nuū ñúhun nájnūhun yúyú náhnu ñññ.

⁴⁵ Te ná ni ndocuiññ yā jeē ni jicān tahú yā, te ni ndee yā nuū tēe cáscuáha jíin yá. Te ni jito ya jeē cáquixí de, chi tuá cáhiyo ndeyí ni de cacān tahú de jeē cácuquíhyá ndasí ni de. ⁴⁶ Te ni cahān yā jíin de:

¿Naun cáquixí rō? Ndonga te cacān tahú rō jeē chindéé ñáhán yá rohó jéē ma sáha ró cuéchi jeē cóto ndee jeneé róhó. Achí yá.

Jeē ní cajññ de Jesús

(Mt. 26.47-56; Mr. 14.43-50; Jn. 18.2-11)

⁴⁷ Te sá cáhán gā yā súcuan, te ni quecoo cuehē ñayuu. Te tēe nání Judas, ñn jnáhan jeē uxí uū tēe scuáha jíin yá, yósnuu de nuū ñayuu un véji de. Te ni quee de nde nuū Jesús, te ni techūhú de ya, te súcuan ni nastúu de ya. ⁴⁸ Te ni cahān Jesús jíin de:

Judas, ¿á jíin jéē téchūhu ró ruhū cúu jeē nastúu ró rúhū, Yaā ní nduu tēe? Achí yá.

⁴⁹ Te tēe cáhiin jíin yá, ni cajito de jeē ní quejéé cúu, te ni cacajnuhún de ya:

¿A ndonda ná jíjnáhan ná síquī de jíin espada? áchí de.

⁵⁰ Te ñin de ni stují de mozo sutū cujéhnū ga, chi ni jehnde de sōho lado váha. ⁵¹ Te ni cahān Jesús:

Siáá, na jécuiñī, achí yá.

Te ni tee ya ndaha ya sōho mozo un, te ni nasávāha ya de. ⁵² Te ni cahān yā jíin sūtū cácujehnū jíin tēe cándiso jniñu ini templo jíin táca tēe jéhnū jeē ní quecoo de jeē jniñ de ya:

¿Te va tēe cuíhná cúu ri jeē véjicoo ró jíin espada jíin yujnu jeē jniñ ró rúhū jeē súcuan?

⁵³ Táca quívī ni ine ri jíin ró jíjnáhan ró ini templo cáhnū, te tu ní cájniñ ró rúhū. Te vijna te ni quee hora jeē jniñ ró rúhū jíin jéē sáha ró táca jniñū jeē ndácu jeneé jéē ndeé núū néē. Achí yá.

Jeē ní cachi Pedro jeē tu jíin de ya

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Te ni cajniñ de ya cuango de jíin yá vehe sutū cujéhnū ga. Te Pedro chi jíicá-ni ndíquín de ya. ⁵⁵ Te táca policía ni cascáyú de ñuhūn ini patio, te ni condúu de yuñuhún un cáyucú de. Te suni ni cucōo Pedro jíin de. ⁵⁶ Te ñin ñahan jéjniñū ini vehe un, ní jito ña nuū de jeē néne de yuñuhún. Te ni jito váha ña nuū de, te ni cahān ña:

Tēe yáha suni ni jica de jíin tēe ún, áchí ña.

⁵⁷ Te máá de tu ní cáchi de, chi ni cahān de:

Tu jíin rī tēe ún, áchí de.

⁵⁸ Te ni cunúu jecu gā, te ni jito tucu inga ñayuu nuū Pedro, te ni cahān:

Róhó, suni jnáhan táca tēe un cúu ró, áchí.

Te ni cahān Pedro:

Nasūu cúu ri, hombre, achí de.

⁵⁹ Te ni cuu nájniñhun ñin hora gā, te ni cahān ñihin inga de:

Jendaá ndije jeē tēe yáha ní jica de jíin tēe ún, chi suni tēe región Galilea cúu de, áchí de.

⁶⁰ Te ni cahān Pedro:

Hombre, tu jíin rī na jnūhun cáhán rō.

Te sá súcuan cáhán gā de, te ni cana-ni líhli. ⁶¹ Yūcuán na te ni ndió cóto máá Jítoho yō, te ni jito ya nuū Pedro. Te ni nucūhun ni de jnūhun ni cahān yā jíin de: Nde ná tu cana líhli, te yūhu ró te cahān rō unī jíinu jeē tu jíin rō ruhū. ⁶² Te ni quenda de cuahān de, te yōhyo ni ndahyū de jeē ní cachi de jeē tu jíin de ya.

Jeē ní casácatā de nuū yā

(Mt. 26.67-68; Mr. 14.65)

⁶³ Te táca tēe cándito Jesús, ni casácatā de nuū yā, te ni cacani de ya. ⁶⁴ Te ni cajesi de sahma nuū yā, te ni cacani de nuū yā, te ni cacahān de:

Cachi ndé ñin cúu jeē ní cani róhó, áchí de.

⁶⁵ Te cuehē gā jnūhun súcuan ni cacahān neé de jíin yá.

Jeē ní indichi Jesús nuū junta tēe cácujehnū ga

(Mt. 26.59-66; Mr. 14.55-64; Jn. 18.19-24)

⁶⁶ Te jeē ní cundijin, te ni candutútú táca tēe jéhnū cándacu jniñū nuū ñayuu hebreo, jíin sūtū cácujehnū, jíin tēe cástéén tutu ley Yaā Dios. Te cuango de jíin yá nuū junta tēe cácujehnū ga, te yūcuan ní cacajnuhún de ya:

⁶⁷ Cachi, ¿á máá ró cúu Cristo jeē ní tají Yaā Dios? Achí de.

Te ni cahān yā jíin de:

Vēsú na cáhán rī jeē suu ri cúu, te ni ma candíje cuiti rō. ⁶⁸ Te suni núu cajnuhūn máá rí rohó jíjnáhan ró, te suni ma stió cuñí rō nuū rī, ni ma siaá rō ruhū. ⁶⁹ Te ruhū, Yaā ní nduu tēe, táca quívī jeē quíji conene ri lado váha máá Yaā iyó poder, achí yá.

⁷⁰ Yūcuán na te ndihí de ni cacajnuhún de ya:

¿A máá ró cúu Sēhe Yaā Dios núu súcuan?

Te ni cahān yā jíin de:

Suu ri cúu, nájnūhun cácahān rō, achí yá.

⁷¹ Yūcuán na te ni cacahān de:

¿Na testigo gā jíni ñúhún yó núu súcuan? Chi ni cajini sōho yó jíin yuhu máá de jeē cahán ndevāha de jeē cúu de Sēhe Yaā Dios. Achí de jíināhan de.

Jeē ní indichi Jesús nuū Pilato

(Mt. 27.1-2, 11-14; Mr. 15.1-5; Jn. 18.28-38)

23

¹ Yūcuán na te ni candocuiñi ndihi de, te cuango de jíin yá nuū Pilato. ² Te yūcuan ní caquejéé de cácahān de cuēchi siquī yā:

Ni canihīn na téé yáha jéé stónnda de ñayuu siquī tohō. Te cáhán de jeē tú vāha jeē cuāha ná xúhun renta nuū rey nación Roma jeē ndácu jniñu nuū nación na. Te suni cáhán de jeē maá de cúu Cristo, Rey jeē ní tají Yaā Dios. Achí de jíināhan de.

³ Yūcuán na te Pilato ni cajnūhún de ya:

¿A máá ró cúu Rey ñayuu hebreo?

Te ni cahān yā:

Suu ri cúu, nájnūhun cáhán rō, achí yá.

⁴ Te ni cahān Pilato jíin sūtū cácujuhnu jíin ñayuu cuehē ún:

Tú ni ñin jnūhun stívi cáhán tēe yáha jéé nihín rī cuēchi siquī de, achí de.

⁵ Te máá de víhyá gā ni cacahān de:

Tēe yáha stónnda ndasí de ñayuu siquī tohō jíin jnūhun stéén de ní Judea. Chi ni quejéé de stéén de nde Galilea, te vijna te nde yáha, achí de.

Jeē ní indichi Jesús nuū Herodes

⁶ Te nuū ní jini sōho Pilato jeē Galilea cácahān, te ni cajnūhún de ñayuu núu tēe región Galilea cúu ya. ⁷ Te nuū ní cacahān ñayuu jeē cúu ya tēe Galilea, te ni ndacu de jniñu jeē na quíngoo de jíin yá nuū Herodes, tēe cúu gobernador Galilea. Chi quivī ún suni íne Herodes ñuu Jerusalén. ⁸ Te nuū ní jito de nuū Jesús, te yōhyo ni cusī ni de, chi je ni cuu cuehē tiempo jeē cuní de coto de nuū yā. Chi ni nihín de jnūhun ya, te ñúhun ni de jeē sáha ya ñin jniñu jéhu coto de. ⁹ Te ni cajnūhún de ya cuehē jnūhun, te tu ní stíó cuíñí yā ni ñin jnūhun nuū de. ¹⁰ Te suni cáhiin tāca sūtū cácujuhnu jíin téé cástéén tutu ley, te nihín ni cacahān de cuēchi siquī yā. ¹¹ Yūcuán na te Herodes jíin tāca soldado de ni cacahān neé de jíin yá, te ni casácatā de nuū yā, chi ni cachuhun de ya sahma váha luu jeē cúu sahma rey. Te Herodes ni ndacu de jniñu jeē na quínundeca de ya nuū Pilato. ¹² Te máá quívī un ní candumanī jnāhan Pilato jíin Herodes, chi ichi yátá ni caquitī jnāhan ni de.

Jeē ní cundaā jeē cúu yā

(Mt. 27.15-26; Mr. 15.6-15; Jn. 18.39-19.16)

¹³ Yūcuán na te ni cana Pilato tāca sūtū cácujuhnu jíin tāca téé cándiso jniñu jíin tāca gá ñayuu, ni candutútú. ¹⁴ Te ni cahān de:

Ni caquindeca ró téé yáha núu rī, jeē cácahān rō jeē stónnda de ñayuu siquī tohō. Te je ni stichí rī de, ni cajito jíinū rō. Te tu ní nihín rī ni ñin cuēchi siquī de nájnūhun jeē cácahān rō. ¹⁵ Te ni Herodes, tu ní nihín de, chi ni natajítucu de tēe yáha núu rī. Te tú cuítī ni ñin cuēchi ní sáha de jeē cúu de. ¹⁶ Núu súcuan te na cuáha ri castigo de, te siáá rī de quihín de, achí Pilato.

¹⁷ Te íyó costumbre jeē tācá vico pascua siaá Pilato ñin preso jeē cuní ñayuu. ¹⁸ Te ñayuu cuehē ún, inuú-ni ni cacana jee i:

Na cúu tēe jíñá, te siáá ní Barrabás, achí i.

¹⁹ Te Barrabás íne de vecāa siquī jeē ni stónnda de ñayuu siquī tohō ini ñuu ún, te ni jehni de ndīyi. ²⁰ Te Pilato cuní de siáá de Jesús, te ni cahān tucu de jíin ñayuu. ²¹ Te máá i víhyá gā ni cacana jee i:

Cata caa ní de jicā cruz, na cúu de, áchí i.

²² Te ni cahān tucu de jíin i vuelta uní:

¿Na cuēchi ni sáha de núu súcuan? Tu ní níhín cuítí rī ni ñin cuēchi siquī de jeē cúu de. Núu súcuan te na cuáha ri castigo de, te siáá rī de quihīn de, áchí Pilato.

²³ Te víhyá gā ni cacana jee ñayuu un, ní cacahān ñihin i jeē na cúu yā jicā cruz. Te máá i jíin táca sūtū cácujuhnu, ni cacana jee ndasí i. Te ni cacundeyí i ni cascāhān i Pilato jeē na cúu yā. ²⁴ Yūcuán na te ni ndacu Pilato jniñu jeē na cóo nájñuhun cácuñi i. ²⁵ Te ni siaá de tēe jeē ní cajicān i, tēe jeē íne vecāa jeē ni stónnda de ñayuu siquī tohō te ni jehni de ndīyi. Te ni jēhe de jñuhun jeē na cúu Jesús nájñuhun cácuñi i.

Jeē ní cacata caa de ya jicā cruz

(Mt. 27.32-44; Mr. 15.21-32; Jn. 19.17-27)

²⁶ Te cuangoo tǎcá soldado jíin yá jeē cahni de ya jicā cruz. Te ni canihīn de ñin tēe ñuu Cirene, nání de Simón, vendiji de jeē ni jéhēn de rancho. Te ni catejniñu de tēe un jéé cóndiso de cruz yā quihīn de yatā yā.

²⁷ Te cuehē ndasí ñayuu ndíquín i yatā yā cuangoo i. Te suni cuehē ñahan cuangoo ña, te cándahyū cohó ña jeē cácuuíhyá ni ña jehē yā. ²⁸ Te ni ndió cóto Jesús nuū ña, te ni cahān yā:

Róhó ñahan Jerusalén jijnáhan ró, ma ndahyú rō jehē rī, chi sa suhva ndahyū rō jehē maá ró jíin jéhē sēhe ró jijnáhan i. ²⁹ Chi quee quivī jeē coo jñundóho xeēn siquī rō, te cahān rō: Yōhyo ndetū tǎcá ñahan númá, jíin jéé tu ní scácu sēhe, jíin jéé tu ní cóndeca yiquín, chi tú sēhe ña jeē jnahuhū ni ña jeē ndóho i, achi rō jijnáhan ró. ³⁰ Quivī ún te quejéé ñayuu cahān i jíin táca yucu: Cotúu siquī rī jijnáhan ri návāha cuu rī. Te suni jíin táca loma: Casi siquī rī jijnáhan ri, achi i. ³¹ Chi núu casáha xeēn i jíin rúhū jeē tú na cuēchi ri, te nagā ni cuu jeē ma cóo xeēn siquī ndíhi ñayuu chi íyó cuéchi i. Achí yá.

³² Te suni cuangoo de jíin úu tēe ni casáha cuēchi xeēn, jeē suni cuu de jíin yá. ³³ Te ni jinūcoo de lugar nuū naní Yiqui Xíní, te yūcuan ní cacata caa de ya jicā cruz. Te suni ni cacata caa de ndíndúú tēe ni casáha cuēchi xeēn un núu uū gā cruz, ñin de lado váha ya, te inga de lado jecó yá. ³⁴ Te níin jéé súcuan cúu, te ni cahān Jesús:

Tátā, cone cáhnu ni ni núu de jijnáhan de, chi tu cájini de na vé casáha de, áchí yá.

Te soldado un ní casáha de sorteo jeē siquī ndese nihīn ñin ñin de sahma ya. ³⁵ Te cáhīin ñayuu yūcuan, cájito i nuū yā. Te suni nde tēe cándiso jniñu, cácahān catá de cájito de ya:

Núu inga ñayuu ni jnama de, te na jnáma de máá de vijna, te núu ndaā jeē Cristo jeē ní nacāji Yaā Dios cúu de, áchí.

³⁶ Te tǎcá soldado suni ni casácatā de nuū yā, chi ni quecoo de nde nuū yā, te ni cajēhe de vinagre iyá coho ya. ³⁷ Te cácahān de jíin yá:

Núu máá ró cúu Rey ñayuu hebreo, te na jnáma ró máá ró, achí de.

³⁸ Te suni ni íyo jñuhun jeē ndeé xinī cruz yā jeē cahān na siquī ni jíhī yā, te suhva yósó jíin yuhu griego jíin latín jíin hebreo: Yāha cúu Rey ñayuu hebreo, achí.

³⁹ Te ñin jeē ndíndúú tēe ni casáha cuēchi xeēn, jeē cándita caa, ni cahān neé de nuū yā:

Núu máá ró cúu Cristo, te na jnáma ró máá ró te suni jnama ró ndíndúú rí, achí de.

⁴⁰ Te inga de ni cahān de nuū jnáhan de:

¿A tu yúhú ró Yaā Dios naún? Chi ínuú cándoho yó jíin Yaā yáha. ⁴¹ Te máá yó chi vetū-ni cándoho yó, chi yāha cánihīn yō castigo siquī jniñu neé ní casáha yó. Te Yaā yáha chi tú ni ñin cuēchi ní sáha ya, achí de.

⁴² Te ni cahān de jíin yá:

Jesús, nucūhun ni ni sáña jéé quéjéé ní ndacu ní jniñu, áchí de.

⁴³ Yūcuán na te ni cahān Jesús jíin de:

Jendaá cahán rī jíin ró jeē v́jna te condee rō jíin rí nuū jardín andiví, áchí yá.

Jeē ni jíhí Jesús

(Mt. 27.45-56; Mr. 15.33-41; Jn. 19.28-30)

⁴⁴ Te nuū ní cuu nájnūhun cahuxí uū, te ni cunee ní cáhnu nde cahuní. ⁴⁵ Te ni cujnúú níāndii. Te sahma ndíta caa jeē ndihyú cuarto íi ini templo cáhnu, ni ndatā-ni sava sava.

⁴⁶ Yūcuán na te ni cana jee Jesús:

Tátā, naquihin ní ánuá na, áchí yá.

Te súcuan ni cahán yā, te ni jíhí-ni ya.

⁴⁷ Te tēe nación Roma jeē cúu capitán ni jito de jeē súcuan ni cuu, te ni cahán de jeē yóhyo cújéhnū Yaā Dios, te áchí de:

Jendaá ndije jeē tēe tú na cuēchi cúu tēe yáha, áchí de.

⁴⁸ Te ndivii ñayuu cáhiin yūcuan ní cajito i tāca jéē ní cuu, te cácani i yíqui jíca i jeē cájnahuhū ni i, te ni nandió cóo i cuanungoo i. ⁴⁹ Te tāca ñáyuu cájini jnāhan jíin yá, jíin tāca ñahan Galilea jeē ní cajica ña jíin yá, cáhiin jíca ña cájito ña tāca jéē ní cuu.

Jeē ní quindūji Jesús

(Mt. 27.57-61; Mr. 15.42-47; Jn. 19.38-42)

⁵⁰ Te ni íyo íin tēe vāha tēe ndaā, nání de José. Te tēe ñuu Arimatea ndañúú Judea cúu de. Te cúu de jnāhan tāca tēe hebreo cácujehnū ga jeē casáha junta. ⁵¹ Te ñūhun ni de jeē quiji quiví jeē ndacu Yaā Dios jniñu, te suni tu ní nújnahan ni de jeē ní casándaā junta un jéē cúu Jesús. ⁵² Te tēe un ní jehēn de nuū Pilato, ni jícan de yíqui cúñu Jesús. ⁵³ Te ni snúu de ya jíca cruz, te ni chusúcún de ya íin sahma cuitá. Te ni chindūji de ya ini íin yaū jeē ní caan jíca íin cava, nuū ná tu quindūji ndíyi. ⁵⁴ Te quiví un cúu quiví casátūhva ñayuu, chi jehíni un quéjéé quiví ndétátú.

⁵⁵ Te ñahan ní quijicoo jíin yá nde Galilea, ni jengoo ña jíin José, te ni cajito vāha ña yaū ún, jíin ndese ni cachindūji de ya. ⁵⁶ Te cuanungoo ña vehe ña, te ni casátūhva ña tāca perfume jíin aceite yucú jeén asín. Te ni candetátú ña quiví ndétátú, nájnūhun ndácu ley Yaā Dios jniñu.

Jeē ní natecu Jesús

(Mt. 28.1-10; Mr. 16.1-8; Jn. 20.1-10)

24

¹ Te jenéhen ndasí quiví domingo, te ni jinūcoo tucu ñahan un núu ní yindūji Jesús, te cándahá ña tāca perfume jíin aceite ni casátūhva ña. Te suni cuangoo sava ga ñahan jíin ña. ² Te nuū ni jínūcoo ña, te ni cajito ña jeē ní cujiyo yuū ndihyú yuyáú ndíyi. ³ Te ni quívicoo ña yaū ún, te tuá yíqui cúñu Jitoho yō Jesús ni cájito ña. ⁴ Te ni cacunéé ni ña cájito ña jeē tuá ndíyi. Sáa te ni cajito ña uū ndajéhé Yaā Dios jeē caa nájnūhun tēe, cáhiin ya xiin ña, te cáñūhun ya sahma ndíndéé. ⁵ Te yóhyo ni cayūhú ña, te ni cajexin ña nuū ña nde nuū ñūhun. Te ni cacahán ndajéhé un jíin ña:

¿Naun sa nuū cáyindūji ndíyi cánanducú ró Yaā técu? ⁶ Tuá yā yāhá, chi je ni natecu yā. Te nucūhun ni rō ndese ni cahán yā jíin ró ná íne ga yā región Galilea. ⁷ Chi ni cachi ya jeē maá yá, Yaā ní nduu tēe, cánuú natūu ya nuū tāca tēe cáhiyo cuēchi, jeē jni de ya cahni de ya jíca cruz, te nuū uní quiví te natecu yā. Achí ndajéhé un.

⁸ Yūcuán na te ni canucūhun ni ña tāca jnūhun ni cahán Jesús. ⁹ Te ni quendacoo ña nuū ní yindūji ya, te cuanungoo ña. Te ni canacani ña tāca jnūhun yáha núu ndihúxí íin apóstol jíin núu tāca gá de. ¹⁰ Te ñahan ní canacani jnūhun yáha núu tēe cácuu apóstol, cúu ña María ñuu Magdala, jíin Juana, jíin María naná Jacobo, jíin sava ga ña. ¹¹ Te tāca apóstol chi cájeni ni de jeē jnūhun cánéé cáñúú cácahán ña, te tu ní cácadíje de.

¹² Te vésú súcuan, te Pedro ni quenda de, te jínu de cuacondéhé de nuū ní yindūji ya. Te ni jito nihni de ini yaū, te ni jito de jeē sahma cuitá un cáyūcu maá na. Te cuanuhun de vehe de, te nahán náa ni de jeē ní jito de jeē tuá yā.

*Jeē ní ndajñūhun yá jíin úu de ichi cuáhán Emaús
(Mr. 16.12-13)*

¹³ Te suu quiv̄i un cuángoo uū jnáhan de ñin ñuu naní Emaús, jeē jicá nájñūhun ux̄i ñin kilómetro jíin ñuu Jerusalén. ¹⁴ Te cándajñūhún de siqūi t̄acá jniñu jeē ní cuu ún. ¹⁵ Te níni cándajñūhún de te cácajñūhun jnáhan de, te máá Jesús ni cuyajni ya yatā de, te jíca ya cuahān yā jíin de. ¹⁶ Te ni sáha jíin de jeē tu ní canacuni de ya, v̄esú cájito de nuū yā. ¹⁷ Te ni cajñūhun yá de:

¿Na jñūhun cándajñūhun ró cájica ró? ¿Te najehē cácuuñhyá ni rō? Achí yá.

¹⁸ Te ñin de jeē naní Cleofas ni cahān de jíin yá:

Ndih̄i cuīti ñayuu cájini i t̄acá jniñu ní cuu ini ñuu Jerusalén t̄aca quiv̄i yáha. ¿Te á máñúhún-ni níhín cúu jeē ní quee ní ñuu un j̄eē tu jíin ni na vé ni cuu? Achí de.

¹⁹ Te ni cajñūhun yá de:

¿Te na vé ni cuu? Achí yá.

Te ni cacahān de jíin yá:

Jeē ní ndoho Jesús ñuu Nazaret, Yaā ní nacani jñūhun Yaā Dios. Te jíin poder Yaā Dios ni sáha ya t̄acá jniñu j̄ehnu te ni nacani ya jñūhun, j̄ito jíinúu Yaā Dios jíin t̄aca ñayuu. ²⁰ Te sutū cácujēhnu jíin t̄ee cándiso jñiñu nuū ná, ni canastúu de ya nuū t̄aca t̄ee Roma, te t̄ee un ní casándaā de jeē cúu yā jicá cruz. ²¹ Te máá ná ní cañūhun ni na j̄eē maá yá jnama ya nación na Israel nuū ñayuu Roma nuú. Te siqūi t̄acá jniñu yáha, te ni cane inga jñūhun. Chi vijna je íyó ún̄i quiv̄i jeē ní cuu ún. ²² Te sava ñahan cájini jnáhan ná jíin, ni canacani ña ñin jñūhun jeē yóh̄yo cánaa ni na sáha, chi cácahān ña jeē ní natecu yā. Chi jenéhen ndas̄í ní jengoo ña yaū nd̄iyi ún. ²³ Te tuá ni cájito ña yiqui cúnu yā. Te ni ndecoo ña nuū na jíin náhan ná, te cácahān ña jeē ní cajito ña jeē ní canecoo ndaj̄ehé Yaā Dios nuū ña, te ni cacahān jeē ní natecu Jesús. ²⁴ Te ni jengoo sava jnáhan ná ndé yaū nd̄iyi ún, te ni cajito de jeē súcuan íyó, nájñūhun ni cacahān ñahan ún, te tu ní cájito cuīti de nuū yā.

²⁵ Yūcuán na te ni cahān maá yá jíin de:

T̄ee tu cájecūhun cuīti ni cácuu ró. Yóh̄yo uhū cácañd̄ije ró t̄aca jnúhun Cristo ni cacahān t̄ee ni canacani jñūhun Yaā Dios nde jenahán. ²⁶ ¿Te á tu súcuan ní jíini ñúhún ndoho Cristo t̄aca jnúndóho yáha, te sáa te quinhun yā nuū lúu cujēhnu ya? Achí yá.

²⁷ Te ni nacani cáj̄i yá t̄aca jnúhun jeē yosó núu tútu ñi jeē cahán siqūi maá yá. Te ni quej̄é yá jíin jnúhun ni tee Moisés, te ni cahān gā yā t̄aca jnúhun jeē ní catee t̄ee ni canacani jñūhun ya nde jenahán.

²⁸ Te nuū ni jíinúcoo de ñuu nuū cuángoo de ún, te Jesús ni sáha ya jeē cáca ga yā quih̄in yā. ²⁹ Te máá de ni castétu de ya, ni cacahān de jíin yá:

Ndōo ní vehe ná, chi je ni ini te je yajni cuaa, ách̄i de.

Yūcuán na te ni quiv̄i ya jeē quéndōo ya jíin de. ³⁰ Te nuū ní cucōo ya mesa jeē cáj̄i yā jíin de jíin náhan de, te ni quih̄in ya staā, te ni jicān tahu yā, te ni tahu cuéch̄i yá, te ni j̄eh̄e ya nuū de. ³¹ Te jeē sáha ya súcuan, te nájñūhun ni cananune tinūu de, te ni canacuni de ya. Te ni ndoñúhún-ni ya nuū de cuahān yā. ³² Te ni cacahān maá de:

Jendaá jeē yóh̄yo ni cacusīni ni yō ná ni nacani ya jñūhun nuū yō ichi ún te ni castūhun cáj̄i yá jñūhun cáhán tutu ñi. Achí de.

³³ Yūcuán na te yach̄i ni canaquih̄in de ichi, ni canandicó de cuanungoo de ñuu Jerusalén. Te ni canajnáhan de jíin ndih̄úxi ñin ga apóstol, cáyūcu tútu de jíin sava ga jnáhan de. ³⁴ Te ni cacahān t̄ee cáyūcu tútu un:

Jendaá ndije jeē ní natecu maá Jítoho yō, te ni nane ndijin yā nuū Simón, achí de jíin náhan de.

³⁵ Yūcuán na te ndindúu t̄ee un ní canacani de jñūhun ndese ni najnáhan ya jíin de ichi, jíin ndese ni canacuni de ya ná ni tahu cuéch̄i yá staā.

*Jeē ní nane ya nuū t̄ee cáscuáha jíin yá
(Mt. 28.16-20; Mr. 16.14-18; Jn. 20.19-23)*

³⁶ Te sá cácahān gā de tāca jnúhun yáha, te ni jecuiñī-ni Jesús mēhñú de jíjnáhan de. Te ni cahān yā jíin de:

Ndeyí sñ coo ni rō jíjnáhan ró, áchí yá.

³⁷ Te ni candacoto iyo de, ni cayūhú ndasí de, chi ni cajeni ni de jeē ñn ánuá cúu ya. ³⁸ Te ni cahān yā jíin de:

¿Naun cáyūhu ró, te naun cájeni siquí ni rō súcuan? ³⁹ Condēhé ndaha ri jíin jēhē rī, te cuni rō jeē maá rí cúu. Jññ ruhū te cuni rō, chi ñn ánuá tu névāha cūñu ni yiqui nájnūhun cájito ró jēé névāha maá rí, áchí yá.

⁴⁰ Te jeē ni cáhān yā súcuan, te ni steén yā ndaha ya jehē yā nuū ni yñhi ndūyu cāa. ⁴¹ Te yōhyo ni cacusiñ ni de, te cánaa ni de. Te vēsú súcuan te ná tu candíje vāha vāha de jeē maá yá cúu. Te ni cahān yā jíin de:

¿A cánevāha ró jecu jeē cáji rī yāhá? áchí yá.

⁴² Yūcuán na te ni cajēhe de ñn pedazo chācá ní tau nuū yā, jíin ñn pedazo ñahmā ndūxi yocō. ⁴³ Te ni quihin ya, te ni yeji yā nuū de jíjnáhan de. ⁴⁴ Te ni cahān yā jíin de:

Tāca jēé ní cuu jíin rí cúu jeē ni cáhān rī ná ni ine ri jíin ró jíjnáhan ró ndé saá, jeē cánuú squícu tāca jnúhun ri jeē yosó núu tútu ley Moisés, jíin núu tācá tutu tēe ní canacani jnúhun Yaā Dios, jíin núu tútu salmo, áchí yá.

⁴⁵ Te ni nune ya jeē níjnūnī de, návāha cuu jecūhun ni de tāca jēé cahán tutu ñ. ⁴⁶ Te ni cahān yā:

Súcuan cáhān nuū tútu jeē ruhū Cristo, cánuú cuu rī, te nuū uní quivī natecu rī. ⁴⁷ Te cuitē núu jnúhun ri jeē cánuú nacani ni ñayuu jeē stóo i cuēchi i, te cone cáhnu ni Yaā Dios nuū i. Te ñuu Jerusalén quejéé cuitē núu jnúhun yáha, te quihñ nuū ñayuu tācá nación. ⁴⁸ Te maá ró cácuu tēe nacani jnúhun tācá jññu ní cajito ró. ⁴⁹ Te tají rí Espíritu Santo quiji ya nuū rō jíjnáhan ró, nájnūhun ni jejnūhun Tátá rī. Te na quéndōo ró ñuu Jerusalén condetu ró ndé nihñ rō poder Espíritu Santo jeē quíji nde andiví. Achí yá.

Jeē ní ndaa ya cuanuhun yā andiví

(Mr. 16.19-20)

⁵⁰ Yūcuán na te ni quenda ya ñuu Jerusalén, cuahān yā nde ñuu Betania jíin de jíjnáhan de. Te ni ndonehen ya ndindúú ndaha ya, te ni jicān tahu yā jehē de. ⁵¹ Te níiní jicān tahu yā jehē de, te ni cujiyo-ni ya nuū de, ni ndaa ya cuanuhun yā andiví. ⁵² Te maá de ni cachiñúhún de ya. Te sáa te cuanungoo de ñuu Jerusalén, te yōhyo cácusñ ni de. ⁵³ Te níiní cáhiin de ini templo cáhnu, cánacuatáhu de nuū Yaā Dios. Te ni cuu. Amén.

JNUHUN VAHA NI TEE SAN JUAN

Yaā naní Jnúhun Yaā Dios ni nduu ya tēe

¹ Nde xihna ñúhún ná ni jecōo ndíhi jeē iyó, te je iyó Yaā naní Jnúhun Yaā Dios, chi steén yā ndíhi jnúhun ndese Yaā cúu Yaā Dios. Te Yaā naní Jnúhun un ndéé yá jíin Yaā Dios, te Yaā Dios cúu ya. ² Máá yá ndeé yá nde jeē xihna ñúhún jíin Yaā Dios. ³ Te ni sáha Yaā Dios jeē jíin máá yá ni jecōo ndíhi tāca jéē iyó. Te ma jecōo ni ñin jeē iyó núu tu ní sáha máá yá. ⁴ Máá yá sáha jeē técu ndíhi-ni, te máá yá cúu luz jeē steén ini anuá ñayuu, cúu jeē sáha ya jeē jécūhun ni i síquī Yaā Dios. ⁵ Te Yaā cúu luz ún ndíndēe núu ñáyuu tu cájica ndaā, jeē nájnūhun cáhiyo i nuū néē. Te ñayuu cáhiyo nuū néē tu cúu ndahva i luz yā.

⁶ Te ni iyo ñin tēe jeē ní tají Yaā Dios, naní de Juan. ⁷ Tēe un ní quiji de jeē nácani cájij de jnúhun máá Yaā cúu luz, návāha candíje tāca ñáyuu jeē jíin jnúhun cáhán de. ⁸ Nasūu máá Juan cúu luz ún, chi cúu de ñin jeē ní nacani cájij jnúhun máá luz un. ⁹ Te máá Yaā cúu luz ndije jeē steén ini anuá tāca ñáyuu, nde saá ní quiji ya ini ñayiví.

¹⁰ Te Yaā cúu Jnúhun Yaā Dios ni condee yā ini ñayiví, te vésú jeē jíin máá yá ni sáha Yaā Dios ñayiví, te ñayuu ñayiví tu ní cácu ni i cuatáhú i jeē máá yá cúu. ¹¹ Ni quiji ya nuū ñáyuu máá yá nación hebreo, te ñayuu ún tu ní cájetáhú i ya. ¹² Te vésú súcuan te sava ñayuu chi ni cajetáhú i ya, te ni cacandíje i jeē sáha ya jehē i. Te nuū máá i ni jēhe ya jnúhun jeē ndúu i sēhe Yaā Dios. ¹³ Te jeē ndúu i sēhe Yaā Dios, nasūu jíin modo jeē cácacu ñayuu ini ñayiví, ni nasūu síquī jeē cácu ni tēe, chi máá Yaā Dios sáha ya jeē ndúu i sēhe ya.

¹⁴ Te máá Yaā cúu Jnúhun Yaā Dios ni nduu ya tēe, te ni condee yā jíin yó. Te ni cajito yó jéē yóhoyo luu cújéhnua ya, chi máñúhún-ni ya cúu Sēhe Tátá yā, Yaā cújéhnua súcuan. Te máni máá jéē sáha ya jeē váha yóhó, te máni máá jnúhun ndaā cahán yā. ¹⁵ Te Juan ni nacani de jnúhun ya, te ni cahán de:

Yaā yáha cúu jeē ni cáhán rī náa áchí rí jeē Yaā quiji chi cújéhnua ga yā vésú ruhū, chi je iyó yá nde ná tu cacu rí, achí de.

¹⁶ Te ndíhi yó ní canihín yō cuehē ndasí jeē váha iyó núu yā, chi máni jeē váha sáha sáha ya jíin yó. ¹⁷ Moisés ni steén de ley Yaā Dios nuū ñáyuu jenahán, te Jesucristo chi sáha ya jeē váha yóhó te steén yā tāca jnúhun ndaā Yaā Dios nuū yō. ¹⁸ Tú ni ñin ñayuu ni jito cuítí nuū Yaā Dios. Te máñúhún-ni Sēhe ya jeē ndeé yá jíin Tátá yā, suu ya ni steén nuū yō ndese Yaā cúu Yaā Dios.

Jnúhun Jesús jeē ni cáhán Juan tēe scuándute

(Mt. 3.11-12; Mr. 1.7-8; Lc. 3.15-17)

¹⁹ Te ñayuu hebreo ñuu Jerusalén, ni catajij i jecu sutū jíin tēe grupo levita jeē cájejníñu ini templo, ni jengoo de nuū Juan, návāha cajnúhún de ndé ñin cúu Juan te na jniñu ndíso de. ²⁰ Te Juan cájij ní cachi de:

Nasūu ruhū cúu Cristo, achí de.

²¹ Te ni cacajnúhún tucu de:

Núu súcuan ¿te ndé ñin cúu ró? ¿A cúu ró Elías, tēe ni nacani jnúhun Yaā Dios nde jenahán, chí naún?

Te ni cahán Juan:

Nasūu de cúu rí.

Te ni cacajnúhún tucu de:

Núu súcuan ¿te á cúu ró tēe nacani jnúhun Yaā Dios jeē achí tutu ñi jeē quíjij?

Tuú, achí tucu Juan.

²² Te ni cacahán tucu jíin de:

¿Te ndé ñin cúu ró núu súcuan? Cachi nuū rī jijnáhan rí, chi jíni ñúhún castūhun rí nuū tāca tēe ni catajij ruhū vējicoo rí. Cachi na jniñu ndíso ró ví.

²³ Te ni cahān Juan:

Máá rí cúu tēe jeē ni cáhān Isaías, tēe ni nacani jnūhun Yaā Dios nde jenahán, jeē quíji ri cana jee ri nde nuū ñūhun téhé. Te cáhān rī jíin ñáyuu jeē na sátūhva i máá i, chi quiiji máá Jítóho yō. Achí Juan.

²⁴ Te tēe grupo fariseo cácuu jeē ní catajī tēe ni quijicoo ún. ²⁵ Te ni cacajñūhún de Juan:

Núu súcuan ¿te naun scuándute ró te núu nasūu Cristo ni Elías ni máá tēe quiiji nacani jnūhun Yaā Dios cúu ró?

²⁶ Te ni cahān Juan:

Ruhū chi jíin ndute scuándute ri. Te mēhñu ró jijnáhan ró íne ñin Yaā jeē tu cájini rō.

²⁷ Te Yaā un cúu jeē ni cáhān rī jeē quíji ya te cújéhnū ga yā vēsú ruhū. Chi tú na vé jéhnū cuítī cúu ri nuū yā, ni jeē cuajñíñu ri nuū yā vēsú ñin jñíñu lúli gá nájñūhun jeē ndají rí correa ndijēn yā. Achí de.

²⁸ Súcuan ni cuu jeē ní candajñūhún de jíin Juan nde Betábara jeē íne ichi núu cáne niāndii yūte Jordán, nuū scuándute Juan.

Siquī jeē cúu ya Londe Yaā Dios

²⁹ Te ñnga quivī un ní jito Juan nuū Jesús jeē véji ya nuū de. Te ni cahān de jíin ñáyuu:

Condēhe jíjñáhan ró, chi yāha véji Yaā cúu Londe jeē ní tají Yaā Dios, te cuu yā jeē sándoo ya cuēchi ñayuu ñayiví. ³⁰ Yaā yāha cúu jeē ni cáhān rī jeē quíji ñin Yaā cujéhnū ndasí, chi je íyó yá nde ná tu cacu ri. ³¹ Te nde saá te tu ní jíin rī jeē yāha cúu Yaā ní tají Yaā Dios. Te ni quiiji ri jeē scuándute ri ñayuu ñuu yō Israel jíin ndute, návāha stéén rí nuū i jeē suu ya cúu, achí Juan.

³² Te suni ni cahān gā de jnūhun ya:

Ni jito ri Espíritu Santo, ni cuun ya ichi ándiví, cáa ya nájñūhun paloma, te ni quee ya xiní Jesús. ³³ Te nde saá te ná tu cuni rī jeē Jesús cúu. Te máá Yaā Dios jeē ní tají yá ruhū jeē scuándute ri jíin ndute, ni cahān yā jíin rí: Núu ni jito ró jéē cúun Espíritu Santo te quendōo xiní ñin tēe, yūcuan cúu Yaā jeē cuáha Espíritu Santo condee ini anuá ñayuu, achí Yaā Dios. ³⁴ Te je ni jito ri ún, te nácani cájī rí jnūhun jeē maá yá cúu Sēhe Yaā Dios. Achí Juan.

Uū tēe jeē ní cana ya xihna gā

³⁵ Te ñnga quivī ún te Juan íne tucu de yūcuan jíin uū tēe cájica jíin de. ³⁶ Te ni jito de nuū Jesús jeē jíca ya yūcuán. Te ni cahān de:

Condēhe jíjñáhan ró, chi yūcuan cúu Yaā cúu Londe jeē ní tají Yaā Dios.

³⁷ Te ndíndúú tēe cájica jíin Juan ni cajini sōho de jnūhun yāha, te ni candiquīn de Jesús. ³⁸ Te ni ndió cóto Jesús, te ni jito ya jeē cándiquīn de yatā yā. Te ni cahān yā jíin de:

¿Na vé cánanducú ró?

Te ni cacahān de jíin yá:

Maestro, ¿ndé nuū ndeé ní?

³⁹ Te ni cahān yā jíin de:

Quíngoo yó te cuni rō.

Te ni jengoo de, te ni cajito de nuū ndeé yá. Te ni caquendōo de jíin yá quivī ún, chi nájñūhun cacuūn jehíni cúu.

⁴⁰ Te Andrés, ñani Simón Pedro, cúu ñin jeē ndíndúú tēe un jéē ní cajini sōho jnūhun ni cahān Juan, te ni candiquīn Jesús. ⁴¹ Te Andrés, yachí ni jenanducú de ñani de Simón, te ni cahān de jíin:

Ni caquijñáhan ri jíin Mesías, achí de. Te jnūhun un cúní cahān Cristo, Yaā ní tají Yaā Dios.

⁴² Yūcuán na te cuanuhun de nuū Jesús jíin Simón. Te nuū ní jito Jesús nuū Simón, te ni cahān yā:

Máá ró cúu Simón sēhe Jonás. Te nde vijna te conaní ró Cefas, achí yá. Te jnūhun un cúní cahān Pedro, jeē cuní cahān yuū.

Jeē ní cana ya Felipe jíin Natanael

⁴³ Te inga quivī un cúní Jesús quihīn yā región Galilea. Te ni nihīn jnāhan ya jíin Felipe, te ni cahān yā jíin de:

Condiquīn ruhū na quíhīn yō.

⁴⁴ Te Felipe cúu tēe ñuu Betsaida, jeē cúu ñuu Andrés jíin Pedro. ⁴⁵ Te ni jenanducú de Natanael, te ni cahān de jíin:

Ni canihīn jnāhan ri jíin Yaā jeē yosó jnúhun ya nuū tútu ley jeē ní tee Moisés, jíin nuū tútu ni catee tēe ni canacani jnúhun Yaā Dios nde jenahán. Te Jesús sēhe José ñuu Nazaret cúu ya. Achí de.

⁴⁶ Te ni cahān Natanael jíin de:

¿Te ndese cúu kujéhnū ñin tēe jeē ní cacu ñuu ndahú Nazaret?

Te ni cahān Felipe:

Quíhīn yō de cuni rō, achí de.

⁴⁷ Te ni jito Jesús jeē véji Natanael, te ni cahān yā:

Yāha véji ñin tēe ndaā jeē cúu ndije yucūn Israel, chi tu stáhú cuiti de, achí yá.

⁴⁸ Te ni cahān Natanael jíin yá:

¿Ndese jíiní ni sáña?

Te ni cahān Jesús:

Je ni jito ri rohó ndé ná tu cana Felipe xinī rō, ná íne ró jéhē mundéhe higo, achí yá.

⁴⁹ Yūcuán na te ni cahān Natanael jíin yá:

Maestro, máá ní cúu Sēhe Yaā Dios, máá ní cúu Rey ñuu yō Israel, achí de.

⁵⁰ Te ni cahān Jesús:

¿A máá jēe ni cáhān rī jeē ní jito ri rohó ná íne ró jéhē mundéhe higo, te jeē yúcuán cándije ró rúhū naún? Tuú chi coo jniñū jéhnū ga coto ró vēsú jeē yáha, achí yá jíin de.

⁵¹ Te ni cahān gā yā:

Jendaá cahán rī jíin ró jijnāhan ró jēe nde vijna te coto ró jēe núne andiví, te tācá ndajéhé Yaā Dios cándaa cánuu nuū ruhū, Yaā ní nduu tēe, achí yá.

Jeē ni jéhēn yā ñin vico nándāha ñuu Caná

2

¹ Te ni yāha unī quivī, te ni iyo ñin vico nándāha ñuu Caná ndañūū Galilea. Te yūcuán íne náná Jesús. ² Te suni ni cacana i Jesús jíin tēe cáscuáha jíin yá, ni jehēn yā vico un jíin de. ³ Te ni ndoco vino. Te náná Jesús ni cahān ña jíin yá:

Ni ndoco vino i, achí ña.

⁴ Te ni cahān Jesús jíin ña:

¿Naun cáhān ni súcuán jíin ná nánā? Chi ná tu quee quivī jeē sáha ná jniñū jéhnū, achí yá.

⁵ Te náná yā chi ni cahān ña jíin ñáyuu cájeni cohō:

Sáha ró jijnāhan ró táca jēe cahān yā jíin ró. Achí ña.

⁶ Te yūcuán íyó íñū tenéjā yuū jeē ñúhun ndute cájichi ñayuu hebreo jeē ndúndoo i nuū Yaā Dios. Te ñin ñin tenéjā un cánda cuhun cuūn xico chí ciento litro ndute. ⁷ Te ni cahān Jesús jíin ñáyuu cájeni cohō:

Scútú ndī rō tācá tenéjā yáha.

Te ni cascútú ndī i. ⁸ Te ni cahān yā jíin i:

Vijna te quēen ró jecu te quindeca ró coto ndee tēe ndíto vico, achí yá.

Te ni cajendeca i nuū de. ⁹ Te ni séyūhú de ndute jeē ní nduu vino, te tu jíiní de ndé ní canihīn i. Chi máni mozo un cúu jeē cájini, chi máá i ni caquēen ndute ún. Yūcuán na te tēe ndíto vico ni cana de tēe nándāha. ¹⁰ Te ni cahān de jíin:

Tāca ñáyuu chi xīhna gā vino váha cájēhe i, te núu je ni cajihī vāha ñayuu cáhīin vico, yūcuán na te jéhe de vino ndahú na. Te máá ró tucu ni sáha ró, chi nde jeē sándīhí te jéhe ró vino jeē yóhyyo vāha ga jíhi, achí de.

¹¹ Jniñu yáha jéē ni sáha Jesús ini ñuu Caná ndañúū Galilea cúu jniñu jéhu xihna ñúhún jéē ni sáha ya jeē steén yā poder yā. Te súcuan ni steén yā jeē yóhyo cújéhu ya. Te tēe cáscuáha jíin yá ni cacandíje de ya.

¹² Te ná ni yáha jniñu yáha, te cuahān yā ñuu Capernaum jíin náná yā jíin táca ñani yā jíin tēe cáscuáha jíin yá. Te ni coyūcu yá yūcuán jecu quiví.

Jeē ní quenehen ya ñayuu ini templo

(Mt. 21.12-13; Mr. 11.15-18; Lc. 19.45-46)

¹³ Te jeē cuácuyajni vico pascua casáha jnáhan ñuu yā hebreo, te cuahān yā ñuu Jerusalén. ¹⁴ Te ini templo cáhnu ni jito ya ñayuu cáxicó stiquí jíin lanchi jíin paloma, jíin ñayuu castáyí xūhun, cáyūcú i nuū mesa i. ¹⁵ Te jeē súcuan ni jito ya, te ni sáha ya ñin cuarta ñii. Te ni scúnu ya tǎcá i ini templo, nde jíin lanchi jíin stiquí i. Te ni jete yā xūhun ñayuu castáyí. Te ni scotúú yá tǎca mesa i. ¹⁶ Te ni cahān yā jíin ñayuu cáxicó paloma:

Tava tǎcá quiti yáha. Te ma sáha ró yáhu ini vehe Tátá rī. Achí yá.

¹⁷ Yūcuán na te tēe cáscuáha jíin yá, ni canucūhun ni de jnūhun yósó núu tútu ii: Je yajni cuu na jéē yóhyo ndíhví ni na síquí vehe ní, áchí yá jíin Tátá yā, achí tutu.

¹⁸ Te tēe ñuu yā hebreo ni cacajñúhún de ya:

¿Na jniñu jéhu sáha ró jéē steén rō poder rō, te cucáhnu ni rī jeē ndíso jniñu ró sáha ró súcuan? áchí de jíin yá.

¹⁹ Te ni cahān yatá Jesús:

Canu rō templo yáha, te nuū uní quiví te nucondichi sáha ri, achí yá.

²⁰ Yūcuán na te ni cacahān tēe hebreo un:

Uū xico iñū cuiyā te ni jīnu ni cuvāha templo yáha. Te róhó, ¿á núu uní-ni quiví te nucondichi sáha ró naún? Achí de.

²¹ Te templo jeē cahán Jesús cúu máa yiqui cúñu yā, chi cahni ñayuu yā te natecu yā nuū uní quiví. ²² Jeē yúcuan cúu jeē ná ni natecu yā jeē ni jíhí yā, te tēe cáscuáha jíin yá ni canucūhun ni de jeē ni cahān yā jnūhun yáha. Te ni cacandíje de jnūhun jeē yósó núu tútu ii, jíin jnúhun yáha jéē ni cahān Jesús.

Jeē jíin Jesús ndese cáa ini anuá ñayuu

²³ Te ná íne Jesús ñuu Jerusalén máa vico pascua, te cuehē ñayuu ni cacandíje i jeē cúu ya Cristo, chi ni cajito i tǎcá jniñu jéhu sáha ya jeē steén yā poder yā. ²⁴ Te máa Jesús chi tu ní jétáhú yá i, chi je jíin yā ndese cáa ini anuá i jíin náhan i. ²⁵ Te tu jíin ñúhún yá jeē cáchi ni ñin ñayuu nuū yā ndese íyó táca ñayuu, chi máa yá je jíin yā ndese cáa ini anuá i.

Jeē ní candajñúhún Jesús jíin Nicodemo

3

¹ Te ni íyo ñin tēe grupo fariseo, naní de Nicodemo, te cújéhu de nuū ñayuu ñuu de hebreo. ² Tēe yáha ní quiji de nuū Jesús ñin jecuáa, te ni cahān de jíin yá:

Maestro, je cájini na jéē máa Yaā Dios ni tají yá nihín jéē steén ni jnúhun ya nuū na jíin náhan ná. Chi núu tu íyó Yaā Dios jíin ní, te ma cúu sáha ní ni ñin jniñu jéhu nájnūhun sáha máa ní jeē steén ni poder ní, áchí de.

³ Te ni cahān Jesús:

Jendaá cahán rī jíin ró jeē núu tu nacacu jeé ñin ñayuu, te ma cúu quiví i ndaha Yaā Dios jeē ndacu ya jniñu nuū i, áchí yá jíin de.

⁴ Te ni cahān Nicodemo jíin yá:

¿Te ndese cuu nacacu ñin tēe te núu je ni jehnu de? ¿A cuu nucūhun tucu de chíji náná de te nacacu tucu de? áchí de.

⁵ Te ni cahān Jesús:

Jendaá cahán rī jíin ró jeē núu tú nacacu ñin ñayuu, te ma cúu quiví i ndaha Yaā Dios jeē ndacu ya jniñu nuū i. Te jeē nácacu i cúu jeē ndúndoo cuēchi i nájnūhun jíin ndute, te condee Espíritu Santo ini anuá i. ⁶ Jeē cácu sáha ñayuu, chi sēhe ñayuu cúu. Te jeē cácu sáha Espíritu yā, chi sēhe ya cúu. ⁷ Ma náa ni rō caní ni rō ndese cúu jnūhun ni cahān

rī jín ró jeē cánuú jéē nacacu jeé ró jijnáhan ró. ⁸ Te tachī chi quée cuahān ndé-ni cúu nuū cuní maá, te jíní sōho ró jéē cáyu, te tu jíní rō ndé nuū véji ni ndé nuū quihín. Te suni súcuan cúu tāca ñáyuu jeē nácacu sáha Espíritu, chi tu jíní rō ndese sáha ya jniñu ún, áchí yá.

⁹ Te ni cahān tucu Nicodemo:

¿Ndese ga cúu núu súcuan?

¹⁰ Te ni cahān Jesús:

Máá ró cúu ñin maestro jeē kujéhnú nuū ñáyuu ñuu yō Israel, te ¿á tu jécūhun ni rō jnūhun yáha naún? ¹¹ Jendaá cahán rī jín ró jeē jnūhun cájecūhun ni rī cúu jeē cácahān rī jín ró. Te cánacani cáji rí jnūhun jniñu ní cajito ri. Te tu cácañdije ró jnūhun cácahān rī. ¹² Chi ni cahān rī jnūhun ndese sáha Yaā Dios ini ñayīví, te tu cácañdije ró. Núu súcuan ¿te ndese candije ró núu cahān rī jnūhun tācá ndese sáha ya nde andiví?

¹³ Chi ni ñin tu ní cáa andiví jeē cúni ndese íyó yúcuan, chi máñúhún-ni ruhū, Yaā ní nduu tēe. Chi andiví ndéé rí, te ni cuun ri véji rí. ¹⁴ Te nájñūhun ni cata caa Moisés ñin coō cāa nuū ñin yujnu, ná ni cajica ñáyuu nuū ñūhun téhé, suni súcuan máá rí, Yaā ní nduu tēe, cánuú jéē cóndita caa ri jicā cruz. ¹⁵ Te súcuan cánuú návāha tāca ñáyuu jeē candije i jeē jnáma ri i, ma jnahnú ndetū i, chi sa suhva cotecu i ní cáni andiví.

Yōhyo ni cundáhu ni yā ñáyuu ñayīví

¹⁶ Chi Yaā Dios yōhyo ni cundáhu ni yā ñáyuu ñayīví. Jeē yúcuan ní tají yá Sēhe ya ni quiji, vésú mañúhún-ni ya iyó, návāha tāca ñáyuu jeē candije i jeē jnáma ya i, ma jnahnú ndetū, chi sa suhva cotecu i ní cáni andiví. ¹⁷ Chi tu ní tají Yaā Dios Sēhe ya ini ñayīví jéē snahnú ndetū yā ñáyuu, chi sa suhva jeē jnáma ya ñáyuu.

¹⁸ Ñáyuu jeē candije i jeē jnáma ya i, ma jnahnú ndetū i. Te ñáyuu tu cándije, je ni jnahnú ndetū i, chi tu ní cándije i máá Sēhe Yaā Dios, te máá ñin-ni ya iyó. ¹⁹ Máá Yaā jeē stíndēé ini anuá ñáyuu, je ni quee ya ini ñayīví. Te cánujnahan gā ni ñáyuu caca i nájñūhun nuū néé vésú nuū luz yā, chi jniñu cásáha i cúu jniñu néé. Jeē yúcuan cúu jeē jnahnú ndetū ñáyuu tu cácañdije ún. ²⁰ Chi tāca ñáyuu casáha jniñu néé, tu núnjahan cuiti ni i luz yā. Te tu jéhe i jnūhun jeē stíndēe yá ini anuá i, chi tu cúni i jeē natū jniñu néé cásáha i. ²¹ Te ñáyuu jeē cájica jín jniñu ndaā, jéhe i jnūhun jeē stíndēe yá ini anuá i, návāha natū ndijin jeē tācá jniñu cásáha i cúu jniñu cúni Yaā Dios. Achí yá jín de.

Jeē ni cáhān tucu Juan jnūhun Jesús

²² Yūcuán na te Jesús jín tēe cáscuáha jín yá, cuahān yā región Judea. Te ni condee yā yūcuán jecu tiempo jín de, te cáscuándute de ñáyuu. ²³ Te suni scuándute Juan, íne de lugar jeē naní Enón yajni ñuu Salim, chi yūcuán íyó cuéhē ndute. Te ni quijicoo ñáyuu nuū de, te ni scuándute de i. ²⁴ Súcuan ni sáha Juan nde ná tu quīvi de vecāa.

²⁵ Yūcuán na te sava tēe cáscuáha jín Juan yōhyo ni cacahān de jín sava jnáhan de hebreo siquī núu ndé ñin cúu modo vāha ga jeē cúchi ñáyuu ndundoo i nuū Yaā Dios. ²⁶ Te ni quecoo de nuū Juan, te ni cacahān de:

Maestro, tēe ní ine jín ní yūte Jordán ichi núu cáne niāndii, jeē ní nacani ní jnūhun de nuū ná, vijna te scuándute máá de, te ndivii ñáyuu cuangoo i nuū de.

²⁷ Te ni cahān Juan:

Ni ñin tēe ma cúu sáha de jniñu Yaā Dios te núu ma tejníñu ya de. ²⁸ Máá ró jijnáhan ró chi ni cajini sōho ró jéē ni cáhān cají rí jeē násūu máá rí cúu Cristo, chi cúu ri ñin jeē ní tají Yaā Dios jeē cósnūú nacani jnūhun jeē quiji ya. ²⁹ Te núu cásáha vico quijnáhan, te máá yī cúu jeē ndéca ñasihí. Te amigo yī un íne jín de, te jíní sōho jnūhun cáhān de. Te yōhyo cúsiñ ni jíní sōho jnūhun cáhān yī ún. Te suni súcuan ruhū, chi cúu ri nájñūhun amigo yī, chi ni quee máá Cristo, te yōhyo cúsiñ ni rī jíní sōho ri jnūhun cáhān yā. ³⁰ Te jíní ñúhún jéē ndujéhnú ga máá yá te ndululí gá máá rí, achí Juan.

Jeē ní quiji ya nde nuū sucún

³¹ Te Yaā jeē véji nde andiví, cújéhnú ya nuū ndihí. Chi tāca jéē ní cacu ini ñayīví yáha, sēhe ñayīví cúu, te máni jnūhun ñayīví cáhān. Te Yaā jeē véji ichi ándiví, chi cújéhnú ya

nuū ndihi ñayuu. ³² Te nácani ya jnūhun jeē ní jito ya jíin jéē ní jini sōho ya. Te ñayuu chi tu cácanđije i jnūhun cáhán yā. ³³ Te núu ñin ñayuu candíje i jnūhun cáhán yā, suu cúu jeē jejnúhún i jeē Yaā ndaā cúu Yaā Dios. ³⁴ Chi Yaā ní tají Yaā Dios vēji, máni máa jnúhun Yaā Dios cahán yā. Chi Yaā Dios tu yícuāha jéhe ya Espíritu yā nuū Yaā ní tají yá. ³⁵ Máa yá jeē cúu ya Tatá, yōhyo maní yā jíin Séhe ya, te ndivii ni jéhe ya ndaha Séhe ya jeē ndacu ya jniñu nuū. ³⁶ Ñayuu jeē candíje máa Séhe ya jeē jnáma ya i, cotecu i nń cání andiví. Te ñayuu tu cúní candíje Séhe ya, ma cótecu i nń cání andiví, chi sa suhva cuāha Yaā Dios castigo jeē ndoho i nń cání.

Jeē ni cáhān Jesús jíin ñahan ñuū Samaria

4

¹ Te tēe grupo fariseo, ni canihīn de jnūhun jeē iyó cuéhē gā tēe cáscuáha jíin Jesús vēsú jíin Juan, jíin jéē cuehē gā ñayuu scuándute ya vēsú Juan. ² Te nasūu jéē scuándute máa yá, chi tēe cáscuáha jíin yá cúu jeē cascuándute. ³ Te ná ni jini Jesús jeē súcuan ni canihīn de jnūhun, te ni quenda ya región Judea, te cuanuhun yā región Galilea.

⁴ Te ichi jeē nuhún yā chi yáha región Samaria. ⁵ Te ni jinū yā ñin ñuu región Samaria jeē naní Sicar, yajni ñuhun jeē ni jéhe Jacob nuū séhe de José nde jenahán. ⁶ Te yūcuan íne pozo jeē naní pozo Jacob. Te ni cucōo Jesús xiin pozo un, chi ni cuíta yá jeē cuahán yā ichi. Te nájnūhun cahuxī uū cúu. ⁷ Te ni quee ñin ñahan Samaria, vēji ña vequihin ña ndute. Te ni cahān Jesús jíin ña:

Cuāha ní ndute coho ná, áchí yá.

⁸ Te tēe cáscuáha jíin yá, chi je cuango de nde ñuu, cuacuaan de jeē cáji de jíin yá.

⁹ Te ñahan Samaria un ní cahān ña jíin yá:

¿Ndese cúu jeē jicán ni ndute nuū ná coho ní? Chi tēe hebreo cúu ní, te ñahan Samaria cúu ná, áchí ña.

Súcuan ni cahān ña, chi ñayuu hebreo tu cácahān i jíin ñáyuu Samaria. ¹⁰ Te ni cahān Jesús:

Núu jeē jiní ni ndese cúní Yaā Dios sáha ya jeē váha níhín, jíin ndé ñin cúu sãña jéē jicán na ndute nuū ní, yūcuán na te máa ní cacān ni núu ná, te cuāha ná ndute jeē cótecu ni nń cání sáha, áchí yá.

¹¹ Te ni cahān ña jíin yá:

Tátā, yōhyo cúnú pozo yáha, te tú na vé ndahá ní jéē táva ní ndute. Núu súcuan ¿te ndé nuū nihín ni ndute jeē cótecu na sáha? ¹² ¿Te á cújéhnú ga maá ní vēsú jíi yō Jacob, chí naún? Chi máa de ni stóo de pozo yáha nuū yō. Te yáha ní cajihí máa de ndute, jíin táca séhe de, jíin quití ndéca de. Achí ña.

¹³ Te ni cahān Jesús:

Tāca ñáyuu jeē jíhi ndute yáha, chi jichí tucu i. ¹⁴ Te ñayuu coho ndute jeē cuáha na núu i, chi ma jichí cuití gā i. Chi ndute jeē cuáha ná un, cane ini i nájnūhun ndute jeē cáne ñuhún, te sáha jeē cotecu i nń cání, áchí yá jíin ña.

¹⁵ Te máa ña tu ní jécūhun ni ña, te ni cahān ña jíin yá:

Tátā, cuāha ní ndute ún coho ná, návāha ma jichí cuití gā ná, ni tuá jíni ñūhun quiquihin ná ndute pozo yáha, áchí ña.

¹⁶ Te ni cahān Jesús jíin ña:

Cuácana ní yíi ní te quiji ní jíin de, áchí yá.

¹⁷ Te ni cahān ña:

Tú yíi ná íyó.

Te ni cahān Jesús:

Ndaā cahán ni jéē tú yíi ní íyó. ¹⁸ Chi je ni cuu uhūn yíi ní, te tēe ndéca ní vijna chi nasūú yíi ní cúu de. Yāha cúu jeē ni cáhān ndaā ní, áchí yá.

¹⁹ Te jeē súcuan ni cahān yā, te ni cahān ña:

Tátá, ìn tēe nácani jnūhun Yaā Dios cúu ní, jéni ni ná. ²⁰ Tāca jíí na ñáyuu Samaria, yucu yáha ní cachiñúhún i Yaā Dios. Te máá ní ñayuu hebreo, cácahān ni jēe ñuu Jerusalén cúu nuū cánuú chiñúhún yó yā, achí ña.

²¹ Te ni cahān Jesús jíín ña:

Nánā, candíje ní jnūhun cáhán na, chi quee quivī jeē ni nasūú yucu yáha ni nasūú ñuu Jerusalén cúu nuū chiñúhún ní maá Yaā cúu Tátá, chi ndīhi-ni lugar te cuu chiñúhún ní yá. ²² Máá ní ñáyuu Samaria tu cájini ni ndé ìn cúu jeē cáchiñúhún ní. Te máá ná jijnáhan ná chi cájini na ndé ìn cúu jeē cáchiñúhún ná. Chi nde nuū maá ná jijnáhan ná ñáyuu hebreo cúu nuū véji Yaā jnama ñayuu. ²³ Te je ni quee quivī jeē ñáyuu cáchiñúhún ndāā, vijna te chiñúhún ndije i Yaā cúu Tátá nde jíín ini jíín ánuá i. Chi máá Tátá cúní yā jeē súcuan chiñúhún ñáyuu yā. ²⁴ Yaā Dios cúu Espíritu, te ñayuu jeē cuní i chiñúhún i ya, cánuú jēe chiñúhún ndije i ya jíín ini jíín ánuá i, achí yá.

²⁵ Te ni cahān ñahan ún:

Jíín na jēe quíji Mesías jeē cúu Cristo, Yaā jeē tají Yaā Dios. Te núu ni quee maá yá, te stéén cají yá tāca jnūhun nuū yō.

²⁶ Te ni cahān Jesús:

Máá ná jeē cahán jíín ní, suu ná cúu Yaā ún.

²⁷ Te sá cáhán gā yā súcuan, te ni ndecoo-ni tēe cáscuáha jíín yá. Te ni canaa ni de cájito de jeē ndájñūhun yá jíín ñahan yúcuan. Te ni ìn de tu ní cájnūhún de ya núu na vé cájnūhun yá ña chí na vé ndájñūhun yá jíín ña. ²⁸ Yūcuán na te ñahan un ní stóo ña quíyi ña, te cuahān ña nde ñuu. Te ni cahān ña jíín ñáyuu ún:

²⁹ Nehen na quíngoo yó te coto ró ìn tēe jeē ní cachi ndīhi tāca jēe ni sáha ri. Sanaa te máá yá cúu Cristo, jeē cándetu yó quíji, achí ña.

³⁰ Yūcuán na te ni quendacoo i ñuu ún, te cuangoo i nuū íne Jesús. ³¹ Te nde ná tu jinūcoco i, te tēe cáscuáha jíín yá ni cacahān ndahú de jíín yá:

Maestro, caji ni stāā víí, achí de.

³² Te ni cahān yā jíín de:

Iyó stāā caji rī jeē tu cájini rō ndese cúu.

³³ Yūcuán na te tēe cáscuáha jíín yá, ni cacajnūhun jnáhan de:

¿A ní quindecā ìn ñayuu jeē ní yeji yā, chí naún? achí de.

³⁴ Te ni cahān Jesús:

Jeē ní cachi rī jeē iyó jēe cáji rī cúu jeē cúsih ni rī sáha ri jniñu cúní Yaā ní tají rúhū véji rī, jíín jēe sínu rī jniñu ún. ³⁵ Te cácahān rō jeē cúmaní cuñ gā yoō te tahndē trigo. Te ruhū chi cáhán rī jíín ró: Condēhe jijnáhan ró, chi ñayuu cuehē cácuu i nájnūhun trigo jeē jé ni cuaan jeē tahndé, chi je cáhiyo tūhva i candíje i ruhū. ³⁶ Te tēe scándíje ñayuu cácuu de nájnūhun tēe cájehnde trigo, te nihīn de yāhu de. Te jeē cánastútú de ñayuu cúu jeē cótecu i ní cáni andiví. Te tēe cáscuíté núu jnūhun ri, inuú-ni cusih ni de jíín tēe cástéén gā jnūhun ri. ³⁷ Chi ndāā cúu jnūhun jeē cahán: ìn tēe jéte, te ìnga tēe nástútú, achí. ³⁸ Te suu cúu jeē ní tají rí rohó jijnáhan ró jēe scándíje ró ñayuu jeē jé ni canihīn jnūhun ya ni casáha ìnga tēe. Chi ìnga tēe je ni canacani de jnūhun nuū ñáyuu, te máá ró chi nájnūhun cánastútú ró i cúu jeē scándíje ró i.

³⁹ Te cuehē ñayuu Samaria jeē cáyūcú ñuu ún, ni cacandíje i Jesús jeē ní jini sōho i jnūhun ni cahān ñahan ún. Chi ni cahān ña: Ni cachi ya ndīhi tāca jēe ni sáha ri. ⁴⁰ Te jeē yúcuan cúu jeē ñayuu Samaria un ní jinūcoco i nuū yā, te ni cacahān ndahú i jíín yá jeē na quéndōo ya ñuu i. Te ni ndōo ya yúcuan úu quivī. ⁴¹ Te cuehē gā i ni cacandíje i ya jíín jnūhun cáhán maá yá. ⁴² Te ni cacahān i jíín ñahan ún:

Tuá niní jēe cahán maá ró te candíje ri yā, chi je ni cajini sōho ri jnūhun cáhán maá yá. Te cájini yō jeē maá yá cúu ndije Cristo, Yaā jnama ñayuu ñayíví. Achí i.

Jeē ní nasávāha ya sēhe tēe ndíso jniñu nuū rey

⁴³ Te nuū ni yáha uū quivī ún, te Jesús ni quenda ya Samaria, te ni quihin tucu ya ichi cuanuhun yā región Galilea. ⁴⁴ Chi je ni cahān maá yá jeē tēe canacani jnūhun Yaā Dios, tu cáhiyo yíñúhún ñáyuu ñuu de jíín de, te suni súcuan ni cuu jíín maá yá. ⁴⁵ Te ná ni

najinū yā Galilea, te ñayuu un ní cajetáhú i ya, chi suni máá i ni jengoo i vico pascua ñuu Jerusalén, te ni cajito i tācá jniñu ní sáha ya quivī ni íyo vico ún.

⁴⁶ Yūcuán na te ni jehēn tucu ya ñuu Caná ndañúū Galilea, nuū ni sáha ya jeē ndúte ni nduu vino. Te ini ñuu Capernaum ni íyo ñin tēe cújéhnu jeē ndíso jniñu nuū rey. Te cúhú sēhe de. ⁴⁷ Tēe un ní jini jnūhun de jeē ní najinū Jesús región Galilea jeē ni jéhēn yā región Judea. Te ni jecondēhé de ya, te ni cahān ndahú de jíin yá jeē na quihín yā jíin de vehe de, te nasávāha ya sēhe de, chi je yajni cuu i. ⁴⁸ Te ni cahān Jesús jíin de:

Núu tú coto ró jniñu jéhnu jeē náā ni rō sáha, te ma candíje cuiti rō jijnáhan ró, áchí yá.

⁴⁹ Te tēe ndíso jniñu nuū rey, ni cahān de:

Cava vāha ni ní na quihín yō, chi núu cucuéé ní te cuu sēhe ná, áchí de.

⁵⁰ Yūcuán na te ni cahān Jesús:

Cuánuhun vehe ró, chi cotecu sēhe ró.

Te tēe un ní candíje de jnūhun ni cahān Jesús, te cuanuhun-ni de. ⁵¹ Te níni jíca de cuanuhun de vehe de, te ni quijicoo mozo de ni caquijnahan i de, te ni cacahān i:

Je ni nduvāha sēhe ní, áchí i.

⁵² Te ni cajnūhún de na hora ni quejéé ndúvāha i. Te ni cacahān i jíin de:

Cahiñ jeē ícu ni quenda quiji i.

⁵³ Yūcuán na te máá tátá i ní sáha de cuenta jeē hora un cúu jeē ni cahān Jesús jíin de jeē cótecu sēhe de. Te ni candíje de jíin ní vehe de jeē cúu ya Yaā ní tají Yaā Dios.

⁵⁴ Yāha cúu vuelta uū jeē ni sáha Jesús jniñu jéhnu jeē ni stéén yā poder yā región Galilea, jeē ní najinū yā jeē ni jéhēn yā región Judea.

Jeē ní nasávāha ya ñin tēe cátú yuhu pila Betesda

5

¹ Yūcuán na te cuahān tucu Jesús ñuu Jerusalén, chi íyó tucu vico cásáha jnáhan ñuu yā hebreo. ² Te Jerusalén iyó ñin pila ndute yajni yéhyí jéē naní yéhyí lanchi. Te yuhu hebreo naní Betesda. Te nuū íne pila un íyó úhūn corredor. ³ Te ini tācá corredor un cācāa cuehē ñayuu cācuhū, jeē cuaá, jeē chacuá, jeē ni íjin. Te cāndetu i jeē canda ndute ún. ⁴ Chi íyó quivī jeē cúun ñin ndajéhé yā ini pila un, te scānda ya ndute. Te ñayuu quivī xihna gā ini pila un ná scānda ya ndute, te ndúvāha i na-ni cuehyī ndóho i. ⁵ Te yūcuan íyó ñin tēe jeē ní cuu ocō xahūn unī cuiyā cuhú de. ⁶ Te ni jito Jesús jeē catú de, te ni jini yā jeē ní cuu cuehē cuiyā cuhú de. Te ni cahān yā jíin de:

¿A cúní rō nduvāha ró? áchí yá.

⁷ Te ni cahān tēe cúhú un jíin yá:

Tu níhín na ni ñin tēe squivī sañá ini pila hora jeē cānda ndute. Chi tāca jínu jeē cuní na quivī ná, te quivī-ni inga ñayuu xihna gā. Achí de.

⁸ Te ni cahān Jesús:

Ndocuññi te naquihin ró camilla rō te caca ró, áchí yá.

⁹ Te tēe un ní nduvāha-ni de. Te ni naquihin de camilla de, te ni quejéé de jíca de. Te quivī ndétātu cúu quivī ún. ¹⁰ Yūcuán na te jnáhan de tēe hebreo un ní cacahān jíin de: Quivī ndétātu cúu vijna. Te áchí ley jeē ma cúu condiso ró camilla rō.

¹¹ Te ni cahān tēe ni nduvāha ún:

Tēe ni nasávāha ruhū, ni cahān de jíin rí jeē náquihin ri camilla rī te caca ri, achí de.

¹² Yūcuán na te ni cacajñūhún un de:

¿Ndé tēe ni cahān jíin ró jeē náquihin ró camilla rō te caca ró?

¹³ Te tēe ni nduvāha ún, tu jíni de ndé ñin cúu jeē ní nasávāha de. Chi cáhiñ cuehē ñayuu yūcuán, te Jesús je cuahān yā. ¹⁴ Te cúcuéé gá te ni najnáhan Jesús jíin de ini templo cáhnu. Te ni cahān yā:

Vijna chi je ni nduvāha ró. Ma sáha ga rō cuēchi, chi núu tuú, te quiji ñin jnūndóho xeñ gā siquī rō, achí yá.

¹⁵ Yūcuán na te cuahān tēe ún, te ni castūhún de nuū jnáhan de hebreo un jēe Jesús cúu jeē ní nasávāha ya de. ¹⁶ Te siquī jeē ní sáha Jesús jniñu yáha quívī ndétátú, jeē yúcuan cúu jeē tēe hebreo un cájito xeēn de ya, te cácuni de cahni de ya. ¹⁷ Te ni cahān Jesús jíin de:

Máa Tátá rī chi nń cáni te nde vijna sáha ya jniñu váha, te suni súcuan ruhū sáha ri jniñu váha.

¹⁸ Te siquī jeē ni cáhān yā súcuan, te tēe hebreo un víhyá gā cácuni de cahni de ya. Chi nasūu máa ĩn-ni jeē tu squícu ya jeē cahán ley siquī quívī ndétátú, chi suni jeē ni cáhān yā jeē Tatá yā cúu Yaā Dios, te súcuan sáha ĩnuū yá máa yá jíin Yaā Dios.

Siquī jeē ndíso jniñu Sēhe Yaā Dios

¹⁹ Te ni cahān Jesús:

Jendaá cahán rī jíin ró jijnáhan ró: Ruhū jeē cúu Sēhe Yaā Dios, tú na vé cúu sáha ri jeē máa rí, chi máni sáha ri jeē jíto ri sáha Tátá rī. Chi tāca jēe sáha Tátá rī, suni sáha ruhū jeē cúu ri Sēhe ya. ²⁰ Chi máa Tátá rī, manī yā jíin ruhū jeē cúu ri Sēhe ya, te stéen yā nuū rī ndīhi jeē sáha ya. Te jéhu ga jniñu stéen yā vēsú jeē ní cuu vijna, jeē naa ni rō coto ró jíjnáhan ró. ²¹ Te nájnūhun jeē nastécu máa Tátá rī ndīyi te cotecu tucu i, suni súcuan ruhū jeē cúu ri Sēhe ya, nastécu rī ndé-ni cúu jeē cuní máa rí. ²² Te máa Tátá rī, tu sándaā yā siquī ni ĩn ñayuu, chi ni jēhe ya jnūhun jeē sándaā máa rí siquī tāca ñáyuu, chi Sēhe ya cúu ri. ²³ Te súcuan te coo yíñúhún ndīhi ñayuu nuū rī, nájnūhun yíñúhún i nuū Tatá rī. Te ñayuu tu íyó yíñúhún núu rī, núu súcuan te suni tu yíñúhún i nuū máa Tátá rī jeē ní tají yá ruhū vēji ri.

²⁴ Jendaá cahán rī jíin ró: Núu ĩn ñayuu chuhun ni i jnūhun cáhán rī, te candíje i jeē Yaā ndaā cúu Yaā ní tají rúhū vēji ri, ñayuu ún cotecu i nń cáni andívī, te ma jnahnú ndetū i. Chi ma cúu ga i nájnūhun ndīyi, chi sa suhva cotecu i nń cáni. ²⁵ Jendaá cahán rī jíin ró jeē quiji quívī, te vijna je ni quejé, jeē tāca ñáyuu cácuu nájnūhun ndīyi, cuni nahín i jnūhun cáhán ruhū, Sēhe Yaā Dios. Te ñayuu cuatáhú, chi cotecu i nń cáni. ²⁶ Chi nájnūhun íyó poder máa Tátá rī jeē sáha ya jeē técu ndīhi-ni, suni súcuan ni jēhe ya poder nuū ruhū jeē sáha ri jeē cotecu ndīhi-ni. ²⁷ Te suni ni sáha ya jeē ndíso jniñu ri sándaā rī siquī ñayuu, chi cúu ri Yaā ní nduu tēe. ²⁸ Ma náa ni rō canī ni rō siquī jnúhun cáhán rī. Chi quee quívī jeē tāca ndīyi cuni sōho i jnūhun cahān rī, ²⁹ te quendacoo i nuū yíndūji i. Te ndīyi jeē ní casáha jniñu váha, natecu i jeē cótecu i nń cáni. Te ndīyi jeē ní casáha jniñu néé, natecu i te quívicoo i nuū jnahnú ndetū i.

Ndé vé cúu jeē steén jeē ní tají Yaā Dios yā

³⁰ Tú na vé cúu sáha ri jeē máa rí. Chi nájnūhun ndácu Yaā Dios jniñu nuū rī, súcuan sándaā rī jniñu. Te ndaā sándaā rī, chi tu sáha ri jeē cuní máa rí, chi sáha ri jeē cuní máa Tátá rī, Yaā ní tají rúhū vēji ri. ³¹ Núu ruhū cahān rī jeē cúu ri Sēhe Yaā Dios, te cachi ñayuu jeē tu jéjníñu jnūhun cáhán rī. ³² Te íyó inga jeē cahán jeē cúu ri Sēhe ya. Te jíin rī jeē jnúhun un jéé cahán yā, chi níhín jniñu. ³³ Máa ró ni catají ró tēe ni cacajnūhún de Juan. Te Juan chi ndaā ni cahān de jnūhun ri. ³⁴ Te vēsú súcuan te nasūu rúhū cúu jeē jíni ñúhún jeē steén ĩn tēe jeē Sēhe Yaā Dios cúu ri. Chi máa ró cúu jeē jíni ñúhún návāha candíje ró te cācu ró jíjnáhan ró. Jeē yúcuan ní cahān rī jeē iyó ndáa jnūhun ri jeē ní nacani Juan. ³⁵ Máa Juan ni cuu de nájnūhun ĩn lámpara jeē cayú te cúndijin, cúu jeē ní nacani de jnūhun ri. Te máa ró, jecu-ni quívī ni canujnahan ni rō jeē ni stéen de nuū rō. ³⁶ Te íyó jéé steén cají gá jeē cujéhu ri vēsú jeē ni cáhān Juan. Suu jniñu sáha ri, jniñu jeē ní tejníñu Tátá rī ruhū jeē sáha ri, jniñu un stéen ndije jeē máa yá ni tají rúhū vēji ri. ³⁷ Te Tátá rī jeē ní tají yá ruhū vēji ri, suni máa yá cahán nuū tútu ĩi jeē cujéhu ri, vēsú tu ní cájini sōho cuítī rō jeē cahán yā, ni tu ní cájito ró yá. ³⁸ Te tu ní cáchuhun ni rō jnūhun un jéé ni cáhān Tatá rī, chi tu cácandíje ró rúhū, Yaā ní tají yá vēji. ³⁹ Cánanducú vii rō tāca jnúhun cáhán tutu ĩi, chi cájeni ni rō jeē yúcuan níhín rō jnūhun jeē cótecu rō nń cáni sáha. Te jnūhun siquī máa rí cúu jeē cahán tutu ún. ⁴⁰ Te vēsú súcuan te tu cácuni rō cuatáhú ró ruhū quívicoo ró ndaha ri návāha cotecu rō nń cáni.

⁴¹ 'Tu chíhi ri cuenta jnūhun jeē cácahān ñayuu jeē cujéhnū ri. ⁴² Chi je jíní rī ndese cándāa ánuá rō jeē tu cáhīyo manī rō jín Yaā Dios. ⁴³ Ruhū vēji ri jín jniñu cúní Tatá rī, te tu cájetáhú ró ruhū. Te núu inga tēe quee de jín jniñu cúní maá de, sa tēe un yáchī cuatáhú ró de. ⁴⁴ ¿Ndese cuu candíje ró jijnáhan ró? Chi máni cáconi rō jeē cujéhnū ró sáha jnáhan ró, te tu cánducú ró jeē cujéhnū ró sáha Yaā Dios, jeē maá ñn-ni ya iyó. ⁴⁵ Ma cáni ni rō jeē cáquin rī cuēchi siquī rō nuū Tatá rī. Chi íyó ñn jeē cáquin cuēchi siquī rō, suu Moisés, tēe jeē cáñuhun ni rō jeē quendōo ndāā rō jín ley jeē ní tee de. ⁴⁶ Chi núu ní cácañdije ró jēē ní tee Moisés, te suni candíje ró rúhū nuú, chi jnūhun máá rí ni tee de. ⁴⁷ Te núu tu cácañdije ró jnūhun ri jeē ní tee de, ¿te ndese candíje ró jnūhun cáhān maá rí núu súcuan? Achí yá jín de.

Jeē ni scáji yā uhūn mil tēe

(Mt. 14.13-21; Mr. 6.30-44; Lc. 9.10-17)

6

¹ Yūcuán na te cuahān Jesús inga lado mar Galilea, jeē cúu mar Tiberias. ² Te yōh̄yo cuehē ñayuu ni candiquīn i ya, chí ni cajito i tācá jniñu jéhnū jeē steén yā poder yā jeē ní nasávāha ya ñayuu cácuñū. ³ Te ni caa ya ñn yucu, te ni cucōo ya yūcuan jín tēe cáscuáha jín yá. ⁴ Te je ni cuyajni vico pascua jeē cánucūhun ni jnáhan ñuu yā hebreo jeē ní cacācu i nuū ñáyuu nación Egipto. ⁵ Te ni ndacoto ya, te ni jito ya jeē véjicoo cuehē ndasí ñáyuu. Te ni cahān yā jín Felipe:

¿Ndé nuū cuaan yó jēē cáji ñayuu yáha jijnáhan i?

⁶ Te súcuan ni cahān yā jeē jito ndee yā de núu ndese cahān de. Chi je jíní maá yá ndese sáha ya. ⁷ Te ni cahān Felipe jín yá:

Te ni ma cánda uū ciento denario staa, ni vēsú jeē cáji i jecu jecu jijnáhan i, áchí de.

⁸ Yūcuán na te ni cahān Andrés, ñani Simón Pedro, inga tēe scuáha jín yá un:

⁹ Yāha íne ñn sūchi yí jēē ndiso i uhūn staa cebada jín uū chācá. ¿Te ndé canda cuiti ún, chí ñayuu cuehē ndasí cúu?

¹⁰ Yūcuán na te ni cahān Jesús:

Cahān jín ñáyuu na cucōo i, áchí yá.

Te yūcuan cáa cuehē ite, te ni cacucōo i, te nájñuhun uhūn mil tēe cúu. ¹¹ Te ni quihin Jesús staa ún, te ni nacuatáhú yá nuū Yaā Dios. Te ni jēhe ya nuū tēe cáscuáha jín yá, te máá de ni casaja de nuū ñáyuu ní cacucōo ún. Te suni súcuan ni sáha ya jín chācá, te ni cayejí i nasaa cáconi maá i. ¹² Te nuū ní candutú chíji i, te ni cahān yā jín tēe cáscuáha ún:

Nastútú ró tācá pedazo jeē ni ndóo, návāha tu stívi cuiti yō.

¹³ Te ni canastútú de, te ni chitú úxī uū jīca pedazo jeē ni ndóo siquī ndihúhún staa cebada un jeē tuá ni ndíhi caji ñayuu. ¹⁴ Te ñayuu un ní cajito i jniñu jéhnū ni sáha Jesús jeē ni steén yā poder yā. Te ni cacahān i:

Jendaá ndije jeē tēe yáha cúu jeē cahān tutu jeē quíji ini ñayívi jēē nácani jnūhun Yaā Dios. Achí i.

¹⁵ Te ni jini Jesús jeē cáconi i sáfuerza i ya jeē cuu ya rey i núu. Te ni cujiyo tucu máá ñn-ni ya, ni caa ya cuahān yā nuū sucún gá yucu.

Jeē ní jica jéhe yá nuū mar

(Mt. 14.22-27; Mr. 6.45-52)

¹⁶ Te nuū cuácuaa, te tēe cáscuáha jín yá ni nanuu de cuango de nde mar. ¹⁷ Te ni ndīvicoo de ini barco, te ni cascáca de jeē quíngoo de nde inga lado mar nde ñuu Capernaum. Te je ni cunee, te ná tu ndee Jesús nuū de. ¹⁸ Yūcuán na te ni jequíhi ñn tachí níhin, te sáha jeē ndónnda ndute mar un. ¹⁹ Te jeē ní cuu nájñuhun uhūn chí íñū kilómetro cájica de jín barco, te ni cajito de jeē jíca Jesús nuū mar, te ni cuyajni ya vēji ya nuū barco. Te ni cayūhú de. ²⁰ Te máá yá ni cahān yā jín de:

Máá rí cúu. Ma yūhu ró jijnáhan ró.

²¹ Te ni cacushī ni de jeē na quívi ya ini barco. Te ni sáha ya jeē yachī-ni ni jinūcoo-ni de ñuhun íchi núu cuángoo de ún.

Jeē cánanducú ñayuu Jesús

²² Te inga quiṽi ún, te ñayuu jeē ní caquendōo inga lado mar, ni cajini i jeē tée cáscuáha jíin yá cuangoo de jíin máñúhún-ni barco ni íne yūcuán, jíin jéē tu ní quiṽi Jesús quihīn yā jíin de jíjnáhan de. ²³ Te sava ga barco jeē véjicoo ichi ñúu Tiberias, ni quecoo yajni lugar nuū ní cayejí i staā jeē ní nacuatáhú máá Jítóho yō jehē. ²⁴ Te jeē ní cajito ñayuu un jéē tuá Jesús íne ya yūcuán, ni tēe cáscuáha jíin yá, te ni quiṽicoo i tāca barco un, te cuangoo i ñuu Capernaum cuananducú i ya.

Jesús cúu staā jeē cótecu yō ñí cáni

²⁵ Te nuū ni jinūcoo i nde inga lado mar, te ni nanihīn jnáhan i jíin Jesús. Te ni cacajnūhún i ya:

Maestro, ¿na hora ni quee ni yáha?

²⁶ Te ni cahān Jesús:

Jendaá cahán rī jíin ró jeē cánanducú ró ruhū síquī jeē ní cayejí rō nde ni candutú chíji ró, te nasūu síquī jeē ní cajito ró tāca jniñu jéhu jeē steén rī poder rī. ²⁷ Ma cóndihṽi ni rō máá síquī jeē caji rō jeē yachī nataxīn, chi sa suhva condihṽi ni rō síquī jeē nihín rō jeē cótecu rō ñí cáni sáha. Te máá rí, Yaā ní nduu tēe, cuāha ri nájnūhun staā jeē cótecu rō ñí cáni sáha. Chi Tátá rī Yaā Dios ni jeni ya ruhū jeē sáha ri súcuan. Achí yá jíin i.

²⁸ Yūcuán na te ni cacajnūhún i ya:

¿Ndese sáha ná návāha squícu ná jniñu cúni Yaā Dios?

²⁹ Te ni cahān Jesús:

Jniñu jeē cuní Yaā Dios cúu jeē candíje ró rúhū, Yaā ní tají yá vēji.

³⁰ Yūcuán na te ni cacahān i:

Núu súcuan ¿te na jniñu jéhu sáha ní coto ná jíjnáhan ná te candíje ná jéē ní tají yá nihín? ¿Na jniñu cúu jeē sáha ní? ³¹ Chi tāca jí yō jenahán ni cayejí de maná jeē ní cuun ichi ándiví ndé nuū ñuhun téhé, nájnūhun yósó núu tútu: Yaā Dios ni jēhe ya staā ni cuun ichi ándiví, ni cayejí i, áchí tutu. Achí i jíin yá.

³² Te ni cahān Jesús:

Jendaá cahán rī jíin ró: Nasūú Moisés ni jēhe staā un núu de jíjnáhan de jeē ní cuun ichi ándiví, chi máá Tátá rī ni jēhe. Te máá yá jēhe staā andiví jéē cótecu rō ñí cáni sáha. ³³ Chi staā jēhe Yaā Dios cúu máá Yaā ní quiji ichi ándiví, te sáha ya jeē ñayuu ñayiví cótecu i ñí cáni andiví. Achí yá.

³⁴ Te ni cacahān i jíin yá:

Níní cuáha ni stáa ún caji na núu súcuan.

³⁵ Te ni cahān Jesús:

Máá rí cúu máá stáa jeē cótecu rō ñí cáni sáha. Ndé vé quiṽi ndaha ri, ma cúu cuiti gā sōco. Te ndé vé candíje ruhū, ma jichí cuiti gā. ³⁶ Te nájnūhun je ni cahān rī jíin ró, tu cáandíje ró rúhū, vēsú ni cajito ró núu rī. ³⁷ Tāca ñayuu jeē sáha Tátá rī jeē candíje i ruhū, máá i quiṽicoo ndaha ri. Te jétáhú rí tāca jéē cuní quiṽi ndaha ri, chi ma squéhichí cuiti rī quihīn. ³⁸ Chi ni quiji ri ichi ándiví návāha sáha ri jniñu jeē cuní Yaā ní tají rúhū, te nasūu jéē sáha ri jeē cuní máá rí. ³⁹ Te jniñu jeē cuní Tátá rī, Yaā ní tají rúhū, cúu jeē ma scuíta ri ni ñin ñayuu ni jēhe ya nuū rī, chi condito ri i te nastécu rī i quiṽi jínu ñayiví. ⁴⁰ Te Yaā ní tají rúhū, cuní yā jeē tāca ñayuu jeē nihín i jnūhun ruhū, Sēhe Yaā Dios, te candíje i ruhū, cótecu i ñí cáni andiví. Chi nastécu rī i quiṽi jínu ñayiví. Achí yá.

⁴¹ Yūcuán na te ni caquejéé jnáhan ñuu yā hebreo cácahān de síquī yā, chi ni cahān yā jeē máá yá cúu staā ní quiji ichi ándiví. ⁴² Te ni cacahān de:

¿A násūu tée yáha cúu Jesús, sēhe José? Te cájini yō tatá de náná de. ¿Te ndese cúu jeē cahán de jeē ni quiji de ichi ándiví núu súcuan?

⁴³ Te ni cahān Jesús jíin de:

Ma cahán rō siquī rī jijnáhan rō. ⁴⁴ Ni ñn ñayuu ma cúu quīvī i ndaha ri núu ma sáha Tátá rī jeē cúu ni i quīvī i, chi máá yá ni tají ruhū vēji ri. Te nastécu rī i quīvī jínu ñayīvī. ⁴⁵ Te suhva yósó núu tútu ni catee tēe ni canacani jnūhun Yaā Dios: Tācá i chi stéén Yaā Dios nuū i, áchí. Núu súcuan te tāca ñayuu jíní sōho jnūhun cáhán Tátá rī, te jétáhú i jeē steén yā nuū i, ñayuu ún chi quívícoo i ndaha ri.

⁴⁶ Te tu ní jíto ni ñn ñayuu nuū maá Tátá rī. Chi máñúhún-ni ruhū ni jito ri nuū yā, chi nde nuū maá yá vēji ri. ⁴⁷ Jendaá cahán rī jíin rō jijnáhan rō jéē ñayuu jeē candíje i jeē jnáma ri i, máá i cotecu i ñí cáni. ⁴⁸ Máá rí cúu staā jeē cótecu rō ñí cáni sáha. ⁴⁹ Tāca jíi rō jenahán, ni cayejí de staā maná jeē ní cuun ichi ándiví ndé nuū ñúhun téhé, te tu ní sáha jeē cótecu de ñí cáni andiví. ⁵⁰ Te staā jeē cahán rī jeē vējí ichi ándiví, chi na-ni ñayuu caji, te cotecu i ñí cáni andiví. ⁵¹ Te suu máá rí cúu staā un jéē ní quiiji ichi ándiví jéē sáha jeē cótecu rō ñí cáni. Te ñayuu jeē caji staā yáha, cotecu i ñí cáni andiví. Te staā jeē cuáha ri un cúu yiqui cúñu rī, te cuāha ri návāha ñayuu ñayīvī cotecu i ñí cáni andiví. Achí yá.

⁵² Yūcuán na te jnáhan ñuu yā hebreo ni cacahān de jíin táca jnáhan de:

¿Ndese cuu cuāha tēe yáha yiqui cúñu de caji yō? achí de.

⁵³ Te ni cahān Jesús jíin de:

Jendaá cahán rī jíin rō: Núu tú candíje rō jéē yiqui cúñu ruhū, Yaā ní nduu tēe, cúu nájnūhun staā, te ñíñī rī cúu nájnūhun ndute, núu súcuan te ma cótecu rō ñí cáni andiví.

⁵⁴ Chi ñayuu cáncandíje jeē yiqui cúñu rī cúu nájnūhun staā te ñíñī rī cúu nájnūhun ndute, máá i cotecu i ñí cáni. Te nastécu rī i quīvī jínu ñayīvī. ⁵⁵ Chi yiqui cúñu rī jíin ñíñī rī cúu ndíje jeē sáha jeē cótecu i ñí cáni. ⁵⁶ Te ñayuu cáncandíje jeē yiqui cúñu rī jíin ñíñī rī cúu nájnūhun staā jíin ndute jeē cótecu i ñí cáni sáha, máá i níni ndúú i jíin rí, te ndúú rí jíin i. ⁵⁷ Máá Tátá rī, Yaā técu, ni tají yá ruhū vējí ri, te técu rī sáha máá yá. Te suni súcuan, ñayuu cáncandíje jeē cúu ri nájnūhun staā i ndute i, suni súcuan cotecu i ñí cáni sáha ri. ⁵⁸ Máá rí cúu staā ní quiiji ichi ándiví. Te staā jeē cahán rī tu cúu nájnūhun staā maná jeē ní cayejí tāca jíi rō jenahán, chi tu ní sáha jeē cótecu de ñí cáni. Te staā jeē cahán rī, chi ñayuu caji, cotecu i ñí cáni sáha, áchí yá.

⁵⁹ Tāca jnúhun yáha ní steén Jesús nuū ñayuu ní candutútú ini vehe ñi sinagoga ñuu Capernaum.

Jnūhun cotecu yō ñí cáni

⁶⁰ Te cuehē ñayuu cascuáha jíin yá, ni cajini sōho i jnūhun yáha jéē ni stéén yā. Te ni cacahān maá i:

Yōhyo yí jnúhun cáhán yā yāhá. ¿Ndese cuu cuatáhú yó?

⁶¹ Te ni jini Jesús jeē cácahān i jeē yí cúu jnūhun yāhá, te ni cahān yā jíin i:

¿A yí sáha jnūhun yáha jíin rō jijnáhan rō? ⁶² ¿Te ndese sáha rō núu coto rō jéē ruhū, Yaā ní nduu tēe, ndaa ri nuhun rī nuū ni cóndee rī xīhna ñúhún? ⁶³ Máá ánuá ñayuu cúu jeē sáha jeē técu i. Chi yiqui cúñu i tu jéjníñu cuítí súcuan. Te tāca jnúhun ni cahān rī jíin rō cúu jeē quéndōo vāha ánuá rō, te cotecu rō ñí cáni sáha. ⁶⁴ Te sava rō chi tu cáncandíje rō. Achí yá.

Chi nde xīhna ñúhún je jíin Jesús ndé-ni cúu ñayuu jeē ma cáncandíje, jíin ndé ñn de cúu jeē nastúu de ya. ⁶⁵ Te ni cahān gā yā:

Jeē yúcuan ní cahān rī jíin rō jeē ma cúu quīvī ni ñn ñayuu ndaha ri, te núu tu sáha Tátá rī jeē cúu ni i quīvī i, áchí yá.

⁶⁶ Te nde quīvī ún te cuehē ñayuu cascuáha jíin yá, ni castóo i ya, te tuá ni cájica i jíin yá. ⁶⁷ Yūcuán na te ni cahān yā jíin máá ndihúxí uū tēe cascuáha jíin yá:

¿A suni cáconi máá rō quingoo rō, chí naún?

⁶⁸ Te ni cahān Simón Pedro:

¿Ndé núu gā quingoo ná? Chi máá ní cúu jeē nácani jnūhun jeē cótecu na ñí cáni sáha.

⁶⁹ Te ni cacandíje ná te cájini na jéē maá ní cúu Cristo, Sēhe Yaā Dios, Yaā técu, achí de.

⁷⁰ Te ni cahān Jesús:

Te vēsú ni nacāji ri ndihúxí uū rō, te íyó ñn rō jeē ní quīvī jexeén ini. Achí yá.

⁷¹ Te súcuan ni cahān yā siquī Judas Iscariote, sēhe Simón. Chi máá de nastúu de ya, vēsú ñn jnáhan jeē uxí uū tēe cáscuáha jíin yá cúu de.

Jeē tu ní cácaandíje ñani Jesús

7

¹ Yūcuán na te jíca cuu Jesús región Galilea. Chi tu cúní yā caca cuu ya región Judea, chi jnáhan ñuu yā hebreo jeē cáyūcu yúcuan, cáconi de cahni de ya. ² Te cuacuyajni vico jeē casáha ñayuu yā hebreo vehe ramadá, cáyūcu i chíji. ³ Te ñani yā ni cacahān de jíin yá:

¿Naun máá yáha-ni íne ró? ¿Naun tú quihīn rō región Judea, návāha tēe yūcuan jēe cácaandíje de rōhó, suni coto de jniñu jéhnū sáha ró. ⁴ Chi núu cúní ñn tēe jeē cuité núu jnūhun de, te tu sáha yuhu de jniñu. Te núu sáha nde ró táca jniñu jéhnū, vāha ga na sáha ró jēe cúni ndivii ñayuu.

⁵ Súcuan ni cacahān ñani yā jíin yá, chi ni máá de tu cácaandíje de ya. ⁶ Yūcuán na te ni cahān Jesús:

Ná tu quee maá quívī jeē quihīn rī. Te máá ró jijnáhan ró chi na-ni quivī-ni te cuu quingoo ró. ⁷ Chi ma quití ni ñayuu ñayīvi núu rō, te máá rí chi quití ni i jíto i ruhū, chi cáhān rī jeē jini rī jeē máni jniñu née cása i. ⁸ Cuángoo máá ró vico ún. Te máá rí chi ma quihīn rī vijna, chi ná tu quee maá quívī cánuú quihīn rī. Achí yá.

⁹ Súcuan ni cahān yā jnūhun yáha jíin de, te ni quendōo ya Galilea.

Jeē ni jéhn Jesús vico vehe ramadá

¹⁰ Te nuū ni yáha ñani yā cuangoo de vico ún, te sáa te suni cuahān maá yá. Te tú cuahān ndijin yā, chi tu ní stéen yā maá yá. ¹¹ Te jnáhan ñuu yā hebreo cánanducú i ya nuū víco ún, te cacahān i:

¿Ndé nuū íne tēe ún? áchí i.

¹² Te yōhyo ni cacahān ñayuu jeē siquí yā, chi sava i cacahān: Tēe vāha cúu de. Te sava ga i cacahān: Tuú chi stáhu de ñayuu.

¹³ Te yuhu-ni ni cacahān i jnūhun ya, chi cáyūhú i jeē quití ni jnáhan i tēe hebreo.

¹⁴ Te jeē ní cuu sava vico, te ni quee Jesús, ni quívī ya templo cáhnu, te ni quejéé yá stéen yā jnūhun. ¹⁵ Te ni canaa ni jnáhan ñuu yā hebreo cájini sōho i, te ni cacahān i:

¿Ndese jíni tēe yáha cuéhē jnūhun ndíchí, chi tu ní jíca de escuela? áchí i.

¹⁶ Yūcuán na te ni cahān Jesús:

Jnūhun stéen rī chi nasūu jnūhun máá rí cúu, chi jnūhun jeē ni jéhe máá Yaā ní tají rúhū cúu. ¹⁷ Núu ñn ñayuu cuní i sáha i jniñu cúní Yaā Dios, ñayuu ún chi jecūhun ni i núu nde nuū Yaā Dios vēji jnūhun stéen rī, chí jnūhun jeē jéni ni maá-ni rí cúu. ¹⁸ Tēe cáhān jnūhun jéni ni maá de, tēe un ndúcú de jeē na sájéhnū ñayuu de. Te núu ñn tēe ndúcú de jeē sajéhnū de Yaā ní tají de, tēe un cúu tēe ndāā, te tú na jnūhun stáhu íyo jíin de.

¹⁹ ¿A násūu jēe ni jéhe Moisés ley yā nuū rō jeē squícu ró? Te ni ñn ró tu cáscuicu. Chi sa jeē cáconi rō cahni rō ruhū, ¿te najehē cúu? Achí yá.

²⁰ Te ni cacahān ñayuu cuehē ún:

Tachī ndóho ró. ¿Ndé ñn cúní cahni rohó?

²¹ Te ni cahān Jesús:

Ni nasávāha ri ñn tēe quivī ndétātú, te ndivii rō ni canaa ni rō ni cajito ró jēe quiví ndétātú ni sáha ri jniñu ún. ²² Te Moisés ni jéhe de ley jeē cúu circuncidar nuū rō. Te cása i ró circuncidar sūchi yí núu uná quivī jeē ní cacu i, vēsú quivī ndétātu cúu. (Te nasūu máá Moisés ní jéquin ley un, chi je ni iyo nuū tāca jí de.) ²³ Núu súcuan te núu cása i ró circuncidar vēsú quivī ndétātu cúu, návāha squícu ró ley Moisés, ¿te najehē cáquitī ni rō jeē ní nasávāha ndihī ri ñn tēe quivī ndétātú? ²⁴ Ma yachí cani ni rō jeē cuéchi cúu jeē sáha ri. Chi sa cani vāha ni rō siquī tācá jniñu váha. Achí yá.

Jeē ní cachi Jesús ndé nuū vēji ya

²⁵ Yūcuán na te sava ñayuu ñuu Jerusalén ni cacajnūhun jnáhan i:

¿A násūu tée yáha cúu jeē cánanducú tée cácujéhnu jeē cáhni de, chí naún? ²⁶ Te yáha cáhán ndijin de nuū chitú, te tú na jnūhun cácahān jíin de. ¿A sanaa te ni cacundaā ni tēe cácujéhnu jeē tēe yáha cúu Cristo jeē achí tutu jeē quiji, chí naún? ²⁷ Te tuú chi je cájini yō nuū vēji tēe yáha. Te jeē quiji Cristo, chi ni ñn yó má cúni ndé chi quiji ya. Achí i.

²⁸ Yūcuán na te ni cahān jee Jesús jeē steén yā jnūhun ini templo:

Cájini rō ruhū, te cájini rō ndé ñuu vēji ri. Te vēsú súcuan te máá Yaā ndaā cúu jeē ní tají ruhū vēji ri, te tú vēji ri jeē cuní maá rí. Te tu cájini rō ndese Yaā cúu ya. ²⁹ Te máá rí chi jíin rī yā, chi nde nuū maá yá vēji ri, te máá yá ni tají ruhū, achí yá.

³⁰ Yūcuán na te ni canducú de jni de ya. Te ni ñn de tu ní cúu jni de ya, chi ná tu quee maá quívī jeē jni de ya. ³¹ Te cuehē ñayuu chi ni cacandíje i ya, te ni cacahān i:

¿A násūu tée yáha cúu Cristo, Yaā ndétu yó jēē quiji? Chi cuehē ndasí jniñu jéhnu sáha ya jeē steén yā poder yā. Achí i.

Jeē ní catajī de policía jeē jni de Jesús

³² Te ni cajini tēe fariseo jeē súcuan cácahān ñayuu jnūhun ya. Te máá de jíin sūtū cácujéhnu, ni catajī de policía cándito templo jeē jni de ya. ³³ Te ni cahān Jesús:

Jecu na quívī condee rī jíin ró jijnáhan ró. Yūcuán na te nuhun rī nuū Yaā ní tají ruhū vēji ri. ³⁴ Te nanducú ró ruhū, te ma nánihīn rō ruhū. Chi ma cúu jinūcoo ró núū cóndee rī. Achí yá.

³⁵ Yūcuán na te máá tēe un ní cacajnūhun jnáhan de:

¿Te ndé nuū quihín tēe yáha jeē ma nánihīn yō de? ¿A quihín de nuū jnáhan yó hebreo jeē ní cajitē núu cáyūcu ndé nación Grecia? ¿Te á stéén de jnūhun nuū ñayuu Grecia, chí naún? ³⁶ ¿Te na jnūhun cúu jeē ni cáhān de jíin yó jeē nanducú yó de te ma nánihīn yō de, chi ma cúu jinūcoo yó núū cóndee de? Achí tēe un jíjnáhan de.

Siquī ndute jeē cótecu yō ní cáni sáha

³⁷ Te quívī sándihí vico ún te cúu vico cáhnu ga. Te quívī un ní ndocuiñī Jesús, te ni cahān jee ya:

Núu ndé ñayuu jnáa ndasí i tāca jēē váha jeē sáha ri jehē i, nájnūhun jeē jichí i ndute, núu súcuan te na quívī i ndaha ri te coho i ndute, cúu jeē nihín i jeē váha ún. ³⁸ Te ñayuu jeē candíje jeē jnáma ri i, chi ini anuá i condee Espíritu Santo, te cuu ya nájnūhun yūte cáne ñuhún jeē sáha ya jeē cótecu i ní cáni, nájnūhun cáhán tutu i. Achí yá.

³⁹ Te súcuan ni cahān yā jeē ñayuu candíje jeē jnáma ya i, nihín i Espíritu Santo. Chi ná tu quee Espíritu ún, chí ná tu ndaa Jesús quinhun yā nuū ndujéhnu ya.

Jeē ní cacusín ñayuu siquī yā

⁴⁰ Te sava ñayuu cuehē ún, ná ni cajini sōho i jnūhun yáha, te ni cacahān i:

Jendaá jeē tēe yáha cúu jeē achí tutu jeē quiji de nacani de jnūhun Yaā Dios, achí i.

⁴¹ Te sava ga i ni cacahān:

Tēe yáha cúu Cristo, Yaā ní tají Yaā Dios.

Te sava ga i chi ni cacahān i:

Tuú chi nasūū Galilea quiji Cristo. ⁴² Chi cáhán tutu i jeē ndé yucūn rey David cacu Cristo, te cacu ya ñuu Belén, ñuu nuū ní cacu máá David. Achí i.

⁴³ Te súcuan te ni cacusín ñayuu jeē siquī yā. ⁴⁴ Te sava i cácu ni i jni i ya, te ni ñn i tu ní jni i ya.

Jeē tu ní cácuandíje tēe cácujéhnu

⁴⁵ Yūcuán na te policía cándito templo tu ní cájni de Jesús, te cuanungoo de nuū tāca tēe fariseo jíin núu sutú cácujéhnu. Te tēe ún ni cacajnūhún de policía:

¿Najehē tu ní quécoo ró jíin de? áchí.

⁴⁶ Te ni cacahān policía un:

Tú cuiti ni ñn tēe cáhán vāha ndasí nájnūhun cáhán tēe yúcuan, áchí.

⁴⁷ Te ni cacahān tēe fariseo:

¿Te á suni nde máá ró jijnáhan ró ní stáhú de naún? ⁴⁸ Ni ñin jnáhan ruhū tēe cácujuhnu jíin tēe fariseo, tu cá candíje ri jnūhun cáhán tēe ún, ¿te naun cá candíje máá ró? ⁴⁹ Te ñayuu cuehē yāhá jēe tu cájecūhun ni i ley Moisés, chi jnahnū ndetū i jeē cá candíje i tēe ún, áchí de jíináhan de.

⁵⁰ Te ni cahān Nicodemo, tēe ni jéhēn nuū yā ñin jecuáā, te suni ñin tēe fariseo cúu de:

⁵¹ Cáhán ley yō jeē ma cúu tee yó cuēchi siquī ñin tēe, te núu tú xīhna gā cuni sōho yó ndese cáhán de, návāha cucáhnū ni yō na cuēchi ni sáha de. Achí de.

⁵² Te ni cacahān jíin de:

Te rōhó, ¿á suni nde Galilea vēji ró jēe cahán rō jehē tēe ún? Nanducú váha ró núu tútu ñi te cuni rō jeē ndé Galilea tu quēnda cuítī ni ñin tēe nácani jnūhun Yaā Dios. Achí jíin de. ⁵³ Te cuanungoo de ná vehe ná vehe de.

Jnūhun ñahan ní casíquí ndeē jnáhan

8

¹ Te ni caa Jesús cuahān yā yucu Olivos. ² Te jeē cuácundijin inga quivī, te ni ndee tucu ya templo. Te ndíhi ñayuu ni quecoo i nuū yā. Te ni cucōo ya, te ni steén yā jnūhun nuū i. ³ Yūcuán na te tēe cástéén tutu ley Yaā Dios jíin tēe grupo fariseo, ni quecoo de jíin ñin ñahan jeē ní canihīn de ña jeē casíquí ndeē ña. Te ni cajeni de ña mēhñú. ⁴ Te ni cacahān de jíin yá:

Maestro, ni canihīn ná ñahan yáha jēe casíquí ndeē ña. ⁵ Te ley Moisés ndácu jniñu nuū yō jeē cuáha yó yūū xinī ñahan cása ha sūcuan návāha cuu ña. Te máá ní, ¿ndese cáhán ni?

⁶ Te sūcuan ni cacahān de jeē cájito ndee de ya núu cuatáhú yá jeē cahán ley un, chi núu tuú te caquin de cuēchi siquī yā. Te Jesús ni jīta ndeyi ya, te ni tee ya nuū ñūhun jíin xinī ndáha ya. ⁷ Te jeē cácajnūhun cácajnūhún de ya, te ni ndonehen ya máá yá, te ni cahān yā jíin de:

Núu ndé ñin máá ró tú na cuēchi ró, te xīhna gā máá ró cuāha yuū xinī ña núu sūcuan, áchí yá.

⁸ Te ni jīta ndeyi tucu ya, te ni tee tucu ya nuū ñūhun. ⁹ Te nuū ní cajini de jeē sūcuan ni cahān yā, te ni cájecūhun ni de jeē suni cáhiyo cuēchi de. Te ná ñin ná ñin de ni quendacoo de cuahān de, xīhna gā tēe jéhnū ga te nde nuū ní ndíhi na. Te ni ndōo máá ñin na Jesús jíin ñahan índichi mēhñú un. ¹⁰ Te ni ndonehen tucu ya máá yá, te tuá ni ñin tēe un ní jíto ya, chi máá na ñahan ún. Te ni cahān yā jíin ña:

¿Nde chi cuángoo tēe cájequin cuēchi siquī rō? ¿A tú ni ñin de ní ndóna cahān gā cuēchi siquī rō?

¹¹ Te ni cahān ña:

Tú ni ñin de, áchí ña.

Yūcuán na te ni cahān Jesús jíin ña:

Ni ruhū, ma cahán rī cuēchi siquī rō. Cuáhán te ma sáha ga rō cuēchi, áchí yá.

Jesús cúu máá luz jeē steén ini anuá ñayuu

¹² Te inga jínu ni cahān Jesús jíin ñayuu:

Máá rí cúu nájnūhun luz jeē steén ini anuá ñayuu ñayiví, jeē sáha jeē jécūhun ni i siquī Yaā Dios. Ñayuu candíje ruhū chi ma cáca i nájnūhun nuū néē, chi sa suhva coneváha i luz ini anuá i jeē sáha jeē cótecu i ní cáni.

¹³ Yūcuán na te ni cacahān tēe fariseo jíin yá:

Rōhó chi cáhán rō jnūhun jehē máá ró, te tu jéjníñu jnūhun cáhán rō.

¹⁴ Te ni cahān Jesús jíin de jíináhan de:

Vēsú cáhán rī jehē máá rí, te íyó ndáā jnūhun cáhán rī. Chi jíin rī ndé nuū vēji ri jíin ndé nuū quihín rī. Te rōhó tu cájini rō ndé nuū vēji ri ni ndé nuū quihín rī. ¹⁵ Máá ró chi cuenta ñayuu ñayiví cása ndaā rō siquī jnūhun cáhán rī. Te ruhū chi tu sándaā mañúhún rí siquī ni ñin ñayuu. ¹⁶ Te núu sándaā rī siquī i, te ndaā sáha ri, chi tu sáha mañúhún rí,

chi sándaā rī nde jíin máá Tátá rī, Yaā ní tají rúhū vēji ri. ¹⁷ Te yósó núū tútu ley cánevāha ró jēē núu inuú cácahān uū testigo, te jíni ñúhún cuatáhú ró jeē cácahān, chi íyó ndāā jnūhun ún. ¹⁸ Núu súcuan te ruhū cúu ñin jeē cahán ndaā rī jehē rī. Te inga jeē cahán ndaā jehē rī cúu máá Tátá rī, Yaā ní tají rúhū. Achí yá.

¹⁹ Te ni cacahān de jíin yá:

¿Ndé nuū ndeé Tátá rō?

Te ni cahān Jesús:

Tu cájini rō ruhū ni Tátá rī. Te núu jeē cájini rō ruhū, suni cuni rō Tátá rī nuú.

²⁰ Tāca jnúhun yáha ní cahān Jesús jeē steén yā ini templo nuū cáyūcu yéjnū jeē cásocō i xūhún. Te tú ni ñin de ní jnī de ya, chi ná tu quee maá quívī jeē jnī de ya.

Jeē ni cáhān yā jeē ma cúu jinūcoo de nuū cóndee yā

²¹ Te ni cahān tucu Jesús jíin de:

Ruhū chi quihīn rī, te nanducú ró rúhū, te ma nánihīn rō ruhū, chi quendō cuēchi ró siquī rō quívī cúu rō. Te jeē yúcuan má cúu jinūcoo ró núū quihīn rī, achí yá.

²² Yūcuán na te tēe hebreo un ní cacahān maá de:

¿A cahni tēe yáha maá de, te jeē yúcuan cáhān de jeē ma cúu jinūcoo yó núū quihīn de, chí naún? Achí de.

²³ Te ni cahān yā:

Máá ró jijnáhan ró chi ñayīvi yáha véjicoo ró, te ruhū chi nde andīví véji ri. Máá ró cácuu ñayuu ñayīvi yáha, te ruhū chi nasūu tēe ñayīvi yáha cúu ri. ²⁴ Jeē yúcuan ní cahān rī jeē quendō cuēchi ró siquī rō quívī cúu rō. Chi núu ma candíje ró jēē maá rí cúu Cristo, te quendō nahín cuéchi ró siquī rō quívī cúu rō. Achí yá.

²⁵ Te ni cacajnúhún de ya:

Núu súcuan ¿te ndé ñin cúu ró?

Te ni cahān yā:

Je ni cachi ri nuū rō nde xīhna ñúhún ndé ñin cúu ri. ²⁶ Te íyó cuéhē gā jnūhun cuu cahān rī jíin ró te sándaā rī siquī rō. Te ma cahán rī, chi ini ñayīvi yáha cáhān rī maá-ni jnūhun jeē ní jini ri ni cahān Yaā ní tají rúhū vēji ri. Te máni jnūhun ndaā cahán yā. Achí yá.

²⁷ Te tu ní cájecūhun ni de jeē cahán yā jnūhun Tátá yā andīví jíin de. ²⁸ Jeē yúcuan ní cahān gā yā:

Nde na yáha jeē cáta caa ró rúhū, Yaā ní nduu tēe, jicā cruz, yūcuán na te cuni rō ndé ñin cúu ri. Te cuni rō jeē tú na vé sáha ri jeē maá rí, chí cáhān rī maá-ni jnūhun ni steén Tátá rī nuū rī. ²⁹ Chi máá Tátá rī, Yaā ní tají rúhū, ndeé yá jíin rí. Te tu stóo máñúhún yá ruhū, chí níni sáha ri jniñu jeē núnahan ni maá yá. Achí yá.

³⁰ Te jeē ni cáhān yā jnūhun yáha, te cuehē ñayuu ni cacandíje i ya.

Siquī ndé-ni cúu sēhe Yaā Dios jíin séhe jexeén

³¹ Yūcuán na te ni cahān Jesús jíin jnáhan ñuu yā hebreo jeē ní cacandíje i ya:

Te núu cuiñi níhin ró jíin jnúhun stéén rī nuū rō, te cuu ndije ró ñáyuu scuáha jíin rí.

³² Te jecūhun ni rō jnūhun ndaā, te jnūhun ndaā un sáha jeē nduu libre rō nuū jeē yñi ró ndaha.

³³ Te ni cacahān i jíin yá:

Sēhe yucūn Abraham cácuu ri, te tu cáyīhi cuíti rī ndaha ni ñin. ¿Te ndese cúu jeē cahán rō jeē nduu libre rī núu súcuan?

³⁴ Te ni cahān Jesús:

Jendaá cahán rī jíin ró jeē tāca ñáyuu casáha cuēchi, tu íyó libre i, chí yñi i chíji cuēchi jeē jejnīñu cāhá i nuū. ³⁵ Te ñayuu jejnīñu cāhá, chí tu cúu i ñin jnáhan ñayuu vehe nuū jejnīñu i. Te ñin sēhe chí sa suhva cúu ndije i jnáhan ñayuu vehe ún. ³⁶ Núu súcuan te máá rí jeē cúu Sēhe Yaā Dios, núu sáha ri jeē tuá cuajníñu cāhá ró nuū cuéchi, núu súcuan te nduu libre ndije ró jijnáhan ró, te cuu ró séhe ya. ³⁷ Te jíni rī jeē séhe yucūn Abraham cácuu ró, te vésú súcuan te cácuni rō cahni rō ruhū, chí tu cájetáhú ró jnūhun cáhān rī.

³⁸ Ruhū chi cáhán rī jnūhun jeē ni stéén Tatá rī nuū rī. Te máá ró chi cásáha ró jniñu jeē ni cáhán tatá maá ró jijnáhan ró. Achí yá.

³⁹ Te ni cacahān i:

Sēhe yucūn Abraham cácuu ri.

Te ni cahān Jesús:

Núu jeē candíje ró nájñūhun ni candíje Abraham návāha cuu ndije ró yúcūn de, yūcuán na te jniñu váha ni sáha de suni sáha máá ró nuú. ⁴⁰ Te vijna chi cācuni rō cahni rō ruhū, vēsú ni cahān rī jíin ró tāca jnūhun ndaā ni steén Tatá rī nuū rī. Te Abraham chi tu ní sáha cuíti de súcuan. ⁴¹ Máá ró chi inuú cásáha ró jíin tátá maá ró. Achí yá jíin i.

Yūcuán na te ni cacahān i:

Máá rí chi tu cácuu ri sēhe ndáhú jéē tu tátá. Chi íyó ñn-ni tátá rī, te Yaā Dios cúu ya.

⁴² Te ni cahān Jesús:

Núu Yaā Dios cúu ndije tátá rō, te coo manī rō jíin rí nuú. Chi nde nuū Yaā Dios ni quenda ri vēji ri. Te tú vēji ri jeē cuní maá rí, chi máá yá ni tají rúhū. ⁴³ ¿Te najehē tu cájecūhun ni rō jnūhun cáhán rī núu súcuan? Suu siquī jeē tu cācuni rō chusóhó ró jnūhun nácani ri. ⁴⁴ Máá ró jijnáhan ró chi tátá rō cúu jexeén. Te cācuni rō sáha ró máá jéē cuní tátá rō ún. Máá jéxeén ni jehni ndīyi nde jeē xíhna ñúhún. Te tu ní íin cuíti jíin jnūhun ndaā, te tú cuíti na jnūhun ndaā cahán. Te jeē cahán jexeén jnūhun stáhú cúu jeē súcuan cáa máá. Chi máá un cúu jeē ndíso jnūhun stáhú, te máá un cúu jeē ní squéjéé ndíhi jnūhun stáhú. ⁴⁵ Te ruhū chi cáhán rī jnūhun ndaā, te jeē yúcuan cúu jeē tu cácandíje ró rúhū. ⁴⁶ Te ni ñn ró ma nihín rō cuēchi siquī rī, chi tú cuíti na cuēchi ri. Te máni jnūhun ndaā cahán rī, ¿te naun tu cácandíje ró rúhū? ⁴⁷ Ñayuu cácuu sēhe Yaā Dios, chi cáchusóhó i jnūhun Yaā Dios. Te nasūu sēhe Yaā Dios cácuu ró, te jeē yúcuan tu cācuni rō chusóhó ró. Achí yá jíin de.

Iyó Jesús nde ná tu coo Abraham

⁴⁸ Yūcuán na te ni cacahān jnáhan ñuu yā hebreo un:

Ndaā cácahān rī jeē canéé ró nájñūhun ñayuu Samaria, te ñúhun tachī ini rō.

⁴⁹ Te ni cahān Jesús:

Tu ñúhun tachī ini rī, chi yíñúhún rí jíin Tátá rī. Te máá ró jijnáhan ró chi tu cáhīyo yíñúhún ró jíin rí. ⁵⁰ Máá rí tu ndúcú rí jeē cujéhnu ri. Iyó ñn jeē sáha jeē cujéhnu ri, te máá yá sándaā siquī jnūhun cácahān rō. ⁵¹ Jendaá cahán rī jíin ró, núu ndé ñáyuu squícu jnūhun cáhán rī, ma cúu cuíti i. Achí yá.

⁵² Te tēe hebreo un tu ní cájecūhun ni de, te ni cacahān de:

Vijna te ni cacacáhnu ni rī jeē ñúhun ndije tachī ini rō. Chi Abraham jíin táca tēe ni canacani jnūhun Yaā Dios nde jenahán, ni cajihī de. Te róhó cáhán rō, núu ndé vé squícu jnūhun cáhán rō, te ma cúu cuíti i, áchí ró. ⁵³ ¿Te chí jéhnu ga rō vēsú jíi yō Abraham naún? Chi ni jihī de, te suni ni cajihī tāca tēe ni canacani jnūhun ya. ¿Te ndé ñn ga sáha ró máá ró núu súcuan? Achí de.

⁵⁴ Te ni cahān Jesús:

Núu ruhū sajeéhnu ri maá rí, te tu níhín jníñu. Máá Tátá rī cúu jeē sajeéhnu ruhū. Te cácahān rō jeē maá yá cúu Yaā Dios maá ró. ⁵⁵ Te vēsú súcuan te tu cájini rō ndese Yaā cúu ya. Te ruhū chí jíin rī yā. Te núu cahān rī jeē tu jíin rī yā, te cuu ri tēe stáhú nájñūhun máá ró jijnáhan ró. Te tuú chí jíin ndije ri yā, te squícu ri jnūhun cáhán yā. ⁵⁶ Te jíi rō Abraham ni cusī ni de jeē coto de quivī queé rī. Te je ni jito de, te ni jito ri jeē ní cusī ndasí ni de. Achí yá.

⁵⁷ Yūcuán na te ni cacahān tēe hebreo un jíin yá:

Ni ná tu coo ró uū xico uxī cuiyā, ¿te ndese cúu jeē cahán rō jeē ní jito ró núu Abraham? achí de.

⁵⁸ Te ni cahān Jesús:

Jendaá cahán rī jíin ró jeē nde ná tu cacu Abraham te je íyó rí, achí yá.

⁵⁹ Yūcuán na te ni caquihin de yuū jeē cuáha de xiní yā. Te Jesús chí ni quenda sāhi yá ni yāha ya mēhñú de, ni quenda ya ini templo cuahān yā.

Jeē ní nasávāha ya ñn tēe ni cacu cuáá

9

¹ Te jeē jíca Jesús cuahān yā, te ni jito ya nuū ñn tēe ni cacu cuáá. ² Te tēe cáscuáha jíín yá ni cacajnūhún de ya:

Maestro, ¿naun ni cacu cuáá tēe yáha? ¿A cuéchi tátá de náná de cúu, chí cuéchi máa de cúu, chí naún?

³ Te ni cahān Jesús:

Nasūu cuéchi máa de, ni nasūu cuéchi tátá de náná de cúu jeē ní cacu de súcuan, chi sa suhva návāha cuni ñayuu jniñu jéhnú sáha Yaā Dios jíín de. ⁴ Níní jeē cúu nájñūhun nduú ini ñayīví, te cánuú sáha ri jniñu Yaā ní tají rúhū. Chi quee tiempo jeē coo nájñūhun jecuáá, jeē tuá cuu sájñiñu ni ñn. ⁵ Níní jeē iyó rí ini ñayīví te cúu ri luz jeē cúndijin ini anuá ñayuu ñayīví, návāha jecūhun ni i siquī Yaā Dios. Achí yá.

⁶ Te ná ni cahān yā súcuan, te ni tesīhi yá nuū ññūhun, te ni sáha ya ndehyū jíín tesīhi yá un, te ni tee ya siquī tñūu tēe cuáá un. ⁷ Te ni cahān yā jíín de:

Cuáhán núu pila Siloé te nacate ró tñūu ró, achí yá. Te jñūhun Siloé cuní cahān, ndute ní cascáca de ni quee.

Yūcuán na te cuahān de, te ni nacate de tñūu de, te ni ndundijin-ni, te ni nandicó de vēji de. ⁸ Yūcuán na te ñayuu yúcu yajni jíín de, jíín ñayuu jeē ní cajito jeē cúu de tēe cuáá, ni cacajnūhun jnáhan i:

¿A násūu tēe yáha cúu jeē ndeé-ni yāhá te jíicán caridad?

⁹ Te sava i ni cacahān:

Suu de cúu.

Te sava ga i ni cacahān:

Nasūú de cúu, te súcuan cúní coto de.

Te máá de chí ni cahān de:

Suu ri cúu.

¹⁰ Yūcuán na te ni cacajnūhún i de:

¿Te ndese cúu jeē ní nanune tñūu ró núu súcuan?

¹¹ Te ni cahān de:

Tēe nání Jesús ni sáha de ndehyū, te ni tee de tñūu rí, te ni cahān de jíín rí: Cuáhán núu pila Siloé te nacate ró tñūu ró. Te ni jehēn rī, te ni nacate ri, te ni nanune-ni tñūu rí, achí de.

¹² Yūcuán na te ni cacajnūhún i de:

¿Ndeé nuū íne tēe ún? áchí i.

Tu jíín rī, achí de.

Jeē ní castíhí tēe fariseo tēe ni cacu cuáá

¹³ Yūcuán na te ni cajendeca i tēe ni iyo cuáá un núu tēe grupo fariseo. ¹⁴ Te quivī ndétātu cúu jeē ni sáha Jesús ndehyū jeē ní nanune ya tñūu de. ¹⁵ Te tēe fariseo un ní cacajnūhún tucu de tēe ún ndese ni nanune tñūu de. Te ni cahān de:

Ni tee de ndehyū siquī tñūu ná, te ni nacate ná, te ni ndundijin-ni tñūu ná, achí de.

¹⁶ Yūcuán na te ni cacahān sava tēe fariseo:

Tēe ún chi nasūu ndé nuū Yaā Dios vēji de, chí tu nēe īi de quivī ndétátú.

Te sava ga de chí ni cacahān:

¿Ndeese cuu sáha tēe un táca jniñu jéhnú yáha te núu tēe iyó cuéchi cúu de?

Te ni cacusñn de siquī yā. ¹⁷ Te ni cacajnūhún tucu de tēe ní iyo cuáá un:

Róhó, ¿ndese cáhán rō siquī tēe ni nanune tñūu ró núu súcuan?

Te máá de ni cahān de:

Ñn tēe nácani jñūhun Yaā Dios cúu de, achí de.

¹⁸ Te tēe hebreo un chí tu ní cácadíje de jeē ní iyo cuáá tēe ún te ni ndundijin tñūu de. Te ni cacana xinī tátá de náná de. ¹⁹ Te ni cacajnūhún de:

¿A yáha cúu sēhe ro jeē ní cacu cuáá cácahān rō? Núu súcuan ¿te ndese ni ndundijin tñūu de vijna? áchí.

²⁰ Te ni cacahān tatá de náná de:

Suu sēhe ri cúu tēe yáha jéē ní cacu cuáá. ²¹ Te tu cájini rī ndese ni ndundijin tinūú de vijna, ni tu cájini rī ndé tēe ni nanune tinūú de. Cajnūhun ró maá de, chi je jéhnū de, te na cáchi máá de.

²² Súcuan ni cacahān tatá de náná de, chi cáyūhú de cájito de jnāhan de tēe hebreo. Chi je ni casándaā tēe un jéē núu ndé ñáyuu cachi i jeē Jesús cúu Cristo, Yaā ní tají Yaā Dios, te quenehen de i jeē ma cúu ga quīví i ini vehe iī sinagoga. ²³ Jeē yúcuan ní cacahān tatá de náná de: Cajnūhun ró maá de, chi je jéhnū de.

²⁴ Yūcuán na te tēe hebreo un ní cacana tucu de tēe ni iyo cuáá un. Te ni cacahān de jíin:

Cachi cají ró nuū rī, jíto jínuū Yaā Dios. Chi cájini rī jeē tēe íyó cuéchi cúu tēe ni nanune tinūu ró.

²⁵ Yūcuán na te ni cahān de:

Tu jíiní na núu íyó cuéchi de, chí naún. Te íyó iin jeē jíiní ná, cúu jeē tēe cuáá ní cuu ná, te vijna chi ni ndundijin tinūu ná. Achí de.

²⁶ Te ni cacajnūhún tucu de:

¿Ndese ni sáha de jíin ró? ¿Ndese ni nanune de tinūu ró núu súcuan?

²⁷ Te ni cahān de:

Je ni cuu ni castūhun ná nuū ní, te tu ní cáconi ní cuatáhu ní. ¿Te najehē cáconi ni jéē cáchi tucu ná núu ní? ¿Te chí suni cáconi ni jíjnāhan ní candíje ní yá naún?

²⁸ Yūcuán na te ni cacahān neé jíin de, te achí:

Máá ró chi cándíje ró tēe ún, te máá rí chi cácandíje ri Moisés. ²⁹ Te cájini rī jeē ni cahān Yaā Dios jíin Moisés. Te tēe yúcuan, ni tu cájini rī ndé nuū véji de.

³⁰ Te ni cahān tēe ni iyo cuáá:

Náa ni na jéē cácahān ni jéē tu cájini ní jeē véji de nuū Yaā Dios, vésú ni nanune de tinūu ná. ³¹ Te cájini yō jeē Yaā Dios tu jíiní nahín yá jeē cájicān ñáyuu iyó cuéchi. Chi jíiní nahín yá nuū maá-ni ñáyuu jeē cáchiñūhún i ya te casáha i jeē cuní yā. ³² Te ní véji yó te tu ní jíiní sōho cuíti yō jeē iin tēe nanune de tinūú inga tēe ni cacu cuáá. ³³ Te núu nasūu ndé nuū Yaā Dios véji tēe ún, te ma cúu cuíti sáha de iin jniñu súcuan. Achí de.

³⁴ Te ni cacahān tēe hebreo un:

Róhó chi íyó ndasí cuéchi ró ndé quiví ní cacu ró, ¿te á máá ró steén nuū rī naún? achí. Te ni caquenehen tēe un yátā vehe iī sinagoga.

Siquī ñáyuu cáhiyo cuáá ánuá

³⁵ Te ni jíiní jnūhun Jesús jeē ní caquenehen de tēe ún. Te ni nihín jnāhan ya jíin de, te ni cahān yā jíin de:

¿A cándíje ró Séhe Yaā Dios?

³⁶ Te ni cahān de:

¿Ndé iin cúu ya návāha candíje ná yá?

³⁷ Te ni cahān Jesús:

Je ni jíto ró núu yā, te suu cúu ruhū jeē cahán jíin ró, achí yá.

³⁸ Yūcuán na te ni jecuiñí yití de nuū yā, te ni cahān de:

Cándíje ná jéē nihín cúu Jitoho ná.

³⁹ Te ni cahān Jesús:

Véji ri ini ñayívi yáha jéē sándaā rī siquī ñáyuu. Chi ñáyuu jeē nájnūhun cácuáá ánuá, ndundijin ini anuá i jeē jécūhun ni i siquī rī. Te ñáyuu jeē jéni ni i jeē cájecūhun ni i, nájnūhun nducuáá ánuá i. Achí yá.

⁴⁰ Te sava tēe fariseo jeē cáhiin jíin yá, ná ni cajini de jnūhun yáha, te ni cacahān de jíin yá:

¿Te chí jéni ni rō jeē suni tēe tu cájecūhun ni cácuu máá rí naún?

⁴¹ Te ni cahān Jesús:

Núu jeē cácuu ró tēe tu jécūhun ni nuú, te ma cóo cuéchi ró. Te siquī jeē ní cacahān rō jeē cájecūhun ni rō, te tu cájetáhu ró, jeē yúcuan condee cuéchi siquī rō.

Jnūhun yátá síquī lanchi

10

¹ Jendaá cahán rī jín ró, núu yíhi lanchi ini corral cánevāha cáhnu ñayuu, te núu ndé té tu quívi de ichi yéhyí corral un, chi sa suhva inga lado cáa de quívi de, tēe un cúu ñacuínhá, chi vēji jeē sacuíhná. ² Te tēe quívi ichi yéhyí, chi tēe un cúu pastor ndíto lanchi. ³ Te tēe ndíto yéhyí, núne de te quívi tēe ún. Te lanchi de cánacuni tī tachī de. Te cána de síhví lanchi máá de, te táva de tī. ⁴ Te núu ni tava de ndíhi lanchi máá de, te yósnúu de nuū tī cuahān de. Te lanchi un cándiquīn tī de, chi nácuni tī tachī de. ⁵ Te ma cóndiquīn tī yatā inga tēe, chi sa suhva cunu tī coto tī de, chi nácuni tī jeē nasūu jítoho tī cúu.

⁶ Jnūhun yátá yáha ní cahān Jesús jín ñáyuu, te tu ní cájecūhun ni i na jnūhun cúu jeē ni cahān yā.

Jesús cúu máá pastor vāha

⁷ Yūcuán na te ni cahān gā Jesús jín i:

Jendaá cahán rī jín ró: Máá rí cúu nájñūhun yéhyí corral nuū quívicoo ñayuu cácuu nájñūhun lanchi ri. ⁸ Tāca tēe jeē tu ní tájí Yāā Dios, jeē ní quijicoo de nde ná tu quee rī, cácuu de nájñūhun ñacuínhá, chi tu ní cástéén de jnūhun ndaā. Te ñayuu cácuu nájñūhun lanchi ri, tu ní cájetáhú i de. ⁹ Máá rí cúu nájñūhun yéhyí. Te ñayuu jeē jín máá rí quívicoo, jnama ri i. Te cuu i nájñūhun lanchi jeē ndívicoo tī nuū yíhi vāha tī, te quéndacoo tī nuū cáji vāha tī.

¹⁰ Tēe cuínhá chi máni vēji de jeē sacuíhná de lanchi, te cahni de, te snāā de. Te ruhū chi vēji ri návāha cotecu ñayuu cácuu lanchi ri, te nde yōhyo vāha ndetū coo i. ¹¹ Máá rí cúu máá pastor vāha. Te pastor vāha chi ndíto vāha de lanchi de, vēsú nde cuu de jeē síquí tī. ¹² Te ñn tēe yíyāhu, nasūú pastor tī cúu de, chi nasūú lanchi máá de cúu tī. Te núu jíto de jeē véji yíhī, te stóo de lanchi, te jínu de cuahān de. Te yíhī chi jnī tī lanchi, te sáha tī jeē jité núu lanchi. ¹³ Te tēe yíyāhu ún chi jínu de cuahān de síquī jeē lanchi tátú cúu jeē ndíto de, te jeē yúcuan tu cúndáhú ni de tī.

¹⁴ Máá rí cúu máá pastor vāha. Te jíní rī tāca ñáyuu cácuu nájñūhun lanchi ri, te máá i cájini i ruhū. ¹⁵ Te yāha cúu nájñūhun jeē Tatá rī jíní yā ruhū, te máá rí jíní rī Tatá rī. Te cuu rī jeē síquí ñayuu cácuu lanchi ri. ¹⁶ Te suni íyó gá ñayuu jeē cácuu lanchi ri, te sñn sñn ñayuu cácuu i. Te cánuú jéē suni condeca ri ñayuu ún. Te cuatáhú i jnūhun cáhán rī. Te coyūcu cáhnu-ni ndíhi ñayuu candíje, te coo ñn-ni pastor i.

¹⁷ Te Tatá rī maní ndasí yá jín rí síquī jeē jéhe ri maá rí jeē cúu rī jehē ñayuu, te natecu tucu ri. ¹⁸ Ni ñn ma cúu cahni ruhū, chi máá rí cúu jeē jéhe jnūhun cuu rī. Jeē cachí máá rí te cuu rī, te jeē cachí máá rí te natecu rī, chi súcuan íyó poder rī. Súcuan ni cahān Tatá rī jeē sáha ri. Achí yá.

¹⁹ Te jeē ní cajini jnáhan ñuu yā hebreo jnūhun yáha, te ni cacusñn tucu i. ²⁰ Te cuehē i ni cacahān:

¿Naun cáchusóhó ró jeē cahán de? Chi ñūhun tachī ini de, te ni tīvi xínī de.

²¹ Te sava ga i ni cacahān:

Tu súcuan cáhán tēe ñūhun tachī ini, nájñūhun cáhán tēe yáha. Te tēe ñūhun tachī ini, ¿á cuu nanune de tīnūu tēe cuáá naún? Achí.

Jeē ní casquéhichī i Jesús

²² Te tiempo mójin cúu, te ñuu Jerusalén cánasáha ñayuu vico jeē cánucūhun ni i quívī ní cuhií templo cáhnu. ²³ Te jíca cuu Jesús ini templo, ini corredor jeē naní Salomón. ²⁴ Te jnáhan ñuu yā hebreo ni cacutútú i nuū yā, te ni cacahān i:

¿Nasaa ga quívī sáha ró jéē ma cucáhnu ni rī? Cachi cají núu rī jijnáhan ri núu máá ró cúu Cristo.

²⁵ Te ni cahān Jesús:

Je ni castūhun rí nuū rō, te tu ní cá candíje ró. Tācá jniñu jeē ní tejniñu Tatá rī ruhū sáha ri, yūcuan stéén cají jéē máá yá ni tájí rúhū. ²⁶ Te tu cá candíje ró, chi nasūú lanchi

ri cácuu ró, nájñūhun je ni cahān rī jíin ró. ²⁷ Ñayuu cácuu lanchi ri, chi nácuni i jeē maá rí cúu jeē cahán jíin i. Te jíin rī i, te cándiquīn i ruhū. ²⁸ Te cotecu i ní cáni sáha ri, te ma jnahnú ndetū cuiti i. Te ni ñin ma cúu quende i ndaha ri. ²⁹ Máá Tátá rī ni squívi ya i ndaha ri. Te cújéhnū ga maá yá vēsú tāca gá. Te ni ñin ma cúu quende i ndaha ya. ³⁰ Máá rí jíin Tátá rī, chi ñin-ni cúu ri, achí yá.

³¹ Yūcuán na te jnáhan ñuu yā hebreo ni caquihin tucu de yuū jeē cuáha de xinī yā.
³² Te ni cahān yā jíin de:

Ni steén rī cuehē jniñu váha nuū rō jeē ni sáha ri jíin poder Tatá rī. ¿Te á síquī jeē ni sáha ri jniñu váha cúu jeē cuáha ró yúu xinī rī núu súcuan? Achí yá.

³³ Te ni cacahān de jíin yá:

Nasūu síquī jeē ni sáha ró jniñu váha cúu jeē cuáha ri yuū xinī rō, chi síquī jeē cahán ndevāha ró jéē achí ró jeē ñnuú cúu ró jíin Yaā Dios. Chi tēe-ni cúu ró, te sáha ró jéē ñnuú cúu ró jíin Yaā Dios. Achí de jíin yá.

³⁴ Te ni cahān Jesús:

Yósó núu tútu ley cánevāha ró jéē ni cáhān Yaā Dios: Nájñūhun yaā cácuu ró, achí Yaā Dios, achí tutu. ³⁵ Chi ñayuu jeē ní cajetáhu jñūhun ya, ni cahān yā jeē cácuu i nájñūhun yaā. Te cájini yō jeē ma cúu cahān yō jeē tú ndaā jñūhun cáhān tutu i. ³⁶ Núu súcuan ¿te naun cácahān rō jeē jñūhun ndevāha cúu jeē ni cáhān rī jeē Séhe Yaā Dios cúu ri? Chi máá Yaā Dios ni jeni ya ruhū síquī jniñu i, te ni tají yá ruhū vēji ri ini ñayīví. ³⁷ Núu tu sáha ri jniñu sáha Tátá rī, núu súcuan te ma candíje ró rúhū. ³⁸ Te núu sáha ri, te vēsú tu cácañdíje ró rúhū, te na cándíje ró síquī jniñu sáha ri ún. Te súcuan te cucáhnū ni rō jeē ñin-ni cúu Tátá rī jíin rí, te ñin-ni cúu ri jíin Tátá rī. Achí yá.

³⁹ Yūcuán na te cánducú tucu de jniñ de ya. Te ni ndoñúhūn-ni ya cuahān yā.

⁴⁰ Te cuanuhun yā yūte Jordán ichi núu cáne niāndii, nuū ni íne Juan ni scuándute de. Te ni condee yā yūcuán. ⁴¹ Te ni quijicoo cuehē ñayuu nuū yā, te ni cacahān i jíin táca jnáhan i:

Ndaā chi vēsú tu ní sáha Juan ni ñin jniñu jéhnū, te ni cundaā ndíhi jñūhun ni cahān de síquī ndese sáha tēe yáha. Achí i.

⁴² Te cuehē ñayuu jeē ni jéngoo nuū yā yūcuán, ni cacandíje i ya.

Jeē ni jíihī Lázaro

11

¹ Te ni iyo ñin tēe cúhú, nání de Lázaro. Te máá de jíin cuáha de María jíin Marta, cácuu de ñayuu ñuu Betanía. ² Te María un jéē cúu cuáha Lázaro, suu ña cúu jeē ní chihi aceíte perfume jehē Jitoho yō, te ni nasíchí ña jíin ixi xíní ña. ³ Te ndíndúú cuáha de un ní catají ña jñūhun cuahān nuū Jesús:

Tēe jeē maní ni jíin, cúhú de, achí ña, achí mozo.

⁴ Te ná ni jini Jesús jñūhun, te ni cahān yā:

Cuehyī yáha chi nasūu cuéhyī jeē ví cuu de cúu. Chi sa suhva sáha Yaā Dios jeē cuni ñayuu ndese cújéhnū ya. Chi ruhū, Séhe Yaā Dios, jíin cuéhyī yáha te steén rī jeē suni cújéhnū máá rí. Achí yá.

⁵ Te maní Jesús jíin Marta jíin cúhū ña jíin Lázaro. ⁶ Te vēsú súcuan te nuū ni níhīn yā jñūhun jeē cúhú de, te ni quendōo ya uū gā quivī nuū ndeé yá un. ⁷ Yūcuán na te ni cahān yā jíin tēe cáscuáha jíin yá:

Na quíhīn tucu yó región Judea.

⁸ Te tēe cáscuáha un ní cacahān de jíin yá:

Maestro, ná tu cuu quivī jeē ní canducú jnáhan yó hebreo cuáha de yuū xinī ní. ¿Te cúní ni quíhīn tucu ní yúcuan naún? Achí de.

⁹ Te ni cahān Jesús:

Ma cúu cahni ñayuu ruhū núu ná tu quee maá quivī cuu rī. Chi jeē iyó rí ñayīví yáha cúu nájñūhun jeē iyó úxī uū hora ñin nduú. Te jeē sáha ri jeē cuní Yaā Dios, cúu ri nájñūhun tēe jeē jíca nduú, te tu cáchihi de jehē de, chi cúndijin nuū de ñayīví yáha.

¹⁰ Te tēe jeē tu sáha jeē cuní Yaā Dios, chi nájnūhun jíca de jecuāā, te nájnūhun cáchihí de jehē de, chi tu cúndijin ini anuá de. Achí yá.

¹¹ Yūcuán na te ni cahān tucu ya:

Amigo yō Lázaro quíxí de, te quihīn rī sáha ri jeē nátahū ni de. Achí yá.

¹² Yūcuán na te tēe cáscuáha un ní cacahān de:

Núu quíxí de te jíní yō jeē nduvāha de.

¹³ Te Jesús chi súcuan ni cahān yā jeē jé ni jihī de. Te cájeni ni tēe cáscuáha jeē quixí ndije de. ¹⁴ Yūcuán na te ni cahān cají yá:

Je ni jihī Lázaro. ¹⁵ Te cúsi ni rī jeē tu ní cóyūcu yó yūcuán, návāha vāha ga candíje ró jéē coto ró jniñu jéhnū sáha ri. Núu súcuan te na quíngoo yó núu ndíyi ún. Achí yá.

¹⁶ Yūcuán na te Tomás, tēe cúu cuatí, ni cahān de jíin jnáhan de jeē cascuáha jíin yá:

Suni na quíngoo yó návāha cuu yō jíin yá, achí de.

Jesús cúu jeē sáha jeē nátecu te cotecu ní cáni

¹⁷ Te nuū ní quee Jesús, te jíní yā jeē ní cuu cuūn quivī yíndūji Lázaro. ¹⁸ Te yajni-ni íne ñuu Betania jíin ñuu Jerusalén, nájnūhun uū kilómetro yosáva. ¹⁹ Te Marta jíin María, ni quecoo cuehē jnáhan ña hebreo jeē cahán i jnūhun ndeyí ni jíin ña jeē síquí jeē ni jíhī cuāha ña. ²⁰ Te nuū ní jini Marta jeē véji Jesús, te ni quenda ña cuajnahān ña ya. Te María chi ni ndōo ña vehe. ²¹ Te ni cahān Marta jíin Jesús:

Núu ní íyo ní yáha, te ma cúu cuāha ná núu. ²² Te vésú súcuan te jíní na jéē tāca jéē cacán ni núu Yaā Dios, te sáha ya, achí ña.

²³ Te ni cahān Jesús jíin ña:

Natecu cuāha ró.

²⁴ Te ni cahān Marta:

Jíní na jéē nátecu de quivī nátecu tāca ndíyi nde quivī jíinu ñayīví.

²⁵ Te ni cahān Jesús:

Máá rí cúu Yaā sáha jeē nátecu jíin jéē cótecu ní cáni. Ñayuu candíje jeē jnáma ri i, vésú na cúu i, te natecu i. ²⁶ Te ñayuu cátecu te cándíje i ruhū, cotecu i ní cáni andíví. ¿A cándíje ró jnúhun yáha? Achí yá.

²⁷ Te ni cahān ña:

Cándíje ná jéē maá ní cúu Cristo, Sēhe Yaā Dios, jeē achí tutu jeē quíji ini ñayīví, áchí ña.

Jeē ni ndáhyū Jesús nuū yíndūji Lázaro

²⁸ Te ná ni cahān ña súcuan, te cuahān-ni ña, cuacana yuhu ña cuhū ña María:

Máá Maestro ni quee yā, te cána ya rohó, áchí ña.

²⁹ Te jeē ní jini María jnūhun yáha, te yachī ni ndocuíñī ña, cuahān ña nuū yā. ³⁰ Te ná tu quivī Jesús ñuu, chi ni ndōo-ni ya nuū ni jéjnahan Marta yā. ³¹ Te ñayuu hebreo un jéē cáyūcú ini vehe jíin María, jeē cácahān i jnūhun ndeyí ni jíin ña, ni cajito i jeē yachí ni ndocuíñī ña cuahān ña. Te ni candiquín i ña cuango i, chi cájeni ni i jeē cuándahyū ña nde nuū yíndūji ndíyi.

³² Yūcuán na te ni jinū María nuū íne Jesús, te ni jecuíñī yití ña nuū jehé yā, te ni cahān ña:

Núu ní íyo ní yáha, te ma cúu cuāha ná núu, áchí ña.

³³ Te ni jito Jesús jeē ndahyū ña jíin jéē cándahyū ñayuu vējicoo jíin ña. Te yōhyo ni nducuíhyá ni yā, te ni jnahuhū ni yā jeē cundáhú ni yā i. ³⁴ Te ni cajnūhun yá ña:

¿Ndé mí ní cachindūji ró de?

Te ni cacahān ña jíin yá:

Quíhín yō te cuni ní, áchí ña.

³⁵ Te ni ndahyū Jesús. ³⁶ Yūcuán na te ni cacahān ñayuu hebreo un:

Condēhe náa yōhyo maní de jíin ndíyi ún.

³⁷ Te sava i chí ni cacahān i:

Tēe yáha jéē ní nanune de tinūu tēe cuáá, ¿á tu ní cúu sáha de jeē ma cúu Lázaro nuú? áchí i.

Jeē ní natecu Lázaro

³⁸ Te yōhoyo ni jnahuhū ni tucu Jesús, te ni quee yā nde nuū yíndūji ndīyi. Te ñin yaū cava cúu, te yuyáú un ndíhyú ñin yuū. ³⁹ Te ni cahān yā:

Tejiyo yuū un jíjnáhan ró, áchí yá.

Te Marta, cuāha ndīyi un, ní cahān ña:

Je jéén xicō de, chi je ni cuu cuūn quivī yíndūji de.

⁴⁰ Te ni cahān Jesús jíin ña:

¿A násūu je ni cahān rī jíin ró jeē núu candíje ró te coto ró jéē yóhoyo cújéhnu Yaā Dios jíin poder yā? achí yá.

⁴¹ Yūcuán na te ni catejiyo i yuū jeē ndési yuyáú ndīyi ún. Te ni ndacoto-ni Jesús ichi ándiví, te ni cahān yā:

Tátā, na cútahū na núu ni jéē sáha ní jéē jicán na. ⁴² Te jíin na jéē niní sáha ní jéē jicán na. Te jeē váha ñayuu cáhīin yáha cúu jeē súcuan cáhán na, návāha na cándíje i jeē maá ní ni tají sáña.

⁴³ Te ná ni cahān yā súcuan, te ni cahān jee ya:

Lázaro, quenda quiji ró, áchí yá.

⁴⁴ Te ni quenda-ni tēe ni jihí ún, te ñúsúcún ndaha de sīhin de jíin tira sahma. Te nuū de ñúsúcún ñin sahma. Te ni cahān Jesús jíin i:

Nandají ró sahma ñúsúcún de, návāha cuu caca de, áchí yá. Te ni canandají i.

Jeē ní casquíjnáhan de jnūhun jeē cáhni de Jesús

(Mt. 26.1-5; Mr. 14.1-2; Lc. 22.1-2)

⁴⁵ Yūcuán na te cuehē ñayuu hebreo jeē ní quijicoo nuū María, ni cacandíje i Jesús, chi ni cajito i jniñu ni sáha ya. ⁴⁶ Te sava i chí cuango i nuū tēe grupo fariseo, te ni cacastūhún i ndese ni sáha Jesús. ⁴⁷ Yūcuán na te tēe fariseo un jíin sūtū cácujuhnu ni candutútú de junta jíin táca gá tēe cácujuhnu. Te ni cacahān de:

¿Ndese sáha yó? Chi tēe ún yōhoyo cuehē jniñu jéhnu sáha de. ⁴⁸ Te núu condēhé-ni yó, te ndivii ñayuu candíje i de. Te quijicoo táca tēe nación Roma jeē cácujuhnu, te canu de templo cáhnu yó, te scuíté núu de ñayuu nación yō, achí de jíjnáhan de.

⁴⁹ Te ñin jnáhan de jeē naní Caifás, jeē cúu máá sūtū cujuhnu ga cuiyā ún, ni cahān de:

Róhó chí tu cájini cuiñi rō, ⁵⁰ ni tu cájecūhun ni rō jeē váha ga jeē cúu ñin tēe jehē ñáyuu nación yō vēsú jeē náa ndivii i, áchí de.

⁵¹ Te tu ní cáhán de jnūhun yáha jéē jéni ni maá de. Chi siquē jeē cúu de sutū cujuhnu ga cuiyā ún, te ni sáha Yaā Dios jíin de jeē ní nacani de jnūhun jeē cúu Jesús jehē ñáyuu nación hebreo. ⁵² Te nasūu máá ñin-ni jehē nación hebreo, chi suni jehē ndivii ñayuu cácuu sēhe Yaā Dios jeē ní cajitē núu táca nación, návāha ñin na cuu i jíjnáhan i. ⁵³ Yūcuán na te nde quivī ún te táca tēe hebreo cácujuhnu un, ní casquíjnáhan de jnūhun jeē cáhni de Jesús.

⁵⁴ Jeē yúcuan tuá ní jíca ndijin yā nuū jnáhan ñuu yā hebreo un, chí ni quenda ya región Judea, te cuahān yā ñin ñuu naní Efraín, nuū iyó yajni ñuhun téhé. Te ni condee yā yūcuan jíin tēe cáscuáha jíin yá.

⁵⁵ Te ni cuyajni vico pascua jeē cánasáha ñayuu hebreo. Te cuehē ñayuu táca ñuu yūcuán cuango i ñuu Jerusalén, návāha squícu i jeē cahán ley jeē cúchi i ndundoo i nuū Yaā Dios, te sáa te quejéé vico pascua. ⁵⁶ Te cánanducú i Jesús, te cácajnūhun jnáhan i ini templo:

¿Ndese cájeni ni rō? ¿A quiji de vico, chí tuú? Achí i.

⁵⁷ Te sutū cácujuhnu jíin tēe fariseo ni candacu de jniñu jeē núu ndé ñin ñayuu jiní ndé nuū íne ya, te na cástūhún i, návāha jniñi de ya.

Jeē ní chuhun María perfume jehē Jesús

(Mt. 26.6-13; Mr. 14.3-9)

12

¹ Te cúmanī iñū gā quivī te coo vico pascua. Te ni jehēn tucu Jesús ñuu Betania nuū ndeé Lázaro, tēe ni jihī te ni nastécu yā de. ² Te ni casáha i ñin vico xíni jeē yíñúhún i jíin yá. Te Marta ni jeni ña cohō. Te Lázaro yéji de staā jíin yá nuū mesa jíin táca gá ñayuu. ³ Yūcuán na te María ni quee ña jíin nájñuhun sava litro aceite perfume jeē máni ita nardo cúu, te yōhyo yahu ndeé. Te ni chuhun ña jehē Jesús, te ni nasíchí ña jíin ixi ña. Te ní ini vehe un ní chitú xícō perfume un. ⁴ Yūcuán na te ni cahān Judas Iscariote sēhe Simón, ñin tēe scuáha jíin yá un, te suu de cúu jeē nastúu de ya:

⁵ ¿Najehē tu ní cúyāhu perfume yáha jēe uní ciento denario, te cuāha yó núu ñayuu ndahú núu. Achí de.

⁶ Súcuan ni cahān de, nasūu jēe cundáhú ndije ni de ñayuu ndahú, chi sa suhva jeē cúu de tēe cuíhná. Chi máa de ndíso yijni xūhún, te quíhin cuíhná de jeē cájequin tāca tēe ún. ⁷ Yūcuán na te ni cahān Jesús:

Ma stáhān rō ña. Chi jeē ni sáha ña yāhá cúu jeē ni sātūhva ña ruhū nde quivī jeē quíndūji ri. ⁸ Chi níni cáyūcu ñayuu ndahú jíin ró, te ruhū chi tuá condee rī jíin ró. Achí yá.

Jeē ní casquijnáhan de jñuhun jeē cahni de Lázaro

⁹ Te cuehē ñayuu hebreo ni cajini jñuhun i jeē néne ya ñuu Betania. Te ni jinūcoo i, te nasūu máa ñin jeē cuní i coto i nuū Jesús, chi suni jeē cuní i coto i nuū Lázaro, tēe jeē ní nastécu yā. ¹⁰ Yūcuán na te sutū cácujeñnu ni casquijnáhan de jñuhun jeē suni cahni de Lázaro. ¹¹ Chi jeē siquí Lázaro te ni cujiyo cuehē jñáhan ñuu de hebreo nuū de, te cácaandíje i Jesús.

Jeē ni quivī Jesús Jerusalén

(Mt. 21.1-11; Mr. 11.1-11; Lc. 19.28-40)

¹² Te inga quivī ún, te ñayuu cuehē jeē ní quecoo vico pascua un, ní cajini jñuhun i jeē véji Jesús ñuu Jerusalén. ¹³ Te ni cajehnde i ndaha ñúú, te ni quendacoo i cuajnahān i ya. Te cácana jee i:

Yōhyo cújéñnu Yaā Dios. Yōhyo vāha Yaā cúu Yaā jeē véji jíin jniñu máa Jítóho yō Yaā Dios. Yōhyo vāha Yaā cúu Rey nación yō Israel. Achí i.

¹⁴ Te ni nihīn Jesús ñin burro, te ni jecosō yā tī, nájñuhun cáhān tutu i:

¹⁵ Ñayuu ñuu Jerusalén jeē naní ñuu Sion, ma yūhu ró jijnáhan ró.

Yāhá condēhe ró jeē véji Rey rō,

te yósó yá ñin burro.

Achí tutu.

¹⁶ Te quivī ún te tēe cáscuáha jíin yá, tu ní cájecūhun ni de jeē súcuan squícu tāca jēe yosó núu tútu i. Te nde ná ni ndujéñnu Jesús jeē cuánuhun yā andiví, te sáa te ni canucūhun ni de tāca jñuhun yósó síquī yā, jíin jēe ní casáha de súcuan jíin yá.

¹⁷ Te ñayuu ní cahīin jíin yá ná ni cana ya xinī Lázaro nuū ní yindūji de, te ni nastécu yā de, ni canacani i jñuhun ndese ni sáha ya. ¹⁸ Jeē yúcuan ní quendacoo ñayuu cuehē un, ní jijnahān i ya, chi ni cajini jñuhun i jeē ni sáha ya jniñu jéñnu un jēe ni steén yā poder yā. ¹⁹ Yūcuán na te ni cacahān máa tēe fariseo:

Vijna te je ni cajito yó jēe ma cúu cuítī gā casi yō. Chi jító yó jēe ndivii cuítī ñayuu cuango i jíin de. Achí de jijnáhan de.

Ñayuu nación Grecia nánducú i Jesús

²⁰ Te sava ñayuu nación Grecia, suni ni quijicoo i ñuu Jerusalén vico pascua un jēe chiñúhún i Yaā Dios. ²¹ Te ni quecoo i nuū Felipe, tēe ñuu Betsaida ndañúú Galilea. Te ni cacahān i jíin de:

Tátā, cácuni ná cahān na jíin Jesús, achí i.

²² Te ni jehēn Felipe, ni castūhún de nuū Andrés. Te ndindúú de cuacastūhún de nuū Jesús. ²³ Te ni cahān Jesús jíin de:

Je ni quee quiv̄i jeē ndujéhn̄u Yaā ní nduu tēe. ²⁴ Te jendaá cahán rī jíin ró, ñ̄n nuni trigo núu tú ñ̄ngava nuū ñ̄nhun te quindūji, núu súcuan te quendōo máá ñ̄n-ni. Te núu quindūji, te nacayā cuehē ndasí. Te suni súcuan cánuú cuu rī quindūji ri, návāha coo cuehē ñ̄ayuu jeē ndúu i sēhe Yaā Dios. ²⁵ Te na-ni ñ̄ayuu núu tu jéhe i jnūhun ndoho i jeē siquí ruhū, te jnahnū ndetū i. Te ñ̄ayuu jeē jéhe i jnūhun ndoho i jeē siquí ruhū ini ñ̄ayiv̄i yáha, cotecu i ñ̄í cáni andiv̄i. ²⁶ Núu ndé ñ̄ayuu cuní i cuajníñ̄u i nuū rī, na cóndiquin i ruhū. Te nuū cóndee rī, suni yūcuán condee ñ̄ayuu jejníñ̄u nuū rī. Te ñ̄ayuu jejníñ̄u nuū rī, chi sáha Tátá rī jeē cujéhn̄u i.

Jeē ni cáhān Jesús jeē cuu yā

²⁷ Te vijna te cúcuíhyá ndasí ni rī sáha jnūndóho quiiji siquí rī. ¿Te ndese cahán rī? ¿A cáhān rī jíin Tátá rī: Jnama ní sáña núu jnūndóho jeē quíji siquí ná, achi rī? Ma cúu, chi jeē siquí yúcuán cúu jeē véji ri. ²⁸ Tátá, stéén ni jéē cujéhn̄u ndasí ní jíin poder ni, áchí yá.

Yūcuán na te ichi ándiv̄i ní cahān ñ̄n jnūhun:

Je ni steén rī jeē cujéhn̄u ri, te sáha tucu ri ñ̄nga jínu, áchí yá.

²⁹ Te ni cajini ñ̄ayuu cáhiin yūcuán, te ni cacahān i jeē taja cáhān. Te sava ga i ni cacahān:

Ñ̄n ndajéhé Yaā Dios ni cahān jíin yá.

³⁰ Te ni cahān Jesús jíin i:

Tu ní cáhān jnūhun yáha jéē siquí ruhū, chi sa suhva návāha cuni rō siquí jnūhun jeē ni cáhān yā jíin rí. ³¹ Vijna cúu jeē sándaā Yaā Dios siquí cuéchi ñ̄ayuu ñ̄ayiv̄i yáha. Vijna cúu jeē scúnu ya jexeén jeē ndácu jniñ̄u ini ñ̄ayiv̄i yáha. ³² Te ruhū, núu na jínu condita caa ri cuu rī ini ñ̄ayiv̄i, te sáha ri jeē jnāá tāca ñ̄ayuu quiv̄icoo i ndaha ri, achí yá.

³³ Súcuan ni cahān yā jeē steén yā ndese modo cuu yā. ³⁴ Te ni cacahān ñ̄ayuu jíin yá:

Ni cajini sōho ná jéē cahán tutu ley Yaā Dios cánevāha yó, jeē Cristo cotecu yā ñ̄í cáni. ¿Te naun cáhān ni jéē Yaā ní nduu tēe, cánuú condita caa ya cuu yā? ¿Ndé ñ̄n cúu máá Yáā ní nduu tēe núu súcuan? Achí i.

³⁵ Yūcuán na te ni cahān Jesús:

Máá jecu na quiv̄i condee rī jíin ró jeē cúu ri luz cundijin ini anuá rō. Núu súcuan te vijna jeē iyó gá luz rī jíin ró, te caca ró jíin, chi sanaa ni rō te cuahān rī, te nájñ̄uhun quendōo ró núu néē. Chi ñ̄ayuu cájica nájñ̄uhun nuū néē, tu cájini i ndé nuū cuángoo i. ³⁶ Núu súcuan te níni ndéé gá rī jíin ró, te candíje ró rúhū jeē cúu ri luz, návāha nduu ró ñ̄ayuu cájica jíin luz, achí yá.

Súcuan ni cahān Jesús tāca jnūhun yáha, te cuahān-ni ya, te tuá ni steén yā maá yá nuū i.

Jeē tu ní cá candíje ñ̄ayuu hebreo jeē cúu ya Cristo

³⁷ Te vēsú cuehē jniñ̄u jéhn̄u ni sáha Jesús jeē steén yā poder yā nuū i, te tu ní cá candíje i ya. ³⁸ Chi squícu nahín jnūhun ni cahān Isaías, tēe ni nacani jnūhun Yaā Dios nde jenahán:

Tátá Yaā Dios, tu ní cá candíje ñ̄ayuu jnūhun ni canacani ná,

te tu ní cá candíje i jniñ̄u jéhn̄u jeē ni steén ni poder ni núu i.

Achí Isaías. ³⁹ Jeē yúcuán tu ní cúu candíje i, chi ni cahān tucu Isaías:

⁴⁰ Ni sáha ya jeē nájñ̄uhun cáhiyo cuáá ánuá i,

jíin jéē cá cunihni ni i,

návāha coo nájñ̄uhun jeē tu cájito i,

te ni ma jécūhun ni i,

ni ma násāma ini i quiv̄icoo i nuū rī,

jeē nasávāha ri anuá i nuū cuéchi i.

Achí Cristo, achí tutu. ⁴¹ Jnūhun yáha ní cahān Isaías, chi je ni jito de ndese yōhyo cújéhn̄u Jesús, te ni cahān de ndese coo quiv̄i jeē quíji ya.

⁴² Te vēsú súcuan te cuehē ñ̄ayuu hebreo chi ni cacandíje i ya, te suni nde jíin sava tēe cándacu jniñ̄u. Te tu ní cá cachí de jeē cá candíje de ya, chi siquí jeē cá yūhú de tāca tēe

fariseo. Chi núu súcuan te quenehen ún de ini vehe ií sinagoga jeē ma cuáha ga jnūhun quīvicoo de. ⁴³ Chi cácusī gā ni de jeē cujéhnū de sáha ñayuu, vēsú jeē cujéhnū de sáha Yaā Dios.

Jnūhun cáhán Jesús cúu jeē sándaā siquī ñáyuu

⁴⁴ Te ni cahān jee Jesús:

Ñayuu cácandíje ruhū, nasūu máñúhún-ni ruhū cácandíje i, chi suni cácandíje i nde maá Tátá rī, Yaā ní tají rúhū. ⁴⁵ Te ñayuu cájito nuū rī, suni cájito i nuū Yaā ní tají rúhū. ⁴⁶ Máá rí jeē cúu ri luz cúndijin ini anuá ñayuu, ni quiji ri ini ñayīví návāha tāca ñáyuu cácandíje ruhū, ma cáca i nájnūhun nuū néē. ⁴⁷ Te núu ñn ñayuu jínī sōho i jnūhun cáhán rī, te núu tu jétáhú i, te nasūu rúhū sándaā siquī i. Chi tú vēji ri jeē ndénehen ri cuēchi siquī ñayuu ñayīví, chi sa suhva jeē jnáma ri i. ⁴⁸ Te ñayuu jeē casquéhichī i ruhū te tu cájetáhú i jnūhun cáhán rī, íyó ñn jeē sándaā siquī i. Suu tāca jnúhun jeē ni cáhán rī, jnūhun un cúu jeē ndenehen cuēchi siquī i quīví jínu ñayīví. ⁴⁹ Chi tu cáhán rī jeē cúu ni maá rí, chi Tátá rī, Yaā ní tají rúhū, máá yá ni ndacu jniñu nuū rī ndese cahān rī jíin ndese stéén rī. ⁵⁰ Te jínī rī jeē jniñu ndácu Tátá rī sáha jeē cótecu ñayuu níf cáni. Núu súcuan te jnūhun cáhán rī, chi máni jnūhun jeē ní cachi Tátá rī cúu, áchí yá.

Jeē ní nacate ya jehē tēe cáscuáha

13

¹ Te jehíni inga quivī te quejéé vico pascua. Te je jínī Jesús jeē ní quee quivī jeē quénda ya ñayīví yáha quínuhun yā nuū Tatá yā. Te níni cúndáhú ni yā ñayuu maá yá jeē cáyūcú ini ñayīví. Te vijna jeē jínu jeē íne ya ñayīví, te sáha ya ñn jniñu jeē steén cají yá jeē cundáhú ni yā i.

² Te jexeén je ni squívī ini anuá Judas Iscariote sēhe Simón, jeē vijna nastúu de ya. ³ Te jínī Jesús jeē vēji ya nuū Yaā Dios, te nuhūn yā nuū Yaā Dios, jíin jēē ni sáha Tátá yā jeē cujéhnū ya siquī ndíhi-ni. ⁴ Te cúxíni ya jíin tēe cáscuáha jíin yá, te ni ndocuíñī yā. Te ni stáa ya sahma ndíi ya, te ni jihni yā ñn toalla chíji ya. ⁵ Te ni chuhun ya ndute ini ñn tijehēn. Te ni quejéé yá nacate ya jehē tēe cáscuáha. Te násíchí yā jíin toalla jeē nuhní chíji ya.

⁶ Te ni jinū yā nuū Simón Pedro. Te ni cahān Pedro jíin yá:

¿Sa máá ní nacate jehē ná naún?

⁷ Te ni cahān Jesús:

Tu jécūhun ni rō jeē sáha ri vijna, te cúcuéé gá te jecūhun ni rō.

⁸ Te ni cahān Pedro jíin yá:

Ma nacate cuiti ni jéhē ná.

Te ni cahān Jesús:

Núu tú nacate ri jehē rō, te ma cúu cundúú ró jíin rí.

⁹ Te ni cahān Simón Pedro:

Núu súcuan cúu te nasūu máá jéhē-ni ná, chi suni nacate ní ndaha ná jíin xínī ná, áchí de.

¹⁰ Te ni cahān Jesús jíin de:

Tēe jeē sa ní jichi, tu jínī ñúhún ndundoo níf cáhnu de, chi máá jéhē-ni de, chi je íyó ndoo níf cáhnu de. Te máá ró chi je ni candundoo ró. Te tú ndíhi ró cáhīyo ndoo.

¹¹ Chi je jínī yā ndé ñn de cúu jeē nastúu de ya, te jeē yúcuan ní cahān yā: Tú ndíhi ró cáhīyo ndoo.

¹² Te nuū ni jínu ni nacate ya jehē de jíjnáhan de, te ni naquihin ya sahma ndíi ya, te ni nucōo tucu ya nuū mesa. Te ni cahān yā:

¿A cájecūhun ni rō na vé cuní cahān jeē ni sáha ri jíin ró? ¹³ Cácahān rō jeē Maestro jíin Jítóho rō cúu ri, te ndaā cácahān rō, chi suu ndije cúu ri. ¹⁴ Núu súcuan te vēsú Maestro rō jíin Jítóho rō cúu ri, te ni nacate ri jehē rō jíjnáhan ró, te suni súcuan cánuú jēē nacate máá ró jehē jnáhan ró. ¹⁵ Chi jniñu yáha ni sáha ri jeē steén rī nuū rō jeē suni súcuan sa cuajniñu ró núu jnáhan ró, nájnūhun sa máá rí ni jejniñu ri nuū rō. ¹⁶ Jendaá cahān rī

jiín ró jeē ñin mozo tu cújéhnū de nuū patrón de, te tēe jíca jniñu táhú nuū de, te cújéhnū de nuū téé ni tají de. Te máá ró cácuu mozo rī, te na cuájniñu ró núū jnáhan ró nájnūhun ni steén rī nuū rō. ¹⁷ Te núu ni cajecūhun ni rō jnūhun yáha, te yōhyo ndetū rō te núu squícu ró.

¹⁸ Te nasūu jéē cahán rī jeē ndíhi ró ndétū, chi je jíni rī tāca rōhó jéē ní nacāji ri. Te cánuú squícu jnūhun yáha jeē cahán tutu i: Tēe yéji staā jíin rí, ni ndió cuíñí de siquī rī, achí tutu. ¹⁹ Te vijna te je cástūhun rí tāca jéē yáha núū rō nde ná tu coo, návāha núu na cóo, te candíje ró jéē maá rí cúu Yaā ní tají Yaā Dios. ²⁰ Jendaá cahán rī jíin ró jeē na-ni ñayuu jeē cuatáhu i tāca jéē tají rí, te ruhū jetáhu i. Te ñayuu jetáhu rúhū, suni jétáhu i Yaā ní tají rúhū vēji ri, achí yá.

Jeē ní cachi yā jeē nastúu Judas yā

(Mt. 26.20-25; Mr. 14.17-21; Lc. 22.21-23)

²¹ Te ná ni cahán Jesús tāca jnūhun yáha, te ni cucuíhyá ndasí ni yā. Te ni cahán cají yá:

Jendaá cahán rī jíin ró jijnáhan ró jéē ñin máá ró nastúu ruhū, achí yá.

²² Yūcuán na te tēe cáscuáha jíin yá, ni candacoto de nuū jnáhan de, cájeni ni de ndé ñin de cúu jeē ni cahán yā. ²³ Te ñin máá téé scuáha jeē maní gā yā jíin, néne de xiin ya mesa jeē cácuixíni de jíin yá. ²⁴ Te ni sáha Simón Pedro seña nuū de jeē na cájnūhún de ya ndé ñin de cúu jeē ni cahán yā. ²⁵ Yūcuán na te tēe un ní scáyí de máá de nuū Jesús, te ni cajnūhún de ya:

¿Ndé ñin de cúu? áchí de jíin yá.

²⁶ Te ni cahán Jesús:

Na chundaji ri staā te cuāha ri nuū ñin de, te suu tēe un cúu, áchí yá.

Te ni chundaji ya staā, te ni jēhe ya nuū Judas Iscariote sēhe Simón. ²⁷ Te jeē ní quihin de staā ún, te ni quívi-ni Satanás ini anuá de. Yūcuán na te ni cahán Jesús jíin de:

Jniñu jeē sáha ró, na sáha yachī rō.

²⁸ Te ni ñin tēe cáyeji staā jíin yá, tu ní cájecūhun ni de naun ni cahán yā súcuan jíin de. ²⁹ Chi sava de cájeni ni de jeē ni cahán Jesús jíin Judas jeē cuáan de jeē jíni ñúhún yá vico ún, chí jéē cuáha de jecu xūhun núū ñayuu ndahú. Chi máá de ndíso yijni xūhún.

³⁰ Te jeē ní yeji de staā ún, te ni quenda-ni de cuahán de. Te je ni cuaa.

Jeē ní ndacu ya jniñu jéé

³¹ Yūcuán na te jeē cuahán Judas te ni cahán Jesús:

Vijna te ruhū, Yaā ní nduu tēe, stéén rī ndese cújéhnū ri, te suni jíin rúhū te cuni ñayuu ndese cújéhnū Yaā Dios. ³² Te núu jíin rúhū cuni ñayuu ndese cújéhnū Yaā Dios, núu súcuan te suni stéén Yaā Dios ndese cújéhnū ruhū jeē cúu ri Sēhe ya. Te yachī-ni stéén yā. ³³ Séhē, tuá nahán condee rī jíin ró jijnáhan ró. Te nanducú ró ruhū, te nájnūhun ni cahán rī jíin táca jnáhan yó hebreo, suni súcuan cahán rī jíin ró vijna, jeē ma cúu jinūcoo ró núu quihín rī. ³⁴ Te vijna te ndácu ri ñin jniñu jéé núu rō, jeē na cúndáhu ni rō jnáhan ró. Nájnūhun cúndáhu ni rī rohó, suni súcuan na cúndáhu ni rō jnáhan ró. ³⁵ Te núu cúndáhu ni rō jnáhan ró, súcuan te cuni tāca ñayuu jeē cácuu ró téé cáscuáha jíin rí, achí yá.

Jeē ní cachi yā jeē yūhu Pedro cahán de jeē jíni de ya

(Mt. 26.31-35; Mr. 14.27-31; Lc. 22.31-34)

³⁶ Te ni cahán Simón Pedro jíin yá:

¿Ndé nuū quihín ni núu súcuan?

Te ni cahán Jesús:

Nuū quihín rī chi ma cúu condiquín rō ruhū vijna, te cúcuéé gá te jinū rō.

³⁷ Te ni cahán Pedro:

¿Najehē ma cúu condiquín na níhín vijna? Tu yúhú ná cuu na jéé siquí ni.

³⁸ Te ni cahán Jesús:

¿A jéni ni rō jeē tu yúhú ró cuu rō jeē siquí rī? Jendaá cahán rī jíin ró jeē nde ná tu cana líhli, te unī jínu yūhu ró te cahán rō jeē tu jíin rō ruhū. Achí yá.

Jesús cúu ichi jeē jinú yō nuū Tatá yā

14

¹ Te ni cahán gā yā:

Ma cucuíhyá ni rō siquí tāca jnúndóho. Na cándíje ró jéē sáha Yaā Dios jehē rō, te suni na cándíje ró jéē sáha ri jehē rō. ² Chi nuū ndeé Tatá rī, íyó cuéhē vehe condee rō jijnáhan ró. Te núu jeē tu súcuan íyó, te je ni castūhun rí nuū rō nuú. Núu súcuan te quihín rī quisátūhva ri nuū cóyūcu ró. ³ Te jeē quihín rī sátūhva ri nuū cóyūcu ró, te ndiji ri quinaquihin ri rohó quihín yō, návāha suni coyūcu ró nuū cóndee maá rí. ⁴ Te je cájini rō ndé nuū quihín rī, te cájini rō ndese jinū rō yūcuán. Achí yá.

⁵ Te ni cahán Tomás jíin yá:

Tu cájini na ndé nuū quihín ni, ¿te ndese cuni ná ichi jíin yūcuan núu súcuan?

⁶ Te ni cahán Jesús jíin de:

Maá rí cúu ichi jinú rō andíví, te maá rí cúu jnúhun ndaā jíin jnúhun cotecu rō níh cáni. Te ni ñin ma jinú nuū Tatá rī te núu tú ruhū. ⁷ Te núu je ni cajini rō ruhū, te suni je ni cajini rō Tatá rī núu súcuan. Te ndé vijna je cájini rō yā, chi je ni cajito ró núu rī, achí yá.

⁸ Te ni cahán Felipe jíin yá:

Stéén ni Tatá ni núu ná, te na cúvāha ni na jijnáhan ná, achí de.

⁹ Te ni cahán Jesús:

Felipe, je ni cuu cuéhē quiví jíca ri jíin ró jijnáhan ró, ¿te á ná tu cuni rō ndé ñin cúu ri naún? Tēe jeē jíto ruhū, suu Tatá rī jíto de. Núu súcuan ¿te najehē cahán rō jeē steén rī Tatá rī nuū rō? ¹⁰ ¿A tu cándíje ró jéē ñin-ni cúu ri jíin Tatá rī, te Tatá rī ñin-ni cúu ya jíin rí? Tāca jnúhun cáhan rī jíin ró, nasūu jnúhun maá rí cúu. Chi Tatá rī jeē ñin-ni cúu ya jíin rí, maá yá sáha tācá jniñu jeē sáha ri. ¹¹ Candíje ró jijnáhan ró jéē ñin-ni cúu ri jíin maá Tatá rī, te Tatá rī ñin-ni cúu ya jíin rí. Te núu tu cájecūhun ni rō, te candíje ró rúhū siquí tācá jniñu sáha ri. ¹² Jendaá cahán rī jíin ró, núu ndé ñayuu candíje ruhū, jniñu jéhnu jeē sáha ri yāhá, suni sáha i. Te jéhnu ga jniñu sáha i vēsú yāhá, chi quinhun rī nuū ndeé Tatá rī. ¹³ Te tācá na-ni vé cacán rō nuū Tatá rī siquí jeē cáncandíje ró jéē cúu ri Sēhe ya, te sáha ri jeē cacán rō, te súcuan stéén rī jeē yóhyo cújéhnu Tatá rī. ¹⁴ Chi tācá na-ni vé cacán rō siquí jeē cáncandíje ró rúhū, te sáha nahín rí.

Jeē ni jéjñūhun ya jeē tají yá Espíritu Santo

¹⁵ Te núu maní rō jíin rí jijnáhan ró, te na squícu ró jniñu ndácu ri nuū rō. ¹⁶ Te cacán tahu rī nuū Tatá rī, te tají yá inga Yaā chindéé ñáhán rōhó, te sáha ya jeē cóo sñi ni rō jijnáhan ró. Te Yaā un cúu maá Espíritu jeē steén jnúhun ndaā, te condee yā jíin ró níh cáni. ¹⁷ Te ñayuu ñayiví má cúu cuatáhú i ya, chi tu cúu coto i nuū yā, ni tu cúu cuni i ndese Yaā cúu ya. Te maá ró chi je cájini rō ndese Yaā cúu ya, chi ndeé yá jíin ró, te condee yā ini anuá rō níh cáni. ¹⁸ Ma stóo uun ri rohó, chi ndiji ri nuū rō. ¹⁹ Jecu na quiví te ma cóto ga ñayuu ñayiví núu rī. Te maá ró jijnáhan ró chi coto ró núu rī, chi cotecu rī níh cáni, te jeē yúcuun suni cotecu maá ró. ²⁰ Te quiví ún te cuni rō jeē ñin-ni cúu ri jíin Tatá rī, te maá ró ñin-ni cúu ró jíin rí jeē ndeé rí ini anuá rō jijnáhan ró. ²¹ Te na-ni ñayuu núu ñúhūn ni i jniñu ní ndacu ri, te squícu i, ñayuu un cúu jeē maní ndije jíin rí. Te ñayuu jeē maní jíin rí, suni coo maní Tatá rī jíin i. Te suni ruhū coo maní rī jíin i, te stéén rī nuū i jeē nduú rí jíin i. Achí yá.

²² Te ni cahán Judas jíin yá (te nasūu tée cúu Iscariote):

Najehē cúu jeē steén ni maá ní nuū ná, te nuū ñayuu ñayiví chi tuú?

²³ Te ni cahán Jesús:

Ñayuu jeē maní jíin rí, chi cásquícu i jeē cahán rī. Te coo maní Tatá rī jíin i. Te Tatá rī jíin maá rí quijicoo ri cundúu rí jíin i. ²⁴ Te ñayuu jeē tú maní jíin rí, tu cásquícu i jeē

cahán rī. Te jnūhun cájini sōho ró cáhán rī, nasūu jnúhun máá rí cúu, chi jnūhun máá Tátá rī jeē ní tají rúhū cúu.

²⁵ Tāca jnúhun yáha cáhán rī jíin ró níni íne ga rī jíin ró. ²⁶ Te Tátá rī chi tají yá Espíritu Santo, quiji nucuiñī nuū rī. Te máá yá chindéé ñáhán yá rohó, te sáha ya jeē cóo sñī ni rō. Te stéén yā tāca jnúhun nuū rō, te nacachi tucu ya tāca jéē ni cáhán rī jíin ró.

²⁷ Te jeē quihín rī, te sáha ri jeē cóo ndeyí coo sñī ni rō. Nájñūhun íyó ndeyí sñī ni maá rí, suni súcuan coo ndeyí sñī ni rō sáha ri. Te jeē sáha ri jeē cóo ndeyí sñī ni rō, tu quíjnáhan jíin jnúhun ndeyí cácahán ñayuu ñayīví. Ma cucuíhyá ni rō siquī tāca jnúndóho, te ni ma yūhu ró. ²⁸ Je ni cajini sōho ró jéē ni cáhán rī jeē quihín rī, te ndiji ri cundúú rí jíin ró. Te núu cáhīyo manī vāha ró jíin rí, te cusñī ni rō jeē ni cáhán rī jeē nuhún rī nuū Tátá rī. Chi cújénu ga Tátá rī vijna vésú ruhū. ²⁹ Je ni castūhun rí nuū rō tāca jnúhun yáha nde ná tu coo, návāha núu je ni cuu, te candíje ró rúhū jijnáhan ró.

³⁰ Ma cahán rī cuehē gā jnūhun jíin ró, chi je vēji jexeén jeē ndácu jniñu ini ñayīví yáha. Te tú na vé cúu sáha siquī rī nuú. ³¹ Te na cóo nájñūhun ni ndacu Tátá rī jniñu nuū rī, návāha cuni ñayuu ñayīví jéē maní rī jíin Tátá rī, te sáha ri jniñu ní ndacu ya. Ndocuiñī jijnáhan ró na quíngoo yó. Achí yá.

Jesús cúu nájñūhun yoyúcu uva

15

¹ Máá rí cúu nájñūhun yoyúcu uva váha ndaā, te Tátá rī cúu nájñūhun tēe ndíto yoyúcu uva un. ² Te máá ró chi cácuu ró nájñūhun ndaha, te núu tu jéhe ró ndéhē te quende yā rohó. Te núu cácuu ró nájñūhun ndaha jeē jéhe ndehē, te nasándoo ya nacahnde yā rohó nájñūhun jeē cúu ró ndaha ún, návāha cuāha ró cuéhē gā ndehē. ³ Te máá ró chi je ni candundoo ánuá rō jíin jnúhun ni steén rī nuū rō, nájñūhun ndúndoo ndaha uva. ⁴ Na cundúú ró jíin rí, te suni máá rí cundúú rí jíin ró. ñn ndaha uva ma cúu cuāha ndehē jeē maá, te núu tu yíjnñī jicā yóho. Te suni súcuan máá ró, ma cúu sáha ró jniñu váha te núu tu cundúú ró jíin rí.

⁵ Máá rí cúu yoyúcu un, te máá ró cácuu ndaha ri. Ñayuu jeē nduú jíin rí, te ruhū ndúú rí jíin i, máá i cúu nájñūhun ndaha jeē jéhe cuehē ndehē. Chi núu tú cundúú ró jíin rí, te tú cuiti na jniñu váha cuu sáha ró. ⁶ Ñayuu jeē tu cundúú jíin rí, quende yā i nájñūhun ñn ndaha uva, te ichī. Te ndoho i nájñūhun ndaha uva un jéē ndutútu te cayū nuū ñuhún.

⁷ Núu ndúú ró jíin rí, te cáñūhun ni rō jnūhun cáhán rī, yūcuán na te cacān rō na-ni vé cácuu rō, te sáha ri jeē cácahán rō. ⁸ Te núu cásáha ró cuéhē jniñu váha, súcuan cástéén rō jeē cúu ndije ró ñáyuu cascuáha jíin rí, te súcuan nácuni ñayuu jeē yóhoyo cújénu Tátá rī. ⁹ Nájñūhun manī Tátá rī jíin rí, suni súcuan manī rī jíin ró jijnáhan ró. Núu súcuan te ma siaá rō jnūhun manī rī jíin ró. ¹⁰ Núu squícu ró jniñu ní ndacu ri nuū rō, te níni coo manī rī jíin ró, nájñūhun máá rí squícu ri jniñu ní ndacu Tátá rī nuū rī, te níni íyó mánī yā jíin rí.

¹¹ Súcuan ni cahán rī jíin ró návāha coo sñī ni rō nájñūhun íyó sñī ni rī, chi nde cusñī teyí ni rō. ¹² Te yāha cúu jniñu ndácu ri nuū rō jijnáhan ró: jeē na cundáhú ni rō jnáhan ró nájñūhun cundáhú ni rī rohó. ¹³ Núu ñn tēe cuu de jehē amigo de, te tuá na vé cúmani gā sáha de jeē cundáhú ni de amigo de. ¹⁴ Te máá ró cácuu amigo rī núu squícu ró jniñu ndácu ri nuū rō. ¹⁵ Ma cahán gā rī mozo jíin ró, chi ñn mozo tu cástūhún patrón nuū i ndese jéni ni de sáha de. Chi sa suhva amigo cahán rī jíin ró, chi je ni castūhun rí nuū rō tāca jnúhun ni cahán Tátá rī jíin rí. ¹⁶ Máá rí ni nacāji rōhó jéē jnáma ri rohó, te nasūu máá ró ni cánacani ni xihna gā jeē cóndiquīn rō ruhū. Te ni jeni ri rohó jéē caca ndaā rō te scándíje ró cuéhē ñayuu jeē cuu i sēhe ri ní cáni. Te súcuan te ndíhi jeē cacán rō nuū Tátá rī siquī jeē cácaandíje ró rúhū, sáha ya jeē jicán rō. ¹⁷ Te yāha cúu jniñu ndácu ri nuū rō: jeē na cundáhú ni rō jnáhan ró.

Jeē cáquiti ni ñayuu ñayīví núu Jesús jíin núu ñáyuu cácaandíje

¹⁸ 'Te núu cáquitī ni ñayuu ñayīvi núu rō jijnáhan ró, te je cájini rō jeē xīhna gā nuū maá rí ni caquitī ni i. ¹⁹ Te núu jeē iyó gá rō jíin modo ñayuu ñayīvi, te coo manī ñayuu ñayīvi jíin ró nuú, nájñuhun manī i jíin jnáhan i. Te ni nacāji ri rohó jēē tuá coo ró jíin modo ñayuu ñayīvi. Te jeē yúcuan cáquitī ni i nuū rō, chi tuá cácuu ró cuenta ñayīvi. ²⁰ Nucūhun ni rō jñuhun ni cahān rī jíin ró: Núu tu iyó yíñúhún ñayuu nuū patrón, te nagā ni cuu nuū mozo de. Núu ni cajito xeēn i ruhū, te suni súcuan coto xeēn i róhó jēē cácuu ró mozo rī. Te núu jeē ni cájetáhú i jñuhun ni steén rī, te suni cuatáhú i jñuhun cástéén rō. ²¹ Te tācá jniñu yáha sáha i jíin ró jeē siquī ruhū, chi tu cájini i Yaā ní tají rúhū vēji rī.

²² 'Núu jeē tu ní quíji ri nacani ri jñuhun nuū i, te ma cóo cuēchi i núu. Te vijna chi ma cóo ga cahān i jeē tu jíin i jeē iyó cuéchi i. ²³ Ñayuu jeē cáquitī ni nuū rī, suni nuū Tatá rī cáquitī ni i. ²⁴ Núu jeē tu ní sáha ri jniñu jéhnú nuū i jeē ní ñn tēe tu ní sáha de súcuan, te ma cóo cuēchi i núu. Te vijna je ni cajito i jniñu ún, te vēsú súcuan te cáquitī ni i nuū rī jíin núu Tatá rī. ²⁵ Te súcuan cásáha i návāha squícu jñuhun yósó núu tútu ley Yaā Dios jeē cánevāha i: Ni caquitī ni i nuū rī, vēsú tú na cuēchi ri, achí.

²⁶ 'Te tají rí maá Yaā chindéé ñáhán róhó te sáha ya jeē cóo sī ni rō. Te Yaā un cóo máa Espíritu jeē steén jñuhun ndaā, te quiji ya nde nuū Tatá rī, te nacani cájí yá jñuhun rī. ²⁷ Te suni máá ró nacani ró jñuhun rī, chi je cáhiin rō jíin rí nde ná ni quejéé rí nacani ri jñuhun.

16

¹ 'Tāca jñuhun yáha ní cahān rī jíin ró návāha ma náyūhu ró jeē quíji jñundóho. ² Chi quenehen i róhó jēē ma cuáha ga i jñuhun cone ró táca vehe i sinagoga. Te quee quivī jeē cahni i róhó, te cani ni i jeē ñn jniñu váha ni sáha i nuū Yaā Dios. ³ Te súcuan sáha i jíin ró, chi tu cájini cuítī i máa Tatá rī ni máa rí. ⁴ Te ni cahān rī jñuhun yáha jíin ró návāha núu je ni quee quivī jeē súcuan coo, te nucūhun ni rō jeē jé ni cahān rī jíin ró.

Jniñu sáha Espíritu Santo

'Te tu ní cáhán rī jñuhun yáha jíin ró nde xīhna ñúhún, chi íne máa rí jíin ró jijnáhan ró. ⁵ Te vijna chi nuhūn rī condee rī jíin Yaā ní tají rúhū vēji rī. Te ni ñn ró tu cájnūhun ró ndé nuū quihín rī. ⁶ Chi máa jēē cácuuñhyá ndasí ni rō jeē ni cáhán rī súcuan jíin ró. ⁷ Jendaá cahān rī jíin ró: Jeē váha máa ró jijnáhan ró cóo jeē quihín rī. Chi núu tú quihín rī, te ma quíji Yaā chindéé ñáhán róhó te sáha ya jeē cóo sī ni rō. Te núu cuahān rī, te tají rí yā quiji ya nuū rō. ⁸ Te jeē quéé yā, te stéén yā nuū ñayuu ñayīvi jēē iyó cuéchi i, jíin ndese quivícoo i ichi ndaā, jíin jēē sándaā Yaā Dios siquī cuéchi i. ⁹ Stéén yā jeē iyó cuéchi i, chi tu cácuñhyé i ruhū. ¹⁰ Te stéén yā siquī ichi ndaā, chi máa rí nuhūn rī nuū Tatá rī, te ma cóto ga rō nuū rī. ¹¹ Te stéén yā siquī jeē sándaā Yaā Dios cuēchi ñayuu, chi je ni cundaā jeē jñahnú ndetū máa jéxeén jeē cujéhnú ini ñayīvi yáha.

¹² 'Te iyó cuéhē gā jñuhun cúní rī cahān rī jíin ró, te ma cóo jecūhun ni rō vijna. ¹³ Te jeē quéé máa Espíritu jeē steén jñuhun ndaā, te máa yá steén tāca jñuhun ndaā un núu rō. Chi ma cahān yā jeē máa yá, chi cahān yā tāca jēē jíin sōho ya cahān Yaā Dios. Te stéén yā siquī tācá jniñu jeē coo. ¹⁴ Te stéén yā jeē cujéhnú rī, chi nacastūhun yá nuū rō tāca jñuhun jeē jé ni cahān rī, te sáha ya jeē jécūhun ni rō. ¹⁵ Ndiñi ndese cújéhnú Tatá rī, suni súcuan cújéhnú máa rí. Jeē yúcuan ní cahān rī jeē Espíritu Santo nacastūhun yá nuū rō tāca jñuhun jeē jé ni cahān rī, te sáha ya jeē jécūhun ni rō jijnáhan ró.

Vēsú cácuuñhyá ni rō, te ndusī ni rō

¹⁶ 'Jecu na te ma cóto ga rō nuū rī. Te jecu tucu quivī te coto tucu ró núu rī, chi quínuhun rī nuū ndeé Tatá rī. Achí yá.

¹⁷ Yūcuán na te sava tēe cáscuáha jíin yá, ni cacajnūhun jnáhan de:

¿Na jñuhun cóo jeē yáha jeē cahān yā jíin yó? Chi áchí yá jeē jecu na te ma cóto ga yō nuū yā, te jecu tucu quivī te coto tucu yó núu yā, chi siquī jeē quínuhun yā nuū ndeé

Tátá yā. ¹⁸ ¿Na jnūhun cúu jeē yáha jeē cahán yā, jecu na? Tu cájecūhun ni yō na vé cúu jeē cahán yā. Achí de.

¹⁹ Te ni jini Jesús jeē cáconi de cajnūhún de ya. Te ni cahān yā jíin de:

¿A cácajnūhun jnáhan ró na vé cúu jeē ni cáhān rī jíin ró jeē jecu na te ma cóto ga rō nuū rī, te jecu tucu quivī te coto tucu ró núū rī? ²⁰ Jendaá cahán rī jíin ró jeē ndahyū rō jijnáhan ró te cucuíhyá ni rō, te ñayuu ñayīví chi sa cusī ni i. Te vēsú cucuíhyá ni rō, te sa ndusiī ni rō jeē cóto tucu ró núū rī. ²¹ ĩn ñahan núu cuacuyajni scácu ña, te jéhnde chíji ña, chi je ni quee hora jeē scácu ña. Te núu je ni scácu ña sūchi lúlí, te tuá nahán ña jeē ní ndoho ña, chi cúsiī ni ña jeē ní cacu sēhe ña. ²² Te suni súcuan cúu jeē cándoho ró vijna, chi cácuquíhyá ni rō jíin rí. Te jecu-ni quivī te coto jnáhan tucu yó, te cusī ndasí ni rō. Te ni ĩn ma cúu casi jeē cúsiī ni rō.

²³ Te quivī ún chi tú na vé cacān gā rō nuū rī. Chi jendaá cahán rī jíin ró jeē nuū maá Tátá rī cacān rō, te sáha ya ndīhi jeē cájicān rō, síquī jeē cácañdije ró rúhū. ²⁴ Nde vijna te ná tu cacān rō nuū Tátá rī jeē jíin síhvī rí. Te vijna te na quéjéé ró cacān rō jíin síhvī rí, te nihīn rō, návāha cusī ndasí ni rō.

Je ni quende yā poder ndīhi jeneé cáhīyo ini ñayīví

²⁵ Tāca jnūhun yáha ní cahān yatá rí jíin ró. Te quee quivī jeē ma cahán yatá gá rī jíin ró, chi sa suhva castūhun cájī rí nuū rō síquī Tátá rī. ²⁶ Te quivī ún chi cacān rō nuū Tátá rī síquī jeē cácañdije ró rúhū. Te tu cáhān rī jíin ró jeē cacán tahu rī jehē rō nuū Tátá rī. ²⁷ Chi máá Tátá rī je cúndáhú ni yā rohó síquī jeē cáhīyo manī rō jíin rí, te ni cacandije ró jéé ndé nuū maá yá véji ri. ²⁸ Ni quenda ri nde nuū Tátá rī, te ni quee rī ini ñayīví. Te vijna te quenda ri ini ñayīví, te nuhūn tucu ri nuū Tátá rī. Achí yá.

²⁹ Te ni cacahān tēe cáscuáha jíin yá:

Vijna te cáhān cají ní, te tuá cahán yatá ní. ³⁰ Vijna te cájini na jéé jíiní ni ndivii cuiti, te tuá jíni ñúhún jéé cájnūhún ni ĩn ná níhín. Jeē yúcuan cácañdije ná jéé véji ní ndé nuū Yaā Dios. Achí de.

³¹ Te ni cahān Jesús jíin de:

¿A ndé vijna te cácañdije ró naún? ³² Te quiji quivī, te je ni quee, jeē cuité núu ró quínungoo ró ná vehe ná vehe ró, te stóo máñúhún ró ruhū. Te nasūu jéé quéndōo máñúhún rí, chi Tátá rī íne ya jíin rí. ³³ Tāca jnūhun yáha ní cahān rī jíin ró návāha coo ndeyí coo síī ni rō síquī jeē cácañdije ró rúhū. Ini ñayīví chi cánuú coto ró jnúndóho. Te vēsú súcuan te na cóo síī ni rō, chi je ni quende rī poder tāca jeneé cáhīyo ini ñayīví. Achí yá.

Jeē ni jíicān tahu Jesús jehē ñayuu cácañdije

17

¹ Te ná ni cahān Jesús tāca jnūhun yáha, te ni ndacoto ya ichi ándiví, te ni cahān yā:

Tátā, je ni quee quivī jeē ndóho ná. Vijna te steén ni jéé cujéhnu máá ná jeē cúu ná Séhe ní, návāha suni máá ná steén na jéé cujéhnu máá ní. ² Chi ni sáha ní jéé ndiso jniñu ná síquī tāca ñayuu, návāha tāca ñayuu jeē ni jéhe ní núu ná, cotecu i ní cáni sáha ná. ³ Te suhva cúu jnūhun cotecu i ní cáni: suu jeē na cúni i níhín jéé mañúhún-ni ní cúu Yaā ndaā, jíin jéé cúni i sāñá jeē cúu ná Jesucristo, Yaā ní tají ní.

⁴ Je ni steén na núu ñayuu ñayīví jéé cujéhnu ní, te je sínu ná jniñu ní ndacu ní núu ná. ⁵ Te vijna, Tátā, sáha ní jéé ndujéhnu tucu ná ndé nuū néne ní, nájnūhun cújéhnu ná jíin ní nde ná tu jecōo ñayīví.

⁶ Ñayuu jeē ní nacāji ní ini ñayīví, ni jéhe ní i nuū ná, te ni steén na núu i ndese Yaā cúu ní. Cuenta maá ní cúu i, te ni jéhe ní i nuū ná. Te ni cajetáhú i jnūhun ní, te ni casquícu i. ⁷ Te vijna te cájini i jeē ndé nuū maá ní véji tāca jéé iyó jíin ná. ⁸ Chi tāca jnūhun ni cahān ni jíin ná, ní castūhun ná núu i, te ni cajetáhú i. Te ni cajini i jeē ní quenda ndije ná ndé nuū maá ní, te ni cacandije i jeē maá ní ni tají sáña.

⁹ Te jíicān tahu na jéhē maá i jíináhan i. Tu jíicān tahu na jéhē ñayuu ñayīví jéé tu cácañdije, chi sa jehē maá ñayuu ni jéhe ní núu ná, chi cuenta maá ní cácuu i. ¹⁰ Te tāca

i jeē yíhi i ndaha máá ná, suni cuenta maá ní cúu. Te tācá i jeē cúu i cuenta maá ní, suni cuenta maá ná cúu i. Te cástéén i ndese cújéhnú ná.

¹¹ Te tuá condee ná ini ñayīví. Te máá i chi quendōo i ini ñayīví, te máá ná chi najeē ná condee na jíín ní. Yaā ī Yaā ndoo cúu ní, Tátā. Te jíín poder ní condito ní táca ñayuu ni jéhe ni núū ná, návāha inuú na cóo ni i jíínáhan i, nájñūhun cúu máá yó. ¹² Te jeē ní condee na jíín i ini ñayīví, te jíín poder ni ní condito ná i. Tāca ñayuu ni jéhe ni núū ná, ni condito yúcún ná i. Te tu ní jéhe na jñūhun naa i jíínáhan i, chi máá ñn-ni tēe jeē je cúu de tēe jñahnū ndetū, návāha squícu jñūhun yósó núū tútu īi.

¹³ Te vijna te najeē na núū ní, te cáhán na táca jñūhun yáha jíín i níni jēē íne ga ná ini ñayīví, návāha na cóo sīñ ndasí ni i nájñūhun cúsiñ ni maá ná. ¹⁴ Ni castūhun ná jñūhun ní núū i. Te ni caquītī ni ñayuu ñayīvi núū i, chi tuá cácuu i cuenta ñayīví, nájñūhun máá ná tu cúu ná cuenta ñayīví. ¹⁵ Te tu jícán tahu na jēē quénehen ní i ini ñayīví, chi sa suhva jeē cóndito ní i nuū jexeén. ¹⁶ Nasūu cuenta ñayīvi cácuu i, nájñūhun máá ná jēē násūu cuenta ñayīvi cúu ná. ¹⁷ Jíín jñūhun ndaā ní te sáha ní jēē coo ndoo coo īi i nuū ní. Tāca jñūhun cáhán maá ní cúu jñūhun ndaā. ¹⁸ Te nájñūhun ni tají ní sāña ní quiji ná ini ñayīví, suni súcuan tají ná i nacani i jñūhun ní núū ñayuu ñayīvi. ¹⁹ Te jehē maá i cúu jeē jéhe ná máá ná cuu ná, návāha suni máá i coo ndoo coo īi i nuū ni jēē jíín jñūhun ndaā.

²⁰ Te nasūu máá ñn-ni jehē ñayuu yáha jícán tahu na, chi suni jehē tāca gá ñayuu jeē candíje i sāña núu na cúni sōho i jñūhun jeē nácani máá i jíínáhan i. ²¹ Te jícán tahu na jēē inuú na cóo ni i jíínáhan i. Nájñūhun ñn-ni cúu ní jíín ná, Tátā, te ñn-ni cúu ná jíín máá ní, suni súcuan na cóo inuú i jíín yó. Te cúni na jēē inuú na cóo ni i, návāha na cándíje ñayuu ñayīvi jēē maá ní ni tají ní sāña. ²² Ni sajéhnú ná i nájñūhun ni sajéhnú ní sāña, návāha inuú na cóo ni i, nájñūhun inuú-ni cúu yó. ²³ Te ndúú ná jíín i, te ndúú ní jíín ná, te súcuan te inuú cuítī coo ni i jíínáhan i. Yūcuán na te cuni ñayuu ñayīvi jēē maá ní ní tají ní sāña, jíín jēē maní ndasí ní jíín i nájñūhun maní ni jíín ná.

²⁴ Tátā, máá ní ni jéhe ní i nuū ná. Te cúni na jēē cóyūcú i jíín ná nuū cóndee ná, návāha coto i ndese luu cújéhnú ná ni sáha ní. Chi íyó maní ndasí ní jíín ná nde ná tu jecōo ñayīvi te nde vijna. ²⁵ Yaā ndaā cúu ní, Tátā, te ñayuu ñayīvi tu jíín i níhín, te máá ná chi jíín na níhín. Te ñayuu yáha chi cájini i jeē maá ní ni tají sāña. ²⁶ Ni steén na núū i jíínáhan i ndese Yaā cúu ní. Te steén gā na súcuan nuū i, návāha na cóo maní ndasí i jíín jñáhan i, nájñūhun íyó maní ndasí ní jíín ná, te návāha condee ná ini anuá i. Achí yá.

Jeē ní cajnií de Jesús

(Mt. 26.47-56; Mr. 14.43-50; Lc. 22.47-53)

18

¹ Te nuū ní cuu ni cahān Jesús tāca jñūhun yáha, te ni quenda ya jíín tēe cáscuáha jíín yá, cuahān yā inga lado yuu Cedrón. Te yūcuan íyó ñn huerto nuū ní quīvi ya jíín tēe cáscuáha jíín yá. ² Te Judas, tēe jeē nastúu de ya, suni jíín de lugar un, chi cuehē jíínu ni nataca Jesús yūcuan jíín tēe cáscuáha jíín yá. ³ Te ni jinū de yūcuan jíín ñn grupo soldado jíín jecu policía cándito templo, jeē ní catají sutū cácujehnú jíín tēe grupo fariseo. Te cándiso de machete, te cájnií de linterna jíín yiti. ⁴ Te Jesús je jíín yā tāca jñúndóho jeē véji siquī yā. Te ni quenda ya ichi núú de, te ni cahān yā:

¿Ndé ñn cánanducú ró?

⁵ Te ni cacahān de jíín yá:

Jesús tēe ñuu Nazaret cánanducú rí.

Te ni cahān yā:

Máá rí cúu.

Te Judas, tēe jeē nastúu de ya, suni íne de jíín tēe ún. ⁶ Te jeē súcuan ni cahān yā, máá rí cúu, te ni cajica yátá de, te ni cacotúu-ni de. ⁷ Yūcuán na te ni cajñūhún tucu ya de:

¿Ndé ñn cánanducú ró?

Te ni cacahān de:

Jesús tēe ñuu Nazaret.

⁸ Te ni cahān Jesús:

Je ni cachi rī jeē maá rí cúu. Te núu ruhū cānanducú ró, te máá-ni ri jñií ró, te tēe yáha na quíngoo de. Achí yá.

⁹ Súcuān ni cuu návāha na squícu jñūhun jeē ni cáhān yā jíin Tátá yā: Tu ní jéhe na jnúhun naa ni iin tēe jeē ni jéhe ni núū na, áchí yá. ¹⁰ Te Simón Pedro ndíso de iin espada. Te ni tava de, te ni jehnde de sōho lado váha iin tēe nání Malco. Te tēe un cúu de mozo maá sūtū cujéhnū. ¹¹ Te ni cahān Jesús jíin Pedro:

Nachuvāha espada rō ini cubierta. ¿A tu cánuú jéē ndóho ri jñūndóho yáha jeē ni sándaā Tatá rī jeē ndóho ri? Achí yá.

Jeē ní indichi Jesús nuū sutú cujéhnū

(Mt. 26.57-58; Mr. 14.53-54; Lc. 22.54)

¹² Yūcuān na te tēcá soldado un, jíin capitán de, jíin táca policía tēe hebreo un, ni cajñií de Jesús, te ni cajihni de ya. ¹³ Te xīhna gā vehe Anás cuangoo de jíin yá. Te tátá chīsó Caifás cúu Anás. Te Caifás cúu máá sūtū cujéhnū ga cuiyā ún. ¹⁴ Te suu de ni cachi nuū jnáhan de hebreo jeē cánuú jéē cúū iin tēe jehē nación de.

Jeē ní cachi Pedro jeē tu jíin de ya

(Mt. 26.69-70; Mr. 14.66-68; Lc. 22.55-57)

¹⁵ Te Simón Pedro jíin inga tēe scuáha, cándiquīn de Jesús cuangoo de yatā yā. Te inga tēe scuáha ún chi jíin jnáhan de jíin sūtū cujéhnū. Jeē yúcuān ní quívi de jíin Jesús ini patio vehe sutū cujéhnū ún. ¹⁶ Te Pedro ni quendōo de yatā yehyí. Te máá tēe scuáha jéē jíin jnáhan jíin sūtū cujéhnū ún, ni quenda de ni cahān de jíin ñahan ndíto yéhyí, te ni squívi de Pedro ini patio. ¹⁷ Yūcuān na te ñahan ndíto yéhyí un ní cajñūhún ña Pedro:

¿A násūú iin tēe scuáha jíin tēe índichi nuū sutú un cúu ró?

Te ni cahān de:

Nasūu cúu rī, achí de.

¹⁸ Te tāca mozo jíin policía un ní cascáyú de ñuhūn jíin tícāyi, chi mījin sáha. Te cáhīin de cánasaā de. Te suni índichi Pedro, násaā de jíin táca tēe ún.

Jeē ni stíchí sutú cujéhnū ún Jesús

(Mt. 26.59-66; Mr. 14.55-64; Lc. 22.66-71)

¹⁹ Te sutú cujéhnū un ní stíchí de Jesús ndé-ni cúu tēe cáscuáha jíin yá, jíin na jñūhun cúu jeē steén yā. ²⁰ Te ni cahān Jesús:

Níní ní cahān rī nuū chitú ñáyuu, ni cajini sōho ndíhi ñayuu. Te níní ní steén rī jñūhun ini tēcá vehe ií sinagoga jíin ini templo cáhnu nuū ndutútú ndivii jnáhan yó hebreo. Te tú ni iin jñūhun ní cáhān sāhi rí. ²¹ ¿Te naun cajñūhun ró ruhū? Cajñūhun ñáyuu ní cajini sōho jñūhun ni cahān rī, te máá i cachi ndese ni cahān rī. Chi cajini i ndese ni cahān rī.

²² Te jeē ni cáhān Jesús súcuān, te iin policía ndíto templo jeē índichi de yūcuān, ní cani-ni de nuū yā. Te ni cahān de jíin yá:

¿A súcuān cáhān rō jíin sūtū cujéhnū naún?

²³ Te ni cahān Jesús:

Núu ni cahān rī iin jñūhun néé, cachi na jñūhun néé ní cahān rī. Te núu tu ní cáhān rī iin jñūhun néé, ¿te naun cáni ró rúhū? achí yá.

²⁴ Yūcuān na te Anás, sutú cujéhnū un, ní tají de ya, núhni yā cuahān yā nuū Caifás, tēe cúu máá sūtū cujéhnū ga.

Jeē ní cachi tucu Pedro jeē tu jíin de ya

(Mt. 26.71-75; Mr. 14.69-72; Lc. 22.58-62)

²⁵ Te níní jéē súcuān cúu, te índichi-ni Pedro, násaā de yuñúhún. Te ni cacahān jíin de: ¿A násūú iin tēe scuáha jíin tēe un cúu ró, chí naún?

Te máá de tu ní cáchi de:

Nasūu cúu rī, achí de.

²⁶ Yūcuān na te iin mozo sutú cujéhnū, jnáhan tēe jeē ní jehnde Pedro sōho, ni cahān jíin de:

¿A násūu máá ró cúu jeē ní jito ri jíin de ini huerto?

²⁷ Te Pedro tu ní cáchi tucu de. Te ni cana-ni líhli.

Jeē ní indichi Jesús nuū Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Yūcuán na te ni quendacoo de jíin Jesús vehe Caifás, cuangoo de jíin yá nde palacio tēe nación Roma jeē cúu gobernador. Te je cuacundijin. Te ñayuu hebreo tu ní quívicoo i ini palacio, návāha tu stívi i ley i jeē cahán jeē ma quívi i ini vehe ñin ñayuu jeē násūu hebreo cúu. Chi núu súcuan te ma cúu cuxíni i vico pascua jeē cóo inga quívi ún.

²⁹ Yūcuán na te ni quenda Pilato, tēe cúu gobernador, ni cahán de jíin i jíinahan i:

¿Na cuēchi cájicān rō siquī tēe yáha?

³⁰ Te ni cacahān i:

Núu jeē násūu tēe cúnéé cúu tēe yáha, te ma jnī ná de jeē quíndeca ná de nuū ni núu, áchí i.

³¹ Te ni cahān Pilato:

Cuángoo jíinahan ró, te sándaā rō siquī de jíin ley cánevāha máá ró.

Te ni cacahān ñayuu hebreo un:

Máá ná jeē cácuu ná ñayuu hebreo, tú na permiso cánevāha ná jēe cáhni ná ni ñin ñayuu.

³² Súcuan ni cacahān i návāha squícu jnūhun jeē ní cachi Jesús jeē quívi ya ndaha tēe Roma te cahni de ya jicā cruz. ³³ Te ni ndīvi Pilato ini palacio, te ni cana de jeē na quíji Jesús. Te ni cajnūhún de ya:

¿A máá ró cúu Rey ñayuu hebreo naún?

³⁴ Te ni cahān Jesús jíin de:

¿A cájnūhun ró ruhū jeē súcuan jéni ni máá ró, chí jēe ní cacastūhun ñayuu hebreo nuū rō?

³⁵ Te ni cahān Pilato:

¿Chí tēe hebreo cúu ri jeē cúni rī? Ñayuu nación máá ró jíin sūtū cácujeñnu ni cachihí róhó ndaha ri. ¿Na vé ni sáha ró núu súcuan? Achí de.

³⁶ Te ni cahān Jesús:

Nasūu jēe ndácu ri jniñu nájnūhun cándacu tāca rey ñayīvi yáha. Chi núu jeē ñayuu ñayīvi ní casáha jeē cúu ri rey, yūcuán na te tēe cándiquín ruhū, cuajnáhan de návāha ma quívi ri ndaha jnáhan ri hebreo nuú. Te nasūu núu ñayīvi yáha cúu jeē ndácu ri jniñu vijna. Achí yá.

³⁷ Yūcuán na te ni cahān Pilato jíin yá:

¿Te á ñin rey cúu ró jēe súcuan?

Te ni cahān Jesús:

Rey cúu ri, nájnūhun cáhán rō. Ni quiji ri ni cacu ri ini ñayīvi yáha návāha nacani ri jnūhun ndaā. Te ndīhi ñayuu cájetáhú jnūhun ndaā, cájini nahín i jnūhun cáhán rī. Achí yá.

³⁸ Te ni cahān Pilato:

¿Ndeese cuni yō ndé ñin cúu máá jnūhun ndaā?

Jeē ní cundaā jeē cúu yā

(Mt. 27.15-31; Mr. 15.6-20; Lc. 23.13-25)

Te jeē ni cáhán de jnūhun yáha, te ni quenda tucu de nuū ñayuu hebreo. Te ni cahān de jíin i:

Tú cuítí na cuēchi níhín rī siquī de. ³⁹ Te íyó costumbre máá ró jíinahan ró jēe vico pascua te siáá rī ñin tēe íne vecāa nuū rō. ¿Te á tu cácuuni rō jeē siaá rī Rey rō nuū rō? Achí de.

⁴⁰ Yūcuán na te ndīvii i ni cacana jee tucu i:

Ma siaá ni tēe jíiná, chi Barrabás siaá ni, áchí i.

Te tēe cuíhná cúu Barrabás.

19

¹ Yūcuán na te ni cahān Pilato jeē na jñí soldado Jesús, te caní de ya jíin cuarta ñíi.
² Te ni casáha de ñin corona iñu, ni cachuhun de xinī yā. Te ni cachuhun de ya ñin sahma cuehé ndíhí jéē cúu sahma rey. ³ Te ni jecondichi de nuū yā, te ni cacahān catá de:

Nacā jeē váha rey cúu Rey ñayuu hebreo.

Te ni cacani de nuū yā.

⁴ Yūcuán na te ni quenda Pilato inga jínu, te ni cahān de jíin ñáyuu:

Yāhá condēhe ró tava rī de, návāha na cúni rō jeē tú na cuēchi níhín rī siquī de.

⁵ Te ni quenda Jesús, ñúhun ya corona iñu jíin sahma cuehé ndíhí un. Te ni cahān Pilato jíin í:

Yāhá condēhe ró de jíin náhan ró.

⁶ Te nuū ní cajito sutū cácujuhnu jíin táca policía nuū yā, te ni cacana jee de:

Cata caa ní de jicā cruz, na cúu de.

Te ni cahān Pilato:

Núu súcuan te najñí máá ró de te cahni rō de. Chi ruhū, tú na cuēchi níhín rī siquī de.

⁷ Te ni cacahān ñayuu hebreo un:

Cáneváha ná ñin ley, te jeē siquī ley un cánuú jéē cúu de, chi sáha de máá de jeē Séhe Yaā Dios cúu de.

⁸ Te jeē ní jini sōho Pilato jñūhun yáha, te víhyá gā ni yūhú de. ⁹ Te ni ndivicoo tucu de ini palacio, te ni cajñūhún de Jesús:

¿Ndé nuū véji ró?

Te tu ní cáhan cuítí Jesús jíin de. ¹⁰ Yūcuán na te ni cahān de jíin yá:

¿Naun tu cáhan rō jeē cáhan rī? ¿A tu jíin rō jeē ndíso jñíñu ri jeē cáhni rī rohó jicā cruz, te suni ndíso jñíñu ri jeē siaá rī rohó quíhín rō?

¹¹ Te ni cahān Jesús:

Núu tu ní sáha Yaā Dios jeē ndíso jñíñu ró, te tú na vé cúu sáha ró siquī rī. Jeē yúcuán tēe jeē ní nacváha ruhū ndaha ró, cuēchi xeēn gā condee siquī de vésú máá ró. Achí yá.

¹² Yūcuán na te nde hora un ndúcú ndéyí Pilato ndese siaá de ya. Te ñayuu hebreo chi cácana jee í:

Núu siaá ni tēe jíñā, te tu cúu ní amigo rey Roma jeē cujéhnu ndácu jñíñu núu súcuan. Chi táca tēe jeē sáha de rey máá de, núu súcuan te cúu de enemigo siquī rey un. Achí í.

¹³ Te jeē ní jini sōho Pilato jñūhun yáha, te ni ndacu de jñíñu jeē na quenda Jesús ini vehe quiji ya. Te ni cucōo de silla nuū cúndaā jñíñu, nuū máni máá yúu ní jecáva, te lugar un nání Gabata nuū yúhu hebreo. ¹⁴ Te cuacuu cahuxí uū, te jehíni quiví ún quejéé vico pascua. Te ni cahān Pilato jíin ñáyuu hebreo:

Yāha índichi máá rey rō.

¹⁵ Te ni cacana jee í:

Na cúu de. Cata caa ní de jicā cruz, achí í.

Te ni cahān Pilato jíin í:

¿A jéē cata caa rī rey rō jicā cruz naún?

Te sutū cácujuhnu un ní cacahān de:

Tuá na inga rey cánevāha ná jíin náhan ná, chi máá-ni rey Roma jeē cujéhnu ndácu jñíñu nuū ná.

¹⁶ Yūcuán na te Pilato ni nacváha de ya nuū i jeē na cúu yā jicā cruz. Te ni cajñí i ya cuango i jíin yá.

Jeē ní cacata caa de ya jicā cruz

(Mt. 27.32-44; Mr. 15.21-32; Lc. 23.26-43)

¹⁷ Te ni quenda Jesús, ndíso ya cruz yā, cuango de jíin yá ñin lugar nuū naní Yiquí Xíní, te nuū yúhu hebreo naní Gólgota. ¹⁸ Te yúcuán ní cacata caa de ya jicā cruz. Te suni ni cacata caa de uū tēe nuū uū gā cruz, ñin ñin de ñin lado yā, te máá Jesús mēhñú. ¹⁹ Te suni ni ndacu Pilato jñíñu jeē na cóndee jñūhun xinī cruz yā, jeē cáhan: Tēe yáha cúu Jesús ñuu Nazaret, Rey ñayuu hebreo, achí. ²⁰ Te cuehē ñayuu hebreo ni cacahu i jñūhun yáha,

chi máá yajni yuñúu cúu nuū ní cacata caa de ya. Te jnūhun un yósó jíin yuhu hebreo jíin griego jíin latín. ²¹ Te tāca sūtū cácujuhnu nuū ñayuu hebreo, ni cacahān de jíin Pilato:

Ma tée ní jéē cúu de Rey ñayuu hebreo, chi sa suhva tee ní jéē máá de ni cahān jeē cúu de Rey ñayuu hebreo.

²² Te ni cahān Pilato:

Ma násama ri jeē jé ni ndacu ri jniñu ni jecondee.

²³ Te soldado un, nuū ní cuu ni cacata caa de Jesús jicā cruz, te ni caquihin de sahma ya, te ni cajehnde de ni nduu cuūn parte, te ñin ñin parte ni cuu ñin ñin soldado un. Te suni ni caquihin de camisa yā. Te camisa un tu ní quícu, chi ni cunu nñí. ²⁴ Te ni cacahān máá de:

Ma cáhnde yō, chi vāha ga na sāha yó sorteo, te na cóndēhe yó ndé ñin yó níhīn, achí de.

Te súcuan ni squícu jnūhun yósó núu tútu iī nde jenahán jéē cahān Jesús: Ni caquihin de sahma ri cuu máá de. Te ni casáha de sorteo siquī camisa rī. Achí. Súcuan ni casáha soldado un.

²⁵ Te yajni cruz nuū ndíta caa Jesús íne náná yā, jíin cúhū ña María ñasihí Cleofas, jíin María ñuu Magdala. ²⁶ Te ni jito Jesús nuū naná yā jíin núu téē scuáha jeē maní gā yā jíin, suni índichi de yūcuán. Te ni cahān yā jíin náná yā:

Nánā, nde vijna te máá de nucuiñī de cuu de sēhe ní.

²⁷ Yūcuán na te ni cahān yā jíin téē scuáha ún:

Nde vijna te cuu ña nájñuhun náná rō, achí yá.

Te nde hora un ní cana de ña cuacondee ña vehe de condito de ña.

Jeē ni jihī Jesús

(Mt. 27.45-56; Mr. 15.33-41; Lc. 23.44-49)

²⁸ Yūcuán na te ni jini Jesús jeē jé ni jīnu tācá jniñu jeē cánuú ndoho ya. Te návāha squícu jnūhun cáhán tutu iī, te ni cahān yā:

Jíchí rī ndute, achí yá.

²⁹ Te yūcuan ín ñin tīndohō ñuhun chitú vinagre iyá. Te ni cachundaji de ñin cachí nuū vinagre un, te ni catee de xinī ñin ndaha yújnu hisopo, te ni catee de yuhu ya jeē cóho ya.

³⁰ Te ná ni jihī ya vinagre un, te ni cahān yā:

Je ni jīnu, achí yá.

Te ni cāyí-ni xinī yā, te ni jihī-ni ya.

Jeē ní cují soldado lanza xiin ya

³¹ Te inga quivī ún coo vico pascua. Te tēe hebreo tu cácu ni de jeē cóndita caa ndīyí ún jicā cruz quivī ndétátú un. Chi quivī ndétátú jeē cúu vico pascua, iī ndasí gá vēsú tāca gá quivī ndétátú. Te ni cacahān de jíin Pilato jeē na ndácu de jniñu jeē jnahnú sīhīn tēe cándita caa, te na cújiyo de jicā cruz. ³² Te ni quecoo soldado, te ni cajehnū de sīhīn ñin tēe jeē ndíta caa jíin yá, te suni súcuan inga de. ³³ Te nuū ní quecoo de nuū Jesús, te ni cajito de jeē jé ni jihī yā. Jeē yūcuan tu ní cájehnū de sīhīn ya.

³⁴ Te ñin soldado chi ni cují de lanza xiin ya, te ni cane-ni niñī jíin ndute. ³⁵ Te máá rí jeē téē tutu yáha, ni jito ri jeē súcuan ni cuu, te nácani ndaā rī jnūhun ndese ni cuu. Te jíin rí jeē iyó ndáa jnūhun cáhán rī, návāha suni candíje máá ró jijnáhan ró. ³⁶ Chi súcuan ni cuu návāha squícu jnūhun cáhán tutu iī: Ma cahnú de ni ñin yiqui ya, achí. ³⁷ Te suni inga jnūhun cáhán tutu iī: ñin quivī te coto i nuū Yaā jeē ní cují i lanza, achí.

Jeē ní quindūji Jesús

(Mt. 27.57-61; Mr. 15.42-47; Lc. 23.50-56)

³⁸ Te ni cuu tāca jéē yáha. Te íyó ñin tēe ñuu Arimatea jeē naní José, te cúu de tēe cándíje Jesús. Te yuhu-ni cándíje de, chi yúhú de jnáhan de hebreo. Te ni cahān ndahú de jíin Pilato jeē na cuáha jnūhun quihin de yiqui cúñu Jesús. Te ni jēhe Pilato jnūhun. Yūcuán na te cuahān José, ni snúu de yiqui cúñu Jesús. ³⁹ Te suni ni jinū Nicodemo, tēe ni quiji nuū Jesús ñin jecuáa. Te ndíso de nájñuhun ocō uxī kilo sūje uvuā jeē ní saca jnáhan

jín yúcū áloe. ⁴⁰ Te ndindúú de ni caquihin de yiqui cúñu Jesús, te ni cachusúcun de jín tira sahma jeē ni quívi yucū jeē jeén asīn ún, nájñuhun íyó costumbre maá ñáyuu hebreo jeē cáchindūji i ndīyi. ⁴¹ Te yajni nuū ni jíhī Jesús íyó ñn huerto. Te nuū huerto un ndéé ñn yaū jeē ní caan jeé jicā ñn cava, nuū ná tu quindūji ndīyi. ⁴² Te yūcuan ní cachindūji de Jesús, chí íne yajni yaū ndīyi ún. Chí je yajni quejéé quívi ndétátú de jeē cácuu de ñayuu hebreo, te tú na ley chindūji de ndīyi núu je ni quejéé quívi ún.

Jeē ní natecu Jesús

(Mt. 28.1-10; Mr. 16.1-8; Lc. 24.1-12)

20

¹ Te jenéhen quívi domingo ni jinū María ñuu Magdala nuū ní yindūji Jesús, te yínee gā cúu. Te ni jito ña jeē ní cujiyo yuū ndihyú yuyáú ndīyi. ² Yūcuán na te jínu ña cuahān ña nuū Simón Pedro jíin núu ñga tēe scuáha ún jeē maní gā Jesús jíin. Te ni cahān ña jíin de:

Ni catava de Jitoho yō nuū ní yindūji ya, te tu cájini yō ndé nuū ní cachune de ya, achí ña.

³ Te ni quendacoo Pedro jíin ñga tēe scuáha ún, cuácondēhé de yaū ndīyi. ⁴ Te cájinu tayí ndindúú de. Te ñga tēe scuáha ún, ñihin ga ni jinu de vēsú Pedro. Te xīhna gā de ni jinū yaū ndīyi. ⁵ Te ni scáyí de máá de, te ni jito ñihin de ini yaū. Te ni jito de jeē tira sahma un cáyūcu máá na. Te tu ní quívi de. ⁶ Te sáá te ni jinū Simón Pedro jeē ndiquín jnāhan de vēji de jíin ñga tēe ún. Te ni quívi de nuū ní yindūji Jesús. Te suni ni jito de jeē tira sahma cáyūcu máá na. ⁷ Te ni jito de sahma jeē ni ñúsúcun xínī Jesús, tu cátu jíin tira sahma, chí ni natuu te cátu sīn. ⁸ Yūcuán na te suni ni quívi ñga tēe scuáha jeē ni jíin xīhna gā nuū ní yindūji ya. Te ni jito de ndese íyó, te ni candíje de jeē ní natecu yā. ⁹ Chí nde ná tu jinūcoo de yaū ndīyi, te tu ní jécūhun ni de jñuhun cáhān tutu ñi, jeē jíini ñúhún natecu yā núu je ni jíhi yā. ¹⁰ Yūcuán na te ndindúú tēe cáscuáha ún cuanungoo de vehe de.

Jeē ní nane ya nuū María ñuu Magdala

(Mr. 16.9-11)

¹¹ Te María índichi ña ndáhyú ña nuū ní yindūji ya. Te níni ndáhyú ña, te ni scáyí ña máá ña, ni jito ñihin ña ini yaū ún. ¹² Te ni jito ña uū ndajéhé andiví, cáñuhun ya sahma cuijín. Te ñn ya néne ichi xíní, te ñga ya néne ichi núu jehé nuū ni cátu yiqui cúñu Jesús.

¹³ Te ni cacahān yā jíin ña:

¿Najehē ndahyú rō?

Te ni cahān ña:

Ni catava de Jitoho ná, te tu jíin na ndé nuū ní cachune de ya.

¹⁴ Te jeē ni cahān ña súcuan, te ni ndió cóto ña, te ni jito ña nuū Jesús jeē índichi yā yūcuán. Te tu ní nacuni ña jeē maá yá cúu. ¹⁵ Te ni cahān yā jíin ña:

¿Najehē ndahyú rō? ¿Ndé ñn nánducú ró? achí yá.

Te máá ña jéni ni ña jeē tēe ndító huerto cúu ya. Te ni cahān ña jíin yá:

Núu máá ní ni quenehen ní yá, te cachi ní ndé nuū ni jéchune ní yá, te na quínuquihin ná yá, achí ña.

¹⁶ Te ni cahān Jesús jíin ña:

María, achí yá.

Te jeē ni cahān yā súcuan, te ni nacuni ña ya, te ni ndió cóto ña, te ni cahān ña jíin yuhu hebreo:

Raboni, achí ña. Te jñuhun un cúní cahān, Maestro.

¹⁷ Te ni cahān Jesús jíin ña:

Ma quehé ró rúhū, chí ná tu ndaa ri quinhun rī nuū Tatá rī. Te cuáhān núu tācá hermano rī, tēe ni cascuáha jíin rí, te cachi rō nuū de jeē ndaa ri quinhun rī nuū Tatá rī, jeē suni Tatá maá ró jijnāhan ró cúu. Te cúu ya Yāā Dios maá rí jíin Yāā Dios maá ró jijnāhan ró. Achí yá.

¹⁸ Yūcuán na te María ñuu Magdala un, cuáhān ña, te ni castūhún ña nuū tēe cáscuáha un jēe ní jito ña nuū maá Jítóho yō jíin jēe ni cáhān yā jnūhun yáha jíin ña.

Jeē ní nane ya nuū tēe cáscuáha jíin yá
(Mt. 28.16-20; Mr. 16.14-18; Lc. 24.36-49)

¹⁹ Te jeē ní cuaa maá quívī domingo un, te cáhiin tūtú tēe cáscuáha ún ini ñin vehe. Te cándihyū yehyí, chi cáyūhú de jnáhan de hebreo jeē coto xeēn i de. Te ni quee-ni Jesús, ni jecuiñī yā mēhñú de vēsú ndihyú yehyí, te ni cahān yā jíin de:

Ndeyí sñ coo ni rō jijnáhan ró, áchí yá.

²⁰ Te ná ni cahān yā súcuan, te ni steén yā ndaha ya jíin xiin ya nuū de. Te ni cacusiñ ni tēe cáscuáha un jēe ní cajito de nuū maá Jítóho yō. ²¹ Yūcuán na te ni cahān tucu Jesús:

Ndeyí sñ coo ni rō jijnáhan ró. Te nájñūhun ni tají Tátá rī ruhū ini ñayīví, suni súcuan tají rí rohó nacani ró jnūhun ri nuū ñáyuu. Achí yá.

²² Yūcuán na te ni tīvi tachī yā nuū de jíin de. Te ni cahān yā:

Vijna te ni canihīn rō Espíritu Santo. ²³ Te tāca ñáyuu jeē cone cáhnu ni rō nuū cuéchi i, núu súcuan te coo jnūhun cáhnu ni nuū cuéchi i. Te núu tú cone cáhnu ni rō nuū cuéchi i, te ma cóo jnūhun cáhnu ni nuū cuéchi i. Achí yá.

Jeē ní nane ya nuū Tomás

²⁴ Te Tomás, tēe ni cacu cuatí, ñin jnáhan jeē uxí uū tēe cáscuáha jíin yá, tu ní íne de quívī jeē ní nane Jesús nuū tāca gá tēe cáscuáha. ²⁵ Yūcuán na te sava ga tēe cáscuáha un, ní cacahān de jíin Tomás:

Ni cajito ri nuū maá Jítóho yō.

Te ni cahān Tomás:

Núu tú coto ri nuū ni túji ndaha ya ni sáha ndūyu cāa, te núu tú chune ri xinī ndáha ri nuū ni íne ndūyu cāa, te núu tú chune ri ndaha ri xiin ya, te ma candíje cuiti rī, achí de.

²⁶ Te nuū uná quívī, te tēe cáscuáha un cáhiin tūtú tucu de ini ñin vehe. Te íne Tomás jíin de. Yūcuán na te ni quee-ni tucu Jesús, ni jecuiñī yā mēhñú de, vēsú cándihyū yehyí. Te ni cahān yā jíin de:

Ndeyí sñ coo ni rō jijnáhan ró.

²⁷ Te ni cahān-ni ya jíin Tomás:

Chune xinī ndáha ró ini ndaha ri yāhá te coto ró. Te scáá ndaha ró, te chune ró xiin ri nuū ni tújī. Te ma cáni siquí gá ni rō, chi sa suhva na cándíje ró.

²⁸ Yūcuán na te ni cahān Tomás jíin yá:

Aī, Jítóho maá ná jíin Yaā Dios maá ná cúu ní, áchí de.

²⁹ Te ni cahān Jesús jíin de:

Tomás, nde ni jito ró núu rī, te ni candíje ró. Te yōhyo ndetū tāca ñáyuu jeē candíje ruhū vēsú tu ní jito i nuū rī, achí yá.

Najehē ni tee Juan libro yáha

³⁰ Te suni ni sáha Jesús cuehē gā jniñu jéhnū jeē ni stéén yā poder yā nuū tēe cáscuáha jíin yá, jeē tu yósó núu tūtu yáha. ³¹ Te tācá jniñu yáha ní tee ri návāha candíje ró jijnáhan ró jēe Jesús cúu Cristo, maá Séhe Yaā Dios. Chi jeē candíje ró yá, te cotecu rō ñí cáni sáha ya.

Jeē ní nane ya nuū uxá tēe cáscuáha jíin yá

21

¹ Te ni cuu jecu quívī, te inga jínu ni nane Jesús nuū tēe cáscuáha jíin yá, jeē cáhiin de yumar Tiberias. Te suhva ni steén yā maá yá nuū de: ² Cáhiin tūtú Simón Pedro, jíin Tomás, tēe ni cacu cuatí, jíin Natanael, tēe ñuu Caná ndañū Galilea, jíin ndindúú séhe Zebedeo, jíin úu gā tēe cáscuáha. ³ Te ni cahān Simón Pedro jíin de jíin de:

Quíjnī ri chācá.

Te ni cacahān de:

Suni quingoo ri jíin ró.

Te cuango de, te ni quívicoo de ñin barco. Te tu ní cániñin cuiti de ti jecuáa yúcuán.
⁴ Te jeē cuácundijin, te íne Jesús yumar. Te tēe cáscuáha ún, tu ní cánacuni de jeē maá yá cúu. ⁵ Yūcuán na te ni cahān yā jíin de:

Aá rō jijnáhan ró, ¿á ní canihñin rō chācá caji yō?

Te ni cacahān de:

Tú cuiti, achí de.

⁶ Yūcuán na te ni cahān yā jíin de:

Síngava ñunu ró ichi lado váha barco, te nihñin rō tī.

Te ni casíngava de ñunu, te tuá ní cúu cuiti natava de, jeē ni quívicoo cuehē ndasí cháca. ⁷ Yūcuán na te tēe scuáha jeē maní gā Jesús jíin, ní cahān de jíin Pedro:

Máa Jítoho yō cúu, achí de.

Te jeē ní jini sōho Simón Pedro jeē maá Jítoho yō cúu, te ni nachuhun de sahma de, chi ni tava de jeē sájniñu de. Te ni ndava-ni de nuū mar cuahān de nuū yā. ⁸ Te tāca gá tēe cáscuáha ún, vendicoo de jíin barco yundúte, cástaa de ñunu ñúhun chitú cháca. Chi tu jíca cáñin de jíin ñuhun íchi, chi nájnūhun ciento-ni metro cúu. ⁹ Te nuū ní quendacoo de ini barco, te ni cajito de jeē nduhvá tīcua ñuhñ, te íne staā jíin ñin chācá chíhyó. ¹⁰ Te ni cahān Jesús jíin de:

Cuáquihñ jecu chācá jēe sa ní cajniñ ró, na táu yó, achí yá.

¹¹ Te ni quívi Simón Pedro ini barco, te ni stāa de ñunu, ni quee de jíin ndé nuū ñúhun íchi. Te ñúhun chitú cháca náñnu, ñin ciento uū xico uxí uní tī cúu. Te vēsú ñin súcuán ti ñúhun, te tu ní táhndé ñunu. ¹² Te ni cahān Jesús jíin de:

Nehen jijnáhan ró na cási ni yō.

Te ni ñin tēe cáscuáha ún tu ní cúndeyí ni de cajnūhún de ya núu ndé ñin cúu ya. Chi je cájini de jeē maá Jítoho yō cúu ya. ¹³ Te ni quindēhe Jesús yuñúhún, te ni quihñ ya staā ún, te ni jēhe ya nuū de, te suni súcuán chācá un.

¹⁴ Yāha cúu vuelta uní jeē ní nane Jesús nuū tēe cáscuáha jíin yá, ná ni natecu yā.

Jeē ní ndajnūhún Jesús jíin Simón Pedro

¹⁵ Te nuū ní cuu ni cajesi ni de, te Jesús ni cajnūhun yá Simón Pedro:

Simón sēhe Jonás, ¿á mánī gā rō jíin rí vēsú tāca gá tēe yāha?

Te ni cahān de:

Je jíiní ni jēe maní na jíin ní, achí de.

Te ni cahān yā jíin de:

Núu súcuán te stēén rō jnūhun ri nuū ñáyuu cácuu nájnūhun londe ri.

¹⁶ Te ni cajnūhun yá de vuelta uū:

Simón sēhe Jonás, ¿á mánī rō jíin rí?

Te ni cahān de jíin yá:

Je jíiní ni jēe maní na jíin ní, achí de.

Te ni cahān yā:

Condito ró ñáyuu cácuu nájnūhun lanchi ri núu súcuán.

¹⁷ Te ni cajnūhún tucu ya de vuelta uní:

Simón sēhe Jonás, ¿á mánī rō jíin rí?

Te ni cucuíhyá ni Pedro jeē ní cajnūhun yá de vuelta uní núu maní de jíin yá. Te ni cahān de:

Máa ní jíiní ni ndihñ, te jíiní ni jēe maní na jíin ní.

Te ni cahān yā:

Núu súcuán te stēén rō jnūhun ri nuū ñáyuu cácuu nájnūhun lanchi ri. ¹⁸ Te jendaá cahán rí jíin ró jeē nde ná suchí ró, te ni quihñ máa ró sahma ró, te ni jica ró ndé nuū cuní maá ró. Te núu na yí ró, te nasūu jēe cuní maá ró, chi ñnga ñayuu quindēca i róhó nuū tu cuní rō quihñ rō. Te scáa rō ndindúu ndaha ró jēe cuu rō.

¹⁹ Jnūhun yāha ní cahān yā jeē ni stēén yā jeē cóndita caa de jíicā cruz cuu de, te jeē súcuán cuatáhú de cúu jeē steén de jeē yóhyo cújéñnu Yaā Dios. Yūcuán na te ni cahān gā yā:

Condiquīn rō ruhū jeē sāha ró jniñu ní ndacu ri nuū rō, achí yá.

Jnūhun tēe scuáha jeē maní gā yā jíin

²⁰ Te ni ndió cóto Pedro, te ni jito de tēe scuáha jeē maní gā Jesús jíin, ndíquín de vēji de yatā. Tēe un cúu jeē ní conene xiin Jesús ná ni cacuxíni de jíin yá, te ni cajnūhún de ya: ¿Ndé ñin de cúu jeē nastúu níhín? ²¹ Te jeē ní jito Pedro nuū tēe ún, te ni cajnūhún de Jesús:

Te tēe yáha, ¿ndese coo jíin de?

²² Te ni cahān Jesús:

Núu cúní rī jeē cótecu de nde quivī ndíji ri, ¿te naun ndíhví ni rō? Máá ró chi condiquīn rō ruhū jeē sāha ró jniñu ní ndacu ri nuū rō, achí yá.

²³ Yūcuán na te jnūhun yáha ní jitē núu nuū tācá hermano, jeē tēe scuáha un má cúu de. Te tu ní cáhán Jesús jeē ma cúu de, chi sa suhva ni cahān yā: Núu cúní rī jeē cótecu de nde quivī ndíji ri, ¿te naun ndíhví ni rō?

²⁴ Te tēe scuáha un jēe maní gā Jesús jíin, suu cúu ruhū jeē nácani jnūhun tācá jniñu yáha, te suu ri tēe tāca jnúhun yáha. Te cájini rō jijnáhan ró jēe iyó ndāā jnūhun nácani ri.

²⁵ Te suni íyó cuéhē ndasí gá jniñu ní sāha Jesús. Te núu tee yó ná ñin ná ñin, te ma cánda ní ñáyiví cuhun tutu jeē cóso jnūhun ún, jéni ni rī. Te ni cuu. Amén.

JNIÑU JEHNU JEE NI CASAHA TEE APOSTOL

Jeē ni jéjnūhun ya quiji Espiritu Santo

¹ Amigo Teófilo, nuū tútu jeē ní tee ná xihna gā ni castūhun ná nuū ni táca jniñu ní sáha Jesús, jíin táca jnúhun ni steén yā nde quivī ní quejéé yá ni sáha ya ² te nde quivī ní ndaa ya cuanuhun yā andiví. Te nde ná tu ndaa ya quihīn yā, te ni sáha Espiritu Santo jeē ní ndacu ya jniñu nuū táca apóstol, tēe ni nacāji ya. ³ Te nuū ni jínu ni ndoho ya jeē ni jíhī yā, te uū xico quivī te tijni jínu ni steén ndijin yā maá yá nuū téee un jíjnáhan de, te súcuan ni cajini de jeē iyó ndāā jeē ní natecu yā. Te ni cahān yā jíin de siquī ndese ndácu Yaā Dios jniñu.

⁴ Te ná cáhiin tútu de jíin yá, te ni cahān yā jíin ndihī de jeē ma quéndacoo de ini ñuu Jerusalén, chí áchí yá:

Condetu ró ndé quee Espiritu Santo jeē ni jéjnūhun máá Tátá rī Yaā Dios. Chi je ni cachi rī nuū rō jeē ni jéjnūhun ya quiji Espiritu Santo. ⁵ Chi Juan, jendaá jeē maá ndute-ni ni scuándute de ñayuu. Te róhó jíjnáhan ró, jecu na quivī te nájnūhun cuandute ró jíin Espiritu Santo, cúu jeē condee yā ini anuá rō, achí yá.

Jeē ní ndaa Jesús cuanuhun yā andiví

⁶ Yūcuán na te tēe cáhiin tútu jíin yá, ni cacajnúhún de ya:

¿A vijna te nasáha ní jéē ñáyuu ñuu yō Israel ndujéhnu i ndacu i jniñu nuū nación yō chí naún? áchí de.

⁷ Te ni cahān yā:

Ma cúu cuni rō quivī chí cuíyā jeē cóo jeē ni sándaā maá Tátá rī, chí máá ñin-ni máá yá jiní yā na quivī sáha ya. ⁸ Te jeē cúni rō cúu jeē quee Espiritu Santo te condee yā ini anuá rō jíjnáhan ró. Yūcuán na te nihīn rō poder te nacani ró jnúhun ri ní ini ñuu Jerusalén, ní Judea, ní Samaria, nde ní cáhnu ñayiví, áchí yá jíin de.

⁹ Te ni ndihī ni cahān yā táca jnúhun yáha. Te ní ní cájito de nuū yā, te ni ndaa-ni ya cuanuhun yā andiví. Te ni quee vicō ni jesi-ni nuū cuahán yā, te tuá ni cájito de ya. ¹⁰ Te ní ní cáhiin de cájito ndaa de ichi ándiví núu ní ndaa ya cuahān yā, te uū jnáhan ndajéhé yā cáñūhun ya sahna cuijín ní cajecuiñī yā xiin de jíjnáhan de, te cájito ya nájnūhun tēe.

¹¹ Te ni cacahān yā jíin de:

Róhó téee Galilea, ¿najehē cájito ndaa ró ichi ándiví? Chi máá Yáā Dios ni naquihin ya Jesús cuanuhun yā andiví, te suni súcuan ndiji ya nájnūhun cájito ró cuáhān yā andiví, áchí yá.

Jeē ní canacāji de Matías jeē nucuiñī de nuū Judas

¹² Yūcuán na te ni nanungoo de yucu jeē naní Olivos, cuanungoo de ñuu Jerusalén. Te yajni-ni íne yucu un jíin ñuu Jerusalén, nájnūhun ñin kilómetro-ni, cūhva jeē ni jéhe ley permiso caca ñayuu quivī ndétātú. ¹³ Te ni ndivícoo de ini ñuu. Te ni ndacoo de cuarto xiní véhe nuū cáyūcu núu de. Te táca de cúu Pedro, Jacobo, Juan, Andrés, Felipe, Tomás, Bartolomé, Mateo, Jacobo sēhe Alfeo, Simón jeē cúu jnáhan grupo cananista, jíin Judas ñani Jacobo. ¹⁴ Táca téee yáha, ní ní cándutútú inuú de cájicān tahu de jíin táca ñani Jesús jíin náná yā María jíin sava ga ñahan.

¹⁵ Te ñin quivī te ni jecondichi Pedro nuū táca hermano cá candíje. Te cáhiin nájnūhun ciento ocō ñayuu. Te ni cahān de:

¹⁶ Hermano jíjnáhan ní, ni squícu nahín jnúhun cáhán tutu iī jeē ni cáhān David nde jenahán ní sáha Espiritu Santo. Te jnúhun un ní cuu siquī Judas jeē ní yosnūu núu téee ni cajniñi Jitoho yō Jesús. ¹⁷ Te suu tēe un ní jica de jíin yó, te ni chindéé ñáhán jnáhan de jíin yó siquī jniñu ní jeni ya yohó. ¹⁸ Te ni cajeen ñin ñuhun jíin xúhun ní nihīn tēe un síquī jniñu neé ní sáha de. Te ni ñinga ndeyi de, te ni ndatā sáva chíji de, te ndihī yiti de ni jitē. ¹⁹ Te ni jitē jnúhun yáha núu táca ñáyuu cáyūcú ñuu Jerusalén, te jeē yúcuán

cúu jeē ní casnání i ñuhun ún Acéldama nuū yúhu máá i, jeē cuní cahān ñuhun jeē cúu cuenta niñī. ²⁰ Chi súcuan je yósó núu tútu Salmo siquī Judas:

Vehe de na quéndōo iyú,

te ma cóndee ni ñn ga ñayuu ini vehe ún.

Te suni cáhán:

Jniñu ní condiso de na cóndiso inga tēe.

Achí.

²¹ Núu súcuan te jíni ñúhún jéē núcuiñī ñn tēe lugar maá de jíin yó. Te tēe nucuñī jíin yó un, nacāji yó de mēhñu táca tēe ni cajica jíin yó tāca quívī jeē ní jica máá Jítoho yō Jesús jíin yó. ²² Te tēe nacāji yó un cúu tēe jeē ni íyo de jíin yó nde quívī ní jendute ya ni sáha Juan, te nde quívī ní ndaa ya cuanuhun yā andiví. Te tēe nucuñī jíin yó na cúu de testigo jíin yó jeē jé ni natecu yā, achí de.

²³ Te ni catee nuū de uū jnáhan tēe: Matías jíin José jeē naní de Barsabás te suni nání de Justo. ²⁴ Te ni cajicān tahu de:

Tátā Yaā Dios, máá ní chi jíni ni ndese cáa ánuá tāca ñáyuu. Núu súcuan te jeē ndindúu tēe yáha, stéén ni ndé ñn de cúu jeē ní nacāji ní. ²⁵ Te condiso jniñu de cuu de apóstol. Te naquihin de jniñu ní stóo Judas, chi ni sáha de cuēchi te cuahān de lugar xeēn nuū cánuú quihñ de, achí de.

²⁶ Yūcuán na te ni casáha de ñn sorteo te ni jinū Matías, te ni nucuñī de ni nduu de jnáhan ndihúxi ñn apóstol.

Jeē ní quee Espíritu Santo

2

¹ Te máá quívī víco Pentecostés ni cahīin tútu ñáyuu cácanđije ñuu Jerusalén. ² Te sanaa-ni te ni quejéé ñhñ vēji nde andiví nájñuhun tachī níhñ quee, te tāca ñáyuu jeē cáyūcú ini vehe un ní cajini sōho i jeē ñhñ ún. ³ Te ni cajito i nájñuhun yáñuhñ jeē ní cajitē núu te ni cacucōo xinī ná ñn ná ñn i. ⁴ Te ndihí i, ni cunuú Espíritu Santo jíin i, te ni quejéé i cácahān i sññ sññ yuhu, ndese ni steén maá Espíritu nuū ná ñn ná ñn i cahān i.

⁵ Te ñuu Jerusalén, suni cáhīin ñayuu hebreo, yññuhñ núu Yaā Dios, jeē ní quijicoo i nde tācá nación ññ cáhñu ñayiví. ⁶ Te jeē ni ñhñ súcuan te ni cacutútú cuéhē ñayuu ún. Te ni cunéé íi ni i jíjnáhan i, chi ná ñn ná ñn i ni cajini sōho i jeē tēe ni canihñ Espíritu Santo cácahān de jñuhun yuhu ñúu jicá nuū véji i. ⁷ Te ni canaa ni i cájito i te ni cacahān i:

¿A násūu tēe Galilea cácuu tāca tēe yáha jéē cácahān de tācá yuhu ñúu nuū véjicoo yó? ⁸ ¿Na vé ni cuu yáha núu súcuan? Chi ná ñn ná ñn yó cájini sōho yó cácahān de jñuhun yuhu ñúu nuū ní cacacu yó. ⁹ Chi vėjicoo yó ndé tācá ñuu jicá. Sava yó véji nde Partia jíin Media jíin Elam. Te sava ga yō vėjí yó ndé Mesopotamia jíin Judea jíin Capadocia jíin Ponto jíin Asia. ¹⁰ Suni nde Frigia jíin Panfilia jíin Egipto jíin tijñi ñuu jeē íne nde yatā gā ñuu Cirene ñuhun Africa vėjicoo yó. Te sava ga yō nde ñuu Roma vėjicoo yó, te cáyūcu jínu-ni yó yáha. Te máá yó jeē vėjicoo ñuu Roma, sava yó cácuu máá ñáyuu hebreo te sava ga yō cácuu ñayuu sññ ñuu, ni cacandije yó ndíquín yō ley ñayuu hebreo. ¹¹ Suni nde Creta jíin Arabia vėjicoo sava yó. Te cájini sōho yó jéē jíin jñuhun yuhu ñúu ná ñn ná ñn máá yó cácahān de tācá jniñu jéhñu ní sáha Yaā Dios, achí i.

¹² Te ndihí i chi ni canaa íi ni i cájini nahín i. Te ni candajnūhñ i jíin jnáhan i:

¿Na vé cúu jeē ní cuu núu súcuan jeē cácahān de yuhu ñúu yō? achí i.

¹³ Te sava i ni cacahān catá i:

Tuú chi jeē cánajini de, achí i.

Jeē ní nacani Pedro jñuhun nuū ñáyuu

¹⁴ Yūcuán na te ni candocuiñī Pedro jíin ndihúxi ñn ga apóstol, te ni cahān jee Pedro jíin ñáyuu ún:

Níhín jnáhan ñuu yō hebreo, jíin ndíhi níhín jéē cáyūcu ní Jerusalén, jnūhun yáha na chūhun ni ni jijnáhan ní, chi cuni nahín ní cahān na jíin ní. ¹⁵ Chi máá ná jijnáhan ná, nasūu jéē cájini ná nájñūhun cájeni ni ní, chi sáá cahān jenéhen cúu, te nasūu hora cánajini ñayuu cúu. ¹⁶ Chi sa suhva squícu jniñu yáha nájñūhun ni cahān Joel, tēe ni nacani jñūhun Yaā Dios nde jenahán, chi súcuan ni cahān de:

¹⁷ Achí Yáā Dios: Quiivī sándihí na te tají rí Espíritu rī cunuú yá jíin táca ñayuu, te sēhe yíí ró jíin séhe síhí ró, nacani i jñūhun ri, te tāca tēe lulí chi coto ndijin de jeē steén rī nuū de, te tāca tēe jéhnū chi sáha ri jeē scóto jēni de.

¹⁸ Te quiivī ún chi tají rí Espíritu rī cunuú yá jíin táca mozo rī, cúu tēe cúu ñahan, te nacani i jñūhun ri.

¹⁹ Te ichi ándiví sáha ri jniñu jéhnū jeē náā ni ñayuu coto i, te sáha ri jniñu jéhnū ini ñayiví jéē steén jeē kujéhnū ri, chi coo niñí jíin ñúhūn jíin ñúhmā nájñūhun vicō. Yūcuan cúu jeē sáha ri jeē cóo jñūndóho xeēn.

²⁰ Te nduu jnúú níandii te ma cundijin gā, te yoō coto cuéhé nájñūhun niñí.

Yūcuán na te quee quiiví jeē ndíji máá Jítóho rō Jesús.

Quiiví ún coo cuéhé jniñu jéhnū, te cuni ndíhi ñayuu jeē quiiví máá Jítóho rō cúu.

²¹ Te tāca ñayuu jeē cahān ndahú i jíin yá te jnama ya i, áchí Yáā Dios.

Achí Joel ni nacani de jñūhun ya.

²² Jeē yúcuán níhín tēe ñuu yō Israel, cuni nahín gá ni jnúhun yáha jijnáhan ní. Ni steén Yaā Dios jeē ní tají yá máá Jesús, Yaā ní jehnu ñuu Nazaret, chi máá Yáā Dios ni jēhe ya jeē ni sáha Jesús jniñu jéhnū mēhñu máá ní, jíin jniñu jeē steén jeē kujéhnū ya, te jniñu un ní canaa ni ni ní cajito ní. Te je cájini vāha ní jéē súcuan ni cuu. ²³ Te máá ní ni cajniñí ní yá, te ni cajendēca ní yá nuū tēe xeēn ni cajehni de ya jicā cruz ni casáha ní. Te nde jíin tiempo je ni jini Yaā Dios jeē súcuan sáha ní jijnáhan ní, chi súcuan je ni sándaā yā. ²⁴ Te ni nastécu Yaā Dios Jesús te tuá ni cúu ya ndīyi, chi jñūhun xeēn jeē jihí ñayuu, tuá na vé cúu ga sáha jíin yá. ²⁵ Chi nde jenahán suhva ni tee David jñūhun ndese ni cahān Jesús jíin Yáā Dios:

Jíní na núū máá ní jeē cúu ní Jítóho ná, chi níí cáni ndéé ní jíin ná,

chi ndéé ní ichi ndáváha ná, cúu jeē chindéé ñáhán ní sāña návāha coo ndeyí ni ná.

²⁶ Jeē yúcuán cúsiñí ni ná te cáhán na jnúhun síñí ni.

Jeē yúcuán ma nácani uhū ni na síquī jnúhun cuu ná.

²⁷ Chi ma cuáha ni jnúhun quendōo ánuá na lugar nuū cáyūcu ánuá ndīyi, ni ma cuáha ni jnúhun tehyū ná, chi jéjníñu ná núū ní te maní ni jíin ná.

²⁸ Te ni steén ni núū na jéē nátecu ná,

te sáha ní jéē cusíñí teyí ni ná condee na jíin ní níí cáni.

Achí Jesús, ni achi David.

²⁹ Tāca níhín jijnáhan ní, na cástūhun cájí ná nuū ni jnúhun jíí yō David, chi tu ní cáhán de jñūhun yáha síquī máá de. Chi ni jihí de te ni quindūji de, te jíní yō nuū yíndūji de nde vijna. ³⁰ Chi ni cuu de tēe ni nacani jñūhun Yaā Dios nde jenahán. Te ni jini de jeē váha ni jejnūhun ya nuū de jeē chíji yucūn máá de quiji Cristo, te condee yā mesa de ndacu ya jniñu nájñūhun ni ndacu de jniñu jeē ní cuu de rey. ³¹ Te nde jíin tiempo ni jini de jeē nátecu Cristo, te ni cahān de jeē anuá yā, ma ndóo lugar nuū cáyūcu ánuá ndīyi, ni yíqui cúñu yā ma tehyú. ³² Chi Yaā Dios ni nastécu yā Jesús, te máá ná cácuu ná testigo jeē ní natecu yā. ³³ Te ni ndujéhnū tucu ya ni sáha Yaā Dios jíin poder yā. Te nde nuū máá Yáā Dios, Yaā cúu Tátá yā, ni nihín Jesús Espíritu Santo, chi súcuan ni jejnūhun ya. Te ni tají Jesús Espíritu Santo, te suu ya sáha jniñu jeē cájito ní te cájini sōho ní vijna.

³⁴ Te David, nasūu síquī máá de ní cáhán de tāca jnúhun yáha, chi tu ní ndáa yíqui cúñu de andiví. Chi síquī Cristo cúu jeē ni cáhán de suhva:

Máá Yáa Dios ni cahān yā jíin Jítóho rī Cristo:
Cucōo ró ichi ndávāha ri jeē steén jeē kujénu ró.

³⁵ Te na sáha ri jeē quende rō poder tāca jéē cájito uhū rohó, áchí yá.

Achí David.

³⁶ Núu súcuan te ndíhi ní jéē cácuu yó ñayuu Israel, na cúni vāha ní jéē vésú ni cajehni ni yá jicā cruz, te Yaā Dios ni jeni ya maá Jesús jeē cúu ya Jítóho yō te suni cúu ya Cristo, Yaā jnáma yóhó, áchí Pedro jíin i.

³⁷ Te jeē súcuan ni cajini sōho i jnūhun yáha, te ni cajnahuhū ni anuá i. Te ni cacajnūhún i Pedro jíin tāca gá apóstol:

¿Te ndese sáha ná jíjnáhan ná núu súcuan? áchí i.

³⁸ Te ni cahān Pedro jíin i:

Nacani ni ní jéē stóo ní cuéchi ní jíjnáhan ní, te cuandute ní jéē ní cacandíje ní Jesucristo, návāha cone cáhnu ni Yaā Dios nuū cuéchi ní, te cuāha Yaā Dios Espíritu Santo yā condee yā ini anuá ni. ³⁹ Chi súcuan ni jejnūhun máá Tátá yō Yaā Dios nuū yō jíin núu séhe yó, te suni súcuan ni jejnūhun ya nuū ñáyuu tāca gá nación, tācá i jeē cána ya i candíje i.

⁴⁰ Te jíin cuéhē gā jnūhun súcuan ni cahān cají Pedro, te ni stíhví ni de i:

Nducú ndéyí ní jeē na cácu ní, chí jnahnū ndetū ñayuu casáha jniñu néé, áchí de.

⁴¹ Yūcuán na te tācá i jeē ní cajetáhú jnūhun ni cahān de, ni cajendute i. Te quiví un ní nducuehē gā ñayuu cácandíje, nájnūhun unī mil gā ñayuu. ⁴² Te ni cahíin níhin i síquī jnūhun cástéén apóstol. Te inuú-ni cándajnūhun mání i te cájicān tahu i, te ñin cáhnu-ni cáyeji i pan, nájnūhun ni steén maá Jítóho yō jeē núcūhun ni yō síquī yā.

Ndese ni coyūcu ñáyuu jeē ní cacandíje jeē xíhna ñúhún

⁴³ Te ndíhi ñayuu ni cayūhú i ni cajito i, chí cuehē jniñu jénu jeē steén jeē kujénu ya ni casáha tēe apóstol. ⁴⁴ Te inuú ní cahíyo ni ñayuu cácandíje, te ni cacuu inuú i tāca jéē cánevāha i. ⁴⁵ Te ni caxícó i na-ni na vé cánevāha i, te ni casaja i xūhún un núu tāca jnáhan i, núu ndese jíni ñúhún ñin ñin i. ⁴⁶ Te ndijnahan quiví ni candutútú i ini templo. Te maní ni cayeji cáhnu i pan tācá vehe jnáhan i nájnūhun ni steén yā, te ni cahíyo síñ ni i. ⁴⁷ Te ni cacahān i jeē yóhoyo cújénu Yaā Dios. Te ndíhi ñayuu ñuu un ní cajejnūhún i ñayuu cácandíje. Te ndijnahan quiví ni jnama Jítóho yō sava ga ñayuu, te ni nduu inuú i jíin ñáyuu cácandíje.

Jeē ní nduvāha tēe ríngo

3

¹ Te ñin quiví te máá cáhuní jehíni ni caa Pedro jíin Juan cuango de templo, chí hora un cájicān tahu jnáhan de hebreo. ² Te cájendēca ñayuu ñin tēe cáríngo nde quiví ní cacu de. Te tēe un ndéé de ndijnahan quiví yehyí templo jeē naní Hermosa, jícan de caridad nuū tāca ñáyuu quívicoo ini templo. ³ Te tēe un ní jito de nuū Pedro jíin Juan jeē véji de quívicoo de ini templo, te ni jicān de caridad nuū Pedro jíin Juan. ⁴ Te Pedro jíin Juan ni cajito vāha de nuū tēe ún. Te ni cahān Pedro jíin de:

Condēhe núu rī jíjnáhan ri, achí de.

⁵ Te máá tēe un ndétu tūhva de, ni jeni ni de jeē cuáha Pedro jíin Juan jecu xūhun núu de. ⁶ Te ni cahān Pedro:

Tú na xūhun plata ni xūhun oro cánevāha ri. Te íyó ñin jeē váha ga sáha ri jíin ró: jíin poder maá Jesucristo, Yaā ní jehnu ñuu Nazaret, cáhán rī jíin ró, ndocuiñí te caca ró, áchí de.

⁷ Te ni jniñ de ndavāha tēe ún, te ni ndonehen de. Te jehē de jíin súcūn jehé de ni nduvāha-ni. ⁸ Te ñin ni scánda de máá de ni ndocuiñí de, te ni quejéé de jíca de. Te ni quiví de jíin Pedro jíin Juan ini templo, jíca de, cánda de, te nácuatáhú de nuū Yaā Dios.

⁹ Te ni cajini tāca ñáyuu jeē jíca de te nácuatáhú de nuū yā. ¹⁰ Te ni canacuni i de jeē maá de cúu tēe ni condee yehyí templo jeē naní Hermosa, ni jicān de caridad. Te ni canaa ni i ni cajito i, te ni cayūhú i cájito i jeē ní nduvāha tēe ún.

Jeē ní nacani Pedro jnūhun ini corredor jeē naní Salomón

¹¹ Te tēe ni nduvāha ún, tu siáá de Pedro jiín Juan. Te ni cacutútú-ni cuehē ñayuu nuū de ini corredor jeē naní Salomón, te ni canaa ni i cájito i. ¹² Te ni jito Pedro jeē ní cutútú ñayuu ún, te ni cahān de jíin i:

Níhín tēe ñuu yō Israel jijnáhan ní, ¿najehē cánaa ni ni cájito ní jniñu yáha? ¿Najehē cájito ní núu ná te cájeni ni ni jēe maá ná jijnáhan ná íyó poder na jēe sáha ná jēe nácaca tēe yáha? ¿Chí ní nduvāha de siquī jeē tēe cájica ndaā cácuu ná cájeni ni ní? ¹³ Tuú chi máá Yáa Dios jíi yō Abraham jíin Isaac jíin Jacob jíin táca gá jíi yō, ni sáha ya jniñu yáha návāha cuni ñayuu jeē kujéhnū Sēhe ya Jesús, Yaā jeē ní cajendēca ní núu tēe cácujuhū. Te ná ni cuni Pilato jeē siaá de ya, te tu ní cájēhe ni jnūhun. ¹⁴ Te ni casquéhichí ni yá vēsú cúu ya Yaā ndaā, Yaā ii. Te sa suhva ñin tēe jéhnū ndīyī ni cacahān ni jíin Pilato jeē na siáá de. ¹⁵ Te ni cacahān ni jēe na cúu Yaā jeē sáha jeē técu ndīhi-ni. Te Yaā Dios ni nastécu yā Jesús jeē ní cuu ya ndīyī, te máá ná cácuu testigo jeē ní natecu yā. ¹⁶ Te tēe yáha jēe cájito ní te cánacuni ní de, ni candíje de jíin ná jeē iyó poder Jesús nasávāha ya de, te jeē yúcuan ní nasávāha ya de. Te jeē súcuan ni cacandíje ná ní sáha ya, jeē yúcuan ní nduvāha vāha de nájnūhun cájito ndīhi ní.

¹⁷ Te na cástūhun ná nuū ni jíináhan ní, je jíiní na jēe maá ní jíináhan ní jíin tēe cácujuhū nuū yō, tu ní cájecūhun ni ní, te jeē yúcuan ní cajehni ni yá. ¹⁸ Te súcuan ni squícu jnūhun ni cahān Yaā Dios nde jenahán jēe cánuú ndoho Cristo siquī cuéchi ñayuu, chi ni sáha ya jeē súcuan ni cacahān tēe ni canacani jnūhun ya nde jenahán. ¹⁹ Te na nácani ni ni jēe stóo ni cuéchi ní, te nasāma ini ní, te quivícoo ní ndaha Yaā Dios návāha ndahva yā cuéchi ní. Te quee quivī jeē ndúsī ni ni sáha máá Jítóho yō. ²⁰ Te natají yá Jesús ndiji ya, chi cúu ya Cristo, Yaā ní jeni Yaā Dios jeē jnáma ya yohó. ²¹ Te jíiní ñúhún jēe cóo ya andiví ndé nasájeé yá táca jēe iyó, nájnūhun ni cacahān tēe ndoo ni canacani jnūhun nde jenahán ní sáha Yaā Dios. ²² Chi suhva ni nacani jíi yō Moisés jnūhun nuū táca jíi yō: Máá Jítóho yō Yaā Dios cani ya Yaā nacani jnūhun nuū rō jijnáhan ró, nájnūhun ni jeni ya ruhū. Te cuu ya ñin jnáhan ñuu yō. Te na chúhun ni rō táca jnūhun jeē nácani ya ún. ²³ Te núu ndé tēe tú chuhun ni de jnūhun cahān yā, jnahnū ndetū de, te ma cúu ga de jnáhan ñayuu yā Israel, áchí Moisés.

²⁴ Te táca tēe ni canacani jnūhun nde jenahán, nde tiempo ni quiji Samuel te ní gá nde vijna, suni ni canacani de jnūhun siquī táca jniñu cúu quivī yáha. ²⁵ Yucūn maá tēe ni canacani jnūhun ya nde jenahán cácuu yó, te suni siquī maá yó jijnáhan yó cúu jeē ni sáha Yaā Dios contrato jíin jíi yō. Chi ni cahān yā jíin Abraham: Yucūn maá ró cane Yaā sáha jeē quéndōo ndetū táca ñayuu ní cáhnu ñayivī, áchí yá. ²⁶ Te jeē ní nastécu Yaā Dios Sēhe ya, te ni quiji ya nuū maá yó xíhna gā, návāha quéndōo ndetū yō sáha ya, chi sama ya anuá yō jeē ma sáha ga yō jniñu neé, áchí Pedro.

Jeē ní cajendēca de Pedro jíin Juan nuū tēe cácujuhū

4

¹ Te Pedro jíin Juan níiní cácahān gā de jíin ñayuu ún te ni quecoo táca sūtū jíin tēe grupo saduceo, jíin tēe cácujuhū nuū tēe cándito templo. ² Te yōhoyo ni caquítī ni de siquī jeē castéén Pedro jíin Juan nuū ñayuu, jíin jēe cánacani de jnūhun jeē nátecu ndīyī chi je ni natecu Jesús. ³ Te ni cajniñi ún de, te ni cachuhun ún de vecāa cone de nde cundijin inga quivī, chi je ni ini. ⁴ Te cuehē ñayuu jeē ní cajini sōho jnūhun ni cacahān Pedro jíin Juan ni cacandíje i. Te ni nduu nájnūhun uhūn mil jeē maá nene tēe jeē ní cacandíje.

⁵ Te jeē ní cundijin inga quivī ún, te tēe cácujuhū nuū ñayuu hebreo jíin tēe jéhnū cándiso jniñu jíin tēe cástéén jnūhun tutu ley yā, ni candutútú de ini ñuu Jerusalén. ⁶ Te suni ni candutútú de jíin Anás jeē cúu sūtū kujéhnū ga, jíin Caifás jíin Juan jíin Alejandro jíin táca gá jeē cácuu jnáhan sūtū kujéhnū ga ún. ⁷ Te ni candacu jniñu jeē na quíjicoo Pedro jíin Juan condichi de mēhñú, te ni cacajnūhún de:

¿Ndé ñin ni tejniñu róhó te ndese ni nihīn jniñu ró ní sáha ró jēe nduvāha tēe yáha? áchí.

⁸ Yūcuán na te Pedro chi ni cunuú maá Espíritu Santo jíin de, te jíin poder yā ni cahān de jíin táca tēe ún:

Tāca nīhín tēe cácujuhnu nuū nūū yō Israel jíin táca nīhín tēe jéhnū cándiso jníñu,

⁹ vijna te cástíhí ni sáña síquī ñn jniñu váha ní casáha ná jēe ní nduvāha tēe cúhú yāhá.

¹⁰ Te na cástūhun ná nuū nīhín jēe cácujuhnu ní, návāha suni cuni ndīhi jnāhan ñuu yō Israel jeē jíin poder maá Jesucristo, Yaā ní jehnu ñuu Nazaret, ni nduvāha tēe índichi nuū ni yáha. Te suu ya cúu Yaā jeē ní cajehni ni jícā cruz, te ni sáha Yaā Dios jeē ní natecu yā. ¹¹ Jesús cúu nájñūhun yuū cimientu jeē quítuu vehe. Te máá ní jijnáhan ní cácuu nájñūhun tēe casáha vehe, te ni casquéhichí ni yá nájñūhun jeē cátejiyo ní yūū, chi tu ní cácañdije ní yá. Te ni sáha Yaā Dios jeē cúu ya nájñūhun yuū cánuú gá jeē quítuu vehe. ¹² Te tú cuiti inga jeē cúu jnama yóhó, chi tuá na inga jeē cujéhnū ní jeni Yaā Dios ini ñayīvi yáha jēe cúu jnama yóhó, áhí Pedro.

¹³ Yūcuán na te ni cajini un jēe Pedro jíin Juan jéhnū-ni cácahān de. Te je cájini jeē tú tūhva de, chi tēe súcuan-ni cácuu de. Te ni canaa ni cájito nuū de, te ni casáha cuenta jeē ní cajica de jíin Jesús. ¹⁴ Te cándēhe nūū tēe ni nduvāha un, índichi de jíin Pedro jíin Juan, te tu ní cániñn gā modo ndese ga cahān. ¹⁵ Yūcuán na te ni candacu jniñu jeē na quéndacoo sñn de yatā véhe juzgado te ndajñūhun máá jijnáhan. ¹⁶ Te ni cacahān:

¿Nde se sáha yó jíin tēe yáha núu súcuan? Chi ni jitē jñūhun yáha núū tāca ñayuu ñuu Jerusalén jeē súcuan ni casáha de ñn jniñu jéhnū, te ma cúu cahān yō jeē tu íyó ndāā.

¹⁷ Te návāha ma cuité ga jñūhun yáha, na cúxeēn yō nuū de jeē ma cahán cuiti gā de jñūhun Jesús nuū ní ñn ñayuu, áhí.

¹⁸ Te ni cacana ún de, te ni cacahān nīhin jíin de jeē ma cahán cuiti gā de jñūhun Jesús ni ma steén gā de jñūhun un núū ní ñn ñayuu. ¹⁹ Yūcuán na te ni cacahān Pedro jíin Juan:

Cani vāha ni ní te núu nújnahan ni Yaā Dios jeē stóo ná jniñu ní ndacu ya jeē sáha ná te cuandije ná máá na jniñu nándacu ní. ²⁰ Chi ma cúu stóo ná jniñu jeē nácani ná jñūhun ní cajini sōho ná jíin jniñu ní cajito ná, áhí de.

²¹ Yūcuán na te tēe ni cacutútú un ní cacuxeēn tucu de nuū Pedro jíin Juan. Te ni casiáá de cuango de, chi tú cuiti na modo stóho de chi cáyūhu cájito ñayuu, chi síquī jniñu jéhnū ni cuu ún te ndīhi i cácahān i jeē yóhoyo cújéhnū Yaā Dios. ²² Chi tēe jeē ní sáha ya jniñu jéhnū jíin de jeē ní nduvāha de, víhyá gā uū xico cuiyā de.

Jeē ní cajicān tahú ñayuu cácañdije

²³ Te ná ni casiáá un Pedro jíin Juan cuango de, te ni najinūcoo de nuū tāca gá jnāhan de, te ni cacachi de ndese ni cacahān sutū cácujuhnu jíin tēe jéhnū cándiso jníñu. ²⁴ Te jeē ní cajini sōho de jñūhun yúcuan, te ñnuú-ni ni cajicān tahú de nuū Yaā Dios:

Tátā Yaā Dios jeē cujéhnū ní núū ndīhi, máá ní cúu Yaā Dios ni sáha andiví jíin ñayīvi jíin mar jíin táca ndīhi jeē iyó. ²⁵ Te jeē jíin Espíritu Santo te ni sáha ní jēe ni cáhān mozo ní David nde jenahán:

¿Najehē cáquitī ndevāha ni ñayuu sñn nación?

¿Te najehē cájeni sáa ni i jeē ndóna i síquī ní?

²⁶ Ni cacutútú jēe cácuu rey ñayīvi jijnáhan,

te tēe cácujuhnu ni cacutútú de,

te ñnuú-ni ni candonda de síquī maá ní jeē cúu ní Jitoho ná,

jíin síquī Cristo, Yaā jeē ní jeni ní.

Ahí David.

²⁷ Te jendaá chi Herodes jíin Poncio Pilato jíin táca tēe ñuu yō Israel jíin tēe tāca gá nación, ni cacutútú de ini ñuu yáha ní candonda de síquī Séhe ī ní Jesús, Yaā ní jeni ní.

²⁸ Te súcuan ni cuu návāha squícu tācá jniñu jeē jíin poder ni ní cundaā ni ni ndé jenahán jēe súcuan coo. ²⁹ Te vijna, Tátā, coto ní ndese cácahān xeēn de nuū na jijnáhan ná, te cuāha ni fuerza ni núū na jēe cácuu ná mozo ni, návāha jéhnū-ni nacani ná jñūhun máá ní. ³⁰ Te jíin poder ní nasávāha ni ñayuu cácuu, te sáha ní jniñu jéhnū jeē steén jeē cujéhnū ní. Te tāca jēe yáha sáha ní jíin poder Séhe ī ní Jesús, áhí i jijnáhan i.

³¹ Te nuū ní ndīhi ni cajicān tahu i, te nuū cáyūcu tūtú i un ní sáha ya jeē ni jnáa. Te ndīhi i ni cunuú Espíritu Santo jíin i, te ni jēhe ya fuerza te jéhnū-ni ni canacani i jnūhun Yaā Dios.

Jeē ní canevāha cáhnu i ndajníñu

³² Te ñayuu cuehē jeē ní cacandíje chi inuú cáhīyo ni i jíjnáhan i. Te tú ni ñin i ní cáhán jeē ndajníñu jeē névāha máa i cuu máa-ni i, chi tācá ndajníñu ni canevāha cáhnu i. ³³ Te nīhin cánacani apóstol jnūhun jeē ní cajito de jeē ní natecu Jitoho yō Jesús. Te yōhyo ni chindéé ñáhán yá ñayuu cácandíje. ³⁴ Chi tú cuiti ni ñin i ní ndóho jeē cumani nuū i, chi tāca ñayuu cánevāha cuehē ñuhun chí vehe, ni caxīcó i sava te ni caquindecā i xūhún un. ³⁵ Te ni cajēhe i xūhún un núū tēe apóstol, te ni casaja tēe apóstol nuū ñayuu cácandíje núū ndese jíni ñuhún ñin ñin i. ³⁶ Te íyo ñin tēe nání José jeē cúu yucūn Leví, ni cacu de Chipre, ñuhun jeē íne sñin nuū ndúte. Te tēe apóstol ni casnání de tēe ún Bernabé, jeē cuní cahān: tēe cáhán jnūhun ndeyí ni. ³⁷ Te ni xīcó de ñin ñuhun de, te ndáhá de xūhún un ní jēhe de nuū tēe apóstol.

Siquē cuēchi jeē ní casáha Ananías jíin Safira

5

¹ Te suni inga tēe nání Ananías jíin ñasihí de Safira, ni caxīcó de ñin ñuhun de. ² Te ni chuvāha de sava xūhún un cuu máa de jíin ña, chi súcuan ni candajñuhún de jíin ña, te ndáhá de inga sava nájñuhun jeē ndīhi cúu, te ni jēhe de nuū tēe cácuu apóstol. ³ Te ni cahān Pedro:

Ananías, ¿naun ni jēhe ro jnūhun jeē quīvi jexeén, jeē cúu Satanás, ini anuá rō te stáhú ró Espíritu Santo cuní rō? Chi jeē ní caxīcó ró ñuhun ró te cuēchi ró cúu jeē tu ní cáchi ndaā rō jeē ni squéndōo ró jecu xūhún un cuajníñu máa ró, chi ni sáha ró nájñuhun jeē ndīhi xūhun ní jēhe ró. ⁴ ¿Te á násūu cuenta maá ró cúu ñuhun un ndé ná tu xīco ró? Te ná ni xīco ró ¿te á násūu cuenta maá ró cúu xūhun jēe cuajníñu ró ndé nuū cuní maá ró? ¿Te naun ni jeni ni rō jeē stahú ró súcuan? Te nasūu máni máa tēe cúu jeē jícu ró stáhú ró, chi suni Yaā Dios, áchí Pedro.

⁵ Te ná ni jini sōho Ananías tāca jnūhun yáha, te ni cotúú-ni de ni jihī de. Te tāca ñayuu ní canihīn jnūhun ún, yōhyo ni cayūhú i. ⁶ Te ni candocuíñī tēe suchí, te ni cachusúcun de ndīyi un cuáchindūji de.

⁷ Te ni cunúu nájñuhun unī hora. Te ni jinū ñasihí ndīyi un ní quīvi ña ini vehe ún, te tú na vé jíni cuiti ña. ⁸ Te Pedro ni cajñuhún de ña:

Cachi nuū rī, ¿á ñin súcuan-ni ni caxīcó ró ñuhun ró chí tuú? áchí de.

Te ni cachi ña:

Suu súcuan-ni ni caxīcó ná, áchí ña.

⁹ Te ni cahān Pedro jíin ña:

¿Naun ni casquijnáhan jnūhun ró jēe cóto ndee rō Espíritu Santo maá Jitoho yō? Chi ni nducú ró stahú ró yā. Cuni nahín jēe cáhma nanecoo tēe cuachindūji yi ró, te suni súcuan quichindūji de rōhó, áchí de.

¹⁰ Te ni cotúú-ni ña nuū jehé Pedro te ni jihī-ni ña. Te ni ndīvīcoo tēe suchí un te ni cajito de jeē jé ni jihī ña, te ni caquenehen de ña, te ni jechindūji de ña xiin yí ña. ¹¹ Te yōhyo ni cayūhú ndīvii ñayuu cácandíje jíin táca gá ñayuu jeē ní cajini jnūhun jeē súcuan ni cuu.

Cuehē jniñu jéhnū ni casáha apóstol

¹² Te cuehē jniñu jéhnū jeē steén jeē cujéhnū Yaā Dios ni casáha tēe apóstol nuū ñayuu. Te tāca ñayuu cácandíje, inuú-ni cándutútú i ini corredor jeē naní Salomón. ¹³ Te tu ní cáchundeyí ni inga ñayuu quijnáhan jíin i. Te cájejnūhún i ñayuu cácandíje. ¹⁴ Te ni nducuehē gā i, chi cúu tēe cúu ñahan ni cacandíje i máa Jitoho yō. ¹⁵ Te cáquindecā ñayuu jnáhan i jeē cácuñu, te cájequin i ini calle cáca i nuū camilla jíin núu yúu, chi cácuñi i vēsú ste cuándahū Pedro na yáha siquē i te nduvāha i. ¹⁶ Te suni cuehē ñayuu

tācá ñuu cáhīyo yajni yūcuan ní quiijicoo i ñuu Jerusalén ni caquindeca i jnáhan i jeē cácuhu jíin jéē cándoho tachī, te ndīhi i ni canduvāha i.

Jeē ní cajito xeēn i tēe cácuu apóstol

¹⁷ Yūcuán na te sutū cujéhnū ga jíin táca gá jnáhan jeē cácandíje sahān saduceo, ni cacucuésún ni jeē siquí tēe cácuu apóstol. ¹⁸ Te ni cajni de tēe cácuu apóstol ni cachuhun de vecāa. ¹⁹ Te ñin ndajéhé maá Jítoho yō ni nune ya yehyí vecāa ún jecuāa, te ni quenehen ya de jíjnáhan de. Te ni cahān yā jíin de:

²⁰ Cuáhán te cuiñi ró ini templo, te yūcuán nacani cájí ró jnūhun nuū ñáyuu siquí ndese nihīn tahū i cotecu i ní cáni, áchí ndajéhé yā.

²¹ Te ni cajini sōho de jnūhun yáha. Te nuū ní cundijin te nehen ni quívicoo de ini templo, te cástéén de jnūhun ya nuū ñáyuu.

Te níni cástéén de te sutū cujéhnū ga jíin táca jnáhan de ni canastútú de tēe junta cujéhnū ga, jeē cúu ndīhi tēe jéhnū cándiso jniñu nuū ñáyuu nación Israel. Te ni catají de policía cuaquenehen tēe apóstol ini vecāa. ²² Te nuū ni jíinūcoo te tuá gā tēe apóstol. Te ni canandió cóo te ni cacachi:

²³ Jendaá cúu jeē ní cajito ná ndési vāha vecāa, te cáhiin tēe cándito yéhyí un. Te nuū ní canune ná, te tú cuiñi gā tēe un cáhiin ini vecāa ún, áchí de.

²⁴ Te sutū cujéhnū ga jíin tēe cújéhnū nuū tēe cándito templo jíin sūtū cácujehnū, nuū ní cajini sōho de jnūhun yáha, te ni cajeni ni de ndese ga cúu un núu súcuan. ²⁵ Te ni quee-ni ñin tēe te ni cachi:

Tēe jeē ní cachuhun ní vecāa, cáhiin de ini templo, te cástéén de jnūhun nuū ñáyuu, áchí de.

²⁶ Yūcuán na te tēe cácujehnū nuū tēe cándito templo, jíin tēe cácuu policía de, ni jengoo de, te yúcún ní nacueca de tāca tēe apóstol vendicoo de jíin, chi cáyūhú de jeē sanaa te cuāha ñayuu yuū xinī de núu sáha xeēn de jíin táca tēe apóstol. ²⁷ Te nuū ní najinūcoo de jíin tēe apóstol, te ni cajecuiñi de nuū tēe cásáha junta. Te sutū cujéhnū ga ni cahān:

²⁸ Ni cacahān nihin ri jíin ró jeē ma steén cuiñi gā rō jnūhun tēe nání Jesús. ¿Te naun ni casáha ró jéē ní ndecāva jnūhun un ní ñuu Jerusalén yāhá? Te cácuni rō stau yáhu ró rúhū jíjnáhan ri siquí jeē ni jíhī tēe ún, áchí.

²⁹ Te Pedro jíin táca gá apóstol ni cacahān de:

Cánuú jéē squícu ná jniñu ní ndacu Yaā Dios nuū ná te nasūú jniñu nándacu tēe. ³⁰ Máa Yāā Dios jíi yō ni nastécu yā Jesús, Yaā ní cajehni maá ní jeē ní cata caa ní yá jicā cruz.

³¹ Te ni sáha Yaā Dios jeē ní ndujéhnū tucu Jesús néne ya ichi ndávāha Yaā Dios, te cúu ya Yaā ndácu jniñu, Yaā jnáma ñayuu. Te súcuan ni sáha Yaā Dios návāha yóhó, jéē cácuu yó ñáyuu Israel, na nácani ni yō jeē stóo yó cuéchi yó, te cone cáhnu ni yā nuū tāca cuéchi yó. ³² Te máa ná ni cajito ná táca jniñu yáha, te suni máa Espíritu Santo steén cají yá jeē súcuan cúu, chi jéhe Yaā Dios Espíritu Santo yā condee ini anuá tāca ñáyuu jeē cájendetū nuū yā, achí de.

³³ Te ná ni cajini sōho un jnūhun yáha, te yōhyo ni caquitī ni, te cahni de cácuni nuú.

³⁴ Te mēhñú un jíjnáhan néne ñin tēe grupo fariseo nání de Gamaliel, te cúu de maestro jeē steén ley yā, te tāca ñáyuu cájejnúhún i de. Te ni ndocuiñi de, te ni ndacu de jniñu jeē na cújiyo núu tēe apóstol. ³⁵ Te ni cahān de:

Róhó jnáhan ñuu yō Israel, cani vāha ni rō núu na vé cácuni rō sáha ró jíin táca tēe yáha. ³⁶ Chi nucūhun ni rō jeē ñin cuiyā ni ndonda Teudas siquí gobierno, te ni cahān de jeē tēe téyí cúu de, te ni cacutútú nájnūhun cuūn ciento tēe jíin de. Yūcuán na te ni cajehni ñayuu Teudas, te tāca jéē ní caquiñáhan jíin de ni cajitē núu cuango sáa-ni, te ni jecuiñi-ni jniñu ún. ³⁷ Yūcuán na te quivī ni íyo censo te Judas, ñin tēe Galilea, ni ndonda de siquí gobierno, te ni cacutútú cuéhē tēe jíin de. Te suni ni cajehni ñayuu Judas, te tāca tēe jeē ní caquiñáhan jíin de ni cajitē núu cuango. ³⁸ Te vijna na cuāha ri consejo rohó. Ma stáhān gā rō tēe yáha. Siáa de na quíngoo de. Chi núu ñayuu-ni ni squejéé jniñu yáha,

te jecuiñī ī. ³⁹ Te núu Yaā Dios ni squejéé, te ma cúu casi rō, chi sanaa te siquī Yaā Dios cándonda ró, áchí de.

⁴⁰ Te ni cachusóhó jéē ni cáhān Gamaliel. Te ni canacana tēe cácuu apóstol, te ni cacani de jíin cuarta ñii te ni cacahān xeēn jíin de jeē ma cahán gā de jnūhun Jesús, te ni casiáa de cuango de. ⁴¹ Te máa apóstol ni quendacoo de nuū junta cuango de, cácusī ni de jeē ni jéhe ya jnūhun ndoho de jeē cuáha ñayuu jnūhun canu de siquī jeē cácdíje de ya.

⁴² Te ndiquivī castéén de jnūhun vāha Jesucristo, te cánacani de jnūhun ún ini templo jíin táca-ni vehe.

Jeē ní cajeni de uxā tēe cuajniñu mēhñu ñáyuu cácdíje

6

¹ Te ni cucuehē ñayuu cácdíje. Te tiempo un te tēe hebreo jeē cácahān yuhu griego, ni quejéé de cácahñu de nuū jnáhan hebreo de, áchí de jeē ñahan viuda jeē cácahān yuhu griego tu cánihīn vāha ña staā jeē cása de tāca quívī cuu ña. ² Yūcuán na te máa ndihúxí uū apóstol ni canastútú de tāca ñáyuu cácdíje, te ni cacahān de:

Tú vāha jeē jecuiñī jniñu jeē cánacani ri jnūhun Yaā Dios siquī jeē cása de rī staā. ³ Núu súcuu te róhó, hermano, nacāji ró úxā jnáhan máa yó, te na cóndiso jniñu de saja de staā. Te nacāji ró tēe jeē cájejnúhún ñáyuu de, tēe ndíchí jéē ní cunuú Espíritu Santo jíin de. ⁴ Te ruhū jijnáhan ri, máni cacān tahu rī jíin jéē nácani ri jnūhun ya, achí de.

⁵ Te ndihī ñayuu ni canujnahān ni i jnūhun ni cacahān de. Te ni canacāji i Esteban, tēe cácdíje vāha jeē ní cunuú Espíritu Santo jíin de. Te suni ni canacāji i Felipe jíin Prócoro jíin Nicanor jíin Timón jíin Parmenas jíin Nicolás. Te Nicolás cúu tēe ñuu Antioquía, te ni nduu de tēe cácdíje sahān ñayuu hebreo nde ná tu cácdíje de jnūhun Cristo. ⁶ Te ni cajeni i tāca tēe yáha núu tēe cácuu apóstol, te tēe apóstol un ní casoó de ndaha de xinī tāca tēe un ní cajicān tahu de nuū Yaā Dios siquī jniñu condiso de.

⁷ Te jnūhun Yaā Dios ni jitē gā cuahān, te ni nducuehē teyí ñáyuu cácdíje i jnūhun ya ini ñuu Jerusalén. Te suni cuehē sutū ni cacandíje de jnūhun ya.

Jeē ní cajni de Esteban

⁸ Te ni chindéé ñahán yá Esteban ni jéhe ya poder nuū de, te ni sáha de táca jniñu jéhnu nuū ñáyuu, jniñu jeē steén jeē cujéhnu Yaā Dios. ⁹ Te ñayuu hebreo jeē ní cacuyāhu i te ni canduu libre i, íyó vehe īi sinagoga i. Te tēe un cácuu tēe ñuu Cirene jíin tēe ñuu Alejandría jíin tēe Cilicia jíin tēe Asia. Te sava tēe un ní caquejéé de cástáhān jnáhan de jíin Esteban. ¹⁰ Te tu ní cácuu deyí jíin de, chi ndíchí ní cahān de ni sáha máa Espíritu Santo. ¹¹ Yūcuán na te ni cascáhān sava tēe jeē na cáhān jnūhun stáhu síquī Esteban. Te ni cacahān jeē ní cajini sōho cáhān ndevāha Esteban siquī Moisés jíin síquī Yaā Dios. ¹² Te jeē súcuu ni cacahān te ni caquitī ni tāca ñáyuu jíin tēe jéhnu cándiso jniñu jíin tēe cástéén jnūhun tutu ley yā. Te ndihī de ni candonda síquī Esteban, te ni cajni de cuango jíin de nde nuū junta cujéhnu ga. ¹³ Te ni cajeni de tēe cahān jnūhun yáa síquī Esteban, te suhva ni cacahān:

Tēe yáha tu ndé jecuiñī de jeē cahān ndevāha de síquī templo īi yáha jíin síquī ley yā. ¹⁴ Chi ni cajini sōho ná cáhān de jeē Jesús, tēe ni jehnu ñuu Nazaret, canu de templo yáha te nasama de jeē tajnúni ley yā jeē ni jéhe Moisés nuū yō, áchí.

¹⁵ Yūcuán na te ndihī tēe cáyūcu núu junta un ní candacoto vāha nuū Esteban, te ni cajini jeē jito nuū de ná jito nuū ñi ndajéhé Yaā Dios.

Jnūhun ni nacani Esteban

7

¹ Te máa sūtū cujéhnu ga ni cajnúhún Esteban:

¿A ndáa jeē súcuu ni sáha ró najnúhun cácahān de yāhá? áchí.

² Te ni cahān Esteban:

Ndihī níhín jéē cácuu ní jnáhan ñuu yō, jíin ndihī níhín jéē cácuujéhnu ní núu ñúu yō, cuni nahín ní jnūhun cahān ná: Máa Yāa Dios jeē yóhyo cújéhnu ya, ni steén yā máa yá

nuū jíí yō Abraham nde na néne ga de región Mesopotamia, nde ná tu quihīn de condee de ñuu Harán. ³ Te ni cahān yā jíín de: Stóo ñuu rō jíín táca jnáhan ró te quihīn rō nuū cuáha ri condee rō, chi máá rí steén ichi nuū quihín rō, achí yá. ⁴ Yūcuán na te ni quenda de región Caldea, te ni jinū de ni condee de ñuu Harán. Te yūcuan ní jihī tatá de. Yūcuán na te ni sáha Yaā Dios jeē ní quee de ñuu yáha núū cáyūcu yó vijna. ⁵ Te tu ní jéhe ya ní ñn tíhlí ñuhun yáha cuu tahū de. Te vēsú súcuan te ni jejnūhun ya jeē cuáha ya ñuhun un núū de nde jíín núū táca séhe de, vēsú ná tu coo sēhe de sáá. ⁶ Te súcuan ni cahān Yaā Dios jíín de: Sēhe ró coyūcu jíicá i inga ñuu, te cuūn ciento cuiyā sájniñu sáá-ni i te stóho ñayuu yúcuán i. ⁷ Te siquē jeē súcuan sáha i jíín séhe ró, te máá rí chi stóho ri ñayuu ñuu ún. Te sáá te quendacoo sēhe ró yúcuán, te nucoyūcú i yāhá chiñúhún i ruhū, achí yá. ⁸ Te ni cahān yā jíín Abraham jeē na cúu de circuncidar, jeē cúu ñn jnuni jeē ni sáha ya contrato jíín de. Te ná ni cacu sēhe de Isaac te ni sáha de circuncidar i nuū uná quivī. Te suni súcuan ni sáha Isaac jíín séhe de Jacob, te Jacob jíín séhe yíí de jeē cácuu ndihúxí uū yucūn ñayuu Israel.

⁹ Te tāca séhe Jacob ni cacucuésún ni de jíín ñani maá de José, te ni caxīcō de i nuū tée jeē ní cajendēca i nde nación Egipto. Te Yaā Dios chi ni ndito ya José. ¹⁰ Te ni jnama ya i nuū tāca jnúndóho ní jito i, te ni cundíchi i ni sáha ya. Te Faraón, tēe cúu rey nación Egipto, ni cusīñ ni de jíín i ni sáha ya, te ni tejniñu de José jeē cúu de gobernador te ndacu de jniñu nación Egipto jíín núū ñayuu cáyūcú vehe Faraón.

¹¹ Te ni quiji quivī jeē ni íyo ñn jnamā xeēn, te ni ndoho ñayuu ní cáhnu nación Egipto jíín ndé ñuu Canaán. Te tāca jíí yō ún, tuá ni cánihīn de jeē cáji de. ¹² Te ni nihīn Jacob jnūhun jeē iyó trigo nde nación Egipto, te ni tají de sēhe de ni jengoo de ni cajeen de trigo vuelta ñn. ¹³ Te jeē cuángoo de vuelta uū te ni nastúu José jeē maá de cúu ñani de jíínáhan de. Yūcuán na te ni jini rey Faraón ndé ñn jnáhan cúu José. ¹⁴ Te ni cahān José jíín táca ñani de jeē na cóndeca de tátá de Jacob jíín ndihī jnáhan vehe de. Te ni íyo unī xico xahūn i. ¹⁵ Te súcuan ni cuu jeē ni jíín Jacob ni condee de nación Egipto nde ni jihī de. Te suni yūcuan ní coyūcu séhe de jeē cácuu jíí yō un ndé ni cajihī maá de. ¹⁶ Te ná ni quee quivī jeē ndénehen ya tāca yúcuán de jeē cáyūcu tátú de nación Egipto, te ni cacondiso de yiqui ndihúxí uū ndīyí jíí un jéē ndíji ñuu Siquem, te ni cachindūji de ini yaū ndīyí ndeé jíicá cáva jeē ní jeen jíí yō Abraham nuū tāca séhe Hamor ñuu Siquem.

¹⁷ Te nde ná cáyūcu gá de nación Egipto, te cuacuyajni quivī jeē squícu jnūhun ni cahān Yaā Dios jíín Abraham jeē quéndacoo sēhe de nucoyūcú i ñuu ni jéjnūhun ya nuū i, te ñayuu un ní tahū cuehē i ini nación Egipto. ¹⁸ Yūcuán na te ni nucuññ inga rey ñuu Egipto jeē tu ní jíín de jeē váha ni sáha ndīyí José. ¹⁹ Te rey un ní stahú de tāca jíí yō te ni sáha ndevāha de jíín i, chi ni sáha fuerza de i jeē ma cóto ga i sēhe yiquñ i te na cúu. ²⁰ Te tiempo un ní cacu Moisés, te ni cusīñ ni Yaā Dios jíín i. Te unī yoō ni condito sáhi náná i tátá i. ²¹ Te tuá ni cúu condito sáhi de i, te ni cachune de i nuū nanihīn sēhe sñhí Faraón i, te ni naquihīn séhe ña i ni scuéñnu ña i nájnūhun sēhe máá ña. ²² Te ni cutūhva Moisés tāca jnúhun ndíchi ñuu Egipto, te ni cujéñnu de jíín jnúhun cáhán de jíín jniñu sáha de.

²³ Te nuū uú xico cuiyā de te ni jecondēhé de jnáhan de jeē cácuu ñayuu Israel. ²⁴ Te ni jito de nuū ñn tēe nación Egipto jeē sáha ndevāha jíín ñn tēe Israel. Te Moisés ni jnama de jnáhan de Israel ún, chi ni jehni de tēe Egipto un. Te súcuan ni ndutahū jeē ni sáha ndevāha jíín jnáhan de ún. ²⁵ Te máá Moisés jéni ni de jeē jécūhun ni tāca jnáhan de jeē Yáa Dios ni tají yá de jeē jnama de jnáhan de ún ini nación Egipto nuú, te tu ní cájecūhun cuiñi ni jnáhan de ún. ²⁶ Te inga quivī suni ni jito de nuū uú tēe Israel jeē cácejnáhan, te cúní de jeē na jécuiññ. Te jeē yúcuán ní cahān de jíín: ¿Najehē casáha ndevāha ró jíín jnáhan ró? Chi nájnūhun ñn ñani-ni cácuu ró, achí de. ²⁷ Te máá tée cáni tahū jnáhan un ní chundahá de Moisés te ni cahān de: ¿Nde ñn ni jeni róhó jéē cujéñnu ró núū rī te sándaā rō jniñu ri jijnáhan ri? ²⁸ ¿Chí suni cúní rō cahni rō ruhū nájnūhun ni jehni rō tēe Egipto icu chí naún? achí de jíín Moisés. ²⁹ Te nuū ní jini sōho Moisés jnūhun yáha,

te ni yūhú de jeē cáhni rey de, te ni jinu de cuahān de inga nación. Te ni condee de ñuu jicá Madián, te yūcuan ní scácu ñasíhí de uū sēhe yí de.

³⁰ 'Te ni jinu uū xico cuiyā jeē néne de yūcuán. Yūcuán na te ñin ndajéhé Yaā Dios ni quenda ya nuū de nde nuū ñúhun téhé nuū ñin yucu súcún Sinaí. Te ni quenda ya nuū de xiní ñin yucū cuí cáhnu cándahá yáñuhūn, te tu ní cáyú yucū ún. ³¹ Yūcuán na te Moisés ni naa ni de jíto de ún, te ni jehēn de nde nuū, návāha coto vāha de. Te ni jini sōho de jeē cahán maá Jítóho yō jíin de: ³² Máá rí cúu Yaā Dios tāca jíí rō jenahán, Abraham jíin Isaac jíin Jacob, achí yá. Te Moisés, quísi i de jeē yūhú de, te jeē yūcuan tuá ni cúndeyí ni de coto de nuū. ³³ Te máá Jítóho yō ni cahān yā jíin de: Quenehen ndijēn rō chi nuū ñin rō, ñuhun íi cúu. ³⁴ Je ni jini rī ñayuu maá rí jeē yóhyo cándoho i nación Egipto, te suni jíni sōho ri jeē cájnana uhū i, te ni cuun ri vēji ri jeē jnáma ri i jíjnáhan i. Núu súcuan te vijna chi tají rí rohó ndicó rō quihīn rō nde nación Egipto, achí yá jíin de.

³⁵ 'Te nde ná tu quenda Moisés Egipto, te tāca jnáhan de ni casquéhichī i de jeē ní cacahān i jíin de: ¿Ndé ñin ni jeni rōhó jéē cujéhnu rō núu rī te sándaā rō jniñu ri? ni cacahān i jíin de. Te vēsú súcuan te máá ndajéhé Yaā Dios ni quenda nuū Moisés un jéē cándahá cáyú yucū cuí ún. Te súcuan ni cuu jeē ní natají yá de cuanuhun de nde Egipto jeē ndácu de jniñu nuū i te jnama de i. ³⁶ Te máá Moisés ni sáha de jeē ní quendacoo jnáhan ñuu de ini nación yūcuan, te ni cayāha de Mar Rojo, te ni cajica cuu de ñuhun téhé úu xico cuiyā. Te ní tiempo un ní sáha de cuehē jniñu jéhnu jeē steén jeē cujéhnu Yaā Dios. ³⁷ Te máá Moisés cúu jeē suhva ni cahān de jnūhun yáha jíin jnáhan ñuu yō Israel: Máá Yáā Dios cani ya Yaā nacani jnūhun nuū rō jíjnáhan rō nájnūhun ni jeni ya ruhū. Te cuu ya ñin jnáhan ñuu yō. Te na chūhun ni rō jnūhun cahān Yaā ún, áchí. ³⁸ Te suni nde ná ni cajica cuu jíí yō nde nuū ñúhun téhé, te ni cahān ndajéhé yā jíin Moisés xiní yucu súcún Sinaí, te ni nihīn de jnūhun jeē cahán ndese nihīn tahu yō cotecu yō, te ni nacani de jnūhun un núu tāca jíí yō, te ni quendōo jnūhun un núu yō.

³⁹ 'Te tāca jíí yō ún tu ní cáculi de cuandetū de nuū Moisés, chi sa suhva ni cacuni de squéhichī ni de Moisés, te ni cacuni de nandicó de nungoo de Egipto nuú. ⁴⁰ Te ni cacahān de jíin Aarón: Sáha ní tijni yaā na cósnūu núu yō. Chi Moisés, jeē ní quenehen de yóhó Egipto vējicoo yó, tu cájini yō na vé ni ndoho de jeē tú de ndéē jeē cuahán de xiní yucu Sinaí, achí. ⁴¹ Yūcuán na te ni cajēhe de oro ni cuvāha ñin becerro oro, te nuū becerro ídolo un ní casocō de quiti, te ni cacusiñi ni de jíin ídolo ni casáha de ún. ⁴² Te Yaā Dios ni cujiyo ya cuahān yā, te ni stóo ya de na chíñúhún de nuū tāca jéē jíto yó ñin andiví, nájnūhun yósó núu tútu tēe ni canacani jnūhun Yaā Dios nde jenahán:

Ni cahān yā: Róhó ñayuu Israel,

¿á cájini ni rō jeē nuū ruhū ni casocō rō quiti

ná ni cajica cuu rō úu xico cuiyā nde nuū ñúhun téhé?

⁴³ Tuú, chi sa suhva ni cacondiso rō nicho jeē íne ídolo jeē naní Moloc

jíin figura quimi jeē naní Renfán,

ídolo jeē ní casáha máá rō ni cachiñúhún rō.

Jeē yūcuan cúu jeē síaha ri rohó quihīn jicá rō nde yatā ñúu Babilonia, achí yá.

⁴⁴ 'Te ni ndacu ya jniñu nuū Moisés jeē na sáha de vehe ñiñ nuū chíñúhún de ya, nájnūhun cáa jeē ní steén yā nuū de. Te tāca jíí yō, nde nuū ñúhun téhé ní canevāha de vehe ñiñ un núu ní cachuvāha de tabla yuū jeē yosó jnúhun ley yā. ⁴⁵ Te ni castóo de vehe un núu ndihí sēhe de jeē cúu jíí yō. Te ni quiví Josué jíin jíí yō ini nación yáha, te ni sáha ya jeē ní cacundeyí de jíin táca ñayuu jeē ní cacoyūcu yáha ní cajinu i cuango i. Te ni quivícoo de táca ñuu i jíin vehe ñiñ ún, te ni quendōo nde quiví ní cuu David rey. ⁴⁶ Te ni cusíñi ni Yaā Dios jíin rey David. Te ni jicān de nuū yā jeē sáha de ñin vehe ñiñ yā nuú, chí máá yá cúu Yaā Dios jíí de Jacob. ⁴⁷ Te ni cuu jeē nde sēhe yí de Salomón ni sáha vehe ñiñ yā. ⁴⁸ Te vēsú súcuan ni cuu te Yaā cujéhnu téyí, tu ndéé yá maá vehe jeē casáha ñayuu, nájnūhun ni cahān tēe ni nacani jnūhun ya nde jenahán:

⁴⁹ Ni cahān yā:

Andiví cúu nájnūhun mesa nuū ndácu ri jniñu

te ñayīvi cúu nájñūhun ññ nuū yftuu jehē rī.
 Núu súcuan ¿te ndese cuu sáha ró vehe jeē cóndee rī,
 te ndese cuu sáha ró núū ndétātu rí?
⁵⁰ ¿A násūu máá rí ní sáha ndihī jeē iyó?
 áchí máá Jítóho yō Yaā Dios.

⁵¹ Te cáhán gā Esteban:

Yōhyo cáacunihni ni ní, te tu cáconi ní chusóhó ní, te cácuu ní nájñūhun ñayuu tācá nación jeē tu cájini i jñūhun ya ni tu cácondije i ya. Chi níní cájesi ni núū Espíritu Santo, te nájñūhun ni casáha jí yō jenahán, suni súcuan casáha ní vijna. ⁵² ¿A ní iyo tēe nácani jñūhun ya nde jenahán jeē tu ní sáha ndeváha jí yō jíin de? Chi jí yō ni cajehni de tēe ni canacani jñūhun jeē quíji máá Yáa ndaā. Te je ni quiiji Yaā ún, te máá ní ni canastúu ni yá nuū tēe ni cajehni de ya. ⁵³ Te vēsú nde jíin táca ndajéhé yā ni jēhe ya ley yā nuū yō, te máá ní chi tu cásquicu ní, áchí Esteban.

Jeē ní cajehni de Esteban

⁵⁴ Tāca jñūhun yáha ní cajini sōho, te yōhyo ni caquitī ni, te cánacayīhí yuhu cájito nuū Esteban. ⁵⁵ Te máá Esteban chi ni cunuú Espíritu Santo jíin de. Te ni jito de ichi ándiví, te ni jini de jeē ndíndēe núū néne Yaā Dios, te índichi Jesús ichi ndáváha ya. ⁵⁶ Te ni cahān de:

Vijna te jíto ri jeē núne andiví, te jíto ri nuū maá Yáa ní nduu tēe, índichi yā nuū cujéhnu ya lado váha Yaā Dios, áchí de.

⁵⁷ Yūcuán na te ni cajesi un sóho, te ni cacana cóhó, te ñnuú-ni ni candonda siquī Esteban. ⁵⁸ Te ni caquenehen Esteban cuangoo jíin de nde yatā ñūū. Te tēe ni cacahān yaá un jíin ndihī jñáhan de ni cachucú de ticāchí de ndíto ññ tēe suchí nání Saulo, te ni cacani de yuū xinī Esteban. ⁵⁹ Te níní jēe cácani tāca tēe un yūū xinī de te ni jicān tahu de nuū yā:

Tátā Jesús jeē cúu ní Jitoho ná, naquihin ní ánuá na vijna, áchí de.

⁶⁰ Te ni jecuíñī yití de te ni cahān jee de:

Tátā Yaā Dios, ma quénehen ní cuéchi siquī i jeē casáha i jíin ná, áchí de.

Súcuan ni cahān de te ni jihī-ni de.

Jeē ní jito xeēn Saulo ñayuu cácondije

8

¹ Te Saulo, ni nujnahan ni de jeē ni jíhī Esteban.

Te quívī un ní caquejéé de cájito xeēn ndasí de ñayuu cácondije Jesús ini ñuu Jerusalén, te jeē yúcuan cúu jeē ní cajitē núu ñayuu cácondije cuangoo i ññ Judea jíin ññ Samaria. Te tēe apóstol chi tu ní cájitē núu de. ² Te sava tēe yñúhún núu Yaā Dios, ni cachindūji de Esteban. Te yōhyo ni candahyū de jeē ni jíhī Esteban. ³ Te Saulo chi jíto xeēn de ñayuu cácondije, te quívī de ndijnahan vehe te jñí de tēe, ñahan, chúhun de i vecāa.

Jeē ní canacani i jñūhun Yaā Dios ndañūū Samaria

⁴ Te tācá ñuu nuū cuángoo tāca ñayuu ní cajitē núu un ní canacani i jñūhun ndese jnáma Yaā Dios ñayuu. ⁵ Te ni jinū Felipe ññ ñuu ndañūū Samaria, te nuū ñayuu yúcuan ní nacani de jñūhun Cristo, Yaā ní jeni Yaā Dios jeē jnáma ya yohó. ⁶ Te tāca ñayuu ní cacutútú un ní cajini nahín váha i tāca jñūhun ni nacani Felipe, te ni cajito i tācá jñū jéhnu ni sáha de. ⁷ Chi cuehē ñayuu cándoho tachī ni canduváha i, te cácana cóhó táchī un ní caquendacoo. Te cuehē ñayuu ni íjin jíin ñayuu ríngo ni canduváha. ⁸ Te jeē yúcuan ní cacusiñ teyí ni ñayuu ñuu ún.

⁹ Te ini ñuu un néne ññ tēe nání Simón, te tēe tásí cúu de. Te nde ná tu jinū Felipe ñuu Samaria, te yōhyo cánaa ni ñayuu ñuu un cájito i jeē sáha Simón, te ni stahú de i ni cahān de jeē ññ tēe cújéhnu téyí cúu máá de. ¹⁰ Te nde tēe cácujuhnu jíin ndivii cuiti ñayuu, cájetáhu ndasí i jñūhun cáhán de, te ni cajeni ni maá i te ni cacahān i:

Tēe yáha ní jēhe Yaā Dios cuehē poder nuū de, áchí i.

¹¹ Te cájetáhú váha i jnūhun cáhán de, chi cuehē tiempo ni sáha de jniñu stáhú ní canaa ni i ni cajito i. ¹² Te nuū ni jínū Felipe, ni nacani de jnūhun váha ndese ndácu Yaā Dios jniñu, jíin jnúhun Jesucristo, te ni cacandíje i te ni cajendute i, cúu tēe cúu ñahan. ¹³ Te suni máá Simón ni candíje de te ni jendute de, te ni jica cuu de jíin Felipe. Te ni naa ni de jíto de tācá jniñu jéhu jeē sáha Felipe jeē steén jeē cujéhu Yaā Dios.

¹⁴ Te cáyūcu tēe apóstol űuu Jerusalén, te ni canihīn de jnūhun jeē űáyuu Samaria ni cacandíje i jnūhun Yaā Dios. Te ni catajī de Pedro jíin Juan cuango de yūcuán. ¹⁵ Te ni jinūcoo de, te ni cajicān tahu de jehē űáyuu un návāha na quívi Espíritu Santo ini anuá i jíināhan i. ¹⁶ Chi ná tu quívi ya ini anuá ni ĩn i, chi máá-ni jeē ní cajendute i jeē ní cacandíje i Jitoho yō Jesús. ¹⁷ Yūcuán na te Pedro jíin Juan ni casoó de ndaha de xinī i jíināhan i, te ni quívi Espíritu Santo ini anuá i.

¹⁸ Te ni jito Simón jeē súcuan casoó apóstol ndaha de xinī űáyuu ún te súcuan quívi Espíritu Santo ini anuá i, te cúní de cuāha de xūhun núū tēe apóstol návāha nihīn de poder un núú. ¹⁹ Chi ni cahān de:

Cúní na jēe cuāha ní poder yáha núū na, návāha núū ndé űáyuu soó ná ndaha ná xinī i te quívi Espíritu Santo ini anuá i, áchí de.

²⁰ Yūcuán na te ni cahān Pedro jíin de:

Na náa xūhun ró je jnahnū ndetū rō siquī jeē jéni ni rō jeē jíin xūhun te cuu cuaan ró táhū jeē véji nuū Yaā Dios. ²¹ Ma nihín tahu rō jeē sáha ró jniñu yáha, chi tu íyó ndāa anuá rō nuū Yaā Dios. ²² Núú súcuan te jíni űúhún jeē stóo rō jnúhun jeē jéni néé ni rō súcuan te cahān ndahú ró jíin Yāā Dios, te máá yá sanaa te cone cáhnu ni yā siquī jeē jéni néé ni rō súcuan. ²³ Chi jíni rī jeē cucuésún ni rō siquī jeē sáha ri jniñu yáha. Te tāca jēe neé jéni ni rō ni cunuú un jíin ró, achí Pedro jíin de.

²⁴ Yūcuán na te ni cahān Simón jíin de:

Cacān tahu ni jehē na jíināhan ní núū maá Jítoho yō návāha tú jnahnū ndetū na nájnūhun ni cahān ní, áchí de.

²⁵ Te Pedro jíin Juan ni cacahān cají de ndese cáandíje de jnūhun Yaā Dios. Te jeē cuanungoo de ichi űúū Jerusalén, te tijni ndañúū Samaria ni canacani de jnūhun jeē jnáma ya űayuu.

Felipe jíin tēe nación Etiopía

²⁶ Yūcuán na te ni cahān ndajéhé maá Jítoho yō jíin Felipe:

Quihin ichi te quihīn rō ichi sur, ichi jeē quénda Jerusalén cuahān nde űuu Gaza, áchí yá.

Te ichi chúcuan chi máá űuhun téhé cúu. ²⁷ Te ni quihin Felipe ichi cuahān de. Te nde nación Etiopía ni quiji ĩn tēe eunuco jeē ndíso jníñu de cúu de tesorero nuū űáhan cúu reina ndácu jniñu nación Etiopía, nání űa Candace. Tēe un ní quichiñúhún de Yaā Dios űuu Jerusalén. ²⁸ Te cuanuhun de néne de nuū carreta de, te cáhu de tutu jeē ní tee Isaías, tēe ni nacani jnūhun Yaā Dios nde jenahán. ²⁹ Te máá Espíritu ni cahān yā jíin Felipe:

Cuáhán quíjnahan rō tēe cuahān jíin carreta un.

³⁰ Te ni jejnahan Felipe carreta un, te ni jini sōho de jeē cáhu tēe ún tutu jeē ní tee Isaías. Te ni cajnūhún de tēe ún:

¿A jécūhun ni ni jnúhun jeē cáhu ní chí tuú? áchí de.

³¹ Te ni cahān maá tēe un jíin Felipe:

¿Te ndese jecūhun ni ná? Chi tú na tēe castūhun núū ná ndese cúu ún, áchí de.

Te ni cahān de jíin Felipe jeē na cáa de conēne ndúú de jíin de ini carreta.

³² Te jnūhun cáhu de tutu ĩi un cáhán suhva:

Nájnūhun lanchi jeē cuahán tī nuū cúū tī, súcuan ni casáha űayuu jíin yá.

Te nájnūhun ĩn londe quití sáte jēe tu ndáhyú tī, súcuan ni sáha ya, chi tú na vé ni cáhán cuítí yā ná ni cajicān i cuēchi siquī yā.

³³ Te hora jeē ní cajēhe i jnūhun canu yā, tu ní casáha ndāa i siquī yā jíin jnúhun ndāa, te ni cajehni i ya ini űayívi yáha.

Te coo cuehē ñayuu candíje nuū yā jeē ma cánda ni ñn ñayuu cahu i ñayuu ún.
Achí.

³⁴ Yūcuán na te ni cahān tē Etiopía un:

Cava vāha ni ní cachi ni núū ná, ¿ndé síquī cahán tē ni nacani jnūhun yáha? ¿A síquī maá de chí síquī ínga tē? áchí de jíin Felipe.

³⁵ Yūcuán na te ni nacani Felipe jnūhun vāha Jesús nuū tēe ún, chi ni quejéé de ni castūhún de jnūhun jeē ní cahu tēe ún, jíin táca gá jnūhun jeē yosó núū tútu yā. ³⁶ Te níni cuángoo de ichi ún te ni jinūcoo de nuū ñūhun ndute, te ni cahān tē Etiopía:

Yāha ñūhun ndute ¿te á tú cuu cuandute ná? áchí de.

³⁷ Te ni cahān Felipe:

Cuu te núu cándíje ñihin ni ndé jíin ini jíin ánuá ni táca jéé ni sáha Jitoho yō Jesús jehē yō, achí de.

Te ni cahān tē Etiopía:

Cándíje ná jéé Jesucristo cúu máá Séhe Yaā Dios, achí de.

³⁸ Te ni sáha de jeē na jécuiñī carreta de, te ni nuu ndíndúú de cuangoo de ichi véyí núū ñūhun ndute ún, te ni scuándute Felipe tēe Etiopía. ³⁹ Te nuū ní quendacoo de nuū ndute, te Espíritu maá Jítoho yō ni sáha ya jeē ní ndoñúhún-ni Felipe. Te tēe Etiopía vésú tuá ni jító de nuū Felipe, te cúsiñi ni de cuahān de. ⁴⁰ Te ni nane Felipe ñuu Azoto. Te nácani de jnūhun ndese jnáma ya ñayuu, cuahān de tēcá ñuu nde ni jinū de Cesarea.

*Jeē ní nasāma ini Saulo ni sáha Jesucristo
(Hch. 22.6-16; 26.12-18)*

9

¹ Te Saulo chi máni cáhán de jeē cáhni de táca ñáyuu cáncandíje i máá Jítoho yō, te jeē yúcuan ní jehēn de nuū sutú cujéhnú ga. ² Te ni jicān de carta jeē cahán jeē quihín de táca vehe íi sinagoga ñuu Damasco te cuhni de tēe ñahan jeē cáncandíje i Jesús, quiji de jíin i ñuu Jerusalén nuú. ³ Te ni quihin de ichi cuahān de. Te cuacuyajni de ñuu Damasco, te sanaa-ni te ichi ándiví ní stíndēé ñn luz nuū de. ⁴ Te ni cotúú-ni de nuū ñūhun, te ni jini sōho de ñn jnūhun cáhán jíin de:

Saulo, Saulo, ¿najehē jító xeēn rō ruhū? achí.

⁵ Te ni cahān maá de:

¿Na ñihín cúu jeē cahán, Tátā?

Te ni cahān yā jíin de:

Máá rí cúu Jesús, te jeē jító xeēn rō ñayuu cáncandíje i ruhū cúu jeē jító xeēn rō ruhū. Te jeē sáha ró súcuan cúu nájnūhun stíquī jeē tu jéndíje tí te jéñú yatá tí xiní pulla, te súcuan stóho tí maá tí, achí yá.

⁶ Te máá de chi quísi i de jeē yūhú de, te ni cahān de:

Tátā, ¿na vé cuní ni jéé sáha ná núu súcuan? áchí de.

Te ni cahān maá Jítoho yō jíin de:

Ndocuiñī, quívi ró ini ñuu, te yúcuan íyó ñn tēe jeē cachi nuū rō na vé cúu jeē cánuú sáha ró, achí yá.

⁷ Te tēe cuangoo jíin Saulo, ni canaa ndasí ni de cájini sōho de ndusu jeē cahán, te tu ní cájito cuiti de nuū jeē cahán un. ⁸ Yūcuán na te ni ndocuiñī Saulo. Te ni nducú de coto de, te tuá cúu coto de, te ni cajniñi tēe ún ndaha de ni jinūcoo jíin de nde ini ñuu Damasco. ⁹ Te yúcuan ní condee de uní quivī. Te tu ní cúu cuiti coto de, ni tú na vé ni yéji de, ni tú na vé ni jíhi de.

¹⁰ Te ñuu Damasco néne ñn tēe cáncandíje, nání de Ananías. Te máá Jítoho yō ni steén ndijin ya maá yá nuū de te ni cahān yā jíin de:

Ananías, achí yá.

Te máá de ni cahān de jíin yá:

Naun ní sáña, Tátā, áchí de.

¹¹ Te ni cahān maá Jítoho yō jíin de:

Quihin ichi te quihīn rō calle jeē naní Calle Derecha, te vehe Judas cajnūhun ró ñn tēe nání Saulo ñuu Tarso, chi jícán tahu de. ¹² Te najnūhun ni jito ndijin de jeē maá ró, Ananías, ni jinū rō, te ni soó ró ndaha ró xínī de, te ni nanune tinūú de, áchí yá.

¹³ Yūcuán na te ni cahān Ananías:

Tátā, cuehē ñayuu cácahān jeē tēe yúcuán yōhyo jító xeēn de ñayuu cácaandíje i níhín ñuu Jerusalén. ¹⁴ Te vijna ni quee de yāhá, chi sutū cácujuhnu ni catejníñu de vēji de jñi de tāca ñayuu cácahān ndahú i jíin ní, áchí de.

¹⁵ Te ni cahān maá Jítóho yō jíin de:

Cuáhán, chi maá rí ni nacāji tēe un jēe quihīn de nacani de jnūhun ri nuū tāca ñayuu nación Israel jíin núu ñayuu tāca gá nación nde jíin núu tāca rey. ¹⁶ Chi stēen rī nuū de jeē cánuú ndoho de cuehē jnūndóho jeē siquí rī, achí yá.

¹⁷ Yūcuán na te cuahān Ananías. Te ni quīvi de ini vehe nuū néne Saulo, te ni soó de ndaha de xinī Saulo, te ni cahān de:

Hermano Saulo, maá Jítóho yō Jesús, Yaā ní quenda ndijin nuū ní ichi jeē vēji ní, ni tají yá sãña vēji ná núu ni návāha na nánune tinūu ní, te návāha na cúnuú Espiritu Santo yā jíin ní, áchí de.

¹⁸ Te ni nanune-ni tinūu Saulo, chi ni nungoo-ni najnūhun soō chācá ní condihyū tinūú de ún. Te ni ndocuñiñ de ni jendute de. ¹⁹ Yūcuán na te ni nacaji de staā, te ni nanihīn ni de. Te ni condee de jecu quivī jíin tēe cácaandíje jeē cáyūcú ini ñuu Damasco.

Jeē ní nacani Saulo jnūhun ini ñuu Damasco

²⁰ Te ni quejé-ñi de nacani de jnūhun Jesús ini tācá vehe iī sinagoga, áchí de jeē Jesús cúu Sēhe Yaā Dios. ²¹ Te tāca ñayuu ni cajini sōho jnūhun cáhán de ni canaa ni i, te ni cacahān i:

¿A násūu tēe yáha cúu jeē yóhyo jító xeēn de tāca ñayuu Jerusalén jeē cájicān tahu nuū Jesús? Te siquí yúcuán ní quee de yāha jēe cúhni de ñayuu cácaandíje, te quihīn de jíin i nuū sutú cácujuhnu núu, áchí i.

²² Te víhyá gā ni nacani Saulo jnūhun ya, te ni steén cají de jeē Jesús cúu Cristo, Yaā ní jeni Yaā Dios jeē jnáma ya yohó. Te tēe hebreo jeē cáyūcú ñuu Damasco, tu ní cánihīn de modo cahān de jeē tu íyó ndáa jeē cahán Saulo.

Jeē ni cácu Saulo nuū jnáhan de hebreo

²³ Te ni yāha cuehē quivī. Te jnáhan de hebreo ni casquíjnáhan jnūhun de jeē cáhni de Saulo. ²⁴ Te ni nihīn Saulo jnūhun jeē cándito de nduú ñuú tāca yéhyí pared jeē ní condūú ndihyū ñuu ún. ²⁵ Yūcuán na te ñn jecuáa te tēe cácaandíje ni caquihin de Saulo, te ini ñn jīca cáhnu ni cascúun de Saulo jicā pared ún, te súcuan ni cácu de.

Jeē ní najinū Saulo ñuu Jerusalén

²⁶ Te nuū ní najinū de ñuu Jerusalén, te cúní de najnáhan de jíin tēe cácaandíje. Te ni cayūhu tēe un ní cajito de Saulo, chi tu ní cácaandíje de jeē ní nduu Saulo tēe cándíje nuū Jesús. ²⁷ Te Bernabé cuahān de jíin Saulo nuū cáyūcu tēe apóstol, te ni nacani de jnūhun nuū tēe ún ndese ni jini Saulo nuū maá Jítóho yō ichi nuū cuahán de, jíin jēe ni cáhán yā jíin de, jíin jēe jénu-ni ni nacani de jnūhun Jesús ini ñuu Damasco. ²⁸ Te ni condee Saulo ñuu Jerusalén ni jica de jíin tāca tēe apóstol. ²⁹ Te jénu-ni ni nacani de jnūhun maá Jítóho yō. Te jnáhan ñuu de hebreo jeē cácahān yuhu griego, ni castáhān jnáhan jíin de, te maá tēe un cácuñi de cahni de Saulo. ³⁰ Te ni cajini tācá hermano cácaandíje, te ni cajendēca de Saulo nde ñuu Cesarea. Te yúcuán ní canatají de Saulo cuanuhun de nde ñuu de Tarso.

³¹ Te ñayuu cácaandíje Jesús jeē cáyūcú Judea jíin Galilea jíin Samaria, tuá ni cájito xeēn ñayuu i. Te ni ije ga i jíin jnúhun ya, te cándiso íyo i nuū maá Jítóho yō. Te Espiritu Santo ni chindéé ñáhán yá i te ni nducuehē gā i.

Jeē ní nduvāha Eneas

³² Te tāca lado jécondēhe Pedro ñayuu cácadíje, te suni ni jecondēhé de ñayuu cácadíje cáyucú ñuu Lida. ³³ Te yūcuan ní jini de nuū ñn tēe nání Eneas jeē ní cuu unā cuiyā cáa de chi ni ijín de. ³⁴ Te ni cahān Pedro jíín de:

Eneas, Jesucristo cúu Yaā nasávāha ya rohó. Ndocuññi te natuu rō yuu ró, áchí de.

Te ni ndocuññi-ni tēe ún. ³⁵ Te tāca ñayuu cáyucú ñuu Lida jíín ndúhvā Sarón ni cajito i jeē ní nacaca Eneas, te ni casquéndōo i tāca jnūhun jeē tu íyó ndāā te ni cacandíje i máá Jítoho yō.

Jeē ní natecu Dorcas

³⁶ Te nde ñuu Jope ni iyo ñn ñahan cándíje, nání ña Tabita, te nuū yúhu griego nání ña Dorcas. Te ñahan yáha máni jniñu váha ni sáha ña, te ni sáha ña caridad ni chindéé ñáhán ña ñayuu cúmaní nuū. ³⁷ Te tiempo yúcuán ní quejéé cuéhyi jíín ña, te ni jihí ña. Te ni cascúchi i ndíyi ún, te ni cajequin i ndíyi un ndé ini cuarto xiní véhe. ³⁸ Te yajni íne ñuu Lida jíín ñuu Jope, te tēe cácadíje ñuu Jope ni cajini jnūhun de jeē néne Pedro ñuu Lida, te ni catají de uū tēe cuacana de Pedro, te ni cacahān de:

Ma cucuéé ní na quíhín yachí yō ñuu Jope, achí de.

³⁹ Yūcuán na te ni quihin Pedro ichi cuahān de jíín tēe ún. Te nuū ni jíín de, te ni cacoo tēe un jíín de nde xiní véhe nuū catú ndíyi ún. Te tācá ñahan viuda ni candicó ndúū ña de cándahyū ña, te cástéén ña tācá sahma jíín tícāchi jeē ni sáha Dorcas te ni saja ña nde na técu ña. ⁴⁰ Yūcuán na te ni ndacu Pedro jniñu jeē na quéndacoo ndíhi ñayuu ún quingoo i nde yatā véhe. Te ni jecuiññi yití de ni jicān tahu de, te ni nandió cóto de nuū catú ndíyi ún, te ni cahān de:

Tabita, ndocuññi ní, áchí de.

Te máá ña ni ndacoto-ni ña te ni jito ña nuū Pedro, te ni nucōo-ni ña. ⁴¹ Te ni jniñ de ndaha ña, te ni ndonehen de ña. Yūcuán na te ni nacana de xiní ñayuu cácadíje nde jíín ñahan viuda ni ndívicoo i, te ni steén de ña nuū i jeē ní natecu ña. ⁴² Te ni jítē jnūhun jniñu yáha ní ñuu Jope cuahān, te cuehē ñayuu ni cacandíje i jnūhun máá Jítoho yō. ⁴³ Te cuehē quiví ni ndōo Pedro ini ñuu Jope, néne de vehe ñn tēe sáha curtir ññi, nání de Simón.

Pedro jíín Cornelio

10

¹ Te ini ñuu Cesarea ni iyo ñn tēe nání Cornelio, ni cuu de capitán grupo soldado jeē nání Italiano. ² Te cúu de tēe ndíso iyo nuū Yaā Dios nde jíín ndíhi ñayuu vehe de, te yōhyo caridad ni tēe cúu de, chi jéhe de xūhun núū ñayuu hebreo cándoho ndáhú, vésú nasūu tēe hebreo cúu de. Te níni jíicán tahu de nuū Yaā Dios. ³ Te ñn quiví ni steén ndijín yā nuū tēe yáha nájñūhun cahuní jehíni, te ni jito de jeē ñn ndajéhé maá Yāā Dios ni quiví ya nuū néne de. Te ni cahān yā jíín de:

Cornelio, achí yá.

⁴ Te máá de ni ndacoto vāha de nuū yā, te ni yūhú de. Te ni cahān de:

¿Na vé cuní ni, Tātā? achí de.

Te ni cahān yā jíín de:

Je chíhi Yaā Dios cuenta jeē jíicán tahu rō jíín jéé sáha ró caridad. ⁵ Vijna te tají ró jecu tēe na quíngoo de nde ñuu Jope, quicana de Simón jeē suni nání de Pedro, na quíji de. ⁶ Chi néne núu de vehe tocayo de Simón, tēe sáha curtir ññi, te ndéé vehe ún yajni yumar. Te máá de castūhun núu rō na vé cúu inga jeē cánuú sáhá ró, achí ndajéhé yā.

⁷ Te ndajéhé yā jeē ni cáhān jíín Cornelio, cuahān-ni ya. Te ni cana de uū mozo de jíín ñn soldado jeē yíñúhún núu Yaā Dios, chi cúcāhnu ni de jeē squícu vāha tēe ún. ⁸ Te ni nacani ndíhi de jnūhun nuū tāca tēe ún, te ni tají de cuangoo nde ñuu Jope.

⁹ Te inga quiví un cájica de ichi cuangoo de, te cuacuyajni de ñuu Jope. Te je yajni cahuxí uū cúu, te suu hora un ní caa Pedro siquí véhe chi cándaā, te yūcuan cácān tahu de. ¹⁰ Te ni quee sōco chíji de, te ni cuni de caji de staā. Te sáá cásáha ña ndeyu te ni steén ndijín yā nuū de. ¹¹ Te ni jito de jeē núne andiví. Te ni jito de nájñūhun ñn sahma

manta jité cǎhnu te núhni jnáhan ndicúun punta, te ni cuun vēji nuū de. ¹² Te chíji un cáñūhun ndinuū quiti, tācá quiti cúun ndaha jíin táca cóo jíin táca quiti cándava. ¹³ Te ni jini sōho de ñin jñūhun ni cahān:

Pedro, ndocuiñi te cahni rō tācá quiti jiñā, te caji rō tī, áchí.

¹⁴ Te ni cahān Pedro:

Ma cǎji na, Tátā, chi tu yéji cuiti na táca quiti jeē cahān ley ni jéē tú vāha caji na tí, chi nájñūhun jeē tu cáhiyo ndoo ti nuū ní, áchí de.

¹⁵ Te ni cahān tucu jñūhun un jíin de:

Áchí rí jeē iyó vāha caji rō tācá quiti jiñā, chi ni sándoo ri, te ma cahān maá ró jeē tu cáhiyo ndoo ti, áchí. Te súcuan ni steén cají yá nuū de jeē cúu quihín de nuū ñáyuu vēsú násūu jnáhan ñuu de hebreo cúu.

¹⁶ Te unī jínu ni cahān súcuan jíin de. Te sahna un ní ndaa cuanuhun andiví. ¹⁷ Te níni nácani ndasí ni Pedro na vé cuni cahān jeē ní jito ndijin de ún, te ni jinūcoo-ni tēe ni tají Cornelio, cácajnūhún de vehe Simón nde ni jinūcoo de yéhyí tēe ún. ¹⁸ Te cácahān jee de cácajnūhún de núu yūcuan ndéé Simón jeē suni nání de Pedro. ¹⁹ Te níni nácani ga ni Pedro siquī jeē ní jito ndijin de ún, te Espiritu Santo ni cahān yā jíin de:

Ni quecoo unī tēe cánanducú róhó. ²⁰ Ndocuiñi te nanuu ró, te ma cáni ni rō jeē tú vāha quihín rō jíin de, vēsú násūu jnáhan ñuu rō hebreo cácuu de, chi máá rí ni tají rí de vējicoo de, áchí yá.

²¹ Yūcuán na te ni nanuu Pedro nuū tēe ni tají Cornelio, te ni cahān de:

Maá ná cúu tēe cánanducú ní. ¿Te na siquī vējicoo ní núu na núu súcuan? áchí de.

²² Te ni cacahān mozo un:

Cornelio, tēe cúu capitán, ni tají de sǎñá. Te tēe ndaā, tēe ndíso iyo nuū Yaā Dios cúu de, te táca ñáyuu hebreo suni cácahān i jeē tēe vāha cúu de. Te ni cahān ñin ndajéhé yā jíin de jeē na cána de níhín jeē ní vehe de te chusóhó de jñūhun cahān ni jíin de.

²³ Yūcuán na te ni cahān Pedro jíin mozo un jéē na cúcōo de ini vehe ún, te ni candōo de yūcuán. Te nuū ní cundijin, te ni quihin Pedro ichi cuahān de jíin mozo un. Te suni cuangoo jecu hermano cácañíje ñuu Jope jíin de.

²⁴ Te nde inga quiví ni jinūcoo de ñuu Cesarea. Te Cornelio ndétu de jinūcoo Pedro, chi ni nastútú de táca jnáhan de jíin táca amigo de jeē quijnáhan vāha ga de jíin. ²⁵ Te nuū ni jínu Pedro jijnáhan de, te ni quenda Cornelio ni cahān de jíin Pedro, te ni jecuiñi yití de jeē chíñúhún de Pedro nuú. ²⁶ Te Pedro ni ndonehen de Cornelio, te ni cahān de:

Ndocuiñi ní, chi sǎñá suni ñin tēe-ni cúu ná, áchí de.

²⁷ Te cándajnūhún de ni quivícoo de ini vehe. Te ni jito Pedro jeē cáyūcu cuéhē ñayuu ini vehe de. ²⁸ Te ni cahān Pedro jíin ñáyuu ún:

Je cǎjini vāha ni jíjnáhan ní jéē ley jeē cánevāha sǎña ñáyuu hebreo, cáhān jeē tú vāha jeē quijnáhan ná jíin ní quivícoo ná vehe ní síquī jeē cúu ní ñáyuu sñin nación. Te Yaā Dios chi ni steén yā nuū na jéē ma kujéē ni na núu ní ñin ñayuu. ²⁹ Jeē yūcuan cúu jeē vēji-ni ná, chi ni cana ní sǎña, te tu ní sǎjéē ni ná. Te na cájnūhun ná nihín, ¿na siquī ni cana ní sǎña? áchí Pedro.

³⁰ Yūcuán na te ni cahān Cornelio:

Vijna iyó cúun quiví nájñūhun máá hora yáha jéē cúu cahunī jehíni, te ndite ni ná chi súcuan chíñúhún ná nuū yā, te jícan tahu na ini vehe ná. Te ni quiji ñin ndajéhé yā nuū ná, te ndíndéé sahna ñūhun ya. ³¹ Te ni cahān yā jíin ná: Cornelio, je ni jini sōho Yaā Dios jeē jícan tahu rō, te chíhi ya cuenta jeē sáha ró caridad. ³² Núu súcuan te tají ró mozo na quíngoo de ñuu Jope quicana de Simón jeē suni nání de Pedro, na quíji de nuū rō. Chi tēe un néne de vehe tocayo de Simón, tēe sáha curtir ñii, te yajni yumar ndéé vehe de. Te quee tēe ún te castūhún de nuū rō jñūhun cánuú, áchí yá jíin ná. ³³ Súcuan ni cuu te ni tají-ni ná mozo na cuajēcoo de cana de níhín, te na cútahū ná, chi vāha ni sáha ní jéē vēji ní. Te vijna ni candutútú ná yāha návāha táca ná cuni sōho ná ndíhi jñūhun Jitoho yō Yaā Dios jeē ni jéhe ya cahān ní, áchí de.

Jeē ní nacani Pedro jñūhun ya vehe Cornelio

³⁴ Yūcuán na te ni cahān Pedro:

Vijna te ni jini vāha ná jēē Yaā Dios inuú-ni sáha ya jíin táca ñáyuu, cúu ñayuu hebreo jíin ñáyuu táca gá nación. ³⁵ Chi cúsi ni yā jíin ñáyuu tǎcá-ni nación núu cándiso iyo i nuū ya te cásáha i jniñu ndaā. ³⁶ Chi ni cahān yā jíin ñáyuu Israel jeē ndávicoo táca ñáyuu nuū jnúhun manī yā jíin i sáha Jesucristo. Te máá yá cúu Jitoho táca yóhó. ³⁷ Máá ní je cájini ní ndese ni cuu. Chi ná ni jinu ni nacani Juan jnúhun jíin jēē ni scuándute de ñayuu, te ni quejéé Jesús nácani ya jnúhun nde Galilea, te ni jitē jnúhun un ní cáhnu Judea. ³⁸ Te cájini ni jēē Yaā Dios ni jēhe ya Espiritu Santo jíin poder nuū Jesús, Yaā ní jehnu ñuu Nazaret. Te cájini ni jēē ní jica cuu ya ni sáha ya jniñu vāha, te ni nasávāha ya táca ñáyuu jeē cándoho i sáha jexeén, chi Yaā Dios ni chindéé ñáhán yá Jesús. ³⁹ Chi máá ná cáncani cájī ná jnúhun tǎcá jniñu ní cajito ná ní sáha ya ní cáhnu Judea jíin ini ñuu Jerusalén. Yūcuán na te ni cajehni i ya, chi ni cata caa i ya jicā cruz. ⁴⁰ Te Yaā Dios ni nastécu yā maá Jesús nuū uní quivī, te ni ndiji ya nuū na ní cajito ná núu yā ni sáha Yaā Dios. ⁴¹ Te tu ní quíji ya nuū tǎcá inga ñayuu, chi nuū maá-ni táca ná jeē jé ni nacáji Yaā Dios sǎña jēē nácani ná jnúhun tǎcá jniñu jeē ní cajito ná. Chi ni cayejī na stáa ni cajihī ná ndute jíin yá ná ni nane ya jeē ní natecu yā. ⁴² Te ni ndacu ya jniñu nuū na jíjnáhan ná jēē na nácani ná jnúhun ya nuū táca ñáyuu te cahān cajī ná jeē maá Yāā Dios ni jeni ya Jesús jeē sándaā yā jniñu ñayuu cátecu jíin ñáyuu ní cajihī. ⁴³ Chi jnúhun Jesús cúu jeē ní cacahān táca téé ni canacani jnúhun Yaā Dios nde jenahán. Chi ni cacahān de jeē táca ñáyuu jeē cándije i Jesús, cone cáhnu ni yā nuū cuéchi i, áchí Pedro.

Jeē ni quivī Espiritu Santo ini anuá ñayuu jeē násūú hebreo cácuu

⁴⁴ Te níni cáhán gā Pedro táca jnúhun yáha te ni quivī-ni Espiritu Santo ini anuá táca ñáyuu cájini nahín jnúhun ya jeē cahán de. ⁴⁵ Te tēe hebreo jeē ni jínūcoo jíin Pedro jeē suni cáccandije de Jesús, nahán ní canaa ni de ni cajito de jeē suni ni quivī Espiritu Santo ini anuá ñayuu jeē násūú hebreo cácuu. ⁴⁶ Chi ni cajini sōho de cácahān ñayuu un sñn yuhu, te cácahān i jeē yōhyo cújéhnu Yaā Dios. ⁴⁷ Yūcuán na te ni cahān Pedro:

¿Ndé ñn casi jeē ma cuándute ñayuu yáha? Chi ni quivī Espiritu Santo ini anuá maá i, nájnūhun ni quivī ya ini anuá maá yó, áchí de.

⁴⁸ Te ni cahān de jíin i jeē na cuándute i siquī jeē ní cacandije i Jesucristo. Yūcuán na te ni cacahān ndahú i jíin Pedro jeē na quéndōo de jecu quivī jíin i.

Jeē ní nacūāha Pedro cuenta nuū ñáyuu cáccandije ini ñuu Jerusalén

11

¹ Te tēe apóstol jíin táca hermano cáyūcú Judea, ni canihīn de jnúhun jeē súni ñayuu sñn nación ni cacandije i jnúhun Yaā Dios. ² Te cuanuhun Pedro ñuu Jerusalén. Te sava tēe hebreo jeē cáccandije de ya ni cacahān de nuū Pedro:

³ ¿Najehē ni condee ní vehe ñayuu jeē násūu ñáyuu nación yō cúu? Te ni yeji ni jíin i, áchí.

⁴ Yūcuán na te ni nacani cájī Pedro jnúhun nuū téé ún ndihī ndese ni cuu siquī téé sñn nación:

⁵ Néne ná ñuu Jope. Te níni jícán tahu na, te ni steén ndijin yā nuū ná, te ni jito ná nájnūhun ñn sahma manta jité cáhnu jeē nuhni jnáhan ndicúún punta, te nde ichi ándiví ní cuun ni quiji nuū ná. ⁶ Te ni jito vāha ná, te ni jini na jēē chíji un cáñūhun quitī cúún ndaha jíin quitī xéén jíin cóo jíin quitī cándava. ⁷ Te ni jini sōho ná ñn jnúhun ni cahān jíin ná: Pedro, ndocuiñi te cahni rō tǎcá quitī jiñā, te caji rō tī, áchí jíni ná. ⁸ Te ni cahān ná: Ma cáji na, Tátā, chí tu yéji cuiti na táca quitī jeē cahán ley ni jēē tu cáhiyo ndoo tī nuū ní, áchí ná. ⁹ Yūcuán na te jnúhun jeē véji nde ándiví ní cahān tucu jíin ná: Ni sándoo máá rí tī, te ma cahán gā rō jeē tu cáhiyo ndoo tī, áchí jíni ná. ¹⁰ Te unī jinu ni cahān súcuan. Yūcuán na te ni ndaa sahma un cuánuhun ándiví. ¹¹ Te hora un ní jinūcoo unī tēe vehe nuū ni cóndee ná un, cáncanducú de sǎñá, te ñn jnáhan ñuu de Cesarea ni tají de vejicoo de. ¹² Te máá Espiritu ni cahān yā jíin ná jeē ma cáni ni na jēē tú vāha quihīn na jíin de. Te suni ññu hermano yáha ní jengoo jíin ná, te ni quivicoo ná ini vehe tēe nání Cornelio.

¹³ Te tēe un ní nacani de jnūhun nuū na jíjnáhan ná jēē ní jito de ñn ndajéhé Yaā Dios, índichi yā ini vehe de, te ni cahān yā jíin de: Tají ró jecu tēe na quíngoo de ñuu Jope, quicana de Simón jeē suni nání de Pedro, na quíji de. ¹⁴ Te tēe ún cachi de nuū rō ndese jnama Yaā Dios rohó jíin ndíhi ñayuu cáyūcú vehe ró, áchí yá. Achí Cornelio jíin ná. ¹⁵ Te nuū ní quejéé ná cahán na, te ni quívi-ni Espíritu Santo ini anuá i jíjnáhan i, nájnūhun ni quívi ya ini anuá maá yó xihna gā. ¹⁶ Yūcuán na te ni nucūhun ni na jnúhun ni cahān maá Jítóho yō: Jendaá jeē maá ndute-ni ni scuándute Juan ñayuu. Te róhó jíjnáhan ró chi nájnūhun cuandute ró jíin Espíritu Santo, cúu jeē cóndee yā ini anuá rō, achí yá. ¹⁷ Te suni ni jēhe Yaā Dios Espíritu yā nuū maá i nájnūhun ni jēhe ya nuū maá yó jeē cácadíje yó Jítóho yō Jesucristo. Núu súcuan ¿te ndé ñn cúu ná jēē cási ná jniñu jeē sáha Yaā Dios? áchí Pedro.

¹⁸ Súcuan ni cajini sōho de jnūhun yáha, te tuá ni cácahān de nuū Pedro, chi sa suhva ni cacahān de jeē yóhoyo cújéñnu Yaā Dios. Te ni cacahān de:

Suni ni jēhe Yaā Dios jnūhun jeē na nácani ni ñayuu tāca gá nación jeē stóo i cuēchi i návāha cotecu i ní cáni núu súcuan, áchí de.

Ñayuu cácadíje ini ñuu Antioquía

¹⁹ Te quívi ní cajehni de Esteban ni quejéé de cájito xeēn de ñayuu cácadíje, te jeē yúcuan ní cajitē núu ñayuu un tāca ñuu cuangoo i, te ni jinūcoo i Fenicia jíin Chipre jíin ñuu Antioquía. Te ni canacani i jnūhun vāha ya nuū máni jnáhan hebreo i jeē cáyūcu yúcuan, te tu ní canacani i jnūhun ya nuū ínga ñayuu. ²⁰ Te jecu tēe cácadíje jeē cáyūcu Chipre jíin ñuu Cirene ni jinūcoo de ñuu Antioquía, te suni nuū ñayuu tāca nación jeē tu cájini i jnūhun ya ni canacani de jnūhun máá Jítóho yō Jesús jeē jnáma ya i. ²¹ Te máá Jítóho yō ni chindéé ñáhán yá de, te cuehē ñayuu ni castóo i jniñu jeē tu íyó ndāa te ni cacandíje i máá Jítóho yō.

²² Te ñayuu cácadíje ini ñuu Jerusalén ni cajini jnūhun i, te ni catají i Bernabé cuahān de nde ñuu Antioquía. ²³ Te nuū ni jíin Bernabé yūcuán, te ni jini de jeē yóhoyo vāha ni sáha Yaā Dios jíin i, te ni cusí ndasí ni de. Te ni stíhví ni de tāca ñayuu un jēē jíin ini jíin ánuá i na cóndíhví ni i squícu vāha i nuū maá Jítóho yō, te ma náyūhú i. ²⁴ Chi tēe vāha cúu Bernabé, te ni cunuú Espíritu Santo jíin de, te cándíje níhin de. Te ni cacandíje cuehē ñayuu nuū maá Jítóho yō ni sáha de.

²⁵ Yūcuán na te cuahān de nde ñuu Tarso cuananducú de Saulo. Te ni nanihín jnáhan de jíin Saulo, te ndéca de tēe un ní ndee de ñuu Antioquía. ²⁶ Te ní ñn cuiyā ni candutútú de jíin ñayuu cácadíje yūcuán, te ni castéén de jnūhun ya nuū cuehē ñayuu. Te ñuu Antioquía cúu nuū xihna ñúhún gá ni caconaní ñayuu cristiano síquí jeē ní cacandíje i Cristo.

²⁷ Te suni tiempo un ní quendacoo tēe canacani jnūhun Yaā Dios ñuu Jerusalén cuangoo de nde ñuu Antioquía. ²⁸ Te ñn jnáhan de jeē naní Agabo ni ndocuíñí nuū hermano cácadíje. Te ni steén Espíritu Santo nuū de, te ni castúhún de jeē cóo ñn jnamā xeēn ní cáhnu. Te ni cuu jnamā ún ñn parte tiempo jeē ní ndacu Claudio jniñu jeē ní cuu de rey. ²⁹ Yūcuán na te ni candajnūhun tēe cácadíje ñuu Antioquía jeē cuáha ñn de nasaa canda de cuáha de te tají de quihín cotecu hermano cáyūcú Judea. ³⁰ Te súcuan ni casáha de. Te ni catají de Bernabé jíin Saulo ni cajendéca de nuū tēe jéñnu cándiso jniñu nuū ñayuu cácadíje cáyūcú Judea.

Jeē ní jehni Herodes Jacobo, te ni chune de Pedro vecā

12

¹ Te suu tiempo un ní quejéé rey Herodes jíto xeēn de sava ñayuu cácadíje. ² Te ni ndacu de jniñu jeē jíin espada na cáhni i Jacobo ñani Juan. ³ Te ni jini de jeē ní cacusí ni tēe hebreo jeē ni sáha de súcuan, te jeē yúcuan suni ni jniñ de Pedro. Te máá quívi un ní cuu vico jeē yéji ñayuu pan jeē tu yíhi levadura. ⁴ Te nuū ní jniñ de Pedro, te ni chune de vecā, te ni jeni de cuñ grupo soldado jeē cóndito Pedro, cuñ cuñ soldado cúu jeē ñn ñn grupo. Chi cúní Herodes jeē na yáha vico un jēē cúu vico pascua te quenehen de Pedro

vecāa un stéén de nuū ñáyuu cuehē. ⁵ Te súcuan íne Pedro vecāa, te cándito soldado un de. Te ñayuu cá candíje chi ñihin ni cajicān tahú i jehē Pedro nuū Yaā Dios jeē na cácu de.

Jeē ní quenehen Yaā Dios Pedro vecāa

⁶ Te jéni ni Herodes jeē na cúndijin inga quivī te quenehen de Pedro vecāa, te stéén de nuū ñáyuu un núú. Te núhní Pedro jíin úū cadena, cátú de quíxí de mēhñu úū soldado jecuāā ún, te suni cáhiin ga soldado cándito yéhyí vecāa ún. ⁷ Te suu jecuāā ún te sanaa-ni te ni jinū ñin ndajéhé maá Jítóho yō, te ni ndindēé ini vecāa. Te ni squíhi ya Pedro, te ni natahū ni de. Te ni cahān yā:

Yachī ndocuiñī rō, achí yá.

Te cadena nuhní ndaha de un ní canandajī-ni. ⁸ Te ni cahān ndajéhé yā jíin de:

Nacuhni ñihin chíji ró, te nuquíhi ró ndíjēn rō, achí yá.

Te súcuan ni sáha de. Te ni cahān tucu ndajéhé yā jíin de:

Condii ticāchi ró, te condiquīn rō ruhū na quíhín yō, achí yá.

⁹ Te ni quenda de ndíquin de ya cuahān de jíin yá, te jéni ni de jeē násūu jéndaá cúu jeē sáha ndajéhé yā jíin de, chí jéni ni de jeē ñin jeē ni stéén yā jíto ndijin de cúu. ¹⁰ Te ni yāha ya jíin de uū nuū cándito soldado. Te ni jinū yā jíin de yéhyí cáa nuū quenda de caca de calle, te yéhyí un ní nune iī-ni máa. Te ni quenda ya jíin de, te ni yāha de ñin calle cuahān de. Yūcuán na te ni cujiyo-ni ndajéhé yā nuū de cuahān yā. ¹¹ Te ni nducájí ni Pedro te ni cahān maá ní cahān ñin de:

Vijna te ni jini ndaā rī jeē ní tají máa Jítóho rī ndajéhé yā ni quiji, te ni jnama ya ruhū nuū Herodes jíin núū tāca ñáyuu hebreo jeē cácu ni i sáha xeēn i jíin rí nuú, achí de.

¹² Te nuū ní jini de jeē ni cácu ndije de, te ni quihin de ichi cuahān de vehe María naná Juan jeē suni nání de Marcos. Te yūcuan cáhiin tútu cuéhē ñayuu cájicān tahú i jehē Pedro. ¹³ Te cáhán Pedro ni jinū de yéhyí fuera, te ñin sūchi síhí nání Rode cuahān i jeē cúni i núu ndé ñin cúu jeē cahán. ¹⁴ Te ni nacuni i tachí Pedro, te jeē ní cusī ni i te tu ní núne i yéhyí un, chí ni nandió cóo i te jínu i ni ndīvi i ini cuarto. Te ni castūhún i jeē ní quee Pedro índichi de yéhyí fuera. ¹⁵ Te ni cacahān jíin i:

Jeē cahán neé ró, achí.

Te máa i ñihin cáhán i jeē maá de cúu. Yūcuán na te ni cacahān:

Ndajéhé yā jeē ndíto Pedro cúu núu súcuan, achí.

¹⁶ Te víhyá gā cahán Pedro. Yūcuán na te ni canune i yéhyí, te ni canacuni i nuū de, te nahán ní canaa ni i cájito i. ¹⁷ Te máa de ni sáha de ndaha de jeē ma cúvaā gā i, te ni castūhún de ndese ni quenehen máa Jítóho yō de vecāa. Te ni cahān de:

Castūhun núu Jacobo jíin núu tāca gá hermano jeē ní quenehen ya ruhū vecāa, achí de.

Te ni quenda de cuahān de inga lugar.

¹⁸ Te nuū ní cundijin, te ni cacuvaā teyí soldado jeē tuá Pedro. ¹⁹ Te ni ndacu Herodes jniñu jeē na nánducú váha i Pedro. Te tu ní cánanihīn i de, te nuū ní cuu ni stichí de soldado jijnáhan, te ni ndacu de jniñu jeē na cúu. Yūcuán na te ni quenda Herodes Judea cuahān de ñuu Cesarea, te ni condee de yūcuán.

Jeē ni jíhī Herodes

²⁰ Te yōhyo ni quítī ni rey Herodes nuū ñáyuu ñuu Tiro jíin ñuu Sidón. Te ñayuu un ní candajnūhún i jeē inuú-ni quívicoo ndíhi i nuū rey un. Te ni casáha i amigo i jíin Blasto, tēe cújéhnū jéniñu nuū rey un. Te ni cacahān ndahú i jíin de jeē na cáhán ndahú de jíin rey un jéē na ndéē ni de jíin i. Chí nde ñuu maá rey un cájeen i jeē cáyeji i. ²¹ Te ni jeni Herodes ñin quivī. Te ni nucūhun de sahma yíñúhún de, te ni cucōo de mesa nuū ndácu de jniñu, te ni cahān de ñin jnūhun jehū ni cajini sōho i. ²² Te ñayuu un ní caquejéé i cacahān jee i jnūhun yíñúhún jíin de:

Nasūu téé-ni cúu ní, chí ñin yaá cúu ní, achí i jíjnáhan i.

²³ Te máá hora un ní sáha-ni ñin ndajéhé máá Jítóho yō jeē ní jniñ ñin cuehyī xeēn rey Herodes, te ni cayeji tindācú de, te ni jihī de, chi ni sandúxí-ni de máá de te tu ní cáhán de jeē Yaā Dios cúu jeē kujéhnú.

²⁴ Te ni jitē gā jnūhun máá Jítóho yō, te cuehē ndasí ñáyuu ni cacandíje i tācá-ni lugar.

²⁵ Te ni jīnu jniñu jeē ní quindecá Bernabé jíin Saulo jeē cótecu ñáyuu Judea. Te ni quendacoo de Jerusalén cuanungoo de Antioquía, te cándēca de Juan jeē suni nání de Marcos cuahān jíin de.

Jeē ní caquejéé Bernabé jíin Saulo caca cuu de nacani de jnūhun ya

13

¹ Te mēhñu grupo ñáyuu cácandíje ini ñuu Antioquía ni cahīyo tēe cástéén jíin tēe cácanani jnūhun Yaā Dios, te cácaní de Bernabé, Simón jeē suni nání de Negro, Lucio ñuu Cirene, Saulo, jíin Manaén tēe ni jehnu jíin inga Herodes jeē ní cuu gobernador Galilea.

² Te ñin quivī jeē cáhiyo ndite ni tēe yáha cáchiñúhún de nuū máá Jítóho yō, te ni cahān máá Espíritu Santo jíin de:

Cúní rī jeē sasñn ró Bernabé jíin Saulo na quíngoo de jniñu jeē ní jeni ri de, áchí yá.

³ Yūcuán na te ni cajicān tahu ndite ni de, te ni casoó de ndaha de xinī Bernabé jíin Saulo, te súcuan ni catajī de ndindúú tēe ún cuanacani de jnūhun nuū tāca ñáyuu.

Jeē ní canacani Bernabé jíin Saulo jnūhun ya nde Chipre

⁴ Te ni sáha Espíritu Santo jeē íchi ñúú Seleucia cuangoo de. Te yūcuan ní quivīcoo de ñin barco cuangoo de nde Chipre, ñuhun jeē íne sñn nuū ndúte. ⁵ Te ni jinūcoo de ñuu Salamina nuū cájecuññi barco, te ni canacani de jnūhun Yaā Dios ini tācá vehe ñi sinagoga jnáhan hebreo de. Te suni cuahān Juan chindéé ñáhán jíin de. ⁶ Te ni cajica nuu de ñí-ni Chipre nde ni jinūcoo de ñuu Pafos jeē suni íne nuū Chipre. Te yūcuan ní cajini de nuū ñin tēe hebreo nání Barjesús. Te tēe tásí cúu de, te cáhán stahú de jeē ñin tēe nácani jnūhun Yaā Dios cúu de. ⁷ Te tēe tásí un jéjníñu de nuū gobernador Sergio Paulo, te tēe ndíchí cúu gobernador ún. Te ni cana de Bernabé jíin Saulo jeē cúni nahín de jnūhun Yaā Dios. ⁸ Te tēe tásí un suni nání de Elimas. Te ndúcú ndéyí de casi de jeē ma cándíje gobernador ún. ⁹ Te Saulo jeē suni nání de Pablo, ni cunuú Espíritu Santo jíin de, te ni ndacoto vāha de nuū tēe tásí un. ¹⁰ Te ni cahān de:

Tēe sáha jniñu néé stáhú ñáhán cúu ró, chi sēhe jexeén cúu ró te jési rō nuū tācá jniñu ndaā. Te tu jécuiññi rō jeē sáca núu ró síquī jnúhun ndaā máá Jítóho yō návāha ma candíje ñáyuu nuū yā. ¹¹ Te máá Jítóho yō stóho ya rohó vijna, te cucuáá ró jeē ma cóto ga rō niāndii jecu quivī, achí Pablo.

Te ni cunee-ni nuū tēe tásí un, te quéndāha quéhiyú de cuahān de ndúcú de ndé vé jniñ ndaha de stéén ichi nuū de quinhun de. ¹² Yūcuán na te ni jini gobernador jeē súcuan ni cuu, te ni candíje de jnūhun máá Jítóho yō, te nāā ni de jíni sōho de jnūhun ya.

Jeē ní coyūcu Pablo jíin Bernabé Antioquía ndañúú Pisidia

¹³ Yūcuán na te ni quendacoo Pablo jíin Bernabé jíin Juan ñuu Pafos, te ni quivīcoo de barco te cuangoo de ñuu Perge ndañúú Panfilia. Te yūcuan ní cusñn Juan, te cuanhun de ñuu Jerusalén. ¹⁴ Te ni quendacoo Pablo jíin Bernabé ñuu Perge cuangoo de, te ni jinūcoo de ñuu Antioquía ndañúú Pisidia. Te quivī ndétātu ní quivīcoo de ini vehe ñi sinagoga, te ni cacucōo de. ¹⁵ Te ni cahu tutu ley yā jíin tutu ní catee tēe ni canacani jnūhun ya nde jenahán. Yūcuán na te tēe cácujeñnu ini vehe ñi sinagoga, vii-ni ni catajī de tēe cahān jíin Pablo jíin Bernabé:

Amigo, núu íyó jnúhun cahān ni jéé stihví ni ni ñáyuu yáha, te cahān ní na cúni nahín i núu súcuan, achí de.

¹⁶ Yūcuán na te ni ndocuiññi Pablo te ni sáha de seña jíin ndaha de jeē nahín-ni coo ñáyuu ún, te ni cahān de:

Níhín jnáhan ñuu yō Israel jíin níhín tēe jeē suni cáchiñúhún ní Yaā Dios, cuni nahín ní jijnáhan ní. ¹⁷ Máá Yáā Dios yohó ñáyuu Israel, ni nacāji ya jíí yō jijnáhan de. Te níni

jeē cáyūcu tátú de ñuu Egipto, te ni sáha ya jeē ní nducuehē de. Yūcuán na te jíin poder maá yá ni quenehen ya de nación Egipto. ¹⁸ Te uū xico cuiyā ni cajica de nuū ñūhun téhé, te ni jendeyí ni yā jíin de jeē ní castívi de. ¹⁹ Te ni snáā yā uxā nación Canaán, te ni jēhe ya ñūhun un núū tāca jíi yō cúu tahū de. ²⁰ Yūcuán na te ni jeni ya tāca tēe ni candacu jniñu nuū de nájñūhun cuūn ciento uū xico uxī cuiyā, nde quivī ní cotecu Samuel, tēe ni nacani jñūhun ya. ²¹ Yūcuán na te máá ñáyuu un ní cajicān i ññ rey, te ni jeni Yaā Dios Saúl ni ndacu de jniñu nuū i uū xico cuiyā. Te yucūn Benjamín sēhe Cis ni cuu Saúl. ²² Te ni quenehen ya jniñu Saúl, te ni jeni ya David ni cuu de rey nuū i. Te ni cahān cají yá jñūhun de: Cúsī ni rī jíin David sēhe Isai, chi sáha de tāca jeē cuní rī, achí yá.

²³ Te cáhān gā Pablo:

Te sēhe yucūn David ni cacu Jesús, Yaā ní jeni Yaā Dios jeē jnáma ya yohó ñáyuu Israel, chi súcuan ni jejnūhun ya. ²⁴ Te nde ná tu quejéé Jesús nacani ya jñūhun nuū ñáyuu, te ni nacani Juan jñūhun nuū tāca jnáhan ñuu yō Israel jeē na nácani ni i jeē stóo i cuēchi i, te cuandute i. ²⁵ Te nuū cuácuyajni jeē cúu Juan, te ni cahān de: Cándētu ró jēē quiji Cristo, te jéni ni rō jeē ruhū cúu, te nasūu rí cúu. Chi quiji ya, te cújéhnu ndasí yá jeē ni ndijēn yā tu cújéhnu ri tava rī, achí de.

²⁶ 'Amigo jijnáhan ní, tāca níhín jēē cácuu yó séhe yucūn Abraham jíin táca níhín jēē suni cándiso iyo ní núū Yaā Dios, chi cuní Yaā Dios jeē na cuní yō jñūhun yáha jeē cáhān ndese jnáma ya yohó. ²⁷ Chi tāca ñáyuu ñuu Jerusalén jíin táca tēe cácujuhnu nuū i, tu ní cájecūhun ni i jeē Jesús cúu Cristo, Yaā ní jeni Yaā Dios jeē jnáma ya yohó. Te ndijnahān quivī ndétātu ní cajini sōho i jñūhun ni cacahu jeē ní catee tēe ni canacani jñūhun Yaā Dios nde jenahán. Te vēsú súcuan te tu ní cájecūhun ni i, te ni candonda i ni cacahān i jeē na cúu yā. Te súcuan ni casquícu i siquī tāca jñūhun jeē ní cacahān tēe ni canacani jñūhun ya nde jenahán. ²⁸ Vēsú tu ní cánihīn i ni ññ cuēchi siquī yā jeē cúu yā, te ni cacahān níhín i jíin Pilato jeē na cúu yā. ²⁹ Te ná ni jīnu ni squícu siquī yā tāca jñūhun cáhān nuū tútu iī, te ni casnúu de ya jicā cruz, te ni cachindūji de ya ññ yaū ní jete jicā cáva. ³⁰ Te ni sáha Yaā Dios jeē ní natecu yā. ³¹ Te ñáyuu Galilea jeē ni jéngoo jíin yá nde Jerusalén nde na técu yā, nuū maá i ni steén ndijin yā maá yá cuehē quivī ná ni natecu yā, te ñáyuu un cácuu jeē cánacani cájí jñūhun ya nuū tāca gá jnáhan yó hebreo vijna.

³² 'Te máá ná jijnáhan ná cánacani ná jñūhun vāha yáha núū ni jíjnáhan ní jēē súcuan ni jejnūhun ya nuū tāca jíi yō. ³³ Te jñūhun yáha ní squícu Yaā Dios nuū maá yó jeē cácuu yó séhe yucūn de, chi ni nastécu yā Jesús. Chi suhva cáhān salmo uū jeē cahān yā jíin Séhe ya Jesús: Máá ró cúu Sēhe ri, te vijna ni sajéhnu ri rohó jēē cúu ri Tatá rō, achí yá. ³⁴ Te ni nastécu yā Sēhe ya Jesús návāha ma tehyú cuíti yā, chi suhva cáhān tutu iī jeē ni cáhān Yaā Dios nde jenahán: Te nihīn maá ró tāca jēē váha ni jejnūhun ri nuū David, achí. ³⁵ Te suni súcuan cáhān inga salmo jeē ní tee David jñūhun jeē cahān Jesús jíin Yáā Dios: Ma cuáha ni jñūhun tehyū ná, chi jéjníñu ná núū ní te manī ni jíin ná, achí. ³⁶ Te David chi jíni yō jeē ní jejníñu de nuū ñáyuu ní cotecu de jíin, nájñūhun ni cuni Yaā Dios. Te ni jihī de, te ni quindūji de nájñūhun ni quindūji tāca jíi yō, te ni tehyū de. ³⁷ Te Jesús, Yaā ní nastécu Yaā Dios, chi tu ní téhyú cuíti yā. ³⁸ Jeē yúcuan jíni ñūhún jecūhun ni ní, amigo, jeē Jesús cúu Yaā cóne cáhnu ni nuū tāca cuéchi yó. ³⁹ Chi ni canducú ní ndahva ni cuéchi ní jēē squícu ní ley jeē ni jēhe ya nuū Moisés, te tu ní cúu ndahvā cuéchi ní súcuan. Te Jesús cúu Yaā ndáhva ndíhi cuéchi ñáyuu jeē cácandíje i tāca jēē ni sáha ya jehē i. ⁴⁰ Núu súcuan te coto ní jíjnáhan ní jēē ma ndóho ní táca castigo jeē ní cacahān tēe ni canacani jñūhun Yaā Dios nde jenahán, chi suhva ni cahān Yaā Dios:

⁴¹ Tāca róhó ñáyuu jeē casácatā, na cóto ró na castigo xeēn quiji siquī rō, te naa ni rō coto ró, te cuu rō.

Chi tiempo maá ró te sáha ri jniñu xeēn

jeē ma cándíje cuíti rō jeē súcuan sáha ri vēsú nacani ñáyuu jñūhun un núū rō, achí yá. Achí Pablo.

⁴² Te ni quendacoo Pablo jíin táca jnáhan de vehe iī sinagoga jnáhan hebreo de. Te ñáyuu sññ nación ni cacahān ndahú i jíin de jeē inga quivī ndétátú nacani tucu de jñūhun

yáha núu i. ⁴³ Te ni jitē ñayuu un cuángoo i. Te cuehē ñayuu hebreo jíin ñáyuu sñin nación jeē ní cacandíje sahān hebreo te cáchiñúhún i nuū Yaā Dios, cuangoo i jíin Pablo jíin Bernabé. Te ni cacahān nihin de jíin i jeē na cuñi nihin i jíin jnúhun jeē maní Yaā Dios jíin i.

⁴⁴ Te quivī ndétātú inga semana te je yajni ndíhi ñayuu ñuu un ní candutútú i jeē cúni nahín i jnúhun Yaā Dios. ⁴⁵ Te nuū ní cajini tēe hebreo jeē ní candutútú cuéhē ñayuu, te ni cacucuésún ni de, te ni cacahān de jeē násūu jnúhun vāha cúu jeē steén Pablo, te ni cacahān neé de nuū Pablo. ⁴⁶ Yūcuán na te jéhu-ni ni cacahān Pablo jíin Bernabé, áchi de:

Cánuú jéē xíhna gā nuū maá ní jeē cácuu ní jnáhan ñuu yō hebreo nacani ná jnúhun Yaā Dios, te tu ní cájetáhu ní. Núu súcuan te cuēchi máá ní cúu jeē ma nihín tahu ni cotecu ni nñ cáni. Te vijna te quinacani ná jnúhun ya nuū ñáyuu tācá nación jeē tu cájini i jnúhun ya. ⁴⁷ Chi suhva ni ndacu máá Jítóho yō jniñu nuū na jíjnhān ná:

Ni jeni ri rohó jéē cúu ró nájnūhun luz jeē steén ini anuá ñayuu tācá nación, chi nñ ñayāvi steén rō jnúhun ri nuū ñáyuu jeē jnáma ri i, áchí yá.

Achí de.

⁴⁸ Te ñayuu sñin nación, nuū ní cajini sōho i jnúhun yáha te ni cacusiñ teyí ni i. Te ni cacahān i jeē yōhyo vāha jnúhun cúu jnúhun máá Jítóho yō, te tāca ñáyuu jeē ní nacāji Yaā Dios i jeē cótecu i nñ cáni, ni cacandíje i. ⁴⁹ Te ni jitē jnúhun máá Jítóho yō cuahān nñ región yūcuán. ⁵⁰ Te ñuu Antioquía cáyūcú ñahan cácuu nuū te cáchiñúhún ña Yaā Dios. Te tēe hebreo ni cascáhān de ña, te suni ni cascáhān de tēe cácujeñu ñuu ún, te ni cajito xeēn i Pablo jíin Bernabé te nde ni cascúnu i de cuangoo de. ⁵¹ Te ni cascóyo de ticachā jehē de jeē steén de jeē iyó cuéchi i. Te ni jinūcoo de ñuu Iconio. ⁵² Te vēsú súcuan te ñayuu cácuandíje un ní cunuú Espíritu Santo jíin i, te cacusiñ teyí ni i.

Jeē ní coyūcu Pablo jíin Bernabé ñuu Iconio

14

¹ Te ñuu Iconio ni quívicoo Pablo jíin Bernabé ini vehe i sinagoga jnáhan de hebreo. Te jíin jnúhun jeē ní canacani de te ni cacandíje cuehē jnáhan de hebreo, te suni súcuan cuehē ñayuu sñin nación ni cacandíje i. ² Te jnáhan de hebreo jeē tu ní cácuandíje, ni cascáhān de ñayuu sñin nación, te ni cajeni ni i jeē násūu ñáyuu vāha cácuu ñayuu cácuandíje. ³ Te ni caquendō Pablo jíin Bernabé yūcuan cuéhē gā quivī. Te jéhu-ni ni canacani de jnúhun Jítóho yō, chi cácuahnu ni de ya jeē vāha quihín jniñu un sáha ya. Te máá yá chi ni steén yā jeē iyó ndāā jnúhun jeē yóhyo vāha ni yā jíin i jeē cácanani de, chi ni jēhe ya jeē sáha de jniñu jéhu jeē steén jeē cujéhu ya. ⁴ Te ñayuu ñuu un ní cacusiñ ni i jíjnhān i, sava i jíin tēe hebreo jeē tu cácuandíje de Jesús, te sava ga i jíin tēe apóstol. ⁵ Te ñayuu hebreo jíin ñáyuu sñin nación jíin tēe cácuu tohō ni casquijnáhan jnúhun jeē sáha xeēn jíin Pablo jíin Bernabé, jíin jéē cuáha yuū xinī de núu. ⁶ Te ni cajini de jeē súcuan cácuuni sáha, te ni cajinu de cuangoo de nde ñuu Listra jíin ñuu Derbe ndañúu Licaonia jíin táca ñuu yajni yūcuán. ⁷ Te yūcuan ní canacani de jnúhun jeē jnáma ya yohó.

Jeē ní cajēhe i yuū xinī Pablo ini ñuu Listra

⁸ Te ñuu Listra néne iñ tēe jeē tu cúu caca, te tu jíca cuiti de chi nde quivī ní cacu de cácójó de. ⁹ Tēe un ní jini sōho de jnúhun jeē cahān Pablo, te ni jito vāha Pablo nuū de, te ni jini de jeē candíje vāha tēe un jéē ndúvāha de. ¹⁰ Te ni cahān jee Pablo jíin de:

Ndocuñi, condichi rō, achí de.

Te ni scānda tēe un máá de ni nucōndichi-ni de, te ni quejéé de caca de. ¹¹ Te ni cajini ñayuu ún jniñu jéhu jeē ni sáha Pablo, te ni cacahān jee i jíin yuhu máá i jeē cúu yuhu Licaonia:

Ni cuun yaā ni quecoo nuū yō, te cájica nájnūhun cájica tēe, áchí i.

¹² Te ni cacahān i jeē Bernabé cúu yaā Júpiter, te Pablo cúu yaā Mercurio chi Pablo cúu tēe nácani jnúhun. ¹³ Te yajni yuñúu un néne veñūhun yaā Júpiter. Te máá sūtū jejniñu

ini veñūhun un ní quihin de stiquī jijnáhan ti te ni scutú de ti ita te vēji de nde nuū quívi i yuñúū, te máá de jíin ñáyuu ñuu un cácu ni de cahni de stiquī un sócō de nuū Bernabé jíin Pablo nuū. ¹⁴ Te Bernabé jíin Pablo, tē cácu apóstol, ni cajito de jeē súcuan cácu ni ñayuu un sáha i, te ni candatá de sahna de jeē steén de jeē castívi ndasí i jeē casáha i súcuan. Te ni quenendava de ni quívicoo de mēhñu ñáyuu cuehē ún, te ni cacana jee de:

¹⁵ Tātā jijnáhan ní, ma sáha cuíti ni súcuan, chi sãñá suni tē-ni cácu ná nájñūhun máá ní jijnáhan ní. Te vējicoo ná nacani ná jñūhun vāha Yaā Dios nuū ní, chi cahān na jíin ní jeē ma sáha ga ni táca jniñu yáha jéé tu ndé jéjñiñu cuíti, chi sa suhva na chíñūhún ní máá Yáā Dios, Yaā técu, Yaā ni sáha andívi jíin ñáyívi jíin ndute mar jíin táca gá jeē iyó ní cáhnu. ¹⁶ Te nde jenahán ní jēhe ya jñūhun jeē na sáha tāca ñáyuu modo cácu ni máá i. ¹⁷ Te vēsú súcuan te níni stéén yā ndese Yaā cúu ya, chi máni sáha ya jniñu vāha jíin yó, chi scúun ya saū, te sáha ya jeē cúu vāha itu yō, te jēhe ya jeē jíni ñūhún yó návāha caji yō te coo sñ ni yō, achí ndíndúú de.

¹⁸ Te vēsú súcuan ni cacahān de, te yōhyo uhū ni cajesi de nuū ñáyuu un návāha tú socō i stiquī un núú de jeē chíñūhún i ndíndúú de.

¹⁹ Yūcuán na te ni quecoo jecu tē hebreo ñuu Antioquía jíin ñuu Iconio, te ni cascáhān de ñayuu cuehē ún, te ni cajēhe i yuū xini Pablo. Te ni caquenehen i de yatā ñúú ún, chi ni cajeni ni i jeē jé ni jihí de. ²⁰ Te tē cácu ndíje ni cacondúú de Pablo, te ni ndonda Pablo, te ni ndívi de ini ñuu. Te inga quívī ni quihin de ichi cuahān de jíin Bernabé nde ñuu Derbe.

²¹ Te ini ñuu un ní canacani de jñūhun jeē jnáma ya ñayuu, te ni cacandíje cuehē ñayuu ni casáha de. Te ni canandíco de cuanuhun de ñuu Listra jíin ñuu Iconio jíin ñuu Antioquía. ²² Te ni cahije ga ni ñayuu cácu ndíje yūcuán ní casáha de. Te ni castíhví ni de i jeē na cuñi nihin i jíin jñūhun ya, chi ni cacahān de jeē níni quiji cuehē jñūndóho síquī yō te yūcuán na te jinū yō ñuu nuū ndácu Yaā Dios jniñu. ²³ Te táca ñuu ni cajeni de tē jéhnu cándiso jniñu condito de ñayuu cácu ndíje. Te ni cahīyo ndite ni Pablo jíin Bernabé nuū yā, te ni cajicān tahu de, te ni cacahān de jíin máá Jítoho yō jeē na cóto ya ñayuu ún chi cácu ndíje i máá yá.

Jeē cuánuhun tucu Pablo jíin Bernabé ñuu Antioquía ndañúú Siria

²⁴ Te ni cayāha de cuango de región Pisidia, te ni najinūcoo de región Panfilia. ²⁵ Te ni canacani de jñūhun ya ini ñuu Perge región Panfilia, te sáa te cuango de ñuu Atalia. ²⁶ Te yūcuán ní quívicoo de barco, te ni najinūcoo de ñuu Antioquía. Te ñuu yūcuán cúu nuū ní cajicān tahu ñayuu nuū Yaā Dios jehē de jeē na chíndéé ñáhān yá de jeē quíngoo de nacani de jñūhun. Te ni jinu jniñu, te ni najinūcoo de ñuu ún. ²⁷ Te nuū ní najinūcoo de yūcuán, te ni casáha de junta jíin ñáyuu cácu ndíje, te ni canacani de jñūhun táca ndese cuehē jeē vāha ni sáha Yaā Dios jíin de, chi ni jēhe ya jñūhun jeē suni candíje ñayuu táca nación jeē tu ní cájini i jñūhun ya. ²⁸ Te ni caquendō de yūcuán cuéhē quívī jíin ñáyuu cácu ndíje.

Siquī junta ñuu Jerusalén

15

¹ Yūcuán na te jecu tē Judea ni quijicoo de ñuu Antioquía, te ni castéén de nuū tāca hermano jeē núu tu sáha i circuncidar, nájñūhun cáhān ley jeē ni jēhe ya nuū Moisés, te tú na modo cācu i. ² Te Pablo jíin Bernabé ni catejñāhan de jíin tē ún, te tu ní cúndaā. Te jeē yūcuán ní candajñūhún de jeē quíngoo Pablo jíin Bernabé jíin jecu gā tē cácu ndíje un ndé ñuu Jerusalén, te yūcuán ndajñūhún de síquī jñūhun yáha jíin tē cácu apóstol jíin tē jéhnu cándiso jniñu nuū ñáyuu cácu ndíje yūcuán.

³ Te ñayuu cácu ndíje un ní canachuhun íchí i de. Te ni cayāha de ichi Fenicia jíin Samaria, te canacani de jñūhun jeē suni ñayuu tāca gá nación jeē tu ní cájini i jñūhun ya, ni castóo i jniñu jeē tu íyó ndáā te ni cacandíje i Yaā Dios. Te yōhyo ni cacusñ ni tāca hermano jeē ní canihīn de jñūhun jeē súcuan ni cacandíje ñayuu ún.

⁴ Te ni najinūcoo de ñuu Jerusalén, te ñayuu cácadíje yūcuan jíin tée apóstol jíin tée jéhnū cándiso jníñu nuū ñáyuu un, ní cacusiñ ni de jeē ní najinūcoo jnáhan de ún. Te Pablo jíin Bernabé ni canacani de tāca jnúhun ndese cuehē jeē váha ni sáha ya siquī jníñu jeē ní canacani de jnúhun ya. ⁵ Te sava tēe grupo fariseo jeē cácadíje ni candocuiñi te ni cacahān:

Ñayuu sñin nación jeē cácadíje i Jesús, jíni ñúhún jeē sáha i circuncidar nájñuhun cásáha máa yó, te cánuú ndacu yó jniñu nuū i jeē na squícu i ley jeē ni jéhe ya nuū Moisés, áchí.

⁶ Te tāca tēe apóstol jíin táca tēe jéhnū cándiso jníñu nuū ñáyuu cácadíje, ni candutútú de junta návāha ndajnūhún de te sándaā de siquī jnúhun yáha. ⁷ Te tācá de ni cacahān de ndese cájeni ni de. Yūcuán na te ni ndocuiñi Pedro, te ni cahān de:

Hermano jijnáhan ní, je cájini vāha ni jéē je íyó tiempo jeē ní nacāji Yaā Dios sñā jéē quihín na núū ñáyuu sñin nación te nacani ná jnúhun nuū i jeē jnáma ya i, návāha candíje i Jesucristo. ⁸ Te Yaā Dios chi jíni yā ndese cáa ánuá ndíhi ñayuu, te ni steén yā jeē jetáhu yá i, chi suni ni jéhe ya Espíritu Santo nuū i jijnáhan i, nájñuhun ni jéhe ya nuū maá yó. ⁹ Te inuú-ni sáha ya jíin yó jíin máa i, chi siquī jeē suni ni cacandíje i jnúhun jeē jnáma ya i, te jeē yūcuan ní sándoo ya anuá i nuū tāca cuéchi i. ¹⁰ Te vijna ¿naun cácuni ní ndacu ní jniñu jeē na squícu i ley un? Chi tu nújnahan ni Yaā Dios jeē súcuan. Chi cácuni ní tee ní jniñu yí yáha síquī ñáyuu cácadíje ún, te ni tāca jíi yō tu ní cákundeyí de squícu de, te ni máa yó. ¹¹ Chi sa suhva cácadíje yó jéē jnáma ya yohó súcuan-ni siquī jeē yóhyo vāha ni maá Jítoho yō Jesús jíin yó, te suni súcuan-ni jnáma ya maá i, nasūu síquī jeē squícu i ley un, áchí de.

¹² Yūcuán na te tēe cuehē un ní cacuu nayúú de, te ni cajini nahín de jnúhun cacahān Bernabé jíin Pablo. Chi ni cacastūhún de jeē ni jéhe ya poder jeē ní casáha de tācá jniñu jéhnū jeē steén jeē cujéhnū ya, ni cajito ñayuu tācá nación jeē tu cájini i jnúhun ya. ¹³ Te nuū ni jínu ni cacahān Pablo jíin Bernabé, te ni cahān Jacobo:

Hermano jijnáhan ní, cuni sōho ní na cáhán na. ¹⁴ Ni nacani Simón Pedro jnúhun ndese ni quejéé nuú jniñu jeē jnáma Yaā Dios ñayuu tācá nación jeē tu cájini i jnúhun ya, chi suni mēhñu máa i nacāji ya ñayuu jeē ndúu i ñayuu maá yá. ¹⁵ Te quíjnahan jnúhun ni cahān de yāha jíin jnúhun ni catee tēe ni canacani jnúhun Yaā Dios nde jenahán jeē yosó núu tútu íi:

¹⁶ Achí Yáa Dios:

Nájñuhun ni cotúú vehe David cúu jeē tuá ndácu sēhe yucūn de jniñu, nájñuhun ni ndacu máa de jniñu nde jenahán.

Te ñin quiví te ndee rī

te jeē nasáha ri vehe de cúu jeē sáha ri jeē nandacu Sēhe yucūn de jniñu.

¹⁷ Súcuan sáha ri návāha tāca gá ñayuu na nánducú i ruhū

nde jíin ñáyuu tācá nación jeē tu cájini jnúhun ri, tācá i jeē cána ri i candíje i ruhū.

¹⁸ Súcuan cáhán maá Jítoho yō, te nde jenahán ní steén yā jnúhun yáha núu ñáyuu.

Achí tutu íi.

¹⁹ Jeē yūcuan jéni ni na jéē ñáyuu tāca gá nación jeē ní castóo i jniñu jeē tu íyó ndāā te ni cacandíje i máa Yáa Dios, ma stáhān yō i jeē ndácu yó jniñu jeē squícu i ley Moisés.

²⁰ Chi sa suhva na tēe yó carta quihín nuū i jeē ma cáji i ndeyu jeē ni sócō nuū ídolo, te ma cáca jnéni i, te ma cáji i cūñu quití jeē jihí jeē tu jéti ñiñi tī, te ni ma cáji i ñiñi. ²¹ Jnúhun yáha-ni tee yó quihín nuū i nájñuhun je cástéén nde jenahán. Chi nde jenahán je íyó tēe cástéén jnúhun ley jeē ni jéhe ya nuū Moisés, te ndijnahan quiví ndétatu cácahu de ley un ñiñi vehe íi sinagoga tācá ñuu, áchí Jacobo.

²² Yūcuán na te tēe apóstol, jíin tēe jéhnū cándiso jníñu, jíin ndivii ñayuu cácadíje, ni cacundaā ni de jeē nacāji de tēe quingoo jíin Pablo jíin Bernabé nde ñuu Antioquía. Te tēe ni canacāji de un cácuu Silas jíin Judas, te inga síhví de cúu Barsabás. Te cándiso jniñu de nuū tācá hermano cácadíje. ²³ Te ni cajendēca de carta jeē cahán suhva:

Máa ná cácuu tēe apóstol, jíin táca tēe jéhnú cándiso jníñu nuū ñáyuu cácadíje, jíin táca gá hermano yō. Te cátee ná carta yáha cuájeē nuū ni jíjnáhan ní, hermano, jeē cácuu ní ñáyuu sñín nación jeē cáyūcu ní ñuu Antioquía jíin Siria jíin Cilicia. Cuandeyí ni ni jíjnáhan ní. ²⁴ Ni cajini jnūhun ná jēē ní quendacoo sava jnáhan ná yáha ní jengoo nuū ní, te jíin jnúhun jeē ní cacahān de te ni casáha jeē ní canacani ndasí ni ní, te ni cacuxíi ni ní, chi cándacu de jniñu jeē sáha ní circuncidar jíin jēē squícu ní jniñu cáhán ley jenahán jēē ni jéhe ya nuū Moisés. Te nasūu sáña ní cátají tēe un jēē jeē de nuū ní. ²⁵ Jeē yúcuán ní cajeni ni ná, te inuú-ni ni cacundaā ni ná, te ni nacāji ná tēe cuajēcoo nuū ni jíin úū hermano yō jeē maní yō jíin, cúu Bernabé jíin Pablo. ²⁶ Te ndíndúú de je ni catana de máa de nuū jnúndóho vēsú na cúu de jeē síquí jnūhun Jitoho yō Jesucristo. ²⁷ Núu súcuán te cátají ná Judas jíin Silas jeē nuū ní, te suni nájnūhun cáhán carta yáha suni súcuán castūhún de nuū ni jíjnáhan ní. ²⁸ Chi máa Espíritu Santo ni steén yā ñin modo jeē ní cacundaā ni na jēē ma tēe ná táca jniñu yí ley Moisés síquí ní, chi máa-ni jniñu yáha jēē cánuú gá: ²⁹ Ma cáji ni táca jēē ní casocō nuū ídolo, ni ma cáji ni níñi ni quítí jeē jíhí jeē tu jéti níñi tī, te ma cáca jnéni ní. Te vāha squícu ní núu tuá sáha ní táca jēē yáha. Súcuán na cóo te sándeiyí ni ní, áchí carta.

³⁰ Yūcuán na te tēe quingoo un cuángoo de nde ñuu Antioquía. Te ni cacana de xiní ñáyuu cácadíje ni candutútú de junta, te ni cajēhe de carta un núu i. ³¹ Te ni cacahu i, te ni candusíi ni i jeē ni níñi i jnūhun ndeyí ni nuū carta ún. ³² Te suni tēe canacani jnūhun Yaā Dios cácuu Judas jíin Silas, te jíin cuéhē jnūhun ni cacahān de te ni candundeyí ni tācá hermano un, te ni cahije ga ni i jíin jnúhun ya. ³³ Te ni coyūcú de yūcuán jecu quiví. Yūcuán na te hermano yúcuán ní canacuatahú i nuū de jeē quínuhun de nuū tēe jeē ní catajé de. ³⁴ Te Silas ni nujnahan ni de ni quendōo de yūcuán. ³⁵ Te suni ni caquendōo Pablo jíin Bernabé ñuu Antioquía, te máa de jíin sava ga tēe ni castéén de te ni canacani de jnūhun vāha máa Jítoho yō.

Jeē quihín Pablo inga jínu nacani de jnūhun ya

³⁶ Te ni cuu ga quiví, te ni cahān Pablo jíin Bernabé:

Vijna te na quícondēhe yó tācá hermano yō ndijnahan ñuu nuū ní nacani yó jnúhun máa Jítoho yō, na cóndēhe yó ndese cáhīyo i, áchí de.

³⁷ Te Juan jeē suni nání de Marcos, cúni Bernabé jeē quihín tēe un jíin de. ³⁸ Te tu ní cúni Pablo jeē quihín tēe un jíin de, chi nde Panfilia ni cusíin Marcos nuū Pablo jíin Bernabé, chi tuá ni chindéé ñáhán de ndíndúú tēe un síquí jniñu ya nde saá. ³⁹ Te nahán ní candajnūhun Pablo jíin Bernabé, te tu ní cácuandaā ni de síquí Marcos, te ni cacusíin de. Te Bernabé ni jeca de Marcos, te ni quívicoo de barco cuángoo de nde Chipre, ñuhun jeē íne sñín nuū ndúte. ⁴⁰ Te Pablo ni nacāji de Silas quihín jíin de. Te tācá hermano cácadíje ni cajicān tahu de nuū máa Jítoho yō jeē síquí jeē váha ni yā te na chindéé ñáhán yá Pablo. Te cuahān Silas jíin Pablo. ⁴¹ Te ni cajica cuu de ní Siria jíin Cilicia. Te táca grupo ñáyuu cácadíje ni cahije ga ni i jíin jnúhun ya ni casáha de.

Jeē cuahán Timoteo jíin Pablo jíin Silas

16

¹ Yūcuán na te sáa te ni jinū Pablo jíin Silas ñuu Derbe jíin ñuu Listra. Te yūcuán néne ñin tēe suchí cándíje, nání i Timoteo. Sēhe yí ñin ñahan hebrea cúu i, te ñahan cándíje cúu ña. Te tátá i chi tēe griego cúu de. ² Te tācá hermano ñuu Listra jíin ñuu Iconio cájejnūhún de Timoteo. ³ Te cúni Pablo condeca de Timoteo quihín de jíin i. Te ni cahān Pablo jeē quihín i cuu i circuncidar, chi tu cúni Pablo jeē cahān ñáyuu hebreo jeē tu ní squícu Timoteo costumbre un, chi ndíhi ñáyuu cájini i jeē tēe griego cúu tátá i. ⁴ Te tācá ñuu nuū cuángoo de te ni cacastūhún de nuū ñáyuu cácadíje jeē na squícu i máa jniñu jeē ní casándaā tēe apóstol jíin táca tēe jéhnú cáyūcú ñuu Jerusalén jeē cándiso jníñu nuū ñáyuu cácadíje. ⁵ Te ñáyuu cácadíje ni cahije ga ni i. Te ndijnahan quiví ni cacandíje cuehē gā ñáyuu.

Jeē ní jito ndijin Pablo ñin tēe ñuu Macedonia

⁶ Te tu ní jéhe Espíritu Santo yā jnūhun jeē nácani de jnūhun ya níí Asia. Jeē yúcuan ní cayāha de ichi Frigia jíin Galacia cuangoo de. ⁷ Te ni jinūcoo de nuū quijnáhan Misia jíin Bitinia. Te cáculi de quingoo de Bitinia, te máá Espíritu Jesús tu ní jéhe ya jnūhun quingoo de. ⁸ Te ni cayāha de ñin lado Misia cuangoo de ñuu Troas jeē íne yajni yumar. ⁹ Te ñin jecuāa te nájnūhun ñin jēni ni jito ndijin Pablo, te ni jito de jeē índichi ñin tēe ñuu Macedonia nuū de cáhán ndahú jíin de: Nehen ní ñuu ná Macedonia te chindéé ñáhán ní sãña jíjnáhan ná, áchí. ¹⁰ Te súcuan ni jito ndijin de. Yūcuán na te sãña, Lucas, ni quijnáhan ná jíin de. Te ni casátūhva ná jíin de jíjnáhan de jeē quingoo ná Macedonia, chí ni cajini cají ná jeē máá Yáa Dios tájí yá sãña jíjnáhan ná jēe castūhun ná nuū ñáyuu yúcuan jnūhun jnama ya i.

Jeē ní coyūcu Pablo jíin Silas ñuu Filipos

¹¹ Te jíin barco ni quendacoo ná ñuu Troas, te cuangoo ndaā-ni ná ndé Samotracia, ñuhun jeē íne sñin nuū ndúte. Te inga quivī ni jinūcoo ná ñuu Neápolis. ¹² Te yúcuan ní quendacoo ná, te ni jinūcoo ná ñuu Filipos jeē cúu ñuu cuyéhnu ga íne Macedonia, chí máá ñáyuu ñuu Roma ni casáha i ñuu i ún. Te ni coyūcu ná ñuu Filipos jecu quivī. ¹³ Te ñin quivī ndétātu ní quendacoo ná ñuu ún, te ni jengoo ná ñin yuyúte, chí yúcuan cúu ñin lugar nuū cájicān tahu ñayuu. Te ni cacucōo ná, te ni canacani ná jnūhun ya nuū tācá ñahan ní canataca yūcuán. ¹⁴ Te ñin ña nání Lidia jeē véji ña ñuu Tiatira, xíco ña sahma ndihí jēe yáhu ga ndeé. Te máá ña níní chíñúhún ña Yaā Dios. Te ni jini sōho ña jnūhun canacani ná, te máá Jítóho yō Jesús ni sáha ya jeē ní candíje ña jnūhun jnáma ya ña jeē ni cáhān Pablo. ¹⁵ Te ni jendute ña nde jíin ñáyuu cáyūcú vehe ña, te ni cahān ndahú ña jíin ná:

Núu cáculáhnun ni ni jēe candíje ndije ná máá Jítóho yō, te cuajeē ní coyūcu ní vehe ná, áchí ña.

Te ni cana fuerza ña sãña jíjnáhan ná.

¹⁶ Te ñin quivī te cuangoo tucu ná suu lugar nuū jéngoo ñayuu cájicān tahu. Te ni canajnáhan ná jíin ñin sūchi sñhí jēe ñūhun tachī ini i, te máá un sáha jeē cahán i tācá ndese coo te cúndaā jeē cahán i. Te sūchí un ní cajeen patrón i, návāha nihīn de cuehē xūhun síquī jeē cástūhún i nuū ñin ñayuu ndese coo ichi núu. ¹⁷ Te sūchí un ndíquin i sãña jíjnáhan ná cána jee i:

Tēe yáha cájejniñu de nuū Yaā Dios, Yaā cuyéhnu téyí, te cácastūhún de ndese cācu ní núu cuéchi ní jíjnáhan ní, áchí i.

¹⁸ Te cuehē quivī ni cuu súcuan te nde ni jnaniní ni Pablo. Te ni ndió cóto de nuū i, te ni cahān de jíin táchí ún:

Jíin poder máá Jesucristo ndácu ri jniñu nuū rō jeē na quénda ró ini i quihīn rō, achí de.

Te hora un ní quenda-ni cuahān.

¹⁹ Yūcuán na te ni cajini patrón i jeē ma níhín gā i xūhún cuu de, te jeē yúcuan ní cajniñ de Pablo jíin Silas cuangoo jíin de nde vehe juzgado nuū cáyūcu tóhō. ²⁰ Te ni cajeni ún de nuū juez, tēe cásándaā jniñu, te ni cacahān:

Tēe hebreo cácuu tēe yáha, te cástóna de ñayuu ñuu yō cúvaā i. ²¹ Te cájequin de inga costumbre jeē ma cúu cuatáhu cuiti yō, ni ma cúu sáha yó, chí tu jéhe ley nación yō jnūhun, chí ñayuu nación Roma cácuu yó, áchí.

²² Te suni ní candonda ñayuu síquī Pablo jíin Silas. Te tēe cácuu juez ni candacu de jniñu jeē na quénda sahma ndíndúú de te caní yujnu síquī de. ²³ Te nuū ni jínu ni cacani téyí un de, te ni casquíví de vecāa. Te ni candacu jniñu nuū tēe ndíto vecāa jeē na cóndito ndasí de jeē ma cácu ndíndúú tēe ún. ²⁴ Te jeē súcuan ni tahū jniñu nuū tēe ndíto vecāa te ni squíví de Pablo jíin Silas nde ichi íni gā, te ni squíví jehē de tīsīn yujnu ndéé yaū te ni cajihni de.

²⁵ Te nuū ní cuu sava ñuu, te cájicān tahu Pablo jíin Silas, te cájita de yaa i nuū máá Yáa Dios. Te ñayuu cáhīn jíin de vecāa un ní cajini nahín i. ²⁶ Te sanaa-ni te ni jnāa

nīhin téyí, te nde nuū cimientu vecāa un ní canda. Te ni canune-ni yéhyí vecāa ún, te ni canandajī-ni cadena jeē cánuhnī tāca ñáyuu ún. ²⁷ Te ni natahū ni tēe ndíto vecāa, te ni jito de jeē núne yéhyí vecāa ún. Te ni tava de espada jeē cáhni de máá de núú, chi ni jeni ni de jeē ndivii cuiti ñáyuu cáhiin vecāa un cuángoo i. ²⁸ Te ni cana jee Pablo:

Ma cáhni ni máá ní, chi cáhiin ndīhi ná, áchí de.

²⁹ Yūcuán na te máá tēe ndíto vecāa ni cana de jeē na quíndeca i ñuhūn, te yachī ni quívi de ini vecāa. Te ni jecuiñī yití de nuū Pablo jíin Silas, te quísi i de jeē yūhú de. ³⁰ Te ni quenehen de Pablo jíin Silas, te ni cajnūhún de:

Tátā, ¿na vé cánuú sáha ná te jnama ya sãñá? áchí de.

³¹ Te ni cacahān de jíin tēe ún:

Candíje ní táca jēe ni sáha Jitoho yō Jesucristo jehē ní te cācu ní, te suni súcuan cācu ndīhi ñáyuu cáyūcú vehe ní, áchí de.

³² Te ni canacani de jnūhun máá Jítoho yō nuū tēe un jíin núū táca ñáyuu cáyūcú vehe de. ³³ Te suu máá jecuaā yúcuan ní nacate tēe ndíto vecāa un núú ní catujī Pablo jíin Silas jeē ní cacani yujnu siquī de. Yūcuán na te ni jendute de jíin ndīhi ñáyuu cáyūcú vehe de.

³⁴ Te ni jeca de Pablo jíin Silas cuahān de jíin vehe de, te ni jēhe de staā ni cayejí de, te cácusī ni ndīhi de vehe de jeē ní cacandíje de Yaā Dios.

³⁵ Te nuū ní cundijin, te tēe cácuu juez ni catají de policía cuangoo jíin jnūhun jeē na síáá tēe ndíto vecāa un Pablo jíin Silas quingoo de. ³⁶ Te tēe ndíto vecāa un ní castūhún de jnūhun yáha núū Pablo:

Tēe cácuu juez ni catají de jnūhun vēji jeē na síáá na níhín quíngoo ní. Núu súcuan te quendacoo ní quíhín ní, te cuandeyí ni ní, áchí de.

³⁷ Te ni cahān Pablo jíin policía:

Cuehē ñáyuu ni cajito i jeē ní cacani de sãñá, te ni tu ní cásandaā de xīhna gā núu ndaā jeē iyó cuéchi ná. Te ni cachuhun de sãñá vecāa, vēsú cácuu ná séhe nación Roma, te íyó ley jeē ma cúu sáha súcuan jíin ñáyuu cácuu séhe nación Roma. Te vijna ¿á quenehen sãhí de sãña cácuu de naún? Ma cúu cuiti. Na quícoo máá de quenehen de sãña jíjnáhan ná, áchí Pablo.

³⁸ Te ni canandió cóo policía ni castūhún de jnūhun yáha núū tēe cácuu juez, te ni cayūhú de jeē ní cajini sōho de jnūhun jeē séhe nación Roma cácuu Pablo jíin Silas. ³⁹ Te ni quecoo tēe cácuu juez ún, te yōhoyo ni cacahān ndahú jíin Pablo jíin Silas jeē na cóne cáhnu ni de. Te ni caquenehen de vecāa ún, te ni cacahān ndahú jíin de jeē na quéndacoo de ñuu un quíngoo de. ⁴⁰ Yūcuán na te ni quendacoo de vecāa, te ni jengoo tucu de vehe Lidia, te ni cacahān de jnūhun ndeyí ni jíin táca hermano. Te ni caquihin de ichi cuangoo de.

Jeē ní cacuvaā ñáyuu Tesalónica

17

¹ Te Pablo jíin Silas ni cayāha de ñuu Anfípolis jíin ñuu Apolonia cuangoo de, te ni jinūcoo de ñuu Tesalónica nuū iyó iin vehe iī sinagoga jnāhan de hebreo. ² Te ni coyūcú de yūcuan únī semana, te tāca quívī ndétātu jéhén Pablo vehe iī sinagoga, nájñūhun sáha sáha de, te ni nacani de jnūhun ya nuū tēe un. ³ Te jíin jnūhun cáhán tutu iī ni steén de jeē súcuan ni jini ñūhún ndoho Cristo jeē cúu yā te natecu yā. Te ni cahān de:

Jnūhun nácani ná núū ni cúu jnūhun Jesús, te máá yá cúu Cristo, Yaā ní jeni Yaā Dios jeē jnáma ya yohó, áchí de.

⁴ Te ni cacandíje sava jnāhan de hebreo jíin cuéhē ñáyuu griego jeē cáchiñūhún i Yaā Dios, jíin cuéhē ñahan cácuu nuū, te ni nduu inuú ni i jíin Pablo jíin Silas. ⁵ Yūcuán na te yōhoyo ni cacucuésún ni jnāhan de hebreo jeē tu cacandíje, te ni castútú tēe cunéé jēe cájica cúxí-ni, te ni quejéé cácana ndee cuangoo. Te súcuan ni casaca núu de xinī ñáyuu ñuu ún. Te ni jengoo de vehe Jasón cananducú de Pablo jíin Silas jeē jñí de tēe un quíndeca de nuū ñáyuu cuehē. ⁶ Te tu ní cánanihín de, te ni cañuhun de Jasón jíin sava

ga hermano cuango de jíin núu tohó ñuu ún. Te jeē siquí Pablo jíin Silas ni cacana jee de:

Tēe jeē castívi xíní ñáyuu ní ñáyívi, je ni quecoo de nde yāhá. ⁷ Te máá Jasón ni jēhe núu vehe cáyūcu tēe ún. Te tēe ún tu cájetáhu de ley maá rey yohó ñáyuu Roma, chi sa suhva cácahān de jeē cájetáhu de nuū inga rey jeē naní Jesús, achí de jíjnáhan de.

⁸ Te ñayuu jíin tēe cácuu tohō ni cajini sōho i jnūhun yáha, te ni cacuvaā i siquí. ⁹ Te Jasón jíin táca gá hermano ni castóo de xūhún de, chi ni cacahān tohō un jíin de jeē nde núu tají de Pablo jíin Silas quingoo de inga ñuu, yūcuán na te nacuaaha tohō un xūhun de. Te súcuan te ni casiáá de Jasón jíin táca gá hermano cuango de.

Jeē ní coyūcu Pablo jíin Silas ñuu Berea

¹⁰ Yūcuán na te tǎcá hermano un, yachī-ni ni cascáca de Pablo jíin Silas jecuáa un, cuango de nde ñuu Berea. Te nuū ni jínūcoo de yūcuán, te ni quívicoo de vehe íi sinagoga jnáhan ñuu de hebreo. ¹¹ Te jnáhan ñuu de hebreo cáyūcu yúcuan, vāha ga ni maá de vēsú jnáhan ñuu de hebreo cáyūcú ñuu Tesalónica, chi vāha ni cacusií ni de jíin jnúhun ni cacahān Pablo jíin Silas. Te ndijnahan quívī cānanducú yúcún de nuū tútu íi núu súcuan cáhán chí tuú. ¹² Jeē yúcuan ní cacandíje cuehē jnáhan ñuu de hebreo te suni nde jíin cuehē ñayuu griego, cúu tēe cúu ñahan cácuu nuū. ¹³ Te jnáhan ñuu de hebreo cáyūcú ñuu Tesalónica ni cajini jnūhun de jeē suni nde ñuu Berea nácani Pablo jnūhun Yaā Dios, te ni caquihin de ichi cuango de Berea, te suni yūcuán ní castóna de ñayuu siquí Pablo. ¹⁴ Yūcuán na te tǎcá hermano ni catajī-ni de Pablo cuahān de nde yumar. Te ni ndō Silas jíin Timoteo ñuu Berea. ¹⁵ Te jecu hermano ni cajendēca de Pablo nde ñuu Atenas. Te ni cahān Pablo jíin de jeē cahān de jíin Silas jíin Timoteo jeē na quingoo yachī de nuū Pablo. Te vendicoo de ñuu Berea.

Jeē ní íne Pablo ñuu Atenas

¹⁶ Te níní ndétu Pablo jeē jinúcoo Silas jíin Timoteo nuū de ñuu Atenas, te ni jini de jeē ñáyuu ñuu ún yōhoyo cáchiñúhún i ídolo, te ni nacani cuíhyá ni de. ¹⁷ Te ini vehe íi sinagoga ni cahān de jnūhun ya jíin jnáhan ñuu de hebreo jíin táca gá tēe cáchiñúhún Yáa Dios. Te suni tǎca quívī ni nacani de jnūhun ya nuū tǎca ñáyuu cáhiin nuū yáhu. ¹⁸ Te sava tēe cácuáha jnūhun jeē castéén grupo epicúreo, jíin inga sava tēe cácuáha jnūhun jeē castéén grupo estoico, ni caquejéé cácahān jíin Pablo. Te sava ni cacahān:

¿Na jnūhun cáhán tēe tǎlólhlé yáha? áchí.

Te sava ga de ni cacahān:

Tēe nácani jnūhun tǎca yáa jeē tu cánevāha yó cúu de, áchí.

Súcuan ni cacahān de, chi nácani Pablo jnūhun vāha Jesús jeē ní natecu yā mēhñu ndíyi. ¹⁹ Te ni cajeca de Pablo cuango de, te ni jinúcoo de nde lugar nuū naní Areópago nuū cándutútú ñáyuu cándacu jniñu, te ni cacahān de:

Cácuni ná cachi ni núu na jnúhun jeé jéé steén ni. ²⁰ Chi cáhán ni jnúhun jeé ná tu cuni cuiti na jíjnáhan ná, te jeē yúcuan cácuuni ná jecūhun ni na síquī tǎca jnúhun yáha, áchí jíin de.

²¹ Chi tǎca ñáyuu ñuu Atenas jíin táca ñáyuu inga ñuu jeē cáyūcu núu i yūcuán, tuá na inga jniñu cácusíi gā ni i jíin chi máa-ni jeē cuni nahín i jnūhun jeé chí jéé cahán i jnūhun jeé.

²² Te índichi Pablo mēhñu ñáyuu ní candutútú núu naní Areópago, te ni cahān de:

Tēe ñuu Atenas jijnáhan ní, jító ná jéé yóhoyo cáchiñúhún ní yaā maá ní. ²³ Chi ni jica nuu ná, te ni jecondēhe ná nuū jeē cáchiñúhún ní, te ni jito ná ñin altar jeē yosó jnúhun yáha: Yáha cúu altar yaā jeē ná tu cuni yō jnūhun ya, achí. Te máá Yáa un jéé cáchiñúhún ní, vēsú ná tu cuni ni jnúhun ya, suu jnūhun Yaā un cúu jeē nácani ná núu ní vijna.

²⁴ 'Chi Yaā un cúu Yaā jeē ni sáha ñayívi jíin táca ndíhi jeé iyó, te máá yá cúu Jitoho andívi jíin ñayívi, te tu ndéé yá ini veñūhun cásáha ñayuu. ²⁵ Te ni tu cúmani ni ñin nuū yā jeē cuáha ñayuu nuū yā, chi máá yá sáha jeé técu ñayuu, jíin jéé stáa i tachí i, jíin jéé nihín i ndíhi jeé jíni ñúhún i.

²⁶ Te ni sáha ya jeē chíji ñn-ni yucūn ni tahū tāca ñáyuu jeē ní nduu tācá nación, nāvāha coyūcú i ní cáhnu ñayiví, te ni tana yā cuiyā cotecu ñayuu jíin lugar coyūcú i jíināhan i. ²⁷ Te súcuan ni sáha ya chi cúní yā jeē nanducú yó yā, chi núu nanducú yó yā te cuni yō jeē iyó yá, chi yajni-ni cúu ya jíin ñn ñn yó. ²⁸ Chi máá yá sáha jeē iyó yó jíin jéē cátecu yō jíin jéē cáanda yō. Chi suni súcuan ni cacahān sava tēe ñuu ni jéē cātava yaa: Suni nde yucūn maá yá cácuu yó, áchí. ²⁹ Te núu yucūn Yaā Dios cácuu yó, te ma cáni ni yō jeē ídolo oro chí plata chí yūū cúu ya, chi cájeni ni ñayuu jeē súcuan cáa ya, te súcuan cásāvāha i ídolo. ³⁰ Te ni jendeyí ni yā siquī jeē tu ní cájecūhun ni i ní ndé saá, te vijna chi ndácu ya jniñu jeē ñáyuu ní cáhnu ñayiví na nácani ni i jeē stóo i cuēchi i. ³¹ Chi Yaā Dios, je ni jeni ya quiví jeē ndaā sándaā yā siquī ñayuu ñayiví, te ni jeni ya Jesús jeē máá yá sándaā. Te je ni steén cají Yaā Dios nuū tāca ñáyuu jeē máá yá ni jeni Jesús, chi ni nastécu yā Jesús, achí Pablo.

³² Te jeē ní cajini sōho i jnūhun jeē nátecu ndīyí te sava i ni cacahān catá i, te sava ga i ni cacahān i:

Vāha te núu cuu cuni sōho na jnūhun cáhán ni ndé inga jínu, áchí i.

³³ Te ni quenda Pablo mēhñu ñáyuu un cuáhān de. ³⁴ Te cuahān jecu ñayuu jíin Pablo, te ni cacandíje. Te ñn de cúu Dionisio, tēe ndútútú jíin tēe cácujuhnu cásáha junta nuū naní Areópago, jíin ñn ñahan nání Dámaris, jíin jecu gā i.

Jeē ni íne Pablo ñuu Corinto

18

¹ Yūcuán na te ni quenda Pablo ñuu Atenas, te cuahān de nde ñuu Corinto. ² Te yūcuan ní jito de nuū ñn jnáhan ñuu de hebreo, nání Aquila, te tēe región Ponto cúu de. Te sáa jecu-ni tiempo ni quee de jíin ñasihí de Priscila jeē ní quenda de Italia, chi rey Claudio ni ndacu de jniñu jeē na quéndacoo tāca ñáyuu hebreo ñuu Roma, jeē cúu capital Italia. Te ni jinū Pablo vehe Aquila jíin Priscila jeē cáyūcú de ñuu Corinto. ³ Te suni jniñu sáha tēe un sáha Pablo, chi cáquicu de ñni cuu vehe. Te ni quendōo Pablo jíin tēe ún, te ni casájniñu de. ⁴ Te tāca quiví ndétātu ní jehēn Pablo vehe i sinagoga ni nacani de jnūhun ya, te ni nducú ndéyí de jeē na cándíje ñayuu jnūhun Jesús, cúu jnáhan ñuu de hebreo jíin ñáyuu tācá nación jeē tu ní cajini i jnūhun ya.

⁵ Te ni jinūcoo Silas jíin Timoteo ñuu Corinto jeē véjicoo de nde Macedonia. Yūcuán na te tuá na inga jniñu ní sáha Pablo, chi máni jnūhun ya nácani cájí de nuū ñáyuu cácuu jnáhan de hebreo, jeē máá Jesús cúu ya Cristo, Yaā jeē cáñūhun ni i quiji ya. ⁶ Te ni caquejéé i ni cacahān i siquī jnūhun ún, te ni cacahān xeēn i nuū Pablo. Te máá de ni caja de sahma de jeē cúu seña jeē stóo de i jíin cuéchi i, te ni cahān de jíin i:

Cuēchi máá ní cúu jeē jnahnū ndetū ni núu súcuan, te nasūu cuéchi máá ná cúu. Nde vijna te quihñn na núu ñáyuu tācá nación jeē tu cajini i jnūhun ya, te nacani ná jnūhun ya nuū i, áchí de.

⁷ Te ni quenda de ini vehe i sinagoga, te ni jinū de vehe ñn tēe nání Justo ni condee de. Te chíñúhún tēe un Yāā Dios, te vehe tēe un néne yajni xiin véhe i sinagoga. ⁸ Te Crispo, tēe cújehnu ini vehe i sinagoga, ni candíje de máá Jítoho yō nde jíin ndíhi ñayuu vehe de. Te cuehē ñayuu ñuu Corinto ni cajini nahín i jnūhun nácani Pablo, te ni cacandíje i, te ni cajendute i. ⁹ Te ñn jecuāā ni sáha máá Jítoho yō jeē ní jito ndijin Pablo yā ni cahān yā jíin de:

Ma yūhu ró ni ma cásí rō yuhu ró, chi níni nacani ró jnūhun ri. ¹⁰ Chi ndíto ri rohó, te ma cúu sáha xeēn ni ñn ñayuu jíin ró. Nacani ró jnūhun ri, chi coo cuehē ñayuu candíje jnūhun ri ñuu yáha, áchí yá.

¹¹ Te ni condee Pablo yūcuán ñn cuiyā yosáva ni steén de jnūhun Yaā Dios nuū ñáyuu ún.

¹² Te ná cúu Galión gobernador Acaya, te ñayuu hebreo jeē cúu jnáhan ñuu Pablo, ñn cáhnu-ni ni candonda i siquī Pablo. Te ni cajeca i de cuangoo i jíin de nde vehe juzgado.

¹³ Te ni cacahān i jíin Galión:

Tēe yáha yōhyo scáhán de tāca ñáyuu jeē inga modo chiñúhún i Yaā Dios, suu ñn modo jeē cúu contra siquī ley, achí i.

¹⁴ Te quejéé Pablo cahān de núu, te ni cahān-ni Galión jiín ñáyuu hebreo un:

Ñayuu hebreo jijnáhan ró, núu ñn cuēchi xeēn cúu, te cánuú cuni nahín rí jnūhun cácahān rō núu. ¹⁵ Te tuú, chi máni siquī jnūhun-ni jíin síquī ley maá ró jíin síquī tēe cástéén cúu. Te na sándaā maá ró siquī jniñu yáha, chi tu sándaā rī siquī maá ñn jeē súcuan-ni, áchí de.

¹⁶ Te ni cahān de nuū i jeē na quíngoo i fuera. ¹⁷ Yūcuán na te ñayuu griego ni cajniñ i Sóstenes, tēe cújéhnú ini vehe ñi sinagoga, te máá fuera yehyí vehe juzgado ni cacani i de, te Galión chi tu ní sáha cuiti de cuenta.

Jeē ní najinū Pablo ñuu Antioquía, te cuahān de vuelta unī jeē nacani de jnūhun ya

¹⁸ Te cuehē gā quivī ni condee Pablo ñuu Corinto. Yūcuán na te ni nacuatáhu de nuū tācá hermano yúcuan, te Aquila jíin ñasihí de Priscila cuango de jíin Pablo, te ni jinūcoo de ñuu Cencrea. Te yúcuan ní saté lii Pablo xinī de, te súcuan stéén de jeē squícu de nuū Yaā Dios jeē ni jéjnūhun de. Te ni quivícoo de barco jíin Aquila jíin Priscila quihín de región Siria. ¹⁹ Te ni jinūcoo de ñuu Efeso, te yúcuan ní caquendōo Aquila jíin Priscila. Te ni jehēn-ni Pablo vehe ñi sinagoga, te ni cahān de jnūhun ya jíin jnáhan ñuu de hebreo jeē cándutútú yúcuan. ²⁰ Te ni cacahān ndahú i jíin de jeē na cónēne de jecu gā quivī jíin i, te tu ní jéhe de jnūhun. ²¹ Chi ni nacuatáhu de nuū i, te ni cahān de:

Cánuú jéé nuhūn ná ñuu Jerusalén cone ná vico. Te núu cúní Yaā Dios te ndee tucu ná núu ní, áchí de.

Te ni quenda de ñuu Efeso, te ni quiví de barco cuahān de. ²² Te ni jinū de ñuu Cesarea, te ni jehēn de ñuu Jerusalén. Te nuū ní ndihí ni cahān de jíin grupo ñayuu cácañdije yūcuán, te cuanuhun de ñuu Antioquía. ²³ Te ni coyúcú de yūcuán jecu quivī, te sáá te ni quenda tucu de cuahān de ni jica cuu de ní Galacia jíin Frigia. Te ñayuu cácañdije ni cahije ga ni i jíin jnūhun ya ni sáha de.

Jeē ní nacani Apolos jnūhun Jesús ñuu Efeso

²⁴ Te ñuu Efeso ni quee ñn tēe hebreo nání Apolos, te tēe ñuu Alejandría cúu de. Te vāha nácani de jnūhun ya, chi vāha jíin de jnūhun jeē cahán tutu ñi. ²⁵ Te je ni cutūhva vāha tēe un jíin jnūhun máá Jítóho yō Jesús, vēsú jiní de máni máá jnūhun ya jeē ni stéén Juan ná ni scuándute de ñayuu, te ndíhví ni de stéén cají de jnūhun ya nuū ñáyuu. ²⁶ Te jéhnú-ni ni nacani de jnūhun ya ini vehe ñi sinagoga. Te ni cajini sōho Aquila jíin Priscila jnūhun nácani de, te ni cajeca de Apolos cuango sñn de, te ni cacastūhun yúcún ndíndúú de jnūhun ya jeē ná tu cuni Apolos. ²⁷ Te cúní Apolos quihín de nde región Acaya. Te je cácañdije sava ñayuu yúcuan ní sáha Yaā Dios siquī jeē vāha ni yā. Te tācá hermano ñuu Efeso ni cachindéé ñáhán i de, chi ni catee i carta quihín de jíin núu ñáyuu cácañdije cáyúcú Acaya jeē na cuatáhu i Apolos. Te nuū ní jinū de yūcuán, te vāha ni chindéé ñáhán de tāca ñáyuu cácañdije un jíin jnūhun ya. ²⁸ Te nuū tāca ñáyuu ñuu un ndé jíin jnáhan ñuu de hebreo jeē cáyūcu yúcuan, ní stéén cají de ndese cástívi táca jnáhan hebreo de siquī jnūhun ya. Te tu ní cániñ jnáhan de un jnūhun cahān siquī jeē ni stéén de, chi jíin jéé cahán tutu ñi ni stéén de jeē Jesús cúu Cristo, Yaā jeē cáñūhun ni de quiji ya.

Jeē ni íne Pablo ñuu Efeso

19

¹ Te níní néne Apolos ñuu Corinto, te ni yáha Pablo ichi síquí ñuu Efeso, te ni nanuu de ni jinū de máá ñuu ún. Te yúcuan ní nijnáhan de jíin tijni tēe cácañdije. ² Te ni cajnūhún de tēe ún:

¿A ní canihín ní Espíritu Santo ná ni cacandije ní, chí ná tuú? áchí de.

Te ni cacahān de jíin Pablo:

Tuú, chi ni ná tu nihín na jnūhun jeē iyó Espíritu Santo, achí de.

³ Yūcuán na te ni cahān Pablo:

¿Na siquī ni cajendute ní núu súcuan? áchí de.

Te ni cacahān de:

Ni cajendute ná síquī jnúhun ni steén Juan, achí de.

⁴ Te ni cahān Pablo:

Jeē ní scuándute Juan ñayuu cúu jeē ni steén de jeē na nácani ni i jeē stóo i cuēchi i, te ni cahān de jeē na cándíje i máá Yáa quiji jeē cúu Cristo Jesús, áchí Pablo.

⁵ Te nuū ní cajini sōho tēe un jnúhun yáha, te ni cajendute de jeē ní cacandíje de máá Jítóho yō Jesús. ⁶ Te ni soó Pablo ndíndúú ndaha de xinī tāca tēe ún, te ni quívi ni Espiritu Santo ini anuá de jíjnáhan de, te ni cacahān de sīn sīn yuhu te ni canacani de jnúhun ya. ⁷ Te ni iyo nájnūhun uxī uū jnahān tēe.

⁸ Te unī yoō ni jehēn jehēn Pablo vehe iī sinagoga. Te jéhnú ni nacani de jnúhun ya, te ni nducú ndéyí de jeē na cándíje ñayuu jnúhun ndese ndácu Yaā Dios jniñu. ⁹ Yūcuán na te sava i ni cacunihni ni i te tu ní cácaandíje i, chi sa ni cacahān neé i síquī jnúhun vāha Yaā Dios jíin ñáyuu cánataca. Jeē yúcuan ní cujiyo-ni Pablo nuū ñáyuu ún, te ñayuu cácaandíje cuangoo i jíin de. Te ndijnahan quivī ni steén de nuū ñáyuu ún ini escuela iin tēe nání Tiranno. ¹⁰ Te súcuan ni sáha de uū cuiyā, te tāca ñáyuu cáyūcu Asia, cúu ñayuu hebreo cúu ñayuu tāca gá nación, ni cajini sōho i jnúhun máá Jítóho yō Jesús. ¹¹ Te ni jēhe Yaā Dios poder nuū Pablo jeē sáha de cuehē jniñu jéhnú téyí. ¹² Te nde pañú jíin sahma jeē ní jni de ni cajengoo jíin núu ñáyuu cácuñu, te ni canduvāha-ni i cuehyī cándoho i, te ni quendacoo tachī ini i cuangoo.

¹³ Te jecu tēe hebreo cájica cuu de jeē quénehen de tachī ini ñayuu, te ni cajeni síquī ni de jeē suni jíin poder maá Jítóho yō Jesús quenehen de tachī, te suhva ni cacahān de jíin táca táchi:

Jíin poder Jesús jeē nácani Pablo jnúhun ya, cáhān nihin ri jíin ró jeē na quénda ró quíhīn rō, achí de.

¹⁴ Te súcuan ni casáha uxā sēhe yí iin tēe hebreo nání Esceva, cúu de iin sutū cujéhnú.

¹⁵ Te ná ni casáha de, te ni cahān-ni tachī ún:

Je jíin rī Jesús, te suni jíin rī Pablo. Te róhó jíjnáhan ró ¿ndé tēe cácuu ró jéē cuatáhu rí rohó? áchí jíin de.

¹⁶ Te tēe ndóho tachī un ní ndonda de, te ni cundeyí de síquī ndihúxá tēe ún. Te ni sáha xeēn ndasí de jíin ndé ni catují te ni cacuvichí líi ni quendacoo vehe un ní cajinu cuangoo. ¹⁷ Te jnúhun yáha ní cajini tāca ñáyuu cáyūcú ini ñuu Efeso, cúu ñayuu hebreo cúu ñayuu tāca gá nación, te yōhyo ni cayūhú i, te ni cacahān i jeē yōhyo cújéhnú máá Jítóho yō Jesús.

¹⁸ Te cuehē ñayuu jeē ní cacandíje ni quijicoo i nuū Pablo ni nacani ndaā i jnúhun tācá jniñu neé ní casáha i. ¹⁹ Te cuehē i jeē ní casáha jniñu tásí ní jinūcoo i cándiso i tutu i, te ni cajehmu i tutu un jíto nuū tāca ñáyuu. Te ni catava i cuenta nasaa ndéé tutu ni cáyū ún, te ni cajini i jeē uú xico uxī mil xūhun plata cúu. ²⁰ Te ni jitē jnúhun máá Jítóho yō cuahān, te ndihí ñayuu ni cajini i jeē cujéhnú ndasí jnúhun ya.

²¹ Te nuū ní ndihí tācá jniñu yáha, te jéni téyí ni Pablo jeē quíhīn de Macedonia jíin Acaya, te sáa te najinū de ñuu Jerusalén. Te ni cahān de jeē na nájinū de ñuu Jerusalén, yūcuán na te jíni ñúhún quíhīn de nde ñuu Roma. ²² Te uū tēe jeē cáchindéé ñáhān jíin Pablo cúu Timoteo jíin Erasto, te ni scándú de ndíndúú tēe yāhá cuángoo de nde Macedonia, te ni quendōo máá de Asia jecu gā quivī.

Jeē ní cacuvaā ñayuu ñuu Efeso

²³ Te suu quivī ún yōhyo ni candonda ñayuu síquī jnúhun ya. ²⁴ Chi ni iyo iin tēe sájniñu síquī plata, nání de Demetrio. Te máá de jíin ndihí tēe casájniñu jíin de, cánihīn de cuehē xūhún, chi jíin plata casáha de vehe lulí jéē modo veñūhun ídolo i jeē cúu yaā Diana. ²⁵ Te Demetrio ni nastútú de tēe casájniñu jíin de jíin táca gá tēe jeē suni jniñu yúcuan casáha, te ni cahān de:

Tátā, cájini ni jéē síquī jniñu casáha yó yáha vāha cánihīn yō xūhún. ²⁶ Te cájito ní te cájini sōho ní jéē iin tēe nání Pablo chi cáhān de jeē násūu yāá cácuu jeē casáha ñayuu. Te je ni scandíje de cuehē ñayuu, nasūu máá iin-ni ñuu Efeso yāhá chi ní cáhnu Asia. ²⁷ Te

quíyūhú ni na jéē cahān ñayuu jeē tu ndé jéjníñu jeē casáha yó. Te sanaa te suni súcuan cahān i coto i máá veñūhun yaā sihí Diana jeē kujéñnu, te suni sájéē ni i nuū yaā Diana, te ma cúu ga kujéñnu ya vēsú ndivii ñayuu Asia jíin ñayuu ní cáhnu ñayiví cáchiñūhún i ya vijna, áchí de.

²⁸ Súcuan ni cajini sōho de jñūhun yáha te yōhyo ni caquitī ni de, te ni cacana jee de:

Cújéñnu téyí Diana, yaā cúu patrona ñuu yō Efeso, achí de.

²⁹ Te ñayuu ñuu Efeso ni cacuvaā i, te ñin cáhnu-ni ni candonda i ni cajni i Gayo jíin Aristarco cuango i jíin de nde vehe nuū cándutútú ñayuu casáha i junta. Te ndindúú tée un cácuu tē Macedonia, te cájica de jíin Pablo. ³⁰ Te cúní Pablo quiví de nuū ñayuu cuehē un cáhān de jíin i, te ñayuu cácadíje tu ní cájēhe i jñūhun quihín de. ³¹ Te suni sava tohō jeē cácuu amigo de cáyūcu Asia, ni catají jñūhun cuahān nuū de, cácahān ndahú jíin de jeē ma quihín de nuū ní cacutútú ñayuu ún. ³² Te ñayuu ní cacutútú un, sava i ni cacana jee i ñin jñūhun te sava ga i ñinga jñūhun, te súcuan ni cacuvaā teyí i, te cuehē i ni tu cájini cuitī i na siquī cúu jeē ní cacutútú i. ³³ Te sava tē hebreo ni cajeni de ñin jnáhan de jeē naní Alejandro nuū ñayuu cuehē ún, te ni cacastūhún de nuū tēe ún na siquī cúu jeē cacuvaā i. Yūcuán na te Alejandro ni sáha de seña jíin ndaha de jeē na cúnayúú ñayuu, chi cúní de cahān de jíin i jeē násūu cuéchi tāca ñayuu hebreo cúu. ³⁴ Te ni canacuni ñayuu un jéē tēe hebreo cúu de, te jeē yúcuan ní cacana jee téyí gá i nájñūhun uū hora:

Cújéñnu téyí Diana, yaā cúu patrona ñuu yō Efeso, achí i.

³⁵ Yūcuán na te ni cacunahín ñayuu ni sáha tēe cúu secretario ñuu ún, te ni cahān de:

Níhín ñayuu ñuu yō Efeso, ndihí ñayuu chi je cájini i jeē cándito vāha yó veñūhun yaā Diana jíin imagen Diana jeē ní ñinga nde andiví. ³⁶ Te ni ñin chi ma cúu cahān jeē tú ndaā jñūhun yáha. Núu súcuan te vāha ga na cási ní yuhu ní, te ma sáha yachí ní ñin jeē tu ní nácani vāha ni ni síquī. ³⁷ Chi tēe yáha ní caquindeca ní de yāhá vēsú tu ní casáha de ni ñin cuéchi siquī Diana yō, ni tu ní cácahān ndevāha de ni ñin jñūhun siquī. ³⁸ Te Demetrio jíin táca gá tēe jeē ñin-ni jniñu casáha jíin de, núu cácuu de cahān de cuéchi siquī ñin tēe, te na quíngoo de nde vehe juzgado nuū cáyūcu juez, tēe cásandā jniñu, te yūcuán cundaā siquī de jíin náhan de. ³⁹ Te núu íyó jñūhun jeē ma cúu cundaā yūcuán, te jíni ñūhún cundaā nuū ñin junta nájñūhun tájñuní ley. ⁴⁰ Chi yúhú ná jeē sanaa te cahān tāca tóhō Roma jeē siquí gobierno de ni candonda yó, chi ma nihín yō jñūhun castūhun yó na siquī cúu jeē ní cacutútú yó ni cacuvaā yō vijna, áchí de.

⁴¹ Te nuū ní ndihí ni cahān secretario jñūhun yáha, te ni cajitē ñayuu un cuángo.

Jeē ni jéññ Pablo Macedonia jíin Grecia

20

¹ Te ná ni yāha jéē ní cacuvaā ñayuu, te ni cana Pablo ñayuu cácadíje, te ni jeni ichí de i. Te ni cañunundee jnáhan de jíin Pablo jeē ní nacuatáhu de, te cuahān de Macedonia. ² Te ni jica cuu de tācá ñuu yúcuan. Te jíin cuéhē jñūhun ni stihví ni de tācá hermano cácadíje. Te ni jinū de Grecia. ³ Te ni condee de yúcuan úní yoō. Te je yajni quihín de jíin barco nde Siria nuú, te máá quiví ún te ni nihín de jñūhun jeē jnáhan ñuu de hebreo ni casquíjnáhan jñūhun jeē ndonda siquí de ichi nuū quihín de, te jeē yúcuan ní nacani ni de te cuahān tucu de ichi Macedonia. ⁴ Te ni cahīyo sava tēe cájica jíin Pablo, te cánaní de Sópater ñuu Berea, Aristarco jíin tēe nání Segundo nde ñuu Tesalónica, Gayo ñuu Derbe, Tíquico jíin Trófimo nde Asia, jíin Timoteo. ⁵ Te ni cacandu tēe yáha, te cándētu de Pablo jíin sáña, Lucas, nde ñuu Troas. ⁶ Te nuū ni yáha vico jeē cáyeji i pan jeē tu yíhi levadura, te jíin barco ni quendacoo ná ñuu Filipos, te nde nuū uhún quiví te ni canajnáhan ná jíin de nde ñuu Troas. Te ñuu yúcuan ní coyūcu ná uxā quiví.

Jeē ni íne Pablo ñuu Troas

⁷ Te máá quiví domingo ni candutútú ñayuu cácadíje jeē cáji i pan, nájñūhun ni steén maá Jítóho yō jeē núcūhun ni yō siquí yā. Te ni steén Pablo jñūhun nuū ñayuu ún. Te siquí jeē ñinga quiví un jíni ñūhún quenda de quihín de, te nahán ní nacani de jñūhun nde

ni cuñuú. ⁸ Te vehe yósó jnáhan cúu vehe ún. Te nde cuarto xiní nuū ní candutútú ná un ní iyo cuehē lámpara ni cundijin. ⁹ Te ñin sūchi yíí nání i Eutico, néne i yuhu ventana. Te jeē ní cunahán nácani Pablo jnūhun, te yōhyo jíi i māhná, te ni quixi-ni i. Te nde piso uní un ní ñinga i nde nuū ñúhun. Te je ni jihí i ni candonehen de i. ¹⁰ Yūcuán na te ni nuu Pablo te ni jita ndeyi de ni canehen de i ni ñunundee de i, te ni cahān de:

Ma yūhu ní jíjnáhan ní, chi ni natecu i, áchí de.

¹¹ Te ni ndaa Pablo, te ni yeji de pan jíin i jíjnáhan i jeē cánucūhun ni de siquī yā. Te nahán gá ni nacani de jnūhun nde cuacundijin. Yūcuán na te ni quenda de cuahān de. ¹² Te Eutico chi iyó váha i cuanuhun i jíin de jíjnáhan de, te ndivii ñayuu ún yōhyo cácusíi ni i.

Jeē ní quenda Pablo ñuu Troas cuahān de ñuu Mileto

¹³ Te ni quivicoo ná ini barco cuango ná. Te Pablo chi cúni de caca jéhé de, te ni cundaā jeē najnáhan ná jíin de nde ñuu Asón. ¹⁴ Te nuū ní canajnáhan ná jíin de ñuu Asón, te ni quiví de barco te cuango ná jíin de nde ñuu Mitilene. ¹⁵ Te yūcuan ní quendacoo tucu ná jíin barco te ñinga quiví ni jinūcoo ná xiin Quío, ñuhun jeē íne sñn nuū ndúte. Te quiví uní ni jinūcoo ná Samos jeē súni nuū ndúte íne, te ni caquendōo ná Trogilio. Te quiví cuún ni jinūcoo ná ñuu Mileto. ¹⁶ Te tu ní jéngoo ná ñuu Efeso, chi jéni ni Pablo jeē yáha-ni de ñuu un quihñ de, návāha ma cucuéé de Asia te naa tiempo nuú, chi núu de jinū yachí de ñuu Jerusalén cone de máá quiví Pentecostés núu na cúu.

Jeē ní jeni ichí Pablo tēe jéhu cándiso jniñu nuū ñayuu cácañdije ñuu Efeso

¹⁷ Te ná íne ga Pablo ñuu Mileto, te ni tají de jnūhun cuahān nde ñuu Efeso jeē na quijicoo tēe jéhu cándiso jniñu nuū ñayuu cácañdije yūcuán. ¹⁸ Te nuū ní quecoo tēe ún, te ni cahān de:

Je cájini vāha ní ndese ni jica ndaā na ndé ná ni quee nuú ná Asia te nde vijna. ¹⁹ Chi ní tiempo jeē ni íne ná jíin ní te nde vijna, jéjniñu vāha na síquī jnūhun máá Jítoho yō, te tu ní sándúxí ná maá ná. Te iyó jínu ni ndahyū na jéhē ñayuu. Te ni ndoho ná jnúndóho ni casáha jnáhan ñuu ná hebreo, chi ni casquijnáhan jnūhun i síquī ná. ²⁰ Te cájini ni jēe tu ní táñúhún ná ni ñin, vēsú ndese ga cácahān ñayuu síquī ná, chi ni nacani ná ndihí jnūhun ya jeē quéndōo vāha ní sáha. Te ni steén na jnúhun ya nuū ni jíjnáhan ní, cúu nuū chitú cúu tācá vehe ní. ²¹ Te inuú-ni jnūhun ni nacani ná núu ndihí ní, cúu jnáhan ñuu ná hebreo cúu ñayuu tāca gá nación, chi ni cahān na jēe na nácani ni ni jēe stóo ni cuéchi ní te na cándije ní máá Jítoho yō Jesucristo. ²² Te vijna chi ñúhun ichí ná quihñ ná ñuu Jerusalén, chi stñhví ni Espíritu Santo sñña quihñ ná. Te tu jíin ná ndese ga coo jíin ná yūcuán. ²³ Te iyó ñin jeē jíin na, cúu jeē chune i sññá vecāa te quiji jnúndóho síquī ná, chi Espíritu Santo súcuan cáhán jíin ná ndijnahan ñuu nuū jíca ná. ²⁴ Te ni tu sáha ná cuenta vēsú na cáhni i sññá, chi jeē cuní na cúu jeē na sínu vāha ná jniñu jeē ní tee máá Jítoho yō Jesús síquī ná, te súcuan cusíi ni ná. Te jniñu un cúu jeē nácani ná jnúhun vāha ya nuū tāca ñayuu ndese vāha ni Yaā Dios jíin yó.

²⁵ Te je ni jica cuu ná, ní nacani ná jnúhun ya nuū ní ndese ndácu Yaā Dios jniñu. Te vijna chi jíin na jēe ni ñin ní ma najnáhan ga yō nuū ñayiví yáha. ²⁶ Jeē yūcuan cástūhun cájí ná nuū ni jíjnáhan ní vijna jeē násūu cuéchi ná cúu núu ndé ñin ní stñvi. ²⁷ Chi ni nacani ná núu ní ndihí jnūhun Yaā Dios jeē ni sándaā yā ndese coo, te tu ní quéndōo ni ñin jnūhun. ²⁸ Núu súcuan te coto vāha ní máá ní jíin ndihí ñayuu cácañdije, chi Espíritu Santo ni jeni ya nihín jēe cóndito ní ñayuu máá Jítoho yō, chi ni nacuaan ya i jíin níñi yā. ²⁹ Chi jeē quihñ na te jíin na jēe quijicoo tēe cástáhú quivicoo mēhñu ní, te nducú de snáa de jnūhun ni cajetáhú ñayuu cácañdije, te xeén sáha jnūhun stáhú de nájñūhun xeén sáha yihí jeē cájehni tñ lanchi. ³⁰ Te suni nuū grupo maá ní quejéé sava de cahān de jnūhun stáhú, te stáhú de sava ñayuu cácañdije jeē na cóndiquín i jnūhun stáhú stéén de. ³¹ Jeē yūcuan condito ní jēe ma cóo súcuan. Te ma náā ni ni jēe uní cuiyā ndiquiví ndññuu ni condihví ndasí ni na ndé ndahyú na jéhē ni, ní jeni ichí ná ñin ñin ní jíjnáhan ní.

³² 'Te vijna, hermano, jícán tahu na núu Yaā Dios jeē coto ya nihín. Chi jnūhun jeē váha ni yā ndíso poder sáha jeē ije ga ni jín, te suu sáha jeē ñn quivī te cuāha ya tahu jeē ndujéhu luu ní ndé jín ndíhi ñayuu ní nacāji ya jeē cóo ndoo coo i i nuū yā. ³³ Tu ní ndúcú ná jeē nihín na xúhun chí sahma nuū ní ñn i. ³⁴ Chi je cájini váha ni jéé sa suhva ni sájniñu nihín ná návāha nihín na jéé cótecu na ndé jín táca téé cájica jín ná. ³⁵ Te níní ní steén na núu ni jéé súcuan jíní ñúhún sájniñu yó návāha nihín yō jeē cuāha yó núu ñayuu cúmaní nuū. Te ma náā ni ni jnūhun jeē ni cáhān maá Jítóho yō Jesús, chí suhva ni cahān yā: Ndetū gā quendōo yó jéé cuāha yó vēsú jeē nihín yō, achí yá. Achí Pablo.

³⁶ Te ni ndíhi ni cahān de tāca jnūhun yáha, te ni jecuiñi yití de, te ni jicān tahu de jín ndíhi tēe ún. ³⁷ Yūcuán na te ndíhi de ni cajecunundee jnáhan de jín Pablo ni catechūhú de jeē cánacuatáhu de, te ni candahyū de. ³⁸ Chi cácuquíhyá ndasí ni de jín jnūhun ni cahān Pablo jeē ma ndácoto jnáhan ga de. Te cuangooni de jín Pablo nde núu ñn barco.

Jeē cuánuhun Pablo ñuu Jerusalén

21

¹ Yūcuán na te ni caquendōo tācá hermano ñuu Efeso, te ni quivícoo ná barco, te cuangooni ndaā-ni ná ndé Cos. Te ñnga quivī ni jinūcoo ná Rodas, te yūcuan ní quendacoo ná te ni jinūcoo ná ñuu Pátara. ² Te ni cane ñn barco jeē quihín Fenicia, te ni quivícoo ná cuángoo ná. ³ Te nuū ní cajito ná núu Chipre jeē ñne sñn nuū ndúte, te ni quendōo ichi lado jecó barco, chí ni cayāha ná cuángoo ná nde Siria. Te ni jinūcoo ná ñuu Tiro, chí yūcuan ndóo jeē ndíso barco ún. ⁴ Te ni jenanducú ná ñayuu cá candíje, te ni caquendōo ná jín i uxā quivī. Te máá Espíritu Santo ni steén nuū i jeē quíji jnūndóho siquí Pablo ñuu Jerusalén, te jeē yūcuan ní cacahān i jín de jeē ma quihín de. ⁵ Te ni yāha uxā quivī ún, te ni quendacoo ná. Te tāca téé cá candíje jín ñasíhí de jín séhe de ni cachuhun ichí de sñña ní jengoo de jín ná nde yatā ñuū, te ni cajecuiñi yití ná jín de yumar te ni cajicān tahu na. ⁶ Te ni cañunundee jnáhan ná ní canacuatáhu ná yūcuán, te ni quivícoo ná barco cuangooni ná. Te ni canandió cóo de cuanungoo de vehe de.

⁷ Te ni quendacoo ná ñuu Tiro cuangooni ná jín barco, te ni jinūcoo ná ñuu Tolemaida ni quendacoo ná ini barco. Te yūcuan ní jengoo ná ní cacahān na jín táca hermano, te ni caquendōo ná jín de ñn quivī. ⁸ Te ñnga quivī un ní cajica jéhé ná jín Pablo, te ni jinūcoo ná ñuu Cesarea, te ni quivícoo ná vehe Felipe, tēe nácani jnūhun váha ya. Tēe un cúu jnáhan jeē ndíhuxá tēe jeē ní casaja staā nuū ñáhan viuda. Te ni caquendōo ná jín de. ⁹ Te tēe un íyó cúun sēhe sñhí de jeē cáhiyo máá i, te cánacani i jnūhun Yaā Dios. ¹⁰ Te ni coyūcu ná yūcuán tijni quivī. Te ichi Judea ni quíji ñn tēe nácani jnūhun Yaā Dios, nání de Agabo. ¹¹ Te ni quee de nuū ná. Te ni quihin de sanchí Pablo, te ni jihni de ndaha de jín jéhe de, te ni cahān de:

Suhva cáhān Espíritu Santo. Jnáhan yó hebreo súcuan cuhni i tēe chí sanchí yáha ini ñuu Jerusalén, te nastúu i de nuū ñayuu sñn nación, achí de.

¹² Te jeē ní cajini sōho na jnūhun yáha te máá ná jín táca téé cá candíje cáyucú ñuu Cesarea ni cacahān ndahú ná jín Pablo jeē ma quihín de ñuu Jerusalén. ¹³ Yūcuán na te ni cahān Pablo:

¿Najehē candahyū ni jínáhan ní, te casáha ní jéé cucuíhyá ni ná? Chi sñná je íyó túhva ná jéé násūu máá jéé cónuhni ná ini ñuu Jerusalén, chí suni jeē vēsú na cúu na jéé siquí máá Jítóho yō Jesús, achí de.

¹⁴ Te jeē tu ní cúu cuíti casicoo ná, yūcuán na te sa suhva ni cacahān ná:

Na cóo ndese cúni máá Jítóho yō nuu súcuan, achí ná.

¹⁵ Yūcuan na te sáa te ni casátūhva ná, te cuangooni ná ñuu Jerusalén. ¹⁶ Te suni jecu tēe ñuu Cesarea jeē cá candíje cuangooni de jín ná. Suni cuahān ñn tēe Chipre nání de Mnasón, te je ni cuu cuehē cuiyā candíje de. Te ná ni jinūcoo ná ñuu Jerusalén, te ni cacoyūcu ná vehe de.

Jeē ni jécondēhe Pablo Jacobo

¹⁷ Te nuū ni jínūcoo ná ñuu Jerusalén, te hermano cáyūcú ñuu ún yōhyo ni cacusiñ ni de jeē ni jínūcoo ná. ¹⁸ Te inga quiṽi un ní cajengoo ná jíjnáhan ná jíin Pablo vehe Jacobo, te yūcuan ní candutútú táca tée jéhnū cándiso jniñu nuū ñáyuu cácdandije. ¹⁹ Te Pablo ni sáha de saludar tēe ún jíjnáhan de. Yūcuán na te ni castūhún de ndiñi jniñu ní sáha Yaā Dios ná ni nacani de jnūhun ya nuū ñáyuu táca nación jeē tu cájini i jnūhun ya. ²⁰ Te ni cajini sōho de jnūhun yáha, te ni cacahān de jeē yóhyo cújéhnū Yaā Dios. Te ni cacahān de jíin Pablo:

Hermano, vijna te jíni ni náa cuehē mil jnáhan ñuu yō hebreo ni cacandije i Jesús, te cácahān niñin i jeē cánuú squícu yó ley jeē ni jéhe ya nuū Moisés. ²¹ Te ni canihin i jnūhun cácahān jeē stívi ní steén ni núū tāca jnáhan yó ñáyuu hebreo cáyūcu jíca i tāca gá nación, chi ni steén ni núū i jeē ma cuatáhú gá i nuū ley Moisés, ni ma sáha ga i circuncidar sēhe i, ni ma cuatáhú gá i tāca gá jeē tajnúni jenahán. ²² ¿Ndese sáha ní núú súcuan? Chi cuni ñáyuu un jéē ní ndee ní te cutútú cuéhē i. ²³ Suhva sáha ní núú súcuan. Yáha íyó cúūn tēe jeē ní cajejnūhun de ñin jeē squícu de nuū Yaā Dios. ²⁴ Cueca ní tēe yáha quñin ni jíin de templo, te cuchi ní nasándoo ní máá ní jíin de nuū yā, te cuaan ní jeē socó de nuū Yaā Dios jíjnáhan de. Yūcuán na te cuu sāté de xinī de, te suu steén jeē ní casquícu de ndiñi jeē ní cajejnūhun de nuū yā. Yūcuán na te cuni ndiñi ñáyuu jeē tú ndaā tāca jnūhun ni cajini sōho i siquī ní, chi coto i jeē suni máá ní sa squícu ní ley yā. ²⁵ Te ñáyuu táca nación jeē násūu ñáyuu hebreo cácuu i te ni cacandije i ya, je ni cateo ná carta cuahān nuū i jeē tu cánuú squícu i ley un, chi máá-ni jeē ma cáji i cūñu jeē ni sóco nuū ídolo ni niñi ni quití jeē jihí jeē tu jéti niñi tī, te ni ma cáca jnéni i, áchí de.

Jeē ní cajni de Pablo ini templo

²⁶ Yūcuán na te ni jeca Pablo tēe ún, te inga quiṽi un ní cajichi de ni canasándoo de máá de nuū yā. Te ni quiṽi Pablo ini templo ni cachi de nuū sutú na quiṽi jínu jeē nasándoo tēe un máá de nuū yā, te quindecas de quití jeē socó de nuū yā.

²⁷ Yūcuán na te cácuu de jeē sínu de ndihúxá quiṽi jeē cándundoo de nuū yā, te sava jnáhan hebreo de jeē véjicoo Asia ni cajini de jeē íne Pablo ini templo, te ni cascáhán de ndiñi ñáyuu, te ni cajni i Pablo. ²⁸ Te ni cacana jee i:

Tēe ñuu yō Israel, cuāha núú ní ndaha jíjnáhan ní na jniñi yó tēe yáha. Chi máá de cúu tēe jíca cuu ní cáhnu steén de nuū tāca ñáyuu, te cáhán de siquī nación yō jíin síquī ley jeē ni jéhe ya nuū Moisés jíin síquī templo yáha. Te suni je ni quiṽicoo de jíin jecu tēe griego ini templo iñi yáha, te súcuan stívi de jnūhun iñi jeē cahán jeē ma cúu quiṽi ñáyuu ini templo te núu násūu ñáyuu hebreo cúu i, áchí.

²⁹ Chi nde na íne Pablo ini ñuu un ní cajini tēe hebreo jeē jíca de jíin Trófimo, tēe ñuu Efeso jeē násūu hebreo cúu de, te cájeni ni de jeē ni quiṽi tēe un jíin Pablo ini templo.

³⁰ Te ndiñi ñáyuu ñuu un ní cuvaā, te ni cacutútú-ni i, te ni cajni i Pablo, te ni castáa i de ni quenehen i de ini templo un, te ni canacasi-ni i yéhyí. ³¹ Te ni cacuni i cahni i de núú. Te general, tēe cújéhnū nuū ndiñi soldado, ni niñin de jnūhun jeē ndiñi ñáyuu ñuu Jerusalén ni candonda i cácuvaā i. ³² Te ni jeca general táca soldado jíin capitán, te cájini de cuango de nde nuū cáhñin ñáyuu cuehē ún. Te ná ni cajito ñáyuu jeē ni jínūcoo general jíin soldado, te ni cajecuiñi i jeē cácani i Pablo. ³³ Yūcuán na te ni quiṽi general mēñu ñáyuu, te ni jniñi de Pablo, te ni ndacu de jniñu jeē conuhni de jíin úu cadena. Yūcuán na te ni cajnūhún general ndé tēe cúu Pablo te na cuēchi ni sáha de. ³⁴ Te ni cacana ñáyuu cuehē ún, sava i ñin jnūhun te sava ga i inga jnūhun, te tu ní cúu cuni de na cuēchi ni sáha Pablo, chi cácuvaā i. Te ni ndacu de jniñu cuahān Pablo nde cuartel. ³⁵ Te nuū ni jínu Pablo escalera cuartel ún, te soldado ni cajni de Pablo cándiso de siquī jeē cácani ñáyuu ún jniñi i Pablo sáha xeñ i jíin de. ³⁶ Chi ndiñi i véjicoo i ichi yátá soldado, te cácana jee i:

Cahni ni tēe jíñá, achí i.

Jeē ni cáhán Pablo jehē maá de nuū ñáyuu

³⁷ Te cásquívi de Pablo ini cuartel nuú, te jíin jnūhun griego ni cahán Pablo jíin general:

¿A cuáha ni jnúhun cahān ná ñn jnúhun jíin ní? achí de.

Te ni cahān general jíin de:

Te jíiní rō cahán rō yuhu griego jeē súcuan. ³⁸ Núu súcuan te nasūu rōhó cúu tēe Egipto jeē jé ni cuu quivī ni ndonda siquī gobierno te ni quenehen cuūn mil tēe jéhni ndiīi cuangoo jíin de nde nuū ñúhun téhé, áchí.

³⁹ Yūcuán na te ni cahān Pablo:

Tuú, chi tēe hebreo cúu ná, te ni cacu ná ñuu Tarso, ñn ñuu jeē cujéhnú ndañúu Cilicia. Te quiñúhun ni ni cuáha ní jnúhun na cáhán na jíin ñáyuu yáha jíináhan i, áchí de.

⁴⁰ Te general ni jēhe de jnúhun jeē cahān de. Te ni jecondichi Pablo nuū escalera, te ni sáha de seña jíin ndaha de jeē na cúu nayúu ñáyuu ún. Te nuū ní cuu nayúu-ni i, te jíin jnúhun yuhu ñúu de hebreo ni cahān de:

22

¹ Ndihi níhín jeē cácuu ní jnáhan ñuu yō jíin ndihi níhín jeē cácujehnú ní núu ñúu yō, cuni sōho ní jnúhun cahān na jéhē maá ná, achí de.

² Te ni cajini sōho i jeē cahán Pablo yuhu hebreo jeē cúu yuhu ñúu i, te víhyá gā ni cacunahín i. Te ni cahān Pablo:

³ Máá ná cúu jnáhan ñuu yō hebreo, te ni cacu ná ini ñuu Tarso ndañúu Cilicia. Te ini ñuu Jerusalén yáha ní jehnu ná, te ni cutúhva ná núu Gamaliel, te ni steén de nuū ná ndihi siquī ley jeē ni jēhe ya nuū jíi yō. Te nde jíin ini jíin ánuá na ní nducú ndéyí ná squícu ná súcuan nuū Yaā Dios, nájñúhun cásáha máá ní vijna. ⁴ Te ni jito xeēn na ñáyuu cácadíje i jnúhun Jesús te nde cuní na jéē na cúu ndihi i núu. Chi cúu tēe cúu ñahan ni jñi ná ni chuhun ná vecāa. ⁵ Te sutū cujéhnú ga jíin táca tēe jéhnú cándiso jñiñu nuū ñúu yō, cácuu de testigo jeē súcuan ni sáha ná, te suni máá de ni cajēhe de tijni carta cuahān na jíin jéē cuáha na núu táca jnáhan yó cáyucú ñuu Damasco. Chi cuahān ná ñuu un jéē jñi ná ñáyuu cácadíje i Jesús te quindecá ná i ñuu Jerusalén yáha, návāha ndoho i núu.

Jeē ní cachi Pablo ndese ni sama ya de

(Hch. 9.1-19; 26.12-18)

⁶ Te ni quihin ná ichi cuahān ná, te cuacuyajni ná ñuu Damasco, te nájñúhun caxū cúu. Te ichi ándiví ní quiji ñn nduva ní ndindéē ndaxín núu ná. ⁷ Te ni cotúu-ni ná núu ñúhun, te ni jini sōho ná ñn jnúhun cáhán jíin ná: Saulo, Saulo, ¿najehē jíto xeēn rō ruhū? achí. ⁸ Yūcuán na te ni cahān ná: ¿Na nihín cúu jeē cahán, Tátā? achí ná. Te ni cahān yā jíin ná: Máá rí cúu Jesús jeē ní jehnu ñuu Nazaret, te jeē jíto xeēn rō ñayuu cácadíje i ruhū cúu jeē jíto xeēn rō ruhū, achí yá. ⁹ Te tēe cuangoo jíin ná ni cajini ndije de jeē ndindéē, te ni cayūhú de, te tu ní cájini sōho de ndese ni cahān yā jíin ná. ¹⁰ Yūcuán na te ni cahān ná: Tátā, ¿na vé cuní ní jéē sáha ná? achí ná. Te ni cahān maá Jítoho yō jíin ná: Ndocuññi te quihin rō ñuu Damasco, te yūcuan íyō ñn tēe jeē cachi nuū rō na vé cúu jeē cánuu sáha ró, achí yá jíin ná. ¹¹ Te jeē ní ndindéē un ní sacuaá núu ná, te tēe cuangoo jíin ná un ní cajñi de ndaha ná cuángoo de jíin ná ní jinūcoo ná ndé ñuu Damasco.

¹² Te yūcuan ní condee ñn tēe nání Ananías, te táca jnáhan yó hebreo yūcuan cácahān jeē tēe vāha cúu Ananías, chi vāha squícu de ley jeē ni jēhe ya nuū Moisés. ¹³ Te ni quee tēe un núu néne ná, te ni cahān de jíin ná: Hermano Saulo, na ndúndijin tinūu ní, achí de. Te ni ndúndijin-ni tinūu ná, te ni jito ná núu de. ¹⁴ Te ni cahān Ananías: Máá Yāā Dios táca jíi yō, je ni nacāji ya nihín návāha cuni ní na vé cuní yā jeē sáha ní, te coto ní núu maá Cristo, Yaā ndaā, te cuni sōho ni jnúhun jeē cahán yā. ¹⁵ Te nacani ní jnúhun ya nuū ndivii ñayuu táca jéē ní jito ní jíin jéē ní jini sōho ní. ¹⁶ Ma cúhuun ni ni núu súcuan. Ndocuññi ní, te cuandute ní te cahān ndahú ní jíin máá Jítoho yō, návāha nacate ya anuá ni núu cuéchi, achí de jíin ná.

Jeē ní cachi Pablo ndese ni tají Yaā Dios de nuū ñáyuu táca gá nación

¹⁷ Te ni nandió cóo na ní ndee ná ñuu Jerusalén. Te jícán tahu na ini templo, te ni sáha máá Jítoho yō jeē ní jito ndijin ná. ¹⁸ Te ni jini na núu yā ni cahān yā jíin ná: Yachí

quenda ró ñuu Jerusalén yāhá, chi ma cuatáhu ñáyyu yáha jéē nácani ró jnúhun ri nuū i, áchí yá. ¹⁹ Te ni cahān na jíin yá: Tuú, chi cuatáhu i, Tátā, chi je cájini i jeē ni quívi ná ndijnahan vehe iī sinagoga ni jñi ná táca ñáyyu cácadíje i níhín, te ni cani ná i, te ni chuhun ná i vecāa. ²⁰ Te je cájini i jeē quívi ní cajehni i Esteban, tēe ni nacani cáji jnúhun ní, suni ni indichi na yúcuān, te ni jejnúhún ná jeē na cúu de, chi ni condito ná sahma tēe ni cajehni Esteban, áchí ná jíin yá. ²¹ Te ni cahān yā jíin ná: Cuáhán, chi máá rí tají rí rohó quíhín jicá ró nde nuū ñáyyu tācá nación jeē tu cájini i jnúhun ri, achí yá jíin ná. Achí Pablo.

Jeē ni íne Pablo nuū general

²² Te tāca ñáyyu ún vāha-ni ni cajini sōho i te nde jnúhun sandīhi yáha jéē ní tají yá de nuū ñáyyu tāca gá nación. Yūcuān na te ni cacuvaā i, te ni cacahān jee i:

Na cúu tēe jíin, chi tú vāha jeē cótecu gā de, áchí i.

²³ Te súcuān cácana jee i, te ni cascándo i ticāchí i, te ni cascánda i ticachā. Te súcuān cástéēn i jeē cáquiti xēen ni i. ²⁴ Te ni ndacu general jniñu jeē na quívi Pablo ini cuartel, te ni cahān de jeē na stíchí soldado Pablo nde jíin cuarta ñi, návāha cujnúni ni general na síquī cúu jeē ní candonda ñayuu un síquī de. ²⁵ Te ni cajihni de Pablo návāha súcuān te cani de. Te ni cahān Pablo jíin capitán jeē indichi tūhva:

¿A jéhe ley jnúhun jeē cani ní cuarta tēe cúu sēhe nación Roma núu ná tu sándaā ní núu íyó cuéchi de? áchí de.

²⁶ Te ni jini sōho capitán jnúhun yáha, te ni jecahān jíin general:

Coto vāha ní jéē ma stívi ní sáha ní jíin tēe yáha, chi cúu de sēhe nación Roma, achí.

²⁷ Yūcuān na te ni jinū general nuū Pablo, te ni cajnúhún de:

Cachi núu jendaá cúu jeē sēhe nación Roma cúu ró, áchí.

Te ni cahān Pablo:

Suu cúu ndije ná, áchí de.

²⁸ Te ni cahān general:

Ruhū chi nde jeē ni jéhe ri cuehē xūhún te ni nduu ri sēhe nación Roma, áchí.

Te ni cahān Pablo:

Te sãñá chi nde quívi ní cacu ná cúu ná sēhe nación yō Roma, achí de.

²⁹ Yūcuān na te tāca tēe jeē cácuñi cani Pablo nuú, ni cacujiyo-ni cuango, te suni nde general ni yūhú de, chi ni stívi de jeē ní jihni de Pablo, chi tu íyó váha sáha súcuān jíin sēhe nación Roma.

Jeē ni índichi Pablo nuū junta cujéhnu ga jnáhan ñuu de hebreo

³⁰ Te inga quívi un cúni general cundaā vāha ni de na síquī cúu jeē ní candonda tēe hebreo síquī Pablo. Te ni ndají de cadena jeē nuhní Pablo, te ni ndacu de jniñu ni cacutútú táca sūtú cácujeñnu jíin táca tēe cásáha junta cujéhnu ga, te ni quenehen de Pablo, te ni jeni de nuū tēe ni candutútú un.

23

¹ Yūcuān na te ni ndacoto Pablo nuū tēe ni candutútú junta un, te ni cahān de:

Tátā jijnáhan ní, ní ndé vijna vāha íyó ni anuá na jéē tú na cuéchi ná, jíto jínúu Yā Dios, áchí de.

² Yūcuān na te Ananías, sutū cujéhnu ga, ni cahān jíin tēe cáhiin yajni nuū de jeē na cátu máá yuhu de. ³ Te ni cahān Pablo jíin sūtú cujéhnu ga ún:

Yā Dios stóho ya nihín chi tēe stáhu-ni cúu ní, chi néne ní jéē sándaā ni núu ni stívi ná ley yā, ¿te naun stívi máá ní ley jeē ndácu ní jniñu jeē cáni de sãñá? áchí de.

⁴ Te ni cacahān tēe cáhiin nuū de ún:

¿Naun cáhán rō súcuān jíin sūtú cujéhnu ga? Chi nuū Yā Dios jejniñu de, áchí jíin de.

⁵ Te ni cahān Pablo:

Tátā jijnáhan ní, tu ní jíni na jéē sutú cujéhnu ga cúu de, chi núu ní jíni na te ma cahán na súcuān núu, chi yósó núu tútu iī jeē ni cáhán yā jeē ma cahán neé yó coto yó táca tēe cácujeñnu nuū yō, áchí Pablo.

⁶ Te nuū ní jini Pablo jeē sava de cácuu grupo saduceo te sava ga de cácuu grupo fariseo, te ni cahān jee de:

Tátā jijnáhan ní, máá ná cúu ñn jnáhan grupo fariseo, te suni súcuan ni ñyo tátá na. Chi suni máá ná ñúhun ni na jéē nastécu yā ndīyi, te siquī yúcuan cúu jeē cácahān ni cuéchi siquī ná, áchí de.

⁷ Te jeē súcuan ni cahān de te ni cacusñn ni tēe junta jeē cácuu grupo fariseo jiín grupo saduceo, te ni cacahān ñihin. ⁸ Chi cácahān tēe grupo saduceo jeē ma nátecu ndīyi, ni tu cáhiyo ndajéhé yā ni ánuá, te tēe grupo fariseo cájejnúhún de ndinúní jnúhun yáha. ⁹ Te yōhyo ni cuvaā. Te sava tēe cástéén jnúhun cáhán tutu ley yā jeē cácuu jnáhan grupo fariseo, ni candocuiñi de, te ni cacahān de:

Tú ni ñn cuéchi cánihñn na síquī tēe yáha. Sanaa te ni cahān ndije ñn ánuá jiín de chí ñn ndajéhé yā. Ma sáníhni ni yō nuū Yaā Dios nuu súcuan, áchí.

¹⁰ Te yōhyo ni catejnáhan, te yúhú general jeē quende i chiyō Pablo, te ni ndacu de jniñu jeē na quívi soldado te quenehen de Pablo sava mēhñú i, te na ndívi de ini cuartel.

¹¹ Te jecuāā un ní quee-ni máá Jítóho yō nuū de, te ni cahān yā jiín de:

Pablo, cuandeyí ni rō, chi nájnúhun ni nacani ró jnúhun ri ini ñnuu Jerusalén yāhá, suni súcuan nacani nahín ró jnúhun ri ini ñnuu Roma, achí yá.

Jeē ní casquijnáhan jnúhun cahni Pablo

¹² Te nuū ní cundijin te ni cacutútú sava ñayuu hebreo, te ni casquijnáhan jnúhun, te ni cacahān teyí i jeē ma cáji cuiti i ni ñn ni ma cóho cuiti i nde núu tu cahni i Pablo.

¹³ Te víhyá gā uū xico tēe hebreo ni cacahān teyí jnúhun yáha. ¹⁴ Te ni jengoo nuū sutú cácujuhnu jiín núu tēe jéhnú cándiso jniñu nuū ñáyuu hebreo, te ni cacahān jiín tēe ún:

Ni cacahān teyí ná jeē ma cáji cuiti ná ni ñn níni nde ná tu cahni na Pablo. ¹⁵ Núu súcuan te máá ní jijnáhan ní jiín táca gā tēe cásaaha junta cujéhnú ga, cuácáhān ni jiín general jeē quenehen de Pablo na jéé de nuū junta sajnē, chi cachi ni jéé cácuñi ni stíchí vāha ga ní de. Te máá ná jijnáhan ná cotúhva ná cahni ná de nde ná tu quee de nuū cáhiin tútú ní, achí.

¹⁶ Te sēhe yí cuáha Pablo ni nihñn i jnúhun jeē súcuan ni cacahān, te ni jehēn i cuartel, te ni castúhún i nuū Pablo. ¹⁷ Te ni cana Pablo xiní ñn jnáhan capitán, te ni cahān de:

Condeca ní súchi yáha quíhñn ni jiín i nuū general, chi íyó ñn jnúhun castúhún i nuū de, áchí de.

¹⁸ Te capitán un ní jeca de i cuahān i jiín de nuū general, te ni cahān de:

Pablo, tēe íne vecāā, ni cana de sãhá, te ni cahān de jiín ná jeē quíndeca ná súchi yáha núu ní, chi íyó ñn jnúhun cahān i jiín ní, áchí de.

¹⁹ Te ni jniñ general ndaha i cuahān de jiín i ñn lado, te yuhu-ni ni cajnúhún de i:

Na jnúhun cúní rō cahān rō jiín rí, áchí de.

²⁰ Te ni cahān i:

Tēe hebreo ni casquijnáhan jnúhun de jeē cahān ndahú de jiín ní quenehen ní Pablo sajnē quihñn de nuū táca tēe cásaaha junta cujéhnú ga, chi cahān-ni de jiín ní jeē cácuñi de jeē stíchí vāha ga de Pablo. ²¹ Te ma cuáha ni jnúhun, chi víhyá gā uū xico de cándētu sáhi de ichi, te ni cacahān teyí de jeē ma cáji cuiti de ni ñn ni ma cóho cuiti de nde núu tú cahni de Pablo, te vijna je cándētu túhva de jeē cuáha ni jnúhun quihñn Pablo nuū junta, áchí i.

²² Te ni cahān general jiín i jeē ma cáchi i nuū ní ñn ñayuu jeē ni cáhān i jnúhun yáha jiín de, te ni tají de i cuanuhun i.

Jeē ní tají general Pablo cuahān de nuū Félix, tēe cúu gobernador

²³ Yūcuán na te ni cana general uū capitán de, te ni ndacu de jniñu jeē sátúhva de uū ciento soldado cájica jéhe jiín úní xico uxí jeē cáyōsō caballo jiín uū ciento jeē cándāha lanza, chi cahñn jecuāā ún quendacoo de jiín Pablo quingoo de nde ñnuu Cesarea. ²⁴ Te suni ni ndacu de jniñu jeē coo túhva caballo jeē cóso Pablo, te condito vāha soldado un Pablo quingoo de nde nuū Félix, tēe cúu gobernador. ²⁵ Te ni tee de ñn carta jeē cáhán jnúhun yáha:

²⁶ Máá ná cúu Claudio Lisias, te tée ná carta yáha cuájeē nuū ní, señor Félix, gobernador kujéhu. Nde se tahū cúu ní. ²⁷ Ñayuu hebreo ni cajni i tēe yáha, te je yajni cahni i de núu, te ni jnama ná de jíin soldado, chi ni jini na jēē séhe nación Roma cúu de. ²⁸ Te ni jendeca ná de nuū junta maá i jíinánhan i jeē sándaā i núu na cuēchi ni sáha de. ²⁹ Te ni jini na jēē siquī ley maá i cúu cuēchi cácahān i siquī de, te tu níhín na ni iin cuēchi siquī de jeē cúu de ni jeē cóne de vecā. ³⁰ Te ni nihín na jnúhun jeē sava tēe hebreo ni casquínánhan jnúhun de jeē cahni de tēe yáha, te jeē yúcuan cúu jeē yachī ni tají ná de cuajeē de nuū ní. Te suni je ni cahān na jíin ñayuu cájicān cuēchi siquī de jecoo i nuū ní, te jiñā cahān i jíin ní na cuēchi ni sáha de. Je ni cahān yō, achí carta.

³¹ Te ni cajeca ñuú-ni soldado Pablo cuango jíin de nde ñuu Antípatris, nájnūhun ni tahū jniñu nuū de. ³² Te inga quivī ni canandió cóo-ni soldado cájica jéhé cuánungoo nde cuartel, te soldado cáyōsó caballo cuango de jíin Pablo. ³³ Te ni jinūcoo ñuu Cesarea, te ni cachihí carta ndaha gobernador, te suni ni cajeni Pablo nuū de. ³⁴ Te ni cahu gobernador carta un. Te ni cajnūhún de nde ñuu cúu Pablo, te ni jini de jeē tēe ndañū Cilicia cúu Pablo. ³⁵ Te ni cahān de:

Nde na quécoo tēe cájequin cuēchi siquī rō te cuni nahín rí jnúhun cahān rō, áchí de. Te ni cahān de jeē na quíndihyū Pablo ini palacio ndīyī Herodes.

Jeē ni cáhān Pablo jehē maá de nuū Félix

24

¹ Te nuū uhún quivī te Ananías, sutū kujéhu ga, ni quee de ñuu ún. Te suni ni quecoo sava tēe jéhu cándiso jniñu nuū jnánhan ñuu de hebreo jíin iin tēe cúu abogado, nání de Tértulo. Te ni quivícoo de nuū gobernador jeē cahān de cuēchi siquī Pablo. ² Te ni cana gobernador Pablo ni quee de. Te ni quejéé Tértulo cahān de cuēchi siquī Pablo, chi suhva ni cahān de jíin Félix:

Tátā gobernador, siquī jeē cúu ní tóhō jeē váha ndíchí ndácu ní jniñu, te jeē yúcuan tú na jnúhun cájejnánhan íyó, chi cáyūcu váha yó. ³ Te na cútahū ná, chi tāca quivī váha cúu tāca núu ndácu ní jniñu jeē váha sáha ní, tátā Félix. ⁴ Te tu cúní na snāa na cuéhē tiempo ni, te cáhān ndahú ná jíin ní cuni nahín ní jecu-ni jnúhun cahān na jíin ní. ⁵ Chi ni cajini na tēe yáha jēē cúu de iin tēe tíxín, te sáha de jeē cánacuajnánhan máá jnánhan ñuu ná hebreo ní cáhnu-ni tāca lado, te cúu de tēe cújéhu nuū ñayuu cascuáha jnúhun tēe nání Jesús jeē ní jehnu ñuu Nazaret. ⁶ Te suni je ndúcú de jeē stívi de tācá jniñu ini templo iī, te ni cajni ná de. Te cácuni na sándaā na síquī de núu, nájnūhun cáhān ley ñuu ná. ⁷ Te ni jinū-ni general Lisias, te ni quende fuerza de tēe yáha núu na jíinánhan ná. ⁸ Te ni ndacu de jniñu jeē tāca ná jeē cácahān na cuēchi siquī tēe yáha quijicoo ná nde nuū ní. Te vijna cuu stíchí maá ní de, te jíin jnúhun cahān maá de te cuni ni jēē ni sáha de cuēchi jeē cácahān na jíin ní, áchí Tértulo.

⁹ Te suni ni cacahān tēe hebreo jeē ni jinūcoo jíin de jeē iyó ndāā jeē súcuan cúu cuēchi Pablo. ¹⁰ Yūcuán na te ni sáha gobernador seña nuū Pablo jeē na cáhān de, te ni cahān Pablo:

Je jíiní na jēē cuehē cuiyā cúu ní gobernador ñuu yáha, te jeē yúcuan nújnahan ni na jēē sándaā ni síquī ná. ¹¹ Chi máá ní cuu nanducú ní te cuni ni jēē sáá máá úxī uū quivī ni cuu jeē ni jéhēn ná ñuu Jerusalén jeē chiñúhún ná Yaā Dios. ¹² Te tu ní stáhān jnánhan ná jíin ni iin ñayuu, ni tu ní stóna ná ñayuu ini templo ni ini vehe iī sinagoga ni ini maá ñuu. ¹³ Ni tú na jíin stéen de jeē iyó ndāā jnúhun cácahān de síquī ná. ¹⁴ Te jnúhun cáhān cají ná jíin ní cúu jeē chiñúhún ná Yaā Dios tāca jíí na, te suu cúu jeē chiñúhún ná maá Jesucristo, te máá jnúhun yáha-ni cúu jeē cácahān de jeē stívi ná. Te cándíje ná tāca jnúhun yósó núu tútu ley yā jíin núu tútu jeē ní catee tēe ni canacani jnúhun ya nde jenahán. ¹⁵ Te inuú ñúhun ni na jíin de jeē sáha Yaā Dios jeē nátecu tāca ndīyī, cúu ñayuu ní casáha váha jíin ñayuu ní casáha néé. ¹⁶ Te jeē yúcuan máni jeē váha ndíhvī ni na sáha ná. Súcuan te váha iyó ni anuá na jēē tú na cuēchi ndéé siquī na núu Yaā Dios ni nuū ñayuu.

¹⁷ Te ni jica cuu ná táca ñuu jicá jecu cuiyā, te sáa te ni ndee na jíin xúhun jéē ní cajēhe tāca ñáyuu jeē chindéé ñáhán i jnáhan ñuu na cáyūcú Jerusalén. Te suni ni ndee na jéē socó na quití nuū Yaā Dios. ¹⁸ Te íne ná ini templo siquī jeē cuchi ná ndundoo ná núu Yaā Dios te socó ná. Te jecu jnáhan ñuu ná hebreo jeē véjicoo Asia ni cajito de sáná ini templo, te tú na ñayuu cuehē ni cóyūcu jíin ná jeē sávaā i. ¹⁹ Te núu ni stívi ná ¿te naun tu ní quíjicoo tēe Asia un návāha suni cahān de ndese ni stívi ná? ²⁰ Chí tēe ni quecoo yāhá na cáhán maá de núu na cuēchi ni canihīn de siquī na ná ni indichi na núu junta tēe cácujuhnu ini ñuu ná. ²¹ ¿Te chí cájequin de cuēchi siquī na jéē ni cáhán jee ná suhva ná ni iyo ná nuū junta naún? Chi ni achi na jéē cándíje ná jéē nátecu tāca ndíyi, te jeē yúcuán cájequin ni cuēchi siquī ná, ni achi na jíin de. Achí Pablo.

²² Te Félix chi je jíin vāha de ndese cácujuhnu ñayuu Cristo. Te jeē ní jini sōho de jnūhun yáha te ni stétu de un jíin náhan, te ni cahān de:

Nde na quée general Lisias te cajnūhun gá rī siquī jniñu yáha, áchí de.

²³ Te ni ndacu de jniñu nuū capitán jeē na cóne ga Pablo vecāa, te ma cási jeē sáha de jeē cuní de, te ni ma cási jeē quíjicoo jnáhan de jeē chindéé ñáhán i de.

²⁴ Te ni cuu jecu quivī, te ni quiji tucu Félix jíin ñasihí de Drusila, te ñahan hebreo cúu ña. Te ni ndacu de jniñu jeē na quíji Pablo návāha nacani de jnūhun ndese cándíje yó Jesucristo. ²⁵ Te ni cahān Pablo jíin de jeē cánuú sáha yó jniñu ndaā, te cánuú coto yó máá yó jeē ma sáha yó jniñu stívi, chi quivī sándihí te sándaā Yaā Dios jniñu ndívii ñayuu ndese ni casáha i. Te ni yūhu Félix te ni cahān de:

Vijna te cuáhán, te inga quivī jeē núne ri te cana ri rohó quiji ró, áchí de.

²⁶ Te ñūhun ni de jeē cuāha Pablo xūhun núu de te siáa de quenda de vecāa. Jeē yúcuán tijni jínu ni cana de Pablo ni candajnuhún de. ²⁷ Te súcuán ni cuu uū cuiyā, te sáa te ni nucuiñi Porcio Festo nuū Félix. Te cúní Félix jeē na cúsiñi ni ñayuu hebreo jíin de, te jeē yúcuán ní squéndōo de Pablo vecāa.

Jeē ni indichi Pablo nuū Festo

25

¹ Te sáa únī quivī jeē ni quívi Festo cuu de gobernador Judea, te ni quenda de ñuu Cesarea cuahān de ñuu Jerusalén. ² Te tāca sútū cácujuhnu jíin tēe cácujuhnu nuū ñáyuu hebreo ni jinūcoo nuū Festo, te ni cajicān cuēchi siquī Pablo. ³ Te ni cacahān ndahú jíin Festo jeē núu vāha ni de te na nátaji de Pablo ndiji ñuu Jerusalén. Súcuán ni cacahān, chí je ni casquínáhan jnūhun jeē cahni Pablo ichi. ⁴ Te ni cahān Festo jeē yíndesi vāha Pablo nde ñuu Cesarea, te je jéni ni de jeē jecu na quivī te nuhūn maá de ñuu Cesarea. ⁵ Te jeē yúcuán ní cahān de jíin táca tēe ún:

Tāca níhín jeē cándiso jniñu, na quíngoo yó nde Cesarea, te yúcuán cácuán ni cuēchi siquī de te núu íyó cuēchi de, áchí de.

⁶ Te ni ine de yúcuán únā chí úxi-ni quivī, te ni ndee de ñuu Cesarea, te inga quivī ni cucōo de mesa nuū sándaā de jniñu, te ni cahān de jeē na quíji Pablo. ⁷ Te je cáhīn tēe hebreo jeē ní quijicoo nde ñuu Jerusalén. Te ni quee Pablo, te ni cajicó ndúu nuū de, te ni caquejé-ñi casájnúhún téyí síquī de, te tú na jíin ní cástéén jeē iyó ndáa jnūhun cácuahān. ⁸ Te ni cahān Pablo jehē maá de:

Tu ní sáha ná ni ñn cuēchi siquī ley ñuu na jéē cácuu ná ñayuu hebreo, ni siquī templo, ni siquī rey nación Roma, achí de.

⁹ Te Festo chí cúní de jeē cusīñi ni ñayuu hebreo jíin de, te ni cajnūhún de Pablo:

¿A tu cúní rō quinhun rō Jerusalén te yúcuán sándaā rī siquī rō? achí de.

¹⁰ Te ni cahān Pablo:

Je indichi na núu cúndaā jniñu jeē ndácu máá tēe cúu rey nación Roma, te yáha cúu nuū cánuú cúndaā jniñu ná. Máá ní je jíin vāha ni jéē tú na cuēchi ní sáha ná síquī tāca jnáhan ñuu ná hebreo. ¹¹ Chí núu ni sáha ná ñn cuēchi xeēn jeē jíin ñúhún cuu ná, te íyó vāha jeē cúu na núu súcuán. Te núu tu íyó ndáa jnūhun jeē casájnúhún tēe yáha síquī

ná, te ni ìn tēe ma cúu chihi de sãhá ndaha tēe yáha jíjnáhan de. Núu súcuan te cúní na quihín na nuū maá rey nación Roma sãndaã de siquĩ na, áchí de.

¹² Te ni cajnúhun Festo ndese cájeni ni tēe cándiso jníñu jíin de. Yūcuán na te ni cahān de jíin Pablo:

Je ni cahān rō jeē cuní rō quihín rō nuū maá rey nación Roma sãndaã de siquĩ rō. Núu súcuan te quihín nahín ró nuū de, áchí de.

Jeē ni índichi Pablo nuū rey Agripa

¹³ Te ni cuu jecu quivĩ, te rey Agripa jíin Berenice ni jecondēhé de Festo nde ñuu Cesarea. ¹⁴ Te tijni quivĩ ni coyūcú de yūcuán. Te ni nacani Festo jnúhun siquĩ Pablo nuū rey un. Te suhva ni cahān de:

Félix jeē ní cuu de gobernador, ni stóo de ìn tēe íne vecāa yāhá. ¹⁵ Te ná ni jehēn ná ñuu Jerusalén, te sutū cácujeñnu jíin ñáyuu jéñnu cándiso jníñu nuū ñáyuu hebreo ni jinūcoo i nuū na cájequin i cuēchi siquĩ tēe ún, te cácuni i jeē na cúu de. ¹⁶ Te ni cahān na jíin i jeē tu íyó costumbre tāca tōhō Roma jeē cahni de ìn tēe súcuan-ni, chi jíni ñúhún condichi de jíin ñáyuu cájequin cuēchi siquĩ de, návāha cahān de jehē maá de te cundaā núu íyó cuēchi de. ¹⁷ Yūcuán na te ni quecoo tútú i yāhá. Te inga quivĩ ún tu ní cúcuéé ná, chi ni cucōo na mesa nuū sãndaã na síquĩ cuēchi, te ni ndacu ná jniñu jeē na quíji tēe ún. ¹⁸ Te cáhiin ñayuu cájequin cuēchi siquĩ de. Te ni jeni ni na jēé iyó cuēchi xeēn cahān de siquĩ tēe un núu, te tú cuiti. ¹⁹ Chi jeē cácahān de cúu máni siquĩ jnúhun cácañíje-ni máa de, jíin síquĩ ìn tēe nání Jesús jeē jé ni jihí de, te Pablo cahán ñihin de jeē ní natecu ndije tēe ún. ²⁰ Te tu ní cújnúní cuiti ni ná ndese sãndaã ná, te ni cajnúhun ná de núu cúní de quihín de ñuu Jerusalén te yūcuán cundaā siquĩ de. ²¹ Te máa Pablo ni cahān de jeē cuní de quihín de nuū Augusto, rey yō nación Roma, te yūcuan sãndaã rey cuēchi de, ni achi de. Te ni cahān na jēé na cóne de vecāa nde tají ná de quihín de nuū rey un, áchí Festo.

²² Yūcuán na te ni cahān Agripa jíin Festo:

Suni cúní maá ná cuni sōho ná jēé cahán tēe un, áchí de.

Te ni cahān Festo:

Sajnē te cuni sōho ní jēé cahán de núu súcuan, áchí de.

²³ Te inga quivĩ un ní quecoo Agripa jíin Berenice. Te cáñuhun de sahma cújéñnu de, ni quivícoo de ini vehe juzgado jíin táca general jíin tēe cácujeñnu ini ñuu ún. Te ni ndacu Festo jniñu jeē na quíji Pablo. ²⁴ Te ni cahān Festo:

Cahán na jíin ní, tátā rey Agripa, jíin ndíhi níhín jēé cáyūcu jíin yó yāhá vijna. Yāha cúu tēe jeē siquĩ de ni candonda ndívii jnáhan de hebreo ñuu Jerusalén jíin ndé ñuu Cesarea yāhá, te máni cácahān i jeē tú vāha jeē cótecu gā de. ²⁵ Te jéni ni maá ná jēé tú na cuēchi xeēn ni sáha de jeē cúu de. Te je ni cahān de jeē cuní de quihín de nuū rey Augusto jeē sãndaã rey un síquĩ de, te jeē yūcuan ní cahān na jēé tají ná de quihín de nuū rey un. ²⁶ Te tu cúcáñnu ni ná na jnúhun tee ná núu tútu quihín jíin de nuū rey yō. Jeē yūcuan ní ndacu ná jniñu ni quee de nuū yō jíjnáhan yó, te cánuú gá nuū maá ní, tátā rey Agripa. Te stíchí ni de návāha nihín na jnúhun tee ná síquĩ de, te quihín jnúhun un jíin de nuū rey. ²⁷ Chi tu jéjníñu cuiti jeē tají ná ìn preso quihín te núu tú castúhun ná nuū tútu na cuēchi ni sáha de, áchí Festo.

Jeē ni cáhān Pablo jehē maá de nuū rey Agripa

26

¹ Yūcuán na te ni cahān rey Agripa jíin Pablo:

Vijna te jéhe ri jnúhun cahān rō jehē maá ró, achí de.

Te Pablo ni sáha de ndaha de jeē ní quejéé de cáhān de, te suhva ni cahān de:

² Tátā rey Agripa, cúsi ni ná vijna jeē cúu cahān na jíin ní siquĩ ndíhi jeē casájnúhún ñáyuu ñuu yō hebreo siquĩ ná. ³ Chi je jíni vāha máa ní tāca jēé ní tajnúni ñayuu ñuu yō hebreo jíin táca jnúhun jeē tu cáhiin ñnuú i jíin. Jeē yūcuan cáhān ndahú ná jíin ní jeē coo paciencia ni cuni sōho ní jnúhun cahān na jíin ní.

Jeē ní cachi Pablo ndese ni sáha de nde ná tu sama ya ini de

⁴ 'Je cájini tāca jnáhan ñuu yō hebreo ndese ni sáha ná ini ñuu nuū ní cacu ná jíin ini ñuu Jerusalén nde ná lulí ná. ⁵ Te núu cácu ni maá de cahān ndaā de, te je cájini de sāha jéē ndé lulí ná ni quívi ná nuū grupo fariseo, te grupo un níhin ga cánducú ndéyi de squícu de ley yā vēsú tāca gá grupo tēe nación yō. ⁶ Te ñúhun ni na jnúhun ni jejnúhun Yaā Dios nuū tāca jíi yō jeē nastécu yā ndīyi, te máá síquī tāca jnúhun yáha-ni cúu jeē cájequin de cuēchi síquī ná. ⁷ Chi máá yó jeē cácuu yó jnáhan ndihúxí uū yucūn ñayuu Israel, cáñuhun ni yō jnúhun ni jejnúhun ya jeē nastécu yā ndīyi, te jeē yúcuan nduú ñuu cáchiñúhún yó Yaā Dios te cájeñíñu yó núu yā. Te suni súcuan ñúhun ni maá ná, tátā rey Agripa, te síquī jeē nácani ná jnúhun jeē natecu ndīyi cúu jeē cájicān jnáhan ñuu yō hebreo cuēchi síquī ná. ⁸ ¿Te chí má nastécu Yaā Dios tāca ndīyi cájeni ni ní naún?

Jeē ní cachi Pablo ndese ni jito xeēn de ñayuu cácadíje

⁹ 'Te máá ná chi ni jeni ni na jéē jíni ñúhún ndonda ná síquī ñayuu cácadíje i Jesús, Yaā ní jehnu ñuu Nazaret. ¹⁰ Te súcuan ni sáha ná ini ñuu Jerusalén, chi tāca sūtū cácujeñnu ni cajēhe de jnúhun jeē cóndiso jníñu ná chuhun ná cuéhē ñayuu vecāa síquī jeē cácadíje i Jesús, te íyó váha ni na núu cájehni de i. ¹¹ Te tíjni jínu ni sáha ndevāha na jíin i ini tācá vehe íi sinagoga jeē ni sáha fuerza na i jeē na stóo i jnúhun cácadíje i. Te xeēn ni quítī ni na núu i, chí nde ñuu jicá ní jehēn ná ni sáha xeēn na jíin i.

*Jeē ní cachi tucu Pablo ndese ni sama ya ini de
(Hch. 9.1-19; 22.6-16)*

¹² 'Te sūtū cácujeñnu ni cajēhe de jnúhun jeē cóndiso jníñu ná quíhīn na sáha xeēn na jíin ñayuu cácadíje cáyūcú ñuu Damasco nuū. ¹³ Te cuahān ná ichi ún, tátā rey, te caxū cúu, te ichi ándiví ní quíji ñn nduva ni ndindéé ndaxín núu na jíin núu tēe cuango jíin ná, te víhyá gā ndíi vēsú niāndii. ¹⁴ Te ndíhi ná ní cacotúú ná nuū ñúhun. Te ni jíni sōho ná ñn jnúhun ni cahān jíin ná jíin jnúhun yuhu yó hebreo: Saulo, Saulo, ¿najehe jíto xeēn rō ruhū? Chi jeē sáha ró súcuan cúu nájñuhun stiquī jeē tu jéndije tí, te jéñú yatá tí xini pulla, te súcuan stóho tí maá tí, áchí. ¹⁵ Yūcuán na te ni cahān ná: ¿Na nihín cúu jeē cahán, Tátā? achí ná. Te máá Jítóho na ní cahān yā jíin ná: Máá rí cúu Jesús, te jeē jíto xeēn rō ñayuu cácadíje i ruhū cúu jeē jíto xeēn rō ruhū. ¹⁶ Ndonga condichi rō, chí vēji ri nuū rō jeē tejníñu ri rohó sáha ró jniñu cúní rī, te nacani cájí ró jnúhun tāca jéē ní jito ró vijna, jíin jéē steén gā rī nuū rō tāca quívi quíji. ¹⁷ Te jnama ri rohó núu tāca jnáhan ñuu rō jíin núu ñayuu tāca gá nación, chí nuū ñayuu un tájí rí rohó quíhīn rō. ¹⁸ Te tájí rí rohó quíhīn rō nuū i, chí nájñuhun nanune ró tñnūú i cúu jeē steén rō jnúhun ri nuū i te jecūhun ni i. Chí ñayuu ná tu candíje i ruhū, nájñuhun cájica i nuū nēe. Te jeē candíje i ruhū, quívi i nuū luz rī, te tuá quíhi i chíji jniñu jeē cuní jexeén jeē cúu Satanás, chí sa suhva quíhi i chíji jniñu cúní maá rí. Te tájí rí rohó quíhīn rō nuū i, návāha candíje i ruhū te cone cáhnu ni rī nuū cuéchi i. Yūcuán na te inuú níhīn tahú i jíin táca gá ñayuu jeē ni sándoo ri anuá i, áchí yá jíin ná.

Jeē ní cachi Pablo ndese ni jetáhú de jnúhun ni cahān yā

¹⁹ 'Jeē yúcuan tu ní sáníhni ni na núu jnúhun ni cahān yā ichi ándiví jíin ná, tátā rey Agripa. ²⁰ Chi ni jetáhú ná, te ni nacani ná jnúhun ya xihna gā nuū ñayuu ñuu Damasco, te sáa te ni nacani ná jnúhun ya nuū ñayuu ñuu Jerusalén jíin ní región Judea jíin núu ñayuu tāca gá nación. Te jnúhun ni nacani ná núu i cúu jeē na nácani ni i jeē stóo i cuēchi i te nasāma ini i sáha Yaā Dios, te na sáha i jniñu váha jeē steén jeē ní nasāma ini i. ²¹ Te síquī jeē súcuan ni nacani ná jnúhun te ni cajñi jnáhan ñuu yō hebreo sāhá ini templo, te ni cacuni i cahni i sāha núu. ²² Te ni chindéé ñáhán Yáa Dios sāhá, te jeē yúcuan índichi níhin na ndé vijna nácani cájí ná jnúhun ya nuū ñayuu cácujeñnu jíin núu tācá-ni ñayuu. Chí tu chíso gá na jnúhun síquī jnúhun jeē ní nacani Moisés jíin táca gá tēe ni canacani jnúhun Yaā Dios nde jenahán. ²³ Te ni cundaā jnúhun ni canacani de un jéē cánuú ndoho Cristo nde cuu yā, te xihna gā maá yá natecu vēsú tāca gá ndīyi, te súcuan steén cájí yá

nuū ñáyuu jeē jnáma ya i, cúu ñayuu nación yō Israel jíin ñáyuu tāca gá nación, áchí Pablo.

Jeē ní nducú ndéyí Pablo scandíje de Agripa jnūhun Jesús

²⁴ Te súcuan ni cahān Pablo jehē maá de, te ni cahān jee Festo:

Ni nduloco rō, Pablo. Siquī jeē ni scuáha ndasí ró te jeē yúcuan ní tīvi xínī rō, áchí de.

²⁵ Te ni cahān Pablo:

Tu ní tīvi xínī na, tátā Festo, chi sa suhva íyó cájí ndāā jnūhun cáhán na. ²⁶ Te máá rey Agripa je jíin vāha de tācá jniñu ní íyo jeē ní nacani ná, te tu yúhú ná cahān na táca jnūhun yáha, chi je jíin vāha na jéē jíin de tāca jnūhun yáha, chi tú sāhi ní cúu tācá jniñu yáha. ²⁷ Tátā rey Agripa, ¿á cándíje ní jnūhun jeē ní cacahān tēe ni canacani jnūhun ya nde jenahán? Jéni ni na jéē candíje ní, áchí Pablo.

²⁸ Yūcuán na te ni cahān Agripa jíin Pablo:

Va jéni ni rō jeē jíin jecu jnūhun ni cahān rō te sāha ró jeē candíje ri Cristo, achí de.

²⁹ Te ni cahān Pablo:

Vēsú jíin jecu-ni jnūhun chí jíin cuéhē, te jícán tahu na jéē maá ní jíin táca gá tēe cájini sōho jnūhun cáhán na vijna, na cándíje ní nájñūhun cándíje máá ná, te tu cúni na jéē cónuhñi ni nájñūhun núhñi na.

³⁰ Te ni ndíhi ni cahān Pablo tāca jnūhun yáha. Te ni ndocuññi rey jíin gobernador jíin Berenice jíin táca gá tēe cácujuhnu cáyūcu jíin de. ³¹ Te ni cacujiyo de, te ni candajnūhun sññ máá de:

Tú ni ññ cuēchi ní sāha tēe yáha jéē cúu de ni jeē cóne ga de vecāa.

³² Te ni cahān Agripa jíin Festo:

Cuu siáá ni tēe yáha núu jeē tu ní cáhán maá de jeē quihín de nde nuū rey yō nación Roma nuú, áchí de.

Jeē ní catajé de Pablo cuahān de ñuu Roma

27

¹ Te ni cundaā jeē quihín Pablo jíin barco nde Italia, te suni quingoo ná jíin de. Te Pablo jíin sava ga tēe cáhiin vecāa ni quívicoo de ndaha ññ capitán naní Julio jeē quíndēca de tēe un ndé Italia. Te Julio cúu ññ jnáhan grupo soldado naní Augusto. ² Te nde ñuu Adramitio nuū cájecuññi barco ni quenda ññ barco ni quee, te ni quívicoo ná, te quihín barco un táca ñuu jeē yñhi chíji Asia jeē yúcu yumar. Te suni cuahān Aristarco jíin ná, te máá de cúu tēe ñuu Tesalónica región Macedonia. ³ Te inga quiví ni jinūcoo ná ñuu Sidón nuū cájecuññi barco. Te Julio ni cundáhú ni de Pablo, te ni jēhe de jnūhun ni jecondēhe Pablo tācá amigo de, te ni cachindéé ñáhán i de. ⁴ Te ñuu yúcuan ní quenda barco cuahān jíin ná. Te siquī jeē ññhin yñhi tachí te tu ní cúu quihín yohó barco, te ni tee xín barco cuahān jíin ná xiin isla Chipre, ññhun jeē íne sññ nuū ndúte, te lado jecó barco ni quendōo Chipre. ⁵ Te ni cayāha ná yumar Cilicia jíin Panfilia cuahān ná, te ni jinūcoo ná ñuu Mira ndañū Licia.

⁶ Te ñuu yúcuan ní ññhin capitán ññ barco jeē véji ñuu Alejandría te quihín ichi Italia, te ni cahān de jíin ná ni quívicoo ná barco un. ⁷ Te cuehē quiví ni cahíin na núu ndúte jíin barco, chí cuéé ní jica, te fuerza-ni ni jinūcoo ná yuñū Gnido. Te tuá ni jēhe tachí un jnūhun quihín yohó barco, te ni cayāha ná núu jnūhma tachí xiin ññ Salmón jeē íne nuū isla Creta. ⁸ Te yōhyo ni canducú ndéyí tēe cáscaca barco un, ní yāha jíin ná ññ yumar xiin Creta. Te ni jinūcoo ná ññ lugar naní Buenos Puertos nuū cájecuññi barco, te yajni un íne ñuu Lasea.

⁹ Te je ni cuu cuehē quiví ni cajica ná jíin barco. Te je yajni quejéé vico mójin, te yúcuan cúu tiempo jeē yñ jica barco te sanaa te coo jnūndóho nuū mar. Te ni cahān ññhin Pablo jíin de:

¹⁰ Tátā jijnáhan ní, jíin na jéē yōhyo yñ coo viaje yáha, te quiji jnūndóho siquī barco, te naa barco jíin ndajnññu, te nde maá yó sanaa te cuu yō, achí de.

¹¹ Te tu ní chúsóhó capitán jeē cahán Pablo, chi sa suhva jeē cahán tēe scáca barco un jíin tēe chíi barco. ¹² Te siquī jeē tu íyó váha lugar nuū ni jécuiñī barco un jēē cóyūcú de ní vico míjin, te ni cajeni ni cuehē gā de jeē váha ga núu quendacoo de yūcuán. Chi cájeni ni de jeē núu cuu te jinūcoo de ñuu Fenice te yūcuán coyūcú de vico míjin. Chi Fenice suni íne yundúte isla Creta nuū cájecuñī barco, te ndijin ichi noroeste jíin suroeste.

Jeē ni jécuiñī ñin tachī níhin jeē stóna ndute mar

¹³ Te ni jecuñī vīta táchī ichi sur, te ni cajeni ni de jeē jinú de Fenice nuú, te ni cascáca ga de barco jíca jíin de xiin Creta. ¹⁴ Te ni cunúu jecu gā, te ni quejéé-ñi ñin tachī níhin ndasí jeē naní táchī nordeste. ¹⁵ Te tuá ni cúu ga quihín yohó barco, chi ni chundahá-ñi tachī cuahān jíin, te ni casiáá-ñi de jeē cascáca de, te cháha chúcuan cuahān barco jíin ndīhi ná sáha tachī. ¹⁶ Te ni yāha jíin ná xiin isla lulí jēē naní Claudia, nuū jnūhma tachī. Te vēsú súcuan te yōhyo uhū ni cascáca ná barco lulí jeē ndiquín yatā barco cáhnu. ¹⁷ Te ni casquívī ná ini barco cáhnu. Te ni casucun núu de barco cáhnu jíin yoho. Te cáyūhú de jeē quihín barco nuū yaxín ndute nuū naní Sirte te jñī nuū ñíti, te jeē yúcuan ní casnúu de sahma cóquin jeē stechí te jíca barco. Te ni casiáá de jeē na quihín ndé chi chundahá táchī. ¹⁸ Te tu jécuiñī cuiti jeē yíhi tachī níhin. Te inga quivī un ní caquejéé de cájete de ndajniñu ndíso barco, návāha nduñama gā barco te ma quée chíji ndute. ¹⁹ Te quivī uní ni cajēhe núu ná ndaha ni cajete ná máá ndajniñu jéjñiñu barco. ²⁰ Te cuehē quivī tu ní cájito ná níandii ni quimi siquī jeē íin vicō, ni tu jécuiñī cuiti tachī níhin ún, te tuá cáñuhun ni na cácu ná.

²¹ Te ni cuu quivī jeē tuá cáyeji cuiti na stáa. Te ni jecondichi Pablo sava mēhñu tēe ún, te ni cahān de:

Tátā jijnáhan ní, núu ní cájetáhú ní jñuhun jeē ni cáhān ná te ma quéndacoo yó Creta nuú, te ni ma cóto yó jnúndóho yáha ni ma náa ndajniñu núu. ²² Te vijna cáhān níhin na jíin ní jeē cuandeyí ni ni jijnáhan ní, chi ni ñin ní má cúu ní, vēsú naa barco. ²³ Chi jeē cúni ni quiji ñin ndajéhé jeē ní tají máá Yáa Dios nuū ná. Chi máá yá cúu Jitoho ná, te jéjñiñu ná núu yā. ²⁴ Te ndajéhé yā ún suhva ni cahān yā jíin ná: Pablo, ma yūhu ró, chi váha-ñi jinū rō nuū rey nación Roma, te jeē siquí rohó te sáha Yáa Dios jeē cácu ndīhi tēe cáhīin jíin ró ini barco yāhá, áchí yá jíin ná. ²⁵ Tátā jijnáhan ní, ma yūhu ní núu súcuan, chi máá ná cúcáhnu ni na Yáa Dios jeē coo nájnūhun ni cahān ndajéhé yā jíin ná. ²⁶ Te jinū nahín yó ñin isla, te ma jinú yachí yō nuū quingoo yó, áchí de.

²⁷ Te ni cuu uxī cuñ jecuáa nde jeē ní quejéé táchī, te jíca barco nuū mar Adria, te cháha chúcuan cuahān barco sáha tachī. Te máá jecuáa ún te jeē ní cuu sava ñuú te cájeni ni tēe cascáca barco jeē jé cuacuyajni jinū barco ñuhun íchi. ²⁸ Te ni casínga de ñin jeē cáchicuāhá de nasaa cúnú ndute, te ni cajini de jeē iyó ócō xahūn ñin metro. Te ni jica barco jecu gā te ni casínga tucu de, te ni cajini de jeē iyó ócō uxā na metro. ²⁹ Te cáyūhú de jeē jécujnáhan barco jíin toto, te ni cajihni de cuñ cāa gancho náhnu yatā barco un, te ni cascāne de nde jehē ndúte návāha chituu te jecuñī barco. Te yōhyo jnāa de jeē na cúndijin yachí. ³⁰ Te tēe cascáca barco un ní canducú de cunu de quingoo de jíin barco lulí te cācu de nuū jnúndóho quiji siquī barco cáhnu núu. Jeē yúcuan ní casnúu de barco lulí un núu ndúte, te casáha-ñi de nájnūhun jeē snúu de inga cāa gancho ichi núu barco návāha tú cuni ñayuu jeē cácuni de cunu de quingoo de. ³¹ Te ni cahān Pablo jíin capitán jíin táca soldado:

Núu tú coyūcu tēe yáha ini barco cáhnu jíin yó, te ma cácu cuiti maá ní jijnáhan ní, áchí de.

³² Yūcuán na te soldado ni cajehnde de yoho núhni barco lulí, te ni jneni-ñi cuahān.

³³ Te nuū cuácundijin te ni cahān Pablo jíin táca tēe un jēē na cáji de stáa. Te suhva ni cahān de:

Vijna íyó úxī cuñ quivī jeē cándito ní te tu cáyeji cuiti ni stáa. ³⁴ Te cáhān ndahú ná jíin ní jeē na cáji ni stáa, návāha nanihīn ni ní te cācu ní, chi ni ñin yó má cúu, ni ma tují cuiti yō, áchí de.

³⁵ Te ni ndihí ni cahān de jnūhun yáha, te ni quihin de ñn staā, te mēhñu táca ñáyuu un ní nacuatáhú de nuū Yaā Dios, te ni tahu sáva de staā ún, te ni quejéé de yéji de. ³⁶ Yūcuán na te ni candusī ni ndihí de, te suni ni cayeji de staā. ³⁷ Te ndivii na jéé cáñūhun ná ini barco cúu uū ciento unī xico xahūn ñn ná. ³⁸ Te ni cayeji vāha ndihí ná. Yūcuán na te ni cajete de trigo cuahān nuū ndúte un, návāha na ndúñama gā barco.

Jeē ni quée barco chiji ndute

³⁹ Te nuū ní cundijin te ni cajito de ñuhun, te tu ní cánacuni de ndé nuū cúu. Te ni cajito de nuū íne cuñi ndute, te suni máá ñíti cúu, te cájeni ni de jinū de yūcuan jíin barco nuū na cúu núú. ⁴⁰ Te ni cajehnde de yoho núhni cāa gancho yūcuan, te ni caquendōo cāa un núū mar. Te ni canandají de yujnu jeē scotú chíí barco, te ni nacata caa de sahma cóquin ichi núú návāha chundahá táchī barco, te ni quejéé caca quihīn jíin de ichi núú iyó ñíti. ⁴¹ Te ni jinū barco nuū níhin náquijnáhan ndute. Te ni quée barco nuū ñíti ñūhun chiji ndute, te ni jñi-ñi ichi núú te tuá ni jíca cuiti, te yatā barco un ní cahya-ñi jeē níhin ni cani suhmā ndute mar. ⁴² Yūcuán na te ni candajnūhún soldado jeē cáhni de tāca preso návāha ma súde i te cunu i quingoo i. ⁴³ Te cúní capitán un jéé cācu Pablo, te ni jesicoo de. Chi sa ni cahān de núu ndé ñáyuu jiní suté te xihna gā i na nungoo i suté i nuū ndúte, te na quénda-ñi i quihīn i nuū ñūhun íchi. ⁴⁴ Te suni sūcuan na quécoo ndihí i quihīn i, sava i coso candá i jíin yujnu cúnu te sava ga i jíin pedazo yujnu barco. Te sūcuan ni cacācu ndihí ná ní jinūcoo ná ñuhun íchi.

Jeē ni íne Pablo isla Malta

28

¹ Te nuū ní cacācu ná te ñáyuu cáyūcu yūcuan ní cacachi i nuū na jéé isla un nání Malta. ² Te ñáyuu un ní cacundáhú ni i sāña jíjnáhan ná, te ni cascáyú i ñn ñuhūn cáhnu, te ni cacahān i jíin ná jeē nasaā ná, chi mījin sáha jeē cúun saū. ³ Te ni stutú Pablo jecu tujnu íchi. Te jeē jnāa de tujnu un núú ñuhún te ñn coō xeén jínu ti ni quenda ti tujnu un jéé ní cujihní, te ni chiyuhú-ñi ti ndaha de. ⁴ Te ñáyuu cáyūcu yūcuan ní cajito i jeē ndíta caa coō un yíyuhú tí ndaha de, te ni cacahān i:

Tēe yáha vā sanaa te ni jehni de ndīyi núu sūcuan, te vēsú je ni cācu de nuū mar, te máá yāa sándaā jniñu ñáyuu tu jéhe ga yā jnūhun jeē cótecu de, áchí i.

⁵ Te ni caja Pablo ndaha de, te ni ñinga coō un núú ñuhún, te tú na vé ni ndóho de. ⁶ Te cándētu tāca ñáyuu jeē chūhun i cuñi de chí cotúú-ñi de te cuu de. Te ni cunahán téyí cándētu i, te ni cajito i jeē tú na vé ni ndóho de. Yūcuán na te ni nasāma cájeni ni i, te ni cacahān i jeē ñn yaā cúu Pablo.

⁷ Te yajni yūcuan íyó ñuhun tēe cújéhnu ga Malta un, nání de Publio. Te ni cana tēe un sāña jíjnáhan ná, te ni jēhe núu de vehe de ni coyūcu ná jíin de unī quivī, te ni jito yúcún de sāñá. ⁸ Te tátá Publio cāa de, chi ndóho de cuehyī quiji jíin cuehyī niñi. Te ni jecondēhe Pablo tēe ún, te ni jicān tahu de te ni soó de ndaha de siquī tēe ún, te ni nduvāha-ñi de. ⁹ Yūcuán na te ni quijicoo ndihí ga ñáyuu cácuñu yūcuán, te suni sūcuan ni canduvāha-ñi i. ¹⁰ Te ñáyuu un ní cajēhe i cuehē ndajniñu ni cacutahū ná. Te nuū ní jinū quivī jeē quingoo tucu ná jíin barco, te ni cajēhe i tācá ndajniñu cuu ná ichi.

Jeē ni jíin Pablo ñuu Roma

¹¹ Te unī yoō ni coyūcu ná Malta. Te ñn barco jeē véji ñuu Alejandría ni ine Malta ní vico mījin, te ichi núú barco un ndéé uū figura ídolo ñuu de nání Cástor jíin Pólux. Te ni quivīcoo ná barco un cuángoo ná. ¹² Te ni jinūcoo ná ñuu Siracusa, te yūcuan ní coyūcu ná unī quivī. ¹³ Te ni quenda barco cuahān jíin ná nduu nduu yundúte, te ni jinūcoo ná ñuu Regio. Te ñnga quivī ún vāha ni quiji tachī ichi sur, te ni quendacoo ná ñuu Regio, te uū quivī te ni jinūcoo ná ñuu Puteoli. ¹⁴ Te yūcuan ní caquijnáhan ná jíin jecu hermano cácadije, te ni cacana de sāña ní coyūcu ná jíin de ñn semana. Yūcuán na te ni quendacoo ná jéé quihīn ná ñuu Roma. ¹⁵ Te hermano cáyucú ini ñuu Roma, je ni canihīn de jnūhun jeē jinūcoo ná, te ni quendacoo de, te sava de ni caquijnahan de

sāña ndé ñuu Foro de Apio te sava ga de ñuu Tres Tabernas. Te ná ni jito Pablo nuū de jijnáhan de, te ni nacuatáhu de nuū Yaā Dios, te ni ndundeyí ni de. ¹⁶ Te sáá te ni jinūcoo ná ini ñuu Roma, te capitán ni squívi de tāca preso ndaha tēe cújéhu nuū tācá soldado ñuu Roma. Te ni cajēhe de jnūhun jeē cone sñin Pablo te condito ñin soldado de.

Jeē ní nacani Pablo jnūhun ya ini ñuu Roma

¹⁷ Te nuū uní quiví te ni cana Pablo tāca tēe cácujuhnu nuū jnáhan ñuu de hebreo cáyucú ini ñuu Roma. Te ni cacutútú de, te ni cahān Pablo jíin de:

Tátā jijnáhan ní, tú cuiti na vé ni sāha ná síquī jnáhan yó hebreo ni síquī tācá jniñu ní catajnúní jíi yō. Te vēsú súcuan te ni cajni i sāña ndé ñuu Jerusalén ni casquíví i sāñá ndaha tēe ñuu Roma jijnáhan de. ¹⁸ Te tēe ñuu Roma jeē cácujuhnu cáyucú Cesarea ni castíhí de sāñá, te cácuni de siáá de sāña núú, chi ni cajini de jeē tú na cuēchi ná jéē cúu ná. ¹⁹ Te jnáhan ñuu yō hebreo tu ní cajēhe de jnūhun. Jeē yúcuan ní cahān na jéē quiji ná núu maá rey cujéhu ga nde ñuu Roma yāhá te sándaā maá de síquī ná. Te tú vēji ná jéē cáquin na cuēchi síquī ñayuu nación yō. ²⁰ Jeē yúcuan ní cana ná níhín jijnáhan ní, návāha cuni na tāca ní te ndajñūhun yó. Chi yóhó ñáyuu Israel cáñūhun ni yō jeē nátecu ndíyi, te suu jnūhun un nácani ná, te jeē yúcuan cúu jeē nuhni na jíin cadena yāha, áhí de.

²¹ Te ni cacahān tēe un jíin Pablo:

Tú ni ñin carta ni cátají ñáyuu cáyucú Judea nuū na jéē cástūhún de jnūhun ní, te tāca jnáhan yó Judea jeē ní quijicoo yāhá, tú ni ñin jnūhun néé ní cacahān de síquī ní. ²² Te cánujnahan ni ná cuni sōho ná ndese cúu jnūhun jeē cahān ni, chi je cájini na jéē tācá-ní lado cacahān ñayuu contra síquī jnūhun jeé jéē steén ni, áhí de.

²³ Te ni cajeni de ñin quiví, te ni quijicoo cuehē de vehe nuū néne Pablo. Te ni nacani de jnūhun ndese ndácu Yaā Dios jniñu, te ni steén cají de jnūhun nde jenéhen te nde ni ini. Te súcuan ni nducú ndéyí de scándíje de tāca tēe un jnúhun Jesús, te ni steén de jeē suni súcuan cáhán ley jeē ni jéhe ya nuū Moisés jíin jnúhun jeē ní catee tēe ni canacani jnūhun Yaā Dios nde jenahán. ²⁴ Te ni cacandíje sava de jnūhun ni cahān Pablo, te sava ga de tu ní cájetáhu de. ²⁵ Chi tú ñuú cáhiyo ni de. Te sáá cánducú de quingoo de te ni cahān Pablo:

Ndaā cahán jnūhun jeē ni cáhán Isaías, tēe ni nacani jnūhun Yaā Dios nde jenahán, chi suhva ni cahān de jíin tāca jíi yō ni sāha Espíritu Santo:

²⁶ Ni cahān Yaā Dios:

Cuáhán núu jnáhan ñuu rō yāhá te cahān rō jíin i:

Vēsú cuni nahín váha ró te ma jécūhun ni rō,

te vēsú coto vāha ró te ma cúni rō.

²⁷ Chi yōhyo nihni ni rō,

chi tu cácuni rō cuatáhu ró.

Te yōhyo uhū cájini sōho ró,

chi tu cánujnahan ni rō cuni sōho ró jnúhun ri.

Te nájnūhun cájesi rō tinūu ró

cúu jeē tu cácuni rō nanducú ró ndese cúu,

te tu cácuni rō jeē násāma ini rō

návāha nasávāha ri anuá rō nuū cuēchi ró, ní achi Yaā Dios.

Ahí tutu. ²⁸ Núu súcuan te na cástūhun ná nuū ni jéē jnúhun ni tájí Yáā Dios jeē jnáma ya yohó, nde vijna te tájí yá jnūhun yāha quíhín nuū ñáyuu tācá nación jeē tu cájini i jnūhun ya, te máá i chi cuni sōho i, áhí de.

²⁹ Te ni jinu ni cahān de jnūhun yāha, te cuangoo jnáhan de hebreo, te yōhyo ni cacahān de síquī jnúhun yāha jijnáhan de.

³⁰ Te ni condee Pablo uū cuiyā vehe jeē ní quihin núu de ún. Te ni cusí ni de cahān de jíin tāca ñáyuu ní quijicoo nuū de. ³¹ Te jéhu-ni ni nacani de jnūhun ndese ndácu Yaā Dios jniñu, te ni steén de jnūhun máá Jítoho yō Jesucristo, te tú ni ñin ní jési jeē nácani de jnūhun.

CARTA JEE NI TEE SAN PABLO APOSTOL NUU ÑAYUU ÑUU ROMA

¹ Máá rí cúu Pablo, mozo Jesucristo, chi ni cana Yaā Dios ruhū cúu ri apóstol yā, ni jeni ya ruhū te ni tají yá ruhū jeē nácani ri jnūhun jeē jnáma ya ñayuu.

² Te jnūhun un ní jejnūhun ya nde jenahán ndasí, te yósó núu tútu ii jeē ní catee tēe ni canacani jnūhun ya. ³ Te jnūhun un cáhán siquī Jitoho yō Jesucristo, Yaā cúu Sēhe Yaā Dios. Te ni nduu ya tēe, ni cacu ya chíji yucūn rey David. ⁴ Te ni natecu yā mēhñu ndíyi ni sáha Espíritu ii, te súcuan ni steén Yaā Dios jeē cúu ya Sēhe ya jeē ndíso poder. ⁵ Te jeē jíin Jesucristo ni jēhe Yaā Dios jniñu luu yáha jeē cácuu ri apóstol, cájica ri jíin jnūhun Cristo, návāha coo ñayuu tācá nación jeē candíje i jeē sáha ya jehē i, te cuatáhú i nuū yā. ⁶ Te suni máá ró jijnáhan ró, suni ni cana ya rohó ní quívicoo ró ndaha Jesucristo.

⁷ Te tēe ri carta yáha cuajeē nuū rohó ñayuu ñuu Roma. Chi ni cundáhú ni Yaā Dios rohó, te ni cana ya rohó jéē coo ndoo coo ii rō nuū yā. Te ñúhun ni rī jeē maá Tátá yō Yaā Dios jíin Jitoho yō Jesucristo sáha ga yā jeē váha rohó, te sáha ya jeē coo ndeyí coo sīñ ni rō.

Jeē cuní Pablo quihñ de ñuu Roma

⁸ Te xihna gā cástūhun rí nuū rō jeē nácuatáhú rí nuū Yaā Dios jeē siquí rohó jijnáhan ró, chi ni sáha Jesucristo jeē váha rohó. Chi ní ñáyivi jíté núu jnūhun cuahān ndese vāha cácuandíje ró yá. ⁹ Te máá Yaā Dios jiní yā jeē niní jícán tahu rī jehē rō jijnáhan ró nuū jicán tahu rī. Chi yōhyo ndíhví ni rī jejníñu ri nuū yā jeē nácani ri jnūhun Sēhe ya. ¹⁰ Te niní jícán tahu rī nuū yā jeē núu cuní yā te nde vijna te cuu jecondēhe rí rohó. ¹¹ Chi cúu ni rī coto ri nuū rō jijnáhan ró, te steén gā rī jnūhun ya nuū rō, návāha quendōo vāha ga anuá rō te cuiñi nihin ga rō jíin. ¹² Súcuan cuní rī návāha sáha yó jéē inuú coo ndeyí ni yō jijnáhan yó siquí jeē ínuú cácuandíje yó yá.

¹³ Hermano jijnáhan ró, cuní rī jeē na jécūhun ni rō jeē tǵjni jínu ni cuu ni rī jecondēhe rí rohó, te nde vijna ná tu cuu. Chi cuní rī scuité núu ga rī jnūhun ya mēhñu ró, nájnūhun ni sáha ri mēhñu ñayuu tāca gá nación. ¹⁴ Chi cúu ri tēe táu siquí jnūhun ya, chi táu rī nacūaha ri jnūhun ya nuū ndíhi ñayuu, cúu ñayuu jiní gā siquí ndíhi jeē iyó ñáyivi jíin jéē tu jíin cuiñi, cúu ñayuu tūhva jíin jéē tú tūhva. ¹⁵ Jeē yúcuan cúu jeē ndíhví ni rī jeē suni nuū rohó ñayuu ñuu Roma nacani ri jnūhun jnáma ya yohó.

Jeē ndíso jnūhun vāha ya poder

¹⁶ Chi tu cúcanu rī siquí jnūhun vāha ya, chi yúcuan cúu poder Yaā Dios jeē jnáma ya tāca ñayuu cácuandíje, xihna gā ñayuu hebreo te suni tāca gá ñayuu. ¹⁷ Chi jnūhun vāha ya un steén nuū yō jeē ndáhva Yaā Dios cuēchi yó siquí jeē candíje yó jéē sáha ya jehē yō, te máá jéē candíje yó ní cuahān yō. Chi súcuan cáhán nuū tútu ii: Ñayuu jeē ní ndahva yā cuēchi i, técu i jeē candíje i jeē sáha ya jehē i, áchí.

Siquí jeē iyó ndasí cuēchi ñayuu

¹⁸ Chi jíin vāha yó jéē Yaā Dios andiví, cuāha ya castigo xeēn nuū tāca ñayuu tu cácuandíje te máni cuēchi cásáha. Chi jíin jniñu néé cásáha i te cájesi i nuū jnūhun ndaā. ¹⁹ Te ma cúu cahān i jeē tu jécūhun ni i siquí ndese Yaā cúu Yaā Dios, chi máá yá ni steén nuū i. ²⁰ Chi jíin táca jeē ni sáha ya te cúu jécūhun ni ñayuu ndese Yaā cúu máá Yaā tu jíto i nuū. Chi nde ni jecōo ñáyivi jíin ndé vijna te cúu jécūhun vāha ni i jeē maá yá cúu Yaā Dios te iyó poder yā ní cáni. Te jeē yúcuan má cúu cuiñi cahān i jeē tu jíin i jeē iyó yá. ²¹ Chi vēsú ni cajini i ndese Yaā cúu ya, te tu ní cáchiñúhún i ya jeē cúu ya Yaā Dios, te ni tu ní nácuatáhú i nuū yā. Chi sa suhva ni nduu i ñayuu cájeni cāhá ni, chi ni candunéé í i, te ni quendōo nee ini anuá i. ²² Cácahān i jeē ndichí i, te sa suhva cácuandíje i. ²³ Chi ni castóo i Yaā Dios jeē yóhyo luu cújéhnu, jeē ma cúu cuiñi. Te ni cajetáhú i tācá imagen

jeē casáha i, jeē cáa nájnūhun tēe cájihī, te suni nde imagen saa jíin cóo jíin quiti cájica ndicúun ndaha.

²⁴ Te jeē yúcuan ní siaá Yaā Dios i jeē na sáha i tǎcá jniñu jnéhen jniñu néé jēē cuní i. Te casáha i jniñu néé jíin jnáhan i jeē cúu máá jnúhun canu. ²⁵ Chi tu ní cacandíje i jnúhun ndaā Yaā Dios, chi sa ni cacandíje i jnúhun stáhú. Te cáhiyo yíñuhún i te cáchiñuhún i nuū tǎca jēē ni sáha ya, lugar jeē chiñuhún i máá Yaā ni sáha ún, Yaā jeē cánuu cahān yō jeē cujéhu ya ní cání. Amén.

²⁶ Jeē yúcuan ní siaá Yaā Dios i jeē na sáha i tǎcá jniñu néé jēē cándiyo ni i jeē cúu máá jnúhun canu. Chi nde ñahan ni casama ña modo síhí, te ni quívi ña jíin modo neé. ²⁷ Te suni súcuan tēe ni casiáá de modo chíjñiñu jíin ñahan. Te nde ni nduquíjī de ni casáha ndiyī de jíin jnáhan yí de, te tēe jíin tēe ni casáha de jniñu jnúhun canu. Te cándoho de castigo síquī jniñu néé ní casáha de.

²⁸ Te jeē tu ní cǎcuni i cuajnúhún i Yaā Dios, jeē yúcuan ní siaá yā i jeē na cání néé ni i, te sáha i tǎcá jniñu jeē tu íyó váha. ²⁹ Te máni máá na jniñu jeē tu íyó ndaā cándihvī ni, te cájica jnéni, casáha jniñu néé, cándiyo ni, cájito uhū jnáhan. Te máni jeē cǎcucuésún ni, cájehni ndīyī, cájehnáhan, cástáhú, cásáhuhū jnáhan, cásájnúhún síquī jnáhan. ³⁰ Cǎcahān jnúhun néé síquī jnáhan, cájito uhū Yaā Dios, cǎcujēē ni, cásándúxí máá, cásátéyí máá, cájequin costumbre neé, tu cájendetū nuū tatá nuū naná. ³¹ Te tu cájecūhun cuiti ni, tu squícu jnúhun jéjñuhun, tu íyó máni jíin jnáhan, tu íne cáhnu ni nuū jnáhan, tu cúndáhú ni jnáhan. ³² Te je cájini váha i jeē ni sándaā Yaā Dios jeē ñáyuu casáha súcuan, cánuu jnahnū ndetū i. Te vēsú súcuan cájini i, te níni casáha i jniñu néé un, te suni cǎnujnahan ni i jeē casáha jnáhan i súcuan.

Ndaā sándaā Yaā Dios síquī cuéchi

2

¹ Núu súcuan te róhó jēē cahán cuéchi síquī jnáhan, núu na-ni ñayuu cúu ró, ma cúu cahān rō jeē tú na cuéchi máá ró. Chi jeē cahán rō cuéchi síquī jnáhan ró cúu jeē ndénehen ró cuéchi síquī maá ró. Chi róhó jēē cahán cuéchi, suni súcuan sáha máá ró cuéchi. ² Chi jíni yō jeē Yaā Dios, ndaā sáha ya jeē ndóna ya síquī cuéchi ñayuu casáha súcuan. ³ Te róhó jēē cahán cuéchi síquī ñáyuu casáha cuéchi, te suni súcuan sáha máá ró, ¿te á jéni ni rō jeē cǎcu máá ró quívi ndóna Yaā Dios síquī cuéchi, chí naún? ⁴ ¿A cújēē ni rō nuū jnúhun jeē yóhyo váha ni Yaā Dios jíin ró, jíin jēē íyó paciencia yā jeē tú yachī cuāha ya castigo nuū rō? ¿Te á tu jécūhun ni rō jeē jnúhun jeē yóhyo váha ni yā sáha jeē nǎcani ni rō síquī cuéchi ró? ⁵ Chi níhni ni rō te tu nǎcani ni rō síquī cuéchi ró. Te jeē yúcuan cǎyā gā rō castigo síquī rō quívi sáha Yaā Dios juicio, máá quívi jeē cóo ndijin jeē ndaā sándaā yā síquī cuéchi. ⁶ Chi chunaa yā nuū ná ñn ná ñn ñayuu núu ndese jniñu ni casáha i. ⁷ Te ñayuu jeē tu jécuiñī i jeē sáha i jniñu váha, cuāha ya jnúhun jeē cótecu i ní cání. Chi ndúcu i quívi i nuū ndujéhu yíñuhún i, nuū ní cání cotecu i. ⁸ Te quitī ni yā te cuāha ya castigo nuū ñáyuu cujēē ni nuū yā, te cúnihni ni nuū jnúhun ndaā, chi sa nuū jnúhun yacúa yóho jetáhú i. ⁹ Te tǎca ñáyuu casáha jniñu néé, chi nihīn i jnúndóho xeēn te cucuíhyá ndasí ni i, xīhna gā ñayuu hebreo te suni súcuan ñayuu tǎca gá nación. ¹⁰ Te sa suhva tǎca ñáyuu casáha jniñu váha, chi quívi i nuū ndujéhu yíñuhún i, te coo ndeyí coo síhī ni i, xīhna gā ñayuu hebreo te suni súcuan ñayuu tǎca gá nación.

¹¹ Chi Yaā Dios tu sáha ya cuenta ndese cúu ñn ñn ñayuu, chi inuú sáha ya jíin i. ¹² Chi tǎca ñáyuu jeē casáha cuéchi, vēsú tu cǎyihī i chíji ley jeē ni jéhe ya nuū Moisés, te tu níni ley un te jnahnū ndetū i. Te tǎca ñáyuu cǎyihī chíji ley Moisés te casáha cuéchi, jíin ley un sándaā yā cuéchi i. ¹³ Chi tu ndáhva Yaā Dios cuéchi ñayuu jeē máá jēē cúni nahín-ni i jnúhun cáhán ley yā. Chi sa suhva ñayuu squícu jeē cahán ley yā cúu jeē ndáhva yā cuéchi i. ¹⁴ Chi ñayuu tǎcá nación jeē tu cǎnevāha tutu ley jeē ni jéhe ya nuū ñáyuu hebreo, te núu cǎsquícu máá i ley yā, suu cúu jeē cǎnevāha i ley yā ini anuá i, vēsú tu cǎnevāha i tutu ley un. ¹⁵ Te súcuan cǎstéén i jeē jnúhun ndácu ley un chí ñuhun ini anuá i. Te tǎca jēē cájeni ni i jíin ánuá i, suu cúu jeē steén nuū i síquī núu ni sáha i cuéchi chí váha ni

sáha i. ¹⁶ Te súcuan coo máá quíivī jeē jíin Jesucristo sándaā Yaā Dios siquī tāca jéē tu íyó váha jeē ní cajeni sáhi ni tāca ñáyuu. Súcuan cáhán jnūhun váha ya jeē nácani ri.

Siquī jeē tu cásquícu ñáyuu hebreo ley Moisés

¹⁷ Te róhó cácahān rō jeē téē hebreo cácuu ró, te cátenuū rō maá ley Moisés, te cácutéyí ró jeē siquí Yaā Dios. ¹⁸ Te cájeni ni rō jeē jíiní rō ndese nújnahan ni yā, jíin jéē cúu nácāji váha ró ndé-ni cúu jniñu váha, chi ni cacutūhva ró ley un. ¹⁹ Te cájeni ni rō jeē maá ró cácuu téē stéén ichi Yaā Dios nuū ñáyuu tu cájini cuiṭi, jíin jéē cúu sáha ró jéē cúndijin ini anuá ñáyuu cájica nájnūhun nuū néē. ²⁰ Te cájeni ni rō jeē cúu stéén rō nuū ñáyuu tú tūhva jnūhun ya, jíin jéē maá ró cácuu maestro nuū ñáyuu tu jécūhun ni. Chi jíin tutu ley yā te cájini rō ndese cúu jnūhun ndichí jnūhun ndaā, cájeni ni rō. ²¹ Núu súcuan te máá ró jeē castéén nuū ñáyuu, ¿te naun tu cástéén rō nuū maá ró? Te máá ró jeē cácahān jeē ma sácúíhná i, ¿te naun cásácúíhná máá ró? ²² Te máá ró jeē cácahān jeē ma cósíquí ndéē i, ¿te naun cásíquí ndéē máá ró? Te máá ró jeē cácahān jeē cácuquini ni rō ídolo, ¿te naun cásácúíhná ró ndajniñu jeē yúcu ini vehe ídolo? ²³ Te cácutéyí ró jíin ley Yaā Dios, te vésú súcuan te cásáha ró jéē cácahān ñáyuu siquī yā, chi tu cásquícu máá ró jnūhun ndácu ley yā ún. ²⁴ Chi súcuan yósó núu tútu iī: Ñáyuu tāca gá nación, máni cácahān ndevāha i siquī Yaā Dios, jeē siquí cuéchi róhó ñáyuu hebreo.

²⁵ Te núu cásquícu ró ley Moisés, yūcuán na te níhín jniñu ndije jeē ní canihīn rō jnunī circuncidar. Te núu tu cásquícu ró ley un, te vésú ni cuu ró circuncidar, te nájnūhun jeē tu ní cúu ró. ²⁶ Te téē tācá nación, núu cásquícu de jniñu ndácu ley un, vésú tu ní canihīn de jnunī circuncidar, núu súcuan te nájnūhun ni canihīn de jnunī circuncidar. ²⁷ Te téē jeē tu ní cúu circuncidar yiqui cúñu de, te cásquícu de ley yā, máá de cahān cuéchi siquī rō. Chi tu cásquícu ró, vésú cánevāha ró tutu ley un, te ni cuu ró circuncidar. ²⁸ Chi nasūu jéē cáca ichi síquí ñin téē sáha jeē cúu ndije de téē hebreo. Te ni nasūu jéē cúu circuncidar yiqui cúñu ñin téē sáha jeē cúu de téē ndaā. ²⁹ Chi sa suhva téē cúu hebreo ndije, cúu jeē ini anuá de ñūhun jnūhun ndaā. Te téē cúu circuncidar ndije, chi nde jíin ini jíin ánuá de sáha de jniñu ndaā te nasūu jéē ndíso de jnunī circuncidar jeē cahán ley un cúu. Téē cándaā súcuan, nasūu ñáyuu cájejnūhún i de, chi máá Yaā Dios.

3

¹ ¿Núu súcuan te na vé iyó gá nuū ñáyuu hebreo jeē quéndōo váha ga i? ¿Te ndé níhín jniñu jeē casáha i circuncidar? ² Vāha ndasí níhín jniñu. Xihna gā nihín jniñu jeē ni jéhe Yaā Dios jnūhun ya nuū maá i. ³ Te vésú sava i tu ní cácañdije, ¿te á suu sáha jeē ma squícu ga Yaā Dios jnūhun ni jejnūhun ya, chí naún? ⁴ Tú cuiṭi jeē súcuan, chi vésú núu ndíhi ñáyuu castáhu i, te Yaā Dios chí íyó ndáā yā. Chi suhva yósó nuū tútu iī jeē ni cáhān ñin téē jíin yá:

Cahān ñáyuu jeē iyó ndáā ni jíin táca jnúhun cáhán ni,
te cuni i jeē iyó ndáā ní vésú núu cácahān i siquī ní.
Achí tutu.

⁵ Te cácahān sava ñáyuu jeē iyó váha jeē sáha yó cuéchi, chi cuéchi yó jéjníñu stéén jeē iyó ndáā Yaā Dios. Núu súcuan ¿te á cuu cahān yō jeē tú váha sáha Yaā Dios jeē jéhe ya castigo núu jéjníñu cuéchi yó súcuan? (Va cáhán-ni nde ri nájnūhun cácahān ñáyuu ñayívi.) ⁶ Tú cuiṭi jeē súcuan. Chi núu jeē tú váha sáha Yaā Dios, ¿te ndese cuu sándaā yā cuéchi ñáyuu ñayívi?

⁷ Te núu jnūhun stáhu cácahān ñáyuu jéjníñu stéén jeē yóhoyo cújéhnu Yaā Dios siquī jeē máni cáhán ndaā yā, ¿te á cuu cahān yō jeē tú váha jeē cahán yā jeē cuéchi cúu jeē castáhu i? ⁸ Tuú, chí núu jeē súcuan cúu, te cuu cahān yō jeē vetū-ni sáha yó jéē néé návāha quee jeē váha núu. Te sava ñáyuu cácahān ndevāha i siquī rī jeē súcuan cástéén rī, te tú ndaā. Ñáyuu ún chí íyó váha jeē ndénehen ya cuéchi siquī i.

Ndívii yō iyó cuéchi

⁹ Núu súcuan ¿te á váha ga ñayuu cácuu yóhó ñáyuu hebreo vésú inga ñayuu naún? Tú cuíti jeē súcuan. Chi je ni cacahān yō jeē vésú ñayuu hebreo chí ñáyuu tāca gá nación, ndivii yō yíhi chíji cuēchi. ¹⁰ Chi suhva cáhán tutu i:

Tú cuíti na ñayuu ndaā iyó, ni ñin i.

¹¹ Te tú cuíti ñayuu jécūhun ni iyó,

te tú ni ñin i nánducú i Yaā Dios.

¹² Ndíhi i ni cascuíta i jnūhun ya,

te inuú-ni ni castívi ndíhi i máá i.

Te tú cuíti ñayuu sáha jniñu váha iyó, ni ñin i.

¹³ Yaū sucūn i cúu nájnūhun yaū ndīyi jeē núne,

chi máni jnūhun stáhú cácahān i.

Te nájnūhun veneno coō yíhi yuhu i,

¹⁴ chí máni máá jnūhun ndevāha jnūhun uvuā cácahān i.

¹⁵ Te yōhyo ñama jehē i jeē cáhni i ndīyi.

¹⁶ Te ndé-ni cúu-ni nuū cájica i te squívi i jnūndóho jeē jnahnú ndetū ñayuu.

¹⁷ Te tu cájica cuíti i jíin jnūhun coyūcu máni i,

¹⁸ te ni tu cánacani ni i jeē cónso iyo i nuū Yaā Dios.

Achí tutu.

¹⁹ Te jíni yō jeē tāca jnūhun cáhán ley jenahán, chi cáhán nuū ñáyuu yíhi chíji ley un, návāha ndíhi i ma cúu cahān i jehē i. Chi ndenehen Yaā Dios cuēchi siquī i nde jíin ñáyuu ní ñáyiví. ²⁰ Chi tú ni ñin ñayuu quendō ndaā i nuū yā jeē nducú i squícu i jniñu ndácu ley un. Chi ley un jéjníñu máni návāha cuni yō jeē iyó cuéchi yó.

Jeē jnáma ya yohó síquī jeē candíje yó jéé sáha ya jehē yō

²¹ Te vijna te je cájini váha yó ndese ndáhva Yaā Dios cuēchi yó. Te nasūu ley un sáha jeē quéndō ndaā yō, vésú maá tutu ley jíin téé ni canacani jnūhun ya, ni cacahān ndese ndáhva yā cuēchi ñayuu. ²² Chi tāca ñáyuu jeē cácaandíje i jeē ni jíhi Jesucristo jeē chúnaa yā cuēchi i, chi ndahva Yaā Dios cuēchi i siquī jeē súcuan cácaandíje i. Chi inuú-ni cúu tāca ndíhi ñayuu. ²³ Chi ndíhi yó ni casáha cuēchi, te jeē yúcuan tu ní cúu quendō ndaā yō nuū Yaā Dios. ²⁴ Te siquī jeē yōhyo váha ni Yaā Dios, jeē yúcuan ndáhva yā cuēchi yó súcuan-ni. Chi siquī jeē ni jíhi Cristo Jesús cúu jeē jnáma ya yohó. ²⁵ Chi Yaā Dios ni jeni ya Cristo návāha socō yā maá yá chunaa yā cuēchi yó jéé ni jíhi yā. Te jnáma ya yohó núu súcuan cándíje yó. Te súcuan ni sáha Yaā Dios návāha stéén yā jeē Yaā ndaā cúu ya. Chi ichi yátá ni iyo paciencia yā, te tu ní chíhi ya cuenta cuēchi ñayuu. ²⁶ Te tiempo yáha stéén yā jeē Yaā ndaā cúu ya, chi ndaā sáha ya jeē squéndō ndaā yā ñayuu candíje vésú iyó cuéchi i, chi cácaandíje i jeē ní chunaa Jesús cuēchi i ni ndahva yā.

²⁷ Núu súcuan ¿te á cuu cutéyí gá yō siquī maá yó? Ma cúu cuíti, chi ma cúu cutéyí yó cani ni yō jeē váha squícu yó ley yā. Chi jnáma ya yohó máá síquī jeē candíje yó jéé sáha ya jehē yō. ²⁸ Núu súcuan te je jíni yō jeē ndáhva Yaā Dios cuēchi yó síquī jeē súcuan cándíje yó, te nasūu jéé nducú yó squícu yó jéé ndácu ley.

²⁹ ¿Te á núu maá-ni ñayuu hebreo cúu ya Yaā Dios, chí naún? Tuú, chi suni cúu ya Yaā Dios jeē jnáma ñayuu tāca gá nación. ³⁰ Chi ñin-ni Yaā Dios iyó, te ndáhva yā cuēchi ñayuu cácaandíje jeē ní sáha ya jehē i, cúu ñayuu ndíso jnunī circuncidar, cúu ñayuu jeē tuú. ³¹ Te jeē candíje yó jéé jnáma ya yohó, ¿á sáha jeē tuá jíni níhún squícu yó ley yā, chí naún? Tú cuíti, chi sa suhva sáha jeē váha ga cuu squícu yó ley yā.

Abraham cúu ñin ejemplo nuū yō

4

¹ Núu súcuan ¿te ndese cahān yō siquī tāca jéé ní cuu jíin jíi yō Abraham? ¿Ndese ni ndahvā cuēchi de? ² Nasūu jéé ni sáha máá de cúu jeē ní ndahva Yaā Dios cuēchi de. Chi núu jeē súcuan cúu núu, te cuu cutéyí de jeē váha ni sáha de. Te tu ní cutéyí de, chi nasūu síquī jeē ni sáha máá de cúu jeē ní ndahva Yaā Dios cuēchi de. ³ ¿Chi ndese cáhán tutu i? Cáhán jeē ní candíje Abraham jeē sáha ya jeē ní jéjnūhun ya nuū de, te jeē yúcuan

ní ndahva yā cuēchi de. ⁴ Te ñin ñayuu sájniñu, te yāhu i chi nasūu jēe cútahū i cúu, chi jeē chúnaa yō nuū i cúu. ⁵ Te jeē jnáma Yaā Dios ñayuu, chi jeē cútahū i cúu. Chi vēsú tu cúu squícu i tācá jniñu váha, te núu candíje i jeē jnáma ya i nuū cuēchi i, yūcuán na te ndahva yā cuēchi i. ⁶ Te David suni ni cahān de ndese yōhyo ndetū ñayuu jeē ndáhva Yaā Dios cuēchi i, vēsú tu cúu sáha i ni ñin jniñu jeē quéndōo ndaā i nuū yā. ⁷ Chi ni cahān de: Nacā ndetū ñayuu jeē íne cáhnu ni yā nuū jniñu nées ni sáha i, te tu ndénehen ya cuēchi siquī i.

⁸ Te nacā ndetū tēe jeē tuá chíhi máá Jítóho yō cuenta cuēchi de. Achí tutu.

⁹ ¿Te á máni máá ñayuu squícu ley circuncidar cúu jeē quéndōo ndetū? ¿Chí suni quéndōo ndetū ñayuu jeē tu cúu circuncidar naún? Suni máá i quéndōo ndetū i. Chi je ni cahān yō jeē ní candíje Abraham jeē sáha ya jeē ni jéjnūhun ya, te jeē yúcuan ní ndahva yā cuēchi de. ¹⁰ Te ná ni ndahva yā cuēchi de, ¿á je ni cuu de circuncidar, chí ndé ná tuú? Nasūu jēe jé ni cuu de circuncidar, chi nde ná tuú. ¹¹ Te cuéé gá te ni nihin de jnunī circuncidar. Te suu ni cuu ñin seña, nájnūhun ñin sello jeē ní ndahva yā cuēchi de siquī jeē súcuan ni candíje de. Te jeē yúcuan ní cahān yā jeē cuu de jíi nuū tāca ñayuu jeē candíje i jeē sáha ya jehē i, suni nuū ñayuu tu ní cúu circuncidar, chi suni ndahva yā cuēchi máá i. ¹² Te suni cúu de jíi nuū ñayuu ní cuu circuncidar, te nasūu máni jeē ní cuu i circuncidar, chi suni jeē ní jniñ i ejemplo de. Chi cáncandíje i jeē sáha ya jehē i, nájnūhun ni candíje máá de nde ná tu cuu de circuncidar.

Núu candíje yó te sáha Yaā Dios jeē ni jéjnūhun ya

¹³ Chi ni jejnūhun Yaā Dios nuū Abraham jíin núu tāca yúcūn de jeē cuāha ya ní ñáyiví cuu tahū de. Te nasūu siquī jeē ní nducú de squícu de ley yā cúu jeē ní jejnūhun ya un núu de, chi sa suhva siquī jeē ní candíje de jeē ni jéjnūhun ya, te ni ndahva yā cuēchi de. ¹⁴ Chi núu jeē máni máá ñayuu nducú squícu ley cúu jeē nihín jeē ni jéjnūhun ya, núu súcuan te cáncandíje cāha yó nuú, te ma nihín jniñu jeē ni jéjnūhun ya ún. ¹⁵ Te ley chi sáha jeē nihín ñayuu castigo siquī jeē tu cúu squícu i. Te núu jeē tu ley, te suni tú na jnūhun stívi ñayuu siquī ley coo núu.

¹⁶ Núu súcuan te ni jejnūhun ya jeē sáha ya jeē váha jíin ñayuu siquī jeē candíje i jeē súcuan sáha ya, te jeē cútahū i súcuan-ni cúu. Te jeē ni jéjnūhun ya ún, íyó cutú nuū tāca yúcūn Abraham, te nasūu núu maá-ni ñayuu jeē nducú squícu ley jenahán, chi suni nuū tāca ñayuu cáncandíje nájnūhun ni candíje Abraham. Te súcuan cúu de jíi nuū tāca yó jeē cáncandíje yó. ¹⁷ Súcuan ni sáha Yaā Dios chi ni candíje de jeē sáha ya. Chi súcuan cáhán tutu íi: Ni jeni ri rohó cuu ró jíi nuū cuehē ndasí ñayuu. Súcuan ni cahān maá Yaā jeē nastécu ndíyi te cáhán yā ndese coo tāca jēe ná tu coo.

¹⁸ Te ni candíje de, te ni cocuhun teyí ni de jeē ni jéjnūhun ya jeē coo cuehē yucūn de, vēsú tuá na modo coo sēhe de núu. Te jeē yúcuan ní nduu de jíi nuū cuehē ndasí ñayuu, nájnūhun ni cahān Yaā Dios: Súcuan nducuehē yucūn rō, achí yá jíin de. ¹⁹ Te je yajni jinū de ciento cuiyā, te vēsú súcuan te tu ní quénda de nuū jnūhun cáncandíje de, vēsú jiní de jeē maá de jíin ñasíhí de Sara je jéhnu ndasí ndíndúú de jeē ma cúu ga coo sēhe de. ²⁰ Te tu ní nácani siquí ni de jeē ma cáncandíje ga de jnūhun ní jejnūhun Yaā Dios jeē coo sēhe de. Chi sa suhva ni candíje nihin ga de, te ni nacuatáhú de nuū Yaā Dios. ²¹ Chi ni cucáhnu váha ni de jeē cúu squícu Yaā Dios ndíhi jeē ni jéjnūhun ya. ²² Te jeē yúcuan ní ndahva yā cuēchi de siquī jeē súcuan ni candíje de.

²³ Te nasūu máá-ni siquī Abraham cúu jeē yosó núu tútu jeē ní ndahva yā cuēchi de jeē ní candíje de. ²⁴ Chi suni yósó jēe siquí yohó jíjnáhan yó. Chi suni ndáhva yā cuēchi máá yó jēe candíje yó jēe cúu ya Yaā ní nastécu Jítóho yō Jesús. ²⁵ Chi ni jihí Jesús jeē chúnaa yā cuēchi yó, te ni natecu yā návāha ndahva Yaā Dios cuēchi yó.

Ndese quéndōo ñayuu jeē ndáhva yā cuēchi

5

¹ Núu súcuan te je ni ndahva Yaā Dios cuēchi yó síquī jeē ní candíje yó jéē sáha ya jehē yō. Te jeē yúcuan ní sáha ya jeē ní ndīvi yó núu jnúhun manī yā jíin yó, síquī jeē ni jíhī Jitoho yō Jesucristo jehē yō. ² Chi máá Cristo ni sáha jeē ni quívicoo yó núu Yaā Dios, chi ni sáha ya jeē váha yóhó síquī jeē súcuan cándíje yó. Te cáhīin nihīn yó jíin jnúhun jeē sáha ya jeē váha yóhó. Te cúsih ni yō chi núhun ni yō jeē jinú yō nuū lúu cujéhu yó jíin Yaā Dios. ³ Te nasūu máá yáha-ni, chi suni cúsih ni yō jeē ndóho yó jnúndóho. Chi jíin yō jeē máá jnúndóho sáha jeē jéndeyí ni yō. ⁴ Te jeē jéndeyí ni yō sáha jeē íje vāha yó cuu yó ñáyuu ndaā. Te jeē íje vāha yó sáha jeē núhun ni yō tāca jéē váha jeē cóo. ⁵ Te tāca jéē núhun ni yō, chi nihīn nahín yó. Chi jnúhun cúndáhú ni Yaā Dios yohó, ni cunuú ini anuá yō, sáha Yaā Dios jeē jíin Espíritu Santo jeē ni jéhe ya nuū yō.

⁶ Chi náa ndóho yó jéē ma cúu cuíti jnama yó máá yó, te ni jíhī Cristo jehē yohó jéē cúu yó ñáyuu íyó cuéchi. Te ni jíhī yā máá quívī jeē jé ni jeni Yaā Dios. ⁷ Te yíh cúu jeē cúu ĩn ñayuu jehē inga ñayuu, vésú jehē ĩn ñayuu ndaā. Chí sanaa te íyó jíin jeē chúndeyí ni ĩn tēe cuu de jehē ĩn tēe ndaā vāha. ⁸ Te máá Cristo chi ni jíhī yā jehē yō náa máni cuēchi sáha yó, te súcuan ni steén Yaā Dios jeē cundáhú ni yā yohó. ⁹ Te vijna je ni ndahva Yaā Dios cuēchi yó síquī jeē ni jíhī Cristo jehē yō. Núu súcuan te suni jíin vāha yó jéē jnama Cristo yohó núu castigo quiji quívī sáha Yaā Dios juicio. ¹⁰ Chi náa cúu ga yō enemigo Yaā Dios, te síquī jeē ni jíhī Sēhe ya jehē yō, te ni sáha ya jeē ndīvi yó núu jnúhun manī yā jíin yó. Te jeē súcuan ní ndīvi yó nuū jnúhun manī yā jíin yó, te suni jíin vāha yó jéē cācu yó síquī jeē técu Cristo, nduú yá jíin yó. ¹¹ Te nasūu máá yáha-ni, chi suni cúsih ndasí ni yō jíin Yaā Dios síquī jeē ni sáha Jitoho yō Jesucristo jehē yō, chi máá yá ni sáha jeē ní ndīvi yó núu jnúhun manī Yaā Dios jíin yó.

Jnúhun Adán jíin jnúhun Cristo

¹² Núu súcuan te jíin yō jeē ni quívī cuēchi ini ñayīvi ní sáha máá ĩn-ni tēe Adán. Te jeē síquī cuéchi yúcuan te ni jecōo cuehyī jéhu ñayuu. Te jeē yúcuan cúu jeē jíhī ndīhi ñayuu, chi ndīhi i yíhi cuēchi. ¹³ Te nde ná tu cuāha ya ley nuū Moisés, te je íyó cuéchi ini ñayīví. Te síquī jeē ná tu coo ley yā, te tu ní chíhi ya cuenta jeē castívi i. ¹⁴ Te vésú súcuan te nde tiempo Adán te nde tiempo Moisés ni yíhi ñayuu chíhi cuehyī jeē jéhu i síquī jeē íyó cuéchi i. Chi ni jíhī i síquī cuéchi ni casáha máá i, vésú tu ní sáha i jnáhan cuéchi jeē ni sáha Adán jeē ní cunīhni ni de nuū ĩn jniñu ní ndacu ya. Te Adán ni cuu de ĩn muestra máá Yaā ní quiji cuéé gá.

¹⁵ Te jnúhun jeē ni sáha Adán cuēchi, tu quíjnáhan cuíti jíin táhū jeē jnáma Yaā Dios yohó. Chi jeē ni stívi máá ĩn-ni tēe ún, jeē yúcuan cúu jeē jíhī ndīhi yó. Te jnúhun jeē jnáma Yaā Dios yohó cújéhu ndasí gá, chi síquī jeē ni sáha máá ĩn-ni tēe Jesucristo cúu jeē súcuan-ni jnáma ya ndīhi ñayuu candíje. ¹⁶ Te cuēchi jeē ni sáha máá ĩn-ni Adán, tu quíjnáhan cuíti jíin jnúhun jeē jnáma Yaā Dios yohó. Chi síquī máá ĩn-ni cuéchi ún te ni quívicoo ñayuu chíhi jnúhun jnahnū ndetū i. Te jnúhun jeē jnáma ya ñayuu, sa suhva sáha jeē súcuan-ni ndáhva yā cuéchi i, vésú yóhyo cuehē cuéchi ni casáha i. ¹⁷ Chi síquī jeē ni sáha máá ĩn-ni tēe Adán cuéchi, te ni nihīn poder cuehyī jéhu ñayuu. Te sa suhva síquī jeē ni jíhī máá ĩn-ni tēe Jesucristo, te víhyá gā ni nihīn ñayuu máá yá poder jeē cótecu i caca ndaā i jíin yá. Chi ni ndahva yā cuéchi i síquī jeē yóhyo vāha ni yā.

¹⁸ Núu súcuan te síquī jeē ni sáha máá ĩn-ni tēe Adán cuéchi, te ni quívicoo ndīhi ñayuu chíhi jnúhun jnahnū ndetū i. Te sa suhva síquī jeē ni sáha máá ĩn-ni tēe Jesucristo ĩn jniñu váha ndasí, te ndáhva Yaā Dios cuéchi ndīhi ñayuu te cotecu i níh cáni. ¹⁹ Chi síquī jeē tu ní jéndije máá ĩn-ni tēe, te ni quívicoo cuehē ndasí ñáyuu chíhi cuéchi. Te suni súcuan síquī jeē ní jéndije máá ĩn-ni tēe Jesucristo, te ndáhva Yaā Dios cuéchi cuehē ndasí ñáyuu.

²⁰ Te ni jéhe ya ley yā návāha cuni yō jeē cuéhē cuéchi casáha yó. Te jeē ní nducuehē cuéchi yó, te víhyá gā cuehē cúu jnúhun jeē váha ni yā jeē íne cáhnu ni yā nuū yō. ²¹ Núu súcuan te nájnūhun ni nihīn poder cuehyī jéhu ñayuu síquī jeē íyó cuéchi i, suni súcuan

íyó poder jnūhun jeē váha ni yā jíin yó. Chi ndáhva yā cuēchi yó te cotecu yō ní cání síquī jeē ni jíhī Jítoho yō Jesucristo jehē yō.

Jeē tuá yíhi yó chíji cuēchi chi yíhi yó ndaha Cristo

6

¹ Núu súcuan ¿te ndese cahān yō? ¿A caca ga yō jíin cuéchi návāha víhyá gā sáha ya jeē váha yóhó jéē cóne cáhnu ni yā nuū yō? ² Ma cúu cuiiti. Chi nájnūhun je ni jíhī yō jeē tuá yíhi yó chíji cuēchi, te ma cúu ga caca yó jíin cuéchi núu súcuan. ³ ¿A tu cájecūhun ni rō jeē tāca yó jeē ní jendute yó síquī jeē ni quívi yó ndaha Cristo Jesús, suni ni jendute yó síquī jeē ni quívi yó chíji jnūhun jeē ni jíhī yō jíin yá? ⁴ Chi jeē ní jendute yó cúu nájnūhun ni quindūji yó jéē ni jíhī yō jíin yá. Te vijna te cuu caca yó jíin vida jeē jeē ni jéhe ya nuū yō, chi nájnūhun suni ni natecu yō jíin yá. Chi ni natecu yā ni sáha Tátá yā jíin poder jeē cujéhnu ndasí yá.

⁵ Chi núu ni cundúu yó jíin yá síquī jnūhun jeē ni jíhī yō jíin yá, te suni súcuan cundúu yó jíin yá síquī jnūhun jeē ní natecu yō jíin yá. ⁶ Chi jíin yō jeē ní naa modo maá yó jeē ni jíca yó jíin ichi yátá, chi ni quívi yó núu jnūhun jeē ni jíhī yō jíin Cristo jicā cruz. Te súcuan ni naa modo yō jeē cúu yó mozo nuū cuéchi, návāha tuá cuajníñu yó núu tācá jniñu jeē máni cuēchi cúu. ⁷ Chi ñayuu jeē jé ni cajihī, je ni quendacoo i chíji tāca cuéchi. ⁸ Te núu je ni jíhī yō jíin Cristo, te cándíje yó jéē suni súcuan ni natecu yō jíin yá. ⁹ Chi jíin yō jeē ní natecu Cristo, te ma cúu cuiiti ga yā, chi cuehyī jéhni yóhó, tuá na vé cúu sáha jíin yá. ¹⁰ Chi jeē ni jíhī yā, te ñin jínu-ni ni jíhī yā jeē síquī cuēchi ñayuu. Te jeē técu yā vijna, chi sáha ya jeē cuní Yaā Dios. ¹¹ Te suni súcuan róhó jíjnáhan ró, sáha ró cuenta jeē nájnūhun ni cajihī rō jeē ní quendacoo ró chíji cuēchi. Te cátecu rō návāha sáha ró jéē cuní Yaā Dios, chi ndúu ró jíin Jítoho yō Cristo Jesús.

¹² Núu súcuan te ma cuáha ga rō jnūhun quíhi ró chíji cuēchi jíin yíqui cúnu rō jeē cúu. Chi cuēchi ún stíhví ni rohó jéē na sáha ró táca jéē ndíyo néé ni rō. ¹³ Te ma cuáha ró máá ró cuajníñu ró núu cuéchi jeē cócuu ró jíin jniñu néé. Chi sa suhva cuāha ró máá ró nuū Yaā Dios, te sáha ró cuenta jeē nájnūhun je ni cajihī rō te ni canatecu rō nuū yā. Te cuāha ndíhi ró máá ró nuū yā jeē cuajníñu ró núu jniñu ndaā. ¹⁴ Chi tuá na poder cuēchi jeē cundeyí jíin ró, chi tuá cáyíhi ró chíji ley jenahán, chi sa cáyíhi ró chíji jnūhun jeē váha ni yā jíin ró.

Jnūhun mozo jeē steén ndese quéndōo ñayuu cácandíje

¹⁵ ¿Nde se sáha yó núu súcuan? ¿A caca ga yō jíin cuéchi síquī jeē tuá yíhi yó chíji ley jenahán, chi sa yíhi yó chíji jnūhun jeē váha ni yā jíin yó? Ma cúu cuiiti. ¹⁶ Chi cájini rō jeē núu cuāha ró máá ró jeē cuatáhú ró sájniñu ró núu ñin tēe, núu súcuan te cácuu ró mozo nuū tēe ún, te cánuu cuandíje ró núu de. Te suni súcuan núu cuāha ró máá ró jeē sáha ró cuéchi, te mozo cuēchi cácuu ró, te cuu rō. Te núu cuatáhú ró nuū maá yá, te mozo yā cácuu ró jéē cáca ndaā rō. ¹⁷ Te na cútahū yō nuū Yaā Dios, chi vésú ni cacuu ró mozo nuū cuéchi, te vijna chi nde jíin ini jíin ánuá rō ni cajetáhú ró nuū jnūhun ya jeē ni quívicoo ró núu. ¹⁸ Te vijna te je ni nduu libre rō jeē tuá cácuu ró mozo nuū cuéchi, te cájejniñu ró núu jniñu ndaā. ¹⁹ (Ni cahān rī ñin jnūhun ndese cúu síquī mozo ini ñayívi yáha, chi tu cájecūhun yachī ni rō síquī jnūhun ya.) Núu súcuan te nájnūhun ni cajéhe ró máá ró nde saá jeē ní cajejniñu ró núu tācá jniñu jnéhén jniñu néé, suni súcuan cuāha ró máá ró vijna jeē cuajníñu ró núu jniñu ndaā, návāha coo ndoo coo iī rō nuū Yaā Dios.

²⁰ Chi nde náa cácuu ró mozo nuū cuéchi, te tu ní cájejniñu ró núu jniñu ndaā. ²¹ ¿Te na vé ni canihīn rō síquī cuéchi ni casáha ró un jéē cácuu rō vijna sáha? Tú cuiiti, chi máá jéē jnahnú ndetū rō ní cání sáha. ²² Te vijna te je ni canduu libre rō jeē tuá cácuu ró mozo nuū cuéchi, te cájejniñu ró núu Yaā Dios. Te suu sáha jeē quéndōo vāha ró, chi cáhīyo ndoo cáhīyo iī rō nuū yā, te nde sandíhí te cotecu rō ní cání. ²³ Chi yāhu jeē nihín ñayuu síquī cuéchi cúu jeē jnahnú ndetū i. Te sa tahū jeē jéhe Yaā Dios cúu jeē cótecu yō ní cání andíví, síquī jeē ndúu yó jíin Jítoho yō Cristo Jesús.

Jnūhun ñasihí jín yii jeē steén ndese quéndō ñayuu cá candíje

7

¹ Hermano, je cájini rō ndese cáhán ley yā, te cájini rō jeē yłhi ñayuu chíji ley maá-ni núu técu i ñayıvi yáha. ² Te yāha cúu nájnūhun iin ñahan jeē ní quijnáhan, chi cáhán ley jeē yłhi ña ndaha yii ña maá-ni núu técu de. Te núu ni jihı yii ña, te je ni quenda ña chíji ley jeē ní quijnáhan ña jín de. ³ Núu súcuan te núu quijnáhan ña jín inga tēe nínı técu gā yii ña, te cásiquí ndēē ña de. Te núu je ni jihı yii ña, te je ni quenda ña chíji ley un. Te cuu quijnáhan ña jín inga tēe, chi nasūu jēē casıquí ndēē ña núu súcuan.

⁴ Te suni súcuan rōhó jijnáhan ró, ñánı mánı, chi ndúú ró jín Cristo. Chi nájnūhun ni cajihı rō jín Cristo, te ni quendacoo ró chíji ley jenahán. Te vijna chi nájnūhun ni quijnáhan ró jín inga, cúu jeē ní quıvıcoo ró ndaha Cristo, Yaā ni natecu mēhñu ndıyı, návāha cuu sáha ró jniñu váha jeē cunı Yaā Dios. ⁵ Chi ná ni cajica yó jín modo maá yó nde saá, te ley un ní sáha jeē ní ndıyo neé ni yō tāca jēē cunı yıqui cúñu yō jeē sáha yó. Te yūcuan ní sáha jeē jnahnú ndetū yō nuú. ⁶ Te vijna te je ni quenda yó chíji ley jenahán, chi nájnūhun je ni jihı yō jeē ma nihın gā poder siquı yō. Te súcuan te íyó libre yō jeē cuajniñu yó núu Yaā Dios. Te jíca yó jín modo jeé jēē cunı maá Espıritu, chi tuá yłhi yó chíji ley jeē ní tee Moisés jenahán.

Siquı cuēchi jeē ñūhun ini anuá yō

⁷ ¿Ndese cahán yō núu súcuan? ¿A ley ndıso cuēchi? Tú cuıti jeē súcuan. Te núu jeē tú ley yā, te ma cunı cuıti rı jeē iyó cuēchi rı. Chi ma cunı rı jeē cuēchi cúu jeē ndıyo ni rı ndajniñu jnahan rı núu tu ní cáhán ley jeē ma ndıyo ni yō. ⁸ Te súcuan ni nihın cuēchi modo cocuu jín rı. Chi siquı jeē ndácu ley jniñu jeē ma sáha yó cuēchi, te ni quejéé ndıyo ni rı sáha rı tāca jēē neé. Te núu jeē tu ley, te suni tú na jnūhun stıvi yó siquı ley nuú. ⁹ Chi ni iyo tiempo jeē técu rı jeē ná tu jecūhun ni rı jeē cahán ley. Te ná ni quejéé rı jecūhun ni rı jniñu jeē ndácu ley, te ni jecūhun ni rı jeē iyó cuēchi rı, te ni nduu rı nájnūhun ndıyı. ¹⁰ Chi ni jini rı jeē ley jeē sáha jeē cótecu anuá rı nuú, te tuú chi sa ni sáha jeē jnahnú ndetū rı nuú. ¹¹ Chi jín jēē ndácu ley un jniñu, te ni nihın cuēchi modo cocuu jín rı, te ni stahú ruhū. Chi jín jēē ndácu ley jniñu, te cuēchi ni sáha jeē ní quenda jnūhun jeē jnahnú ndetū rı.

¹² Núu súcuan te íyó ndāā maá ley, te tācá jniñu ndácu chi íyó ndoo íyó ndāā váha.

¹³ Núu súcuan te ley jeē iyó váha ún, ¿á suu sáha jeē jnahnú ndetū rı naún? Tú cuıti. Chi sa suhva máá cuēchi cúu jeē sáha jeē jnahnú ndetū rı, te súcuan stúu cuēchi ndese íyó máá. Chi jín jniñu váha jeē ndácu ley te ni natūu jniñu neé jēē cúu cuēchi.

¹⁴ Chi jínı yō jeē nuú maá Espıritu vęji ley. Te ruhū chi sa névāha rı iin modo neé máá rı jeē ni squıvi ruhū jeniñu cáha rı nuú cuēchi. ¹⁵ Chi tāca jēē sáha rı, tu jecūhun ni rı najehē cúu jeē sáha rı. Chi jniñu váha jeē cunı rı sáha rı, tu ndé nihın rı fuerza sáha rı, chi sa suhva sáha rı jniñu neé jēē tu cúvāha ni rı sáha rı. ¹⁶ Te náa sáha rı jniñu neé jēē tu cunı rı sáha rı, núu súcuan te nácuni rı jeē iyó ndāā ley. ¹⁷ Núu súcuan te nasūu rúhū cúu jeē sáha jniñu neé un, chi modo neé jēē ñūhun ini anuá rı cúu jeē sáha cuēchi. ¹⁸ Chi jínı rı jeē modo maá rı jeē névāha rı ini anuá rı, tú cuıti na vé jeē váha íyó. Chi cunı rı sáha rı jniñu váha, te tu ndé nihın rı fuerza sáha rı. ¹⁹ Chi jniñu váha jeē cunı rı sáha rı, tu sáha rı. Te jniñu neé jēē tu cunı rı, sa yūcuan sáha rı. ²⁰ Te náa sáha rı jniñu jeē tu cunı rı sáha rı, te nasūu rúhū cúu jeē sáha, chi modo neé jēē ñūhun ini anuá rı cúu jeē sáha.

²¹ Núu súcuan te ni jini rı jeē súcuan cúu jín rı: Vēsú cunı rı sáha rı jniñu váha, te sa máni modo neé cúu jeē ñūhun ini anuá rı. ²² Chi cúsı ni rı jín ley Yaā Dios nde jín ini anuá rı. ²³ Te ni nacuni rı jeē iyó inga modo neé máá rı jeē jésı nuú jeē cunı rı sáha rı jeē váha. Te cúu rı nájnūhun preso nuú cuēchi jeē jícu jín rı.

²⁴ Nacā jeē ndahú gá cúu rı núu súcuan. ¿Ndé iin jnama ruhū nuú modo neé máá rı jeē jícu jín rı jeē jnahnú ndetū rı? ²⁵ Na cútahū ndası rı nuú Yaā Dios, chi máá yá cúu jeē jnama ruhū nuú modo neé rı siquı jeē ni jihı Jitoho rı Jesucristo jehē rı. Núu súcuan te

vēsú cuní yō squícu yó ley Yaā Dios, te jeē jín fuerza maá yó ma cúu, chi modo neé máá yó sáha jeē jejnínū cāha yó nuū cuéchi.

Siquī jeē jíca yó jín modo cuní Espíritu Yaā Dios

8

¹ Núu súcuan te ma ndénehen Yaā Dios cuēchi siquī ñayuu cáyihí ndaha Cristo. Chi tuá cájica i jín modo neé máá i, chi sa suhva cájica i nájñūhun cuní maá Espíritu yā. ² Chi modo jeē sáha Espíritu cúu jeē técu yō siquī jeē yíhi yó ndaha Cristo Jesús. Te yūcuan ní sáha jeē ní nduu libre yō nuū jñūhun jeē ni yíhi yó chíji cuēchi jeē jñahnú ndetū yō nuú. ³ Chi ni sáha Yaā Dios jeē quéndō vāha ñayuu jeē tu ní cúu quéndō vāha jín ley Moisés, siquī jeē tú na fuerza i jín modo maá i jeē squícu i ley un. Chi ni tají yá Sēhe ya ni quiji, te ni nduu ya nájñūhun ñayuu cáhīyo cuēchi, návāha socō yā maá yá siquī cuéchi, vēsú tú na cuēchi ya. Te súcuan ni ndonda Yaā Dios siquī cuéchi jeē ní casáha ñayuu jín modo neé máá i. ⁴ Súcuan ni cuu návāha cuu squícu yó táca jñiñū ndaā jeē ndácu ley, chi tuá jíca yó jín modo neé máá yó, chi jíca yó nájñūhun cuní maá Espíritu.

⁵ Chi ñayuu jeē cájica jín modo neé máá, chi máni ndíhví ni i siquī jeē cuní maá i. Te ñayuu jeē cájica nájñūhun cuní Espíritu, chi máni ndíhví ni i siquī jñiñū cuní maá Espíritu. ⁶ Te jeē ndíhví ni yō siquī modo cuní maá yó sáha jeē jñahnú ndetū yō. Te jeē ndíhví ni yō siquī jñiñū cuní maá Espíritu, sa suhva sáha jeē cotecu yō níf cáni te coo ndeyí coo sñi ni yō. ⁷ Chi ñayuu jeē ndíhví ni siquī modo neé cuní maá i, chi jíto uhū i Yaā Dios, chi tu cuní i cuatáhu i ley Yaā Dios, te ni ma cúu squícu i. ⁸ Jeē yúcuan, ñayuu jíca jín modo cuní maá, tu cúu sáha i jeē cúsiñi ni Yaā Dios jín i.

⁹ Te máá ró jijnáhan ró, chi tuá cájica ró jín modo cuní maá ró, chi cájica ró nájñūhun cuní Espíritu, chi ndéé Espíritu Yaā Dios ini anuá rō. Te ñayuu jeē tu ndéé Espíritu Cristo ini i, tu cáyihí i ndaha ya. ¹⁰ Te núu ndéé Cristo ini rō, te vēsú ññ quiñvī te cuu yiquí cúñu rō jeē siquí cuéchi, te cotecu anuá rō siquī jeē ní ndahva Yaā Dios cuēchi ró. ¹¹ Te núu ini rō jijnáhan ró ndéé Espíritu maá Yaā jeē ní nastécu Cristo Jesús mēññu ndíyí, yūcuán na te máá yá suni sáha ya jeē natecu yiquí cúñu rō jeē cúu. Te sáha ya súcuan jeē jín máá Espíritu yā jeē ndéé ini rō.

¹² Núu súcuan, hermano jijnáhan ró, ndéé jñiñū yó jéé caca ndaā yō, te nasūu jéé sáha yó modo neé cuní maá yó. ¹³ Chi núu caca ró jín modo neé máá ró, te jñahnū ndetū rō. Te núu jín fuerza maá Espíritu snáā rō táca jñiñū casáha ró jín modo neé máá ró, te cotecu rō níf cáni.

¹⁴ Chi táca ñayuu jeē cándiquín modo jeē steén Espíritu Yaā Dios, máá i cácuu sēhe Yaā Dios. ¹⁵ Chi Espíritu jeē ní canihīn rō, tu ní sáha ya rohó jéé cuu ró nájñūhun mozo nuū yā jeē yūhú tucu ró núu yā, chi sa ni sáha ya jeē cúu yó séhe ya. Te jeē yúcuan cúu jeē cahán jee yó: Tátá maá ná. ¹⁶ Te máá Espíritu steén yā ini anuá yō jeē cúu ndije yó séhe Yaā Dios. ¹⁷ Te núu sēhe ya cácuu yó, te suni nihīn yō maá táhū jeē ni jéjñūhun ya, te ññ cáhnu-ni coo tahū yō jín Cristo. Chi núu ndóho yó jín yá vijna, suni cujéñnu yó jín yá andíví.

¹⁸ Núu súcuan te sáha ri cuenta jeē táca jñúndóho jeē ndóho yó vijna, lúlí ndasí cúu nuū jñūhun jeē cujéñnu luu yó jín yá cucuéé gá. ¹⁹ Chi ndíhi jeē ni jécōo, yōhyo cándetu jeē na sáha Yaā Dios jeē nduvāha, quiñvī quénda ndijin jeē cujéñnu sēhe Yaā Dios jijnáhan i. ²⁰ Chi táca jéé ni jécōo, chi ni quiñvī chíji jñūhun jeē tu quéndō vāha. Te nasūu jéé ní castíví máá, chi ñayuu ni casáha cuēchi, te jeē yúcuan ní squéndō Yaā Dios súcuan. Te máni cándetu jeē ndúvāha. ²¹ Chi ññ quiñvī te táca jéé ni jécōo, chi quenda chíji jñūhun jeē tíví jín jéé tehyú. Te nduluu ndasí nájñūhun coo táca séhe Yaā Dios, chi cácu nuū jñūhun jeē tu quéndō vāha. ²² Chi jíní yō jeē táca jéé ni jécōo, chi nde vijna te nájñūhun ñnuú-ni cándoho te cájitū ni jeē na ndúvāha ndíhi. ²³ Te nasūu máá-ni táca jéé ni jécōo cúu jeē ndóho, chi suni nde maá yó ndóho yó, vēsú je névāha yó Espíritu jeē cúu seña jeē ññ quiñvī te nihīn yō ndíhi tahū yō. Chi yōhyo ndóho yó jñúndóho, te ndétu yó jéé náquihín séhe ya yohó te jnama ya yiquí cúñu yō jeē tuá ndoho yó jín. ²⁴ Chi ni jnama ya

yohó síquī jeē ñúhun ni yō jeē súcuan coo. Te núu je ni sáha ya nájnūhun ñúhun ni yō, yūcuán na te tuá ñúhun ni yō jeē sáha ya súcuan jíin yó. Chi tuá ndétu yó te núu je ni cuu súcuan. ²⁵ Te núu ná tu coto yó jéē sáha ya jeē ñúhun ni yō, yūcuán na te jíin paciencia ndétu yó jéē sáha ya.

²⁶ Te suni súcuan máá Espiritu chindéé ñáhán yá yohó jéē tú na fuerza ini yō. Chi tu jíin yō cacān tahu yō nájnūhun cánuú. Te máá Espiritu cahán ndahú yá jíin Yaā Dios jehē yō síquī tāca jéē jitú ndasí ni yō te tu níhín yō jnūhun ndese cacān tahu yō. ²⁷ Te máá Yaā Dios jeē jíto ndee anuá yō, chi jíin yā tāca jéē cuní maá Espiritu cahán yā jehē yō. Chi ñayuu cáyihí ndaha Yaā Dios, cáhán ndahú Espiritu jehē i nájnūhun cuní Yaā Dios.

Vāha-ni cūndeyí yó síquī ndihí jeneé

²⁸ Te jíin yō jeē tācá-ni jeē quíji nuū ñayuu maní jíin Yaā Dios, jeē váha chí jéē uhú, chi quéndōo vāha ga i nuū yā, sáha ya jíin táca jéē yúcuán. Chi cácuu i ñayuu jeē ní cana ya i ni quívicoo i ndaha ya síquī jeē súcuan ni tee ni yā nde jenahán. ²⁹ Chi nde ná tu coo i te je jíin yā i, te je ni jeni ya i jeē ndoo ndaā nduu ánuá i ndacu i máá Séhe ya, návāha na cúu Séhe ya ñani jéhnú nuū cuehē ñayuu cácuu ñani cácadíje. ³⁰ Te jeē ní jeni ya i, te suni ni cana ya i. Te jeē ní cana ya i, te suni ni ndahva yā cuēchi i. Te jeē ní ndahva yā cuēchi i, te suni ni sáha ya jeē kujéhnú i.

³¹ ¿Te ndese ga cahán yō síquī jnúhun jéhnú yáha núu súcuan? Chi núu íne Yaā Dios jíin yó, ¿te ndé ñin cuu cahán síquī yō? Tú ni ñin. ³² Chi máá yá tu ní jnáma ya Séhe ya jeē ma cúu yā, chi sa suhva ni jēhe ya Séhe ya ni jihí yā jehē ndihí yó. Te núu súcuan ni jēhe ya Séhe ya, te nagā ni cuu jeē ma cuáha ya tāca gá jeē jíin ñúhún yó. ³³ ¿Te ndé ñin cuu cahán cuēchi síquī ñayuu jeē ní nacāji Yaā Dios? Tú ni ñin. Chi máá yá ni ndahva yā cuēchi i. ³⁴ ¿Te ndé ñin cuu ndenehen cuēchi síquī yō núu súcuan? Tú ni ñin. Chi máá Cristo cúu jeē ni jíhí yā jehē yō, te suni ni natecu yā. Te vijna te ndéé yá lado váha Yaā Dios nuū kujéhnú ya, te cáhán ndahú yá jíin Yaā Dios jehē yō. ³⁵ ¿Te ndé ñin cuu quenehen yohó núu jnúhun cúndáhú ni Cristo yohó? ¿A jnúndóho, chí táca jéē yí sáha, chí jéē cájito xeēn ñayuu yohó, chí jnámā, chí jéē cúmaní sahma, chí jnúhun yúhú, chí jéē cáhni i yohó naún? Ni ñin tāca jéē yáha. ³⁶ Chi súcuan yósó núu tútu íi jeē cácahán ñayuu cácadíje jíin Yaā Dios:

Jeē síquí maá ní te ndihí-ni hora cácuu i cahni i sáñá.

Te cásáha i jíin ná nájnūhun cásáha i jíin lanchi, quítí cúu.

Achí tutu. ³⁷ Te tuú chi vésú cándoho yó táca jéē yáha, te vāha-ni cūndeyí yó síquī ndihí-ni, sáha máá Yaā jeē ní cundáhú ni yohó. ³⁸ Jeē yúcuán cúcáhnú ni rī jeē tú ni ñin cuu quenehen yohó núu jnúhun cúndáhú ni Yaā Dios yohó. Ni núu cuu yō, ni núu cotecu yō, ni tācá ndajéhé andíví, ni tāca jéē neé jéē cácujehnú jnái poder, ni jeē iyó vijna, ni jeē cóo, ³⁹ ni jeē iyó núu súcún, ni jeē iyó núu cúnú, ni tāca gá jeē ní jecoo, ma cúu cuítí quenehen yohó núu Yaā Dios, jeē jíin Jítoho yō Cristo Jesús ni cundáhú ni yá yohó.

Síquī ndese ni nacāji ya yucūn Israel

9

¹ Te cáhán ndaā rī chi cúu ri tēe cándíje Cristo, te tu stáhú rí, te jíin rī ini anuá rī jeē cahán ndaā rī sáha Espiritu Santo. ² Yōhyo cúcuíhyá ni rī, te níin jnáhuu ni anuá rī ³ jeē síquí tāca jnáhan ri ñayuu nación hebreo, chi ñin-ni yucūn rī jijnáhan ri. Chi jeē síquí máá i te cúu ni rī jeē núu na cúu te cujiyo ri nuū Cristo te jnahnū ndetū rī, návāha jíin yúcuán te cuu cácu ánuá maá i núu. ⁴ Chi cácuu i yucūn ñayuu Israel, te nde jenahán ni sáha Yaā Dios jeē cúu i sēhe ya, te mēhñu vícō jeē ndíndéé ní condee yā jíin i sáa. Te jíin máá i ni sáha ya tācá contrato, te ni jēhe ya ley yā nuū Moisés jeē cúu máá i, te ni steén yā ndese chiñúhún i ya ini templo, te nuū máá i ni jejnūhun ya cuehē jnūhun. ⁵ Te máá i cácuu yucūn tāca jíi yō jeē ní cacujéhnú, te suni yucūn maá i ni cacu Cristo jeē ní nduu ya tēe. Te máá yá cúu Yaā Dios jeē jnái ndihí-ni, te níí cáni cahán ñayuu jeē kujéhnú ya. Amén.

⁶ Te nasūu jēe tu ní quée ndaā tāca jnūhun jeē ni jéjnūhun Yaā Dios nuū ñayuu Israel. Chi ni quee ndaā nahín núu vēsú jecu-ni i, chi tú ndíhi-ni yucūn Israel cúu jeē cácañdíje.

⁷ Chi nasūu ndíhi yucūn Abraham cácuu ndije sēhe de jeē ni jéjnūhun ya. Chi ni cahān Yaā Dios jíin de: Nuū maá-ni sēhe ró Isaac cúu nuū coo yucūn rō jeē ni jéjnūhun ri nuū rō. ⁸ Te jnūhun yáha cúní cahān jeē ni ñin ñayuu tu cúu i sēhe Yaā Dios síquī jeē ní cacu i ñin yucūn jeē jéni ni i jeē váha ga cúu. Chi sa suhva máni yucūn jeē ni jéjnūhun ya cúu ndije yucūn jeē chíhi ya cuenta. ⁹ Chi yáha cúu jnūhun jeē ni jéjnūhun ya nuū Abraham: Máa tiempo jeē ní jeni ri te quiji ri, te cacu ñin sēhe yí ñasihí ró Sara, achí yá.

¹⁰ Te nasūu máa yáha-ni, chi suni Rebeca ni cacu uū sēhe yí ña, te ñin-ni tátá ndíndúu i, jeē ní cuu jíi yō Isaac. ¹¹⁻¹³ Te nde ná tu cacu ndíndúu i, te ná tu sáha i jeē váha jeē uhú, te je ni cahān yā jíin Rebeca: Sūchi ní cacu xīhna gā cuajníñu i nuū súchi sándíhí, achí yá. Chi suni súcuan cáhān tutu íi: Ni jito maní rī Jacob, te Esaú chi tuú, achí Yaā Dios. Te súcuan jíni yō jeē maá Yaā Dios cuu nacāji ya ñayuu núu ndese téé ni maá yá, te nasūu síquī jniñu jeē sáha i, chi sa suhva síquī ndese cúní maá yá nacāji ya i.

¹⁴ ¿Ndeese cahān yō núu súcuan? ¿A jéé tu íyó ndáa Yaā Dios jeē sáha ya súcuan, chí naún? Tú cuítí. ¹⁵ Chi nde jenahán ní cahān yā jíin Moisés: Ndé-ni cúu jeē cuní rī cundáhú ni rī, te cundáhú ni rī. Te ndé-ni cúu jeē cuní rī sáha ri jeē váha jíin, te sáha ri jíin, achí yá. ¹⁶ Núu súcuan te nasūu síquī jeē cuní maá ñayuu, ni nasūu jéé nducú ndéyí máa i cúu, chi síquī ndese cúní maá yá cundáhú ni yā i. ¹⁷ Chi suni súcuan yósó núu tútu íi jeē ni cáhān yā jíin rey ñuu Egipto: Ni jeni ri rohó jéé cúu ró rey, návāha jíin rohó te steén rī poder rī, te návāha cuíté núu síhví rí ñí ñáyiví, achí yá. ¹⁸ Núu súcuan te núu ndé ñin cúní yā cundáhú ni yā, te cundáhú ni yā. Te núu ndé ñin cúní yā jeē cuníhni ni, te sáha ya jeē cuníhni ni.

¹⁹ Te sanaa te cahān ñin ró jíin rí: Núu súcuan cúu ¿te najehē cahán gā yā jeē cuēchi sáha yó? Chi ma cúu casi yō nuū yā jeē ndese cúní maá yá sáha ya. Achi rō. ²⁰ Te sa suhva cáhān rī jíin ró: Róhó, ¿ndé ñin cúu ró jéé jéni ni rō stió cuíñí rō nuū Yaā Dios? ¿A cuu cahān quísi ñuhun jíin téé ni sáha: Najehē ni sáha ró rúhū súcuan? achi. ²¹ Chi téé sáha quísi, cuu sáha de ndese cúní maá de, chi ñin-ni ñuhun cuu sáha de ñin quísi fino te inga quísi corriente.

²² ¿Te á tu jétáhú ró jeē suni súcuan sáha Yaā Dios jíin ñayuu? Chi cúní yā steén yā ndese sáha ya juicio síquī ñayuu, te súcuan te cuni i poder yā. Te vēsú súcuan te ni íyo paciencia ni yā jeē tu ní ndónda yachí yā síquī ñayuu jeē jnahnú ndetū. ²³ Te sáha ya súcuan návāha steén yā ndese yōhyo luu cújéhnu ya síquī jniñu sáha ya jíin yóhó ñayuu cundáhú ni yā. Chi nde jenahán je ni sátūhva ya yohó jéé luu cújéhnu yó jíin yá. ²⁴ Chi ni cana ya yohó jéé candíje yó, te sava yó cúu ñayuu hebreo te sava yó cúu ñayuu tāca gá nación. ²⁵ Chi suni súcuan ni cahān yā, yósó núu tútu Oseas:

Ñayuu jeē tu ní cúu ñayuu maá rí, vijna te cahān rī jeē cácuu i ñayuu maá rí.

Te ñayuu jeē tu ní íyo maní rī jíin, vijna te cahān rī jeē cácuu i ñayuu jeē maní rī jíin.

²⁶ Te máa lugar nuū ni cáhān rī jeē násūu ñayuu rī cácuu i,

suu yūcuan cáhān ñayuu jeē cácuu i sēhe Yaā Dios, Yaā técu ní cáni.

Achí yá. ²⁷ Te Isaías sa suhva ni cahān de jnūhun ñayuu Israel: Vēsú ni cayā yucūn Israel nájnūhun ñíí yumar, te jecu-ni i jnama ya. ²⁸ Chi Jitoho yō Yaā Dios, yachí sínu ya jniñu jeē sándaā yā cuēchi ñayuu ñáyiví. Achí tutu. ²⁹ Chi nájnūhun ni cahān tucu Isaías:

Máa Yáa cúu Jitoho nuū tācá ndajéhé andíví, núu tu ní jnáma ya jecu yucūn yō nuú,

te je ni ndoho yó nájnūhun ñayuu ñuu Sodoma jíin ñuu Gomorra, jeē ní naa ndíhi.

Achí tutu.

Jeē tu cájetáhú ñayuu hebreo jnūhun jnama ya i

³⁰ ¿Ndeese cahān yō núu súcuan? Suu jeē ñayuu tāca gá nación, vēsú tu ní cánducú i quendōo ndaā i nuū Yaā Dios, te ni ndahva yā cuēchi i. Chi síquī jeē ní candíje i jeē ni jíhí Cristo jehē i cúu jeē ní ndahva yā cuēchi i. ³¹ Te sa suhva ñayuu Israel, vēsú cánducú i quendōo ndaā i nuū Yaā Dios sáha ley yā, te tu cundeyí i quendōo ndaā i. ³² ¿Te najehē?

Siquī jeē tu cánducú i jeē ndahva yā cuēchi i jeē candíje i jeē ni jīhī Cristo jehē i, chi sa jéni ni i jeē squícu máá i ley te quendōo ndaā i. Te jeē stívi i súcuan cúu nájñūhun cácotúú i siquī maá yūū jeē cácachihī jehē, te suu cúu Cristo. ³³ Chi súcuan cáhán nuū tútu iī: Nde ñuu rī Sion sáha ri jeē cóne maá Yaā jeē cúu nájñūhun yuū jeē cácachihī i jehē i. Te cúu ya nájñūhun toto jeē cotúú i sáha. Te sa suhva ñayuu cáchandíje Yaā ún, chi jnama nahín yá i. Achí Yaā Dios.

10

¹ Hermano jijnáhan ró, cúu ndasí ni rī te jícán tahu rī nuū Yaā Dios jehē ñayuu nación rī Israel, jeē na jnáma ya i jijnáhan i. ² Chi cáhán rī jeē vāha cásáha i jeē ndihví ni i cáchiñúhún i Yaā Dios. Te vésú súcuan te cáchiñúhún cáhá i. ³ Chi tu cájecūhun ni i ndese ndáhva Yaā Dios cuēchi ñayuu, te ndúcú i quendōo ndaā i máá-ni jeē squícu i ley. Te tu cájetáhú i máá modo jeē ndáhva Yaā Dios cuēchi i. ⁴ Chi siquī jeē ni sáha Cristo te cuu quenda ñayuu chíji ley Moisés. Te ndáhva Yaā Dios cuēchi tāca ñayuu jeē candíje i jeē ni sáha Cristo jehē i.

⁵ Chi súcuan ni tee Moisés jñūhun ñayuu jeē cánducú quendōo ndaā jín ley: Núu ññ ñayuu cuu squícu i tācá jniñu ndácu ley, te cotecu i núú, achí. ⁶ Te jñūhun jeē ndáhva Yaā Dios cuēchi ñayuu siquī jeē candíje i jeē sáha ya jehē i, chi sa suhva cáhán: Ma cáni ni rō jeē jíní ñúhún caa ró andiví nasnúu ró Cristo jeē ndahva yā cuēchi ró. ⁷ Ni ma cáni ni rō jeē jíní ñúhún cuun ró ndé nuū cúnú ndonehen ró Cristo mēhñu ndíyi, nájñūhun jeē tu ní nátecu yā. ⁸ ¿Te ndese cáhán jñūhun un núu súcuan? Yajni íyó jñūhun ya jín ró, chi ñūhun ini yuhu ró jín ini anuá rō, achí tutu. Te suu cúu jñūhun jeē na cándíje yó jéé jnáma ya yohó. Te jñūhun yáha cúu jeē cánacani ri. ⁹ Chi núu cahān rō jeē Jítóho rō cúu Jesús, te núu candíje ró jín ini jín ánuá rō jeē ní natecu yā mēhñu ndíyi ni sáha Yaā Dios, yūcuán na te jnama ya rohó. ¹⁰ Chi jín ini jín ánuá yō cándíje yó jéé ni jīhī yā jehē yō, te súcuan te ndáhva Yaā Dios cuēchi yó. Te jeē cahān yō jeē Jítóho yō cúu Jesucristo, te súcuan te jnama ya yohó.

¹¹ Chi cáhán tutu iī: Tāca ñayuu jeē candíje i ya, chi jnama nahín yá i, achí. ¹² Chi inuú-ni cúu ñayuu hebreo jín táca gá ñayuu, chi máá yá cúu Jítóho nuū ndihí yó, te cuehē jeē váha sáha ya jín ñayuu cácahān ndahú jín yá. ¹³ Chi súcuan cáhán jñūhun ya: Ndihi ñayuu cácahān ndahú jín máá Jítóho yō, chi jnama ya i, achí. ¹⁴ ¿Te ndese cahān ndahú i jín yá te núu tu ní cándíje i jeē jnama ya i? ¿Te ndese candíje i te núu tu ní jíní sōho i jñūhun ya? ¿Te ndese cuni sōho i te núu tú na ñayuu nacani jñūhun nuū i? ¹⁵ ¿Te ndese nacani ñayuu jñūhun ya te núu jeē tu tájí yá i quihín i? Chi nájñūhun cáhán tutu iī: Yōhoyo luu jniñu cásáha ñayuu cájica jín jñūhun ndeyí sñ ni jeē cánacani i jñūhun vāha ya, achí.

¹⁶ Te nasúu ndihí i jétáhú nuū jñūhun jnama ya i. Chi ni cahān Isaías nde jenahán: Tátā Yaā Dios, ¿ndé ñayuu ni candíje jñūhun jeē cánacani ná ví? achí de. ¹⁷ Núu súcuan te núu cuni nahín ñayuu te cuu candíje i. Te jñūhun cuni nahín i cúu jñūhun Cristo.

¹⁸ Te cájnūhun rí: ¿A tu ní cájini sōho i jñūhun un núu súcuan? Tuú chi ni cajini sōho i, chi cáhán tutu iī:

Níí ñáyiví ní cajini sōho ñayuu jñūhun jeē ní canacani de.

Te nde nuū jicá gá tāca lado ni jinū jñūhun ún.

Achí tutu. ¹⁹ Te suni cájnūhun rí: ¿A tu ní cájecūhun ni ñayuu Israel jñūhun ún? Tuú chi ni cajecūhun ni i, te tu ní cájetáhú i. Chi xihna gā Moisés ni cachi de jeē ni cáhān Yaā Dios:

Cucuñí ró jijnáhan ró, chi cuāha ri jñūhun ri nuū inga ñayuu jeē násúú ññ nación cúu.

Te quití ni rō coto ró jéé cuáha ri jñūhun ri nuū ññ nación jeē tu jécūhun ni.

²⁰ Te suni Isaías ni chundeyí ni de ni cachi cājí de jeē ni cáhān Yaā Dios:

Ñayuu jeē tu ní cánanducú rúhū, ni cajini i ruhū.

Te nuū ñayuu jeē tu ní cácajnūhún, ní steén rī nuū i ndese Yaā cúu ri.

²¹ Te siquī ñáyuu Israel sa ni cahān de jeē ni cáhān yā: Ndiquivī ni cana ri i jeē quívicoo i nuū rī, te tu ní cácuu i, chi ñayuu nīhni ni, ñayuu jéē ni cácuu i. Achí yá, achí Isaías.

Jeē iyó jecu na ñayuu Israel jeē jnáma ya

11

¹ Núu súcuan te cájnūhun rí: ¿A ní stóo Yaā Dios ñayuu maá yá Israel, chí naún? Tú cuiti. Chi ruhū suni tēe Israel cúu ri, te yucūn Abraham cúu ri, te Benjamín cúu jíi rī jenahán. ² Tu ní stóo Yaā Dios ñayuu maá yá, chi je ni nacāji ya i nde jenahán. ¿A tu cájini rō ndese cáhán tutu i jnūhun Elías, tēe ni nacani jnūhun ya jenahán? Chi náa jícán tahu de, te ni cahān de siquī ñáyuu Israel: ³ Tātā Yaā Dios, ni cajehni i tāca tēe cánacani jnūhun ní, te ni cajenu i tācá altar ní. Te máñúhún na sāña ní quendō, te vijna suni cácuu i cahni i sāña, áchí de. ⁴ Te Yaā Dios ni nastió cuíñí yā: Iyó nahín úxā mil ñayuu cácuu ruhū jeē tu ní cájecuñí yití i nuū ídolo naní Baal, achí yá. ⁵ Te suni súcuan vijna, chi iyó jecu na ñayuu jeē ní nacāji ya siquī jeē váha ni yā jíin i. ⁶ Te núu ni nacāji ya i siquī jeē váha ni yā jíin i, te nasūu síquī jeē ní sáha i jniñu váha cúu. Chi núu siquī jeē ní sáha i jniñu váha cúu, yūcuán na te nasūu síquī jeē váha ni yā cúu.

⁷ ¿Te ndese cúu núu súcuan? Cúu jeē ñáyuu Israel tu ní cūndeyí i quendō ndaā i nájnūhun ni canducú i. Te sava i jeē ní nacāji ya, chi máá i ni ndahva yā cuēchi i. Te sava ga i ni ndunīhni ni i, ⁸ nájnūhun cáhán tutu i: Ni sáha Yaā Dios jeē tu jécūhun cuiti ni i siquī yā, ni tu jíin i jíin tñūú i, ni tu jíin nahín i jnūhun ya, te súcuan cúu nde vijna. Achí tutu. ⁹ Te suni ni cahān David:

Vico jeē casáha i, na cóo nájnūhun iin trampa chí iin xeyū, návāha nihīn i castigo xeēn siquī jeē castívi i casáha i cuēchi.

¹⁰ Te ánuá i na ndúnee, nájnūhun jeē tuá cúu coto i, te na jécosthí jnūndóho siquī i ní cáni. Achí tutu.

Siquī jeē jnáma ya ñayuu tāca gá nación

¹¹ Núu súcuan te cájnūhun rí: ¿A tuá cúu cuiti ndívi ñayuu Israel nuū Yaā Dios jeē súcuan ni castívi i? Tú cuiti. Chi sa suhva jeē ní cacunīhni ni i, te sa ñayuu tāca gá nación ni canihīn tahu máá i jnūhun jeē jnáma ya i. Te yūcuu sáha tucu jeē ñáyuu Israel condíhvī ni i jeē suni candíje máá i. ¹² Chi jeē ní castívi i, te sa ñayuu ní cáhnu ñayívi ní canihīn maá i jnūhun ya. Te jeē ní cajica yátá i, suu ni sáha jeē ní canihīn ñayuu tācá nación jnūhun ya. Núu súcuan te quivī jeē ndívicoo tucu ndíhi ñayuu Israel ndaha ya, te ñayuu ñayívi víhyá gā quendō ndetū i sáha ún.

¹³ Te vijna te cáhán rī jíin róhó ñáyuu tācá nación jeē tu ní jíin jnūhun ya. Chi ni tají Yaā Dios ruhū jeē scáca ri jnūhun nuū rohó ñáyuu tācá nación. Te ndúcú rí jeē na cuájñúhún ró jijnáhan ró jniñu sáha ri jeē nácani ri jnūhun ya. ¹⁴ Chi cúní rī jeē jíin yúcuu te nacani ni sava jnáhan ri ñayuu Israel jeē suni candíje máá i, te jnama ya i. ¹⁵ Chi jeē ni stóo ya ñayuu Israel, jeē yúcuu cúu jeē sa ñayuu ñayívi ní sáha ya jeē ndívicoo i nuū jnūhun maní yā jíin i. Núu súcuan te quivī naquihīn tucu ya ñayuu Israel, quivī ún suni vāha ndasí sáha ya jíin ñáyuu ní cáhnu ñayívi. Chi coo nájnūhun jeē natecu i jeē cúu i nájnūhun ndívi. ¹⁶ Te ñayuu Israel cásocō i nuū Yaā Dios pan jeē quénda xihna gā nuū ñujen, te súcuan stéen i jeē ndíhi un cúu cuenta yā. Te iin yujnu, núu yíhi jeē cuenta yā cúu, te suu cúu nde yoho jíin ndé ndíhi ndaha. Te suni súcuan ñayuu Israel, yíhi cuenta i nuū yā, siquī jeē jíi i xihna ñúhún, ni quívicoo de ndaha ya.

¹⁷ Chi ñayuu Israel cácuu i nájnūhun ndayújnu olivo váha, te sava ndaha un ní quendē. Te róhó ñáyuu tācá nación jeē tu jíin jnūhun ya, cácuu ró nájnūhun ndayújnu olivo yucú, te ni nachuhun ya rohó núu ni quendē ñayuu cácuu ndayújnu váha ún. Te nájnūhun inuú-ni cástáa ró ndúxi jíin cajin jeē véji nde yoho yújnu ún. ¹⁸ Núu súcuan te ma sáha téyí ró maá ró nuū ñáyuu Israel jeē cácuu nájnūhun ndayújnu jeē ni quendē. Ma cutéyí ró, chi nucūhun ni rō jeē násúú jéē yoho stáa cajin nuū maá ró, chi sa máá ró stáa cajin jeē véji nde yoho.

¹⁹ Te sanaa te cahān rō: Tú chi sava ndaha ni quendē návāha nachuhun ya ruhū nuū ni quendē ún, achi rō. ²⁰ Ndaā, te ni quendē i siquī jeē tu ní cá candíje i Cristo. Te rōhó chi máni siquī jeē cá candíje rō, jeē yúcuan cúu jeē ni quívicoo rō lugar i. Te ma sándúxí rō maá rō núu súcuan, chi sa suhva conso iyo rō núu Yaā Dios. ²¹ Chi tu ní íne cáhnu ni yā nuū maá ndaha jeē chíjniñu, te suni súcuan ma cóne cáhnu ni yā nuū rō jijnáhan rō te núu stívi rō. ²² Núu súcuan te sáha vāha ro cuenta ndese vāha ni Yaā Dios jíin ndese xeēn ni yā. Chi ni nduxeēn ni yā jíin ñáyuu hebreo jeē ní castívi ún, te sa cúndáhú ni yā rohó. Te cánuú cuiñi nihin ro jíin jnúhun jeē váha ni yā jíin rō. Chi núu tuú, te suni quende yā rohó. ²³ Te máá i, núu candíje tucu i, te nucōndee tucu i, chi máá Yaā Dios cuu nachuhun tucu ya i. ²⁴ Núu súcuan te rōhó ñáyuu tācá nación jeē tu ní jíní jnúhun ya, ni quendē rō xinī yújnu olivo yucú, te ni nachuhun ya rohó xíní yujnu olivo váha, vēsú nasúú ndaha máá yujnu un cácuu rō. Te nagā ni cuu ñáyuu hebreo jeē ma náchuhun ya i nuū ni quendē i, chi cácuu i máá ndayújnu váha ún.

ñin quivī te jnama ya ndihi ñáyuu nación Israel

²⁵ Hermano, cúní rī jeē na jécūhun ni rō jijnáhan rō ndese íyó jnúhun yáha jéē ní yisāhí, návāha ma cutéyí rō cani ni rō jeē ndichí xíní maá rō: Chi sava ñáyuu Israel ni ndunihni ni i, te súcuan coo máá-ni nde quivī jínu candíje ñáyuu tācá nación jeē tu jíní jnúhun ya.

²⁶ Te sáá te jnama ya ndihi ñáyuu nación Israel, chi cáhán tutu i:

Ichi ñuu rī Sión quiji Yaā jnáma ñáyuu,
te sáha ya jeē tuá coo cuēchi nuū tāca yúcūn Jacob.

²⁷ Te yāha cúu contrato jeē sándaā rī jíin i,
quivī jeē quende ri cuēchi i jijnáhan i, áchí Yaā Dios.
Achí tutu.

²⁸ Chi ñáyuu hebreo un ní nduu i nájnūhun enemigo Yaā Dios siquī jeē tu ní cá candíje i jnúhun jnáma ya i. Te jeē yúcuan te cuu cuitē núu jnúhun un núu tāca rōhó. Te vēsú súcuan te siquī jeē ní nacāji ya tāca jíi i jenahán, te cúndáhú gá ni yā i jeē ma stóo ya i ní cáni. ²⁹ Chi tu nácani yátá ni yā jeē cána ya ñáyuu jíin jéē jéhe ya tahū i. ³⁰ Te rōhó jijnáhan rō, suni ni cahīyo nihin ni rō nuū Yaā Dios nde saá. Te vijna jeē ní cacunihni ni maá ñáyuu hebreo, te cúndáhú ni yā rohó. ³¹ Te suni súcuan máá i, chi vēsú cácuunihni ni i vijna, te cúndáhú tucu ni yā i, nájnūhun cúndáhú ni yā maá rō jijnáhan rō. ³² Chi Yaā Dios ni sáha ya jeē ní quendōo ndivii ñáyuu chíji jnúhun cúnihni ni i, návāha suni cuu cúndáhú ni yā ndivii i.

³³ Núu súcuan te náhán náā ni yō jeē yóhoyo cuehē jnúhun ndichí íyó jíin Yaā Dios, te ndihi cuiti jiní yā. Te ni ma cúu cuiti castūhun yó ndese téé ni yā sáha ya tācá-ni, te ma cánda cuiti yō jecūhun ni yō ndese cúu tāca jéē sáha máá yá. ³⁴ Chi cáhán tutu i: ¿Ndé ñin ni jecūhun ni ndese jéni ni maá Jítóho yō? ¿Chí ndé ñin ni steén nuū yā? ³⁵ ¿Ndé ñin ni jéhe xihna gā nuū maá yá, návāha nachunaa yā nuū i? ³⁶ Chi nde nuū maá yá vēji tāca jéē iyó, te máá yá ni sáha ndihi, te jeē cúu máá yá cúu. Te na cáhán yō jeē yóhoyo luu cújéhnú Yaā Dios ní cáni. Amén.

Jeē na cóo ndoo ánuá yō cuajniñu yó núu Yaā Dios

12

¹ Núu súcuan te cáhán ndahú rí jíin rō jijnáhan rō, hermano, jeē siquī jeē cúndáhú ni Yaā Dios yohó. Na sócō rō maá rō núu yā, coo ndoo coo i rō cuajniñu rō núu yā, nájnūhun cúsiñ ni yā. Chi yāha cúu jeē chíniñuhún rō yā nde jíin ini jíin ánuá rō. ² Te ma cáca rō jíin tāca modo casáha ñáyuu ñayiví yáha, chi sa na sáma rō modo cani ni rō, te ndujeé jéē níjnūn rō. Te súcuan te cuu nacāji rō ndé-ni cúu jeē váha jeē núnjahan ni Yaā Dios, jeē cúsiñ ni yā, jíin jéē íje ni rō jíin jnúhun ya.

³ Te siquī jeē váha ni yā ni jéhe ya jniñu nácani ri jnúhun ya, jeē yúcuan cáhán rī jíin ndihi rō jéē ma cáni ni rō jeē váha ga ñáyuu cúu rō núu cūhva jeē iyó rō. Chi ná ñin ná ñin rō na cáni ndaā ni rō siquī maá rō, te ma scáa ga rō cani ni rō jeē váha ga ñáyuu cúu rō vēsú nuū cūhva jeē ni jéhe Yaā Dios fuerza ini rō cándíje rō. ⁴ Chi cácuu yó nájnūhun

ñin yiqui cúñu jeē iyó cuéhē parte, te sñin sñin jéjníñu ñin ñin. ⁵ Chi vēsú iyó cuéhē yō, te nájñūhun ñin-ni yiqui cúñu cúu yó jéē yíhi yó ndaha Cristo, chi ñin-ni ni nduu yó jíjñáhan yó.

⁶ Te sñin sñin tahū ni jēhe Yaā Dios nuū yō jeē cuajníñu yó núū yā, núu ndese ni nujñahan ni yā ni jēhe ya nuū ñin ñin yó. Núu súcuan te na cuájñíñu vāha yó jíin táhū ún. Núu ni nihīn yō tahū jeē nácani yó jnúhun ya, te cánuú sáha yó ndé maá cúhva ni jēhe ya cándíje yó. ⁷ Te núu ni nihīn yō tahū jeē chindéé ñáhán yó jñáhan yó, te na sáha yúcún yó. Te núu ni nihīn yō tahū jeē steén yō, te na cóndihvī ni yō steén yō. ⁸ Te ñayuu jeē stihví ni inga ñayuu, suni na sáha yúcún i. Te ñayuu jēhe nuū jñáhan, na cuāha i súcuan-ni. Te ñayuu ndíso jníñu, na ndácu vāha i jniñu. Te ñayuu jíto ndáhú ñayuu ndahú, na cúsiñ ni i sáha i.

Ndese cánuú squícu ñayuu cáccandíje

⁹ Te na cúndáhú ndije ni rō jñáhan ró, nasūu máá jéē cahán-ni ró. Te coto uhū rō jniñu néé, te condiquīn rō jniñu vāha. ¹⁰ Te cánuú coo manī rō jíin jñáhan ró nájñūhun jéē manī rō jíin ñani rō. Te nducú ró jeē quéndōo yíñúhún gá jñáhan ró vēsú maá ró.

¹¹ Te ma cucúxí ró jíin jniñu casáha ró. Chi jíin ini jíin ánuá rō cóndihvī ni rō cuajníñu ró núū maá jítoho yō.

¹² Te na cúsiñ ni rō jeē cáñuhun ni rō tāca jéē vāha jeē cóo. Te na cuándeýí ni rō núu ndóho ró jnúndóho. Te níni na cácan tahú rō.

¹³ Te coto ndáhú ró ñayuu cáccandíje núu cúmanī nuū i. Te cuāha núu ró vehe nuū ñáyuu cájica.

¹⁴ Te cacān tahú rō jehē ñayuu cájito xeēn rohó. Ma cahán ndevāha ro síquī i, chi sa cacān tahú rō jehē i.

¹⁵ Te núu cúsiñ ni ñayuu, te suni na cúsiñ ni rō jíin i. Te núu cúcuíhyá ni ñayuu, te suni na cúcuíhyá ni rō jíin i.

¹⁶ Na cóo inuú ni rō jíin táca jñáhan ró. Te ma cundúxí ró, chi sa quiñáhan ró jíin ñáyuu núu ga. Ma cáni ni rō jeē ndichí xínī rō.

¹⁷ Te ma nasáha ndevāha ró jíin ni ñin ñayuu, núu ni sáha ndevāha i jíin ró. Na cóndihvī ni rō sáha ró jniñu vāha, jíto jínúū tāca ñáyuu. ¹⁸ Te na cóndihvī ni rō coyūcu mánī rō jíin táca ñáyuu, vēsú ndese cándāa máá i. ¹⁹ Nāni mánī jijnáhan ró, ma nácuāha ró jéē ndútahū ñayuu casáha ndevāha jíin ró, chi sa cuāha ró jnúhun jeē maá Yaā Dios cuāha ya castigo i. Chi cáhán tutu ii: Máá rí cuāha castigo i, máá rí nacuāha yāhu i, áchí jítoho yō. ²⁰ Te suni cáhán tutu: Tēe jíto uhū rohó, núu jí de sōco, te cuāha ró jéē cáji de. Te núu jíchí de, te cuāha ró jéē cóho de. Chi núu sáha ró súcuan, te cucanu de te nacani uhū ni de jeē ni jíto uhū de rōhó. ²¹ Ma cuāha ró jnúhun jeē cúndeýí jniñu néé jíin ró, chi sa jniñu vāha na sáha ró návāha ndahvā jniñu néé.

13

¹ Tāca ñáyuu na cuátáhú i nuū tohō cándiso jníñu ñuu. Chi ma cóo tēe cándiso jníñu te núu tu ní sáha máá Yaā Dios. Te tēe cándiso jníñu chi Yaā Dios ni tee jniñu síquī de. ² Te ñayuu jeē tu jétáhú núū tēe cándiso jníñu, núu súcuan te cúnihni ni i nuū jeē ní jeni Yaā Dios. Te ñayuu jeē cúnihni ni, chi cuēchi sáha i, te nihīn i castigo. ³ Chi tāca tēe ndíso jníñu, nasūu jéē ndíso jníñu de jeē yūhú ñáyuu casáha jniñu vāha, chi sa jeē yūhú ñáyuu casáha jniñu néé. Te núu cúní rō jeē ma cúxeēn tēe cándiso jníñu nuū rō, na sáha ró jniñu vāha núu súcuan. Yūcuán na te cuajnúhún de rōhó. ⁴ Chi jéjníñu Yaā Dios de jíjñáhan de, návāha coyūcu vāha ró jíjñáhan ró. Te núu sáha ró jniñu néé, te sa yūhu ró, chi nasūu cáha-ni cúu jeē cándiso jníñu de stóho de ñayuu. Chi jéjníñu Yaā Dios de, návāha cuāha de castigo ñayuu casáha jniñu néé. ⁵ Jeē yúcuan cánuú jéē cuatáhú ró núū tēe cándiso jníñu, te nasūu mánī jeē ma níhín rō castigo, chi suni jeē tú na cuēchi coo ánuá rō. ⁶ Te jeē yúcuan cúu jeē suni cájēhe ró xúhun núū tēe cándiso jníñu cuu jniñu ñuu. Chi jéjníñu Yaā Dios de, te mánī jniñu yúcuan casáha de.

⁷ Te chunaa rō ndihi jeē cátaū rō nuū tāca ñáyuu. Cuāha ró xúhun ñuu nuū téé stútú xúhun ñuu, te cuāha ró xúhun renta nuū téé stútú renta. Te na cóo respeto rō nuū ñáyuu cánuú coo respeto rō. Te na cóo yíñúhún ró nuū ñáyuu cánuú coo yíñúhún ró. ⁸ Ma cótaū rō nuū ní ñin. Te íyó ñin jeē taú rō jeē ma tahndé cuiti, suu jeē ni cáhān Yaā Dios jeē cundáhú ni rō jnáhan ró. Chi ñayuu cundáhú ni jnáhan, je ni squícu i ndihi jeē ndácu ley yā. ⁹ Chi súcuan ndácu ley jniñu: Ma cosíquí ndéē rō jnáhan ró, ma cáhni rō ndīyí, ma sacuíhná ró, ma sajnúhún ró, ma ndíyo ni rō jeē névāha jnáhan ró. Te tāca jnúhun yáha jíin táca gá jniñu ndácu ley, ndihi-ni yíhi chíji jnúhun yáha: Cundáhú ni rō jnáhan ró nájnūhun cundáhú ni rō maá ró, áchí tutu. ¹⁰ Te núu cundáhú ni yō jnáhan yó, te tu sáha yó ni ñin jeē tu íyó váha nuū i. Núu súcuan te jeē cundáhú ni yō jnáhan yó, yūcuan cúu jeē squícu yó níí ley yā.

¹¹ Súcuan sáha ró jíjnáhan ró, chi sáha ró cuenta jeē cuácuyajni quiví ndíji ya. Te ma cóo ga rō nájnūhun ñayuu quixí, jeē cúhuun ni rō. Chi vijna je ni cuyajni ga quiví jnáma ya yohó vésú quiví ní candíje yó jnúhun ya. ¹² Chi nájnūhun je yajni yāha jecuáā, te cuacundijin quiví jnáma ya yohó. Núu súcuan te na stóo yó jniñu jeē ni sáha yó núu néē, te na cúcutú yó jíin táca jniñu ndaā jeē caca yó jíin luz yā. ¹³ Na cáca yíñúhún yó nájnūhun cánuú caca yó jíin luz yā. Ma nájini ró, ma sáha ró táca vico néé, ma cáca jnéni ró, ma sáha ró jniñu néé, ma cuajnáhan ró, ma cucuésún ni rō. ¹⁴ Chi sa suhva cuiñi cutú ró jíin fuerza maá Jítoho yō Jesucristo, jeē ma cuāha ga rō jnúhun sáha ró jniñu cúní modo neé maá ró.

Ma cahán neé yó coto yó jnáhan yó

14

¹ Cuatáhú ró ñayuu jeē ná tu ije jíin jnúhun ya, te ma tejnáhan ró jíin i síquī tāca jnúhun jeē sñin jéni ni i jíin maá ró. ² Chi íyó ñáyuu jeē jéni ni i jeē cúu caji i ndinuū-ni. Te íyó ñáyuu jeē ná tu ije jíin jnúhun ya, te cájeni ni i jeē tú váha caji i cūñu, chi jeē ní casocō ñayuu nuū ídolo cúu. ³ Te róhó téé jeē yéji ndinuū-ni, ma cahán rō coto ró téé jeē tu yéji ndinuū. Te róhó téé jeē tu yéji ndinuū, ma cahán rō coto ró téé jeē yéji ndinuū. Chi Yaā Dios ni jetáhú yá téé ún. ⁴ Te róhó, ¿ndé ñin cúu ró jéé cahán neé ró jíto ró mozo Yaā Dios? Chi núu váha chí neé sáha de, te maá yá cúu jeē sándaā jíin de, nasūu maá ró. Te tuú chi cuiñi váha de, chi mozo maá Jítoho yō cúu de, te cuu sáha ya jeē ma stívi de.

⁵ Te suni íyó ñayuu jeē jéni ni jeē íí gā ñin quiví vésú inga quiví. Te inga ñayuu chí jéni ni i jeē ñnuú-ni cúu tāca quiví. Te tācá i na cúndaā váha ni maá i síquī jeē jéni ni i. ⁶ Chi téé jeē néé íi quiví, chíñúhún de maá Jítoho yō jeē sáha de súcuan. Te téé jeē tu néé íi quiví, suni chíñúhún de Jítoho yō jeē sáha de súcuan. Te téé jeē yéji ndinuū-ni, chíñúhún de maá Jítoho yō jeē sáha de súcuan, chíñúhún de maá Jítoho yō jeē sáha de súcuan, chi nácuatáhú de nuū Yaā Dios. Te téé jeē tu yéji ndinuū, suni chíñúhún de Jítoho yō jeē sáha de súcuan, te suni nácuatáhú de nuū yā.

⁷ Chi ni ñin yó tu técu yō jeē váha maá-ni yó, te ni ñin yó tu jíhí yō jeē cuní maá yó. ⁸ Chi núu técu yō, te técu yō jeē cuajniñu yó núu maá Jítoho yō. Te núu cuu yō, te suni cuu yō síquī jeē cuní maá Jítoho yō. Núu súcuan te núu jeē cótecu yō chí jéé cuu yō, te yíhi yó ndaha Jítoho yō. ⁹ Chi ni jihí Cristo te ni natecu yā, návāha cuu ya Jítoho nuū ñáyuu ni jíhi jíin ñáyuu técu.

¹⁰ Te róhó, ¿naun jéni néé ni rō jíto ró jnáhan ró núu súcuan? ¿Te naun cújéé ni rō jíto ró de? Chi tāca yó cuiñi yó yuhu mesa Cristo jeē sándaā yā jniñu yó. ¹¹ Chi suhva yósó núu tútu íi:

Jendaá ndije chi nuū maá rí cuiñi yítí táca ñáyuu,
te ndihi i cahán jeē maá rí cúu Yaā Dios, áchí maá Jítoho yō.

¹² Núu súcuan te ná ñin ná ñin yó nacuāha yo cuenta nuū Yaā Dios ndese jniñu ni casáha yó.

Ma sáha yó jéé quiví jnáhan yó cuéchi

¹³ Te jeē yúcuun ma cahán neé gá yō coto yó jnáhan yó. Chi sa tee ni rō jeē ma sáha ró ni ñin jniñu jeē sáha jeē stívi jnáhan ró te quiví i cuéchi. ¹⁴ Te jíni rí jeē ni ñin jeē ni sáha

Yaā Dios, tu stívi ánuá yō. Chi súcuan ni cucáhnu vāha ni rī siquī jeē candíje ri Jitoho yō Jesús. Te núu ññayuu jéni ni i jeē iyó jéē stívi ánuá i, yūcuán na te súcuan sáha un jíin máá i. ¹⁵ Te núu jnáhan ró tu cúvāha ni de jeē yéji rō cūñu ni casocō ññayuu nuū ídolo, chi jéni ni de jeē stívi un ánuá rō, núu súcuan te tu cundáhú ni rō de jeē sáha ró súcuan. Coto má snáā rō anuá jnáhan ró síquī jeē yéji rō ññ jeē jéni ni de jeē cuēchi cúu. Chi suni jehē maá de ni jihī Cristo. ¹⁶ Ma sáha ró jniñu jeē cahán i síquī, vēsú jiní maá ró jeē iyó váha. ¹⁷ Chi jeē ndácu Yaā Dios jniñu nuū yō, nasūu síquī ndese caji yō coho yó cúu, chi sa suhva síquī jeē na sáha yó jniñu ndaā, te coyūcu mánī yō jíin jnáhan yó, te cusī ni yō sáha Espíritu Santo. ¹⁸ Te ññayuu jeē súcuan jéjníñu nuū Cristo, chi cúsī ni Yaā Dios jíin i, te suni cájejnúhún ññayuu i.

¹⁹ Núu súcuan te na cóndihvī ni yō coyūcu mánī yō, návāha jíin yúcuan chindéé ññájnáhan yó ije yó jíin jnúhun ya. ²⁰ Te ma cuáha ró jnúhun jeē ndeyu yéji rō snáā jniñu ni sáha Yaā Dios jíin jnáhan ró. Chi íyó ndoo ndije ndihī jeē yéji yō, te vēsú súcuan te tú vāha jeē yéji rō ndeyu jeē sáha jíin jnáhan ró jéē caji de jeē jéni ni de jeē cuēchi cúu. ²¹ Vāha ga ma cáji rō cūñu, ni ma cóho ró vino, te ni ññ ma sáha ró jéē stívi ánuá jnáhan ró, te quīvi de cuēchi, te caca yátá de nuū jnúhun cándíje de. ²² Te núu cándíje ró jéē tú na vé sáha jeē yéji rō, te súcuan na cándíje máá-ni ró núu Yaā Dios. Te nacā ndetū tēe jeē tu sáha jíin ánuá de jeē cuēchi cúu núu caji de coho de. ²³ Te tēe yéji ññ jeē jéni ni de sanaa te stívi ánuá de, núu súcuan te sáha de cuēchi, chi tu cándíje de jeē iyó váha jeē yéji de. Chi tāca jéē sáha yó, núu tu cándíje yó jéē iyó váha, te cuēchi cúu.

Jeē na sáha yó jéē cúsī ni jnáhan yó

15

¹ Te yóhó jéē ni íje yó jíin jnúhun ya, cánuú condito yó ññayuu jeē ná tu ije jíin jnúhun ya, návāha candíje vāha i. Te ma sáha yó jéē máá-ni yó cusī ni. ² Chi ná ññ ná ññ yó na sáha yó jéē cúsī ni jnáhan yó, návāha quendōo vāha i te ije i jíin jnúhun cándíje i. ³ Chi ni Cristo, tu ní sáha ya jeē cúsī ni maá yá, chi sa suhva jeē cúsī ni Tatá yā. Chi suhva cáhán tutu iī: Tāca jnúhun ndevāha jeē cácahān ndevāha ññayuu síquī ní, ni ndīvi síquī maá ná, áchí Cristo jíin Tatá yā. ⁴ Chi tāca jnúhun jeē ni jécósō nuū tútu iī nde jenahán, chi ni jecosō návāha stéén nuū yō, te nihīn yō jnúhun jeē sáha jeē cuandeyí ni yō te ndusī ni yō. Te súcuan te cocuhun ni yō tāca jéē váha jeē cóo. ⁵ Te máá Yaā Dios jeē jéhe jnúhun cuandeyí ni jíin jnúhun ndúsī ni, na sáha ya jeē cóo ñnuú ni rō, nájñuhun cúní Cristo Jesús. ⁶ Te súcuan te ññ-ni coo ró te ñnuú-ni cuu cahān rō jeē yóhoyo vāha Yaā cúu Yaā Dios, Tatá Jitoho yō Jesucristo.

Jeē ni jítē jnúhun vāha ya nuū ññayuu tācá nación

⁷ Núu súcuan te cuatáhú ró tāca jnáhan ró, nájñuhun ni jetáhú Cristo yohó, návāha cuni ññayuu jeē luu cújéhnu Yaā Dios. ⁸ Chi cáhán rī jeē ní quiji Cristo Jesús, ni sáha ya tācá jniñu jeē quendōo vāha ññayuu hebreo, návāha cundaā tāca jnúhun jeē ni jéjñuhun Yaā Dios nuū tāca jíi i. Te súcuan ni steén Cristo jeē squícu Yaā Dios tāca jéē ni jéjñuhun ya. ⁹ Te suni ni quiji ya návāha ññayuu tācá nación jeē tu jíin jnúhun ya, cahān i jeē yóhoyo vāha ni Yaā Dios jeē cundáhú ni yā i. Chi suhva cáhán tutu iī:

Núu súcuan te cahān na jéē yóhoyo vāha ni ní, cuni ññayuu tācá nación,
te cata ná yaa jeē chiñúhún ná nihín.

¹⁰ Te cáhán tucu tutu iī:

Róhó ññayuu tācá nación, ñnuú na cúsī ni rō jíin ññayuu maá yá.

¹¹ Te cáhán tucu:

Róhó ññayuu tācá nación, na cáhán rō jeē yóhoyo vāha ni Jitoho yō Yaā Dios,
te róhó ññayuu tācá-ni ñnuu, suni na cáhán rō jeē yóhoyo cújéhnu ya.

¹² Te suni ni tee Isaías jnúhun yáha:

Nuū yúcūn Isaí quiji ññ jeē cújéhnu,
te ndacu ya jniñu nuū ññayuu tācá nación.

Te ññayuu ún chi cocuhun ni i tāca jéē sáha ya.

Achí tutu.

¹³ Te máá Yaā Dios jeē sāha jeē cáñuhun ni yō tāca jēē váha jeē coo, na sāha ya jeē cóo sīh ndasí ni rō jíin jēē cóo ndeyí ni rō siquī jeē cácadíje niñin ró yá. Te súcuan te cocuhun teyí gá ni rō tāca jēē váha jeē coo, sāha poder maá Espíritu Santo.

¹⁴ Ñānī mání, cúcáñu ni rī jeē váha ndasí cándihvī ni rō jíin jniñu váha, te vāha ndasí cájecūhun ni rō, te cúu stíhvī jnáhan ni rō. ¹⁵ Te ni jeni ni rī jeē tee ri carta yáha cáhān cají rí jíin ró jijnáhan ró, návāha víhyá gā na cócuhun ni rō tāca jnúhun yáha. Chi súcuan sāha ri siquī jeē váha ni Yaā Dios te ni jēhe ya jniñu nuū rī ¹⁶ jeē jejniñu ri nuū Jesucristo, jeē nácani ri jnúhun nuū ñáyuu tācá nación jeē tu jíin jnúhun ya. Te nácani ri jnúhun vāha Yaā Dios nuū i jeē jnáma ya i. Súcuan sāha ri návāha ñayuu tācá nación, cuu squívi ri i ndaha ya jeē cúu i nájnūhun ñn jeē socó rī nuū yā jeē cúsi ni yā jíin. Chi ni sāha Espíritu Santo jeē iyó ndoo íyó íi i nuū yā.

¹⁷ Núu súcuan te siquī jeē candíje ri Cristo Jesús, te cúsi ni rī jeē jejniñu vāha ri nuū Yaā Dios. ¹⁸ Chi ma cúu cahān rī siquī jniñu cásáha ñga tēe, chi máá-ni siquī ndese ni jejniñu Cristo ruhū jeē sāha ri jeē ñáyuu tācá nación tu ní jíin jnúhun Yaā Dios, vijna jétáhú i nuū yā. Chi súcuan ni cuu jíin jnúhun ni cahān rī jíin jniñu ni sāha ri. ¹⁹ Chi ni sāha ri jniñu jéñu ndíso poder jeē steén jeē cujéñu ya, te ni ñyo poder Espíritu Santo jíin rí. Te súcuan ni nacani ndíhi ri jnúhun ndese jnáma Cristo ñayuu. Te ni nacani ri nde ñuu Jerusalén, jíin ndíhi tācá ñuu, jíin nde ní región Ilírico. ²⁰ Súcuan cúu jeē ní condíhvī ni rī ni nacani ri jnúhun jeē jnáma ya ñayuu. Te ni jehēn rī nuū ñáyuu jeē ná tu cuni jnúhun Cristo, chi tu ní cúni rī nacani ri nuū ñáyuu jeē jé ni jini i ni canacani ñga tēe. ²¹ Chi sa suhva ni sāha ri nájnūhun cáhān tutu íi:

Tāca ñáyuu jeē tu ní quíji jnúhun ya nuū i, vijna chi cuni i jnúhun ya, te tāca ñáyuu jeē tu ní jíin cuíti jnúhun ya, vijna chi jecūhun ni i. Achí tutu.

Jeē ñúhun ni Pablo jeē quihín de Roma

²² Te jeē yúcuan cúu jeē cuehē jínu ni cujnéñu ri, te tu ní cúu jecondēhe rí rohó jíjnáhan ró. ²³ Te vijna chi ni ndíhi jniñu ri ní cáñu tācá región ndañúu yáha. Te je ni cuu cuehē cuiyā jeē cuní rī jeē rī nuū rō. ²⁴ Núu súcuan te ñúhun ni rī jecondēhe rí rohó jíjnáhan ró núu na yáha ri quihín rī España. Te ñúhun ni rī jeē núu je ni cusí ni rī jeē ní jito jnáhan yó, yūcuán na te chindéé ñáhán ró ruhū jeē quihín gā rī. ²⁵ Te xihna gā na quihín rī ñuu Jerusalén quindēca ri xūhún cuu hermano cáyūcu yúcuan. ²⁶ Chi ñayuu Macedonia jíin Acaya ni cajeni ni i jeē cáquin i xūhun quihín nuū hermano cándoho ndáhú ñuu Jerusalén. ²⁷ Chi súcuan ni cacusi ni i ni casáha i. Te íyó váha jeē súcuan, chi máá i jeē cácuu i ñayuu tāca gá nación, táu i jeē sāha vāha i nuū ñáyuu hebreo un. Chi ñayuu hebreo ni casáha jeē ní quiji jnúhun Yaā Dios nuū i jeē quéndōo vāha ánuá i sāha. Jeē yúcuan cánuú jēē chindéé ñáhán i ñayuu hebreo cácadíje jíin ndajniñu ñayívi yáha. ²⁸ Núu súcuan te jeē jínu jniñu yáha jēē quindēca ri xūhun yáha nuū i, yūcuán na te jecondēhe rí rohó jíjnáhan ró jēē yáha ri quihín rī España. ²⁹ Te jíin vāha ri jeē quiví jinú rī nuū rō, te vāha ndasí quendōo ró jēē nacani ga rī jnúhun vāha Cristo nuū rō.

³⁰ Hermano jijnáhan ró, cáhān ndahú rí jíin ró jeē chindéé ñáhán ró ruhū cacān tahu rō jehē rī nuū Yaā Dios siquī jniñu ndúcú ndeyí rí. Súcuan sāha ró siquī jeē candíje yó Jítoho yō Jesucristo, jíin siquī jeē cundáhú ni yō jnáhan yó sāha máá Espíritu. ³¹ Te cacān tahu rō jeē na cácu ri nuū tēe región Judea jeē tu cácadíje, jíin jēē na cúsi ni tācá hermano ñuu Jerusalén jeē quindēca ri xūhun yáha cuu de. ³² Te súcuan te núu cúni Yaā Dios te jecondēhe rí rohó jíjnáhan ró, te cusí ni yō, te naniñin ni rī jeē condee rī jíin ró. ³³ Te máá Yaā Dios jeē jēhe jnúhun ndeyí sīh ni, na cóo ya jíin ró jijnáhan ró. Amén.

Jeē cahán Pablo jeē sándeýí ni i

16

¹ Te vijna te cáhān rī jíin ró jijnáhan ró jēē na chindéé ñáhán ró hermana Febe, chi cúu ña ñahan jéjniñu jeē siquí jnúhun ya nuū ñáyuu cácadíje ñuu Cencrea. ² Te cuatáhú ró

ña nájñūhun cúní maá Jítóho yō, chi súcuan cánuú sáha hermano cá candíje. Te chindéé ñáhán ró ña na-ni vé cúu jeē jíni ñúhún ña, chi súcuan ni chindéé ñáhán maá ña cuehē ñayuu, te suni nde ruhū.

³ Cahān rō jíin Priscila jíin Aquila jeē sándeyí ni ndindúú de, áchí rí, chi cáchindéé ñájñáhan de jíin rí síquī jníñu Cristo Jesús. ⁴ Chi ná ni iyo jñūdóho jeē cuu rī nuú, te ni cachundeyí ni de ni canducú de scácu de ruhū, vēsú suni cuu maá de núú. Te nácuatáhú rí nuú ndindúú de, te nasūu maá-ni ruhū, chi suni tāca grupo ñayuu cá candíje tācá nación. ⁵ Te suni cahān rō jíin ñayuu cá candíje ndútútú vehe de, sándeyí ni i, áchí rí. Te cahān rō jeē sándeyí ni Epeneto, tēe manī rī jíin. Chi ñuu Acaya, maá de cúu jeē ní candíje xīhna gā nuū Cristo. ⁶ Suni cahān rō jeē sándeyí ni María, ñahan jeē ní jejniñu ndasí jeē síquī jñūhun ya mēhñu ró jijnáhan ró. ⁷ Te cahān rō jeē sándeyí ni Andrónico jíin Junias, tēe cácuu jñáhan ñuu rī jeē ní cahīin jíin rí vecāa. Te tācá apóstol chi cájejniñu de ndindúú tēe jíñá, te xīhna gā de ni cacandíje Cristo vēsú maá rí.

⁸ Cahān rō jeē sándeyí ni Amplias, tēe manī rī jíin, chi cándíje de Jítóho yō. ⁹ Te cahān rō jeē sándeyí ni Urbano, tēe chindéé ñájñáhan jíin yó síquī jníñu Cristo Jesús, te suni súcuan Estaquis, tēe jeē manī rī jíin. ¹⁰ Suni cahān rō jeē sándeyí ni Apeles, tēe jeē ni stéén jeē candíje vāha de Cristo, te suni súcuan cahān rō jíin ñayuu vehe Aristóbulo. ¹¹ Cahān rō jeē sándeyí ni Herodión, tēe cúu jñáhan ñuu rī. Te suni súcuan ñayuu vehe Narciso jeē cá candíje maá Jítóho yō. ¹² Te suni cahān rō jeē sándeyí ni Trifena jíin Trifosa, ñahan cá sájniñu síquī jñūhun maá Jítóho yō. Te suni sándeyí ni Pérsida, hermana jeē manī yō jíin, chi suni ni sájniñu ndasí ña síquī jñūhun Jítóho yō. ¹³ Te cahān rō jeē sándeyí ni Rufo, tēe cájejniñu ñayuu jeē vāha cándíje de maá Jítóho yō. Te suni súcuan cahān rō jíin náná de, te maá ña suni ni jito ña ruhū nájñūhun jeē naná rī cúu ña. ¹⁴ Te cahān rō jeē sándeyí ni Asíncrito jíin Flegonte jíin Hermas jíin Patrobas jíin Hermes jíin táca hermano jeē cáyūcu jíin de. ¹⁵ Te suni súcuan Filólogo jíin Julia jíin Nereo jíin cuáha de, jíin Olimpas jíin ndihí hermano cá candíje cáyūcu jíin de jíijnáhan de.

¹⁶ Te jeē cahán tāca ró jíin jñáhan ró, te yíñúhún techūhu ró ndaha i. Te tāca grupo ñayuu cá candíje nuū Cristo, cáhán i jeē na sándeyí ni rō.

¹⁷ Te cáhán ndahú rí jíin ró, hermano jijnáhan ró, jéé cóto ró maá ró nuū ñayuu cútucu ni te ndúcú stívi jñáhan jíin jñūhun tu quíjnáhan jíin jéé ní cacutūhva ró. Te cujiyo ró nuū i jíijnáhan i. ¹⁸ Chi ñayuu súcuan, tu jéjniñu i nuū Jítóho yō Jesucristo, chi máni ndíhví ni i síquī jeē cáji i. Te yóhoyo ndúxí i jíin jñūhun cácahān i, te súcuan stáhú i ñayuu jeē tu jíin vāha. ¹⁹ Te maá ró jijnáhan ró, chi je cájini ndihí ñayuu ndese vāha cájetáhú ró nuū yā, te jeē yúcuan cúsiñi ni rī. Te cúní rī jeē cóo listo vāha ró sáha ró jniñu vāha, te ma sáha ró jniñu néé. ²⁰ Te maá Yaā Dios jeē jéhe jñūhun ndeyí sñi ni, yachí sáha ya jeē cúndeyí ró síquī jexeén jeē cúu Satanás. Te ñúhún ni rī jeē Jítóho yō Jesucristo na sáha ya jeē vāha róhó jíijnáhan ró.

²¹ Sándeyí ni rō jijnáhan ró, áchí Timoteo, tēe chindéé ñáhán jíin rí síquī jñūhun ya. Te suni súcuan cácahān jñáhan ñuu rī Lucio jíin Jasón jíin Sosípater.

²² Te ruhū jeē naní Tercio, jeē tēe rí carta yáha jéé cahán Pablo, suni cáhán rī jeē sándeyí ni rō jeē cá candíje ró Jítóho yō.

²³ Te Gayo, tēe ni jéhe núu vehe ndéé rúhū Pablo, cáhán de jeē sándeyí ni rō jijnáhan ró. Te suni jéhe núu de vehe nuū tāca ñayuu cá candíje. Te suni súcuan cáhán Erasto, tēe cúu tesoroero ñuu yáha, te suni súcuan cáhán hermano Cuarto.

²⁴ Te ñúhún ni rī jeē maá Jítóho yō Jesucristo, na sáha ya jeē vāha róhó jíijnáhan ró. Amén.

Jñūhun sándihí jéé cahán jeē yóhoyo cújéhnu ya

²⁵ Te vijna na cáhán yō jeē yóhoyo cújéhnu Yaā Dios. Chi maá yá cuu sáha jeē cuñiñi ñihin ga rō jijnáhan ró jíin jñūhun jñáma ya rohó jeē nácani rí, jíin jñūhun Jesucristo jeē steén rī. Chi súcuan ni steén Yaā Dios jñūhun sáhi yá, jeē ní yisáhi ní cáni nde ná tu jecōo ñayívi. ²⁶ Te vijna te je ni nane cáji. Chi jíin tútu i jeē ní catee tēe ni canacani jñūhun ya,

ni jitē núu jnūhun sāhi yáha nuū ñáyuu tācá nación, návāha candíje i te cuatáhú i. Chi Yaā Dios jeē técu ní cání, súcuan ni ndacu ya jniñu.

²⁷ Te ní cání na cáhán yō jeē yóhyo cújéhnu Yaā Dios siquī jniñu ní sáha ya jeē jíin Jesucristo. Chi máá ñn-ni ya iyó te yóhyo ndíchí yá. Súcuan na cóo. Amén.

CARTA HIN JEE NI TEE SAN PABLO APOSTOL NUU ÑAYUU ÑUU CORINTO

¹ Máá rí cúu Pablo, te ni cana Yaā Dios ruhū cúu ri apóstol Jesucristo. Chi súcuan ni nujnahan ni yā ni tají yá ruhū nacani ri jnūhun ya. Te ndindúú rí jíin hermano yō Sóstenes ² cátee ri carta yáha cuájeē nuū rohó ñayuu ñuu Corinto jeē cáccandíje ró Yaā Dios. Chi cácuu ró ñayuu maá yá, chi cáyihí ró ndaha Cristo Jesús. Chi ni cana Yaā Dios rohó jíjnáhan ró jéē coo ndoo coo iī rō nuū yā. Te ni cana ya rohó ndé jíin táca gá ñayuu jeē ndácunehen i máá Jítóho yō Jesucristo, ndé-ni cúu nuū cáhīyo i. Chi Jítóho táca yó jíin i cúu ya. ³ Te cáñuhun ni rī jeē Tatá yō Yaā Dios jíin Jítóho yō Jesucristo na sáha ga yā jeē váha róló, te sáha ya jeē coo ndeyí coo sñ ni rō.

Cristo sáha ya táca jéē váha yóhó

⁴ Te níni nácuatáhú rí nuū Yaā Dios jeē síquí rohó jíjnáhan ró, chi jeē jíin Cristo Jesús ni sáha ya jeē váha róló. ⁵ Chi cáyihí ró ndaha Cristo, te jeē yúcuan ní sáha Yaā Dios jeē cáhīyo cúca ró jíin táca jnūhun ya, chi cájecūhun vāha ni rō te cúu nácani ró. ⁶ Chi súcuan cúu jeē cáhīin nīhin ró jíin jnūhun Cristo jeē ní canacani ri nuū rō. ⁷ Te súcuan te tu cúmanī ni ñin tahū jeē jéhe ya cuu ánuá rō níni jéē cándetu ró quívī jeē quénda ndijin Jítóho yō Jesucristo. ⁸ Te máá yá chi sáha ya jeē cuiñi nīhin ró nde na jínu quívī, návāha ma cóo cuēchi síquī rō quívī ndíji Jítóho yō Jesucristo. ⁹ Te síqucu Yaā Dios táca jéē ni jéjnūhun ya, te ni cana ya rohó jíjnáhan ró návāha cuni jnáhan ró jíin Séhe ya, Yaā cúu Jítóho yō Jesucristo.

Síquī jeē ma cóo sñ ni i jíin jnáhan i

¹⁰ Hermano, nde jíin síhvī Jítóho yō Jesucristo cahán ndahú rí jíin ró jeē ñnuú-ni na ndájñuhun ró jíjnáhan ró, te ma cóo sñ ni rō. Chi vāha ñnuú na cóo ni rō jíin táca jéē cájeni ni rō. ¹¹ Súcuan cáhán rī, ñánī mánī, chi ni cacastūhun ñayuu vehe Cloé nuū rī jeē cátejñáhan ró. ¹² Chi táca ñin ñin ró sñ sñ cácahān rō: Ruhū chi jíin Pablo índichi rī, cácahān sava ró. Te sava ga rō: Ruhū chi jíin Apolos. Ruhū chi jíin Pedro. Ruhū chi jíin Cristo. Cácahān rō. ¹³ Te jeē cácahān rō súcuan ¿te á cájeni ni rō jeē sñ sñ Cristo iyó jéē canacani ri jnūhun? ¿Te á ruhū Pablo ni jihī jicā cruz jehē rō? ¿Chí jíin síhvī ruhū ni cajendute ró, chí naún? ¹⁴ Tú cuítī. Te na cútahū rī nuū Yaā Dios jeē tú cuehē rō ni scuándute ri, chí máá Crispo jíin Gayo-ni, ¹⁵ návāha ma cahán ni ñin ró jéē jíin síhvī rí ni jendute ró. ¹⁶ Te sá núcūhun ni rī jeē suni ni scuándute ri Estéfnas jíin ñayuu vehe de. Te sanaa te súcuan-ni cúu ñayuu ni scuándute ri, jéni ni rī. ¹⁷ Chi tu ní téjñíñu Cristo ruhū jeē scuándute ri, chí sa suhva jeē nácani ri jnūhun jeē jnáma ya ñayuu. Te tu ní ndúcú rí jeē steén rī nuū rō ñin modo ndichí jéē ma jécūhun ni rō, chí núu súcuan te ma cúu jecūhun vāha ni rō jnūhun jeē ni jíhī Cristo jicā cruz.

Jíin Cristo ni steén Yaā Dios poder yā jíin jnūhun ndíchí yá

¹⁸ Te jnūhun jeē ni jíhī yā jicā cruz jeē jnáma ya ñayuu, chí jnūhun cánéé íi cúu nuū ñayuu cuango nuū jnahnú ndetū. Te máá yó jeē cuahán yō nuū cácu yó, chí jíin yō jeē jnūhun Yaā Dios jeē ndíso poder cúu. ¹⁹ Chi suhva yósó núu tútu iī jeē ni cáhān Yaā Dios: Na snáa rī jnūhun ndíchí cácahān ñayuu ndichí cuenta ñayīvi yáha, te ma cuatáhú rí jnūhun cácahān ñayuu jeē jéni ni jeē jíin vāha. Achí yá.

²⁰ Núu súcuan ¿te ndé cuajñíñu tēe ndíchí cuenta ñayīvi yáha, jíin tēe cástéén tutu, jíin tēe cánanducú yúcún síquī jeē steén ñayuu ñayīvi yáha? Chi táca jnūhun ndíchí cuenta ñayīvi yáha, ni cáhān Yaā Dios jeē jnūhun cánéé íi cúu. ²¹ Te yōhoyo ndíchí sáha Yaā Dios. Chi táca jnūhun ndíchí cájini ñayuu ñayīví, ni cachi ya jeē tu jéjñíñu jeē cúni i ndese Yaā

cúu ya. Yūcuán na te ni nujnahan ni yā jeē jíin jnúhun ya jeē cánacani ri te jnama ya ñayuu cácanáje, vésú cájeni ni ñayuu ñayívi jéē jnúhun cánéé íi cúu.

²² Chi ñayuu hebreo, máni cácani i jeē sáha Yaā Dios cuehē jniñu jéhu jeē steén poder yā. Te ñayuu griego chi máni síquī jnúhun ndíchí cándihvī ni i. ²³ Te máá rí chi sa suhva cánacani ri jnúhun jeē ni jíhī Cristo jicā cruz jeē jnáma ya ñayuu. Te jnúhun yáha sáha jeē jnánini ni ñayuu hebreo, te ñayuu tāca gá nación chi cájeni ni i jeē jnúhun cánéé íi cúu. ²⁴ Te ñayuu jeē ní cana ya ni quívicoo ndaha ya, vésú ñayuu hebreo chí ñáyuu griego, chi jíni i jeē jíin Cristo ni steén Yaā Dios poder yā jíin jnúhun ndíchí yá. ²⁵ Chi jnúhun Yaā Dios jeē cácahān ñayuu jeē jnúhun cánéé íi cúu, yōhyo ndíchí gá vésú jnúhun ndíchí ñáyuu. Te cájeni ni ñayuu jeē tú na poder yā ná ni jihī Jesús jeē jnáma ya yohó, te tuú chi nihin téyí gá poder yā ún vésú poder ñayuu. ²⁶ Hermano, máá ró cácuu jeē ní cana ya ni quívicoo ró ndaha ya. Te condēhe ró jeē tú cuehē rō ndichí jíin jnúhun ñayívi, ni tú cuehē rō cándacu jniñu, ni tú cuehē rō cácuu sēhe ñayuu kujéhu. ²⁷ Chi sa suhva ni nacāji Yaā Dios tāca jéē cácahān ñayuu ñayívi jéē tu ndíchí cuítī, návāha coo jnúhun canu nuū tāca jéē ndichí. Te ni nacāji ya ñayuu tu téyí ini ñayívi, návāha coo jnúhun canu nuū ñayuu teyí. ²⁸ Te suni ni nacāji Yaā Dios tāca jéē tu cújéhu ini ñayívi, jíin tāca jéē sajéē ni i nuū, nde jíin tāca jéē tú jniñu cájeni ni i, návāha snúu ya tāca jéē kujéhu ini ñayívi. ²⁹ Súcuan ni sáha ya návāha ni ñin ñayuu ma cúu sátéyí i máá i nuū yā. ³⁰ Te máá ró jijnáhan ró chi ni sáha Yaā Dios jeē nduú ró jíin Cristo Jesús. Chi nde nuū maá yá ni canihin yō jnúhun ndíchí, te ni ndahva yā cuēchi yó, te ni sáha ya jeē iyó ndoo íyó íi yō nuū yā, chi ni jnama ya yohó. ³¹ Te jeē yúcuan na cóo nájnuhun cáhān tutu íi: Núu ñin ñayuu cuní i cutéyí i, te na cutéyí i síquī jeē ni sáha máá Jítoho yō jehē i, áchí.

Jeē nácani Pablo jnúhun jeē ni jíhī Cristo

2

¹ Te ruhū, hermano, ná ni jeē rī nuū rō jijnáhan ró jéē nácani ndaā rī jnúhun Yaā Dios, te tu ní nácani ri jnúhun ndíchí jéē ma jécūhun ni rō. ² Chi ná ni iyo ri jíin ró te tú na inga jnúhun ní ndúcú rí castūhun rí nuū rō, chi máni máá jnúhun Jesucristo jeē ni jíhī yā jicā cruz jeē jnáma ya yohó. ³ Te ná ni jinū rī nuū rō jijnáhan ró, chi tú na fuerza rī, te yúhú rí, te quísi i ruhū. ⁴ Te ná ni nacani ri jnúhun nuū rō, chi nasūu jíin jnúhun ndíchí ñáyuu ñayívi ní scándíje ri rohó, chi sa suhva jíin máá poder Espíritu yā ni steén rī nuū rō jijnáhan ró, ⁵ návāha ma cuíñi ró síquī jnúhun ndíchí cácahān ñayuu, chi cuíñi ró síquī poder Yaā Dios.

Jíin Espíritu te stéén Yaā Dios ndese Yaā cúu ya

⁶ Te ndaā chi ndíchí cácahān rī jíin ñáyuu jeē jé ni ije jíin jnúhun cándíje i ya. Te nasūu jnúhun ndíchí jéē iyó ini ñayívi yáha, ni nasūu jnúhun ndíchí cácahān tēe cácujeñu ñayívi yáha, chi tēe ún yāha-ni jeē cácujeñu de. ⁷ Chi jnúhun cácahān rī cúu jnúhun ndíchí máá Yaā Dios jeē ní yisāhí. Chi jnúhun ndíchí un jéē ní yisāhí, ni jequin Yaā Dios nde ná tu jecōo ñayívi, návāha cácu yó jéē cótecu yō ní cáni sáha jnúhun ún. ⁸ Chi ni ñin tēe cújéhu nuū ñayívi yáha, tu ní jécūhun ni de jnúhun ndíchí un. Chi núu ni jecūhun ni de núu, te ma cáhni cuítī de máá Jítoho yō, Yaā kujéhu luu. ⁹ Chi cúu nájnuhun cáhān tutu:

Tāca jéē ni sátūhva Yaā Dios jeē cúu ñayuu jeē maní jíin yá,
ni ñin ún tu ní jíto jínúu ñayuu, ni tu ní jíni sōho i,
ni tu ní quíji jeē súcuan cani ni i.

Achí tutu. ¹⁰ Te máá yó jijnáhan yó chi ni steén Yaā Dios tācá un núu yō jeē jíin Espíritu yā. Chi máá Espíritu jíni vāha ya te stéén yā ndíhi, chi nde ndíhi jeē ndichí gá máá Yaā Dios.

¹¹ Chi ni ñin ñayuu ma cúu cuni i ndese jéni ni inga ñayuu, chi máá-ni i jíin ánuá i cúu jeē jíni. Te suni súcuan ni ñin ñayuu tu jíni i ndese jéni ni Yaā Dios, chi máá-ni Espíritu Yaā Dios cúu jeē jíni. ¹² Te máá yó chi ni nihin yō Espíritu un jéē véji nuū Yaā Dios, te tu cájeni ni yō nájnuhun cájeni ni ñayuu ñayívi. Te jeē yúcuan cúu jeē cájécūhun ni yō

ndese ni sáha Yaā Dios jeē váha yóhó síquī jeē váha ni yā. ¹³ Te suu síquī tāca jēē yáha cúu jeē cácahān rī, te nasūu jíin jnúhun jeē castéén ñayuu ndichí, chi jíin jnúhun jeē steén maá Espíritu. Chi cástéén rī jnúhun Espíritu nuū ñáyuu cánevāha Espíritu.

¹⁴ Te ñayuu ñayīví tu cájetáhu i tāca jnúhun jeē véji nuū Espíritu Yaā Dios, chi cájeni ni i jeē jnúhun cánéé íi cúu. Te ma cúu jecūhun ni i, chi tu cánevāha i maá Espíritu jeē sáha jeē jécūhun ni i. ¹⁵ Te ñayuu cánevāha Espíritu, chi cájecūhun ni i ndese íyó ndíhi-ni. Te ñayuu ñayīví ma cúu jecūhun ni i ndese ñayuu cácuu ñayuu ún. ¹⁶ Chi suhva cáhán tutu íi: ¿Ndé ìin cuu cuni ndese jéni ni maá Jítóho yō? ¿Te ndé ìin cuu stéén nuū yā? Ni ìin ma cúu. Achí tutu. Te vēsú súcuan te maá yó chi cájeni ni yō nájñuhun jéni ni Cristo.

Jeē cáchindéé ñájñahan de cájejniñu de nuū Yaā Dios

3

¹ Te ruhū, hermano, tu ní cúu cahān rī jíin ró jijnáhan ró nájñuhun cáhán rī jíin ñáyuu jíca jíin Espíritu. Chi ni cahān rī jíin ró nájñuhun jíin ñáyuu cájica jíin modo maá, chi cácuu ró nájñuhun sūchi lúlí jēē ná tu ije ró jíin jnúhun Cristo. ² Ni steén rī nuū rō jeē tú yí, chi cácuu ró nájñuhun sūchi lúlí jēē jéxin gā. Te tu ní cáhán rī jíin ró jnúhun yí jeē cúu nájñuhun jeē ndáva jeē yéji ñayuu ni ije, chi ná tu canda ró jíin ndé saá. Te ni vijna ná tu canda ró jíin. ³ Chi cájica ga rō jíin modo neé maá ró. Chi cáccuésún ni rō, te cácajnáhan ró, te cácusñin ni rō. Núu súcuan te cácuu ró nájñuhun ñayuu ñayīví jēē cájica jíin modo neé maá. ⁴ Chi ìin ró cáhán: Ruhū chi jíin Pablo índichi rī. Te inga rō cáhán: Ruhū chi jíin Apolos. Te súcuan cúu jeē cájica ró jíin modo neé maá ró

⁵ ¿Te ndé ìin cúu ruhū, te ndé ìin cúu Apolos núu súcuan? Chi maá mozo-ni Yaā Dios cácuu ri, te ni jejniñu ya ruhū návāha candíje ró maá Jítóho yō. Chi ná ìin ná ìin ri ni sáha jniñu ndese ni jēhe maá Jítóho yō nuū rī. ⁶ Ruhū, nájñuhun ni taji ri jnúhun ya ini anuá rō, te Apolos, nájñuhun ni chuhun de ndute cúu jeē ní steén gā de nuū rō. Te maá Yaā Dios cúu jeē ni scuéhnu jnúhun ini anuá rō. ⁷ Núu súcuan te tú na vé cúu sáha tēe táji ni tēe chúhun ndute, chi sa suhva maá Yaā Dios cúu jeē scuéhnu. ⁸ Te tēe táji jíin tēe chúhun ndute, ìin-ni cácuu de. Te tācá de chi cuāha ya yāhu nuū de ndese jniñu ni casáha ìin ìin de. ⁹ Chi ruhū jijnáhan ri chi tēe chindéé ñájñahan cájejniñu nuū Yaā Dios cácuu ri. Te maá ró jijnáhan ró cácuu nájñuhun itu Yaā Dios jeē jícu ya jíin.

Te suni nájñuhun ìin vehe jeē sáha Yaā Dios cácuu ró. ¹⁰ Te ruhū chi cúu ri nájñuhun ìin maestro albañil jeē ní jequin rī cimientu vehe ún, cúu jeē ni scándíje ri rohó. Te inga de cásama de síquī, cúu jeē castéén gā de nuū rō. Núu súcuan te ná ìin ná ìin de na cóo cuidado de ndese sáma de síquī. ¹¹ Te Jesucristo cúu cimientu vehe ún, te ni ìin ma cúu caquin inga cimientu, chi maá yá cúu jeē ní ndahva cuēchi ró. ¹² Te tāca ñáyuu cácañíje, chi sáha i vehe síquī cimientu un, núu jíin ndajniñu vāha nájñuhun oro chí plata chí yúu luu, chí jíin jēē yachí naa, nájñuhun yujnu chí ite chí ndayóhō. ¹³ Te natūu jniñu un jēē ní sáha ìin ìin i, te suu cúu ndese ni condíhvī ni i síquī maá yá. Chi maá quívī juicio jeē sándaā yā jniñu ñayuu, quívī ún natūu cáji jniñu i. Chi jíin ñúhūn quiiji quívī ún, te nájñuhun sáha ñuhūn jeē jéhmū tāca jēē cúu cayū, súcuan coto ndee ya jniñu ìin ìin i. ¹⁴ Te núu tú cayū jniñu ní sáha i síquī cimientu un, te nihīn i tahū i. ¹⁵ Te núu tu ní condíhvī ni i jíin jniñu ya, te ma nihín i tahū i, chi nájñuhun cayū jniñu i. Te maá i chi cácuu ánuá i, vēsú nájñuhun je yajni cayū i nuū yáñuhūn.

¹⁶ ¿A tu cájini rō jeē cácuu ró nájñuhun templo Yaā Dios, chi ndéé Espíritu Yaā Dios ini anuá rō? ¹⁷ Te núu ìin tēe stívi de templo Yaā Dios, te snáhnú ndetū yā tēe ún. Chi ndo ndasí cúu templo yā, te suu cácuu maá ró.

¹⁸ Ni ìin ró ma stahú ró maá ró jíin jēē jéni ni rō. Núu ìin ñayuu jéni ni i jeē ndichí i jíin jnúhun ñayīví yáha, vāha ga na siáā i ún, návāha coo ndíchí ndíje i jíin jnúhun maá yá. ¹⁹ Chi jnúhun ndíchí jēē iyó ini ñayīví yáha, jnúhun cánéé íi cúu nuū Yaā Dios. Chi cáhán nuū tútu íi: Ñayuu ndichí cuenta ñayīví, chi nájñu ya i síquī jnúhun ndíchí i jeē jési i jnúhun ya, achí. ²⁰ Te cáhán tucu tutu: Maá Jítóho yō jiní yā tāca jēē jéni ni ñayuu ndichí, chi máni jeē jéni cáhá ni i, áchí. ²¹ Núu súcuan te ni ìin ró má cutéyí ró jeē síquí

ni ñin tēe ndíhí. Chi cuenta maá ró cúu ndíhi-ni. ²² Cúu Pablo, cúu Apolos, cúu Pedro jeē castéén nuū rō. Cúu ndíhi jeē iyó ini ñayíví, jeē iyó vijna jíin jéē quíji. Te vésú núu cotecu rō chí cuu rō, te ndíhi-ni chi cuenta maá ró cúu. ²³ Te maá ró cácuu cuenta Cristo, te Cristo cúu cuenta Yaā Dios.

Jeē casájniñu apóstol siquī jnúhun ya

4

¹ Núu súcuan te na cáni ni rō jijnáhan ró jeē mozo-ni nuū Cristo cácuu ri, jeē ní tejniñu ya ruhū jeē steén rī jnúhun Yaā Dios jeē ní yisáhi ndé jenahán. ² Te ndaā chi tēe jeē sájniñu siquī ún, íyó responsable ná ñin ná ñin de jeē squícu vāha de. ³ Te ruhū tu sáha ri cuenta núu cánanducú ró siquī rī ndese sáha ri, chí núu cánanducú ñáyuu cácutéyí ini ñayíví. Te ni máá rí tu chíhi ri cuenta siquī maá rí. ⁴ Chi vésú jíin rī jíin ánuá rī jeē tú na cuēchi ri, te nasūu yúcuan cúu jeē quéndōo ndaā rī, chi máá Jítóho yō cúu jeē jító ndee ruhū. ⁵ Jeē yúcuan ma nánducú ró siquī jniñu jnáhan ró, chi nde na quéē maá quívī te cuni rō. Chi nde na ndíji máá Jítóho yō te nastúu ndijin yā tācá jniñu jeē yísáhi núu néé, te steén ndijin yā tāca jéē jéni ni ñayuu jíin ánuá i. Yūcuán na te máá Yaā Dios cuajnúhún yá ná ñin ná ñin i ndese ni casáha i.

⁶ Hermano, tāca jnúhun yáha ní cahān rī návāha quendōo vāha ró jíjnáhan ró. Te ni cachi rī jeē maá rí jíin Apolos cácuu ri mozo-ni nuū yā, te súcuan cácuu ri ñin ejemplo nuū rō. Te cáhán rī jeē súcuan cácuu ri, návāha cutūhva ró caní ni rō maá-ni nájnuñun cáhán tutu i. Chi ma sandúxí ró jeē cuajnúhún ró ñin tēe steén, te inga de tuú. ⁷ ¿Te naun cácutéyí ró nuū jnáhan ró núu súcuan? ¿Te na vé cúu jeē iyó núu rō jeē tu ní cácutahū rō nuū yā? Te núu ni cacutahū rō nuū yā, ¿te naun casátéyí ró maá ró jeē nájnuñun jeē nasūu jéē ní cacutahū rō cúu?

⁸ Va je ni cacucúca ró, chi je cánevāha ró ndíhi, cájeni ni rō. Te je cándacu máá ró jniñu, te ni tuá cájini ñúhún ró ruhū, cájeni ni rō. Tú vāha jeē súcuan cácutéyí ró. Te nacā jeē vāha núu jeē cándacu ndije nde ró jniñu núu, návāha suni cuāha ró jnúhun jeē ndacu nde ri jniñu jíin ró jijnáhan ri. ⁹ Te íyó jéni ni rī jeē ruhū tēe cácuu apóstol, ni sáha Yaā Dios jeē cácuu ri nájnuñun tēe núu ga nuū ñáyuu, nájnuñun tēe jeē jé ni cundaā jeē cúu. Te ní ñáyíví jíin andiví cándēhe vāha nuū rī, cúu ndajéhé Yaā Dios jíin ñáyuu. ¹⁰ Chi jeē siquí Cristo te cácahān i jeē tēe cánéé cácuu ri. Te tāca rōhó va ndíhí ró jíin jnúhun Cristo, cájeni ni rō. Te tāca rúhū chi tu fuerza rī, te rōhó va íyó fuerza rō, cájeni ni rō. Te rōhó chí cáhiyo yíñuhún ñáyuu nuū rō, te nuū rī chí casájéé ni i. ¹¹ Ní véjicoo ri cájii rī sōco te nde vijna. Te cájichí rī ndute, te cúmaní sahma ri, te tu casáha vāha ñayuu jíin rí, te ni tu cánevāha ri vehe. ¹² Te níhin casájniñu ri jíin ndaha ri. Cácahān neé i nuū rī, te cácahān vāha ri jíin i. Cájito xeēn i ruhū, te cájendeyí ni rī. ¹³ Cácahān neé i siquī rī, te sa cácahān maní rī jíin i. Te cácuu ri nájnuñun yācá ini ñayíví, te casquéhichí i ruhū nde vijna.

¹⁴ Te nasūu jéē tēe ri yāha jéē cúcanu rō, chí sa suhva jeē stíhví ni rī rohó, chí cácuu ró nájnuñun sēhe ri chí maní rī jíin ró. ¹⁵ Chi vésú na cóo uxí mil tēe steén jnúhun Cristo nuū rō, te ñin-ni tátá rō iyó. Te máá rí cúu nájnuñun tátá rō, chí ni scandíje ri rohó jéē ní nacani ri jnúhun vāha Cristo Jesús jeē jnáma ya yohó. ¹⁶ Núu súcuan te cáhán ndahú rí jíin ró jeē na ndácu ró rúhū jijnáhan ró.

¹⁷ Te jeē yúcuan cúu jeē tají rí Timoteo cuajeē de nuū rō. Chi cúu de nájnuñun sēhe ri jeē maní rí jíin de, te squícu vāha de nuū maá Jítóho yō. Te máá de nacachi tucu de nuū rō ndese jíca ri jeē candíje ri Cristo, jíin ndese steén rī nuū tāca grupo ñayuu cácañíje tāca lado. ¹⁸ Te sava ró chí casátéyí ró maá ró, chí cájeni ni rō jeē ma jéé cuítí gā rī nuū rō. ¹⁹ Te tuú chí yachí jeē rī nuū rō te núu súcuan cúní maá Jítóho yō. Yūcuán na te nanducú rí siquī tēe cácutéyí, te ma sáha ri cuenta jnúhun cácahān-ni de, chí sa coto ndee rī de núu cuu squícu nde de. ²⁰ Chi jeē ndácu Yaā Dios jniñu nuū yō, nasūu máá jéé cahán i-ni yó cúu, chí jíni ñúhún condiso poder jnúhun cáhán yō jíin jniñu sáha yó. ²¹ Núu súcuan

¿te ndese cácu ni rō? ¿A jēē cuxeēn rī nuū rō núu na jéé rī, siquī jeē tu cánacani ni rō, chí nacani ni rō te jeē rī jíin jnúhun cúndáhú ni jíin jnúhun vítá ni?

Jeē sándaā Pablo siquī ñin cuēchi

5

¹ Te ni nihīn rī jnúhun jeē jíca jnéni ñin tēe jeē íne mēhñu ró, chi ndéca de naná uū de. Te xeēn ndasí sáha tēe ún, chi ni ñayuu jeē tu cájini jnúhun Yaā Dios, tu casáha i súcuan. ² Te vēsú súcuan te casátéyí ró maá ró jijnáhan ró. Váha ga jeē na cúcuíhyá ndasí ni rō. Te cánuú jéē na quénehen ró tēe sáha cuēchi ún na quénda de mēhñu ró. ³ Te ruhū, vēsú tu íyó rí jíin ró, te nájnūhun jeē iyó rí jíin ró cúu jeē ñúhún ni rī rohó. Te je ni sándaā rī siquī tēe ni sáha cuēchi ún, chi nájnūhun jeē iyó rí jíin ró cúu. ⁴ Núu súcuan te na ndútútú ró jijnáhan ró, te máá Jítóho yō Jesucristo coo ya jíin ró. Te máá rí chi nájnūhun cone rí jíin ró, chí ñúhún ni rī rohó. Te poder maá Jítóho yō Jesús suni coo jíin ró. ⁵ Te na chíhi yó tēe ún ndaha Satanás, náváha na ndóho yiqui cúñu de, te nacani ni de te cācu ánuá de quivī ndiji Jítóho yō Jesús.

⁶ Tuú váha jeē casátéyí ró maá ró. ¿A tu cájini rō jnúhun cáhán suhva? Vēsú jecu-ni levadura te ndáa ní ñujen sáha, áchí. ⁷ Núu súcuan te quenehen ró tēe un nájnūhun scáne ró levadura jeē ni tívi. Te súcuan te cuu ró nájnūhun pan jeē cúváha jíin ñujen jéé jéé tú na levadura yíhi, jeē cáyeji i vico pascua. Te ndaā jeē súcuan cácuu ró. Chi je ni jihī Cristo jeē ni sócō yā maá yá jehē yō, chí cúu ya nájnūhun londe pascua jeē ni jíhi. ⁸ Núu súcuan te na cócūhun ni yō ndese ni cuu vico pascua un, te na cóo ndije ndaā anuá yō, te suu cúu nájnūhun pan jeē tú na levadura yíhi. Te ma sáha yó jniñu néé jíin jniñu jnéhén, jeē cúu nájnūhun levadura jeē ni tívi.

⁹ Nuū ñnga carta jeē ní tee ri nuū rō jijnáhan ró ni cahān rī jeē ma quíví nduu rō jíin ñáyuu cájica jnéni. ¹⁰ Te tu ní cáchi rī jeē ma quíjnanhan cuítí rō jíin ñáyuu tu cácadíje jeē cájica jnéni, jeē ndíyo ni, jeē sácúíhná, jeē chíñúhún ídolo. Chi núu súcuan te jíni ñúhún jeē quénda ró ini ñayívi núu, chí tuá na ñnga modo jeē cújiyo ró núu i chí ndéé yó ñayívi jíin i. ¹¹ Chí sa suhva ni cachi rī jeē ma quíví nduu rō jíin máá ñáyuu jeē cácahān i jeē cúu i hermano, te núu jíca jnéni i, chí ndíyo ni i, chí chíñúhún i ídolo, chí chísó jnúhun i siquī jnáhan i, chí nájini i, chí cuíhná i. Te ni ma cáji cuítí rō staā jíin ñáyuu casáha súcuan. ¹²⁻¹³ Chí nasúu jniñu rí cúu jeē sándaā rī siquī ñáyuu jeē tu cáhiin jíin yó. Yaā Dios cúu jeē sándaā siquī i. Te ñayuu cáhiin jíin ró chí cánuú jéē sándaā rō siquī i. Núu súcuan te cánuú jéē quénehen ró tēe ni sáha cuēchi un jéé íne de mēhñu ró, na quénda de.

Jeē ma cáquin i cuēchi siquī jnáhan i nuū tohó tu cácadíje

6

¹ Te núu jnáhan ró jéē candíje ni sáha cuēchi siquī rō, ¿te naun jéngoo ró jíin de nuū tohó jeē tu cácadíje jíin yó? ¿Te naun tu casándaā rō nuū jnáhan ró cácadíje Yaā Dios? ² ¿A tu cájini rō jeē ñáyuu cácadíje Yaā Dios chí ñin quivī te sándaā i jniñu ñayuu ñayívi? Te núu ñin quivī sándaā rō jniñu ñayuu ñayívi, ¿te á má cúu sándaā rō vijna siquī tāca cuéchi lúlí casáha jnáhan ró? ³ ¿A tu cájini rō jeē ñin quivī te sándaā yō nde jniñu tāca ndajéhé andívi? Te nagā ni cuu jniñu ñayívi yáha jeē ma cúu sándaā yō. ⁴ Núu súcuan te núu jnáhan ró sáha de ñin cuēchi siquī rō, ¿te naun jéngoo ró sa nuū tāca tēe jeē tu cúu de jnáhan ñayuu cácadíje jeē sándaā de siquī cuéchi ún? ⁵ Súcuan cáhán rī náváha na cúcanu rō jijnáhan ró. ¿A tu íyó ni ñin tēe jécūhun ni mēhñu ró jeē cuu sándaā de siquī rō? ⁶ Tú váha jeē ñin hermano caquin cuéchi siquī ñnga hermano nuū tohó jeē tu cácadíje.

⁷ Te jeē cájequin rō cuēchi siquī jnáhan ró, chí jeē castívi íi rō cúu. ¿A tú váha ga cuandeyí ni rō na sáha i cuēchi siquī rō chí quende i ndajniñu ró? ⁸ Te tuú chí sa máá ró casáha cuēchi te cáquende ró ndajniñu, te nuū tāca hermano rō cúu jeē casáha ró.

⁹⁻¹⁰ ¿A tu cájini rō jeē ñáyuu tu íyó ndāā, ma nihín tahú i quívi i ñuu nuū ndácu Yaā Dios jniñu? Ma stahú ró maá ró cani ni rō jeē nihín tahú rō, chi ni ñayuu jeē jíca jnéni, ni ñayuu chiñúhún ídolo, ni ñayuu casíquí ndéē jnáhan, ni tēe sáha ndiyí jíin jnáhan yí, ni ñayuu cuihná, ni ñayuu ndíyo ni, ni ñayuu nájini, ni ñayuu chisó jnúhun síquí jnáhan, ni ñayuu stahú jnáhan síquí xúhun, ma nihín tahú i quívicoo i ñuu nuū ndácu Yaā Dios jniñu. ¹¹ Te súcuan ni candāa sava ró núú, te vijna chi je ni nacate ya rohó, te cáhiyo ndoo cáhiyo íi rō nuū yā. Chi je ni ndahva yā cuēchi ró jéē jíin máá Jítoho yō Jesús jíin Espíritu Yaā Dios.

Jeē íyó ndoo íyó íi yíqui cúñu ñayuu cávandíje

¹² Te ndaā cúu jeē cácahān jeē ndíhi-ni jniñu íyó váha sáha yó núu ndese cúni yō. Te vésú súcuan te nasúú ndíhi sáha jeē quéndōo váha ánuá yō. Ndíhi chi cuu sáha yó, te vésú súcuan te tu íyó váha jeē quívi yó núu jniñu jeē stívi ánuá yō. ¹³ Te ndaā cúu jeē cácahān jeē ndeyu cúu jeē cúhun chíji, te chíji cúu jeē cúhun ndeyu. Te íin quívi te tuá coo súcuan, chi naa ndíndúú un sáha Yaā Dios. Te nasúu síquí jeē cáca jnéni yó cúu jeē íyó yíqui cúñu yō, chi sa suhva jeē sáha yó jéē cúni máá Jítoho yō. Te Jítoho yō chi ndíto ya yíqui cúñu yō. ¹⁴ Te nájñuhun jeē ní nastécu Yaā Dios Jítoho yō, suni súcuan nastécu yā yohó jíin poder yā.

¹⁵ ¿A tu cájini rō jeē yíqui cúñu tāca íin íin ró cúu nájñuhun tāca parte yíqui cúñu Cristo? Núu súcuan ¿te á cuu quende yó íin parte yíqui cúñu Cristo te squíjñahan yó jíin íin ñahan jíca jnéni? Ma cúu cuiti súcuan. ¹⁶ ¿A tu cájini rō jeē tēe quíjñahan jíin ñahan jíca jnéni, íin na yíqui cúñu ni nduu de jíin ña? Chi cáhan tutu íi: Jeē ndíndúú chi íin na yíqui cúñu cuu, áchí. ¹⁷ Te ñayuu jeē quíjñahan jíin máá Jítoho yō, chi suni súcuan íin na cúu i jíin yá síquí jeē candíje i ya.

¹⁸ Núu súcuan te cunu ró jéē ma quívi ró núu jnúhun jíca jnéni. Chi tāca gá cuēchi jeē sáha ñayuu, chi nasúú yíqui cúñu i stívi i. Te núu jíca jnéni i, te síquí yíqui cúñu i cúu jeē sáha i cuēchi. ¹⁹ ¿A tu cájini rō jeē yíqui cúñu rō cúu templo Espíritu Santo jeē ni jéhe Yaā Dios nuū rō, te ndéé yá ini rō? Te nasúu cuenta maá ró cácuu ró. ²⁰ Chi Yaā Dios yahu ni cuu jeē ní nacuaan ya rohó jíjñahan ró. Te jeē yúcuan cánuú jéē cáca yíñúhún ró nuū Yaā Dios jeē sáha ró jniñu váha nde jíin yíqui cúñu rō jíin ini jíin ánuá rō, chi máni cuenta Yaā Dios cúu.

Jnúhun cástúhun síquí tēe jíin ñasíhí

7

¹ Vijna te na cáchi rí síquí tāca jnúhun jeē ní cacajñuhun ró ruhū nuū carta. Jendaá jeē váha ga quendōo íin tēe núu tú condeca de ñahan. ² Te síquí jeē íyó jnúhun jnéni, te váha ga jeē tāca tēe na cóo ñasíhí máá de, te suni tāca ñahan coo yíi máá ña. ³ Te yíi na squícu váha de nuū ñasíhí de jeē cúu de yíi ña. Te suni súcuan ñasíhí na squícu váha ña nuū yíi ña. ⁴ Chi ñasíhí chi tu cúu sáha ña jeē cúni ña jíin yíqui cúñu ña, chi suni jeē cúni yíi ña. Te suni súcuan yíi tu cúu sáha de jeē cúni de jíin yíqui cúñu de, chi suni jeē cúni ñasíhí de. ⁵ Te ma sasáhán ró maá ró nuū jnáhan ró. Te núu cácuu rō jeē vihyá gā cacān tahú rō jecu tiempo, te núu cáhiyo conforme ndíndúú ró, te cuu sasáhán ró maá ró nuū jnáhan ró. Te yūcuán na te váha ga naquíjñahan tucu ró, návaha ma cóto ndee Satanás rohó síquí jnúhun jnéni.

⁶ Te nasúu jéē ndácu ri jniñu jeē cánuú quíjñahan ró, chi jeē jéhe ri jnúhun cúu. ⁷ Chi nújñahan ni rí jeē tāca tēe na cóo máá íin-ni de, nájñuhun íyó máá rí. Te sín sín ni sáha Yaā Dios jíin íin de ndese cúu máá de, chi sava de cuu quendōo máá íin-ni de, te inga de chi tuú chi sín ni sáha ya jíin de.

⁸ Núu súcuan te cáhan rí jíin ñáyuu cáhiyo máá íin-ni, jíin ñahan ní caquendōo ndáhú, jeē váha ga te núu quendōo máá íin-ni i, nájñuhun íyó máá rí. ⁹ Te núu jíní i jeē ma cánda í quendōo máá íin-ni i, te na quíjñahan i núu súcuan. Chi váha ga jeē quíjñahan i vésú jeē ndúquiji i.

¹⁰ Te nuū ñayuu jeē jé ni quijnáhan chi ndácu ri jniñu jeē ñahan ma ndusín ña jíin yíi ña. Te nasūu rúhū cúu jeē ndácu jniñu, chi máá Jítóho yō. ¹¹ Te núu ñin ñahan ndusín ña jíin yíi ña, te na quéndōo máá ñin-ni ña, chí cuu naquijnáhan ña jíin yíi ña. Te yíi suni ma ndusín de jíin ñasihí de.

¹² Te jíin sava ga ñayuu chi cahān rī yāha jéē jéni ni maá rí, te nasūu jéē ní cachi maá Jítóho yō cúu. Núu ñin hermano ndéca de ñahan jeē tu cándíje, te núu nújnahan ni ña condee ña jíin de, te ma ndusín de jíin ña. ¹³ Te núu ñin ñahan ndéca ña tēe jeē tu cándíje, te núu nújnahan ni de condee de jíin ña, te ma ndusín ña jíin de. ¹⁴ Chi tēe tu cándíje, yíhi cuenta de nuū Yaā Dios siquī jeē ní quijnáhan de jíin ñahan cándíje. Te ñahan tu cándíje, yíhi cuenta ña nuū Yaā Dios siquī jeē ní quijnáhan ña jíin tēe cúu hermano candíje. Chi núu tu súcuan te sēhe i ma quíhi cuenta i nuū Yaā Dios, te vijna chi yíhi cuenta i nuū yā. ¹⁵ Te yíi chí ñasihí tu cándíje, núu fuerza cuní i ndusín i jíin jnáhan i, te na ndúsín i. Chi núu súcuan cuní i, te hermano chí hermana candíje tu cánuú casi i jeē ndusín jnáhan i jeē tu cándíje. Chi ni cana Yaā Dios yohó jéē condee manī yō jíin jnáhan yó. ¹⁶ Te rōhó jéē cácuu ñasihí, tu cájini rō, sanaa te candíje yíi ró sáha ró, te cācu de. Te suni súcuan rōhó jéē cácuu yíi, tu cájini rō, sanaa te candíje ñasihí ró sáha ró, te cācu ña.

¹⁷ Te ná ñin ná ñin ró na quéndōo ró ndese ni sáha Jítóho yō jeē cúu ró, jíin ndese íyó ró ná ni cana ya rohó ní candíje ró. Te súcuan ndácu ri nuū tāca grupo ñayuu cáncandíje. ¹⁸ Núu ni cana ya ñin tēe jeē ní cuu circuncidar, te súcuan na quéndōo de. Núu ni cana ya ñin tēe jeē tu ní cúu circuncidar, te ma cúu de circuncidar. ¹⁹ Chi tú na vé sáha núu cúu yó circuncidar chí tuú, chi jeē cánuú gá cúu jeē na squícu vāha yó jniñu cuní Yaā Dios. ²⁰ Ná ñin ná ñin ró na quéndōo ró ndese íyó ró ná ni cana ya rohó ní candíje ró. ²¹ Núu mozo jeē ní jeen ñayuu cúu ró ná ni cana ya rohó, te ma cóndihvī ni rō jeē quénda ró. Te núu íyó modo jeē quénda ró nduu libre rō, te íyó váha jeē sáha ró. ²² Chi tēe cúu mozo jeē ní jeen ñayuu, te núu ni cana Jítóho yō de, te vijna chi ni nduu libre de nuū cuéchi de, jéjníñu de nuū maá Jítóho yō. Te suni súcuan tēe sájniñu cuenta maá, te núu ni cana ya de, te vijna chi ni nduu de mozo jejniñu nuū Cristo jeē ní nacuaan ya de. ²³ Chi yahu ni cuu jeē ní nacuaan Yaā Dios rohó jijnáhan ró, cúu jeē ni jíhi Sēhe ya jehē rō. Núu súcuan te ma cuajniñu ró núu jniñu cāhá-ni jeē ndácu ñayuu ñayívi. ²⁴ Núu súcuan hermano, ná ñin ná ñin ró na quéndōo ró núu Yaā Dios ndese íyó ró ná ni cana ya rohó.

²⁵ Te vijna te siquī ñayuu jeē íyó máá-ni, tú na jnūhun ní ndácu Jítóho yō nuū rī. Te na cáhān rī jeē jéni ni maá rí, chí ni cundáhú ni Jítóho yō ruhū, te ni sáha ya jeē cúu cahān ndaā rī. ²⁶ Jéni ni rī jeē vāha-ni núu quendōo-ni tēe ndese cáhiyo de, jeē siquí jeē íyó jnundóho tiempo yáha. ²⁷ Núu íyó ñasihí ró, te ma ndusín ró jíin ña. Te núu tu íyó ñasihí ró, te ma nducú ró ña. ²⁸ Te núu quijnáhan ró, te nasūu cuéchi cúu. Te núu quijnáhan sūchi síhi, te suni nasūu cuéchi cúu. Te ñayuu quijnáhan, chí nihīn i jnundóho ñayívi yáha, te cuní rī jeē ma nihín rō jnundóho.

²⁹ Hermano jijnáhan ró, jnūhun jeē cahān rī yāha cúu jeē yachī-ni ndíhi tiempo jeē sáha yó jniñu ya. Núu súcuan te nde vijna te tēe íyó ñasihí, na cóndihvī gā ni de siquí jniñu máá yá vésú siquī ña. ³⁰ Te ñayuu jeē ni jíhi jnáhan vehe i, na sáha i nájnūhun jeē tu cúcuíhyá ni i. Te ñayuu cúsiñ ni, na sáha i nájnūhun jeē tu cúsiñ ni i. Te ñayuu jéen, na sáha i nájnūhun jeē nasūu ndajniñu i cúu. Ma cuáha i jnūhun jeē cási tācá un jéē ma cúu condihvī ni i jniñu máá yá. ³¹ Te ñayuu jeē ní cacondihvī ni siquī ndajniñu ñayívi yáha, ma kujnéñu ga i jíin. Chi je yajni naa tāca jéē íyó ñayívi yáha.

³² Cuní rī jeē ma nácani ndasí ni rō siquī tāca jéē íyó ini ñayívi. Chi tēe cúu soltero, ndíhvī ni de jniñu máá Jítóho yō, ndese cusñ ni Jítóho yō sáha de. ³³ Te tēe íyó ñasihí chí ndíhvī ni de jniñu íyó ñayívi, ndese cusñ ni ñasihí de sáha de. ³⁴ Te suni súcuan sñin sñin jéni ni ñahan íyó yíi jíin ñahan íyó máá. Chi ñahan íyó máá, ndíhvī ni ña jniñu máá Jítóho yō, chí cuní ña jeē coo ndoo coo iī anuá ña jíin yiqui cúñu ña cuajniñu ña nuū yā. Te ñahan íyó yíi chí ndíhvī ni ña jniñu íyó ñayívi, ndese cusñ ni yíi ña sáha ña.

³⁵ Jeē váha máá ró jijnáhan ró cúu jeē ni cáhān rī súcuan. Chi nasūu jēē nducú rí casi rī jeē quijnáhan ró, chi sa suhva cúní rī jeē caca yíñúhún ró te nune ró cuajníñu cutú ró núu máá Jítóho yō.

³⁶ Te núu ñin tēē íyó sēhe síhí de, te núu cuayii i, te núu jéni ni de jeē vāha ga jeē quijnáhan i, núu súcuan te na sáha de jeē jéni ni de, te cuāha de jnūhun quijnáhan i, chi nasūu cuéchi cúu. ³⁷ Te núu ñin tēē ni cundaā ni de jeē cóndee sēhe síhí de súcuan-ni, jeē ma cuāha de i vēsú fuerza jícán ñayuu i, núu súcuan te cuu quendōo i nájñūhun cúní de, chi jeē váha sáha de. ³⁸ Núu súcuan te tēē jēhe jnūhun quijnáhan i, vāha sáha de. Te tēē tu jēhe jnūhun, chi vāha ga sáha de.

³⁹ Te ñahan ní quijnáhan, chi yíhi ña ndaha yí ña níni jeē técu de. Te núu je ni jihí yí ña, yūcuán na te je ni cuu libre ña jeē quijnáhan tucu ña jíin na-ni tēē cúu ni ña, te núu tēē cándíje nuū Jítóho yō cúu de. ⁴⁰ Te jéni ni rī jeē ndetū gā coo ña te núu quendōo ña súcuan-ni. Te suni jéni ni rī jeē jíin Espíritu Yaā Dios cúu jeē cahán rī.

Siquī cūñu ni sócō nuū ídolo

8

¹ Te vijna te na cáchi rī siquī cūñu ni sócō nuū ídolo. Ndaā chi tāca yó jéni ni yō jeē máá yó cúu jeē jiní ndese cúu. Te tāca jēē jiní yō ún, chi nducú sáha jeē cundúxí yó. Te sa suhva jeē cundáhú ni yō jnáhan yó, sáha un jēē íje i jíin jnúhun ya. ² Núu na-ni ñayuu jéni ni i jeē jiní vāha i, te tuú chi ná tu cuni cuítí i nájñūhun cánuú cuni i. ³ Te sa suhva ñayuu jeē maní i jíin Yaā Dios, máá i cúu jeē jetáhú yá.

⁴ Núu súcuan te na cástūhun rí siquī cūñu jeē ní casocō ñayuu nuū ídolo. Ndaā chi jiní yō jeē tāca ídolo ñayíví, tú ndaā cuítí. Te tú na inga yaā iyó, chi máá ñin-ni Yaā Dios. ⁵ Te ñayuu chi cájeni ni i jeē iyó táca yáā ini andíví jíin ñáyíví, chi cácahān i jeē iyó ndije cuehē yaā i jíin Jítóho i. ⁶ Te nuū máá yó chi ñin-ni Yaā iyó, jeē cúu Tátá yō Yaā Dios. Te máá yá ni sáha tāca jēē iyó, te cuenta máá yá cúu yó jíjnáhan yó. Te suni íyó ñin-ni Jítóho yō Jesucristo, te nde nuū máá yá vēji tāca jēē iyó, te suni máá yá ni sáha yóhó.

⁷ Te ñayuu cácañíje, chi tú ndíhi i jiní jnūhun yáha. Chi sava i ni cacāan i ni chíñúhún i ídolo nde ná tu candíje i. Te nde vijna núu cáyeji i cūñu ún te sáha i cuenta jeē ni sócō nuū ídolo cúu. Te siquī jeē ná tu ije i jíin jnúhun Yaā Dios, te jéni ni i jeē cujnéhén anuá i sáha cūñu jeē ni sócō nuū ídolo ún. ⁸ Te ndaā chi nasūu jēē yéji yō cúu jeē sáha jeē cuatáhú Yaā Dios yohó. Chi núu yéji yō, nasūu yúcuan sáha jeē quéndōo vāha ga yō nuū Yaā Dios. Te núu tu yéji yō, ni tu sáha jeē quéndōo ndáhú gá yō nuū yā. ⁹ Te vēsú tú ni ñin jési jeē ma cúu caji rō cūñu ún, te coto ró jnáhan ró jēē ná tu ije jíin jnúhun ya, te ma sáha ró jēē suni caji i jeē jéni ni i jeē cuéchi cúu. ¹⁰ Vāha ga ma caji rō núu súcuan, chi sanaa te hermano rō jeē ná tu ije jíin jnúhun ya, coto de róhó jēē yéji rō ini vehe ídolo, chi jiní vāha ró jēē tú na vé sáha. Te súcuan te sáha ró jēē cájni ni de jeē suni caji máá de cūñu jeē ni sócō nuū ídolo, vēsú jéni ni de jeē cuéchi cúu. ¹¹ Te súcuan stívi ró anuá hermano rō jeē ná tu ije jíin jnúhun ya, vēsú jiní vāha máá ró jeē tú na vé sáha jeē caji rō. Te tú vāha sáha ró, chi suni jehē máá de ni jihí Cristo. ¹² Te núu súcuan stívi ró anuá hermano rō jeē ná tu ije jíin jnúhun ya, núu súcuan te siquī Cristo cúu jeē sáha ró cuéchi. ¹³ Núu súcuan te núu cūñu un sáha jeē quívi hermano rī cuéchi, te ma caji cuítí ga rī cūñu ún, návāha ma sáha ri jeē quívi de cuéchi.

Siquī jeē iyó derecho tēē cácuu apóstol

9

¹ Te máá rí chi jíca libre rī, te íyó derecho rī siquī jeē cúu ri apóstol, tēē ni tají yá scáca jnūhun ya. Chi ni jito ri nuū máá Jítóho yō Jesús, te máá ró jijnáhan ró cácuu jniñu jeē ni sáha ri jeē ni squívi ri rohó ndaha Jítóho yō. ² Te núu sava ga ñayuu tu jétáhú i jeē cúu ri apóstol, te nuū máá ró chi suu cúu ndije ri. Chi siquī jeē ní scandíje ri rohó jíjnáhan ró, te jeē yúcuan cácuu ró prueba jeē steén jeē ndíso jníñu ri cúu ri apóstol nuū máá Jítóho yō.

³ Te jnūhun yáha cáhán rī jehē maá rí nuū ñayuu cácahān siquī rī. ⁴ Achí rí: Iyó derecho rī caji rī coho ri jeē cájēhe ñayuu núu cúní rī. ⁵ Te suni íyó derecho rī núu jeē cuní rī condeca ri ñin hermana candíje cuu ñasihí rí, caca ña jíin rí, nájñūhun íyó ñasihí Pedro jíin táca gá apóstol jíin tée cácuu ñani maá Jítóho yō. ⁶ ¿Chí cájeni ni rō jeē maá rúhū-ni jíin Bernabé tú na derecho rī jeē stóo ri jniñu cásáha ri jeē cótecu rī, návāha nune ga rī nacani ri jnūhun vāha ya, chí naún? ⁷ ¿A íyó soldado jeē técu de xūhún vehe de? ¿A íyó tée jeē jítu uva te tu yéji de ndehē ún? ¿A íyó tée jeē ndíto lanchi te tu jíhi de leche tī? Tú cuiti. ¿Te á suni tu íyó derecho rī cotecu rī siquī jnūhun ya naún? ⁸ Te ma cáni ni rō jeē tāca jēē cahán rī yāhá, máni máá jēē cácahān ñayuu ñayivi cúu. Chi nde maá ley yā jeē ni jēhe ya nuū Moisés, cáhán súcuan. ⁹ Chi cáhán nuū tútu ley yā: Ma chúhun ró ñunu yuhu stíquī, quití jéxín trigo, achí. Te ndaā chi nasūu máni siquī stíquī cúu jeē ni cáhān yā súcuan. ¹⁰ Chi suni siquī maá yó ní cahān yā. Chi ley un ní jēhe ya jeē vāha máá yó, chi stéén jeē tēe jítu jíin tée jéxín trigo cánuú jeē nihín de sava un quívī ndutútú. ¹¹ Te suni súcuan ruhū jijnáhan ri jeē ní cataji ri jnūhun Espíritu ini anuá rō, ¿te á véyi cúu jíin ró núu nastútú rí jeē cótecu rī nuū rō? ¹² Te núu sava ga tēe cástéén nuū rō, íyó derecho de cacān de nuū rō, te nagā ni cuu ruhū jijnáhan ri jeē ma cóo derecho rī cacān rī.

Te tu ní cájicān rī derecho un, chi sa suhva ni jendeyí ni rī coto máá rí jeē cáji rī, návāha ma cási rī jeē cáca jnūhun vāha Cristo. ¹³ Te cájini rō jeē sutū ni cajejníñu ini templo, ni cacotecu de siquī jeē ní casocō ñayuu ini templo. Chi sutū ni cajejníñu nuū altar nuū ní casocō i quití, suni ni cayeji de sava quití ún. ¹⁴ Te suni súcuan ni ndacu máá Jítóho yō jniñu jeē tēe cánacani jnūhun jeē jnáma ya yohó, siquī jniñu un níhín de jeē cótecu de. ¹⁵ Te ruhū tu ní jícán cuití rī derecho rī yāhá, te suni nasūu jēē tēe ri jnūhun yáha návāha cuāha ró núu rī jijnáhan ró. Chi jéni ni rī jeē vāha ga núu na cúu rī nasūu jēē quíhin ri jeē cuáha ró, chi casi jeē cúsiñi ni rī scáca ri jnūhun ya súcuan-ni.

¹⁶ Te tú vāha núu sátéyí rí maá rí siquī jeē nácani ri jnūhun jeē jnáma ya yohó. Chi ñin jeē ní tejníñu ya ruhū cúu, te cánuú squícu ri. Chi nacā ndahú cúu ri te núu tú nacani ri jnūhun ya. ¹⁷ Te núu jeē cúu ni maá rí sáha ri nuú, yūcuán na te cuu cacān rī yāhu ri. Te tuú chi cánuú sáha ri, chí máá Yaā Dios ni tee ya jniñu siquī rī. ¹⁸ Núu súcuan te yāhu ri cúu jeē cúsiñi ni rī jeē súcuan-ni nácani ri jnūhun jeē jnáma ya yohó, te tu jícán rī derecho rī jeē cotecu rī siquī jeē nácani ri jnūhun ya.

¹⁹ Chi vésú tú ni ñin ñayuu ndácu jniñu nuū rī, te ni sáha ri maá rí mozo nuū tācá i jeē nácani ri jnūhun nuū i, návāha nihín rī cuehē i candíje i Cristo. ²⁰ Núu íne ri jíin jnáhan ri hebreo te sáha ri nájñūhun cásáha i, návāha cuu scándíje ri i. Chi násáha ri maá rí nájñūhun tēe cáyihí chíji ley Moisés, návāha cuu scándíje ri i jeē cáyihí i chíji ley un, vésú tuá yíhi ri chíji ley un. ²¹ Te suni násáha ri maá rí nájñūhun ñayuu tu cáyihí chíji ley Moisés, návāha cuu scándíje ri ñayuu ún. Te vésú súcuan te yíhi ri chíji ley Yaā Dios, chí suu cúu ley Cristo jeē squícu ri. ²² Te núu íne ri jíin ñayuu jeē ná tu ije jíin jnūhun ya, te sáha ri maá rí nájñūhun jeē ná tu ije ri jíin jnūhun ya, návāha cuu scándíje ga rī i. Núu súcuan te násáha ri maá rí núu ndese cándāa tāca ñayuu, návāha tācá-ni modo un te cuu scándíje ri sava i. ²³ Tāca yáha sáha ri jeē siquí jnūhun jeē jnáma ya yohó, návāha suni nihín rī tahū jeē ndíso jnūhun ya.

²⁴ Je cájini rō jeē tēe cájini carrera, jendaá chi ndíhi de cájini, te ñin-ni de cúndeyí níhín premio. Te suni súcuan nducú ndéyí máá ró squícu ró, návāha nihín rō premio nuū yā. ²⁵ Te tāca tēe cúní cundeyí síquī ñin deporte, chí cáscuáha de te cándito de máá de. Súcuan cásáha de návāha nihín de ñin premio jeē cúu corona ndaha yújnu jeē nāā yachí. Te máá yó chí sa suhva cánducú ndéyí yó návāha nihín yō ñin premio jeē ma nāā cuití. ²⁶ Te máá rí suni nducú ndéyí rí nájñūhun tēe cájini, te tu nducú ndéyí cāha rí. Te sáha ri nájñūhun tēe cácajnáhan juego jeē tu jēhe iyú de, chí quée jniñu sáha ri. ²⁷ Chí sa suhva stóho ri yiquí cúñu rī, te stíhví ni rī maá rí squícu ri. Chí vésú ni stíhví ni rī ñga ñayuu jeē nducú ndéyí i, te núu tu nducú ndéyí máá rí te snāā rī premio rī.

Siquí jeē ma chíñúhún i ídolo

10

¹ Hermano jijnáhan ró, cúní rī jeē na jécūhun ni rō ndese ni cajica jí yō jenahán. Chi ndīhi de ni cajica chíi vicō jeē ni stéén ichi nuū de, te ndīhi de ni cayāha mēhñū ndute Mar Rojo jeē ní cusñin, ni nune ichi. ² Súcuan cúu jeē ní canduu inuú ndīhi i jíin Moisés, chi ni candiquin i de chíi vicō jíin méhñu mar. ³ Te ndīhi i chi inuú-ni ni cayeji i alimento jeē ni jéhe máa Espiritu. ⁴ Te suni ndīhi i ni cajihí ndute jeē ni jéhe Espiritu. Chi ni cajihí i ndute jeē ní cane jicā cáva nuū ní cajica cuu i. Te Cristo cúu nájnūhun cava un jéē jéhe ya ndute cotecu yō níí cáni. ⁵ Te vēsú súcuan te cuehē i ni cunihni ni i, te tu ní cúsñi ni Yaā Dios jíin i, te jeē yúcuan ní cajihí i nuū ñūhun téhé.

⁶ Te tāca jéē ní cuu ún, ñin ejemplo cúu nuū yō, návāha ma ndíyo ni yō tāca jéē neé, nájnūhun ni candiyo ni ñayuu ún. ⁷ Te ma chiñúhún ró ídolo, nájnūhun ni casáha sava i. Chi súcuan cáhán nuū tútu iī: Ni cacucōo ñayuu ún, ni cayeji i ni cajihí i vico ídolo, te ni ndocuññi i ni cajita jéhe i, áchí. ⁸ Te ni ma cáca jnéni ró nájnūhun ni casáha sava i, te ni cajihí ocō unī mil i jeē ñin quivī-ni. ⁹ Te ni ma sáha ró jniñu jeē squití ni rō Jitoho yō, nájnūhun ni casáha sava i, te ni cajihí i jeē ní catuu coō i, ni sáha ya. ¹⁰ Te ni ma cahán sōó ró siquī Yaā Dios, nájnūhun ni cacahán sōó sava i, te ni cajihí i jeē ní jehni ndajéhe yā i.

¹¹ Te tāca jéē ní cuu ún, chi ñin ejemplo cúu nuū yō. Te súcuan yósó núu tútu návāha na chúhun vāha ni maá yó. Chi cácuu yó ñayuu cátecu quivī cuándihí ñayiví. ¹² Núu súcuan te rōhó jéē cájeni ni rō jeē cáhiin nihin ró jéē ma sáha ró cuéchi, coto má quiví ró cuéchi. ¹³ Chi máni íyó jéē nducú squiví rōhó cuéchi, te inuú-ni cándoho ró súcuan nde jíin táca gá ñayuu. Te cuu cucáhu ni rō Yaā Dios jeē ma cuáha ya jnūhun jeē vihyá gā coto ndee jexeén rōhó vēsú jeē cúu cundeyí ró jíin. Chi sa suhva núu vēji jeē nducú squiví rōhó cuéchi, te chindéé ñáhán yá rohó quenda ró te cundeyí ró siquī.

¹⁴ Ñāni máni, ma chiñúhún cuiti rō ídolo núu súcuan. ¹⁵ Cáhán rī jíin ró jéē cúu ró ñayuu cájecūhun ni, te na sáha ró cuenta núu ndaā jnūhun cáhán rī. ¹⁶ Máa copa iī jeē cájicān tahu yō jehē, suu cájihí cáhu yó jéē steén yō jeē inuú cúu ndīhi yó, chí ni jeti niññi Cristo jeē siquí yō ná ni jihí yā jicā cruz. Te pan jeē sacuéchí yó cáyeji cáhu yó, stéén jeē inuú cúu ndīhi yó siquí jeē ni jéhe Cristo yiqui cúñu yā ni jihí yā jehē yō. ¹⁷ Te vēsú cuehē yō iyó, te ñin-ni ñayuu cácuu yó, chí ñin-ni pan un cáyeji cáhu yó siquí jeē cácadíje yó.

¹⁸ Condēhe ró ndese casáha ñayuu Israel. Tāca téé jeē yéji quiti jeē ni sócō nuū yā, chi inuú-ni cúu ndīhi de siquí jeē cáyeji de jeē ni sócō ún. ¹⁹ Núu súcuan te cáhán rī jeē tu ndé jéjñiñu ídolo, ni tu jéjñiñu cúñu jeē ni sócō nuū ídolo, chí inuú cúu jíin táca gá cúñu. ²⁰ Te suni cáhán rī jeē ñayuu tu cájini jnūhun Yaā Dios, núu cásocō i, te nuū tachī cásocō i, nasūu núu Yaā Dios. Te tu cúní rī jeē cuajñiñu ró núu tachī. ²¹ Ma cúu coho ró copa maá Jitoho yō te núu cájihí ró jéē ni sócō nuū tachī. Te ma cúu caji rō nuū mesa Jitoho yō te núu cáyeji rō jeē ni sócō nuū tachī. ²² Ma quiví nduu yō súcuan jíin táchī, návāha ma cucuññi Jitoho yō jíin yó. ¿Chí téyí gá maá yó vēsú maá yá jeē ma cúu stóho ya yohó, cájeni ni rō, chí naún?

Ndīhi chí sáha yó jíin jnūhun cundáhú ni

²³ Te ndaā cúu jeē cacahán jeē ndīhi-ni jniñu íyó váha sáha yó núu ndese cúní yō. Te tuú chi nasūu ndīhi sáha jeē quéndōo vāha ánuá yō. Ndīhi chí cuu sáha yó, te vēsú súcuan te nasūu ndīhi sáha jeē ije jnáhan yó jíin jnūhun ya. ²⁴ Chi cánuu sáha yó jéē váha jnáhan yó, nasūu máni máa jéē váha máa yó.

²⁵ Cuu caji rō ndīhi-ni cúñu cūyāhu nuū yáhu, te ma cájnūhun ró ni ma cáni ni rō núu jeē ni sócō nuū ídolo cúu. ²⁶ Chi cuenta maá Jitoho yō cúu ñayiví jíin ndivii jeē iyó ini, te cuu cuajñiñu yó.

²⁷ Te núu ñin tēe tu cándíje, cana de rōhó caji rō jíin de, te núu cácuu rō quihñi rō, núu súcuan te caji rō tāca jéē cáni de nuū rō. Te ma cájnūhun ró ni ma cáni ni rō núu jeē ni sócō nuū ídolo cúu. ²⁸ Te núu cachi ñin i nuū rō jeē cúñu ni sócō nuū ídolo cúu, yūcuán na te ma cáji rō, chí siquí jeē jéni ni i jeē cuéchi cúu, te tu cúní rō sáha ró jéē quiví i cuéchi.

²⁹ Te súcuan cáhán rī siquī jeē inga i cájeni ni i jeē cuēchi cúu, te nasūu jéē súcuan cájeni ni maá ró.

Te sanaa te cahān ñn ró: ¿A tu íyó libre rī caji rī jeē cuní maá rí, vēsú cájeni ni inga i jeē cuēchi cúu? ³⁰ ¿Te núu nácuatáhú rí nuū Yaā Dios te yéji rī, te najehē cácahān i siquī rī jeē yéji rī? achi rō. ³¹ Tuú chi ndihi jeē sáha ró, vēsú jeē caji rō chí jéē coho ró, chí na-ni jniñu sáha ró, ndihi na sáha yíñúhún ró jíín Yaā Dios, návāha cuni ñayuu jeē luu cújéhu ya. ³² Te ma sáha ró jniñu jeē squívi ró ñayuu nuū cuéchi, cúu ñayuu hebreo, cúu ñayuu tācá nación jeē tu jíni jnūhun ya, cúu ñayuu cácañdije Yaā Dios. ³³ Te ruhū chi ndúcú rí jeē na cúsiñ ni tāca ñayuu jíni tāca jniñu sáha ri. Tu ndúcú rí jeē váha máa-ni ri, chi sa ndúcú rí sáha ri jeē váha cuehē ñayuu, návāha cācu i.

11

¹ Te na ndácu ró rúhū jijnáhan ró, nájñūhun ndácu máá rí Cristo.

Siquī ndese cánuú sáha ñahan cándutútú

² Váha casáha ró, hermano, jeē niní cánuūhun ni rō ruhū, te cándihvī ni rō jíin táca jniñu jeē ni steén rī nuū rō. ³ Te cúní rī jeē na jécūhun ni rō jeē Cristo cúnuú yá nuū tāca té. Te tēe cúnuú de nuū ñasihi de. Te Yaā Dios cúnuú yá nuū Cristo. ⁴ Núu ñn tēe ñūhun de lélu te jícan tahu de chí nácani de jnūhun nuū ndutútú ñayuu cácañdije, núu súcuan te jéhe de jnūhun canu máá de. ⁵ Te sa núu ñn ñahan tu ndési xinī ña te jícan tahu ña chí nácani ña jnūhun, núu súcuan te jéhe ña jnūhun canu máá ña, chi ñn-ni cúu un núu ní sáte xinī ña. ⁶ Chi núu tú casi ña xinī ña, váha ga na sáte ña ixi ña núu súcuan. Te núu cúcanu ña jeē sáte ña ixi ña chí jéē sáte lii ña, te na cási ña núu súcuan. ⁷ Te tēe chi ma cási de xinī de, chi máá de cúu muestra jeē steén ndese cúu Yaā Dios jeē cújéhu ya. Te ñahan chi stéén ña jeē cújéhu tēe. ⁸ Chi ná ni sáha ya tēe, te nasūu jíin yiqui ñahan ni sáha ya, chi sa suhva jíin yiqui té ni sáha ya ñahan. ⁹ Te ñahan chi ni cuvāha ña jeē siquí té, nasūu té jeē siquí ñahan. ¹⁰ Te jeē yúcuan cánuú jéē cóndesi xinī ñahan, te suu stéén jeē cújéhu tēe, chi suni cándehé ndajéhe yā ndese sáha ña. ¹¹ Te vēsú súcuan te yóhó jéē cándije yó, chí jíni yō jeē tu íyó té núu jeē tu íyó ñahan, te tu íyó ñahan núu jeē tu íyó té. ¹² Chi vēsú ni sáha ya ñahan jíin yiqui té, te vijna cácu tēe chíji ñahan, te máá Yaā Dios cúu jeē sáha tācá-ni.

¹³ Na sáha máá ró cuenta ¿á íyó váha núu tu ndési xinī ñahan te jícan tahu ña nuū Yaā Dios? ¹⁴ Chi sáha yó cuenta jeē ini ñayivi yáha, núu cáni ixi tēe te cúcanu de sáha. ¹⁵ Te ñahan chi sa váha jíto ña te núu cáni ixi ña, chi suu ni jēhe ya jeē cóndesi xinī ña. ¹⁶ Te núu ndé ñn ñayuu cuní i cahān i siquī jnūhun yáha, te ruhū jíin táca grupo ñayuu cácañdije nuū Yaā Dios, tú na inga costumbre jejnūhún rí siquī jnūhun yáha.

Jeē castívi i siquī Cena Jitoho yō

¹⁷ Te íyó inga jnūhun cánuú cahān rī jíin ró, chí tu cúu cahān rī jeē váha casáha ró. Chi nuū cándutútú ró te tu sáha jeē quéndōo váha ga rō, chí sa jeē castívi ró. ¹⁸ Xihna jnūhun yáha cáhán rī, jeē nihín rī jnūhun jeē nuū cándutútú ró te cácusñn ni rō. Te jéni ni rī jeē ndaā cúu. ¹⁹ Chi níni coo sava ró jéē cusñn ni, návāha natūu ndé-ni cúu jeē cácañdije váha mēhñu ró. ²⁰ Te jeē cácusñn ró súcuan nuū cándutútú ró, te nasūu cena maá Jitoho yō cúu jeē cáyeji rō núu súcuan. ²¹ Chi núu cáyeji rō, te tācá ñn ñn ró cúní caji xihna gā vēsú jnáhan ró. Te súcuan te sava ró tu cánihñn, te cájii sōco, te sava ró cánañini jeē cájihi cuehē. ²² ¿A tu cánevāha ró vehe nuū cáji rō coho ró, chí naún? Chi jeē casáha ró súcuan cúu jeē tu íyó yíñúhún ró ini vehe nuū cándutútú ñayuu cácañdije Yaā Dios, chí casáha ró jéē cácuñu ñayuu jeē tú na vé névāha. ¿Ndese cahān rī jíin ró núu súcuan? ¿A cáhán rī jeē váha casáha ró? Tuú chí nasūu jéē váha cúu jeē casáha ró súcuan.

Siquī jeē ní jequin Jitoho yō Cena yā

(Mt. 26.26-29; Mr. 14.22-25; Lc. 22.14-20)

²³ Chi jnūhun yáha jéē ní nastéén rī nuū rō, chí nuū maá Jitoho yō ni nihín rī: Jeē maá jecuāa jeē ní nastúu de Jitoho yō Jesús, te ni quihin ya pan. ²⁴ Te ni nacuatáhú yá, te ni

tahū cuéchi yá, te ni cahān yā jíin téé cáscuáha jíin yá: Quihin te caji rō jijnáhan ró, chi yáha cúu yiqui cúñu rī jeē ni sócō rī jeē siquī rō. Te níní caji rō súcuan jeē cáñuhun ni rō ruhū jeē ni jíhī rī jehē rō. Achí yá. ²⁵ Te suni súcuan ni quihin ya copa ná ni cuu ni cuxíni ya jíin de, te ni cahān yā: Jeē ñuhun copa yáha cúu ñiñī rī jeē sácútu contrato jeé jeē jnáma ri ñayuu. Te tāca jínu jeē cájihi ró, te nucūhun ni rō ruhū. Achí yá. ²⁶ Chi tāca jínu jeē cáyeji rō pan un te cájihi ró copa un, súcuan cástéén rō jeē ni jíhī Jitoho yō jehē yō. Te súcuan na sáha ró ndé quiivī ndíji ya.

Ndese caji yíñúhún i Cena yā

²⁷ Te núu na-ni ñayuu caji i pan un chí coho i copa Jitoho yō ún, te núu tu sáha yíñúhún i nuū Yaā Dios, núu súcuan te sáha i cuéchi jeē tu íyó yíñúhún i siquī yiqui cúñu maá Jítoho yō jíin síquī ñiñī yā. ²⁸ Núu súcuan te coto ndee rō maá ró núu íyó ndoo ánuá rō jeē tú cuéchi ró. Te sáa te cuu caji rō pan un te coho ró copa un. ²⁹ Chi núu ñin ñayuu tu yéji tu jíhi yíñúhún i te tu nucūhun ni i jeē yiqui cúñu yā cúu, ñayuu ún chi nihīn i castigo núu na cáji i coho i. ³⁰ Jeē yúcuan cúu jeē iyó cuéhē ñayuu cácuñu jíin jéé ní cacuxíí, cáhiyo mēñū ró. Te sava i je ni cajihī. ³¹ Te núu coto ndee yō maá yó nde ná tu caji yō, te Jitoho yō ma cuáha ya castigo yohó. ³² Te núu Jitoho yō jéhe ya castigo yohó, te súcuan stóho ya yohó návāha ma jnahnú ndetū yō jíin ñayuu ñayiví.

³³ Nánī mánī, núu súcuan te jeē cándutútú ró jeē cáji rō Cena yā, te condetu ró te caji inuú ró. ³⁴ Te núu ñin ñayuu jíí i sóco, te xihna gā na cáji i vehe i návāha ma stívī i nuū cándutútú ró. Te súcuan te ma cuáha ya castigo i. Te quiivī jécondēhe rí rohó te cachi rī ndese coo sava ga jniñu.

Siquī tāca táhū jeē jéhe Espiritu

12

¹ Hermano, cúní rī jeē na jécūhun ni rō siquī tāca táhū jeē jéhe Espiritu nuū yō, suu tāca modo jejniñu ñin ñin yó núu Yaā Dios.

² Te cájini rō jeē ná ni cuu ró ñayuu ná tu candíje, te ni cacondihvī ni rō ni cachiñúhún ró ídolo ñihín. ³ Te vijna te na jécūhun ni rō jeē núu ndé ñayuu cahán ndevāha i siquī Jesús, te nasūu jíin poder Espiritu Yaā Dios cúu jeē cahán i súcuan. Te ni ñin i ma cúu cahán i jeē Jitoho i cúu Jesús, te núu tu ndéé poder Espiritu Santo ini i.

⁴ Te sñin sñin tahū jéhe ya jeē cuajniñu ñin ñin yó núu yā, te ñin-ni maá Espiritu cúu jeē jéhe. ⁵ Te sñin sñin jéjniñu yó, te nuū maá ñin-ni Jitoho yō jejniñu yó. ⁶ Te sñin sñin modo sáha yó jniñu ya, te ñin-ni Yaā Dios cúu jeē sáha jniñu un jíin yó. ⁷ Te nuū ná ñin ná ñin yó ní jéhe Yaā Dios tahū jeē sáha Espiritu yā jíin yó, návāha na sáha yó jéé ije jnáhan yó jíin jnúhun ya. ⁸ Chi sava yó ní canihīn tahū jeē ndichí cáhán yō jnúhun ya, sáha maá Espiritu. Te sava ga yō ni canihīn yō jeē cúu jécūhun vāha ni yō te castūhun yó, te suni maá Espiritu sáha. ⁹ Te nuū sava ga yō ni jéhe ya tahū jeē cúu cándíje ñihin yó jéé sáha ya jeē jicán yō, te sava ga yō cúu sáha yó jéé ndúvāha ñayuu cácuñu, te suni maá Espiritu sáha. ¹⁰ Te sava ga yō cúu sáha jniñu jéñu jíin fuerza Yaā Dios. Te sava ga yō cúu nácani jnúhun ya. Te sava ga yō ni sáha ya jeē nácuni yō tāca jnúhun, núu vēji nuū Espiritu yā chí tuú. Te sava ga yō ni nihīn tahū jeē cahán yō tijni yuhu jeē tu jécūhun ni yō. Te sava ga yō cúu nacastūhun yó jnúhun ni cahán jnáhan yó jíin inga yuhu ún. ¹¹ Te tāca táhū yáha, chi ñin-ni maá Espiritu sája, te sñin sñin jéhe ya nuū ñin ñin yó, ndese nújnahān ni maá yá.

Ndihī yó cúu nájñūhun ñin na yiqui cúñu

¹² Chi nájñūhun ñin yiqui cúñu iyó cuéhē parte, súcuan cúu yó jíin Cristo jeē cúu yó nájñūhun yiqui cúñu yā, chi ñin na cúu yó jíin yá. Te vēsú cuéhē parte cácuu yó te ñin-ni cúu yó, nájñūhun ñin yiqui cúñu jeē iyó cuéhē parte. ¹³ Chi ñin na ni canduu yó jíin yá ni sáha ñin-ni maá Espiritu ná ni cajendute yó. Súcuan cúu vēsú cúu yó ñayuu hebreo chí ñayuu griego, vēsú mozo jeē ní jeen ñayuu chí téé sájniñu cuenta maá. Te ndihī yó chi ñin-ni Espiritu ni canihīn yō.

¹⁴ Te ìn yìqui cúñu chi nasūú ìn-ni parte cúu, chi sa cuehē parte cúu. ¹⁵ Te núu jehē cahān: Nasūu cuenta yìqui cúñu cúu ri, chi nasūú ndaha cúu ri, te tuú chi parte yìqui cúñu cúu nahín. ¹⁶ Te núu sōho cahān: Nasūu cuenta yìqui cúñu cúu ri, chi nasūu tñūu cúu ri, te tuú chi parte yìqui cúñu cúu nahín. ¹⁷ Núu ñí yìqui cúñu yō cúu tinūú, ¿te ndese cuni sōho yó núu súcuan? Te núu ñí yìqui cúñu yō cúu sōho, ¿te ndese cuan yó xicō núu súcuan? ¹⁸ Te Yaā Dios ni chujnáhan ya ìn ìn parte yìqui cúñu, nájñūhun cúní yā jeē coo. ¹⁹ Chi núu ìn-ni parte cúu ndíhi, te nasūú ìn ñí yìqui cúñu cúu núu súcuan. ²⁰ Te tuú chi cuehē parte iyó, te ìn-ni yìqui cúñu cúu.

²¹ Te ni ma cúu cahān tinūu jíin ndaha: Tu jíni ñúhún rí rohó. Te ni xiní ma cúu cahān jíin jéhē: Tu jíni ñúhún rí rohó. ²² Chi sa suhva tāca parte yìqui cúñu jeē jéni ni yō jeē núu ga fuerza, suu cúu jeē cánuú gá. ²³ Te tāca parte yìqui cúñu jeē jéni ni yō jeē tu cáa vāha, suu cúu jeē yucún gá chúhun yó sahma. Te parte jeē tú-ni luu cáa, sa vāha ga jési yō. ²⁴ Chi parte jeē lúu cáa, tu cánuú jéē condihyū. Chi súcuan ni chujnáhan Yaā Dios yìqui cúñu, jeē yucún gá ndíto yó jéē tu cáa luu. ²⁵ Súcuan ni sáha ya návāha ma cusñin tāca parte yìqui cúñu, chi sa chindéé ñájñáhan vāha jíin jnáhan. ²⁶ Te núu jétú ìn parte yìqui cúñu, te suni ñí cáhnu-ni jétú. Te núu ìn parte ndíto yúcún yó, te suni ndíhi-ni parte quéndō vāha.

²⁷ Te róhó jíin náhan ró chi nájñūhun yìqui cúñu Cristo cácuu ró, chi ìn na cúu yó jíin yá. Te ná ìn ná ìn ró cúu ìn ìn parte yā. ²⁸ Núu súcuan te sñin sñin jniñu ni jēhe Yaā Dios nuū tāca ñáyuu cácan díje jeē cácuu i nájñūhun ìn ìn parte yā: Te suu ìn parte yā cúu tācá apóstol jeē ní jeni ya xihna gā jeē scáca de jñūhun ya. Yūcuán na te jeē uú, tēe cácanani jñūhun ya, te jeē uní, tēe cástéén. Yūcuán na te ñayuu casáha jniñu jéhnu jíin fuerza yā, jíin ñáyuu casáha jeē ndúvāha ñayuu cácuu, jíin ñáyuu cachíndéé ñájñáhan, jíin ñáyuu cándiso jniñu, jíin ñáyuu cácahān sñin sñin yuhu jeē tu cájecūhun ni. ²⁹ ¿A ndíhi yó cácuu apóstol, chí naún? ¿A ndíhi yó cácanani jñūhun? ¿A ndíhi yó cástéén? ¿A ndíhi yó cuu sáha jniñu jéhnu? ³⁰ ¿A ndíhi yó cuu sáha jeē ndúvāha ñayuu cácuu? ¿A ndíhi yó cuu cahān sñin sñin yuhu? ¿A ndíhi yó cuu nacastūhún yuhu ún, chí naún? Tuú chi sñin sñin tahū ni canihñin yō. ³¹ Núu súcuan te na cóndihvī ni rō cacān rō jeē cuáha Yaā Dios tahū cánuú gá nuū rō. Te vijna te na stéén rī nuū rō ìn jeē vāha ga nuū tāca gá tahū ún, suu jñūhun cúndáhú ni jnáhan.

Jñūhun jeē cundáhú ni jnáhan

13

¹ Vēsú núu cuu cahān yō tijni yuhu jeē cácahān ñayuu chí jéē cácahān ndajéhé Yaā Dios, te núu tu cúndáhú ni yō jnáhan yó, te jñūhun cahān yō un cúu nájñūhun ìn tambor jeē ndaxín cáján chí ìn platillo jeē ndaxín cáxín sánee sōho ñayuu. ² Te vēsú cuu nacani vāha yó jnúhun ya, te cuu jecūhun ni yō tāca jnúhun sáhi yá jíin táca jnúhun ndíchí, te núu tu cúndáhú ni yō jnáhan yó, te tu ndé jéjníñu cuiñi yō núu súcuan. Te vēsú cuu candíje téyí yó jeē nde cuu cahān yō jeē cújiyo yucu, te núu tu cúndáhú ni yō jnáhan yó, te tu ndé jéjníñu cuiñi. ³ Te vēsú na sája yó ndíhi jeē névāha yó cuu ñayuu ndahú, te vēsú núu cuāha yó jnúhun cahmu ñayuu yohó jéē siquí jnúhun ya, te núu tu cúndáhú ni yō jnáhan yó, te tu ndé jéjníñu cuiñi.

⁴ Ñayuu cundáhú ni chi íyó paciencia jíin jnáhan, te íyó mání ni, te tu cúcuésún ni. Te tu sándúxí, te tu sátéyí máá. ⁵ Tu sájéē ni, tu ndúcú jéē cúu máá-ni, tu quítí ni, tu ñúhun ni jñūhun quítí ni. ⁶ Tu cúsiñ ni jíto jniñu néé casáha jnáhan, chi sa cúsiñ ni jíin jniñu vāha. ⁷ Ñayuu cundáhú ni chi ndíhi jéhnde ni ndoho jehē jnáhan, te tu jécuiñí jeē candíje jnáhan, jíin jéē ñúhun ni jeē squícu jnáhan, jíin jéē jéndeýí ni jíin jnáhan.

⁸ Jñūhun cúndáhú ni chi ma náā cuiñi. Te quiñi quiví jeē tuá nacani i jñūhun, ni tuá cahān i tijni yuhu, ni tuá jíni ñúhún jñūhun ndíchí. ⁹ Chi tu jíni vāha vāha yó vijna, te jñūhun cácanani yó suni jecu-ni cúu. ¹⁰ Te núu na quíji quiví jeē cúni yō ndíhi, yūcuán na te tuá coo jeē jíni yō jecu-ni.

¹¹ Ná ni cuu yó súchi lúlí te ni cahān yō, ni jeni ni yō, ni jecūhun ni yō nájñūhun sūchi lúlí. Te ná ni jehnu yó te ni stóo yó modo sūchi lúlí. ¹² Te suni súcuan, jecu-ni jécūhun ni yō vijna, nájñūhun jeē jító yó núū ñn espejo jeē tú ndijin vāha. Te cúcuéé gá te jecūhun cájí ni yō ndíhi. Te vijna chi jecu-ni jíní yō, te cúcuéé gá te cuni vāha yó ndese Yaā cúu ya, nájñūhun jíní vāha ya yohó ndese ñayuu cúu yó. ¹³ Núu súcuan te íyó úní jñūhun jeē quéndōo cutú ñí cáni: Jeē candíje ñihin yó jéé squícu ya jeē ni jéjñūhun ya, jeē cócuhun ni yō tāca jéé váha coo, jíin jéé cundáhú ni yō jñáhan yó. Te jñūhun cúndáhú ni chi jéhnu ndasí gá cúu nuū tāca jéé yáha.

Siquí jeē cácahān i tijni yuhu

14

¹ Na cóndihvī ni rō cundáhú ni rō jñáhan ró, te suni cóndihvī ni rō cacān rō tāca táhū jeē jéhe Espíritu. Te tahū jeē cánuú gá cúu jeē nácani ró jnúhun ya. ² Chi tēe névāha tahū jeē cahán de tijni yuhu jeē tu jécūhun ni de, chi máa-ni Yaā Dios jiní jeē cahán de, nasūu ñayuu. Chi ni ñn i ma jécūhun ni jeē cahán de. Chi sáha Espíritu jeē cahán de tāca jnúhun yísahí. ³ Te sa suhva tēe nácani jñūhun ya, chi jíin ñayuu cahán de návāha ije i jíin jnúhun ya, te stíhvī ni de i, te cáhán ndeyí ni de jíin i. ⁴ Te tēe jeē cahán tijni yuhu, chi máa-ni de íje jíin jnúhun ya. Te tēe jeē nácani jñūhun ya, chi sa suhva sáha de jeē ñayuu cácaandíje íje i jíin jnúhun ya.

⁵ Nújnahan ni rī jeē ndíhi ró cuu cahān rō tijni yuhu jeē tu jécūhun ni rō, te jeē cánuú ndasí gá cúu jeē nácani ró jnúhun ya. Chi jéhnu ga jniñu sáha tēe nácani jñūhun ya vésú tēe cáhán tijni yuhu. Chi núu tú tēe castūhun jnúhun cáhán de, te ma cuajníñu jeē íje ñayuu cácaandíje. ⁶ Jeē yúcuan hermano jijnáhan ró, núu na jéé rī nuū rō, te núu cahān rī tijni yuhu jeē tu jécūhun ni rō, ¿te ndé cuajníñu ún? Te núu na cáhán rī ñn jeē ni steén yā, chí ñn jeē cutūhva ró jnúhun ndaā, chí ñn jeē nácani rī jñūhun ya, chí ñn jeē steén rī nuū rō, yúcuan cúu jeē cuajníñu.

⁷ Sáha yó cuenta jeē nájñūhun instrumento música, vésú tu técu, te cuu cata, nájñūhun flauta jíin arpa. Te núu tu jíta sñn sñn nota, ¿te ndese cuni yō na yaa jíta? ⁸ Te núu corneta tu jécú cájí, te ni ñn tēe ma sātūhva de quihñ de guerra. ⁹ Te suni súcuan róhó jíjnáhan ró, núu tu cáhán cají ró jñūhun jecūhun ni ñayuu, ¿te ndese cuni i na vé cahán rō? Chi jñūhun cáhán rō ndíso tachī cuahān jíin. ¹⁰ Te ndaā chi íyó cuéhē yuhu ini ñayíví, te tāca yuhu chi íyó ñayuu jécūhun ni. ¹¹ Te núu tu jécūhun ni yō yuhu cáhán ñn tēe, te cúu yó nájñūhun tēe ñuu jicá núū tēe cáhán, te suni nájñūhun tēe ñuu jicá cúu de nuū maá yó. ¹² Jeē yúcuan róhó jéé cácuni ndasí ró ñihin rō tahū jeē jéhe Espíritu, na cácan rō tahū jeē sáha jeē íje ñayuu cácaandíje jíin jnúhun ya.

¹³ Núu súcuan te ñayuu jeē cahán ñga yuhu jeē tu jécūhun ni i, na cácan tahu i jeē cuu nacastūhún i yuhu ún. ¹⁴ Chi núu jícan tahu yō jíin ñga yuhu, te máa ánuá-ni yó cúu jeē jícan tahu, te tu ndé jéjníñu nuū jeē níjnūní yō. ¹⁵ ¿Ndese sáha yó núu súcuan? Na cácan tahu yō jíin ánuá yō, te suni jíin jéé níjnūní yō. Na cáta yó yaa íi jíin ánuá yō, te suni jíin jéé níjnūní yō. ¹⁶ Chi núu nácuatáhú ró máni jñūhun jeē ní quiji nuū anuá rō te tu jécūhun ni rō, núu súcuan te tēe jíni sōho te tu jécūhun ni, ma cúu nacuatáhú de jíin ró. Chi tu jíni cuíti de na jñūhun cáhán rō. ¹⁷ Ndaā chi vāha nácuatáhú máa ró, te ñga de chi tú na vé ñihñ de jeē íje de jíin jnúhun ya. ¹⁸ Na cutahū rī nuū Yaā Dios jeē cahán gā rī jíin tijni yuhu vésú maá ró jijnáhan ró. ¹⁹ Te vésú súcuan te núu íne rī nuū cáyūcu tútu ñayuu cácaandíje, te nújnahan gā ni rī cahān rī uhūn-ni jñūhun jeē jécūhun ni i te steén nuū i, vésú jeē cahán rī uxí mil jñūhun jíin ñga yuhu jeē tu jíni cuíti i.

²⁰ Hermano jijnáhan ró, ma cáni ni rō nájñūhun sūchi lúlí, chi sa suhva na íje ró jéé jecūhun vāha ni rō. Te coo ró nájñūhun sūchi lúlí jéé tu jíni i jniñu néé. ²¹ Te yósó núu tútu ley yā jenahán: Jíin jnúhun cácahān tēe ñga yuhu, jíin jnúhun cácahān tēe ñuu jicá, sáha rī jeē cúni sōho ñayuu yáha jnúhun rī. Te ni jíin súcuan ma sáha i cuenta jñūhun cahān rī, achí máa jítoho yō. ²² Núu súcuan te tahū jeē cahán yō tijni yuhu, yúcuan cúu ñn jeē steén poder Yaā Dios nuū ñayuu tu cácaandíje, nasūu núu ñayuu cácaandíje. Te jeē

nácani yó jnúhun ya, yūcuan cúu jeē steén nuū ñáyuu cácadíje, nasūu núu ñáyuu tu cácadíje. ²³ Núu súcuan te núu ndíhi ró ñáyuu cácadíje cáhiyo tútú, te tāca ró cácahān sīn sīn yuhu, te quīvicoo ñayuu tu jécūhun ni jíin ñáyuu tu cácadíje, ¿te á má cahán i jeē ní canduu loco rō? ²⁴ Te núu tāca ró cácanani jnúhun ya, te núu quīvi iin tēe tu cácadíje chí iin tēe tu jécūhun ni, yūcuán na te nacuni de jeē tēe íyó cuéchi cúu de, te coto ndee de máá de jíin jnúhun cácanani ró. ²⁵ Te nucūhun ni de tāca jēe ní jeni yuhu ni de jíin ánuá de. Yūcuán na te jecuiñi yití de te chiñúhún de Yaā Dios. Te cahān de jeē íne ndije Yaā Dios jíin ró jijnáhan ró.

Siqui jeē yucún yíñúhún na cóo nuū ndutútú yó

²⁶ Núu súcuan hermano jijnáhan ró: Nuū cándutútú ró te tāca ró coo iin yaa iī cata ró, chí iin jnúhun stéén rō, chí iin jnúhun jeē ni sáha Yaā Dios jeē jécūhun ni rō, chí inga yuhu jeē cahán rō, chí jēe nácastūhun ró jnúhun inga yuhu ún. Te ndíhi ún na sáha ró návāha ije ñayuu cácadíje jíin jnúhun ya. ²⁷ Te núu cáhiyo tēe cahán inga yuhu, te na cáhán uū de chí únī-ni de, te ná iin ná iin de na cáhán. Te suni jíin íñúhún jēe nacastūhún iin tēe jnúhun ún. ²⁸ Te núu tu íyó tēe jeē cúu nacastūhun jnúhun ún, te tēe cácahān inga yuhu, vāha ga ma cahán de nuū cándutútú ró, te na cáhán maá-ni de jíin Yaā Dios. ²⁹ Te suni súcuan tēe cácanani jnúhun, na cáhán uū de chí únī de, te sava ga rō nacani ni rō núu íyó ndāā jeē cácahān tēe ún. ³⁰ Te núu inga tēe néne ni nihīn de iin jnúhun jeē ni stéén yā nuū de, núu súcuan te tēe cáhán na jecuiñi jeē cahán de, návāha cahán inga tēe ún. ³¹ Te súcuan te ná iin ná iin ró cuu nacani ró jnúhun jeē steén yā nuū rō, návāha cutūhva ró te coo ndeyí ni rō. ³² Te tēe cácanani jnúhun, jíin íñúhún cuatáhú de jeē nácani inga tēe jnúhun te jecuiñi jeē cahán maá de. ³³ Chi Yaā Dios cuní yā jeē coo nayúú méhñu ró, násūu jēe sacā núu cuvaā rō.

Te nájnūhun cásaha tāca grupo hermano cácadíje, ³⁴ suni súcuan tācá ñahan cándutútú jíin ñáyuu cácadíje, na cóo nayúú ña. Chi tú vāha jeē cahán ña, chi sa cuatáhú ña nájnūhun cáhán tutu ley yā. ³⁵ Te núu cuní ña cucáhnu ni ña iin jnúhun, te nde vehe na cájnūhún ña yī ña. Chi jnúhun canu cúu jeē cahán iin ñahan méhñu núu cándutútú ró.

³⁶ Te na sáha ró cuenta jeē tu ní quénda jnúhun Yaā Dios nuū maá ró jijnáhan ró, te nasūu máá iin máá ró ní cánihīn jnúhun ya. ³⁷ Núu iin tēe jéni ni de jeē tēe nácani jnúhun ya jíin tēe névāha Espíritu cúu de, núu súcuan te na cuájnúhún de jeē jniñu ní ndacu Jitoho yō cúu jeē tēe ri yāhá. ³⁸ Te núu tu jétáhú de jnúhun yáha, suni ma cuatáhú yó de.

³⁹ Núu súcuan, ñánī mánī jijnáhan ró, na cóndihvī ni rō nacani ró jnúhun ya, te ma cási rō nuū tēe cácahān sīn sīn yuhu. ⁴⁰ Te yucún yíñúhún na sáha ró táca jniñu.

Jnúhun jeē ní natecu Cristo

15

¹ Hermano jijnáhan ró, vijna te nucūhun ni rō jnúhun jnáma ya yohó jeē ní nacani ri nuū rō. Te jnúhun ún chi je ni cajetáhú ró, te suni cáhiin nihīn ró jíin. ² Te suni jíin jnúhun ún te ni jnama ya rohó, te núu cáhiin nihīn ró jíin jnúhun ni nacani ri nuū rō, te núu tu ní cácadíje cāha ró.

³ Chi jnúhun cánuú gá jeē ni nihīn maá rí ni nastéén rī nuū rō: Jeē ni jíhī Cristo siquī cuéchi yó, nájnūhun je cáhán tutu iī nde jenahán. ⁴ Te ni quindūji ya, te ni natecu yā nuū uní quivī, nájnūhun cáhán tutu iī. ⁵ Te ni nane ya nuū Pedro. Te sáá te ni nane ya nuū ndihúxí gā apóstol. ⁶ Te sáá te ni nane ya nuū víhyá gā uhūn ciento hermano jeē cáyūcu tútú. Te sava i tēcu gā nde vijna, te sava i je ni jihī. ⁷ Te sáá te ni nane ya nuū Jacobo, yūcuán na te nuū ndíhi ga apóstol.

⁸ Te jeē sándihí na te ni nane ya nuū maá rí. Te nájnūhun iin jeē ní cacu yúte, súcuan cúu jeē iin sanaa-ni te ni nduu ri apóstol. ⁹ Chi tēe núu ga nuū tāca gá apóstol cúu ri, te ni nasūu tēe vāha cúu ri jeē cónaní rí apóstol, chi ni jito xeēn rī ñayuu cácadíje nuū

Yaā Dios. ¹⁰ Te siquī jeē ni sáha Yaā Dios jeē váha ruhū, jeē yúcuan cúu ri apóstol vijna. Te jeē ni sáha ya jeē váha ruhū, chi tú cāha ní cúu, chi sa ni scáca ga rī jnūhun ya vēsú tāca gá tēe apóstol. Te nasūu máá rí ni sáha, chi Yaā Dios ni sáha ya jeē váha un jín rí. ¹¹ Núu súcuan te vēsú ruhū chí táca gá tēe ún, súcuan cánacani ri jnūhun, te súcuan ni cacandíje ró.

Jnūhun jeē natecu ndīyi

¹² Te jeē cánacani ri jnūhun Cristo jeē ní natecu yā mēhñu ndīyi, ¿te naun cácahān sava ró jēe ma nátecu ndīyi? ¹³ Chi núu jeē tú natecu ndīyi, te suni tu ní nátecu Cristo nuú. ¹⁴ Te núu jeē tu ní nátecu Cristo, te cánacani cāha rí jnūhun ya nuú, te suni cácaandíje cāha ró núu. ¹⁵ Chi núu jeē súcuan cúu núu, te cácuu ri tēe jeē tu cácahān ndaā jnūhun Yaā Dios, chi ni cacachi rī jeē ní nastécu Yaā Dios Cristo. Te núu jeē tú natecu ndije ndīyi, núu súcuan te tú ndaā jeē ní nastécu Yaā Dios Cristo. ¹⁶ Chi núu tú natecu ndīyi, te ni Cristo suni tu ní nátecu yā nuú. ¹⁷ Te núu tu ní nátecu Cristo, te cácaandíje cāha ró te cándiso iī gā rō cuēchi ró núu. ¹⁸ Te núu jeē súcuan cúu núu, te suni je ni cajnahñu ndetū ñayuu ni cacandíje Cristo. ¹⁹ Chi núu tú natecu ndīyi, te núu máá ñin-ni siquī vida yáha ñūhun ni yō jeē sáha Cristo jeē váha yóhó, núu súcuan te ndahú ndasí gá cácuu yó vēsú tāca gá ñayuu, chi cácaandíje cāha yó nuú.

²⁰ Te tuú chi íyó ndaā jeē ní natecu Cristo mēhñu ndīyi. Te máá yá cúu jeē xíhna gā ni natecu nuú tāca gá ndīyi jeē natecu. ²¹ Chi siquī jeē ni stívi ñin-ni tēe Adán, te ni quejé jíhí ñayuu. Te suni súcuan siquī jeē ni sáha ñin-ni tēe Cristo, te natecu ñayuu. ²² Chi nájñūhun cájihí ndíhi yó síquī jeē cácuu yó yúcūn Adán, suni súcuan natecu ndíhi yó síquī jeē yíhi yó ndaha Cristo. ²³ Te ná ñin ná ñin ndese ndíquín jnáhan máá: Xíhna gā Cristo ni natecu yā, te sáá te quiví ndíji ya te natecu tāca ñayuu yíhi ndaha ya. ²⁴ Yūcuán na te jínu tiempo, te snāā yā poder tāca enemigo jeē cujéhnu jín jēe ndácu jniñu jín jēe iyó poder. Te ndíhi jeē ndácu ya jniñu nuú, nacuaña ya nuú Tatá yā Yaā Dios. ²⁵ Chi cánuú jēe ndacu Cristo jniñu nde quiji quiví jeē quēnde Yaā Dios poder tāca jēe jító uhū nuú Cristo, te stóho ya. ²⁶ Te jeē sándíhí na te snāā yā cuehyi jéhni ñayuu. ²⁷ Chi cáhán tutu iī jeē sáha Yaā Dios jeē cujéhnu Cristo siquī ndíhi, te cuatáhu núu yā. Te jeē cáhán jeē cujéhnu ya nuú ndíhi-ni, te jíní váha yó jēe maá Yaā Dios ma quíhi ya ndaha Cristo, chi Yaā Dios cúu jeē ni chíhi táca un ndaha Cristo. ²⁸ Te ná ni quiví ndíhi ún ndaha Cristo, yūcuán na te suni máá Cristo jeē cúu ya Sēhe, quiví ya ndaha Tatá yā, Yaā jeē ní chíhi táca un ndaha ya. Te súcuan te máá Yaā Dios jniñ ya ndíhi-ni.

²⁹ Te íyó ñayuu cájendute jehē ndīyi. Te núu tú natecu cuiti ndīyi, ¿te najehē cájendute i jehē ndīyi núu súcuan?

³⁰ Te ruhū jijnáhan ri, ¿najehē cúu jeē ndiquiví cájendeyí ni rī jító ri jñundóho cuu rī, te núu tú natecu ndīyi? ³¹ Hermano, nájñūhun íyó ndaā jeē cúsiñ ni rī siquī jeē cácaandíje ró Jítóho yō Jesucristo, suni súcuan íyó ndaā jeē ndiquiví nducú ñayuu cahni ruhū siquī jniñu ya. ³² Te jeē ní ndoho ri ni casáha tēe xeēn ñuu Efeso, jeē cácuu de nájñūhun quití xéén, ¿te na vé nihín rī siquī un núu súcuan? Chi núu tú natecu ndīyi, te cuu cáhán yō nájñūhun áchí ñin jnūhun: Na cúsiñ ni yō caji yō coho yó, chi sanaa te sajnē te cuu yō, achi yō nuú.

³³ Ma cuáha ró jnúhun stáhu ñayuu rohó. Chi áchí ñin jnūhun: Núu cájica ró jín ñayuu neé, te stívi i róhó jēe tuá caca ndaā rō. ³⁴ Nachuhun ni rō jijnáhan ró, te sáha ró jniñu ndaā, te ma sáha ga rō cuēchi. Chi sava ró tu cájini cuiti rō ndese Yaā cúu Yaā Dios. Súcuan cáhán rī návāha na cúcanu rō.

Ndese natecu ndīyi

³⁵ Te sanaa te cáhán ñin ró: ¿Ndese natecu ndīyi? ¿Ndese coo yiqui cúñu i? achi rō. ³⁶ Tu jécūhun cuiti ni rō núu súcuan. Chi cúu nájñūhun jeē cátají ró táca tata chíhi ñuhun návāha nane yucū i. ³⁷ Te tata jeē quiví chíhi ñuhun, núu trigo chí inga tata, chi nasūu yúcū cúu, chi máá núní-ni cúu. ³⁸ Te cuéé gá te cane, chi Yaā Dios ni jēhe ya yucū tata ún, ndese ni nujnahan ni máá yá, te ná ñin ná ñin tata chi sín sín cáa yucū ni sáha ya. ³⁹ Te

suní súcuán tǎcá yǐqui cúñu, chí tú ìnuú cándāa. Chí sǐn cáa ñayuu, te sǐn cáa quítì, te sǐn cáa saa, te sǐn cáa chācá. ⁴⁰ Te suní súcuán cúu tǎca jéē ìn andívì jíin tǎca jéē iyó ñáyǐvì. Te sǐn luu cáa jeē ìn andívì, te sǐn luu cáa jeē iyó ñáyǐvì. ⁴¹ Te sǐn ndíndēe níāndii, te sǐn ndíndēe yóō, te sǐn ndíndēe tǎca quǐmì. Te tǎcá ìn ìn quǐmì chí suní sǐn sǐn ndíndēé. ⁴² Te suní súcuán coo jíin ndíyì jeē natecu. Ndíyì jeē chíndūji yó chí téhyū, te jeē nastécu yā chí ma cúu gā. ⁴³ Jeē chíndūji yó chí ndáhú cáa, te jeē nastécu yā chí luu cujéñu. Jeē chíndūji yó chí tú na fuerza, te jeē nastécu yā chí coo fuerza. ⁴⁴ Jeē chíndūji yó chí ìn yǐqui cúñu cuenta ñayǐvì cúu, te jeē nastécu yā chí ìn yǐqui cúñu cuenta Espírìtu yā cúu. Chí íyó yǐqui cúñu cuenta ñayǐvì, te suní íyó yǐqui cúñu cuenta Espírìtu.

⁴⁵ Chí súcuán yósó núu tútu ì: Adán, tēe xǐhna ñúhún, ní cuvāha de jíin vida cuenta ñayǐvì, áchì. Te Cristo cúu nájñūhun ìnga Adán uū, te máá yá cúu Espírìtu jeē jéhe vida. ⁴⁶ Te nasūú yǐqui cúñu cuenta Espírìtu cúu jeē ní cuvāha xǐhna gā, chí sa suhva yǐqui cúñu cuenta ñayǐvì, te sáá te nduu cuenta Espírìtu. ⁴⁷ Te cuenta ñayǐvì cúu tēe xǐhna ñúhún, chí ní cuvāha de jíin tǎcachā ñuhun. Te Adán uū jeē cúu máá Jítóho yō, chí nde andívì ní quiji ya. ⁴⁸ Te ñayuu ñayǐvì yáha, chí cúu ì jnāhan Adán jeē ní cuvāha jíin tǎcachā ñuhun. Te ñayuu jeē quívicoo andívì, chí ndúu ì nájñūhun máá Yaā ní quiji nde andívì. ⁴⁹ Chí jeē cáa yó nájñūhun tēe ní cuvāha jíin tǎcachā ñuhun, suní súcuán coo yó nájñūhun cáa máá Yaā ní quiji nde andívì.

⁵⁰ Jñūhun yáha cástūhun rí nuū rō jijnáhan ró, hermano, jeē yǐqui cúñu yō cuenta ñayǐvì yáha, ma cúu quǐvì ñuu nuū ndácu Yaā Dios jniñu. Chí jeē jihí cúu, te ma cúu quǐvì nuū cótecu ní cáni. ⁵¹ Te cúnì rī jeē na jécūhun ní rō jñūhun yáha jeē ní yisāhì: Nasūú ndíhì yó cuu, te ndíhì yó chí nasāma yǐqui cúñu yō. ⁵² Chí quǐvì jeē cuécu sandíhì na trompeta, te ìn yachì-nì, nájñūhun ìn jeē nácuenì-nì yó, te nasama ya yohó. Chí cuecu trompeta un, te natecu tǎca ndíyì jeē ma cúu gā ì. Te tǎca yó jeē cátecu yō quǐvì ún, chí nasama ya yǐqui cúñu yō. ⁵³ Chí jeē tehyú yāhá, cánuú nucūhun jeē ma téhyú gā. Te jeē jihí cánuú nucūhun jeē ma cúu cuítì gā. ⁵⁴ Chí jeē jihí jeē tehyú, chí quiji quǐvì jeē nucūhun jeē ma cúu gā ma tehyú gā. Yūcuán na te cundaā jñūhun yósó núu tútu ì: Jíin poder yā ní snāá yā cuehyì jéñni ñayuu. ⁵⁵ Cuehyì jéñni yóhó ¿ndese ga cuu sáha xeēn jíin yó? Chí natecu yō. ¿Te ndese ga cundeyì jíin yó? Chí snāá yā. Achì tutu. ⁵⁶ Chí cuēchi cúu jeē sáha jeē cundeyì cuehyì jéñni ñayuu. Te ley yā jenahán sáha jeē náne cuēchi síquì yō. ⁵⁷ Te na cútahū yō nuū Yaā Dios, chí jíin máá Jítóho yō Jesucristo sáha ya jeē cundeyì yó síquì cuēchi jíin síquì jñūhun cuu yō.

⁵⁸ Jeē yúcuán, ñánì mánì, cuiñì nihìn ró te ma cáca yátá ró jijnáhan ró. Te níni na sájñiñu vāha ró jíin jniñu máá Jítóho yō. Chí je cájini rō jeē tu casájñiñu cāha ró jíin máá Jítóho yō.

Siquì jeē cáquin ì xūhún cuu tǎcá hermano

16

¹ Te vijna te cahān rī síquì xūhun jéē cáquin rō cuu hermano cácadíje cándoho ndáhú. Suní na sáha máá ró jijnáhan ró nájñūhun ní ndacu rì nuū tǎca grupo ñayuu cácadíje ichi Galacia. ² Tǎcá domingo te ná ìn ná ìn ró chuvāha sǐn ró jecu xūhún, núu ndese ní nihìn máá ró, návāha quǐvì jeē jinú rī nuū rō te je íyó túhva. ³ Te jeē jeé rī, te cuāha rì carta nuū tǎca tēe jeē nácāji ró, te tají rí de quingoo de nuū tǎcá hermano cáyūcú Jerusalén, quísíaha de xūhun jéē ní casocō rō. ⁴ Te núu íyó váha jeē quihín rī, te suní quihìn rī jíin de jíināhan de.

Jeē cahán Pablo síquì jeē quícondēhé de ñayuu cácadíje

⁵ Te jeē jeé rī nuū rō jijnáhan ró, te jíni ñúhún jeē xǐhna gā jeē rī región Macedonia, yūcuán na te jeē rī ñuu rō Corinto. ⁶ Te sanaa te quendōo rì jíin ró jijnáhan ró jecu tiempo, chí sanaa te coyūcu yó ní tiempo mǐjin. Yūcuán na te cuu chindéé ñáhán ró ruhū, núu ndé chí quihín tucu rì. ⁷ Chí tu cúnì rī jeē rī nuū rō vijna te yáha yachì rī quihìn rī, chí

ñúhun ni rī jeē quendōo ri jíin ró jecu tiempo, te núu cuāha Jitoho yō jnūhun. ⁸ Te cone ri ñuu Efeso yāhá nde na yáha quivī Pentecostés. ⁹ Chi coo cuehē ñayuu scandíje ri, te vāha quihīn jniñu Jitoho yō. Te suni íyó cuéhē ñayuu cácuu contra.

¹⁰ Te núu na jée Timoteo, te sáha ró jée coo sīi ni de mēhñu ró, te ni ñin ma cáni ni de siquī. Chi suni jniñu máá Jítoho yō sáha de, nájñūhun máá rí. ¹¹ Núu súcuan te ni ñin ró má sajeē ni rō nuū de. Chi sa suhva chindée ñájnáhan ró jíin de jeē na quíhín gā de, te coo ndeyí coo sīi ni de, návāha ndiji de coto jnáhan ri jíin de. Chi ruhū jíin sava ga hermano cándetu ri de.

¹² Te hermano Apolos chi ni cahān ndahú rí jíin de jeē na jée de jíin sava ga hermano, condēhé de rōhó. Te ni jeni ni de jeē ma cúu jeē de vijna. Te núu na núne de te jeē de.

Saludo jeē sándhí

¹³ Ndito coo ni rō jijnáhan ró, te cuiñi ñihin ro jíin jnúhun cácandíje ró. Te téyí na cóo ni rō, te na cóo fuerza ini rō. ¹⁴ Te tāca jée casáha ró, na sáha ró jíin jnúhun cúndáhú ni jnáhan.

¹⁵ Hermano, cájini rō jeē xíhna gā ñayuu vehe Estéfanos ni cacandíje ichi Acaya. Te ni cajēhe i máá i nuū jniñu jeē chindée ñáhán i tācá hermano cácandíje. ¹⁶ Te cúní rī jeē suni máá ró jijnáhan ró, cuatáhú váha ró ñáyuu casáha súcuan, jíin táca ñáyuu cachindée ñájnáhan te cásájniñu siquī jniñu ya. ¹⁷ Cúsīi ni rī jeē ní quijicoo Estéfanos jíin Fortunato jíin Acaico, chi tēe yáha ni cajejniñu de nuū rī jehē rō jeē tu ní cáhīyo ró jíin rí. ¹⁸ Chi ni ndundeyí ni rī, te suni súcuan máá ró jijnáhan ró, ni casáha de. Te cánuú cuajnúhún ró tāca tēe cándāa súcuan.

¹⁹ Sándeyí ni rō jijnáhan ró, áchí táca grupo ñayuu cácandíje cáyūcu Asia. Aquila jíin Priscila jíin ñáyuu cácandíje jeē cándutútú vehe de, cácahān i jeē sándeyí ndasí ni rō jíin jnúhun máá Jítoho yō. ²⁰ Te tācá hermano cácahān i jeē sándeyí ni rō. Te jeē cahán rō jíin táca jnáhan ró, te yíñúhún techūhu ró ndaha i.

²¹ Ruhū Pablo, jíin ndaha máá rí tēe ri jnūhun yáha jeē na sándeyí ni rō jijnáhan ró.

²² Te núu ndé ñin tu íyó manī jíin Jítoho yō Jesucristo, te na jnáhnú ndetū i núu súcuan. Te na cáhán yō: Jitoho ná, cúní na jée yachī ndiji ní.

²³ Te ñúhun ni rī jeē máá Jítoho yō Jesucristo na sáha ga yā jeē váha rōhó jijnáhan ró.

²⁴ Te manī rī jíin ró jijnáhan ró jée cácandíje ró Cristo Jesús. Súcuan na cóo. Amén.

CARTA UU JEE NI TEE SAN PABLO APOSTOL NUU ÑAYUU ÑUU CORINTO

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū nacani ri jnūhun ya. Te ndīndúú rí jín hermano yō Timoteo cátee ri carta yáha cuájeē nuū rohó hermano ñuu Corinto jeē cácanđije ró Yaā Dios, jín núū ndīhi ródó jéē cáyihī ndaha Yaā Dios jeē cáyūcu ní cáhnu Acaya. ² Te cáñuhun ni rī jeē Tatá yō Yaā Dios jín Jítóho yō Jesucristo na sáha ga yā jeē váha ródó te sáha ya jeē coo ndeyí coo sīī ni rō.

Siquī jeē ní ndoho Pablo jnūndóho

³ Na cáhán yō jeē yóhyo cújéhnū Yaā Dios, Yaā cúu Tátá maá Jítóho yō Jesucristo. Chi máá yá cúu Tátá yō jeē cundáhú ni yohó, te níni sáha ya jeē ndúsīī ni yō. ⁴ Chi sáha ya jeē ndúsīī ni yō siquī tāca jnūndóho ndóho yó, návāha suni cuu sáha máá yó jeē ndúsīī ni jnánhan yó jéē cándoho jnūndóho. Chi nájnūhun ni sáha ya jeē ndúsīī ni maá yó, suni súcuan sáha yó jéē ndúsīī ni i. ⁵ Chi jeē ndóho yó cuehē jnūndóho nájnūhun ni ndoho Cristo, suni súcuan nihīn yō cuehē jnūhun ndusīī ni, sáha Cristo. ⁶ Jeē yúcuan núu cándoho ri jnūndóho te súcuan te cuu sáha ri jeē ndúsīī ni rō te quendōo vāha ga anuá rō. Te jeē sáha Yaā Dios jeē ndúsīī ni rī, suu sáha tucu jeē ndúsīī ni maá ró, te quendōo vāha ga anuá rō. Te súcuan te nihīn rō fuerza jeē cuándeýí ni rō jín táca jnūndóho nájnūhun cándoho ri. ⁷ Te cáñuhun ndasí ni rī jeē cúu ródó, chi cájini rī jeē nájnūhun cándoho ró jnūndóho jín rí, suni súcuan ndusīī ni rō jín rí sáha máá Yaā Dios.

⁸ Hermano, cácani rī jeē na cúni rō jijnáhan ró ndese ni candoho ri ichi Asia. Chi yóhyo xeēn jnūndóho ni cajito ri, nde je yajni tuá canda ri, te ni jeni ni rī jeē cuu rī nuú. ⁹ Te siquī jeē ní cajehnde ni rī cuu rī, te yúcuan ní sáha jeē ní cajecūhun ni rī jeē ma ténuū rī maá rí chí tú jniñu ri, chi sa suhva Yaā Dios jeē nastécu ndīyí tenuū rī. ¹⁰ Chi máá yá ni scácu ruhū jijnáhan ri nuū jnūndóho xeēn jeē jé yajni cuu rī nuú, te suni súcuan scácu ya ruhū vijna. Te ñūhun ni rī jeē suni scácu tucu ya ruhū ichi núú gā. ¹¹ Te suni na chindéé ñáhán ró rúhū jijnáhan ri jeē cacān tahu rō jehē rī. Chi núu cuehē ñayuu cacān tahu jehē rī, te suni cuehē i cuu nacuatáhú jehē rī jeē ni sáha ya jeē váha ruhū.

Jeē ní cucuéé Pablo quihīn de ñuu Corinto

¹² Iyó ĩn jeē sáha jeē cácusīī ni rī: Chi vāha íyó ni anuá rī jeē váha ndoo te ndaā ni cajica ri nuū ñayuu ñayīví, te víhyá gā nuū maá ró jijnáhan ró. Chi siquī jeē váha ni Yaā Dios, te ni chindéé ñáhán yá ruhū, te nasūu síquī jéē ndichí máá rí cúu jeē ní cajica ri súcuan. ¹³ Te jnūhun cátee ri nuū tāca carta rī, chí máni jeē cúu cahu ró te jecūhun ni rō cúu. Te ñūhun ni rī jeē jecūhun vāha ga ni rō, ¹⁴ nájnūhun je cájecūhun ni rō jecu. Te súcuan te cuu cusīī ni rō siquī rī quiví ndíji Jítóho yō Jesús, nájnūhun cácusīī ni rī siquī maá ró.

¹⁵ Te siquī jeē súcuan ni cucáhnu ni rī, te jeē yúcuan ní jeni ni rī jeē núu na quihín rī Macedonia te jeē rī nuū maá ró xīhna gā, návāha cusīī ni rō jeē jécondēhe rí rohó úū jínu núú. ¹⁶ Chi ni jeni ni rī jeē jécondēhe rí rohó, te yāha ri quihín rī Macedonia, te jeē nándicó rí Macedonia te ndiji tucu ri nuū rō. Yūcuán na te cuu chindéé ñáhán ró ruhū jeē quihín rī ichi Judea nuú. ¹⁷ Te jeē súcuan ni jeni ni rī, ¿te á tée tu nácani vāha ni cúu ri jeē tu ní jéé rī nuū rō, chí naún? ¿A cájeni ni rō jeē cúu ri nájnūhun ñayuu ñayīví jéē yachī cáhán jeē cuu, yūcuán na te tuú, chí naún? ¹⁸ Tuú chí máá Yaā Dios jíní yā jeē tu cáhán rī jín ró jeē cuu, te yachī nácahān rī jeē ma cúu. ¹⁹ Chi ruhū jín Silvano jín Timoteo ni canacani ri jnūhun Jesucristo Sēhe Yaā Dios nuū rō jijnáhan ró. Te máá yá tu cáhán yā jeē cuu te nacahān tucu ya jeē ma cúu. Chi squícu ya jeē cáhán yā. ²⁰ Chi ndīhi jeē ni jéjnūhun Yaā Dios, squícu máá Cristo. Te jeē yúcuan cácahān yō jeē yóhyo luu cújéhnū Yaā Dios, te cácahān yō Amén, chi ndīhi squícu Cristo Jesús. ²¹ Te Yaā Dios cúu jeē sáha jeē ruhū jijnáhan ri jín ródó jijnáhan ró, cáhīn nihīn yó jín Cristo, te ni

sándoo ya yohó jéē cuajníñu yó núū yā. ²² Te suni ni jēhe ya Espiritu yā jeē cóndee ini anuá yō, te cúu ya nájnūhun ñn sello jeē steén jeē cúu yó séhe Yaā Dios. Te sáha Espiritu jeē iyó ndāā ni yō jeē cuāha Yaā Dios tahū yō.

²³ Te jeē ná tu jeē rī nuū rō ñuu Corinto, nájnūhun ni jeni ni rī, suu cúu siquī jeē tu ní cúní rī cuxeēn rī nuū rō jeē tu cásáha vāha ró. Te máá Yaā Dios cúu Yaā jiní jeē cahán ndaā rī. Te íyó váha jeē na cúu rī te núu tu cáhán ndaā rī. ²⁴ Te nasūu jéē cécuni rī ndacu nīhin ri jniñu nuū rō siquī jnūhun cécandíje ró yá, chi je cáhiin nīhin ro jíin jnūhun ún. Chi sa suhva cécuni rī chindéé ñáhán rí rohó jéē na cúsiñ gā ni rō.

2

¹ Núu súcuan te ni jeni ni rī jeē ma jéé rī inga jínu nuū rō jíin jnūhun cuxeēn rī te cucuíhyá ni rō sáha rí. ² Chi núu cucuíhyá ni rō sáha rí, ¿te ndé ñáyuu sáha jeē cusī ni maá rí? Tuá na inga ñáyuu, chi máni máá róhó, te ndese cuu te núu ni sáha rí jeē cucuíhyá ni rō. ³ Te jeē yúcuan cúu jeē ní tee ri carta un núū rō, návāha nacani ni rō siquī cuéchi ró sáha, te ma cucuíhyá ni rī sáha cuéchi ró quívi jeé rī nuū rō. Chi sa suhva sáha ró jéē cúsiñ ni rī. Te jíni vāha ri jeē núu cusī ni rī, te suni ndíhi ró jíinánhan ró cusī ni rō. ⁴ Te jeē ní tee ri carta un núū rō, te yōhyo ni nacani ni rī siquī rō, te ni jnahuhū ni rī, te nde ndahyú rī ni tee ri. Te tu ní tée ri jeē sáha ri jeē cucuíhyá ni rō, chi sa suhva návāha cuni rō ndese yōhyo manī rī jíin ró.

Jeē íne cáhnu ni Pablo nuū tée ni sáha cuéchi

⁵ Te jeē ní cucuíhyá ni rī ni sáha tēe jeē ni sáha cuéchi ún, te nasūu máá-ni ri, chi suni nde máá ró jíinánhan ró ni sáha de jeē ní cacucuíhyá ni rō jecu. Te cáhán rī jeē jecu-ni, chi tu cúní rī cuxeēn ndasí rí. ⁶ Te jíin jéē ní cacuxeēn rō nuū de ná ni candutútú ró, te jíin yúcuan-ni te ni cuu-ni. ⁷ Te vijna chi jíni ñúhún jeē cóne cáhnu ni rō nuū de, te sáha ró jéē ndúsī ni de, chi sanaa te caa ga cucuíhyá ni de, te ma ndúsī gā ni de. ⁸ Núu súcuan te cáhán ndahú rí jíin ró jíinánhan ró jéē steén tucu ró jéē iyó máni rō jíin de. ⁹ Chi jeē siquí jniñu yáha cúu jeē ní tee ri carta un núū rō, návāha coto ndee rī rohó núu cuatáhú váha ró jniñu ndácu ri nuū rō. ¹⁰ Núu súcuan te núu íne cáhnu ni rō nuū ñáyuu, te suni súcuan ruhū. Chi jeē íne cáhnu ni rī nuū ñáyuu núu ni sáha i cuéchi, te sáha ri súcuan siquī jeē maní rī jíin ró jíto jínuú Cristo. ¹¹ Chi cánuú cone cáhnu ni yō, chi tu cúní yō jeē nihín Satanás cuéchi siquī yō, chi je jíni vāha yó ndese ndúcú un stáhú yóhó sáha yó cuéchi.

Jeē tu ní íyo nayúú ni Pablo ini ñuu Troas

¹² Ná ni jehēn rī ñuu Troas jeē nácani ri jnūhun Jitoho yō Cristo, te vāha ni sáha ya jeē ni íyo modo jeē nácani ri jnūhun ya. ¹³ Te vésú súcuan te tu ní íyo nayúú ni anuá rī, chi tu ní níjnánhan ri jíin hermano yō Tito. Yūcuán na te ni nacuatáhú rí nuū ñáyuu yūcuán, te cuananducú rí de ichi Macedonia.

Jnūhun jeē cujéhnu ndúú yó jíin Cristo

¹⁴ Te na cútahū yō nuū Yaā Dios, chi níni ndéca vāha ya yohó cuángoo yó jíin Cristo Jesús, te ndúú yó jíin yá jeē cujéhnu ndasí yá snáā yā poder ndíhi enemigo yā. Te jéjníñu ya yohó jéē scuité núu yó jnūhun ya tācá-ni lugar, nájnūhun jíte núu ñn xicō asīn. ¹⁵ Te cúu yó nájnūhun ñn sūje jeē jeén asīn nuū Yaā Dios sáha Cristo. Te nájnūhun jeē jinú xicō un núū ñáyuu cācu ánuá jíin núū ñáyuu jnahnū ndetū. ¹⁶ Nuū ñáyuu jnahnū ndetū chi cúu yó nájnūhun ñn xicō jeē cúu i sáha, te nuū ñáyuu cācu ánuá chi cúu yó nájnūhun ñn xicō váha jeē cótecu i sáha. Te ni ñn yó ma cánda yó sáha yó jniñu yáha, te núu ma chindéé ñáhán yá yohó. ¹⁷ Te ruhū jíinánhan ri, tu cásáha ri nájnūhun cásáha cuehē tēe jeē cánducú de nihín de xūhun siquī jnūhun Yaā Dios. Chi sa cánacani ndaā rī jnūhun ya, chi máá Yaā Dios ni tají rúhū, te máá yá jiní jeē cánacani ndaā rī siquī jeē cécandíje ri Cristo.

Jnūhun siquī contrato jeé

3

¹ Te jeē cácahān rī súcuan, ¿te á cájeni ni rō jeē cánducú tucu ri cahān rī jeē váha ga tēe cácuu ri, chí naún? ¿Te chí jíni ñúhún jeē steén rī carta recomendación nuū rō, chí jeē cacán rī cuāha ró núu rī jijnáhan ri, nájnūhun cásáha sava i? ² Tuú chi máa-ni ró cácuu nájnūhun ñn carta recomendación rī. Te jeē ñúhún ni rī jeē ní cacandíje váha ró ni sáha ri, suu cúu nájnūhun jeē yosó jnúhun carta un ini anuá rī. Te ndíhi ñayuu chi nájnūhun cáhu i, cúu jeē jiní i ndese ni nasāma ró. ³ Chi máa ró cácuu nájnūhun ñn carta jeē ní tee Cristo te cáscaca ri. Te nasūu jíin tinta ni tee ya, chi sa suhva jíin Espíritu Yaā Dios, Yaā técu. Te nasūu núu tabla yuū nájnūhun ni tee ya ley yā, chi sa suhva nuū anuá ñayuu ni tee ya.

⁴ Te cácahān rī súcuan, chi cácucahnu ni rī Yaā Dios siquī jeē ni sáha Cristo. ⁵ Te nasūu jeē cájeni ni rī jeē cúu canda máa rí sáha ri jniñu ún. Chi sa suhva máa Yaā Dios sáha jeē cuu squícu ri. ⁶ Te máa yá ni sáha jeē cuu cuajniñu váha ri siquī contrato jeé yá. Te contrato yáha tu cáhán jeē squícu yó ley jeē ní tee jíin letra, chi sa suhva jeē caca yó jíin vida jeé, suu jeē ni jéhe Espíritu yā. Chi contrato ley jeē yosó jíin letra, jnahnū ndetū ñayuu sáha. Te jeē sáha máa Espíritu cúu jeē cótecu yō ní cáni.

⁷ Te ley jenahán jeē ni jéhe ya nuū Moisés, ni yosó letra nuū tabla yuū. Te yōhyo ni kujéhnu, te ni ndindēe ndasí ni sáha, te nde Moisés ndíi nuū de ni sáha. Te tu ní cúu coto váha ñayuu Israel nuū de ni sáha. Te vēsú súcuan te cuéé-ni cuéé-ni ni ndahvā jeē ndíndēe núu de. Te núu súcuan ni kujéhnu ndasí ley jeē sáha jeē cuu ñayuu te jnahnū ndetū i, ⁸ te sa víhyá gā kujéhnu ndasí gá jnūhun cotecu yō jeē jéhe Espíritu nuū yō. ⁹ Chi núu yōhyo ni kujéhnu ley un jéē jnahnū ndetū ñayuu sáha, te sa víhyá gā kujéhnu jnūhun jeē ndáhva Yaā Dios cuéchi yó. ¹⁰ Chi ley un jéē ní kujéhnu nde saá, tuá kujéhnu cuítí, siquī jeē kujéhnu ndasí gá jnūhun Espíritu jeē iyó vijna. ¹¹ Te núu súcuan ni kujéhnu ley jeē ni íyo jecu-ni tiempo, te sa kujéhnu ndasí gá jnūhun jeē coo ní cáni.

¹² Te jeē súcuan cáñuhun ni rī, jeē yúcuan cáhīyo téyí ni rī nácani ri jnūhun yáha. ¹³ Chi tu cásáha ri nájnūhun ni sáha Moisés jeē ní jesi de ñn sahma nuū de, návāha tú coto ñayuu Israel ndese cuandahvā jeē ní ndíndēe núu de. ¹⁴ Te ñayuu ún tu ní cájecūhun ni i. Te nde vijna núu cácahu ñayuu Israel tutu contrato ley jenahán, suni tu cájecūhun ni i, chi nájnūhun jesi sahma un núu jeē níjnūní i, te tu cújiyo cuítí. Chi nde jeē candíje i Cristo, yūcuán na te cujiyo. ¹⁵ Te suni súcuan nde vijna núu cácahu i tutu ley Moisés, te nájnūhun jeē jesi ñn sahma nuū jeē níjnūní i. ¹⁶ Te jeē násāma ini ñn ñayuu quívi i nuū máa Jítoho yō Cristo, yūcuán na te cújiyo-ni jeē jesi ún. ¹⁷ Chi Jítoho yō cúu máa Espíritu. Te nuū íne Espíritu máa Jítoho yō, yūcuán cúu nuū iyó libre ñayuu jeē tuá yíhi i chíji ley jenahán. ¹⁸ Te jeē yúcuan máa yó jijnáhan yó, tuá jesi nuū jeē níjnūní yō. Chi cácuu yó nájnūhun espejo jeē jéhe nduva, cúu jeē cájica ndaā yō te suu steén ndese yōhyo luu cújéhnu máa Jítoho yō. Te máa yó tāca quívi cuanasāma yó cuanduu luu ga anuá yō nájnūhun cáa máa yá. Chi máa Jítoho yō jeē cúu ya Espíritu, súcuan sáha ya jíin yó.

4

¹ Núu súcuan te tu ndínuu ni rī cánacani ri jnūhun ya. Chi siquī jeē ní cundáhú ni yā ruhū jijnáhan ri te ni jéhe ya jniñu yáha nuū rī. ² Te tu cásáha ri jniñu néé jéē cúcanu yō sáha, ni tu cájica cuu ri jíin jnúhun ndíchí stáhú, ni tu cásama ri jnūhun Yaā Dios. Chi sa suhva cácahān rī máni jnūhun ndaā. Te súcuan te cuu cuni tāca ñáyuu ini anuá i jeē cácahān ndaā rī jíto jíinúu Yaā Dios. ³ Te núu iyó ñáyuu tu jécūhun ni jnūhun jnama ya yohó jéē cánacani ri, te súcuan cúu nuū máni máa ñáyuu jnahnū ndetū. ⁴ Te jeē tu cacandíje i, te máa jéxeén jeē ndácu jniñu ini ñayívi yáha, ní jesi nuū jeē níjnūní i, návāha ma ndíndēe jnúhun Cristo ini anuá i, te ma cúni i jeē yóhyo luu cújéhnu Cristo, Yaā jeē ínuú cáa jíin Yaā Dios. ⁵ Te jeē cánacani ri jnūhun, te nasūu jnúhun máa rí, chi sa suhva jnūhun Jítoho yō Jesucristo cánacani ri. Te máa rí chi cácuu ri mozo-ni nuū rō jijnáhan ró jéē siquī jeē maní rī jíin Jesús. ⁶ Chi ná ni sáha Yaā Dios ñayívi te ni cahān yā jeē na cundijin nuū néé. Te suni súcuan ni sáha ya jeē ní cundijin nuū anuá yō jeē cájecūhun ni

yō siquī Jesucristo, ndese ndíndēe núū yā, cúu jeē yōhyo luu cújéhnū ya nájñūhun cúu Yaā Dios.

Jeē cándiquīn yō jñūhun cáccandíje yó yá

⁷ Te tāca jñūhun yáha jeē yóhyo luu cújéhnū, chi nájñūhun jeē ñūhun ini ññ quīsi ñūhun. Chi cácuu yó nájñūhun quīsi ñūhun, chi tú na fuerza yō. Te jeē yúcuan cájini vāha ri jeē maá Yaā Dios cúu jeē jéhe poder siquī jñūhun yáha jeē yóhyo luu cújéhnū, te nasūu fuerza maá rí cúu. ⁸ Te jeē yúcuan, vēsú tāca lado cájito ri jñūndóho, te tu sáha jeē ma ndúsñ gā ni rī. Te vēsú cáccuñhyá ni rī siquī jñūndóho, te cáñūhun ni rī jeē quee vāha jñiñu ri. ⁹ Te vēsú cájito xeñ ñayuu ruhū, te maá yá tu stóo ya ruhū jijnáhan ri. Te vēsú cánducú i snāā i ruhū jín jñiñu sáha ri, te ma cúu. ¹⁰ Te ndé-ni cúu nuū cuángoo ri, te nájñūhun ni ndoho Jesús jeē ni jíhī yā, suni súcuan cándoho ri jeē jé yajni cuu rī, návāha suni cuu stéén rī fuerza Jesús jeē técu yā ini yiqui cúñu rī. ¹¹ Chi jeē niní cátecu rī, te tāca quívī je yajni cahni ñayuu ruhū jeē siquī Jesús. Te súcuan te cájito ñayuu jeē técu Jesús ini yiqui cúñu rī jeē cúu. ¹² Núu súcuan te ruhū jijnáhan ri, níní cúu jeē jé yajni cuu rī siquī jñūhun ya, te yúcuan sáha jeē cotecu maá ró ññ cáni jijnáhan ró.

¹³ Te yósó núū tútu i: Ni candíje ri te jeē yúcuan ní cahān rī, achí. Te suni jeē cáccandíje maá rí cúu jeē cáncani ri jñūhun ya. ¹⁴ Chi cájini rī jeē maá Yaā jeē ní nastécu Jitoho yō Jesús, suni súcuan nastécu yā ruhū, te sáha ya jeē ññ cáhnu ni cuiñi ndíhi yó núū yā. ¹⁵ Chi tāca jñūndóho yáha cándoho ri návāha coo vāha ró jijnáhan ró. Te súcuan te cayā cuehē gā ñayuu jeē sáha ya jeē vāha i. Yūcuán na te suni yōhyo cuehē i nacuatáhu i nuū Yaā Dios, te kujéhnū ga yā sáha.

¹⁶ Jeē yúcuan cúu jeē tu ndínuu ni rī, te vēsú cuandíhi fuerza yiqui cúñu rī, te sa suhva cuanduu fuerza gā anuá rī tāca quívī. ¹⁷ Chi jñūndóho jeē ndóho yó ñayivī yáha, tú-ni xeñ cúu, te yachī yāha. Te sáha jeē nihín yō ññ tahū jeē kujéhnū yó ññ cáni jeē cá ndasí gá vēsú jñūndóho ún. ¹⁸ Te tu táñúhún yó nuū tāca jñūndóho jíto yó núū vijna, chi sa suhva táñúhún yó nuū tāca jéē vāha jeē tu jíto yó núū vijna. Chi tāca jéē jíto yó núū vijna, chi yachī ndíhi, te tāca jéē tu jíto yó núu, chi coo ññ cáni.

5

¹ Chi yiqui cúñu yō jeē ndeé yó ñayivī yáha, cúu nájñūhun ññ vehe jeē náā. Te cájini yō jeē núu na náā, te cuāha Yaā Dios ññ yiqui cúñu jeé, te suu cúu nájñūhun ññ vehe jeé coo ññ cáni ichi ándiví. Te nasūú ññ vehe jeé sáha ñayuu cúu, chi jeé sáha Yaā Dios cúu. ² Te níní jéē ndeé yó vehe yáha jeé cúu yiqui cúñu yō, te cájitū ni yō sáha, chi yōhyo cúní yō jeé núcūhun yó yiqui cúñu jeé yó nde ándiví. ³ Chi jeé núcūhun yó un, te ma cóo máá na anuá yō jeé náā yiqui cúñu yō yáha. ⁴ Chi níní jéē iyó gá yō ini vehe yiqui cúñu yō yáha, te jíto ni yō te cúcuñhyá ni yō. Te nasūu jéē cuní yō jeé stóo yó yiqui cúñu yō te coo máá-ni ánuá yō. Chi sa suhva cúní yō nucūhun yó jéē jeé, návāha ndahvā yiqui cúñu yō jeé náā, te coo máá jéē cótecu ññ cáni. ⁵ Te Yaā Dios cúu jeē ni sáha ya jeé súcuan coo yó. Te ni jéhe ya Espíritu yā jeé cóndee ini anuá yō, te sáha Espíritu jeé iyó ndáā ni yō jeé cuāha Yaā Dios tahū yō.

⁶ Núu súcuan te níní cúu jeé cáccacáhnū ni rī. Chi cájini rī jeé niní ndeé gá rī chíji yiqui cúñu yáha, te jíca cúu ri jíñ núu ndeé máá Jitoho yō. ⁷ Chi vijna chi cáccandíje ri jeé iyó yá jíñ rí, vēsú ná tu coto ri nuū yā. ⁸ Te cáccacáhnū ni rī, chi sáha ri cuenta jeē vāha ga núu na quénda ri chíji yiqui cúñu yáha te quihīn rī condee rī jíñ máá Jitoho yō. ⁹ Jeē yúcuan cúu jeé cánducú ndeyí rí sáha ri jeé cusñ ni yā jíñ rí, vēsú núu ndeé gá rī yiqui cúñu rī chí vēsú núu condee rī jíñ yá. ¹⁰ Chi cánuú jéē ndíhi yó cuiñi yuhu mesa Cristo jeé sándaā yā jñiñu yó. Te ná ññ ná ññ yó níhīn yō siquī ndese ni casáha yó, á jéē vāha chí jéē neé, ná ni condee yō chíji yiqui cúñu yō.

Siquī jeē ndávicoo yó núu jñūhun manī Yaā Dios jíñ yó

¹¹ Núu súcuan te cándiso iyo ri nuū maá Jitoho yō, te jeē yúcuan ndúcú ndeyí rí scandíje ri ñayuu. Te jíñí Yaā Dios jeé cáhīyo ndāā rī, te ñūhun ni rī jeē suni súcuan cájini maá ró.

¹² Te nasūu jéē cánducú tucu ri cahān rī jeē vāha ga tēe cácuu ri, chi sa suhva cástūhun

rí jeē cuu cusī ni rō jeē siquī rī jijnáhan ri. Te súcuan te cuu stío cuñí rō nuū ñáyuu jeē cutéyí i siquī ndese cáa ñayuu, te tu sáha i cuenta ndese cáa ini anuá ñayuu. ¹³ Te va sanaa te cájeni ni rō jeē tée loco cácuu ri jeē cácahān rī súcuan. Te siquī jeē cándihvī ni rī jehē Yaā Dios cúu. Te tuú chi cáhīyo vāha xinī rī, te jeē yúcuan cájejniñū ri jeē quéndō vāha ró. ¹⁴ Chi siquī jeē ní cundáhú ni Cristo ruhū jijnáhan ri cúu jeē cánuú nacani ri jnūhun ya. Chi cájini vāha ri jeē ni jīhī mañúhún-ni ya jeē siquī ndīhi yó, te jeē yúcuan nájñūhun ni jīhī ndīhi yó jíin yá. ¹⁵ Chi ni jīhī yā jeē siquī ndīhi yó návāha tāca yó jēé técu, ma cótecu ga yō jeē sáha yó jēé cuní maá yó, chi sa suhva jeē cuní maá yá jeē ni jīhī yā te ni natecu yā jeē siquī yō. ¹⁶ Jeē yúcuan tuá casáha ri cuenta ndese-ni cándāa ñayuu, nájñūhun casáha ñayuu ñayīví. Te vēsú súcuan ni casáha ri cuenta siquī Cristo nde saá, jeē ñn tēe-ni cúu ya, te vijna chi cájini rī jeē cúu ya Sēhe Yaā Dios. ¹⁷ Chi núu ñn ñayuu yīhi i ndaha Cristo, te je ni ndujeé i. Te tāca modo neé ní nevāha i, je ni yāha cuahān, te vijna je ni ndujeé ndīhi.

¹⁸ Te Yaā Dios cúu jeē sáha ndīhi jeē yáha, chi jíin Cristo ni sáha ya jeē ní ndīvicoo yó núu jnúhun manī yā jíin yó. Te ni tejníñū ya ruhū jeē cánacani ri jnūhun jeē ndīvicoo ñayuu nuū jnúhun manī yā jíin i. ¹⁹ Chi jíin Cristo te ni sáha Yaā Dios jeē ñáyuu ñayīví ndīvicoo i nuū jnúhun manī yā jíin i. Te tu ndácunehen ya cuēchi ni casáha ñayuu. Te ni tejníñū ya ruhū jeē cánacani ri jnūhun yáha ndese ndīvicoo i nuū jnúhun manī yā jíin i. ²⁰ Núu súcuan te cácuu ri tēe cájica jniñū máa Cristo. Te jeē cahán rī, te nájñūhun jeē maá Yaā Dios cahán ndahú yá jíin ró. Núu súcuan te cácahān ndahú rí jíin ró jeē cahán Cristo, jeē na ndīvicoo ró núu jnúhun manī Yaā Dios jíin ró. ²¹ Te Cristo, vēsú tú ni ñn cuēchi ya, te ni sáha Yaā Dios jeē ní nucondee cuēchi yó síquī yā. Te súcuan te yóhó jéé yīhi ndaha Cristo, ni nucondee siquī yō jeē iyó ndāa yō nájñūhun iyó ndāa Yaā Dios.

6

¹ Núu súcuan te siquī jeē cácuu ri tēe casájniñū jíin yá, te cácahān ndahú rí jíin ró jeē ma stóo uun ró jnúhun jeē ni sáha Yaā Dios jeē váha róhó. ² Chi áchí yá nuū tútu i:

Maá tiempo cuní maá rí te cuni sōho rí jnūhun cáhān ndahú ró jíin rí.

Te maá tiempo jnáma ri ñayuu, te jnama ri rohó.

Achí yá. Te vijna-ni cúu maá tiempo jeē cuní yā, chi vijna-ni cúu tiempo ni quiji Yaā jnáma yóhó.

³ Te cánducú rí jeē ma sáha ri ni ñn jniñū jeē casi jeē candíje ñayuu, návāha ma cahán i siquī jniñū ndíso ri. ⁴ Chi sa suhva cánducú rí jeē ndīhi jeē sáha ri, steén jeē cácuu ri tēe cájejniñū nuū Yaā Dios. Jeē yúcuan cájendeyí ni rī jíin jēé ndóho ri jnūndóho, jíin jēé cúmani nuū rī, jíin jēé yī sáha jíin rí. ⁵ Chi ni íyo tijní jínu jeē ní cacani i ruhū, jeē ní cachune i ruhū vecāa, jeē ní candonda i siquī rī, jeē ní casájniñū ñihin ri, jeē ní cajehni rī māhna máa rí, jeē ní cahīyo ndite ni rī. ⁶ Te suni cánducú rí jeē cuajnúhún i ruhū siquī jeē ndoo cájica ri, te cájecūhun vāha ni rī jnūhun ndāa, te cáhīyo paciencia ni rī, te vāha ni rī, te ndéé Espíritu Santo ini rī, te cákundáhú ndije ni rī jnáhan ri. ⁷ Te cánacani ndāa rī jnūhun, te poder Yaā Dios íne jíin rí. Te jíin jnúhun ndāa cándahva rī tācá jniñū néé, chi nájñūhun jeē cájejnáhan ri siquī. Chi nájñūhun jeē ndóna un síquī rí te ndóna ri siquī. ⁸ Iyó jínu yíñúhún ñáyuu jíin rí, te iyó jínu tuú. Iyó jínu jéjñúhún i ruhū, te iyó jínu cácahān i siquī rī. Iyó jínu cácahān i jeē tēe stáhú cácuu ri, te iyó jínu cácahān i jeē tēe ndāa cácuu ri. ⁹ Iyó jínu casáha i nájñūhun jeē tu jíin i ruhū jijnáhan ri, te iyó jínu jeē jíin vāha i ruhū. Iyó jínu jeē cuní ñayuu cahni i ruhū, te cátecu nahín rí. Te vēsú cástóho i ruhū, te tu cájihī rī sáha. ¹⁰ Te vēsú iyó jēé cácuuhyá ni rī, te níiní cácusī ni rī. Te vēsú tēe ndáhú cácuu ri, te sácúcá rí cuehē ñayuu jíin jnúhun ya. Te vēsú tú na vé cánevāha ri, te jíin máa yá te ndīhi-ni cúu jeē cánevāha ri.

¹¹ Hermano ñuu Corinto, súcuan cúu jeē cácahān cají rí jíin ró jijnáhan ró, chi siquī jeē maní rī jíin ró, jeē yúcuan cáchí ndīhi ri ndese cándoho ri. ¹² Maá rí jijnáhan ri cácahān cají rí siquī jeē maní ndasí rí jíin ró, te maá ró jijnáhan ró sanaa te tu súcuan

cúu. ¹³ Nájñūhun cáhán tatá jíñ séhe, súcuan cáhán ndahú rí jíñ ró jeē nájñūhun íyo mánī rī jíñ ró, súcuan na cóo manī tucu ró jíñ rí.

Siquē jeē cúu yó templo Yaā Dios

¹⁴ Ma quívi nduu rō jíñ jñiñu néé cásáha ñayuu tu cávandíje, chi ma cúu coo inuú ró jíñ i. ¿Chi ndese cuu quiñáhan jñiñu cásáha ñayuu ndaā jíñ jñiñu cásáha ñayuu tú ndaā? ¿Te ndese cuu coyūcú inuú ñáyuu cájica jíñ luz yā jíñ ñáyuu cájica nájñūhun nuū néé? ¹⁵ ¿Ndese cuu coo inuú ni Cristo jíñ Satanás? ¿Te ndese cuu cuiñi cáhnu ñayuu cávandíje jíñ ñáyuu tu cávandíje? ¹⁶ ¿Te ndese cuu quiñáhan templo Yaā Dios jíñ ídolo? Chi máá ró cácuu templo Yaā Dios, Yaā técu, chi ndéé yá ini anuá rō, nájñūhun ni cahān yā:

Condee rī ini i te caca cuu ri mēhñú i,
te cuu ri Yaā Dios máá i,
te cuu i ñayuu máá rí.

¹⁷ Te jeē yúcuu ní cahān gā yā:

Ma quívi nduu rō jíñ jñiñu néé cásáha i,
te cusñ rō jijnáhan ró, áchí Jítóho yō.

Te ma jñí ró tāca jéé tú ndaā.

Yūcuán na te naquihin ri rohó,

¹⁸ te cuu ri Tatá rō jijnáhan ró,
te cuu ró séhe yí rí jíñ séhe síhí rí,
áchí Jítóho yō, Yaā jñí ndihí poder.
Achí tutu.

7

¹ Núu súcuan, ñánī mánī, cánevāha yó tāca jñūhun yáha jéé ni jéjñūhun ya. Jeē yúcuu na sándoo yó máá yó tāca jéé sajnéhén yiqui cúñu yō jíñ ánuá yō. Te na cóonso íyo yó núu Yaā Dios, te coo ndoo coo ii yō nuū yā jíñ ndihí jñiñu cúní yā.

Jeē ní canacani ni ñayuu Corinto siquē cuéchi i

² Coo manī rō jíñ rí jijnáhan ró víi. Chi tu ní sáha ri falta nuū ní ññ ró, te tu ní stívi rí anuá ni ññ ró, te ni ññ ró tu ní stáhú rí. ³ Te nasūu jéé nducú rí cahān rī nuū rō cúu jeē cahān rī súcuan, chi je ni cahān rī jeē yóhyo manī rī jíñ ró. Te níní ññhun ni rī rohó, vésú cuu yō chí cotecu yō. ⁴ Te cúcáhnu ndasí ni rī rohó jijnáhan ró, te cúsiñ teyí ni rī jeē siquí rō. Te vésú cájito ri tāca jñúndóho yáha, te íyó ndeyí ni rī te cúsiñ ndasí ni rī jeē siquí rō.

⁵ Ná ni jengoo ri Macedonia te tu ní íyo nayúú ni anuá rī, chi sa suhva yí ní íyo jñúndóho jíñ rí tāca lado. Chi ni íyo jeē ní castáhān jñáhan jíñ rí, te ni cayūhu rí sanaa te caca yátá ñáyuu cávandíje. ⁶ Te Yaā Dios jeē sáha jeē ndúndeyí ni ñayuu cácuuíhyá ni, ni sáha ya jeē ní candundeyí ni rī, chi ni quiji Tito ni sáha ya. ⁷ Te ni candusiñ ni rī, nasūu máá ññ-ni siquē jeē ní quiji de, chi suni jeē ní ndundeyí ni de ni casáha ró. Chi ni castūhún de jeē cáñuhun ni rō coto tucu ró rúhū, jíñ jéé cácuuíhyá ni rō jeē siquí cuéchi ró, jíñ jéé canacani ni rō jehē rī. Te jeē yúcuu ní cusñ gā ni rī.

⁸ Te carta jeē ní tají rí nuū rō, vésú ni sáha jeē ní cacucuíhyá ni rō, te tuá nácani cuíhyá ni rī jeē ni sáha súcuan. Chi vésú ni cucuíhyá ni rī saá, te vijna te tuá, chi jíñ rī jeē jecu-ni quiví ni cacucuíhyá ni rō ni sáha. ⁹ Te vijna te cúsiñ ni rī, te nasūu síquē máá jéé ní cacucuíhyá ni rō. Chi cúsiñ ni rī jeē ní jejniñu jeē ní cacucuíhyá ni rō, chi ni sáha jeē ní canacani ni rō siquē cuéchi ró. Chi ni cacucuíhyá ni rō nájñūhun cúní máá Yaā Dios, te nasūu jéé ni sáhuhū rī rohó. ¹⁰ Chi núu cúcuuíhyá ni yō nájñūhun cúní Yaā Dios, te suu sáha jeē nácani ni yō siquē cuéchi yó te jnama ya yohó, te ma cóo ga jeē nácani cuíhyá ni yō. Te jeē cácuuíhyá ni ñayuu tu cávandíje, tu jéjniñu jeē nácani ni i, chi sa jnahnū ndetū i. ¹¹ Te ni cacucuíhyá ni rō nájñūhun cúní Yaā Dios, te vijna te cájito ró náa vāha ni jejniñu. Chi ni canacani ndasí ni rō ni sáha, te ni canducú ró jeē quéndōo ndaā rō, te ni cacuxeēn rō nuū téé ni sáha cuéchi, te ni cayūhu ró jeē ní castívi ró núu yā. Yūcuán na

te yōhyo ni cacuni rō coto tucu ró núu rī, te yōhyo ni candihvī ni rō ni cacuxeēn rō nuū tēe ni sāha cuēchi ún. Te súcuan ni castéén rō jeē tú cuēchi ró, chi tu ní cájejnúhún ró cuēchi ni sāha tēe ún. ¹² Te jeē ní tee ri carta un, nasūu máa-ni jeē cúxeēn rī nuū tēe ni sāha cuēchi ún, ni nasūu máa-ni jeē cahán rī jehē tēe ni ndoho ni sāha de. Chi sa suhva ni tee ri návāha nucūhun ni rō ndese yōhyo ni canacani ni rō jehē rī jító jínúu Yaā Dios. ¹³ Jeē yúcuan ní candusiñ ni rī jeē siquí rō.

Te víhyá gā ni cacusiñ ni rī jeē ní jini rī jeē cúsiñ ni Tito, chi ni nduu nayúu ini de ni casáha ró. ¹⁴ Chi je ni cahán rī jíin de jeē cúsiñ ni rī jeē váha ñayuu cácuu ró, te vijna te tu ní quéndōo rī jnūhun canu jeē siquí rō. Chi nájnūhun ni cajini rō jeē iyó ndāā tāca jnúhun ni cacahán rī jíin ró, suni súcuan ni cundaā jnūhun ni cacahán rī jíin Tito jeē cúsiñ ni rī siquí rō jeē váha cásquicu ró. ¹⁵ Te víhyá gā manī de jíin ró vijna jeē ñūhun ni de jeē váha ni cajetáhú ró jeē cahán de, te ni cahīyo yíñúhún ró ni candiso iyo ró núu de. ¹⁶ Núu súcuan te cúsiñ ni rī siquí jeē cucáhu ndasí ni rī rohó jijnáhan ró.

Jeē na cúsiñ ni i socō i cuehē

8

¹ Hermano, vijna te suni cácuu rī castūhun rí nuū rō jijnáhan ró ndese cuehē jeē váha ni sāha Yaā Dios jíin ñayuu cácuu Macedonia. ² Chi vēsú yōhyo ni jito ndee jnūndóho i, te suni yōhyo ni cacusiñ ni i jíin jnúhun ya. Te vēsú ñayuu ndahú ndasí cácuu i, te yōhyo váha ni cajequin i cuehē xūhun jéé cúu ñayuu ndahú cácuu. ³ Chi cúu ri testigo jeē ní cacusiñ ni máa i ni cajēhe i ndésaa ni canda i, te nde vihyá gā ni cajēhe i. ⁴ Chi ni cacahán ndahú ndasí i jíin rí jeē na cuáha rī jnūhun chindéé ñáhán i jíin yó cuāha i xūhún cuu hermano cándoho ndahú. ⁵ Te víhyá gā ni casáha i vēsú jeē ní cajeni ni rī, chi xīhna gā ni casocō i máa i nuū Jítoho yō, te sáa te ni cajēhe i máa i sāha i tāca jéé cácuu rī, ndihī ndese nújnahan ni Yaā Dios. ⁶ Te jeē súcuan ni casáha ñayuu Macedonia, te ni castūhvī ni rī Tito jeē na jéé tucu de nuū máa ró, sāha de jeē jíinu jniñu jeē ni squéjéé de jíin ró jeē suni caquin rō cuehē xūhún cuu ñayuu ndahú. ⁷ Chi máa ró yōhyo váha casáha ró táca-ni, chi váha cácuu ró, váha canacani ró jnúhun, váha cájecūhun ni rō, váha cándihvī ni rō, váha manī rō jíin rí jijnáhan ri. Núu súcuan te suni cácuu sāha váha ró jniñu yáha jéé cuáha ró jéé cúu ñayuu ndahú.

⁸ Te nasūu jéé cuní rī ndacu rī jniñu nuū rō, chi sa cástūhun rí nuū rō ndese yōhyo cácuu ni sava ga ñayuu jéhe i xūhún, te súcuan te cuní rī jeē suni máa ró cácuu ndihī ndije ni rō ñayuu ndahú. ⁹ Chi je cajini rō ndese yōhyo váha ni Jítoho yō Jesucristo jíin yó. Chi siquí jeē ní cundáhú ni yā rohó te ni nasáha ndahú yá máa yá, vēsú cucá ndasí yá nde andiví núu. Te súcuan ni sāha ya jeē cácuu ró ndihī jeē ndiso jnūhun ya, siquí jeē ní nasáha ndahú yá máa yá.

¹⁰ Te jeē váha máa ró cúu jeē na cáchi rī ndese jéni ni rī siquí jniñu yáha. Váha ni caquejéé ró nde jendujin, chi nasūu máa-ni jeē ní cajequin rō xūhún, chi suni yōhyo ni cacusiñ ni rō sāha ró. ¹¹ Núu súcuan te vijna te sínu ró. Te nájnūhun ni cacusiñ ni rō ni caquejéé ró jíin, suni súcuan na cúsiñ ni rō sínu ró, chi cuāha ró núu ndese cánevāha ró. ¹² Chi núu cúsiñ ni yō cuāha yó, te jétáhú yá núu ndese névāha yó, chi tu jíicán yā jeē cuāha yó jéé tu névāha yó.

¹³ Te nasūu jéé cahán rī jeē cáhni ndahú ró máa ró jeē cáa ga nihīn i vēsú jeē ndóo nuū máa ró. ¹⁴ Chi sa suhva jeē ñin cūhva-ni coneváha ró jíin i. Chi cánevāha cuehē rō vijna, te cuu cuāha ró jéé cúmaní nuū i. Yūcuán na te núu ndé ñin quivī coneváha i, te suni cuu cuāha i te núu ni cumaní nuū rō. Te súcuan te ñin cūhva-ni coneváha ró jijnáhan ró, ¹⁵ nájnūhun cáhán tutu i siquí ñayuu jeē ní canastútú maná nde jenahán: Tēe jeē ní nastútú cuehē, tu ní ndóo ga nuū de. Te tēe jeē ní nastútú jecu-ni, suni tu ní cúmaní nuū de. Achí tutu.

Jnūhun Tito jíin úu gā jnahan de

¹⁶ Te na cútahū rī nuū Yaā Dios jeē ni sáha ya jeē ndihví ni Tito jehē rō nájñuhun cándihvī ni maá rí. ¹⁷ Chi ni jetáhu de jeē ní cacahān rī jín de jeē jeé de nuū rō. Te siquī jeē ndihví ni de jehē rō, jeē yúcuan cuájeē de, chi súcuan cúu ni maá de.

¹⁸ Te suni cátají rí ñn hermano cuajeē jín Tito nuū rō. Te tāca grupo ñayuu cá candíje cájejnúhún i tēe un jéē váha jéjnínū de siquī jnúhun jeē jnáma ya yohó. ¹⁹ Te tāca grupo ñayuu cá candíje suni ni catee i jniñu siquī de jeē cáca de jín rí chindéé ñáhán de quindēca de xúhun jín rí jeē ní cajēhe ñayuu. Te jniñu yáha cásáha ri návāha cahān ñayuu jeē yóhyo vāha Yaā cúu máá Jítóho yō, chi cuni i ndese yóhyo cácusī ni rō cásocō rō xúhún. ²⁰ Te quingoo ndindúú rí návāha ni ñn ñayuu ma tēe i cuēchi siquī rī siquī xúhun cásocō ñayuu. ²¹ Chi ndúcú rí jeē squícu ndaā rī tācá jniñu, nasūu máá ñn-ni nuū Yaā Dios, chi suni nuū ñayuu.

²² Te suni cátají rí ñga hermano yō cuajeē de jín ndindúú tēe yáha. Te tijni jínu ni steén de jeē yóhyo cúsi ni de ndihví ni de tācá jniñu. Te vijna chi ndihví gā ni de jehē rō, chi cúcáhu ndasí ni de jeē cásquícu ró. ²³ Te núu cácajnúhún ñayuu siquī Tito, te achi rō jeē cúu de tēe chindéé ñáhán jéjnínū jín rí nuū rō siquī jnúhun ya. Te uū gā hermano yō yáha, achi rō jeē cácuu de tēe jeē ní catejnínū ñayuu cá candíje, te cáhīyo yínúhún de nuū Cristo. ²⁴ Núu súcuan te stéén rō nuū de jeē cáhīyo manī ndije ró jín de, návāha na cuni tāca grupo ñayuu cá candíje. Te súcuan cuni i jeē tu ní cácusī cāhá ni rī siquī rō.

Siquī jeē cájequin i xúhún cuu tācá hermano

9

¹ Te vijna te tuá jíní ñúhún tee ri nuū rō siquī xúhun jeē cájequin rō cuu tācá hermano cándoho ndáhu. ² Chi je jíní rī jeē cánujnahan ni rō cuāha ró. Te jeē yúcuan máni cúsi ni rī cahán rī jín ñáyuu Macedonia jeē rohó ñáyuu Acaya, je ni casátúhva ró xúhun ndé jendujin. Te jeē súcuan ni cacusi ni maá ró, te jeē yúcuan cuehē ñayuu Macedonia ni cacandihvī ni i ni cajēhe máá i. ³ Te táji rí ndinúní hermano yáha cuájeē maá de nuū rō xíhna gā, návāha jeē jinú maá rí te ma quéndōo néé rí siquī jnúhun ni cahān rī jeē squícu vāha ró jín jniñu ún. Chi coo túhva ndije ró jín xúhun nájñuhun ni cahān rī jín i. ⁴ Chi sanaa te jecoo jecu tēe Macedonia jín rí, te núu cuni de jeē tu cáhīyo túhva ró, te coo jnúhun canu nuū rī, te suni nuū maá ró jijnáhan ró, chi ni cahān teyí rí jeē cáhīyo túhva ndije ró. ⁵ Jeē yúcuan ní jeni ni rī jeē cánuú cahān rī jín táca hermano yáha jecoo de xíhna gā, te sáa te jinū rī, návāha stíhvī ni de rōhó jéé yáchī na cóo túhva xúhun jéé ní cacahān rō jeē cuáha ró. Te súcuan te coo túhva siquī jeē váha ni rō, te nasūu jéé safuerza rī rohó.

⁶ Cocuhun ni rō jnúhun yáha, jeē núu jecu-ni cuāha ró te suni jecu-ni nanihīn rō: Chi tēe jeē tihlí-ni táji, suni tihlí-ni nastútú. Te tēe jeē táji cuehē, suni cuehē nastútú. Achí tutu. ⁷ Tācá ñn ñn ró cuāha ró ndésaa ni tee ni rō. Ma cúxī ni rō cuāha ró, chi nasūu fuerza cúu. Chi Yaā Dios manī yā jín ñáyuu jeē cúsi ni cuāha. ⁸ Te máá Yaā Dios cuu sáha ya jeē nducuehē ndinuū jeē váha cuu ró jijnáhan ró, návāha níni coneváha ró ndihī tācá jeē jíní ñúhún ró, te coo sobra gā jeē cuāha ró jéé cúu tācá jniñu váha. ⁹ Chi súcuan cáhán tutu i siquī tāca ñáyuu jéhe:

Ni scáa i ni jēhe i nuū ñáyuu ndahú.

Te tācá jniñu váha sáha i, chi quendōo ñí cáni.

Achí tutu. ¹⁰ Te Yaā Dios jéhe ya tata nuū tēe táji, te nihīn de staā jeē cáji de. Te suni súcuan cuāha ya ndinuū jeē váha cuu ró, te sáha ya jeē cáyā te nducuehē jniñu váha cásáha ró. ¹¹ Súcuan cucúca ró jín táca-ni, návāha cuu cuāha cuehē rō. Te xúhun jéé cuáha ró quíhīn nuū hermano cándoho ndáhu, suu sáha jeē nácuatáhu i nuū Yaā Dios. ¹² Chi xúhun jéé cuáha ró núu i, nasūu máá ñn-ni jeē nihín i jeē cúmanī nuū i, chi suni sáha jeē nácuatáhu ndasí i nuū Yaā Dios. ¹³ Te cahān i jeē yóhyo vāha Yaā cúu Yaā Dios, chi xúhun jéé ní cajēhe ró stéén jeē váha cá candíje ró jnúhun Cristo. Te suni sáha jeē cahān i jeē yóhyo cújéhnu Yaā Dios siquī jeē ní cajēhe cuehē rō nuū i jín núu sava ga ñayuu. ¹⁴ Te suni cacān táhu i jehē rō, chi coo manī ndasí i jín ró siquī jeē yóhyo vāha ni

sáha Yaā Dios jíin ró. ¹⁵ Te na cútahū yō nuū Yaā Dios, chi ni jēhe ya Sēhe ya nuū yō, jeē cúu ìn tahū cáhnu ndasí jēē ma cánda cuiti yō castūhún ndìhi yó.

Jeē ndíso jníñu Pablo cúu de apóstol

10

¹ Te ruhū Pablo, cáhán ndahú rí jíin ró jijnáhan ró jíin modo maá Cristo jeē vītá ni yā te vāha ni yā. Ruhū, chi cácahān rō jeē iyó suchí ni rī núu ndéé rí jíin ró, te núu ndéé jíca rí te tu yúhú cuiti rī cahān nīhin rí jíin ró, cácahān rō. ² Núu súcuan te cáhán ndahú rí jíin ró jeē núu na jéé rī te ma cahān rō jnūhun jeē sáha jeē cuxeēn rī nuū rō. Chi sava ró cácahān jeē casáha rí jniñu ya síquī jeē máni jeē na níhín rī síquī ún. Núu súcuan te íyó túhva rí cuxeēn rī nuū ñáyuu cácahān súcuan. ³ Chi vēsú cácuu rí ñayuu cáyūcú ini ñayīví, te tu cájejnáhan rí modo cájejnáhan ñayuu ñayīví. Chi nájñūhun jeē cájejnáhan rí síquī tācá jniñu neé. ⁴ Chi nasūú ndajníñu ñayīví jéjníñu rí cájejnáhan rí, chi jíin poder Yaā Dios cájejnáhan rí snāá rī tāca fuerza jeē cúu contra síquī yā. ⁵ Súcuan cásnāá rī tāca jnúhun ndúxí jíin jnúhun téyí jeē nducú casi jeē ma cúni ñayuu ndese Yaā cúu Yaā Dios. Te cájesi rí nuū ndìhi jeē tú vāha jeē cájeni ni ñayuu, návāha cuandetū i nuū Cristo. ⁶ Te jeē jínu cuandetū vāha máá ró, yūcuán na te coo túhva rí cuāha rí castigo nuū tāca gá ñayuu jeē tu cájendetū.

⁷ Máá ró jijnáhan ró máni cájeni ni rō modo ñayuu tu cájecūhun ni. Núu na-ni tēe jéni ni de jeē Cristo ni tejníñu ya de, te na sáha de cuenta jeē suni súcuan ni tejníñu ya ruhū jijnáhan rí. ⁸ Te núu ni cahān teyí rí jíin ró jeē ndíso jníñu rí, te tu cúcanu rī sáha. Chi máá Jítoho yō ni tejníñu ya ruhū jijnáhan rí, návāha sáha rí jeē ije ánuá rō jíin jnúhun ya, nasūu jéē snāá rī. ⁹ Núu súcuan te tu cúni rí jeē cáni ni rō jeē nducú rí síuhú rí rohó jíin carta rī. ¹⁰ Chi cácahān sava ró jéé tāca carta rī yōhyo stīhví ni te nīhin ndácu jniñu, te sa suhva núu ndéé rí jíin ró te tu cúndeyí ni rī ndacu nīhin rí jniñu, te suni tu cúu cahān vāvíhí rí, achí ró. ¹¹ Te ñayuu cácahān súcuan na sáha i cuenta jeē nájñūhun nīhin cáhán carta rí jeē íne jíca rí, suni súcuan nīhin ndacu rí jniñu nuū rō jeē cóndee rī jíin ró.

¹² Te va ma chúndeyí cuiti ni nde rí jeē sajeñu rí maá rí, nájñūhun casáha sava tēe un jéé cájejnúhún nde de máá de. Tāca tēe ún chi cáacunéé de jeē cájeni ni de jeē cujéñu ga de vēsú jnáhan de, te tu casáha de cuenta ndese cúni Yaā Dios jeē caca de. ¹³ Te ruhū jijnáhan rí, chi cutéyí nde rí maá cúhva-ni jniñu jeē ni jéhe Yaā Dios nuū rī, te ma yáha ga rī. Máá Yaā Dios ni tee cūhva yá ndesaa cúu jeē sáha rí, te máá yá ni jéhe jnūhun jeē ni jínū rī nuū rohó ñáyuu ñuu Corinto. ¹⁴ Jeē yúcuan ná ni jinūcoo rí nuū rō jeē xīhna ñúhún te nasūu jéé ni yáha rí nuū cúhva jniñu ní jéhe ya nuū rī. Chi xīhna gā maá rí ni jinūcoo nuū rō ni canacani rí jnūhun vāha Cristo. ¹⁵ Te tu cácutéyí rí síquī jniñu ní casáha inga tēe, nájñūhun jeē jniñu máá rí cúu. Chi sa suhva cáñuhun ni rí jeē cuehē gā candíje ró, te súcuan te cuu sáha rí cuehē gā jniñu ya mēhñu ró, te níní máá cúhva jeē ni jéhe ya nuū rī. ¹⁶ Yūcuán na te cácuuni rí scuité núu ga rí jnūhun jnáma ya yohó núu tāca gá ñuu yúcu ndé yūcuan gá. Te súcuan te ma quívi nduu rí cutéyí rí nuū jeē jé ni canacani inga tēe jnūhun.

¹⁷ Te núu ndé tēe cúni de cutéyí de, na cutéyí de síquī jeē sáha máá Jítoho yō, nasūu síquī jéé sáha máá de. ¹⁸ Chi nasūu tēe jeē jejnúhún máá cúu jeē quéndōo yíñúhún, chi sa suhva tēe jeē jejnúhún máá yá.

Jeē cahán Pablo síquī tēe cánacani jnūhun stáhú

11

¹ Cone cáhnu ni rō jijnáhan ró jeē cahán rí jecu jnūhun modo nájñūhun cácahān ñayuu canéé. Núu súcuan te cáhnu coo ni rō víi. ² Chi cúcuñí rí jehē rō jijnáhan ró, nájñūhun cúcuñí Yaā Dios. Chi cácuu ró nájñūhun ìn sūchi síhí íyó ndoo, te ni sáha rí jeē quijnáhan ró jíin Cristo, nájñūhun quijnáhan ìn sūchi síhí jíin máñúhún-ni yí i. ³ Te yúhú rí sanaa te cuāha ro jnúhun stáhú tāca tēe un rōhó, te siáá rō jnūhun jeē chiñúhún ndāá rō Cristo nde jíin ini jíin ánuá rō. Chi suni súcuan ni sáha Satanás jíin Eva, chi ni quívi ini ìn coō,

te ni stahú un ña jíin jnúhun ndíchí stáhú. ⁴ Chi núu quíjicoo tēe nuū rō jeē tu cánacani ndaā de jnúhun Jesús nájñuhun ni canacani ri nuū rō, te va yōhyo vāha cájetáhú nde ró de. Te suni súcuan vāha cájetáhú nde ró núu inga espíritu jíin núu inga jnúhun jeē tu quíjnáhan jíin Espíritu jíin jnúhun jeē ní cacandíje ró jēē jnáma ya rohó. ⁵ Te tāca tēe cacandíje ró un jēē cácahān jeē apóstol cujéhnu ga cácuu, tú cuiti jeē cujéhnu ga nde de nuū rī. ⁶ Chi vēsú tu níhín vāha nde ri modo cahān rī, te jécūhun vāha ni rī. Chi jíin ndíhi jniñu ni casáha ri mēhñu ró ni castéén cají rí nuū rō jeē súcuan cúu.

⁷ Tu ní jíicán rī xūhun núu rō síquī jeē ní nacani ri jnúhun jnáma ya yohó. Te súcuan ni cotecu ndahú rí návāha quendōo vāha ga maá ró jíin jnúhun ya. ¿Te va cuēchi ni sáha ri jeē ni sáha ri súcuan, chí naún? ⁸ Chi sava ga grupo ñayuu cacandíje ni quihin ri xūhun jēē ní cajēhe i nuū rī, návāha súcuan-ni nacani ri jnúhun ya nuū rō jíin náhan ró. ⁹ Te ná ni condee rī jíin ró te ni ndíhi xūhun rí, te tu ní jíicán cuiti rī nuū ní ñn ró. Chi hermano jeē ní quijicoo ichi Macedonia ni cajēhe de nuū rī jeē cúmanī. Te jeē súcuan tu ní stáhān rī rohó, te ni ma sáha cuiti rī. ¹⁰ Te nájñuhun cúcáhnu vāha ni rī jeē jíin rī jnúhun ndaā Cristo, suni súcuan jíin rī jeē ma quíhin ri xūhún nuū ni ñn ñayuu ní ndáñúú Acaya, návāha ma cásí i jeē cúsi ni rī jeē súcuan-ni nacani ri jnúhun ya. ¹¹ ¿Te á síquī jeē tú manī rī jíin ró cúu jeē cahān rī súcuan, jéni ni rō, chí naún? Tuú chi máá Yaā Dios jíin rī ya jeē manī rī jíin ró jíin náhan ró.

¹² Te sáha ri ná-ni sáha ri, chi ma quíhin ri xūhun ró, návāha casi rī nuū jeē casátéyí tēe un máá de jeē cácahān de jeē inuú casáha de jniñu ya jíin rí. ¹³ Te tēe ún chi nasúu apóstol ndaā cácuu de, chi máni máá jnúhun stáhú cácahān de, te casáha de máá de jeē cácuu de apóstol Cristo. ¹⁴ Te tu náā ni yō jíto yó jēē casáha de súcuan, chi je jíin yō jeē suni Satanás násama máá te stáhú jēē sáha máá nájñuhun ñn ndajéhé Yaā Dios jeē jíca jíin luz yā. ¹⁵ Te jeē yúcuan suni tu náā ni yō jíto yó jēē tēe cájejniñu nuū Satanás, casáha de máá de jeē tēe ndaā cácuu de. Te ñn quivī te nanihīn de síquī jniñu néé casáha de.

Jnūdóho ni ndoho Pablo síquī jeē cúu de apóstol

¹⁶ Inga jíinu cáhān rī jíin ró jeē ni ñn ró ma cáni ni rō jeē tēe cánéé cúu ri. Te núu súcuan cájeni ni rō, te va cuatáhú nde ró jēē cahān rī nájñuhun tēe cánéé, návāha suni cuu cutéyí nde ri jecu nájñuhun casáha tēe ún. ¹⁷ Jeē cahān rī vijna chi nasúu jēē ní ndacu máá Jítoho yō cúu, chi sa nájñuhun tēe cánéé cáhān rī jeē cutéyí nde ri. ¹⁸ Chi cuehē de casátéyí de máá de modo jeē iyó ini ñayīvī, te suni súcuan na sátéyí nde ri maá rí núu súcuan. ¹⁹ Te va tēe cáhīyo cají xínī cácuu nde ró, te jeē yúcuan cúu vāha ni nde ró cuatáhú ró ñn tēe cánéé núu súcuan. ²⁰ Chi va vāha-ni cájendeyí ni rō nuū tēe un jēē casáfuerza de rōhó cuajniñu ró núu de, chí casáha de jeē ndundáhú ró, chí cáquende de ndajniñu ró, chí cájéhnu de máá de nuū rō, chí ndé cácatu de nuū rō. ²¹ Te vēsú cúcanu nde ri cahān rī, te na cáhān rī jeē tu ní cúndeyí ni nde ri sátéyí rí maá rí nájñuhun casáha tēe ún.

Te vijna te núu iyó sava tēe chúndeyí ni de sátéyí de máá de, te va suni chundeyí ni nde máá rí núu súcuan. Te va cáhān rī nájñuhun cáhān ñn tēe cánéé. ²² Núu cácutéyí de jeē tēe hebreo cácuu de, te suni súcuan ruhū. Núu tēe Israel cácuu de, te suni ruhū. Núu yucūn Abraham cácuu de, te suni ruhū. ²³ Núu tēe cájejniñu nuū jnúhun Cristo cácuu de, te víhyá gā ruhū. Te va cáhān rī nájñuhun tēe cánéé jēē cutéyí rí súcuan. Chi ni caa ga ni sájniñu ri vēsú maá de jíin náhan de, te ni caa ga ni cacani i ruhū, te cuehē gā jíinu ni ine ri vecāa, te suni cuehē gā jíinu ni cacani ñayuu cahni i ruhū. ²⁴ Te jnáhan ri hebreo, uhūn jíinu ni cacani xeēn de ruhū jíin cuarta ññi, ñn cūhva jeē jé yajni cuu rī sáha. ²⁵ Unī jíinu ni cacani de ruhū jíin yujnu xíi, te ñn jíinu ni cajēhe de yuū xínī rī. Unī jíinu ni quēe barco jeē ní jíca ri síquī jnúhun ya. Te ñn jecuáa jíin ñn ndiáca ni yosō candá rí nuū cunú ndute mar. ²⁶ Cuehē jíinu ni ndoho ri ni jíca ri ichi, te ni cācu ri nuū táca yúte, te ni cācu ri nuū táca ñácuīhná. Ni cācu ri nuū ñayuu nación rī jíin núu ñayuu ñuu jíca. Ni cācu ri cháha chúcuan ná ni iyo ri ñuu jíin rancho jíin mar. Ni cācu ri nuū táca jnáhan ri jeē tu

íyó ndáa. ²⁷ Ni sájniñu nihin ri te yíí ní ndoho ri. Cuehē jínu ni jehni rī maá rí māhná. Ni jīi rī sōco, ni jichī rī ndute. Cuehē jínu ni iyo ndite ni rī, ni cuijnu rī, ni cumani sahma ri

²⁸ Te siquī tāca jēē yáha chi íyó gá. Chi ndiquivī ndóho ri jeē nácani ndasí ni rī jehē tāca grupo ñayuu cácadíje. ²⁹ Núu ññ ñayuu tu fuerza ini i, te suni ndóho ri jehē i. Te núu ññ ñayuu quívi i cuēchi sáha jnánhan i, te ndóho ri jnūhun cúcanu jíin jnúhun náxeēn ni. ³⁰ Núu súcuan te núu cánuú cutéyí nde ri, te va cutéyí rí siquī tāca jēē steén jeē tú na fuerza ini rī. ³¹ Te Yaā Dios, Yaā cúu Tátá maá Jítóho yō Jesucristo, jíní yā jeē cahán ndaā rī. Te ní cání na cáhán ñayuu jeē vāha ndasí Yaā cúu ya. ³² Ná ni iyo ri ñuu Damasco, te gobernador jeē ndácu jniñu ndañúu jeē jññ rey Aretas, ni jeni de soldado ni cacondito tāca yéhyí jeē ní condúu ndihyú ñuu ún, chi jññ de ruhū quihñ rī vecāa ni cuni de núu. ³³ Te ni quívi ri chíji ññ jīca, te ñayuu cácadíje ni cascúun i ruhū ventana ññ vehe jeē néne jicā jeē ndihyú ñuu ún. Te súcuan ni cācu ri nuū téé ún.

Jeē ní jito ndijin Pablo jeē ni stúu ya nuū de

12

¹ Te tu níhín jniñu jeē cutéyí rí. Te vāha ga na cástūhun rí nuū rō siquī jeē ní jito ri jeē ni stúu maá Jítóho yō nuū rī te ni steén ndijin yā nuū rī. ² Jíní rī ññ tēe cándíje Cristo, te je ni cuu uxī cuñ cuiyā jeē ní sáha ya jeē ní caa tēe un ní jehēn de nde andíví únī. Te tu jíní rī núu ni jehēn rī jíin yiquí cúñu rī, chí ní jehēn anuá-ni ri. Máá Yaā Dios cúu jeē jíní. ³ Te jíní rī jeē ní ndonehen ya ruhū. Te á ní jehēn rī jíin yiquí cúñu rī, chí ní ndōo, tu jíní rī, chí máá-ni Yaā Dios cúu jeē jíní. ⁴ Chi ní sáha ya jeē ní caa ri ni jehēn rī nde jardín andíví. Te yūcuan ní jini sōho ri tāca jnúhun sáhi ndasí jēē ma cúu castūhun yóhó ñáyuu. ⁵ Te siquī jeē ni sáha ya súcuan jíin rí cúu jeē cutéyí rí, te ma cutéyí rí siquī ndese cúu máá rí. Chi cutéyí rí máni jeē tú na fuerza ini rī. ⁶ Te núu cúní rī cutéyí rí siquī maá rí nuú, te nasūu jēē canéé rí núu sáha ri súcuan núu, chí ndaā cúu jeē iyó jeē cutéyí rí. Te ni ma sáha ri, chí tu cúní rī jeē cani ni ñayuu jeē kujéñnu ga rī vēsú jeē ní jito i chí jēé ní jini i jnūhun ri.

⁷ Te tu cúní yā jeē yáha ri cutéyí rí siquī jeē ni steén ndijin yā jniñu jéñnu ndasí un núu rī, te jeē yūcuan ni quiji ññ jññndóho jeē ndiquín ruhū te stóho ruhū. Te ññ jeē ni jéhe ya jnūhun ni tají Satanás cúu, ññ jeē stóho ruhū, návāha ma yáha ri cutéyí rí. ⁸ Te uní jínu ni cahán ndahú rí jíin máá Jítóho yō jeē na téjiyo ya quihñ. ⁹ Te ni cahán yā jíin rí: Tuú chí tu cúmaní jeē cundáhú ni rī rohó. Chi ñayuu jeē tú na fuerza ini, sáha ri jeē nducuehē gā fuerza maá rí ini i, ni achi yā. Núu súcuan te cúsiñ ni rī jeē tú na fuerza ini rī, chí súcuan te nducuehē gā fuerza Cristo ini rī. ¹⁰ Jeē yūcuan cúu jeē cúsiñ ni rī jeē tú na fuerza rī, jíin jēē cácahán ndevāha ñayuu jíin rí, jíin jēē cúmaní nuū rī, jíin jēē cájito xeēn i ruhū, jíin jēē ndóho ri jññndóho siquī Cristo. Chi jeē tú na fuerza maá rí, yūcuan sáha jeē nihín rī fuerza maá yá.

Jeē nácani ni Pablo siquī ñayuu cácadíje ñuu Corinto

¹¹ Te va tēe cánéé cúu ri jeē ni sátéyí nde ri maá rí. Te siquī jeē tu cácadíje ró rúhū, jeē yūcuan ní sátéyí rí maá rí. Chi cánuú jēē máá ró cuajnúhún ró ruhū nuú. Chi vēsú tú jniñu ri jeē maá rí, te va tu núu cuiñi nde ri nuū tāca téé un jēē cácahán rō jeē apóstol kujéñnu cácuu de. ¹² Chi mēhñu ró ní sáha ri tācá jniñu jeē steén jeē cúu ndije ri apóstol. Chi jíin cuéhē paciencia ni sáha ri tācá jniñu jéñnu jeē steén poder Yaā Dios, jíin táca jniñu jeē nahán ní canaa ni rō ni cajito ró. ¹³ Te tu ní sáha ri jeē núu ga cácuu ró núu tāca gá grupo ñayuu cácadíje, chí máá ññ-ni jeē tu ní stáhán rī rohó jēē cuáha ro jēē jíni ñúhún rí. Cone cáhnu ni rō núu súcuan ni sáha nde ri falta nuū rō víi.

¹⁴ Te vijna je íyó túhva ri jecondēhe rí rohó vuelta uní. Te suni tú na vé cacán rī nuū rō, chí nasūú ndajniñu ró cúu jeē cuní rī, chí sa suhva jeē quendōo vāha ró jíin jnúhun ya. Chi nájnūhun sēhe ri cácuu ró, te sēhe chí tu cánuú caya i jeē cúu tátá i, chí sa tátá cánuú cuáha de jeē quéndōo vāha sēhe de. ¹⁵ Jeē yūcuan cúsiñ ni rī stíhi ri jeē névāha

ri, te nde st̄hi ri fuerza maá rí, návāha sáha ri jeē quéndōo vāha ánuá rō jijnáhan rō. Te manī gā coo ri jiín rō, vēsú sanaa te jecu-ni cáhiyo manī rō jiín rí.

¹⁶ Te íyó jecu rō cácahān jeē vēsú tú na vé ni jícán rī nuū rō, te tēe stáhú cúu ri, chi ni nducú rí modo ndichí nihīn rī xūhun rō, cácahān rō. ¹⁷ ¿A táca tēe ní tají rí nuū rō, á ñn máá de ni stahú de rōhó jēe nihín de xūhun rō cuu máá rí, chí naún? Tú cuiti. ¹⁸ Ni cahān ndahú rí jiín Tito jeē jécondēhé de rōhó, te ni tají rí ñn hermano ni jeē jiín de. ¿Te chí ní stahú Tito rohó ní quihin de xūhun núu rō jeē cuu máá de, chí naún? Tuú chi inuú-ni cásáha ndindúú rí, te ñn-ni ánuá ndindúú rí.

¹⁹ ¿Sanaa te cájeni ni rō jeē cahán rī jnūhun yáha návāha quendōo vāha ri jiín rō, chí naún? Nasūu súcuan cúu, chi Yaā Dios jiní yā jeē cahán rī maá-ni jnūhun jeē cuní Cristo. Te ndihí jeē cahán rī chi nducú rí jeē ije rō jín jnūhun ya, ñānī mánī. ²⁰ Chi yúhú rí jeē núu na jéé rī, te sanaa te cuni rī jeē tu cásáha rō jniñu nújnahan ni rī. Te máá rō jijnáhan rō, suni ma nújnahan ni rō ruhū. Chi sanaa te cátejnhān rō, cáccuésún ni rō, cáquitī ni rō, cásándúxí rō, cásájnúhún rō, cácahān rō siquī jnáhan rō, cácutéyí rō, cájica néé rō. ²¹ Te yúhú rí jeē núu na jéé tucu ri te cuāha Yaā Dios jnūhun canu nuū rī jeē súcuan cásáha rō. Te sanaa te cucuíhyá ni rī núu íyó cuēhē rō jeē ní casáha cuēchi ichi yátá, te tu nácani ni rō stóo rō jniñu jnéhén jniñu jíca jnéni jín jniñu néé ndasí ní casáha rō.

Saludo jiín jnūhun cástūhun Pablo jeē sánd̄hí

13

¹ Yáha cúu vuelta unī jeē jécondēhe rí rohó. Te sándā yō jniñu nájnhun cáhán tutu: Jín jnūhun jeē cahán uū chí únī testigo te cundaā tācá jniñu, áchí. ² Te vijna jeē íne jíca rí te cáhán tucu ri nájnhun ni cahān rī ná ni ine ri jiín rō. Cáhán rī nuū ñáyuu ni casáha cuēchi un jín núu ndihí rō, jeē núu na jéé tucu ri te ma cóo vītá ni rī jiín rō. ³ Te yūcuán cuu prueba jeē cánducú rō, suu núu jendaá jeē cahán rī jín fuerza Cristo. Chi Cristo tu cúmanī fuerza yā jeē sándā yā jín rō, chí stéén yā poder yā mēhñu rō. ⁴ Te vēsú tu ní stéén yā fuerza yā ná ni jihí yā jicā cruz, te vijna chi técu yā jín poder Yaā Dios. Te nájnhun ni ndoho máá yá, suni súcuan cándoho ri vijna jeē tu fuerza rī. Te vēsú súcuan te jín poder Yaā Dios cátecu rī jín yá jeē cuajniñu ri nuū rō jeē siquī jnūhun ya.

⁵ Coto ndee rō maá rō núu cáhiin nihin rō jín jnūhun cácañdije rō yá. Sáha vāha ro cuenta. ¿Te á tu cájini rō jeē ndeé Jesucristo ini anuá rō, te núu ndāā jeē ní cacandije ndije rō? ⁶ Te ñūhun ni rī jeē suni cácuáhnu ni rō jeē maá rí cácañdije ndije rí. ⁷ Te cájicān tahú rī nuū Yaā Dios jeē ma sáha rō ni ñn jniñu néé. Te vēsú núu cuajnúhún rō jeē váha ndácu ri jniñu nuū rō, chí vēsú núu ma cuajnúhún rō, te tú na vé sáha, chí máni jeē na sáha rō jniñu ndāā cúu jeē cánducú rí. ⁸ Chi tu jési ri nuū jniñu ndāā, chí sa suhva scáca ri. ⁹ Núu súcuan te cácusī ni rī núu tú na fuerza maá rí, te núu íyó fuerza maá rō. Te níni cácān tahú rī jeē na íje ga ni rō jijnáhan rō jín jnūhun ya. ¹⁰ Te tēe ri carta yáha nuū rō nde ná tu jeē rī, návāha núu na jéé rī te tuá jini ñúhún cuxeēn rī nuū rō. Chi ni jēhe Jitoho yō jniñu ndíso ri yāha jéé sáha ri jeē íje ánuá rō jín jnūhun ya, nasūu jéé snāā rī.

¹¹ Je ni cahān yō núu súcuan hermano, te na cóo jeē váha jín rō jijnáhan rō. Te na cóndihvī ni rō ije rō jín jnūhun ya, te coo ndeyí ni rō. Te na cóo inuú ni rō te coyūcu mánī rō jín jnáhan rō. Te Yaā ndíso jnūhun ndeyí s̄hī ni jín jnūhun cúndáhú ni, coo ya jín rō jijnáhan rō. ¹² Te jeē cahán rō jín táca jnáhan rō, te yíñúhún techūhu rō ndaha i.

¹³ Sándeyí ni rō jijnáhan rō, áchí hermano cácañdije jeē cáyūcu yáha.

¹⁴ Te ñūhun ni rī jeē Jitoho yō Jesucristo na sáha ga yā jeē váha rōhó jijnáhan rō, te Yaā Dios cundáhú ni yā rohó, te Espiritu Santo condee cáhnu ya jín rō. Súcuan na cóo. Amén.

CARTA JEE NI TEE SAN PABLO APOSTOL NUU ÑAYUU GALACIA

¹ Máá rí cúu Pablo apóstol. Te nasūu ñáyuu ni jéni ruhū ni nasūu ñáyuu ni tájǵ ruhū jeē nácani ri jnūhun, chi sa suhva máá Jesucristo jíin Tátá yō Yaā Dios, Yaā ní nastécu Jesús mēhñu ndíyi. ² Te ruhū jíin táca hermano cáyūcu jíin rí yāhá, cátee ri carta yáha cuájeē nuū rohó ñáyuu cávandíje ní región Galacia. ³ Te cáñuhun ni rí jeē Tátá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo síñ ni rō. ⁴ Chi Jesús ni socō yā maá yá jeē ni jíhǵ yā jeē síquǵ cuéchi yó, návāha jnama ya yohó núu táca jéē neé íyó ñayívi yáha, chi súcuan ni nujnahan ni maá Tátá yō Yaā Dios. ⁵ Jeē yúcuan na cáhán yō jeē yóhoyo luu cújéhnu ya ní cáni. Súcuan na cóo. Amén.

Siquǵ jeē tuá na inga jnūhun cācu ñayuu

⁶ Te náhán náā ni rí jíto ri jeē yóhoyo yachǵ cánducú ró stóo ró Yaā Dios, Yaā ní cana róhó jéē quívi ró ndaha ya síquǵ jeē cundáhú ni Cristo yohó. Chi ni candiquǵn rō inga jnūhun jeē síñ cáhán. ⁷ Te tú cuítǵ na inga jnūhun jnama yohó íyó. Te cáhǵyoye jecu ñayuu castáhán i róhó, te cávani i nasama i jnūhun ndese jnáma Cristo yohó. ⁸ Te núu ñin ñayuu nacani inga jnūhun nuū rō ndese jnáma ya rohó, te núu tu quíjnáhan jíin jnūhun ni canacani ri nuū rō xǵhna gā, na jnáhnú ndetū ñayuu ún. Te vēsú maá rí chí ñin ndajéhé jeē quíji nde andívi nacani inga jnūhun núu, na jnáhnú ndetū. ⁹ Je ni cahán rí jíin ró, te suni súcuan cáhán tucu ri vijna: Na-ni tēe nacani inga jnūhun nuū rō, te núu tu quíjnáhan jíin jnūhun jeē ní cajetáhú ró, na jnáhnú ndetū tēe ún.

¹⁰ Te jeē cahán rí súcuan, ¿á ndúcú rí jeē cuajnúhún ñáyuu ruhū, chí Yaā Dios? ¿Chí ndúcú rí jeē cúsiñ ni ñayuu jíin rí, cájeni ni rō? Núu ndúcú gá rí jeē cúsiñ ni ñayuu jíin rí, te nasūu mozo Cristo cúu ri núu súcuan.

Ndese ni jinū Pablo cúu de apóstol

¹¹ Te cástūhun rí nuū rō, hermano jijnáhan ró, jéē jnūhun jnáma ya yohó jéē nácani ri, nasūu jéē ní jeni ni maá rí jíin ñáyuu cúu. ¹² Chi nasūu ñáyuu ni stéén nuū rí, ni nasūu ñáyuu ni sáha jeē ní cutūhva ri, chi sa suhva máá Jesucristo ni steén nuū rí.

¹³ Chi je ni cajini jnūhun ró ndese ni sáha ri nde saá, ná ni chíñúhún rí sahán jnáhan ri ñayuu hebreo. Te cájini rō jeē yóhoyo ni jito xeēn rí ñayuu cávandíje nuū Yaā Dios, te ni condíhvǵ ni rí snáā rí i núu. ¹⁴ Te vāha ga ni cutūhva ri sahán ún vēsú cuehē gā tēe nación rí jeē ní cajehnu jíin rí, chi ni condíhvǵ gā ni rí síquǵ táca jéē ní cajequin jíi rí. ¹⁵ Te vēsú súcuan te Yaā Dios je ni nacáji ya ruhū nde ná tu cacu ri, te ñin quívi te ni cusíñ ni yā ni cana ya ruhū jeē quívi ri ndaha ya, síquǵ jeē yóhoyo ni cundáhú ni yā ruhū. ¹⁶ Te ni steén yā Sēhe ya nuū rí, návāha nacani ri jnūhun ndese jnáma ya ñayuu táca nación jeē tu jíni jnūhun ya. Yūcuán na te tu ní cájnūhun rí ni ñin ñayuu, ¹⁷ ni tu ní jéhén rí ñuu Jerusalén nuū tēe cácuu apóstol xǵhna gā vēsú ruhū. Chi sa suhva ni jehēn-ni ri nde región Arabia, te saá te ni nuhūn tucu ri ñuu Damasco.

¹⁸ Yūcuán na te nde ni yāha unǵ cuiyā, te ni jehēn rí Jerusalén. Te ni jini jnáhan ri jíin Pedro, te ni condee rí jíin de xahūn-ni quívi. ¹⁹ Te tu ní jíto ri nuū táca gá apóstol, chí máá ñin-ni nuū Jacobo ñani maá Jítóho yō. ²⁰ Jnūhun yáha jéē tēe ri cuajeē nuū rō, chí jíni Yaā Dios jeē ndaā cúu.

²¹ Yūcuán na te ni jehēn rí ní región Siria jíin Cilicia. ²² Te ñayuu cávandíje jeē yǵhi ndaha Cristo, jeē cáyúcú región Judea, ná tu coto cuítǵ i nuū rí saá. ²³ Chi máni jnūhun-ni ni cajini i cácahán ñayuu: Tēe ni jito xeēn yohó nde saá, vijna chí nácani de jnūhun cávandíje yó jéē ní nducú de snáā de nde saá, áchǵ i. ²⁴ Te ni cacahán i jeē yóhoyo cújéhnu Yaā Dios jeē súcuan ni sáha ya jíin rí.

Jeē ní cajetáhú táca gá apóstol un Pablo

2

¹ Yūcuán na te nde nuū uxí cuñ cuiyā, te ni jehēn tucu ri Jerusalén jíin Bernabé, te suni ni jeca ri Tito ni jehēn de jíin rí. ² Te ni jehēn rī chi máá Yaā Dios ni steén yā jeē jíni ñúhún quíhīn rī. Te ni candutútú sīn nene tēe cácujeñnu nuū ñáyuu cácuñje ún. Te ni castūhun rí nuū de síquī jnūhun jnáma ya yohó jéē nácani ri nuū ñáyuu tācá nación tu jíni jnūhun ya. Te súcuan ni sáha ri návāha cuajnúhún de jniñu ri, te ma quéndōo cāhá jniñu sáha ri jíin jéē ni sáha ri. ³ Te ni tu ní cásáha fuerza de Tito, tēe ni jica jíin rí, jeē cóndee jnunī circuncidar de, vēsú nasūu tēe hebreo cúu de. ⁴ Te súcuan ni cundaā, vēsú ni quívicoo jecu tēe stáhu jéē sáha de jeē hermano cácuu de. Te tēe un ní quívicoo de návāha yuhu-ni coto de ndese ni ndulibre yō nuū ley circuncidar síquī jeē yíhi yó ndaha Cristo Jesús. Chi cácuñi de jeē squícu tucu yó ley un, nduu tucu yó mozo nuū ley un. ⁵ Te tu ní cájetáhu cuiti rī nuū tēe ún, chi cúní rī jeē quéndōo nīhin ró jíin náhan ró jíin jnūhun jnáma ya yohó.

⁶ Te máá tēe cácujeñnu nuū ñáyuu cácuñje ún, tuá na inga jniñu jéē ní cándacu de nuū rī. Te máá rí chi tu ní chíhi ri cuenta síquī jeē cácujeñnu de, chi suni Yaā Dios tu sáha ya cuenta, chi inuú-ni cúu ndivii tēe nuū yā. ⁷ Chi sa suhva ni cajini de jeē jnūhun jnáma ya yohó, ndíso jniñu ri nacani ri nuū ñáyuu tācá nación jeē tu cásáha circuncidar, nájñūhun nácani Pedro jnūhun un núu ñáyuu hebreo jeē casáha circuncidar. ⁸ Chi Yaā Dios jeē ní tají Pedro jeē nácani de jnūhun nuū ñáyuu hebreo, suni máá yá ni tají ruhū jeē nácani ri jnūhun nuū ñáyuu tācá nación tu jíni jnūhun ya.

⁹ Jeē yúcuan, Jacobo jíin Pedro jíin Juan, ni cajini de jeē Yaā Dios ni jēhe ya jniñu luu yáha nuū rī. Te tēe un cácahān ñayuu cácuñje jeē maá de cácujeñnu ga. Te ni cajniñi de ndaha ri jíin ndaha Bernabé, jeē ní castéén de jeē cáhiyo manī de jíin rí, jíin jéē ní cacundaā ni de jeē maá rí quingōo nacani jnūhun nuū ñáyuu tāca gá nación, te máá de jíin náhan de nuū ñáyuu hebreo. ¹⁰ Te máá ñn-ni jeē ní cajicān de cúu jeē cónahán rí chindéé ñáhán rí ñayuu cándoho ndáhu, te jniñu ún je ni condíhvī ni rī ni sáha ri.

Jeē ni cáhān Pablo nuū Pedro

¹¹ Te ná ni quiji Pedro ñuu Antioquía, te ni cahān cají rí nuū de, chi ni stívi de jniñu. ¹² Chi nde ná tu quecoo sava jnáhan de hebreo jeē ní tají Jacobo, te yéji de staā jíin ñáyuu jeē násūu hebreo cácuu. Yūcuán na te nuū ní quecoo tēe ún, te ni cusīn de jeē tuá yéji de jíin i, chi yúhú de jeē cúni tāca tēe un jéē tuá squícu de ley jnáhan de hebreo. Chi áchí ley jeē ma cúu caji de staā jíin ñáyuu jeē tu cásáha circuncidar. ¹³ Te sava ga tēe hebreo jeē cácuñje, suni ni cacujiyo de nuū i, nájñūhun ni sáha Pedro, chi cáyūhú de jeē cúni tēe ún. Te nde máá Bernabé ni cascáhán de ni cujiyo. ¹⁴ Yūcuán na te ni jini rī jeē ní canayūhú de caji de staā jíin ñáyuu ún, cúu jeē tuá jica de jíin modo jeē cahán jnūhun jnáma ya yohó. Te ni cahān rī nuū Pedro, jíto jíinúu tācá de: Róhó jéē cúu tēe nación yō hebreo, tuá squícu ró ley jnáhan yó hebreo, chi yéji rō jíin ñáyuu ún. ¿Te najehē safuerza rō i jeē squícu i ley jnáhan yó hebreo núu súcuan? ni achi rī.

ñn-ni modo jnáma ya ñayuu hebreo jíin táca gá nación

¹⁵ Te yóhó chi cúu yó ñáyuu hebreo, te cácahān yō jeē násūu ñáyuu tāca gá nación casáha cuēchi cácuu yó. ¹⁶ Te vēsú súcuan te jíni yō jeē ní ñn yó tu quéndōo ndaā yō nuū Yaā Dios jeē squícu yó jniñu ndácu ley Moisés jenahán, chi máá jéē candíje yó jeē Jesucristo ndahva yā cuēchi yó. Jeē yúcuan suni máá yó ni candíje yó Jesucristo, návāha ndahva yā cuēchi yó síquī jeē candíje yó, nasūu jíin jéē nducú yó squícu yó ley un. Chi áchí tutu i: Ni ñn ñayuu ma quéndōo ndaā i nuū Yaā Dios jíin jéē nducú i squícu i jniñu jeē ndácu ley, achí.

¹⁷ Te máá yó ñayuu hebreo, núu cúní yō jeē ndahva Yaā Dios cuēchi yó síquī jeē ni jíhī Cristo jehē yō, suu cúu jeē jécūhun ni yō jeē suni ñayuu casáha cuēchi cúu yó, nájñūhun tāca gá ñayuu. Núu súcuan ¿te á cuēchi ni sáha yó jeē ni stóo yó ley jenahán ná ni candíje yó Cristo? Tú cuiti jeē súcuan. ¹⁸ Chi sa núu naquihin tucu yó ley jeē ni stóo yó un, te súcuan tēe yó cuēchi síquī maá yó. ¹⁹ Chi ruhū, nájñūhun ni jihī rī ni sáha ley un, te jeē

yúcuan má cúu ga ndacu jniñu nuū rī. Te súcuan te cuu cotecu rī jeē sáha ri jeē cuní Yaā Dios. ²⁰ Chi nájñuhun je ni jihī rī jicā cruz jíin Cristo, te vijna chi tuá técu rī jeē maá rí, chi máa Cristo cúu jeē técu ini rī. Te jeē técu rī ini ñayīvi yáha vijna cúu jeē candíje ri jeē Sēhe Yaā Dios chindéé ñáhán yá ruhū. Chi ni cundáhú ni yā ruhū te ni socō yā maá yá jehē rī. ²¹ Núu súcuan te tu cúní rī casi rī nuū jnúhun jeē ndáhva Yaā Dios cuēchi yó síquī jeē yóhyo vāha ni yā jíin yó. Chi núu jeē quéndōo ndaā yō nuū yā jeē nducú yó squícu yó ley jenahán, yūcuán na te tu ndé jéjñíñu jeē ni jíhī Cristo nuú.

Jnúhun ley jíin jnúhun cándíje

3

¹ Róhó hermano ñuu Galacia, ¿naun tu cájecūhun ni rō? ¿Ndé téé ni saca núu xinī rō jeē tuá cájetáhú ró jnúhun ndaā? Chi ná ni canacani ri jnúhun ya nuū rō, te cájí ndasí ni cajecūhun ni rō jeē ni jíhī Jesucristo jicā cruz jehē rō. ² ñin-ni jnúhun yáha cájnūhun rí rohó: ¿Ndese ni canihīn rō Espíritu Santo? ¿A jéé ní cacundeyí ró squícu ró jniñu ndácu ley Moisés? Tú cuiti, chi jeē ní cacandíje ró jnúhun jnáma ya rohó jéé ní cajini sōho ró. ³ ¿Ndese cúu jeē tu cájecūhun cuiti ni rō? Chi xīhna gā ni cacandíje ró jéé ni jíhī Cristo jeē jnama ya rohó, te ni canihīn rō Espíritu. Te vijna ¿á cájeni ni rō jeē stóo ró jnúhun ún te fuerza maá ró squícu ró ley un, te cācu ró naún? ⁴ Núu súcuan te tu ndé ní jéjñíñu cuiti jeē ní castóho ñayuu rohó síquī jnúhun jnáma Cristo rohó, chi vijna cánducú ró squéndōo ró jnúhun ún. Nacā jeē vāha te núu jeē tu ní castóo ró, chi sa cácaníje ndije ró yá. ⁵ ¿Te na síquī cúu jeē jéhe Yaā Dios Espíritu yā nuū rō te sáha ya jniñu jéhnū mēhñu ró? Tu sáha ya síquī jeē cánducú ró squícu ró ley un, chi síquī jeē ní cacandíje ró jnúhun jnáma ya rohó jéé ní cajini sōho ró.

⁶ Abraham ni candíje de jeē sáha Yaā Dios jeē ni jéjñūhun ya, te jeē yúcuan ní ndahva yā cuēchi de. ⁷ Núu súcuan te na jécūhun ni rō jijnáhan ró jéé ñáyuu cácaníje jeē sáha Yaā Dios jehē i, ndívi i yucūn Abraham síquī jeē súcuan cácaníje i. ⁸ Chi nde jenahán je cáhán tutu ií jeē ñáyuu tācá nación tu jíin jnúhun Yaā Dios, ndahva yā cuēchi i núu candíje i ún. Te nde ná tu cuu tāca jéé yáha te je ni jejnūhun ya jnúhun vāha yáha nuū Abraham: Jeē rohó cúu jeē quéndōo ndetū ñayuu tācá nación. ⁹ Núu súcuan te ñayuu cácaníje, quéndōo ndetū i jíin Abraham, téé ni candíje jeē ni jéjñūhun ya.

¹⁰ Te sa jnahnū ndetū ñayuu jeē cánducú i quéndōo ndaā i jeē jíin ley Moisés. Chi súcuan yósó núu tútu ií: Jnahnū ndetū tāca ñáyuu jeē tu squícu ndíhī cuiti jnúhun yósó núu tútu ley, achí. ¹¹ Núu súcuan te cájí cúu jeē ni ñin ñayuu ma quéndōo ndaā i nuū Yaā Dios síquī jeē nducú i squícu i ley un. Chi cáhán tutu: Ñayuu jeē ní ndahva yā cuēchi i, técu i jeē candíje i jeē sáha ya jehē i, achí. ¹² Te ley Moisés tu cáhán jeē cótecu yō ní cáni síquī jeē candíje yó, chi sa suhva cáhán: Núu ndé ñáyuu squícu jniñu yáha, te cotecu i sáha, achí.

¹³ Te Cristo ni jnama ya yohó núu jnúhun cáhán ley jeē jnahnú ndetū yō síquī cuéchi yó, chi máa yá ni ndoho síquī jnúhun jeē jnahnú ndetū yō. Chi yósó núu tutu ií: Tāca ñáyuu condita caa jicā yújnu, jnahnū ndetū i, achí. ¹⁴ Te Cristo Jesús ni jihī yā jicā yújnu cruz návāha quéndōo ndetū ñayuu tācá nación sáha ya. Chi jnúhun jeē ni jéjñūhun ya quéndōo ndetū Abraham, jinū nuū i. Te súcuan te núu candíje yó jeē ni sáha Yaā Dios jehē yō, te nihīn yō Espíritu jeē ni jéjñūhun ya quiiji.

Síquī ley jíin síquī contrato jeē ni jéjñūhun ya

¹⁵ Hermano, na cáhán rī ñin jnúhun ndese cásáha ñayuu ñayīvi: Núu ñin téé sáha de ñin contrato chí ñin acta, te núu je ni cucutú ni sáha de firmar, te ma cúu ga najnanū, ni ma cúu jecosō gā. ¹⁶ Te suni súcuan ni sáha Yaā Dios ñin contrato jeē ni jéjñūhun ya nuū Abraham jíin yúcūn de jeē quíji. Te tu cáhán tutu ií síquī cuehē yucūn de, chi sa cáhán síquī ñin-ni yucūn de, te suu cúu Cristo. ¹⁷ Núu súcuan te jnúhun jeē cahán rī yáha cúu jeē xīhna gā ni sáha Yaā Dios ñin contrato jíin Abraham, jeē quiiji Cristo jnama ya yohó, te ni sácútu yá. Yūcuán na te ni yáha cuūn ciento ocō uxī cuiyā, te sáa te ni jéhe ya ley

nuū Moisés. Te ley un jēē ní quee cueé gá, ma cúu nacanu contrato un, ni ma cúu casi nuū jnūhun jeē ni jéjnūhun ya jeē jnama ya yohó. ¹⁸ Chi núu jeē jíin ley Moisés jnama Yaā Dios ñayuu, yūcuán na te nasūu síquī contrato jeē ni jéjnūhun ya cúu. Chi sa suhva síquī maá jēē ni jéjnūhun Yaā Dios nuū Abraham cúu jeē ní jnama ya de.

¹⁹ Núu súcuan ¿te ndese jéjníñu ley Moisés? Jéjníñu chi ni jēhe ya un cueé gá návāha nastúu cuēchi i. Te ni ndacu jniñu máá-ni nde ná tu quiji Cristo, Yaā cúu yucūn jeē ni jéjnūhun Yaā Dios jeē quíji. Te nde ná ni jēhe Yaā Dios ley un núu ñayuu, te ni tají yá tācá ndajéhé yā ni cacastūhun núu Moisés, te Moisés ni nacachī nuū i. ²⁰ Te sín cúu jnūhun jeē ni jéjnūhun ya nuū Abraham jeē quíji Cristo, chi máñúhún-ni ya ni jejnūhun, te tu ní jíni ñúhún ni ñin jeē nacachī nuū Abraham.

Siquī ndese jéjníñu ley jenahán

²¹ Núu súcuan ¿te á cúní cahān jeē ley jeē ni jēhe Yaā Dios nuū Moisés, téjiyo jeē ni jéjnūhun ya ún? Tú cuíti jeē súcuan. Chi núu jeē ni jēhe Yaā Dios ñin ley jeē cótecu ñayuu ní cáni sáha, yūcuán na te quendōo ndaā i nuū yā síquī jeē squícu i jniñu ndácu ley un núu. ²² Te tuú chi yósó núu tútu íi jeē ndihí ñayuu ñayíví, nájnūhun yíndihyū i vecāa chi cáyihí i chíji cuēchi. Te súcuan cúu návāha tācá i jeē candíje i jeē ni jíhí Jesucristo jehē i, nihīn i máá jēē ni jéjnūhun ya nuū i síquī jeē candíje i ún.

²³ Chi nde ná tu quee jnūhun candíje yó Cristo, te nájnūhun ni yíndihyū yō ni sáha ley jenahán, návāha condetu yó quívī quiji Cristo, Yaā candíje yó. ²⁴ Núu súcuan te ley ni cuu ñin jeē ndíto yóhó nájnūhun ñin mozo ndíto sūchi lúlí, te ni jejníñu nde quívī ní quiji Cristo, návāha candíje yó jēē ni jíhí yā jehē yō, te ndahva Yaā Dios cuēchi yó. ²⁵ Te vijna jeē ní quee Cristo, Yaā candíje yó, te tuá yíhi yó ndaha ley jeē cúu nájnūhun mozo ndíto yóhó.

²⁶ Chi ndivii rō cácuu sēhe Yaā Dios síquī jeē ní cacandíje ró Cristo Jesús. ²⁷ Chi tāca ró jeē ní jendute ró síquī jeē ni quívī ró ndaha Cristo, ni sáha ya jeē ní nduu ró nájnūhun cúu máá yá. ²⁸ Te vijna chi tuá cúu ró ni ñayuu hebreo ni ñayuu griego, ni mozo jeē ní jeen ñayuu, ni ñayuu sájniñu cuenta maá, ni tēe ni ñahan. Chi ñin na cúu ró núu yā jeē cáyihí ró ndaha Cristo Jesús. ²⁹ Te núu cáyihí ró ndaha Cristo, núu súcuan te yucūn Abraham cácuu ndije ró, te nihīn rō maá táhū jeē ni jéjnūhun ya.

4

¹ Jeē cahán rī jíin ró jijnáhan ró cúu jeē yáha: ñin sūchi chíí táhū, vēsú maá i naquihin ndihí jeē névāha tátá i, te núu lúlí i chi ínuú cúu i jíin mozo. ² Chi yíhi i ndaha tāca jēē ndíto i jíin jēē ndíto ndajníñu i, nde quee quívī jeē ní jeni tátá i, te sáa te nihīn i. ³ Te suni súcuan yóhó, chi nde ná tu jecūhun ni yō síquī Cristo te ni cuu yó nájnūhun sūchi lúlí, te ni yíhi yó chíji tācá costumbre jeē ní cajequin ñayuu ñayíví. ⁴ Te nde ná ni quee quívī jeē ní jeni Yaā Dios, te ni tají yá Sēhe ya, ni cacu ya chíji ñin ñahan, te ni cacu ya yucūn ñayuu nación hebreo jeē cáyihí chíji ley Moisés. ⁵ Súcuan ni cacu ya návāha jnama ya yohó jēē tuá quíhi yó chíji ley un, te návāha naquihin Yaā Dios yohó cuu yó sēhe ya.

⁶ Te síquī jeē cácuu ró sēhe ya, te ni tají Yaā Dios Espíritu Sēhe ya ni quívī ini anuá rō, te sáha ya jeē cácahān jee ró: Tátá maá ná. ⁷ Núu súcuan te tuá cácuu ró nájnūhun mozo, chi sēhe ya cácuu ró. Te jeē cácuu ró sēhe Yaā Dios, te suni nihīn rō maá táhū jeē ni jéjnūhun ya jeē jíin Cristo.

Jeē nacani ni Pablo síquī ñayuu cácaandíje

⁸ Chi nde saá, nde ná tu jecūhun ni rō ndese Yaā cúu Yaā Dios, te ni cacu ró mozo nuū tāca jēē násūu yāā ndaā cúu. ⁹ Te vijna chi je cájini rō ndese Yaā cúu ya, te vāha ga na cáhán rī jeē maá yá je jíin yā rohó. Núu súcuan ¿te najehē cácuu rō nandió cóo ró nduu tucu ró mozo nuū tācá costumbre ñayuu ñayíví jēē tu níhín jníñu cuíti? ¹⁰ Chi máni jeē cánēe íi rō quívī jíin yóo jíin vico jíin cuíyā. ¹¹ Te yúhú rí sanaa te tu ní jéjníñu cuíti jeē ní nacani rī jnūhun nuū rō.

¹² Cáhán ndahú rí jíin ró hermano, jeē na cáni ni rō nájñūhun jéni ni maá rí jeē tuá squícu ri costumbre ñayuu hebreo. Chi ruhū ni nasáha ri maá rí nájñūhun máa ró jeē tu ní cáyihí ró núū ley costumbre ñayuu hebreo. Te tú na vé ni cásáha ró jéē cucuíhyá ni rī nde saá. ¹³ Chi cájini rō ndese ni cuu ná ni nacani núú rí jñūhun nuū rō ndese jnáma ya yohó. Chi siquī jeē cuhú rī te ni jecuíñī rī ñuu rō ni nacani ri jñūhun. ¹⁴ Te vésú jñūndóho ni cuu jeē ní cocuhū rī, te tu ní cásájéē ni rō nuū rī, ni tu ní cásquéhichī ni rō ruhū. Chi sa ni cajetáhú ró ruhū nájñūhun jeē cúu ri ñin ndajéhé Yaā Dios, chí nájñūhun jeē cúu ri maá Cristo Jesús. ¹⁵ Núu súcuan ¿te najehē cúu jeē tuá cácusī ni rō jíin rí vijna? Chi náhán rí jeē vāha ni casáha ró jéē ní cajnahuhū ni rō núu jeē cúu te tava rō tinūu váha máa ró, cuāha ró nduu tinūu rí nuú. ¹⁶ Te vijna ¿á ní nduu ri enemigo rō siquī jeē cachí rí máni jñūhun ndaā nuū rō, chí naún?

¹⁷ Te cáhiyo tēe jeē cándihvī ni siquī rō jijnáhan ró, te nasūu jéē quéndōo vāha ánuá rō, chi sa jeē cáculi de nasásñin de róhó jíin rúhū, návāha condihvī ni rō jeē cúu máa de. ¹⁸ Te iyó váha jeē cándihvī ni de jehē rō, te núu jeē quéndōo vāha ánuá rō cúu núu. Chi níni jíni ñúhún sáha de jeē váha róhó, vésú núu íne ri jíin ró chí núu tú ri íne. ¹⁹ Séhē mánī jijnáhan ró, jeē siquí rohó cúu jeē inga jínu jnáhuhū ni rī, chí nájñūhun ñin ñahan scácu sēhe, súcuan ndóho ri jehē rō. Te suu cúu jeē jnáhuhū ni rī ndétu ri jeē na ndúndaā anuá rō ndacu ró Cristo. ²⁰ Nacā jeē váha núu jeē ndeé rí jíin ró vijna ñúhún, návāha cuu cahān manī rī jíin ró. Te tu cújñuní cuiti ni rī ndese ga cúu jeē cáni ni rī siquī rō.

Jñūhun yátá siquī Agar jíin Sara

²¹ Róhó jíjnáhan ró jéē cáculi rō quíhi ró chíji ley Moisés, cachí nuū rī: ¿A tu ní cájini sōho ró ndese cáhán ley un? ²² Chi cáhán tutu ií jeē Abraham ni iyo uū sēhe yíi de. Te ñin i cúu sēhe Agar, ñahan cúu mozo vehe de. Te inga i cúu sēhe ñahan iyó libre, suu ñasihí de Sara jeē ní cuu ña ñahan numá. ²³ Te sēhe ñahan cúu mozo, ni cacu i nájñūhun cácu tāca gá sūchi lúli. Te sēhe ñahan cúu libre, ni cacu i máa siquī jeē súcuan ni jejnūhun Yaā Dios. ²⁴ Te yāha cúu ñin jñūhun yátá, chí ndíndúú ñahan un cúu ña nájñūhun ndíndúú contrato jeē ni sáha Yaā Dios jíin ñáyuu. Máa ñahan nání Agar, cúu ña nájñūhun contrato ley jeē véji nde yucu Sinaí. Te ñayuu cáyihí chíji contrato ley, cácuu i mozo nuū ley un. ²⁵ Chi Agar cúu nájñūhun ley jeē ni jéhe Yaā Dios xinī yucu Sinaí jeē ñin nde Arabia. Te cúu ña nájñūhun Jerusalén, ñuu ñayuu hebreo, jeē iyó vijna, chí tāca sēhe ñuu Jerusalén, cácuu i nájñūhun mozo nuū ley un. ²⁶ Te Jerusalén jeē iyó andiví, chí sa suhva iyó libre nájñūhun Sara. Te yóhó ñáyuu cáculi je, nájñūhun sēhe un cácuu yó, chí iyó libre yó nuū contrato ley. ²⁷ Chi suhva yósó núu tútu ií:

Róhó jeē ní cuu ró ñahan numá jéē tú sēhe ró, na cúsi ni rō.

Róhó jéē tu ní jéhnde chíji ró jéē scácu ró, na cána jee ró jéē cúsi ni rō.

Chi coo cuehē gā sēhe róhó jéē ní cuu ró ñahan numá vésú ñahan jeē jé ni scácu sēhe.

Achí tutu.

²⁸ Hermano, sēhe Yaā Dios cácuu yó, chí súcuan ni jejnūhun ya nuū yó, nájñūhun ni jejnūhun ya nuū Abraham jeē cacu sēhe de Isaac. ²⁹ Te nde saá te inga sūchi ní cacu nájñūhun cácu tāca gá ñayuu, ni jito xeēn i Isaac, sūchi ní cacu ni sáha Espíritu. Te nájñūhun ni iyo sáá, suni súcuan cájito xeēn ñayuu tāca sēhe Yaā Dios nde vijna. ³⁰ ¿Te ndese cáhán tutu ií? Achí: Quenehen ró ñahan cúu mozo na quíhín ña jíin sēhe ña. Chi sēhe ñahan cúu mozo, ma nihín i tahū jíin sēhe ñahan libre, achí yá jíin Abraham. ³¹ Núu súcuan hermano, tu cúu yó nájñūhun sēhe ñahan cúu mozo, chí nájñūhun sēhe ñahan libre cúu yó.

Na cúñi ñihin yó jíin jñūhun jeē ni sáha libre yohó

5

¹ Te Cristo ni sáha libre yā yohó jéē tuá yíhi yó chíji ley Moisés. Núu súcuan te cuiñi ñihin ró jíin jñūhun jeē ni sáha libre yā yohó, te ma ndívicoo tucu ró cuu ró mozo nuū ley un.

² Sáha ró cuenta jijnáhan ró, chi ruhū Pablo cahán rī jín ró jeē núu squícu ró ley circuncidar, yūcuán na te tu níhín jniñu cuiti jeē ní candíje ró jéē ni jíhī Cristo jehē rō. ³ Te inga jínu cáhán nihin ri jín táca tée cánducú cuu circuncidar, jeē núu súcuan te suni cánuú jéē squícu de ndivii cuiti gā jnūhun cáhán ley Moisés. ⁴ Róhó jéē cánducú ró quendō ndaā rō jeē squícu ró ley un, je ni casiáá rō Cristo núu súcuan. Je ni castóo ró jnūhun jeē ndahva yā cuēchi ró síquī jeē cundáhú ni Yaā Dios rohó. ⁵ Te máá yó chi cájica yó jín Espiritu, te cácdíje yó jéē ní ndahva yā cuēchi yó, te jeē yúcuan ñūhun ni yō jeē quendō ndaā yō quivī cuíñi yó núu Yaā Dios. ⁶ Chi yóhó jéē cáyihī ndaha Cristo Jesús, vésú núu jeē cúu yó circuncidar chí tu cúu yó, tú na vé níhín jniñu. Jeē nihín jniñu cúu jeē candíje yó jeē sáha ya jehē yō. Te yūcuan sáha jeē cundáhú ni yō jnáhan yó.

⁷ Vāha ni cacandíje ró núu. ¿Te ndé ñin ni jesi jeē tuá cájetáhú ró jnūhun ndaā núu súcuan? ⁸ Jnūhun jeē ní cascáhán de róhó, chi tú vēji nuū maá Yaā ní cana róhó ní quivícoo ró ndaha ya. ⁹ Te ma náā ni rō jeē tée cástáhú róhó, jnūhun cástéén de cúu nájnūhun levadura, chi vésú jecu-ni levadura, te ndáa ndihī ñujen sáha. ¹⁰ Te cúcáhnū ni rī jeē maá Jítóho yō sáha ya jeē ma cándíje ró jijnáhan ró inga jnūhun jeē sñn cáhán. Te máá Yaā Dios cuāha ya castigo tēe jeē sáca núu xinī rō, núu na-ni tēe cúu de.

¹¹ Te ruhū, hermano, núu jeē nácani ga rī jnūhun ley circuncidar nde vijna, te jnáhan ri ñayuu hebreo ma cóto xeēn i ruhū nuū. Chi ma quití ni i jeē nácani ri jnūhun jeē ni jíhī Cristo jicā cruz, núu jeē súni nácani ri jnūhun circuncidar nuū. ¹² Te tāca tée jeē sáca núu xinī rō síquī jnūhun ún, vāha ga na cáhnde gā de máá de núu súcuan.

¹³ Chi máá ró jijnáhan ró hermano, ni cana ya rohó návāha coo libre rō nuū ley un. Te vésú iyó libre rō, te ma cáni ni rō jeē cúu quivícoo ró táca cuéchi jeē cúu modo neé cúní maá ró, chi sa suhva na sáha ró máá ró mozo jeē chindéé ñáhán ró jnáhan ró síquī jeē cundáhú ni rō i. ¹⁴ Chi je ni squícu ró ndihī ley núu squícu ró ñin-ni jnūhun ndácu jniñu yáha: Cundáhú ni rō jnáhan ró nájnūhun cundáhú ni rō maá ró, achí. ¹⁵ Te núu máni jeē ndóna xeēn rō síquī jnáhan ró jéē cuajnáhan ró, te coto ma snáā rō jniñu jeē ni sáha ya mēñu ró jijnáhan ró.

Modo cuní ñayuu tu cándíje jín modo sáha Espiritu

¹⁶ Súcuan cáhán rī jín ró jijnáhan ró: Caca ró nájnūhun cúní maá Espiritu, te yūcuán na te ma sáha ga rō modo jeē cuní maá ró. ¹⁷ Chi tāca jéē cuní maá yó, yūcuan jési nuū jeē cuní maá Espiritu. Te jeē cuní Espiritu, jési nuū modo neé jéē cuní maá yó. Te jeē ndíndúú yáha chí cájesi nuū jnáhan, te jeē yúcuan tu cúu sáha ró jniñu vāha jeē cuní rō sáha ró. ¹⁸ Te núu máá Espiritu steén nuū rō, núu súcuan te tuá cáyihī ró chíji ley jenahán.

¹⁹ Te íyó ndijin tācá jniñu casáha ñayuu cájica jín modo neé máá, te yāha cúu: Cásíquí ndéē jnáhan i, casáha i jniñu jnéhén, casáha neé ndasí i. ²⁰ Cáchiñúhún i ídolo, casáha tásí i, cájito uhū jnáhan i, cájejnáhan i, cácuquíñi ni i. Te yachí cáquití ni i, te cándihvī ni i jeē cúu máá-ni i, te cátejnéhan i cáśásñn i máá i. ²¹ Te cácuquésún ni i, cájehni i ndīyí, cáñajini i, casáha i vico neé, jín táca gá jeē súcuan. Te cáhán nihin ri jín ró, nájnūhun je ni cahán rī jín ró saá, jeē ñayuu casáha súcuan, ma nihín tahu i quivícoo i ñuu nuū ndácu Yaā Dios jniñu.

²² Te ñayuu jeē nduú i jín Espiritu, tācá jniñu yáha sáha ya jín i: Jeē cundáhú ni jnáhan, jeē cúśñ ni, jeē iyó ndeyí sñ ni, jeē iyó paciencia, jeē maní ni, jeē váha ni, jeē squícu vāha, ²³ jeē tu sáha jeē cujéhnū, jín jéē jési modo jeē cuní maá. Te tú na ley cacān cuēchi síquī rō núu sáha ró táca jniñu yáha. ²⁴ Te ñayuu cáyihī ndaha Cristo, nájnūhun je ni cajehni i modo neé máá i jicā cruz, nde jín táca jéē ndíyo neé ni i te cútíndí i. ²⁵ Te jeē súcuan ni jēhe máá Espiritu ñin vida jeé núu yō, te suni na cáca yó jín modo steén Espiritu.

²⁶ Te ma sandúxí yó jéē squití ni yō jnáhan yó, te ni ma cucuésún ni yō síquī jnáhan yó.

Jnūhun jeē chindéé ñáhán yó jnáhan yó

6

¹ Hermano, núu ñin jnáhan ró ni sáha cuéchi, te róhó jéē cájica jíin Espíritu, na náchuhun ichí ró i. Te jíin jnúhun vitá cahān rō jíin i, te suni condito ró máá ró jeē ma cacán ini rō sáha ró táca cuéchi. ² Te chindéé ñáhán ró jnáhan ró núu na vé cúu jeē ndóho i, chi súcuan cúu jeē squícu ró ley Cristo.

³ Chi núu ñin ñayuu jéni ni i jeē ñayuu teyí cúu i, vésú nasūu súcuan cúu, te stáhú i máá i núu súcuan. ⁴ Te tācá ñin ñin ró na cóto ndee rō ndese cáa jniñu sáha ró. Te núu vāha sáha ró, yūcuán na te cuu cusī ni rō jíin jéē sáha máá ró, te tu níni jéē scáni jnáhan ró máá ró jíin jnáhan ró. ⁵ Chi tācá ñin ñin yó cánuu squícu yó jíin jniñu ní jéhe ya nuū máá yó.

⁶ Te róhó jéē cascuáha jnúhun vāha ya, na chindéé ñáhán ró tēe cástéén nuū rō jíin táca jéē váha cánevāha ró.

⁷ Ma stívi ró cani ni rō jeē cuu sáha ró cuéchi. Chi ma cúu sácatā rō nuū Yaā Dios cani ni rō jeē tu sáha ya cuenta. Chi tāca núu ndese sáha ñayuu, suu yūcuán nanihīn i. ⁸ Chi ñayuu jeē sáha i jeē cuní modo neé máá i, nihīn i jeē jnahnú ndetū i sáha modo jeē cuní máá i ún. Te ñayuu jeē sáha jeē cuní máá Espíritu, chi nihīn i jeē cótecu i ní cáni andíví sáha Espíritu. ⁹ Te ma cuíta yó jeē sáha yó jniñu váha núu súcuan, chi jeē quée máá quívī te nanihīn yō, te núu ma cuíta yó. ¹⁰ Núu súcuan te tāca jínu jeē cúu sáha yó, te na sáha vāha yó jíin táca ñayuu, te hermano yō jeē cácandíje cúu jeē cánuu gá.

Saludo jíin jnúhun cástūhun Pablo jeē sándīhí

¹¹ Condēhe ró jeē náhnu letra tēe ri cuajeē nuū rō jijnáhan ró, chi ndaha máá rí tēe ri yāhá. ¹² Te tēe jeē casáfuerza de róhó cuu ró circuncidar, casáha de siquī jeē cácuni de cuajnúhún ñayuu de. Te casáha de návāha ma cóto xeē ñayuu de jeē cáncani de jnúhun jeē ni jíhī Cristo jehē yō. ¹³ Te ni máá de jeē casáha de circuncidar, suni tu squícu vāha de ndíhi ga ley jenahán. Te cácuni de jeē cuu ró circuncidar, návāha cuu sátéyí de máá de núu quihin ró jnúni circuncidar sáha de. ¹⁴ Te ruhū tu cuní rī satéyí rí máá rí siquī ní ñin jeē yúcuan, chi máá ñin-ni siquī jeē ni jíhī Jítoho yō Jesucristo jicā cruz. Chi siquī yúcuan cúu nájnūhun ni jíhī rī, chi ni siaá rī tāca jéē iyó ini ñayíví, te suni nájnūhun ñin ndīyí cúu ri nuū ñayíví. ¹⁵ Chi núu yíhi yó ndaha Cristo Jesus, te tu níhín jniñu núu cúu yó circuncidar chí tuú. Chi jeē níhín jniñu cúu jeē ní nasájeé yá anuá yō. ¹⁶ Te ñúhun ni rī jeē tāca ró jeē jíca ró jíin modo yáha, na sáha ga yā jeē coo ndeyí coo sī ni rō, te cundáhú ni yā rohó. Te suni ñúhun ni rī jeē súcuan sáha ya jíin táca gá i jeē cúu ndije i ñayuu cácandíje Yaā Dios.

¹⁷ Te vijna jíin ní gá cuahān yō, cuní rī jeē ma stáhān gā ni ñin ñayuu ruhū. Chi yiquí cúñu rī ndíso seña jeē ni tújī rī ni ndoho ri jeē cúu ri mozo máá Jítoho yō Jesús.

¹⁸ Hermano, ñúhun ni rī jeē na sáha ga Jítoho yō Jesucristo jeē váha róhó jijnáhan ró. Súcuan na cóo. Amén.

CARTA JEE NI TEE APOSTOL SAN PABLO NUU ÑAYUU ÑUU EFESO

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū. Te tée ri carta yáha cuájeē nuū rohó ñáyuu ñuu Efeso, jeē cácuu ró ñáyuu maá yá jeē cácuandíje ró Cristo Jesús. ² Te ñúhun ni rí jeē Tatá yō Yaā Dios jíin Jítóho yō Jesucristo, na sáha ga yá jeē váha róhó, te sáha ya jeē coo ndeyí coo sñ ni rō.

Jeē sáha Cristo jeē quéndōo vāha ánuá yō

³ Na cáhán yō jeē yóhoyo cújéhu Yaā Dios, Yaā cúu Tatá Jítóho yō Jesucristo. Chi ni jēhe ya tāca jéē váha íyó andiví jéē quéndōo vāha ánuá yō, chi yíhi yó ndaha Cristo. ⁴ Chi nde ná tu jecōo ñayiví te ni nacāji ya yohó jéē quívi yó ndaha Cristo, návāha coo ndoo ánuá yō te caca ndaā yō nuū yā. ⁵ Je ni cundáhú ni yā yohó nde saá, te ni tana ya yohó jéē náquihin séhe ya yohó. Te jíin Jesucristo ni sáha ya súcuan, chi ni nujnahan ni yā sáha ya. ⁶ Te jeē yúcuan níní na cáhán yō jeē yóhoyo cújéhu ya, chi yóhoyo vāha ni sáha ya yohó jíin táca jéē váha ni yā, siquī jeē yíhi yó ndaha Cristo, Sēhe ya jeē maní yā jíin. ⁷ Te siquī jeē yóhoyo vāha ni yā jíin yó, te Sēhe ya un ní jnama ya yohó jéē ni jíhi yā jehē yō, te ni ine cáhnu ni yā nuū cuéchi yó. ⁸ Te ni steén yā jeē cundáhú ndasí ni yā yohó, te ni sáha ya jeē jécūhun ni yō te cundíchí yó jíin jnúhun ya. ⁹ Te ni sáha ya jeē cuni yō ñin jnúhun ya jeē ní yisāhí, jeē tu ní sáha ya jeē cuni ñayuu jenahán. Chi súcuan ni tee ni yā nde saá, te nújnahan ni yā sáha ya. ¹⁰ Te yāha cúu jnúhun ún: Nde na quée tiempo te sáha ya jeē ndíhi jeē yúcu andiví jíin jéē yúcu ñayiví, inuú-ni nduu, quíhi ndaha Cristo.

¹¹ Te siquī jeē yíhi yó ndaha Cristo, te nihīn yō tahū yō, chi je ni nacāji Yaā Dios yohó nde saá. Chi súcuan ni tee ni maá yá, chi sáha ya tācā-ni jeē jé ni cundaā ni yā jeē nújnahan ni yā sáha ya. ¹² Súcuan ni sáha ya návāha máá rí jeē xíhna gā ni cacandíje ri Cristo, caca ndaā rí te súcuan sájéhu ri yā jeē yóhoyo luu cújéhu ya. ¹³ Te suni máá ró jíin náhan ró, ni cajini ró jnúhun ndaā jnúhun vāha jeē jnáma ya rohó, te ni cacandíje ró Cristo. Te ni canihīn rō Espíritu Santo jeē ni jéjnūhun ya jeē cuáha ya. Te ndée Espíritu yā ún ini anuá yō, te cúu ya nájnūhun sello jeē steén jeē cúu yó séhe Yaā Dios. ¹⁴ Te sáha ya jeē jini ndije yó jéē cucuée gá te cuāha Yaā Dios tahū yō, nde na sínu ya jniñu jeē jnáma ya ñayuu yā. Te quívī ún cahān yō jeē cújéhu ya, chi yóhoyo luu cújéhu ya.

Jeē jicán tahú Pablo jehē ñáyuu cácuandíje

¹⁵ Te ruhū ni jini jnúhun ri ndese cácuandíje ró jéē ni sáha Jítóho yō Jesús jehē rō, jíin ndese cácuandíje ni rō ndíhi ñayuu cáyíhi ndaha Yaā Dios. ¹⁶ Te jeē yúcuan tu jécuiñí rí jeē nácuatáhú rí jehē rō, te jeē jicán tahú rí te tu náa ni rí cacān tahú rí jehē rō. ¹⁷ Chi jicán tahú rí jeē na sáha Yaā Dios jeē jécūhun vāha ni rō te ndundíchí ró jíin jnúhun ya, te cuni gā rō ndese Yaā cúu ya. Chi máá yá cúu Yaā Dios Jítóho yō Jesucristo, te cúu ya Tatá yō jeē lúu ndasí cújéhu. ¹⁸ Te jicán tahú rí jeē na sándijin gā yā nuū jeē níjnūnī rō, návāha jecūhun ni rō ndese cácuandíje ndíhi jeē cáñuhun ni rō nihīn rō siquī jeē ní cana ya rohó. Te jecūhun ni rō ndese cúcá cácuu ró jíin táca jnúhun jéhu luu ndíso jnúhun ya jeē cúu ñayuu maá yá. ¹⁹ Te jicán tahú rí jeē na jécūhun ni rō ndese yóhoyo jéhu poder yā jeē sájniñu ya ini anuá yohó jéē cúu yó ñáyuu cácuandíje. Chi tu ndíhi cuíti poder yā. ²⁰ Te suu poder un cúu jeē ni steén yā ná ni sáha ya ñin jniñu jéhu ga jeē ní nastécu yā Cristo mēñu ndíyí te ni scúcōo ya lado váha ya nde andiví. ²¹ Te ni jeni ya Cristo siquī tāca jéē cújéhu, jíin jéē ndíso jniñu, jíin jéē jniñu poder, jíin jéē ndácu jniñu, jíin siquī táca jeē cácahān ñayuu jeē cújéhu, cúu tiempo yáha, cúu tiempo quiji. ²² Te ni jēhe ya jeē cújéhu Cristo siquī ndívii. Te ni sáha ya jeē cúnuú yá cújéhu ya nuū ñáyuu cácuandíje. ²³ Te ñayuu cácuandíje un cácuu i nájnūhun yiqui cúñu ya, chi ñin na cúu i jíin yá te ñúhun chitú yá ini anuá i, chi Yaā jeē ñúhun chitú ñí cáhnu-ni cúu ya.

Ni cācu yó siquī jeē ní cundáhú ni yā yohó

2

¹ Te ni sáha ya jeē cotecu rō nī cání jíin Cristo. Chi je ni cacuu ró nájñūhun ndīyī nuū yā, ni sáha cuēchi ró jíin jñiñu néé ní casáha ró. ² Chi ni cajica ró jíin jñiñu yúcuan nde saá, ná ni cacondiquīn rō jñiñu ñayuu ñayiví, ná ni cajetáhú ró núū jexeén jeē ndácu jñiñu nuū tāca táchi xeén, te jíca nuū tachí. Te suu cúu jeē scánda ini ñayuu nīhni ni nuū Yaā Dios. ³ Te máá rí jijnáhan ri, suni súcuan ni cajica ri, chi ni casáha ri jñiñu néé jēē cuní máá rí, jíin táca jēē jicán yiqui cúñu rī, jíin jēē cájeni néé ni rī nde saá. Jeē yúcuan suni ni cacuu ri ñayuu jeē nihīn castigo xeén jeē cuáha ya nuú, chi inuú-ni ni casáha ri nájñūhun casáha máá i. ⁴ Te Yaā Dios chi yōhyo cuehē ni cundáhú ni yā yohó, te vāha ndasí ni yā jíin yó. ⁵ Te náa cúu yó nájñūhun ndīyī nuū yā ni sáha cuēchi yó, te ni nastécu yā yohó jēē cótecu yō nī cání jíin Cristo. Chi siquī jeē yóhyo vāha ni yā cúu jeē ní jnama ya yohó. ⁶ Te ni nastécu yā yohó jēē cótecu inuú yó jíin Cristo Jesús, te scúcōo ya yohó jíin yá nde andiví. ⁷ Súcuan ni sáha ya návāha nī gá tiempo jeē quíji, te stéén yā ndese yōhyo manī yā jíin yó, jíin ndese vāha ni yā jíin yó jeē siquí Cristo Jesús. ⁸ Chi siquī jeē yóhyo manī yā jíin ró cúu jeē ní jnama ya rohó, chi ni cacandíje ró jēē sáha ya jehē rō. Te nasūu síquī jeē ní casáha máá ró cúu, chi tahū jeē ni jéhe ya nuū rō cúu. ⁹ Chi tú na jñiñu vāha ní casáha yó jēē jnáma ya yohó, te jeē yúcuan ni ñin yó ma cúu sátéyí yó máá yó. ¹⁰ Chi cúu yó ñin jñiñu luu jeē ní nasáha máá yá, chi ni nasáha ya yohó jēē cundúú yó jíin Cristo Jesús, návāha sáha yó táca jñiñu vāha jeē jé ni sátūhva Yaā Dios jeē sáha yó.

Jeē sáha Cristo jeē ndívi yó núū jñūhun manī Yaā Dios jíin yó

¹¹ Núu súcuan te na núcūhun ni rō ndese ñayuu ni cacuu ró ndé saá. Chi tu ní cácuu ró ñáyuu hebreo, chi sa suhva ni cacuu ró ñáyuu tāca nación jeē tu jíin jñūhun ya. Te ñayuu hebreo jeē casáha circuncidar yiqui cúñu, ni cacahān i jeē cácuu ró ñáyuu tu sáha circuncidar. ¹² Na núcūhun ni rō jeē ndé saá tu ní cáhiin ró jíin Cristo, te ni cacuu ró ñáyuu ñuu jicá núū nación Israel. Te tu ní cájini rō tāca jñūhun contrato jeē ni jéjñūhun Yaā Dios. Te tu ní íne Yaā Dios jíin ró ñayiví yáha, te tú na vé jeē vāha ní cáñuhun ni rō jeē cóo. ¹³ Te vijna chi ni ndīvicoo ró núū Yaā Dios jeē tu ní cájini rō jñūhun ya nde saá, chi ni quīvicoo ró ndaha Cristo siquī jeē ni jíhī yā jehē rō. ¹⁴ Chi Cristo cúu Yaā sáha jeē ndúmanī jnáhan yó. Chi ni sáha ya jeē ñáyuu hebreo jíin ñáyuu tāca gá nación, ni nduu yó ñin na nuū yā. Chi ni sáha ya jeē tuá jíto uhū jnáhan yó, te suu cúu nájñūhun jeē ní jenu ya ñin jeē ndihyú sava mēhñu yó jeē sásñin yóhó. ¹⁵ Chi ni socō yā máá yá ni jíhī yā, te súcuan ni ndahva yā ley jenahán jíin jñūhun ndácu jñiñu jíin jēē tajnúní ndíso máá. Chi ley un ní sásñin ñayuu hebreo jíin táca nación jeē tu ní jíin i ley un. Te ni nasquíjñahan ya ndíhi yó jēē ní nduu yó ñin na nación jeē, yíhi yó ndaha ya. Te súcuan ni sáha ya jeē ní ndumanī jnáhan yó. ¹⁶ Te jíin jēē ni jíhī yā jicā cruz, te ni snāa yā jñūhun cájito uhū jnáhan ñayuu hebreo jíin táca gá nación. Te ni sáha ya jeē ndívicoo yó núū jñūhun manī Yaā Dios jíin yó, te ni nduu yó ñin na ñayuu máá yá.

¹⁷ Chi ni quíji Cristo ni nacani ya jñūhun vāha nuū tāca ñáyuu jeē na ndívi i nuū jñūhun manī yā jíin i, cúu róhó ñáyuu tu ní cájini jñūhun ya, te suni ñayuu jnáhan ri hebreo jeē cájini jñūhun ya. ¹⁸ Te vijna te siquī jeē ni jíhī Cristo, te ndíhi yó, cúu ñayuu hebreo chí ñáyuu tāca gá nación, cuu quīvicoo yó núū Tatá yō Yaā Dios, te ñin-ni Espíritu yā sáha. ¹⁹ Núu súcuan te tuá cúu ró nájñūhun ñayuu ñuu jicá ni ñayuu tatú, chi ñin na ni nduu ró jíin ñáyuu ñuu máá yá. Te jnáhan ñayuu vehe Yaā Dios cácuu ró. ²⁰ Te cácuu ró nájñūhun ñin ñin parte ñin vehe cáhnu jeē cúvāha siquī cimientu, te cimientu un cúu jñūhun Cristo jeē ní canacani tāca apóstol jíin téé ni canacani jñūhun ya jenahán. Te máá Jesucristo cúu nájñūhun yuū cánuú gá jeē yítuu vehe. ²¹ Te nī vehe cúvāha vāha siquī máá yá, cúsucún cuáhān, cúu ñin templo ñi jeē ndeé máá Jítoho yō. ²² Te suu cúu máá ró jijnáhan ró, chi ndúú ró jíin Cristo, te inuú-ni sáma ya rohó jíin táca ñáyuu cácandíje, cácuu ró nájñūhun ñin ñin yuū templo. Te suu cúu jeē ndeé Espíritu Yaā Dios ini rō nájñūhun ini ñin templo.

Jeē ndíso jñiñu Pablo nácani de jñūhun nuū ñáyuu tu jíin jñūhun Yaā Dios

3

¹ Te jeē yúcuan ruhū Pablo, jícán tahu rī nuū yā. Te íne ri vecāa siquī jeē ní nacani ri jnūhun Cristo Jesús nuū rohó ñáyuu tācá nación jeē tu ní jíní jnūhun ya nuū. ² Te jíní rī jeē ní cajini ró jnúhun ndese yōhyo vāha ni sāha Yaā Dios jíin rí, chi ni jēhe ya jniñu nuū rī jeē nácani ri jnūhun vāha ya nuū rō. ³ Te jnūhun ya jeē ní yisāhí, ni nastúu ya nuū rī, nájnuhun je ni tee ri jecu siquī un núu rō. ⁴ Te núu na cáhu ró te cuu jecūhun ni rō jeē ní jini vāha ri jnūhun Cristo jeē ní yisāhí un. ⁵ Te tu ní stéén yā jnūhun sāhí un núu ní ñin ñayuu tāca cuýā ní quiji ichi yátá. Te vijna cúu jeē steén ndijin yā jíin Espíritu yā nuū tācá apóstol jeē ní jeni ndoo ya, jíin núu téé cánacani jnūhun ya. ⁶ Te súcuan cáhán jnūhun ní yisāhí un: Ñayuu tāca gá nación, ñin cáhnu-ni nihin i tahu i jíin ñáyuu hebreo, chi ni cacandíje i jnūhun jeē jnāma ya i. Te ñnuú-ni ni nduu ndihi i, te ñin cáhnu-ni quéndōo ndetū anuá i sāha Cristo, nájnuhun ni jejnūhun Yaā Dios. ⁷ Te jeē siquí jnūhun yáha cúu jeē ní jeni ya ruhū jeē nácani ri jnūhun nuū rō. Chi ni cutahū rī jniñu luu yáha jeē ni jēhe ya nuū rī. Te jíin poder yā ni sāha ya un jíin rí. ⁸ Te ruhū chi cúu ri tēe núu ga nuū tāca ñáyuu núu ga jeē yíhi ndaha ya. Te vēsú súcuan te nuū maá rí ni jēhe ya jniñu luu yáha jēe nácani ri jnūhun vāha ya nuū ñáyuu tācá nación jeē tu jíiní, ndese yōhyo cúcá yó ndihi jeē ndíso jnūhun Cristo, jeē ma cánda cuiti yō jecūhun ni yō. ⁹ Chi ni jeni ya ruhū jeē steén cají rí jeē suni máa i jnama ya i. Te yúcuan cúu jnūhun Yaā Dios jeē ni yísāhi ndé jenahán ndasí, chi máa yá ni sāha ndihi-ni. ¹⁰ Te súcuan ni sāha ya jíin ñáyuu, návāha vijna te tāca jēe cácujeñu jíin jēe ndíso jniñu nuū sucún, na cúni ndese ndíchí ndasí Yaā Dios. Chi ndíchí ndasí ni sāha ya jíin ñáyuu cácuandíje. ¹¹ Chi súcuan ni tee ni yā nde ñí cáni, te ni sāha ya jeē Jítoho yō Cristo Jesús ni squícu ya ún. ¹² Te siquī jeē ni sāha Cristo, te vijna te jíiní ndije yó jēe cúu quívi yó cáhán yō jíin Yaā Dios siquī jeē candíje yó Cristo. ¹³ Núu súcuan te cáhán ndahú rí jíin ró jeē ma cucuíhyá ni rō siquī jnūndóho jeē ndóho ri jehē rō. Chi suu sāha jeē quéndōo ndetū anuá rō jijnáhan ró.

Cristo yōhyo cundáhu ni yā yohó

¹⁴ Te jeē yúcuan cúu jeē jécuiñi yití rí nuū maá Yaā cúu Tátá Jítoho yō Jesucristo. ¹⁵ Te maá yá cúu Tátá nuū ndihi ñayuu yā jeē yúcu andiví jíin ñáyiví. ¹⁶ Te jícán tahu rī jeē jíin poder yā jeē cujéñu ndasí yá, na sāha ya jeē íje vāha ni rō jíin jnúhun ya, te coo fuerza ini anuá rō, sāha Espíritu yā. ¹⁷ Te jícán rī jeē candíje nihin ró Cristo, návāha condee yā ini anuá rō, te jniñi vāha ró jnúhun jeē cundáhu ni yā rohó, te cuiñi nihin ró jíin. ¹⁸ Te súcuan te cuu jecūhun vāha ni rō jíin táca ñáyuu candíje, ndese cáa jnūhun cundáhu ni Cristo yohó. Chi yōhyo jíté, cáni, cúnú, súcún jnúhun ún, chi yōhyo cuehē sāha. ¹⁹ Te jícán rī jeē na cúni vāha ró ndese cundáhu ni yā yohó, vēsú tu cúu cuiti jecūhun ni yō ndihi ndihi. Te súcuan te cundúu ró jíin Yaā Dios jeē cunuú yá ini anuá rō.

²⁰ Núu súcuan te na cáhán yō jeē yóhyo luu cújéñu ya, chi máa yá cúu Yaā iyó poder jeē sāha ya jeē vāha ndasí gá vēsú ndihi jeē jicán yō chí jēe jeni ni yō. Te sāha ya un jíin poder yā jeē sájniñu ini anuá yō. ²¹ Te na cáhán yō jeē yóhyo luu cújéñu ya jeē siquí jeē ni sāha ya jehē ñayuu cácuandíje jíin jēe siquí Cristo Jesús. Te súcuan na cóo nde ñí cáni cuiti tiempo jeē quíji. Amén.

ñnuú-ni cácuu ñayuu cácuandíje sāha Espíritu

4

¹ Te ruhū jeē íne ri vecāa siquī jnúhun maá Jítoho yō, cáhán ndahú rí jíin ró jeē na cáca ndaā rō nájnuhun cánuú caca ró jēe cácuu ró ñáyuu ni cana ya. ² Te níni na cóo suchí ni rō, te coo vítá ni rō. Te na cóo paciencia rō, te cuandeyí ni rō jíin jnáhan ró jēe cundáhu ni rō i. ³ Te na cóndihvī ni rō coyūcu mání ñnuú ró, sāha máa Espíritu nuū véji jnūhun maní ni. ⁴ Chi ñin-ni cácuu ñayuu maá yá, te íyó ñin-ni Espíritu, te ñnuú cáñūhun ni yō jeē cóo jeē vāha siquī jeē ní cana ya yohó. ⁵ Te íyó ñin-ni Jítoho yō, jíin ñin-ni jnūhun cándíje yó, jíin ñin-ni jnūhun jéndute yó. ⁶ Te íyó ñin-ni Yaā Dios jeē cúu Tátá yō jijnáhan yó. Te maá yá cujéñu siquī ndihi yó, te sájniñu ya jíin ndihi yó, te ndéé yá ini ndihi yó.

⁷ Te tācá ñin ñin yó ní cacutahū yō sñn sñn jniñu sáha yó, núu ndese ni tana Cristo cūhva tahū un núu yō. ⁸ Jeē yúcuan cáhán tutu ñi:

Ná ni ndaa ya cuanuhun yā andiví, te ni stutú yá cuehē jeē yíndihyū, cuahān yā jíin. Te ni saja ya tahū nuū tāca ñáyuu.

⁹ Te jeē cahán tutu jeē ní ndaa ya, suni cúní cahān jeē xihna gā nde andiví ni cuun ya nde nuū cunú gá ñayiví yáha. ¹⁰ Te Yaā ní cuun, suni máá yá cúu jeē ní ndaa nde nuū sucún gá andiví, návāha cuhun chitú yá ní cáhnu-ni. ¹¹ Te ni tana ya sñn sñn jniñu sáha ñayuu. Chi ni jeni ya sava ñayuu cuu apóstol, te sava ga nacani jñūhun ya, te sava ga scándíje ñayuu jñūhun jeē jnáma ya i, te sava ga coo pastor condito ñayuu cácandíje, te sava ga steén. ¹² Súcuan ni jeni ya ñayuu maá yá jeē cuajniñu i nuū yā, návāha cuehnu ga ñayuu Cristo jíin jñūhun ya. ¹³ Te súcuan coo nde nduu ñnuú-ni ndihí yó jíin jñūhun cándíje yó, te cuni vāha yó ndese Yaā cúu Sēhe Yaā Dios. Te súcuan ije vāha yó ndé na cúchitú yó jíin ndihí jñūhun jeē ñūhun chitú ini Cristo. ¹⁴ Te súcuan te ma cóo ga yō nájñūhun sūchi lúli jéē yachí jéni yāha jéni yūcuán ni i, ni ma quíví nduu yō cháha chúcuan jíin sñn sñn jñūhun jeé cástéén tēe stáhú jéē yóhyo ndito de squíví de yóhó nuū jñūhun stáhú. ¹⁵ Chi sa suhva na cóndiquin yō jñūhun ndaā jíin jñūhun cundáhú ni. Te súcuan cuehnu yó jíin táca jniñu cúní Cristo, Yaā cujéhnu nuū ñáyuu cácuu nájñūhun yiqui cúñu yā, chi ñin na cúu i jíin yá. ¹⁶ Te sáha ya jeē nduu ñnuú ni tācá i jeē cáhije i cuahān i, chi cácuu i nájñūhun ñin na yiqui cúñu jíin yá. Te jéjñiñu vāha tācá ñin ñin i ndese ni nihin jniñu i, návāha scuéhnu jnáhan te ije jíjñáhan jíin jñūhun cundáhú ni.

Jeē ndújeé yó sáha Cristo

¹⁷ Núu súcuan te yāha cúu jñūhun cáhán rī jíin ró, te jeē achí Jítóho yō cúu jeē cahān ñihin ri jíin ró: jeē ma cáca ga rō nájñūhun cájica sava ga ñayuu jeē tu jíin i ndese Yaā cúu Yaā Dios, chi cájica i jíin jñūhun jeē jéni sáa-ni máá i. ¹⁸ Te íyó nee nuū jeē níjnūní i, te tu névāha i Espiritu jeē véji nuū Yaā Dios, chi tu jíin i jñūhun ya, siquí jeē níhni ni i. ¹⁹ Te tuá cúcanu i, chi ni quívicoo i jíin jniñu néé ndasí, te ndíhví ni i sáha i tācá jniñu jnéhén. ²⁰ Te róhó jíjñáhan ró, nasūu súcuan ní cáscuáha ró jñūhun Cristo, ²¹ te núu ndaā jeē ní cajini ró jñūhun ya jíin jéē ní cacutūhva ró jíin jñūhun ndaā Jesús. ²² Núu súcuan te na stóo ró táca jniñu ní casáha ró ichi yátá, ná ni casáha ró modo cuní máá ró jeē ní cujnéhén ánuá rō ni sáha jniñu néé stáhú jéē ní ndiyo ni rō. ²³ Te na ndújeé ánuá rō jíin jéē níjnūní rō. ²⁴ Te na cuáha ró jñūhun ndujeé ró, chi nasáha Yaā Dios rohó nájñūhun cúní máá yá jeē cáca ndaā rō jíin jniñu vāha jniñu ndoo.

²⁵ Núu súcuan te ma cahán gā rō jñūhun stáhú, te na cáhán ndaā rō jíin táca jnáhan ró, chi ñin-ni cácuu ndihí yó.

²⁶ Núu véji ñin jeē squítí ni rohó, te ma quití neé ni rō. Te ma quití ni rō nde quee niāndii. ²⁷ Ma cuáha ró jñūhun jeē sáha jexeén jeē quíví ró cuéchi.

²⁸ Ñayuu ní sacuíhná, ma sacuíhná gá i, chi sa suhva na sájniñu i, te na cócuu i jíin jniñu vāha, návāha nihin i jeē cuáha i nuū ñáyuu cúmaní nuū.

²⁹ Ni ñin jñūhun néé ma cahán rō, chi sa suhva na cáhán rō jñūhun vāha jeē scuéhnu jnáhan jíin jñūhun ya, te sáha jeē quéndōo vāha ñayuu jíin sōho. ³⁰ Ma sáha ró cuéchi návāha ma cucuíhyá ni Espiritu Santo Yaā Dios. Chi Espiritu yā cúu nájñūhun sello jeē steén jeē cúu yó séhe Yaā Dios, nde quiji quíví jínu jniñu jeē jnáma ya rohó.

³¹ Te na siáá rō tāca jñūhun cútucu ni, jíin jñūhun xeén ni, jíin jñūhun quití ni, jíin jñūhun cáhán ndevāha, jíin táca jñūhun néé. ³² Chi sa suhva na cóo vāha ni rō jíin jnáhan ró, te cundáhú ni rō i. Na cóne cáhnu ni rō nuū jnáhan ró, nájñūhun ni ine cáhnu ni Yaā Dios nuū rō siquí Cristo.

Ndese cánuú caca ndaā sēhe Yaā Dios

5

¹ Núu súcuan te na ndácu ró Yaā Dios, chi cácuu ró séhe ya jeē maní yā jíin. ² Te níni cundáhú ni rō jnáhan ró, nájñūhun ni cundáhú ni Cristo yohó, te ni socō yā máá yá jehē yō, ni cuu ya nájñūhun ñin londe jeē jeén asñ nuū Yaā Dios jeē ni sócō yā máá yá.

³ Te vijna jeē cácuu ró séhe Yaā Dios, te ni ma sáha ró ni ma ndájnūhun ró síquī jnūhun jíca jnéni, ni tācá jniñu jnéhen, ni jnūhun ndíyo ni ndajniñu. ⁴ Te ni ma cahán rō tāca jnūhun sáha jeē cúcanu jnáhan, ni jnūhun cánéé íi, ni jnūhun jeē tu ndé jéjñiñu cuiti. Chi tācá un tu níhín jniñu. Chi sa suhva na nácuatáhú ró nuū Yaā Dios. ⁵ Chi je cájini rō jeē ní ññayuu cájica jnéni, ni jeē sáha jniñu jnéhen, ni jeē ndíyo ni tācá ndajniñu, ma nihín tahú i quívi i ndaha Cristo jíin Yaā Dios jeē ndacu ya jniñu nuū i. Chi tāca jéé ndíyo ni i cúu nájnūhun ídolo i jeē cáchiñúhún i. ⁶ Te coto ró jéé ma stahú ni ññi i róhó jíin táca jnūhun cáhán saá ni i, chi síquī tāca jnūhun néé yáha cúu jeē quíji castigo xeēn Yaā Dios nuū tāca ññayuu níhni ni. ⁷ Ma quívi nduu rō jíin i núu súcuan.

⁸ Chi tāca quívi saá ni coyūcu ró nájnūhun nuū néé, te vijna chi cáyūcu ró jíin luz maá Jítóho yō, cúu jeē cájecūhun ni rō síquī yā. Te na cáca ró nájnūhun cájica ññayuu jeē steén luz yā ini anuá i. ⁹ Chi jniñu sáha luz yā jíin yó cúu tācá jniñu maní ni, jniñu ndaā, jíin jniñu váha. ¹⁰ Scuáha ró sáha ró táca jniñu jeē nújnahan ni maá Jítóho yō. ¹¹ Te ma quívi nduu rō jíin táca jeē tu níhín jniñu jeē casáha ññayuu cáyūcu nájnūhun nuū néé. Chi sa suhva stéén rō nuū i jeē tú váha casáha i. ¹² Chi cúcanu yō cahán yō síquī jniñu casáha yuhu maá i. ¹³ Te luz yā sáha jeē nátūu tācá jniñu néé casáha i. Te núu cuatáhú i luz yā te caca i jíin luz ún. ¹⁴ Jeē yúcuan cáhán tutu:

Róhó jeē cúhuun ni, jeē nájnūhun quíxi, natahū ni,
te quenda ró méhñu ññayuu jeē cácuu nájnūhun ndíyi.

Te Cristo steén yā luz yā ini anuá rō.

Achí tutu.

¹⁵ Núu súcuan te coto vāha ró ndese caca yúcún ró. Te ma cáca ró nájnūhun cájica ññayuu canéé, chi caca ró nájnūhun cájica tēe ndíchí. ¹⁶ Ma snāā rō tiempo, chi condíhvī ni rō jíin jniñu ya, chi íyo cuéhē cuēchi quívi yáha. ¹⁷ Núu súcuan te ma cóo néé xínī rō, chi sa suhva na jécūhun vāha ni rō na jniñu nújnahan ni maá Jítóho yō. ¹⁸ Te ma nájini ró, chi tívi ró sáha. Chi sa suhva na ndúcú ró jeē cúnuú Espíritu Santo ini anuá rō. ¹⁹ Te cahán rō jíin jnáhan ró jíin salmo jíin himno, yaa íi jeē cahán jnūhun ya. Te ini anuá rō cahán rō jíin yá jíin táca yaa, chi yúcuan cúu jeē jíta ánuá rō nuū yā chíñúhún ró yā. ²⁰ Te níni nacuatáhú ró síquī tācá-ni nuū Tatá yō Yaā Dios te ndacunehen ró síhvī máá Jítóho yō Jesucristo.

Ndese squícu vāha ññayuu cácadíje nuū jnáhan i

²¹ Te cuatáhú ró nuū jnáhan ró síquī jeē cáhīyo yíñúhún ró nuū Cristo.

²² Róhó ññahan cácuu ññasihí, cuatáhú ró nuū yíi ró, nájnūhun jétáhú ró nuū Jítóho yō.

²³ Chi yíi cújéhnu nuū ññasihí, nájnūhun cújéhnu Cristo nuū yohó ññayuu cácadíje, jeē cácuu yó nájnūhun yíqui cúñu yā, chi ññi na cúu yó jíin yá. Te máá yá jnáma ya yohó.

²⁴ Chi nájnūhun ññayuu cácadíje cájetáhú i nuū Cristo, suni súcuan ññasihí cuatáhú ññi ndíhi jeē cahán yíi ñña.

²⁵ Te róhó tēe cácuu yíi, cundáhú ni rō ññasihí ró, nájnūhun ni cundáhú ni Cristo yohó ññayuu cácadíje, te ni socō yā maá yá jehē yō. ²⁶ Súcuan ni sáha ya jeē cóo ndoo coo íi yō nuū yā, te ni nacate ya anuá yō jíin jnūhun ya jíin jéé ní jendute yó. ²⁷ Te yohó ññayuu cácadíje chi cuiñi yó núu yā, te luu cújéhnu yó. Te ma cóndee cuēchi ánuá yō, ni jeē tú luu, ni ññi jeē súcuan, chi sa suhva coo ndoo coo íi yō nuū yā, te tú na vé cumaní gā. ²⁸ Te nájnūhun Cristo ni cundáhú ni yā ññayuu cácadíje, suni súcuan cánuú jéé cundáhú ni yíi ññasihí de, nájnūhun cundáhú ni de máá de. Chi tēe cundáhú ni de ññasihí de, máá de cundáhú ni de. ²⁹ Chi ni ññi tēe tu jíto uhū de máá de, chi sa suhva yéji de te ndíto yúcún de máá de. Te suni súcuan sáha Cristo jíin yohó ññayuu cácadíje nuū yā. ³⁰ Chi cácuu yó nájnūhun yíqui cúñu yā, te ññi ññi yó cácuu nájnūhun ññi ññi parte yíqui cúñu yā. ³¹ Te suu cúu nájnūhun tēe jeē stóo de tátá de náná de, te quijnáhan de jíin ññasihí de, te ññi na cúu ndíndúu de. ³² Yóhō yéhnu jnūhun sáhi yáha, te cáhán rī jeē ññayuu cácadíje suni súcuan quijnáhan i jíin Cristo. ³³ Te suni súcuan ná ññi ná ññi ró cundáhú ni rō ññasihí ró, nájnūhun cundáhú ni rō maá ró. Te ññasihí na cúu yíñúhún ñña jíin yíi ñña.

6

¹ Te róhó séhe jíjnáhan ró, cuandije ró núū tatá rō nuū naná rō, chi yūcuan cúu jeē váha sáha ró jéē candíje ró Jítóho yō. ² Chi yāha cúu ñn jnáhan jeē uxí jnūhun ndácu jniñu jeē ni jéhe ya, te xīhna gā jnūhun yáha ndíso tahū: Coó yíñúhún ró nuū tatá rō nuū naná rō, ³ návāha quendōo ndetū rō, te nánán cotecu rō ini ñayīvi yáha. Achí.

⁴ Te róhó tátá jíjnáhan ró, ma squití ni rō séhe ró, chi sa suhva scuéhnu ró i jíin jnūhun cuandije i, te stéén rō nuū i jeē candíje i máá Jítóho yō.

⁵ Te róhó mozo jíjnáhan ró, cuandije ró núū patrón rō ñayīvi yáha, te coo yíñúhún ró te conso iyo ró núū de. Te na sájniñu ndaā sájniñu ndije ró, cani ni rō jeē nuū Cristo cájejniñu ró. ⁶ Ma sájniñu ndúxí ró jeē maá jéē coto de te cuajnúhún de róhó. Chi sa suhva sáha ró cuenta jeē mozo Cristo cácuu ró. Te sáha ró jéē nújnahan ni Yaā Dios nde jíin ini jíin ánuá rō. ⁷ Te na cúsiñi ni rō sájniñu ró, te na cáni ni rō jeē nuū maá Jítóho yō cájejniñu ró, nasūu núū ñáyuu. ⁸ Chi je cájini rō jeē jniñu váha sáha ñn ñn ró, te nihin rō yáhu jniñu yūcuan núū maá Jítóho yō, vēsú cúu ró mozo chí tēe sájniñu máá.

⁹ Te róhó patrón jíjnáhan ró, suni súcuan sáha ró jíin mozo rō, te ma cahán xeēn rō jíin i. Chi na cócuhun ni rō jeē suni máá ró jíin máá i yíhi ró ndaha Jítóho yō, Yaā ndeé andiví. Te tu sáha ya cuenta ndese cúu ñn ñn ñáyuu, chi inuú sáha ya jíin i.

Na cúcutú yó jíin táca fuerza Yaā Dios

¹⁰ Te íyó inga jnūhun, hermano jíjnáhan ró. Nducú ró jeē na cóo fuerza ini rō jíin fuerza máá Jítóho yō jeē nduú yá jíin ró, chi íyó téyí poder yā. ¹¹ Na cúcutú ró jíin táca fuerza Yaā Dios, návāha cuu cuiñi nihin ró jéē ma stahú jexeén róhó. ¹² Chi nájnūhun jeē cájejnáhan yó jíin táca jéē neé. Te nasūu ñáyuu cúu jeē cájejnáhan yó jíin, chi sa suhva jíin táca táchi cájica nuū sucún. Te yūcuan cúu jeē cácujeñnu, jíin jéē cándiso jniñu, jíin jéē cándacu jniñu nuū ñáyuu ñayīvi yáha jeē nájnūhun cájica i nuū neé. ¹³ Núu súcuan te na cúcutú ró jíin ndihi fuerza Yaā Dios, návāha cuu cuiñi nihin ró quívi jíto ndee jexeén rohó. Te súcuan coo tūhva ró jíin táca ndihi jeē cuiñi nihin ró jíin. ¹⁴ Núu súcuan te cuiñi nihin ró jíin jnūhun ndaā jeē cúu nájnūhun jeē yíhi nihin sanchíi chíji ró. Te sácutú ró maá ró jíin jnūhun caca ndaā rō, te suu cúu nájnūhun jeē cúcutú soldado jíin sahma cáa jeē ndihyú de. ¹⁵ Te níni cotūhva ró nacani ró jnūhun ndeyí jnūhun siñi ni jeē véji nuū Yaā Dios. Te suu cúu nájnūhun jeē chíhi soldado ndijēn jehē de. ¹⁶ Te jeē cánuú gá cúu jeē candíje ró jeē iyó yá jíin ró. Te yūcuan cúu nájnūhun jeē tūhva ró máá ró yatā ñn escudo. Chi jíin jnūhun cándíje ró un te cuu ndahva rō ndihi jeē tají máá jéxeén, jeē cúu nájnūhun nduva jeē cayú yáñuhūn punta. ¹⁷ Te cuiñi ró jíin jnūhun ni jnama ya rohó, jeē cúu nájnūhun ñn lélú cáa. Te cuajniñu ró jnūhun jeē yosó núū tútu Yaā Dios jeē ni jéhe Espíritu Santo nuū rō. Chi yūcuan cúu nájnūhun jéjniñu soldado espada de. ¹⁸ Te níni cácan tahú rō nuū Yaā Dios siquī ndihi-ni, te cahān ndahú ró jíin yá jíin fuerza Espíritu. Núu súcuan te ndito na cóo ni rō, te ma jécuiñi rō jeē cacán tahú rō jehē táca ñáyuu máá yá. ¹⁹ Te suni cahān rō jehē rī, návāha nihin rī jnūhun cahān rī, te coo téyí ni rī nacani cáji rí jnūhun jeē jnáma ya yohó, suu jnūhun jeē ní yisáhí un. ²⁰ Chi ni tají yá ruhū jeē jíca rí nacani rí jnūhun ya ún, te jeē siquí un cúu jeē íne rí vecāa. Te na cácan tahú rō jeē coo téyí ni rí cahān rí jnūhun ya, nájnūhun cánuú cahān rí.

Saludo jeē sándihí

²¹ Tíquico cúu ñn hermano jeē maní yō jíin, te cúu de tēe squícu vāha chíndéé ñájnañan jíin rí nuū jniñu máá Jítóho yō. Te máá de castūhún ndihi ndese cuahān jniñu rí te ndese íyó rí. ²² Jeē yūcuan ní tají rí de cuajeē de nuū rō, návāha cachi de ndese cáhiyo rí, te coo ndeyí ni rō jíjnáhan ró sáha de.

²³ Te ñūhun ni rí jeē Tatá yō Yaā Dios jíin Jítóho yō Jesucristo, na sáha ya jeē coo ndeyí coo siñi ni táca róhó jéē cácuu hermano, te coo maní gā rō jíin yá, te candíje vāha ró. ²⁴ Te ñūhun ni rí jeē na sáha ga yā jeē váha róhó jíjnáhan ró jéē maní ndije ró jíin Jítóho yō Jesucristo. Súcuan na cóo. Amén.

CARTA JEE NI TEE APOSTOL SAN PABLO NUU ÑAYUU ÑUU FILIPOS

¹ Máá rí cúu Pablo jíin Timoteo, mozo Jesucristo. Te cátee ri carta yáha cuájeē nuū tāca róhó hermano cáyucú ñuu Filipos, jeē cácuu ró ñáyuu maá yá jeē cáyihí ró ndaha Cristo Jesús. Te suni cátee ri nuū tēe cándiso jníñu cándito róhó, jíin núu tēe cájejníñu mēhñu ró. ² Te cáñuhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo siñ ni rō.

Jeē jicán tahu Pablo jehē ñáyuu cáandíje

³ Tāca jínu jeē núcūhun ni rī rohó jíjnáhan ró, te nácuatáhú rí nuū Yaā Dios. ⁴ Te náa jicán tahu rī, te níní cúsiñ ni rī jicán tahu rī jehē rō. ⁵ Chi ni chindéé ñájnáhan ró jíin rí jeē scáca yó jnúhun vāha ya, nde quivī ní cacandíje ró te nde vijna. ⁶ Te jíni ndije ri jeē maá Yaā ní squéjéé jniñu váha jíin ró, cocu ya jíin ndé quivī ndíji Jesucristo, te sínu ndíhi ya. ⁷ Te íyó váha jeē súcuan jéni ni rī siquī tāca róhó, chi yōhyo manī rī jíin ró, te inuú-ni ni sáha ya jeē váha yóhó. Te súcuan cúu vēsú íne ri vecāa chí vēsú cuiñi ri nuū tāca tēe cújéhnú, cahān rī jehē jnúhun jeē jnáma ya yohó jéē jnúhun ndaā cúu. ⁸ Chi Yaā Dios jíni yā ndese yōhyo manī rī jíin ró jíjnáhan ró, nájnūhun yōhyo manī Jesucristo jíin yó. ⁹ Te jicán tahu rī jeē na cáa ga jeē cundáhú ni rō jnáhan ró, jíin jéē na jécūhun ga ni rō te cundíchí ró jíin táca jnúhun ya. ¹⁰ Te súcuan te cuu nacāji ró táca jéē váha condiquín rō, te caca ndaā rō, te ma cóo ni ñn cuēchi siquī rō quivī ndíji Cristo. ¹¹ Te súcuan te cayā cuehē jniñu váha jeē sáha Jesucristo jíin ró. Te sáha jeē coo yñúhún ñáyuu jíin Yaā Dios te cahān i jeē yóhyo luu cújéhnú ya.

Jnúhun jeē técu nduú yó jíin Cristo

¹² Hermano, cúni rī jeē na cúcáhnú ni rō jíjnáhan ró ndese ni sáha jnūndóho ni ndoho ri. Chi ni sáha jeē ni jítē núu ga jnúhun jeē jnáma ya yohó. ¹³ Chi tācá soldado cáyucú ini palacio, jíin táca gá ñayuu, cájini i jeē íne ri vecāa jeē siquí Cristo. ¹⁴ Te siquī jeē íne ri vecāa, jeē yúcuan cúu jeē vihyá gā nihín ndeyí ni cuehē tācá hermano cáandíje nuū Jítóho yō. Te cáhiyo téyí gá ni de nácani de jnúhun ya, te tu ndé ndínúu ni de.

¹⁵ Te ndaā chi sava tēe cánacani de jnúhun Cristo siquī jeē cuesún ni de jíin jéē nduxí de. Te sava ga de chi sa suhva cánacani de jnúhun ya siquī jeē váha ni de. ¹⁶ Sava de cánacani jnúhun Cristo siquī jeē nducú de jeē váha máa-ni de, te tú ndije de, chí cácu ni de jeē nihín gā rī jnūndóho jeē íne ri vecāa. ¹⁷ Te sava ga de chí cánacani de jnúhun siquī jeē cundáhú ni de ruhū, chí cájini de jeē íne ri vecāa siquī jeē cahān rī jehē jnúhun jeē jnáma ya yohó. ¹⁸ Tú na vé sáha núu súcuan, chí tācá-ni modo cascuíté núu de jnúhun Cristo, vēsú núu ndije de chí tuú. Te yāha cúu jeē cúsiñ ni rī sáha.

Te suni cusñ gā ni rī, ¹⁹ chí jíni rī jeē tāca jéē yáha sáha jeē váha ga coo jíin rí, chí cájicān tahu rō jehē rī, te Espíritu Jesucristo chíndéé ñáhán yá ruhū. ²⁰ Chí ñúhun ni rī te cúu ndasí ni rī jeē ma sáha ri ni ñn jeē sáha jeē cucanu ri nuū yā. Chí sa suhva coo téyí ni rī cahān rī jnúhun ya, návāha ndujéhnú ga Cristo sáha máa rí vijna, nájnūhun je ni sáha ri ñí véji ri, te vēsú na cótecu rī chí vēsú na cúu rī. ²¹ Chí jeē técu rī cúu jeē nduú rí jíin Cristo, te jeē cúu rī cúu jeē vihyá gā vāha coo jíin rí. ²² Te núu cotecu gā rī, te cuu scáca ga rī jniñu máa Jítóho yō. Núu súcuan te tu cúcáhnú ni rī ndé ñn cúu jeē váha ga, núu jeē cótecu rī chí jéē cúu rī. ²³ Chí mēhñú ndíndúú jnúhun yáha íne nihín ri. Chí ñn cúu jeē cuní rī quihín rī condee rī jíin Cristo, chí yúcuan cúu jeē vihyá gā vāha coo jíin rí. ²⁴ Te suni cánuú gá jeē cótecu gā rī jeē siquí rohó jíjnáhan ró. ²⁵ Núu súcuan te íyó ndaā ni rī jeē quéndōo ri condee gā rī jíin ró, návāha stéén gā rī nuū rō ndese caca vāha ga rō jíin yá, te cusñ gā ni rō jíin jnúhun cáandíje ró. ²⁶ Núu súcuan te condee tucu ri jíin ró, te cusñ teyí ni rō jeē siquí ruhū, sáha máa Cristo Jesús.

²⁷ Te máá ñn-ni jeē condihvī ni rō caca ndaā rō, nájñūhun cánuú caca ró síquī jeē cá candije ró jñūhun Cristo. Yūcuán na te vēsú na jínú rī coto jñáhan yó, chí condee jicá rí, te nihīn rī jñūhun ro jēē cáhiin nihin ró jín jñūhun ya, te cáhiyo inuú ni rō, te inuú-ni cánducú ndéyí ró síquī jñūhun jeē cá candije yó jēē jnáma ya yohó. ²⁸ Te ma yūhú cuiti rō sáha jeē cájito uhū rohó. Chi jeē jíto uhū i rohó, yūcuan stéén jeē jnahnú ndetū i, te suni stéén jeē cācu ánuá maá ró jijnáhan ró sáha Yaā Dios. ²⁹ Chi ni jēhe Cristo uū jeē váha nuū rō: nasūu máá ñn-ni jeē candije ró yá, chi suni jeē na ndóho ró jēē síquí yā. ³⁰ Chi máá rí jín rohó jijnáhan ró, nájñūhun jeē cájejnáhan yó jín táca jēē neé. Chi ni cajito ró jēē súcuan ni sáha máá rí, te cánihīn rō jñūhun jeē sáha ga rī nde vijna.

Jeē ni sáha suchí yá maá yá te ni ndujéhu ya

2

¹ Núu súcuan te sáha Cristo jeē cáhiyo ndeyí ni rō, jín jēē cúsī ni rō síquī jeē váha ni yā jín ró. Te ndéé Espíritu yā jín ró, te manī rō jín jñáhan ró, te cájito ndáhú ró i. ² Núu súcuan te na cócu ga rō jín táca jñūhun yáha, návāha cusī teyí ni rī. Te inuú-ni na cóo ni rō, te coyūcu mánī rō, te inuú na cóo ánuá rō, te inuú cani ni rō. ³ Te ni ñn jniñu ma sáha ró jēē nducú ró jeē váha máá-ni ró, ni jeē satéyí ró maá ró. Chi sa suhva sáha suchí ró maá ró, te sáha ró cuenta jeē váha ga jñáhan ró vēsú maá ró. ⁴ Te ma condihvī ni rō maá-ni jniñu jeē quéndōo vāha máá-ni ró, chi suni na condihvī ni rō jniñu jeē quéndōo vāha jñáhan ró.

⁵ Te na cáni ni rō jijnáhan ró nájñūhun ni jeni ni Cristo Jesús. ⁶ Chi máá yá kujéhu inuú yá jín Yaā Dios, te vēsú súcuan te tu ní jéni ni yā jeē kujéhu inuú yá jín Yaā Dios. ⁷ Chi ni siaá yā jeē kujéhu ya, te ni nduu ya nájñūhun índāa mozo, te ni cacu ya ni nduu ya tēe. ⁸ Te ná ni nduu inuú yá jín tée, te ni sáha suchí yá maá yá. Te ni jendije ya nde jín jñūhun jeē cúu yā, te nde jín jñūhun canu jeē cúu yā jicā cruz. ⁹ Jeē yúcuán ní sáha Yaā Dios jeē yóhyo ni ndujéhu luu ya, te síhví yá kujéhu ndasí gá nuū tāca gá síhví. ¹⁰ Te tāca jēē cáhiin andiví jín ñáyiví jín chíji ñayiví, núu na cúní i síhví Jesús te jecuiñi yití i. ¹¹ Te cahān ndaā ndivii i jeē Jesucristo cúu máá Jítóho. Te súcuan stéén i jeē yóhyo kujéhu máá Tátá yā Yaā Dios.

Ñayuu cá candije cúu i nájñūhun quīmi jeē ndíndē

¹² Núu súcuan hermano jijnáhan ró, nájñūhun níní ní cajendije ró jñūhun ni cahān rī ná ni condee rī jín ró, suni súcuan víhyá gā cuandije ró vijna jeē ndeé jicá rí jín ró. Te condihvī ni rō jeē caca ndaā rō jín jñūhun ní jnama ya rohó, te caca yñūhún ró conso iyo ró núu yā. ¹³ Chi Yaā Dios jícu ya jín ró jeē cúu ni rō sáha ró jniñu váha, te chíndēé ñáhán yá rohó jēē síquí ró jniñu nújnahan ni yā.

¹⁴ Ndihí jeē sáha ró, ma cahān sōo ró, ni ma tejnáhan ró, ¹⁵ návāha cuu ró séhe Yaā Dios jeē tú na cuēchi coo síquī rō te coo ndaā rō. Te caca ndoo ró méhñu ñayuu nihni ni jeē casáha neé. Chi méhñu ñayuu un stéén rō jniñu váha ró, te súcuan cácuu ró nájñūhun quīmi jeē ndíndēe núu neé ñayiví. ¹⁶ Te stéén rō jñūhun ya nuū i jeē cótecu i ñí cáni sáha. Te súcuan te cusī teyí ni rī quiví ndíji Cristo, chi cuni rī jeē tu ní jíca cāhá rí, ni tu ní sájniñu cāhá rí. ¹⁷ Te vēsú na cúu rī jeē socō rī maá rí nuū yā jeē síquí rohó, te yūcuan cúu jeē nducú rí scandije ga rī rohó, návāha socō rō maá ró sáha ró jniñu váha jeē cá candije ró yá. Jeē yúcuán cúsī ni rī, te cúní rī jeē suni cusī ni rō jín rí jijnáhan ró. ¹⁸ Núu súcuan te na cúsī ni maá ró jín rí, te inuú na cúsī ni yō jijnáhan yó.

Jñūhun Timoteo jín Epafrodito

¹⁹ Te ñūhun ni rī jeē cuáha máá Jítóho yō Jesús jñūhun jeē tají yáchī rī Timoteo jeē de nuū rō, návāha ndusī ni rī núu na nihín rī jñūhun ndese cáhiyo ró. ²⁰ Chi tuá na inga tēe íyó yáha jēē inuú jéni ni jín rí, nájñūhun máá de jeē ndihví ndije ni de jehē rō. ²¹ Chi táca de cánducú de jeē cúu máá de, te nasūu jēē cuní Cristo Jesús. ²² Te je cájini rō jeē téē vāha cúu Timoteo. Chi nájñūhun sēhe jín tátá, súcuan ni jejniñu de jeē nácani de jñūhun vāha ya jín rí. ²³ Núu súcuan te ñūhun ni rī tají rí de jeē de nuū rō, te núu je ni

cucáhnu ni rī ndese coo jíin rí. ²⁴ Te jéni ndije ni rī jeē cuāha Jítoho yō jnūhun jeē suni máá rí jinū yachī rī nuū rō jijnáhan ró.

²⁵ Te suni jéni ni rī jeē cánúú tají rí hermano yō Epafrodito jeē de, chi tēe sájniñu jíin rí siquī jnūhun ya cúu de te chindéé ñájnáhan de jíin rí. Chi máá ró ni catají ró de jeē cuajniñu de nuū rī tāca jéē cúmanī nuū rī. ²⁶ Chi yōhyo cúu ni de ndacoto tucu de nuū rō jijnáhan ró. Te ni cucuíhyá ndasí ni de, chi ni canihīn rō jnūhun jeē ní cocuhū de. ²⁷ Chi jendaá ni cocuhū de, te je yajni cuu de núú. Te Yaā Dios ni cundáhú ni yā de, te nasūu máñúhún-ni de, chi suni ruhū, návāha tú caa ga cucuíhyá ni rī jehē de núú. ²⁸ Jeē yúcuan cúu jeē ndihví gā ni rī tají rí de nuū rō, návāha ndusī ni rō jeē ndácoto tucu ró núú de. Te suni ruhū ma cucuíhyá ndasí gā ni rī. ²⁹ Núu súcuan te na cúsi ni rō jeē nájinū de nuū rō, chi cúu de hermano yō jeē candíje de maá Jítoho yō. Te coo yíñúhún ró jíin tāca tēe índāa nájnūhun cáa de. ³⁰ Chi jeē siquí jniñu Cristo cúu jeē jé yajni cuu de núú. Chi ni chundeyí ni de jeē cúu de siquí jeē chindéé ñáhán de ruhū jíin jniñu jeē tu ní íyo modo sáha máá ró jijnáhan ró.

Jnūhun jeē cáca ndaā vāha yó

3

¹ Te vijna, hermano jijnáhan ró, na cúsi ni rō jíin máá Jítoho yō. Ruhū chi tu jnánini ni rī jeē tēe tucu ri jnūhun yáha núu rō, chi cuajniñu jeē quéndōo vāha ga rō. ² Condito ró máá ró nuū tēe casáha jniñu néé, jeē cándāa ná cándāa ina. Chi cánducú de stújí de rōhó jeē casáha de circuncidar, te tu casáha de jniñu ndaā. ³ Te máá yó cácuu ñayuu ni cuu circuncidar ndije, chi cáchiñúhún yó nuū Yaā Dios nde jíin ini jíin ánuá yō, te cácusī ni yō jeē yíhí yó ndaha Cristo Jesús, te tu tenuū yō jeē quéndōo ndaā yō jíin jniñu jeē sáha máá-ni yó. ⁴ Núu jeē súcuan cúu te ruhū chi suni cuu tenuū rī jniñu jeē sáha máá-ni ri nuú. Chi núu ndé tēe jéni ni de jeē cuu tenuū de máá de, te ruhū chi víhyá gā cuu tenuū rī máá rí. ⁵ Chi ni casáha circuncidar ruhū nuū uná quivī ná ni cacu ri. Te yucūn Israel cúu ri, te suni jnáhan yucūn Benjamín, te ñin hebreo sēhe hebreo cúu ri. Te suni ni cuu ri tēe grupo fariseo jeē ni squícu ri tāca ley jnáhan ñuu rī hebreo. ⁶ Te ni jito xeēn rī ñayuu cáccandíje, chi yōhyo ni condihví ni rī jeē ma sáma i modo ley jenahán. Te ni ñin tu ní cúu cahān jeē tu squícu ri ley un, chi ni squícu vāha ri. ⁷ Te tāca jéē ní tenuū rī ún, chi sáha ri cuenta jeē tu ndé níhín jniñu cuiti, chi vijna te ni candíje ri Cristo. ⁸ Te suni chíhi ri cuenta jeē vāha ga na náā ndihí jeē ní tenuū rī ún, chi vāha ndasí gā cúu jeē ni quívi ri ndaha máá Jítoho rī Cristo Jesús. Te jeē siquí maá yá te ni siaá rī ndihí ún, te sáha ri cuenta jeē nájnūhun yācá-ni cúu. Chi ni quívi ri ndaha Cristo, ⁹ te ndúú yá jíin rí. Te tuá nducú rí quendōo ndaā rī jeē jíin ley un, chi sa suhva Yaā Dios ni ndahva yā cuēchi ri jeē ní candíje ri Cristo. Chi súcuan squéndōo ndaā yā ñayuu cáccandíje. ¹⁰ Te vijna te cúní rī jecūhun vāha ni rī ndese Yaā cúu ya. Te cúní rī jeē poder jeē ní natecu yā cone jíin rí. Te cúní rī ndoho ri jíin yá, te nde jinū rī ndoho ri nájnūhun ni ndoho máá yá jeē ni jíhī yā. ¹¹ Chi yōhyo ñúhún ni rī natecu rī nájnūhun ni natecu yā.

Jeē nducú ndéyí Pablo sínu de carrera de

¹² Te ná tu nihīn rī ndihí jeē ni cáhān rī ún, ni ná tu ije ri jíin. Te nducú ndéyí rí siquí ún, chi ñúhún ni rī jeē nihīn rī tācá un, chi jeē yúcuan cúu jeē ni níhín Cristo Jesús ruhū xīhna gā. ¹³ Hermano jijnáhan ró, tu sáha ri cuenta jeē jé ni nihīn rī ndihí ún. Te íyó ñin jeē sáha ri, cúu jeē squéndōo ri tāca jéē ní cuu ichi yátá, te nducú ndéyí rí nihīn rī tāca jéē íyó ichi núú. ¹⁴ Chi cúu un nájnūhun jeē jíinu ri ñin carrera cuahān rī nde jinū rī andiví, te nihīn rī premio jeē cuáha Yaā Dios. Chi ni cana ya yohó jéē quihín yō nuū yā andiví siquí jeē yíhí yó ndaha Cristo Jesús.

¹⁵ Te tāca yó jeē jé ni ije vāha yó jíin jnūhun cándíje yó, súcuan na cáni ni yō. Te núu ndé ñin ró síin jéni ni rō, te Yaā Dios suni stéén yā nuū rō jeē násūu súcuan cúu. ¹⁶ Te jíini ñúhún cani ni yō te caca yó modo jeē quijnáhan jíin jéē jé ni nihīn yō.

¹⁷ Hermano, na ndácu ró rúhū jijnáhan ró. Te condēhe váha ró ndese cájica ñayuu ndaā, chi cájica i nájñūhun ni castéén rī nuū rō. ¹⁸ Te je ni cuu tǎjni jínu ni cahān rī jín ró, te nde ndahyú rī cahán tucu ri vijna, jeē iyó cuéhē ñayuu cájica i ñn modo jeē steén jeē jító uhū i jñūhun jeē ni jǎhī Cristo jicā cruz. ¹⁹ Te ñn quivī te jnahnū ndetū ñayuu ún. Chi máni jeē cáji váha i cúu jeē cáchiñúhún i. Te sátéyí i máá i jín jniñu néé jeē jéhe jñūhun canu. Te máni máá jéē iyó ini ñayīvi cúu jeē ndíhví ni i. ²⁰ Te máá yó chi ñayuu coyūcú andiví cúu yó, te cándetu yó jéē nde yūcuán ndiji Jitoho yō Jesucristo, Yaā jnáma yóhó. ²¹ Te máá yá nasama ya yiqui cúñu ndahú yó, návāha nduu yó nájñūhun cáa máá yá jeē lúu cújéhnū ya. Te súcuan sáha ya jín poder yā jeē cújéhnū ya siquī ndíhi-ni.

Níní na cúsiñ ni yō jín Jitoho yō

4

¹ Núu súcuan hermano jijnáhan ró, cuiñi nihin ró jín jñūhun máá Jitoho yō. Chi yōhyo maní rī jín ró, te cúní rī jeē coto jnáhan yó, te cúsiñ ni rī jín ró, te nájñūhun premio rī cácuu ró.

² Te cáhán ndahú rí jín róhó Evodia jín Síntique jeē ñnuú na cóo ni rō, chi cácuu ró hermana jeē cácadíje ró máá Jitoho yō. ³ Te suni cáhán ndahú rí jín róhó, téé jeē ní chindéé ñájñáhan váha jín rí, jeē na chindéé ñáhán ró hermana un, chi ni casájñiñu nihin ña jín rí siquī jñūhun jeē jnáma ya yohó. Te suni súcuan ni sáha Clemente jín sava ga ñayuu ni sájñiñu jín rí. Te ni jecosō síhví i nuū libro jeē yosó síhví ñayuu cotecu ní cáni.

⁴ Te níní na cúsiñ ni rō jijnáhan ró jín máá Jitoho yō. Te ñnga jínu cáhán rī jeē na cúsiñ ni rō. ⁵ Sáha váha ró jín táca ñayuu, návāha cuni i jeē súcuan váha ni rō. Chi máá Jitoho yō, yajni-ni cúu ya jín ró.

⁶ Ma nácani ndasí ni rō siquī ni ñn. Chi sa cahān rō jín Yaā Dios siquī táca jéé nácani ni rō. Chi cacān tahu rō, te cahān ndahú ró, te suni nacuatáhu ró nuū yā. ⁷ Yūcuán na te sáha Yaā Dios jeē cóo ndeyí coo síñ ndasí ni rō, te súcuan coo jín ró nde cūhva jeē ma jécūhun ni rō ndese cúu jeē sáha ya ún. Te condito váha ya anuá rō jín jéé níjnūní rō, coo cuehē jñūhun ndeyí jñūhun síñ ni jín ró, siquī jeē yǎhi ró ndaha Cristo Jesús.

Jeē na cáni ni yō siquī táca jéé váha

⁸ Te ñn na jñūhun íyó, hermano jijnáhan ró. Na cáni ni rō siquī táca jéé iyó ndaā, jín jéé sáha yǎñúhún, jín táca jniñu sáha váha, jín jniñu íyó ndoo, jín táca jéé iyó máni ni, jín jéé lúu sáha. Te máni na núcūhun ni rō táca jéé váha jeē sáha jeē nácuatáhu ró nuū yā.

⁹ Táca jéé ni steén rī nuū rō, jeē ní cacutūhva ró núū rī, jín jéé ní cajini ró ní cahān rī, jín jéé ní cajito ró ni sáha ri, táca yúcuán suni na sáha máá ró. Yūcuán na te máá Yaā jeē jéhe jñūhun ndeyí síñ ni, coo ya jín ró.

Jeē ní casocō ñayuu Filipos nuū Pablo

¹⁰ Te yōhyo cúsiñ ni rī sáha máá Jitoho yō, chi vijna te ni canucūhun tucu ni rō jeē chindéé ñáhán ró rúhū. Te nasūu jéé ní naa ni rō sáha ró súcuan, chi siquī jeē tu ní íyo modo. ¹¹ Te nasūu jéé cahán rī siquī jeē ndóho ndahú rí, chi je ni cutūhva ri cusíñ ni rī jín jéé névāha ri. ¹² Jíní rī cotecu ndahú rí, te jíní rī cotecu cucá rí. Chi ni cāan ri jín táca-ni, núu jeē ndutú chíji ri chí jéé ndóho ri sōco, núu jeē cónevāha cuehē rī chí jéé cúmaní nuū rī. ¹³ Ndihi-ni cúu sáha ri, chi máá Cristo jéhe ya fuerza ini rī. ¹⁴ Te vésú súcuan te váha ni casáha ró jéé ní chindéé ñáhán ró ruhū jín jnundóho jeē ndóho ri.

¹⁵ Te róhó ñayuu ñuu Filipos, je cájini rō ndese ni cuu. Chi nde quivī ní quejéé rí nácani ri jñūhun jeē jnáma ya yohó, ná ni quenda ri Macedonia vēji ri, te ni casocō rō xūhun núū rī siquī jeē ní canihín rō jñūhun ya ni nacani ri. Te ni ñn grupo ñayuu cácadíje tu ní sáha súcuan, chi máá-ni róhó jijnáhan ró. ¹⁶ Te ná íne ri ñuu Tesalónica, te ni catajé ró jecu jeē jíní ñúhún rí, ni jinū ñn uū jínu. ¹⁷ Te nasūu jéé nducú rí jeē cuáha ró núū rī, chi sa ndúcú rí jeē na cáyá gā jniñu váha ró, návāha cayā tahū rō nuū Yaā Dios. ¹⁸ Chi je

ni nihīn rī ndīhi jeē jīni ñúhún rí, te ndóo ga. Te íyó cuéhē nuū rī, chi ni nihīn rī jeē ní catajǐ ró vēji jīn Epafrodito. Te jeē ní catajǐ ró cúu nájnūhun ñn ofrenda jeē asín jeén, ni casocō rō nuū Yaā Dios, te cúshī ni yā jīn. ¹⁹ Te Yaā Dios chi cuāha ya nuū rō tāca jēē cúmanī nuū rō, chi cúcá ndasí yá jīn táca jēē váha jeē lúu íyó núu Cristo Jesús. ²⁰ Te na cáhán yō jeē yóhyo luu cújéhnū Tátá yō Yaā Dios níí cáni. Amén.

Saludo jeē sándīhí

²¹ Cachi rō nuū tāca ñáyuu maá yá jeē sándeyí ni i, áchí rí, chi cá candíje i Jesucristo. Te hermano yō cáyūcu jīn rí yáha, cácahān de jeē sándeyí ni rō jijnáhan ró. ²² Te tāca ñáyuu maá yá jeē cáhīyo yáha, suni cácahān i jeē sándeyí ni rō. Te ñayuu cáyūcú vehe rey cújéhnū ñuu Roma yáha, máá i cácahān gā súcuan.

²³ Te ñúhun ni rī jeē maá Jítóho yō Jesucristo, na sáha ga yā jeē váha róhó jijnáhan ró. Súcuan na cóo. Amén.

CARTA JEE NI TEE APOSTOL SAN PABLO NUU ÑAYUU ÑUU COLOSAS

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū. Te jíin hermano yō Timoteo ² cátee ri carta yáha cuájeē nuū rohó ñáyuu ñuu Colosas, jeē cácuu ró ñáyuu maá yá jeē cácandíje vāha nuū Cristo. Te cáñuhun ni rī jeē Tatá yō Yaā Dios na sāha ga yā jeē vāha rōhó, te sāha ya jeē coo ndeyí coo siī ni rō.

Jeē jicān tahu Pablo jehē ñáyuu cácandíje

³ Te jeē cájicān tahu rī nuū Yaā Dios, Yaā cúu Tatá maá Jítóho yō Jesucristo, te níni cánacuatahú rí nuū yā jeē siquí rohó jíjnáhan ró. ⁴ Chi ni cajini jnūhun ri ndese vāha cácandíje ró Cristo Jesús, jíin ndese cákundáhú ni rō tāca ñáyuu maá yá. ⁵ Chi cáñuhun ni rō nihīn rō jeē ñūhun vāha nde andiví cuu ró. Chi ná ni cajini ró jnūhun ndaā jeē jnáma ya rohó, te ni caquejéé ró ñūhun ni rō. ⁶ Te jnūhun un jéē ní canacani nuū rō, chi ndúcuehē cuahān te níhīn jníñu ní cáhnu ñayiví. Te suni súcuan ni sāha jíin rōhó jíjnáhan ró ndé quiví ní cajini ró te ni cajecūhun ni rō jeē ndaā cúu jeē yóhyo vāha ni Yaā Dios jíin ró. ⁷ Te jnūhun un cúu jeē ni stéén Epafras nuū rō, tēe sájniñu jíin rí jeē maní rī jíin. Chi cúu de tēe jéjníñu squícu vāha nuū Cristo jeē ndíto de rōhó. ⁸ Te máá de ni castūhun núu rī siquí rohó, ndese cákundáhú ni rō jnáhan ró sāha máá yá.

⁹ Jeē yúcuan suni tu cájecuñī rī jeē cájicān tahu rī jehē rō, nde quiví ni níhīn rī jnūhun ún te nde vijna. Te cájicān rī nuū yā jeē na jécūhun vāha ni rō te coo ndíchi ró jíin jnūhun ya, sāha máá Espíritu, návāha cuni rō ndíhi ndese nújnahan ni maá yá. ¹⁰ Te cájicān rī jeē caca ndaā rō nájnūhun cánuú caca ró jéē cácuu ró ñáyuu maá Jítóho yō. Te súcuan te sāha ró ndíhi jeē nújnahan ni yā, te nihīn jníñu ró jíin táca jniñu vāha, te jecūhun ga ni rō ndese Yaā cúu Yaā Dios. ¹¹ Te cájicān rī jeē cuáha ya fuerza ini rō, nájnūhun íyó fuerza máá yá jeē kujéhnu luu ya. Te súcuan te cuu cuandeyí ni rō jíin táca-ni jnūndóho, te cusī teyí ni rō. ¹² Te cuu nacuatáhú ró nuū Tatá yō, chi máá yá ni chihi fuerza yohó jéē ñi cáhnu-ni jíin táca ñáyuu maá yá nihīn yō tahū yō. Chi cájica yó jíin luz yā jeē yíhi yó ndaha ya. ¹³ Chi ni jnama ya yohó jéē ni yíhi yó ndaha máá jéē jní poder nuū néē, te ni squívi ya yohó ndaha Séhe ya jeē maní yā jíin, ndácu ya jniñu nuū yō. ¹⁴ Chi Séhe ya un ní jnama ya yohó jéē ni jíhi yā jehē yō, te ni ine cáhnu ni yā nuū cuéchi yó.

Jeē ni sāha Cristo jeē ní ndiví yó núu jnūhun maní Yaā Dios jíin yó

¹⁵ Yaā Dios jeē tu cúu coto yó, ni sāha ya jeē ní quiji Séhe ya, te súcuan ni jito yó máá yá. Te Séhe ya ún, je íyó yá nde ná tu jecōo tāca jéē iyó. ¹⁶ Chi jíin Séhe ya ni sāha Yaā Dios ndíhi jeē ni jécōo, ndíhi jeē iyó andiví jíin jéē iyó ñayiví, jeē jiní yō nuū jíin jéē tu jíin yō nuū. Te suni ni sāha ya tāca ndajéhé jeē cándacu jniñu, jíin jéē cándiso jniñu, jíin jéē cácujeñu, jíin jéē cájni poder. Jíin Cristo ni sāha Yaā Dios jeē ni jécōo ndíhi, te jeē cúu Cristo cúu. ¹⁷ Te je íyó Cristo nde ná tu coo ndíhi jeē iyó. Te ndaha máá yá yíhi vāha ndíhi-ni. ¹⁸ Te máá yá kujéhnu nuū ñáyuu cácandíje, nájnūhun kujéhnu xiní nuū yiquí cúñu, chi nájnūhun yiquí cúñu yā cácuu i, cúu jeē ñi na cúu i jíin yá. Te máá yá sāha jeē cotecu i ní cáni, te xīhna gā maá yá ni natecu mēñu ndíyi, návāha kujéhnu ya nuū tācá-ni. ¹⁹ Chi ni cusī ni Yaā Dios jeē ndíhi ndese cúu máá yá, suni súcuan cúu Cristo. ²⁰ Te siquí jeē ni jíhi Cristo, te ni cusī ni Yaā Dios sāha ya jeē ndívicoo tācá-ni nuū jnūhun maní yā jíin, tāca jéē yúcu ñayiví jíin jéē yúcu andiví. Chi jíin jéē ni jíhi Cristo jicā cruz, te ni sāha Yaā Dios jeē ndívicoo tācá-ni nuū jnūhun maní yā jíin.

²¹ Te máá ró jíjnáhan ró, chi sīn siquí ni cahīn ró ndé saá, te ni cajito uhū rō yā ini anuá rō, chi máni jniñu néē ní casáha ró. Te vijna chi je ni sāha Yaā Dios jeē ní ndívicoo ró núu jnūhun maní yā jíin ró. ²² Súcuan ni sāha ya siquí jeē ni sócō Cristo maá yá ni jíhi yā, návāha coo ndoo coo i rō cuiñi ró núu yā, te ma cóo jnéhén ró, te tú na cuéchi coo siquí rō. ²³ Te súcuan sāha ya núu cuiñi níhīn ró jéē candíje vāha ró, te núu quendōo

nihin ró jíin jnúhun vāha jeē cáñuhun ni rō jeē jnáma ya rohó, te ma siaá cuiti rō. Chi jnúhun un ní cajini ró, te ni jite núu ní cáhnu ñayví. Te ruhū Pablo suni jéjníñu ri jeē nácani ri jnúhun ún.

Jeē jejníñu Pablo siquī ñáyuu cá candíje

²⁴ Te vijna te cúsiñ ni rī jeē ndóho ri jehē rō jijnáhan ró. Chi jíin yiqui cúñu rī ndóho ri jeē cúmani gā ndoho ri jíin Cristo jehē ñáyuu cá candíje, suu ñáyuu cúu nájnūhun yiqui cúñu yā. ²⁵ Te cúu ri tēe jéjníñu siquī ñáyuu cá candíje, chi súcuan ni tejníñu Yaā Dios ruhū, návāha nacani ndíhi ri jnúhun ya nuū rō te quendōo vāha ró. ²⁶ Te nácani ri jnúhun ya jeē ní yisāhí, jeē tu ní cájini ñáyuu nde jenahán ndasí te nde ní cáni vēji. Te vijna te je ni steén cají yá jnúhun un núu ñáyuu maá yá. ²⁷ Chi ni cusí ni yā jeē steén yā nuū i ndese cúcúca ndasí i jíin ndíhi jeē ndíso jnúhun sāhi yáha jéē lúu cújéñu, te cuitē núu quihñ nuū tāca nación jeē tu jíiní. Te jnúhun sāhi yáha cúu jeē ndeé Cristo ini anuá rō, ndúú yá jíin ró, te jeē yúcuan cáñuhun ni rō tāca jéē lúu jéñu jeē coo.

²⁸ Te jnúhun Cristo un cúu jeē cá nacani ri, te cástíhví ni rī tāca ñáyuu, te cástéén rī jnúhun ya návāha jecūhun vāha ni i. Te súcuan te ije vāha ni ndivii i jeē yíhi i ndaha Cristo Jesús. ²⁹ Te siquī yúcuan cúu jeē sájniñu ri, chi ndíhví ni rī nácani ri jnúhun jíin tāca fuerza Cristo jeē chindéé nájnáhan ya jíin rí.

2

¹ Chi cúni rī jeē na jécūhun ni rō ndese yōhyo ndúcú ndéyí rí jehē rō, jíin jéhē ñáyuu ñuu Laodicea, jíin ndé tāca ñáyuu jeē tu ní cájini cuiti nuū rī. ² Chi cúni rī jeē coo ndeyí ni anuá i, te inuú-ni coyūcu mání i, te jecūhun ndíhi ni i ndese yōhyo cúca i jíin jnúhun jeē candíje nihin i. Chi cuni i ndese Yaā cúu Cristo, chi máá yá cúu jnúhun Yaā Dios jeē ni yisāhí un. ³ Te ini Cristo yisāhí tāca jnúhun jeē cucúca ró jíin, suu jnúhun ndíchí jíin jnúhun jécūhun ni. ⁴ Te jnúhun yáha cáhán rī jíin ró jijnáhan ró, návāha ma stahú ni ññ i rōhó jíin tāca jnúhun stahú jéē lúu cáhán. ⁵ Chi vēsú ndeé jíca rí jíin ró, te ñúhun ni rī rohó, te cúsiñ ni rī jeē jíiní rī ndese cájica ndaā rō te cá candíje nihin ró Cristo.

⁶ Núu súcuan te nájnūhun ni cajetáhú ró jeē Jítóho rō cúu Jesucristo, suni súcuan na cáca ndaā rō jíin yá. ⁷ Te na jñí vāha jnúhun ya ini rō, te na íje vāha ró jíin jnúhun cá candíje ró yá, nájnūhun je ni cajini rō. Te níni nacuatáhú ró nuū Yaā Dios.

Jeē ndújeé yó sáha Cristo

⁸ Coto má cuāha ró jnúhun jeē stahú ni ññ ñáyuu rohó jíin jnúhun ndíchí jéē tu jéjníñu, jíin jnúhun ndúxí stahú. Chi tu cá candíje i jnúhun Cristo, chi sa cá candíje i tāca jéē tajnúni ñáyuu, modo jeē castéén ini ñayví yáha.

⁹ Chi ndíhi ndese cúu máá Yaā Dios, suni súcuan cúu Cristo. ¹⁰ Te ndíhi ndese cúu Cristo, suni súcuan cúu ró jijnáhan ró, chi cáyíhi ró ndaha ya. Te máá yá cújéñu nuū tāca jéē cújéñu jíin jéē ndíso jníñu andiví. ¹¹ Te siquī jeē cáyíhi ró ndaha ya, suu cúu jeē nájnūhun ni cuu ró circuncidar. Te jeē súcuan ni sáha ya circuncidar rohó, chi nasúú ññ jnuní jeē yíhi yiqui cúñu rō cúu, chi sa suhva jeē ní sándoo ya tāca cuéchi ni casáha ró jíin modo neé máá ró. Chi súcuan cúu jeē sáha Cristo circuncidar rohó. ¹² Te jeē ní cajendute ró cúu nájnūhun jeē ní quindūji ró jíin Cristo, te suni nájnūhun jeē ní natecu rō jíin yá. Chi ni cá candíje ró jéē jíin poder Yaā Dios ni nastécu yā Cristo mēñu ndíyí. ¹³ Chi ni cacuu ró nájnūhun ndíyí nuū yā siquī cuéchi ró, chi ná tu sáha ya circuncidar anuá rō nde saá. Te vijna te ni sáha Yaā Dios jeē cotecu rō ní cáni jíin Cristo, chi ni ine cáhnu ni yā nuū tāca cuéchi ró. ¹⁴ Te nájnūhun jeē iyó ññ acta jeē jícan cuéchi siquī yō jeē ni stívi yó ley yā. Te ni ndahva yā acta un, chi ni chunaa Cristo cuéchi yó jéē ni jíhí yā jíca cruz. ¹⁵ Chi ná ni jíhí yā jíca cruz, te ni quende yā ndíhi poder tāca jéneé jéē cá cújéñu jíin jéē cájniñ poder. Te ni quende yā jeē tuá cújéñu, chi ni sáha ya jeē cuángoo nuū quíndihyū, te súcuan ni steén yā poder yā.

Na ndúcú yó jeē quéndōo vāha yó ndé andiví

¹⁶ Núu súcuan te ma cuatáhú ró núu cácahān ñayuu cuēchi siquī rō, siquī ñin jeē yéji rō chí siquī ñin jeē jíhi ró, chí jéē tu née iī rō quivī víco jíin quívī núcosō yoō jíin quívī ndétātú. ¹⁷ Chi tāca ley siquī un ní jejniñu máá ndé ná tu quiji Cristo. Te vijna te ni quiji ya te tuá jíni ñúhún táca ún. ¹⁸ Ma cuáha ro jnúhun jeē cási ni ñin ñayuu jeē nihín rō tahū rō. Chi cáchiñúhún i tācá ndajéhé yā, te cácahān i jeē súcuan cásáha suchí i máá i. Te cácahān i jeē cájini ndije i jeē iyó ndāā jnúhun cánacani i, te tuú. Te súcuan cásáha téyí sáa-ni i máá i, chí cájeni néé ni i. ¹⁹ Te tu cáhiin i jíin Cristo, Yaā cujéhu nuū ñáyuu cácuu nájnūhun yiqui cúñu yā chí ñin na cúu i jíin yá. Chi máá yá scuéhu ya i jíin jnúhun ya, te nduu inuú ni tācá i jeē cáhije i cuahān i, nájnūhun ni jeni ni Yaā Dios.

²⁰ Núu súcuan te nájnūhun jeē je ni cajihī rō jíin Cristo, cúu jeē ní casiáá rō tāca jéē tajnúni jeē castéén ini ñayívi. Núu súcuan ¿te naun cásáha ga rō nájnūhun cásáha ñayuu ñayívi jéē jéndije ró táca jéē tajnúni i? ²¹ Chi cácahān i: Ma quehé ró ma caji rō jeē yáha chí jéē yúcuan, ni ma jní ró, áchí i. ²² Te máni jeē tajnúni ñayuu jíin costumbre maá i cúu te tu níhín jniñu jeē quéndōo ndāā ñayuu. ²³ Te ndāā chí cájeni ni i jeē jnúhun ndíchí cúu ún, chí sáha jíin i jeē chiñúhún níhin i, jíin jéē sáha suchí i máá i, jíin jéē stóho i yiqui cúñu i. Te tu níhín jniñu cuiti jeē casi tācá jniñu néé jéē cuní i sáha i.

3

¹ Núu súcuan te nájnūhun ni natecu Cristo, suni súcuan ni canatecu rō jeē ní cuu ró nájnūhun ndāyi ni sáha cuēchi ró. Te na cóndihvi ni rō siquī tāca jéē iyó andiví núu ndeé Cristo lado váha Yaā Dios nuū cujéhu ya. ² Te na cáni ni rō siquī tāca jéē iyó andiví, nasūu síquī jeē iyó ini ñayívi. ³ Chi nájnūhun je ni cajihī rō jíin Cristo, te vijna chí nájnūhun cátecu rō jíin yá andiví, chí cáyihí ró ini ndaha Yaā Dios. ⁴ Te quivī ndíji Cristo, Yaā sáha jeē cótecu yō ní cáni, yūcuán na te suni quendacoo ndijin maá ró jíin yá, te cujéhu luu ró jíin yá.

Ñayuu jica jíin modo cuní maá, jíin ñayuu ní ndujeé

⁵ Núu súcuan te casi rō tāca modo cuní maá ró jeē cáhīyo ró ini ñayívi yáha. Chi ma cáca jnéni ró, ma sáha ró jniñu jnéhén, ma ndíyo ni rō sáha ró táca jniñu néé, ma cutóo ró, ma ndíyo ni rō ndajniñu. Chi tācá ndajniñu jeē ndíyo ni yō cúu nájnūhun ídolo yō jeē chiñúhún yó. ⁶ Chi siquī tācá jniñu yáha cúu jeē cuáha Yaā Dios castigo xeēn nuū ñáyuu níhni ni nuū yā. ⁷ Te suni jíin jniñu yáha ní cajica ró ndé saá, ná ni casáha ró súcuan. ⁸ Te vijna te na stóo ró táca jéē yáha: jeē quití ni, jeē xeēn ni, jeē sáha jniñu néé, jeē cahán ndevāha nuū jnáhan, jíin jéē cahán tāca jnúhun tú vāha. ⁹ Ma stahú ró jnáhan ró, chí yúcuan cúu modo maá ró jeē ní cajica ró jíin ndé saá, te je ni castóo ró. ¹⁰ Te ni canduu ró ñáyuu jeé, cuandacu ró máá Yaā ni sáha róhó, te cuajecūhun vāha ni rō ndese Yaā cúu ya. ¹¹ Te ñayuu ní ndujeé tuá cúu i ñayuu griego, ni ñayuu hebreo, ni ñayuu ni sáha circuncidar, ni ñayuu tu ní sáha circuncidar, ni ñayuu ñuu jicá, ni ñayuu yucú jeē ní indāa néé, ni mozo jeē ní jeen ñayuu, ni ñayuu sájniñu cuenta maá, chí inuú cúu ndíhi i nuū yā. Chi Cristo cúu Jítoho ndíhi i, te ndeé yá ini anuá ndíhi i, ndúú yá jíin i.

¹² Chi ni nacāji Yaā Dios rohó jínáhan ró jeē cúu ró ñáyuu maá yá jeē maní yā jíin. Núu súcuan te níni cundáhú ni rō jnáhan ró, te coo vāha ni rō jíin jnáhan ró. Te coo suchí ni rō, te coo vítá ni rō, te coo paciencia ni rō. ¹³ Cuandeyí ni rō jíin jnáhan ró, te cone cáhnu ni rō nuū i te núu na vé ni sáha i nuū rō. Chi nájnūhun ni ine cáhnu ni Cristo nuū rō, suni súcuan sáha máá ró. ¹⁴ Te jeē cánuú gá cúu jeē cundáhú ndasí ni rō jnáhan ró. Chi yúcuan sáha jeē ndúu inuú ni rō te íje vāha ni rō jíin jniñu vāha. ¹⁵ Te jnúhun coyūcu mání na cúnuú ini anuá rō sáha Yaā Dios. Chi ni cana ya rohó jéē nduu ró ñin na ñayuu jéē cóyūcu mání rō. Te níni na nácuatáhú ró núu yā.

¹⁶ Te scuáha vāha ró jnúhun Cristo návāha cunuú jnúhun ún ini anuá rō. Te stéén rō nuū jnáhan ró, te stíhví ni rō i jíin táca jnúhun ndíchí yá. Te jíin salmo jíin himno, yaa iī jeē cahán jnúhun ya, na cáta luu ró jéē nácuatáhú ró ini anuá rō nuū Yaā Dios. ¹⁷ Te tācá jniñu sáha ró, núu jeē cahán rō chí jéē sáha ró cúu, ndíhi na sáha ró jéē ndujéhu síhví máá Jítoho yō Jesús, te nacuatáhú ró núu Tatá yō Yaā Dios sáha ya.

Ndese cánuú squícu ñayuu cávandje nuū jnánhan i

¹⁸ Róhó ñahan cácuu ñasihí, cuatáhú ró nuū yíi ró, chi súcuan cánuú sáha ró síquī jeē candje ró Jítóho yō. ¹⁹ Te róhó tée cácuu yíi, cundáhú ni rō ñasihí ró, te ma cútucu ni rō jíin ña. ²⁰ Róhó séhe jíjnánhan ró, tǎcá-ni jniñu cuandije ró núū tatá rō nuū naná rō, chi súcuan cúsiñi ni maá Jítóho yō. ²¹ Te róhó tátá jíjnánhan ró, ma squítí ni rō séhe ró, návāha ma cucuíhyá ni i. ²² Róhó mozo jíjnánhan ró, tǎcá-ni jniñu cuandije ró núū patrón rō ñayívi yáha. Ma sájniñu ndúxi ró jeē maá jéē coto de te cuajnúhún de róhó. Chi na sájniñu ndaā sájniñu ndije ró, te conso iyo ró núū Yaā Dios. ²³ Te tǎcá jniñu sáha ró, na cúsiñi ni rō sáha ró, te na cáni ni rō jeē nuū Jítóho yō cávejniñu ró, nasūu núū ñáyuu. ²⁴ Chi je cájini rō jeē maá Jítóho yō cuāha ya cuehē tahū cuu ró híí cáni. Chi nuū maá Cristo cávejniñu ró, chi máá yá cúu Jítóho rō. ²⁵ Te ñayuu casáha jniñu néé, chi sa suhva ndutahū i síquī jeē ni sáha i. Chi tu sáha Yaā Dios cuenta ndese cúu ñin ñin ñayuu, chi inuú sáha ya jíin i.

4

¹ Róhó patrón jíjnánhan ró, vāha ndaā na sáha ró jíin mozo rō. Te na núcūhun ni rō jeē suni íyó Jítóho maá ró, Yaā ndeé andívi.

² Te ndívi rō ma jécuiñi rō jeē jicán tahú rō, chi coo ndito ni rō jíin, te nacuatáhú ró núū Yaā Dios. ³ Te suni cacān tahú rō jehē rī jíjnánhan rī, jeē na sáha Yaā Dios jeē cóo ga modo nacani rī jnūhun, návāha cuu cahān rī jnūhun Cristo jeē ní yisāhí, jeē tu ní cájini ñayuu jenahán. Te síquī jnúhun un cúu jeē íne rī vecāa. ⁴ Te cacān tahú rō jeē cuu cahān cají rí ndese cánuú cáhān rī.

⁵ Sáha yúcún váha ró jíin ñáyuu tu cávandje. Ma cúhuun ni rō síquī i, chi condíhvī ni rō scandje ró i. ⁶ Te máni cahān vāha ró jíin ñáyuu, te cahān rō jnūhun cuajniñu jeē quéndōo vāha i sáha. Te cani ni rō ndese vāha nastió cuíñi rō jnūhun nuū ñin ñin i.

Saludo jeē sándihí

⁷ Tíquico cúu ñin hermano jeē maní yō jíin, te tēe squícu vāha chindéé ñájnánhan jíin rí cúu de, te jéjiniñu de jíin rí nuū maá Jítóho yō. Te máá de castūhún ndíhi nuū rō ndese cuahān jniñu rī. ⁸ Jeē yúcuan ní tají rí de cuajeē de nuū rō jíjnánhan ró, návāha cuni rō ndese cáhiyo rī jíin jniñu, te coo ndeyí ni rō sáha de. ⁹ Te suni cuajeē Onésimo jíin de, tēe cúu jnánhan máá ró jíjnánhan ró. Te cúu de hermano jeē squícu vāha jeē maní yō jíin. Te ndíndúú de castūhún núū rō ndese cuahān tǎcá jniñu ichi cháha.

¹⁰ Sándeyí ni rō jíjnánhan ró, áchí Aristarco, tēe íne jíin rí vecāa. Te suni súcuan cáhán Marcos, ñani primo Bernabé. Te je ni ndacu rī jniñu nuū rō síquī Marcos, te núu ni jecondēhé de róhó te sáha vāha ró jíin de. ¹¹ Te suni súcuan cáhán Jesús, tēe jeē suni nání Justo, jeē sándeyí ni rō. Te máá-ni de cácuu tēe hebreo cávandje jeē chindéé ñáhán cánacani jnūhun jíin rí síquī ndese ndácu Yaā Dios jniñu. Te yōhyo ndeyí íyó ni rī casáha de. ¹² Sándeyí ni rō jíjnánhan ró, áchí Epafras, tēe cúu jnánhan máá ró, te mozo Cristo cúu de. Te níni jicán tahú ndasí de jehē rō, jeē na cuíñi níhin ró, te ije vāha ni rō jeē squícu vāha ró ndíhi jniñu cúni Yaā Dios. ¹³ Chi cáhán ndaā rī jeē yōhyo ndíhví ni de jehē rō jíjnánhan ró, jíin jéhē ñáyuu ñuu Laodicea jíin Hierápolis. ¹⁴ Lucas, tēe cúu médico jeē maní yō jíin, suni cáhán de jeē sándeyí ni rō, te suni súcuan cáhán Demas.

¹⁵ Cachi rō nuū tǎcá hermano ñuu Laodicea jeē sándeyí ni i, áchí rí. Te suni súcuan cahān rō jíin Ninfas, jíin táca ñáyuu cávandje cándutútú vehe ña. ¹⁶ Te ná ni jíinu ni cacahu ró carta yáha, te suni tají ró na cáhu ñayuu cávandje ñuu Laodicea. Te suni cahu máá ró carta jeē cuahán nuū ñáyuu Laodicea te ndiji nuū rō. ¹⁷ Te cachi rō nuū Arquipo jeē na ndúcú ndeyí de squícu de jniñu ní tee Jítóho yō síquī de, áchí rí.

¹⁸ Ruhū Pablo, yāhá-ni cúu jeē tēe rī jíin ndaha máá rí, jeē sándeyí ni rō. Te nucūhun ni rō ruhū jeē íne rī vecāa. Te ñúhun ni rī jeē na sáha ga Yaā Dios jeē váha róhó jíjnánhan ró. Súcuan na cóo. Amén.

CARTA HIN JEE NI TEE APOSTOL SAN PABLO NUU ÑAYUU ÑUU TESALONICA

¹ Máá rí cúu Pablo jíin Silvano jíin Timoteo, te cátee ri carta yáha cuájeē nuū rohó ñáyuu cácanđije ñuu Tesalónica, jeē cáyihí ró ndaha Tátá yō Yaā Dios jíin Jítóho yō Jesucristo. Te cáñuhun ni rī jeē Tátá yō Yaā Dios jíin Jítóho yō Jesucristo, na sáha ga yā jeē váha rōhó, te sáha ya jeē coo ndeyí coo sīh ni rō jijnáhan ró.

Ñayuu Tesalónica cúu i hin ejemplo vāha

² Níní cánacuatáhú rí nuū Yaā Dios jeē siquí rohó jíjnáhan ró, te tu náā ni rī cacān tahú rī jehē rō jeē cájicān tahú rī. ³ Te níní ndácunehen ri rohó núū Tátá yō Yaā Dios, jeē váha cásáha ró táca jniñu chi cácanđije ró, jíin jéē váha cájejniñu ró núū yā chi manī rō jíin yā, jíin jéē cájendeyí ni rō chi cáñuhun ni rō jeē coo jeē váha sáha Jítóho yō Jesucristo. ⁴ Chi manī Yaā Dios jíin ró jíjnáhan ró hermano, te cájini rī jeē ní nacāji ya rohó. ⁵ Chi ná ni canacani ri jñuhun nuū rō jeē jnáma ya rohó, te nasūu jéē ni cáhān rī súcuan-ni, chi ni nacani ri jíin poder Espíritu Santo, te ni cacucáhnu vāha ni rī jeē jnúhun ndaā cúu. Te cájini rō ndese ni casáha vāha ri ná ni coyūcu rí jíin ró, chi ni nducú rí jeē quéndōo vāha ró.

⁶ Te rōhó jíjnáhan ró chi ni candacu ró rúhū, te suni ni candacu ró máá Jítóho yō. Chi ni cajetáhú ró jñuhun ya, te ni cacusiñ ni rō ni sáha Espíritu Santo, vēsú ni cajito ró cuehē jñundóho siquí ún. ⁷ Te súcuan cácuu ró hin ejemplo nuū ndihí ñayuu cácanđije jeē cáyūcú región Macedonia jíin Acaya jiñā. ⁸ Chi jeē siquí rohó jíjnáhan ró cúu jeē ní jite núu jñuhun Jítóho yō, te nasūu máni Macedonia jíin Acaya, chi suni ní cáhnu-ni ni jite núu jñuhun ndese cácanđije ró Yaā Dios. Te jeē yúcuan tuá jíni ñúhún jeē nácani máá rí jñuhun nuū i. ⁹ Chi sa máá i cánacani ndese ni cajetáhú váha ró rúhū ná ni jecoo ri nuū rō, jíin ndese ni castóo ro ídolo te ni quívicoo ró ndaha Yaā Dios, Yaā ndaā Yaā técu, jeē cuajniñu ró núū yā. ¹⁰ Te cánacani i jeē cándetu ró jéē ichi ándiví ndiji Sēhe ya Jesús jeē ní nastécu yā. Te máá Jesús jnama ya yohó núū castigo xeēn jeē quíji.

Jniñu jeē ni sáha Pablo ñuu Tesalónica

2

¹ Chi cájini rō hermano, jeē tu ní jécoo cáhá-ni ri nuū rō. ² Te cájini rō jeē ní castóho i ruhū te ni cacahān ndevāha i nuū rī ini ñuu Filipos. Te vēsú súcuan te máá Yaā Dios ni chindéé ñáhán yá ruhū, ni sáha ya jeē ni íyo ndeyí ni rī, te ni jecoo ri ñuu rō ni canacani ri jñuhun jeē jnáma ya rohó. Súcuan ni casáha ri vēsú xeēn ni íyo jñundóho. ³ Te jñuhun ni canacani ri, nasūu jnúhun ni castívi ri cúu, ni nasūu jéē nihín rī siquí rō, ni nasūu jéē ní castáhú rí rohó. ⁴ Chi máá Yaā Dios ni jito ndee yā ruhū, te ni tejniñu ya ruhū jeē nácani ri jñuhun jeē jnáma ya rohó. Te jeē yúcuan cúu jeē cacahān rī. Te tu cacahān rī jñuhun jeē nújnahan ni ñayuu, chi sa jeē nújnahan ni Yaā Dios, chi máá yá jito ndee anuá rī. ⁵ Te cájini rō jeē tu ní cánducú rí cuajnúhún rí rohó hin modo stahú, ni tu ní cacahān rī jeē cúsiñ ni rī jíin ró návāha nihín rī xūhun ró. Te jíni Yaā Dios jeē súcuan cúu. ⁶ Te ni tu ní cánducú rí jeē cuajnúhún ró ruhū, ni jeē cuajnúhún inga ñayuu ruhū, vēsú súcuan cánuú coo núú, chi apóstol Cristo cácuu ri. ⁷ Chi sa suhva víta ní cacahān rī jíin ró, nájnuhun sáha ñahan ndéca yiquín jéē yucún ndíto ña sēhe ña. ⁸ Te siquí jeē cákundáhú ndasí ni rī rohó, jeē yúcuan ní cacondihvī ni rī nacani ri jñuhun vāha Yaā Dios nuū rō. Te nasūu máá yúcuan-ni, chi suni nde vida rī cuāha ri jeē siquí rō nuú, chi yōhyo manī rī jíin ró. ⁹ Te cánahan ró hermano, jeē tú ni hin ró ní stáhān rī jeē cacān rī nuū rō ná ni canacani ri jñuhun vāha Yaā Dios nuū rō. Chi ni canducú ndeyí rí ni casájniñu ndasí rí siquí jeē cótecu rī. Te nduú ñuú ni casájniñu ri.

¹⁰ Máá ró cájini rō, te suni Yaā Dios jiní yā ndese ndaā ndoo ni cajica ri nuū rohó ñáyuu cávandíje. Te ni ñin tu cúu cahān cuēchi siquī rī. ¹¹ Te suni cájini rō ndese ni castíhvī ni rī ná ñin ná ñin ró, te ni cacahān rī jnūhun ndeyí ni jíin ró, nájnūhun sáha ñin tátá jíin séhe de. ¹² Te ni cacahān ñihin ri jíin ró jeē na cáca ndaā rō nuū Yaā Dios nájnūhun cánuú caca ró. Chi ni cana ya rohó jéē quíngoo ró núū ndácu ya jniñu, nuū luu cujéhnū ró jíin yá.

¹³ Te jeē yúcuān níni nácuatáhú rí nuū Yaā Dios, chi ni cajetáhú ró jnūhun ya jeē ní canacani ri. Chi ni cajini rō jeē násūu jnúhun ñin tēe cúu, chi jnūhun Yaā Dios cúu. Te máá jéndaá jeē jnúhun un sájniñu ini anuá rohó ñáyuu cávandíje nde ndacu ró yá. ¹⁴ Hermano, ñayuu ñuu rō ni cajito xeēn i rōhó, te súcuān ni candoho ró nájnūhun ni candoho ñayuu cávandíje cáyūcú región Judea jeē cáyihī ndaha Yaā Dios jíin Cristo Jesús. Chi nájnūhun ni candoho i ni sáha jnáhan i ñayuu hebreo, suni súcuān ni candoho ró. ¹⁵ Chi suu ñayuu hebreo ni cajehni de máá Jítoho yō Jesús, nájnūhun ni cajehni de tāca tēe ñuu de jeē ní canacani jnūhun ya nde jenahán. Te suni nde ruhū jijnáhan ri ni cascúnu de. Te cásáha de jniñu jeē tu nújnahan ni Yaā Dios, te cúu de contra siquī tāca ñáyuu. ¹⁶ Chi jésicoo de jeē ma nácani ri jnūhun nuū ñáyuu tācá nación jeē tu jíin, návāha tú cācu i. Te súcuān sáha de jeē nducuehē gā cuēchi siquī de. Te vijna te yachī quiñi quivī jeē cuāha Yaā Dios castigo xeēn nuū de.

Jeē cuní Pablo quicōndēhé tucu de ñayuu Tesalónica

¹⁷ Hermano, ni cacujiyo ri ñin núnúu-ni nuū rō jijnáhan ró. Te vēsú tu cájito jnáhan yó, te níni cáñuhun ni rī rohó. Te yōhyo ni cacuu ni rī ndacoto ri nuū rō jijnáhan ró. ¹⁸ Te jeē yúcuān ní cajeni ni rī jecoo ri nuū rō nuú. Te ruhū Pablo, tijni jínu ni nducú rí modo jeē rī, te Satanás ni jesi ichi ri jijnáhan ri. ¹⁹ Chi tuá na ñnga cáñuhun ni rī, te tuá na ñnga cácusī ni rī, chi suu máá ró jijnáhan ró. Te jeē siquī máá ró cúu jeē ñihín rī premio rī te cusī teyí ni rī cuiñi yó núū máá Jítoho yō Jesucristo quivī ndíji ya. ²⁰ Suu jeē siquī rohó cúu jeē cácusī teyí ni rī.

3

¹ Te jeē yúcuān tuá ni cácanda ri condetu ri nde ñihín rī jnūhun ndese cáhīyo ró. Te ni casánda rī jeē quéndōo máá-ni ri ñuu Atenas. ² Te ni catají rí hermano yō Timoteo, tēe jéjníñu jíin rí nuū Yaā Dios siquī jnúhun jeē jnáma Cristo yohó. Te ni jecōndēhé de rōhó návāha sáha de jeē cuiñi ñihin ró te coo ndeyí ni rō jíin jnúhun cávandíje ró. ³ Te ni jeē de návāha ma náyūhú ni ñin ró siquī tāca jnúndóho jeē sáha ñayuu. Chi je cájini rō jeē súcuān cánuú ndoho yó. ⁴ Chi nde ná ni coyūcu rí jíin ró, te ni cacastūhun rí nuū rō jeē ñihín nahín yó jnúndóho. Te je cájini rō jeē súcuān ni cuu, nájnūhun ni cacahān rī. ⁵ Te jeē yúcuān, náa tuá ni cánda ri condetu ri jeē ñihín rī jnūhun ndese cáhīyo ró, te ni tají rí de ni jeē de, návāha cuni rī núu cávandíje nahín ró. Chi ni jeni ni rī á sanaa te jexeēn jeē jíto ndee yohó ní cundeyí jíin ró, te naa cāhá-ni jniñu jeē ní casáha ri jíin ró.

⁶ Te vijna chi je ni ndee Timoteo nuū rī jijnáhan ri jeē ní jéē de ñuu rō Tesalónica. Te ni nacani de jeē cávandíje vāha ró, te cávandáhú ni rō jnáhan ró. Te ni cachi de jeē cáñuhun ni rō ruhū, chi cáhīyo manī rō jíin rí. Te cácuni rō ndacoto ró núū rī, nájnūhun cácuni rī ndacoto ri nuū rō. ⁷ Te jeē yúcuān ní candusī ni rī siquī jeē cávandíje vāha ró, hermano, vēsú xeēn iyó jnúndóho siquī rī. ⁸ Te vijna je ni cananiñin ni rī, chi cáhīin ñihin ró jíin máá Jítoho yō. ⁹ Núu súcuān te tu jínu cuiñi nacuatáhú rí nuū Yaā Dios jeē siquī rohó jijnáhan ró. Chi jíto ya jeē cácusī ndasí ni rī jeē súcuān cáhīyo ró. ¹⁰ Te nduú ñuu cájicān tahu ndasí rí jeē ndacoto tucu ri nuū rō, te stéén gā rī na-ni jnūhun cúmani jecūhun ni rō siquī jnúhun cávandíje yó.

¹¹ Te cácuni rī jeē máá Tátá yō Yaā Dios jíin Jítoho yō Jesucristo, na núne ya ichi jeē cuu jecoo tucu ri nuū rō. ¹² Te na sáha máá Jítoho yō jeē cuehē ndasí gā vandáhú ni rō jnáhan ró jíin táca gā ñayuu, nájnūhun cávandáhú ni rī rohó jijnáhan ró. ¹³ Te na sáha ya jeē íje ánuá rō jeē cuiñi ñihin ró, návāha coo ndoo ró jéē ma cóo cuēchi ró núū máá Tátá yō Yaā Dios, quivī ndíji Jítoho yō Jesucristo jíin táca ñáyuu yíhi ndaha ya.

Siqui jeē caca ndaā yō modo jeē cusiñ ni yā

4

¹ Te vijna hermano, íyó inga jñūhun jeē cácahān ndahú rí jíin ró te cáhān nīhin ri jíin ró, chi súcuan cúní maá Jítóho yō Jesús. Je ni castéén rī nuū rō ndese cánuú caca ndaā rō návāha cusñ ni Yaā Dios. Te cácahān ndahú rí jíin ró jeē sa víhyá gā na cáca ró súcuan.

² Chi je cájini rō na jniñu ni candacu ri nuū rō jeē ní ndacu maá Jítóho yō Jesús. ³ Te cúní Yaā Dios jeē na cóo ndoo coo iī rō nuū yā, te ma cáca jnéni ró. ⁴ Te ná ñin ná ñin ró na cóndeca yññuhún ró ñasihí maá ró, te súcuan caca ndoo ró. ⁵ Te ma sáha ró jniñu néé jéē ndíyo ni rō jesihí, nájñūhun cásaħa ñayuu tācá nación jeē tu cájini i jñūhun Yaā Dios. ⁶ Ni ñin ró ma sáha ró cuéchi jeē quénde rō ñasihí jnáhan ró. Chi maá Jítóho yō cuāha ya castigo xeēn nuū ñayuu casáħa tācá jniñu súcuan, nájñūhun je ni cacahān nīhin ri ni castūhun rí nuū rō. ⁷ Chi tu ní cána Yaā Dios yohó jéē sáha yó jniñu jnéhén, chi sa jeē caca ndoo yó. ⁸ Núu súcuan te ñayuu jeē squéhichī jñūhun yáħa, nasūu jñūhun ñin tēe squéhichī i, chi sa jñūhun Yaā Dios, Yaā ni jéhe Espiritu Santo nuū yō.

⁹ Te tu jíni ñúhún jéē téé ri nuū carta yáħa jéē coo manī rō jíin táca hermano, chi je ni steén Yaā Dios nuū rō jeē coo manī rō jíin jnáhan ró. ¹⁰ Te je cáhiyo manī rō súcuan jíin táca hermano cáyūcu ñí cáhnu Macedonia jíñā. Te cáhān ndahú rí jíin ró hermano, jeē sa víhyá gā na cóo manī rō jíin i. ¹¹ Te na cóndihvī ni rō coyūcú nayúú ró, te ma cóndihvī ni rō siquī ndese cásaħa jnáhan ró, chi condihvī ni rō sáha ró jniñu maá ró, nájñūhun ni candacu ri nuū rō. ¹² Súcuan na sáha ró návāha ñayuu tu cándíje, cuatáħú i róhó, te suni ma cúmani jeē cotecu rō.

Siqui jeē ndíji Jítóho yō

¹³ Suni cácuni rī, hermano, jeē na jécūhun ni rō jijnáhan ró siquī ñayuu cájihī, návāha ma cucuíhyá ni rō nájñūhun sava ga ñayuu jeē tu cáñuhun ni i jeē nátecu ndíyi. ¹⁴ Chi nájñūhun cácandíje yó jéē ni jíhi Jesús te ni natecu yā, suni súcuan cácandíje yó jéē nastécu Yaā Dios tāca ñayuu ni cacandíje nuū Jesús te ni cajihī.

¹⁵ Jeē yúcuan cácastūhun rí ñin jñūhun jeē ní castūhun maá Jítóho yō nuū rī: Jeē yóhó jéē cátecu gā quivī ndíji maá Jítóho yō, nasūu maá yó cosnūu jéē ndaa yó quíhin yō. Chi xīhna gā ñayuu je ni cajihī ndaa i quihīn i. ¹⁶ Chi maá Jítóho yō nuu ya quiji ya ichi ándiví, te cana jee ya jeē maá yá ndácu jniñu, te cana jee ndajéħé cujéħnu ga, te cuecu trompeta Yaā Dios. Te xīhna gā natecu tāca ndíyi jeē ní cacandíje Cristo. ¹⁷ Yūcuán na te yóhó jeē cátecu gā yō quivī ndíji ya, suni ndonehen ya yohó jíin i, quihīn yō mēħñu vícō. Te naquijnáhan yó jíin maá Jítóho yō sava andiví. Te súcuan condee yō ñí cáni jíin maá Jítóho yō. ¹⁸ Núu súcuan te jíin jñūhun yáħa cahān ndeyí ni rō jíin táca jnáhan ró.

5

¹ Te tu jíni ñúhún jéē téé ri nuū carta yáħa siquī cuiyā chí quivī jeē coo tācá un, hermano. ² Chi je cájini vāha ró jéē ñin sanaa ni yō te quee quivī ndíji maá Jítóho yō, nájñūhun ñin sanaa ni yō te quíji ñacuīhná jecuáā. ³ Chi ná-ni cácahān ñayuu jeē nayúú-ni íin te tú na jñūndóho coo, te ná-ni cácahān i súcuan te ñin sanaa ni i te quiji jñūndóho siquī i jeē náā i, te ma cácu cuiñi i. Chi quiji quivī un nájñūhun ñin sanaa-ni te quéjéé jéħndē chíji ñin ñahan scácu sēhe. ⁴ Te róhó hermano, tu cácuu ró ñayuu cájica nájñūhun nuū néé jeē ñin sanaa-ni te quiji quivī un siquī rō nájñūhun quíji ñacuīhná. ⁵ Chi ndíhi ró cácuu ñayuu jeē nájñūhun cájica ró nduú, chi stéén luz yā ini anuá rō. Chi tu cácuu yó nájñūhun ñayuu jeē tu jécūhun ni siquī Yaā Dios, jeē nájñūhun cájica i nuū néé. ⁶ Núu súcuan te ma cúhuun ni yō nájñūhun ñayuu cáquixī, chi sa ndito na cóo ni yō te coo cájí xínī yō. ⁷ Chi jecuáā cúu jeē cáquixī ñayuu, te suni jecuáā cúu jeē nájini i. ⁸ Te maá yó chi nájñūhun jeē cájica yó nduú, te na cóo cájí xínī yō. Te na cúcutú yó jíin jñūhun cándíje nīhin yó jíin jñūhun cúndáħú ni yō jnáhan yó, nájñūhun cúcutú soldado jíin sahna cáa. Te na cúcutú yó jíin jñūhun jeē cáñuhun ni yō jeē cācu yó, nájñūhun cúcutú soldado jeē ñúhún lélu cáa xini de. ⁹ Chi Yaā Dios tu ní jéni ya yohó jéē cuáħa ya castigo yohó, chi

sa suhva jeē jnama ya yohó sáha máá Jítóho yō Jesucristo. ¹⁰ Te máá yá ni jihī yā jehē yō, návāha cotecu inuú yó jíin yá, vēsú núu cotecu gā yō ñayīvi yáha chí cúu yō. ¹¹ Núu súcuan te cahān rō jnūhun ndeyí ni jíin táca jnáhan ró, te scuéhnu jnáhan ró jíin jnúhun ya, nájnūhun je cásáha ró.

Jeē jéni ichí Pablo tācá hermano

¹² Te cácahān ndahú rí jíin ró hermano, jeē cuatáhú ró tēe cájejniñu cándito róhó, jeē cácujeñnu de nuū rō jíin jniñu máá Jítóho yō, te cájeni ichí de róhó. ¹³ Te coo yíñúhún ndasí ró nuū de, te coo manī rō jíin de siquī jniñu ya jeē casáha de. Te na cóyūcu mánī rō jíin táca jnáhan ró.

¹⁴ Te suni cácahān ndahú rí jíin ró hermano, jeē na stíhví ni rō ñayuu cájica cúxí. Te cahān rō jnūhun ndeyí ni jíin ñáyuu jeē yachī ndínuu ni i. Te chindéé ñáhán ró ñayuu jeē tu fuerza ini. Te cuandeyí ni rō jíin ndíhi ñayuu.

¹⁵ Te coto má nasáha ndevāha ro jíin ni ñin ñayuu te núu sáha ndevāha i jíin ró. Chi mánī jeē váha nducú ró sáha ró jíin táca jnáhan ró jíin ndíhi-ni ñayuu.

¹⁶ Níní na cóo sī ni rō jijnáhan ró. ¹⁷ Te níní na cácan tahu rō. ¹⁸ Te nacuatáhú ró jeē siquí tācá-ni. Chi súcuan cúní Yaā Dios jeē sáha ró jēe cácañdeje ró Cristo Jesús.

¹⁹ Te ma cásī rō nuū jniñu jeē sáha Espíritu Santo jíin ró. ²⁰ Te ni ma cujéē ni rō nuū jnúhun cácahān tēe cánacani jnūhun Yaā Dios. ²¹ Chi coto ndee rō táca jnúhun, te núu jeē váha cúu, te cuatáhú ró. ²² Te ma quívi nduu rō jíin ni ñin jniñu néé.

²³ Te máá Yaā Dios jeē jéhe jnūhun ndeyí sī ni, ñúhun ni rī jeē sáha ndíhi ya jeē cóo ndoo coo iī rō nuū yā. Te ñúhun ni rī jeē cóndito vāha ya anuá rō jíin jēe níjnūnī rō, jíin yiqui cúnu rō, návāha tú na cuēchi coo siquī rō quívi ndíji máá Jítóho yō Jesucristo. ²⁴ Chi Yaā jeē ní cana róhó, sáha ya ndíhi un jíin ró, chi squícu ya jeē ni jéjnūhun ya.

Saludo jíin bendición jeē sándíhi

²⁵ Hermano jijnáhan ró, cacān tahu rō jehē rī jijnáhan ri.

²⁶ Te núu na cáhán rō jíin táca hermano, te techūhu yíñúhún ró ndaha i.

²⁷ Te cáhán níhin ri jíin ró, chi súcuan cúní máá Jítóho yō, jeē na cáhu ró carta yáha núu tācá hermano.

²⁸ Te ñúhun ni rī jeē máá Jítóho yō Jesucristo na sáha ga yā jeē váha róhó. Súcuan na cóo. Amén.

CARTA UU JEE NI TEE APOSTOL SAN PABLO NUU ÑAYUU ÑUU TESALONICA

¹ Máá rí cúu Pablo jíin Silvano jíin Timoteo, te cátee ri carta yáha cuájeē nuū rohó ñáyuu cávandíje ñuu Tesalónica, jeē cáyihí ró ndaha Tátá yō Yaā Dios jíin Jítóho yō Jesucristo. ² Te cáñuhun ni rí jeē Tátá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo sñ ni rō jijnáhan ró.

Jeē sándaā yā cuēchi quivī ndíji Cristo

³ Cánúú jeē niní nacuatáhú rí nuū Yaā Dios jeē siquí rohó jíin áhan ró hermano. Chi súcuan íyó váha, chi yōhyo váha cuahije ró jíin jnúhun jeē cávandíje ró yá, te yōhyo cuanducuehē jeē cávandíje ni rō táca jnáhan ró. ⁴ Te jeē yúcuan cúu jeē cávusí teyí ni rí cácanani ri jnúhun ró núu táca grupo ñáyuu cávandíje nuū Yaā Dios. Chi váha cávandíje ró, te váha cávendeyí ni rō jeē cájito xeē ñáyuu rohó jíin jéē cándoho ró táca gá jnúndóho. ⁵ Te jíin táca jéē yáha chíhi ya cuenta jeē cácuu ró ñáyuu váha jeē quívicoo ró ñuu nuū ndácu ya jniñu. Chi siquí ñuu un cúu jeē cándoho ró. Te jeē súcuan chíhi ya cuenta siquí rō, yáha stéén nuū yō jeē váha Yaā cúu ya.

⁶ Te suni íyó váha jeē nastóho ya ñáyuu castóho róhó. ⁷ Te quivī ndíji Jítóho yō Jesús, quivī un sáha Yaā Dios jeē ndétātu róhó jéē cándoho, te suni ruhū jijnáhan ri. Chi jíin yáñuhūn quiji Jesús ichi ándiví jíin táca ndajéhé yā jeē ndíso poder. ⁸ Te cuáha ya castigo nuū ñáyuu jeē tu ní cájēhe i jnúhun cuni i ndese Yaā cúu Yaā Dios, te tu ní cájetáhú i jnúhun máá Jítóho yō Jesucristo jeē jnáma ya i. ⁹ Te ñáyuu ún chi ndoho i nñí cáni, chi cujiyo i nuū máá Jítóho yō, te ma cúu quívicoo i nuū lúu ndasí cújéñu ya jíin poder yā. ¹⁰ Súcuan sáha ya quivī ndíji ya jeē lúu cújéñu ya sáha ñáyuu cávandíje jeē yáhi ndaha ya. Te nahán naa ni i coto i nuū yā. Te suni súcuan róhó jíin áhan ró, chi ni cávandíje ró jnúhun jeē ní canacani ri nuū rō.

¹¹ Te jeē yúcuan cúu jeē niní cájicān tahu rí jehē rō, jeē na cúu ró ñáyuu váha jeē ní cana ya rohó. Te jíin fuerza yā na sáha ya jíin ró jeē squícu ró táca jniñu váha jeē ní catee ni rō sáha ró síquí jeē cávandíje ró. ¹² Te súcuan te cújéñu máá Jítóho yō Jesucristo sáha ró, te suni cújéñu máá ró jijnáhan ró sáha ya. Chi Yaā Dios yō jíin Jítóho yō Jesucristo, súcuan cúu jeē sáha ya jeē váha yóhó.

Jnúhun siquí maá téé sáha xeē cuēchi

2

¹ Vijna te cahān rí siquí jeē ndíji máá Jítóho yō Jesucristo jíin jéē ndutútú yó núu yā. Cácahān ndahú rí jíin ró jijnáhan ró hermano, ² jeē ma cuáha ró jnúhun sacā nuu cani ni rō, ni ma cunéé ni rō núu cácahān ñáyuu jeē jé ni quee quivī ndíji máá Jítóho yō. Ma cávandíje cuítí rō vésú núu cahān i jeē ni níhín i ñin jnúhun siquí un núu Espíritu, chí ñin jnúhun jeē ni cáhān ñnga, chí núu cachi i jeē ruhū jijnáhan ri ni tají ñin carta jeē cahān súcuan. ³ Ma cuáha cuítí rō jnúhun jeē stahú ni ñin i róhó. Chi nde ná tu quiji quivī ún te xíhna gā ndunihni ni cuehē ñáyuu nuū yā, te quenda ndijin máá téé sáha xeē cuēchi, te tē jnáhnū ndetū cúu máá téé ún. ⁴ Chi tē jító uhū Yaā Dios cúu de, te ndonda de contra siquí táca jéē casnání i yā i jíin táca jeē cáchíñuhún i. Te xeē gā sáha de, chi nde cucōo de ini templo Yaā Dios jeē íyó Jerusalén, te cahān de jeē maá de cúu Yaā Dios.

⁵ ¿A cánahán ró jnúhun yáha? Chi súcuan ni cahān rí jíin ró ná ni íyo ri jíin ró. ⁶ Te je cájini rō ndé vé cúu jeē jési jeē ná tu quenda ndijin tēe ún, chi nde na quee quivī maá de. ⁷ Chi je jícu sáhi táca cuēchi xeē ini ñayiví, te vijna chi íyó jéē jési nuū, náváha ma cá ndasí gá cuēchi, chi nde na cújiyo máá jéē jési nuū. ⁸ Te sáa te quenda ndijin máá téé xeē ún. Te máá Jítóho yō Jesús cahni ya tēe un jíin táchí yuhu-ni ya, te jíin jéē ndíndēe yá ndíji ya te snáhnū ndetū yā de. ⁹ Te jeē quíji tēe xeē ún chi máá Satanás sáha. Te quiji

de jíin cuéhē poder, te sáha de tācá jniñu jéhu jeē stahú de, jeē nahán naa ni ñayuu coto i. ¹⁰ Te jíin táca jniñu néé te stáhú ndasí de ñayuu jeē jnahnú ndetū, chi tu ní cúní i cuatáhú i jnūhun ndaā jeē cácu i núu. ¹¹ Te jeē yúcuan cuāha Yaā Dios jnūhun jeē cuatáhú i jnūhun jeē tú ndaā cuiti, te candíje i jnūhun stáhú un. ¹² Te súcuan te jecondee cuēchi siquī ndihi i jeē tu ní cá candíje i jnūhun ndaā, chi sa jniñu néé ni cacusiñ ni i jíin.

Ñayuu jeē ní nacāji ya jeē cácu i

¹³ Te cánuú jéé niní nacuatáhú rí jijnáhan ri nuū Yaā Dios jeē siquí rohó jéé cácuu ró hermano jeē maní Jítóho yō jíin. Chi nde ná ni jecōo ñayiví, te je ni nacāji Yaā Dios rohó jéé jnáma ya rohó. Chi sáha Espíritu yā jeē cáhiyo ndoo cáhiyo ii rō nuū yā te cá candíje ró jnúhun ndaā. ¹⁴ Chi jeē yúcuan ní cana ya rohó jíin jnúhun jeē jnáma ya yohó jeē ní canacani ri, návāha quivícoo ró núu cujéhu luu ró jíin máá Jítóho yō Jesucristo.

¹⁵ Núu súcuan te cuiñi nihin ró hermano, te conahán váha ró jnúhun jeē ní cacutūhva ró núu rī, núu jeē ní cacahān rī chí jéé ní tee ri nuū carta. ¹⁶ Máá Jítóho yō Jesucristo jíin Tátá yō Yaā Dios ni cundáhú ni yā yohó, te ni sáha ya jeē coo sñ ni yō ní cáni, jíin jéé ñúhun ni yō tāca jéé váha jeē coo siquí jeē váha ni yā jíin yó. ¹⁷ Te na sáha ga yā jeē cóo ndeyí ni anuá rō jijnáhan ró, te na sáha ya jeē íje ró cáhān rō tāca jnúhun váha ya, te sáha ró táca jniñu váha.

Jeē na cácan tahu i jehē de

3

¹ Te íyó inga jnūhun cánuú, hermano. Na cácan tahu rō jehē rī jijnáhan ri, návāha yachí cuitē núu jnūhun máá Jítóho yō, te cuatáhú váha ñayuu, nájnūhun ni cajetáhú máá ró. ² Te suni cacān tahu rō jeē na cácu ri nuū tāca téé casáha néé jéé cátejnhān jíin rí. Chi tú ndihi tēe cá candíje jnūhun ya. ³ Te máá Jítóho yō chi váha squícu ya jeē ní jéjnūhun ya, te sáha ya jeē íje ni tāca ró jíin jnúhun ya, te coto ya rohó núu jeneé. ⁴ Te cá cucáhnu ni rī sáha máá Jítóho yō, jeē cócuu ró jíin jniñu jeē ní candacu ri nuū rō, te suni cocuu ga rō jíin. ⁵ Te ñúhun ni rī jeē máá Jítóho yō steén gā yā ndese coo maní gā rō jíin Yaā Dios nde jíin ini jíin ánuá rō, jíin jéé cuándeyí ni rō nájnūhun ni sáha Cristo.

Jeē cánuú sájniñu yó

⁶ Te cándacu ri jniñu nuū rō hermano, chi súcuan ni ndacu máá Jítóho yō Jesucristo, jeē na cújiyo ró núu tācá hermano cájica cúxí te tu cájica váha de nájnūhun ni castéén rī nuū rō. ⁷ Chi je cájini rō ndese cánuú ndacu ró rúhū jijnáhan ri, chi tu ní cájica cúxí rí ná ni cahíyo ri jíin ró. ⁸ Ni tu ní cáyeji rī staā ni ñn ró súcuan-ni, chi ni cachunaa rī. Chi sa ni canducú ndeyí rí ni casájniñu téyí rí nduú ñuú, návāha ma stáhān rī ni ñn ró. ⁹ Te vésú íyó derecho rī jeē cacān rī nuū rō nuú, te tu ní cájicān rī, chi súcuan ni casáha ri návāha cuu ri ñn ejemplo nuū rō ndese sáha ró jijnáhan ró. ¹⁰ Chi ná ni coyūcu rí jíin ró, te ni candacu ri jniñu yáha nuū rō: Núu ndé ñn ñayuu tu cúní i sájniñu i, te suni ma cáji i núu súcuan. ¹¹ Chi ni canihīn rī jnūhun jeē cájica cúxí sava ró, te tu casájniñu ró, chi yáha yúcuan-ni sáha ró. ¹² Te cándacu ri jniñu nuū rohó jéé casáha súcuan, te cástíhví ni rī rohó jeē na cóo nayúú ró te sájniñu ró, návāha nihīn rō jeē cáji rō siquí jniñu sáha máá ró. Chi súcuan ndácu máá Jítóho yō Jesucristo jniñu.

¹³ Hermano, ma ndínuu ni rō jijnáhan ró sáha ró táca jniñu váha. ¹⁴ Te núu ndé ñn i tu jétáhú i jnūhun jeē cahán rī nuū carta yáha, te condēhe váha ro ndé-ni i cúu, te ma quijnáhan ga rō jíin i, návāha na cúcanu i te nacani ni i. ¹⁵ Te nasūu jéé cóto uhū rō i, chi sa cahān rō jíin i nájnūhun jíin ñani rō jeē na sájniñu váha i.

Bendición jeē sándíhí

¹⁶ Te ñúhun ni rī jeē máá Jítóho yō, Yaā jeē jéhe jnūhun ndeyí sñ ni, níní na sáha ya jeē coo ndeyí coo sñ ni rō siquí tācá-ni, te coo ya jíin ró jijnáhan ró.

¹⁷ Ruhū Pablo, yáhá-ni cúu jeē téé ri jíin ndaha máá rí jeē cahán rī jeē sándeýí ni rō jijnáhan ró. Te súcuan jéhe ri firma nuū tāca carta rī, návāha cuni rō jeē carta máá rí

cúu. Súcuan cáa letra rī. ¹⁸Te ñúhun ni rī jeē maá Jítóho yō Jesucristo, na sáha ga yā jeē váha ró jíjnáhan ró. Súcuan na cóo. Amén.

CARTA HIN JEE NI TEE SAN PABLO APOSTOL NUU TIMOTEO

¹ Máá rí cúu Pablo, apóstol Jesucristo, chi Yaā Dios jeē jnáma yóhó, jíin Jítóho yō Jesucristo jeē ñūhun ni yō coto yó, ni catajǎ yá ruhū jeē nácani ri jnūhun ya. ² Te tée ri carta yáha cuájeē nuū rō Timoteo, chi cúu ndije ró nájñūhun sēhe ri siquī jeē ni scándije ri rohó. Te ñūhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo siñ ni rō.

Jeē ma candije i tāca jnúhun stáhú

³ Ná ni quihín ri ichi jeē quihín rī Macedonia, te ni cahān ndahú rí jíin ró jeē quéndōo ró ñuu Efeso. Te suni súcuan cáhán rī jíin ró vijna, návāha cahān nihín ró jíin sava ñayuu yúcuan jeē ma stéén i inga jnūhun jeē tú ndaā. ⁴ Te ma cuatáhú i tāca jnúhun jeē cúu máa cuento-ni, jíin jnúhun jeē cahán siquī ndese vēji yucūn tāca jíi yō. Chi tāca jéē yúcuan sáha jeē nahán cándajñūhún i siquī, te tu ndé jéjñíñu, te tu sáha jeē íje i squícu i nuū Yaā Dios siquī jnūhun cáccandije yó.

⁵ Te ndácu ri jniñu yáha chi cúní rī jeē na cundáhú ni i jnáhan i siquī jeē iyó ndoo íyó ndáa anuá i, te cáccandije ndije i ya. ⁶ Te sava ñayuu chi ni cajica yátá i, te ni cascuíta i jnūhun ya, ni quívicoo i nuū tāca jnúhun jeē tu ndé jéjñíñu. ⁷ Chi cáccuni i cuu i maestro ley yā, te ni tu cájēcūhun ni i na jnūhun cúu jeē cácahān i, jíin na vé cúu jeē castéén nihín i.

⁸ Te jíin yō jeē iyó váha ley un, te núu jecūhun ni yō ndese jéjñíñu. ⁹ Chi cánuú sáha yó cuenta jeē tu ní jécōo ni hin ley jeē siquí ñayuu ndaā, chi sa suhva siquī ñayuu jeē tu cájjetáhú, jeē níhni ni, jeē casáha jniñu néé, jeē casáha cuēchi, jeē tu cáchiñúhún Yaā Dios ni tu cáccandije ley yā, jeē cájehni tatá jíin náná, jíin jéē cájehni ndíyi. ¹⁰ Te suni ni jecōo siquī ñayuu cájica jnéni, jíin tée casáha ndiyí jíin jnáhan yí, jíin ñayuu casácuíhna inga ñayuu, jíin ñayuu castáhú, jíin ñayuu cácahān nihín jnūhun yáa. Te ni jecōo siquī tāca gá ñayuu jeē casáha jniñu tu quíjñáhan jíin jnúhun ya jeē stéén ndaā váha. ¹¹ Te jnūhun ya un cúu jnūhun yōhyo jéhnú jeē jnáma Yaā Dios yohó. Te yōhyo ndetū Yaā cúu ya. Te ni tejñíñu ya ruhū nácani ri jnūhun ya.

Jeē náccuatáhú Pablo siquī jeē ní cundáhú ni yā de

¹² Te náccuatáhú rí nuū Jítóho yō Jesucristo, Yaā ni jēhe fuerza ini rī, chi ni quihín ya ruhū ni sáha ya jeē cuu squícu ri, te ni tejñíñu ya ruhū nácani ri jnūhun ya. ¹³ Te súcuan ni sáha ya jíin rí vēsú ni cahān ndevāha ri siquī yā nde saá, te ni sáha ndevāha ri jíin ñayuu cáccandije, te xeēn ni sáha ri. Te vēsú súcuan te ni cundáhú ni yā ruhū, chi ná tu candije ri yā nde saá, te tu ní jécūhun ni rī na vé cúu jeē sáha ri. ¹⁴ Súcuan ni sáha Jítóho yō jeē váha ndasí jíin rí. Te ni sáha ya jeē candije ri jíin jéē cundáhú ni rī jnáhan ri siquī jeē ni quívi ri ndaha Cristo Jesús.

¹⁵ Te ndaā ndije cúu jnūhun yáha, te jeē cánuú candije ndíhi ñayuu cúu: jeē ní quiji Cristo Jesús ini ñayívi návāha jnama ya ñayuu iyó cuéchi. Te ruhū cúu tēe jeē vihyá gā ni sáha cuēchi. ¹⁶ Te ni cundáhú ni Yaā Dios ruhū, návāha jíin ruhū jeē vihyá gā ni sáha cuēchi te stéén Jesucristo ndese yōhyo íne cáhnu ni yā. Te súcuan ni sáha ya jeē cúu ri hin ejemplo nuū tāca ñayuu candije ní cuáhān yō, návāha nihín tahú i cotecu i ní cáni. ¹⁷ Núu súcuan te ní cáni na cáhán yíñúhún yó jeē yóhyo luu cújéhnú máa Yaā jeē cúu Rey siquī ndíhi, jeē técu ní cáni, jeē tu náa cuití. Te tu cúu coto yó núu yā vijna, te máa hin-ni ya iyó, te ndíchí yá. Amén.

¹⁸ Nájñūhun sēhe ri cúu ró Timoteo, te jniñu yáha téjñíñu ri rohó, jéē na ndúcú ndéyí ró síquí jniñu váha. Te na cándije váha ró, te na cóo ndaā anuá rō. Chi nde saá je ni cacahān tācá hermano jíin jnúhun Yaā Dios jeē súcuan condiso jniñu ró. ¹⁹ Chi sava ñayuu tuá iyó ndáa anuá i nuū yā, te ni casnāa i jnūhun cáccandije i. ²⁰ Himeneo jíin Alejandro cúu uū tēe ni casáha súcuan. Te je ni siaá rī de nuū Satanás, jeē stóho ún de, návāha jíin jnúndóho ún te cutūhva de jeē ma cáhán ndevāha ga de siquī Yaā Dios.

Siquī ndese cacān tahu yō

2

¹ Núu súcuan te xihna gā ndácu ri jeē cacān tahu rō jehē tāca ñáyuu. Te cahān ndahú rō jehē i, te cacān rō na-ni na vé jíni ñúhún i, te nacuatáhu ró nuū yā jeē siquí i. ² Te cacān tahu rō jehē tāca tée cácujuhnu jíin jéē ndácu jniñu, návāha sáha de jeē cuu coyūcu váha yó te tú na jnūndóho coo siquī yō, te cuu chiñúhún váha yó Yaā Dios te sáha yíñúhún yó jíin táca-ni. ³ Chi yāha cúu jeē váha jeē nújnahan ni Yaā Dios, Yaā jnáma yóhó. ⁴ Chi máa yá cuní yā jnama ya tāca ñáyuu te cuní i ndese íyó jnúhun ndaā yā. ⁵ Chi íyó ñin-ni Yaā Dios, te suni íyó ñin-ni Yaā jeē cahán jíin Yaā Dios jehē ñáyuu. Te Yaā un cúu máa Jesucristo jeē ní nduu tēe. ⁶ Te ni socō yā máa yá ni jihí yā jeē ní chunaa yā cuēchi ndíhi yó. Te ná ni quiji máa quívī ún, te ni quejéé ní canacani jnúhun ún. ⁷ Te jeē siquí yúcuan ní jeni ya ruhū cúu ri apóstol jeē nácani ri jnúhun ya, návāha stéén rī nuū ñáyuu tācá nación jeē tu jíin jnúhun ya, jeē na cándíje i jnúhun ún te sáha i jniñu ndaā. Te siquí jeē cándíje ri Cristo te ndaā cúu jeē cahán rī.

⁸ Núu súcuan te cúní rī jeē ndíhi-ni lugar na cacān tahu tāca tée. Te na cóo ndoo ánuá de jeē ma quití ni de ni ma tejnáhan de. ⁹ Te suni súcuan tācá ñahan, na cási váha ña máa ña nájñuhun cánuú, návāha ma cóo jnúhun canu. Te ma cóndihvī ni ña jeē sáha luu ndasí ña xinī ña, chí jéē cuhun ña siquí oro chí perla chí sahma váha ga. ¹⁰ Chi sa suhva na quéndōo luu ánuá ña jíin jniñu váha sáha ña, nájñuhun cánuú sáha ñahan ndoo ánuá jeē cájejniñu nuū Yaā Dios. ¹¹ Te núu cáhiin ña jíin ñáyuu cascuáha jnúhun ya, te na cúní nahín ña te cuatáhu ña. ¹² Chi tu jéhe ri jnúhun jeē steén ñahan nuū ñáyuu ndutútú, ni jeē ndácu ña jniñu nuū tēe. Chi sa suhva na cúní nahín ña. ¹³ Chi xihna gā Adán ni sáha ya, te sáa te ni sáha ya Eva. ¹⁴ Te tu ní stáhu jexeén Adán, chi sa suhva ni stáhu un ñasíhí de, te ni sáha ña cuēchi. ¹⁵ Te jeē scácu tācá ña sēhe te coo váha ña, te núu na quéndōo ña jíin jnúhun cándíje ña ya, jíin jéē cundáhu ni ña jnáhan ña, jíin jéē cóo ndoo ánuá ña, jíin jéē sáha yíñúhún ña.

Ndese cánuú coo tēe cándiso jniñu nuū ñáyuu cáncandíje

3

¹ Ndaā cúu jnúhun yáha: Núu ñin tēe cúní de condiso jniñu de condito de ñayuu cáncandíje, te váha jniñu ndúcú de sáha de. ² Núu súcuan te tēe ndíso jniñu nuū ñáyuu cáncandíje, cánuú jeē ma cóo ni ñin jeē nihín ñayuu cuēchi siquí de. Te na cóo ñin-ni ñasíhí de, te cájí coo ni de, te ndito coo xiní de, te sáha yíñúhún de. Te cánuú jeē niní cuanúu de vehe nuū ñáyuu cájica, te níni stéén váha de jnúhun ya. ³ Te ma cúu de tēe nájini, te ma tejnáhan de, te ma ndíyo ni de xúhún. Chi sa suhva coo váha ni de, te coo vítá ni de, te ma cutóo ni de siquí xúhun. ⁴ Te cánuú jéē na ndácu váha de jniñu ini vehe de, te sáha de jeē squícu váha sēhe de te coo yíñúhún i nuū de. ⁵ Chi núu ñin tēe tu jíin de ndacu váha de jniñu ini vehe de, ¿te ndese cuu condiso jniñu de nuū ñáyuu cáncandíje nuū Yaā Dios? ⁶ Núu súcuan te tēe ndíso jniñu nuū ñáyuu cáncandíje, ma cúu de tēe jeē saá ní candíje, chi núu súcuan te sanaa te sándúxí de máa de, te inuú-ni cuēchi jeconde siquí de jíin jéxeén. ⁷ Te cánuú cuu de tēe jeē suni nde ñayuu tu cáncandíje, cuajnúhún i de, návāha ma nihín i cuēchi siquí de, te ma cúndeyí jexeén jíin de.

Ndese cánuú coo tēe cájejniñu mēhñu ñáyuu cáncandíje

⁸ Te suni súcuan tēe cájejniñu mēhñu ñáyuu cáncandíje, cánuú jéē na cóo yíñúhún de, te na squícu de jíin jnúhun cáhán de. Te ma cúu de tēe nájini, te ní ma ndíyo ni de xúhún. ⁹ Te na cuñi nihín de jíin jnúhun cáncandíje yó jéē ní yisáhi ndé jenahán, te na cóo ndoo anuá de. ¹⁰ Te cánuú jéē xihna gā coto ndee rō de, te núu ni jini rō jeē tú na cuēchi de, yūcuán na te cuu cuajniñu de mēhñu ñáyuu cáncandíje. ¹¹ Te suni súcuan ñasíhí de jíin náhan ña, cánuú coo yíñúhún ña, te ma sajnúhún ña, te cájí coo ni ña, te squícu váha ña tācá-ni jniñu. ¹² Te tēe cájejniñu mēhñu ñáyuu cáncandíje, na cóo ñin-ni ñasíhí de, te na ndácu váha de jniñu nuū sēhe de jíin núu ñáyuu vehe de. ¹³ Chi tāca tée cájejniñu

vāha mēhñu ñáyuu cá candíje, chi vāha quéndōo yíñuhún de, te níhín de modo jeē cají gá nácani de jñuhun Cristo Jesús jeē cá candíje yó.

Jñuhun sāhi yá jeē cá candíje yó

¹⁴ Te vēsú ñuhun ni rī cuajeē yachī rī coto jnáhan yó, te tée ri jñuhun yáha cuajeē nuū rō, ¹⁵ návāha núu cucuéeé rí, te je jíni rō ndese cánuú sáha vāha ñayuu cácuu sēhe Yaā Dios. Chi máa i cácuu ñayuu cá candíje nuū Yaā Dios, Yaā técu. Te máa i cásáha jeē iyó cutú jñuhun ndaā, chi cáhiin níhin i jíin. ¹⁶ Te jendaā ndije chi jéhnū ndasí cúu jñuhun yáha jeē cá candíje yó, jeē ní yisāhi ndé jenahán: Yaā Dios ni steén yā maá yá, chi ni nduu ya tēe, te Espíritu ni steén jeē iyó ndáa jniñu ni sáha ya, te tācá ndajéhé andiví ní cajito jniñu ní sáha ya. Te ni jitē núu jñuhun ya nuū ñáyuu tācá nación, te ni cacandíje ñayuu ní ñáyiví núu yā, te ni ndaa ya cuanuhun yā andiví.

Siquī ñáyuu cájica yátá nuū jñuhun cá candíje yó

4

¹ Te cájí stéén Espíritu Yaā Dios jeē quiví cuándihí te coo sava ñayuu caca yátá i nuū jñuhun cá candíje yó. Te cuatáhu i tāca jéē cácahān jñuhun stáhu jíin jñuhun ní castéén tachī. ² Chi cuni nahín i jñuhun cástéén tēe cástáhu-ni, jeē tu cácahān ndaā de. Chi tēe un ní cahije ndasí ni de jíin jñuhun stáhu, te tuá sáha jíin ánuá de jeē nácani ni de. ³ Te cahān de jeē cuēchi cúu jeē coo ñasihí tēe, te suni súcuan núu cají ñayuu sava ndeyu. Te ndeyu ún chi ni sáha Yaā Dios jeē cúu ñayuu cá candíje jeē jíni jñuhun ndaā, návāha cají i te nacuatáhu i nuū yā. ⁴ Chi ndihí jeē ni sáha Yaā Dios, iyó váha, te ma squexicó yō ni ññ, chi sa nacuatáhu yó te cají yō. ⁵ Chi jíin jéē cáhu yó jñuhun Yaā Dios jíin jéē nácuatáhu yó nuū yā, te iyó ndoo ndihí-ni.

Tēe jéjñiñu vāha nuū Jesucristo

⁶ Te núu stéén rō jñuhun yáha núu tācá hermano, núu súcuan te cuu ró tēe jéjñiñu vāha nuū Jesucristo, te ije ró jíin jñuhun vāha ya jeē candíje ró, chi ni cutúhva ró te ndíquin rō. ⁷ Te ma quívi nduu rō jíin táca jñuhun jeē cúu cuento-ni jeē cájeni cāhá ni ñayuu. Chi níni na scuáha ró ndese chiñuhún váha ró Yaā Dios. ⁸ Chi jeē scuáha yó ejercicio jeē cóo ndacuī yiquí cúñu yō, jecu-ni níhín jniñu. Te jeē scuáha yó chiñuhún váha yó yá, suu yúcuan cúu jeē váha níhín jniñu siquī tācá-ni, jeē cúu vida yáha jíin vida quiji. ⁹ Te ndaā ndije cúu jñuhun yáha, te jeē cánuú candíje ndihí ñayuu cúu. ¹⁰ Te jeē siquí yáha cúu jeē sájniñu níhin yó síquī jñuhun ya te ndóho yó jéē cácahān ndevāha i nuū yō. Chi ñuhún ni yō jeē coto yó núu maá Yaā Dios, Yaā técu. Te máa yá cúu Yaā jnáma tāca ñáyuu, te ñayuu cá candíje jñuhun cúndáhu ni yā i, máa i cúu jeē jnáma ya.

¹¹ Tāca jñuhun yáha cánuú jéē ndacu ró núu i te stéén rō. ¹² Ma cuáha ro jñuhun jeē kujéē ni ni ññ i nuū rō siquī jeē suchí ró. Chi sa coo ró ññ ejemplo nuū ñáyuu cá candíje, jeē cúni i ndese vāha cáhān rō, ndese vāha sáha ró, ndese cúndáhu ni rō jnáhan ró, ndese cándíje ró, ndese iyó ndoo ánuá rō. ¹³ Te níni ndé ná tu jinū rī nuū rō, te condihvī ni rō jeē cáhu ró tutu i nuū hermano cándutútú, jíin jéē stihví ni rō i, jíin jéē steén rō nuū i. ¹⁴ Ma cúhuun ni rō jíin táhu jeē ni jéhe Yaā Dios nuū rō jeē nácani ró jñuhun ya. Chi tāca tēe jéhnū cándiso jniñu nuū ñáyuu cá candíje, ni casóo de ndaha de xinī rō, te ni sáha Yaā Dios jeē ní cacahān de jeē súcuan condiso jniñu ró.

¹⁵ Núu súcuan te cocuu ró jíin táca jniñu yáha, te condihvī ni rō jíin, návāha cuni tāca ñáyuu jeē váha íje ró cuáhān rō jíin. ¹⁶ Coo cuidado rō jeē caca ndaā rō jíin jéē steén vāha ró jñuhun ya, te cuiñi níhin ró jíin ndihí. Chi núu súcuan sáha ró te quendōo vāha ánuá maá ró jíin ñáyuu chuhun ni jñuhun cáhān rō.

Ndese sáha vāha yó jíin ñáyuu cá candíje

5

¹ Ma cúxeēn rō nuū tāca tée jéhnū, chi sa cahān vāha ró jíin de jeē ma stívi de, nájñūhun cáhán rō jíin tátá rō. Te tāca tée suchí, suni cahān vāha ró jíin de nájñūhun jíin ñani rō.

² Te suni súcuan cahān rō jíin táca ñahan jéhnū, nájñūhun jíin náná rō. Te suni súcuan jíin táca ñahan súchí, nájñūhun jíin cuáha ró, te yíñúhún ndajnūhun ró jíin ña.

³ Te ñayuu cácadíje na cuáha i jeē jíni ñúhún ñahan ni caquendōo ndáhú, te núu ni quendōo ndáhú ndije ña jeē tú na ñayuu condito ña. ⁴ Chi ñin ñahan ní quendōo ndáhú, núu íyó séhe ña chí séhe chání ña jeē jévāha, te na cóto máá i ña. Chi cánuú cutūhva i jeē xíhna gā nuū ñáyuu vehe i squícu i coto i. Te na nácoto i náná i tátá i síquī jeē ní cacondito ña i. Chi yāha cúu jniñu vāha jeē núnahan ni Yaā Dios. ⁵ Te ñin ñahan ní quendōo ndáhú ndije jeē máá ñin na ña, ñúhún ni ña jeē máá Yaā Dios condito ya ña, te tu jécuiñī ña jeē jicán tahu ña nduú ñuú. ⁶ Te sa suhva núu máni ndíhvī ni ña síquī tāca jéē cúsiñī ni maá-ni ña, yūcuán na te vēsú técu ña, te nájñūhun je ni jihī ña. ⁷ Jniñu yáha ndacu ró núu ñáyuu, návāha ma cóo cuēchi síquī i. ⁸ Te núu ñin ñayuu tu ndíto i jnāhan vehe i, te víhyá gā ñayuu ini vehe i, núu súcuan te sáha i jniñu jeē tu quíjnāhan jíin jñūhun cándíje yó, te cúu i ñin jeē neé gá vēsú ñáyuu tu cácadíje.

⁹ Te ñahan viuda cuu quívi síhvī ña nuū lista ñayuu jeē cáchindéé ñáhán ró jíin xúhun, te núu je ni jínu ña unī xico cuiyā, te núu ni iyo ñin-ni yī ña. ¹⁰ Te suni cánuú jéē cuajnúhún ñáyuu ña jeē vāha jniñu ni sáha ña, núu jeē ni scuéhnu vāha ña sēhe ña, jíin jéē ní jēhe núu ña vehe nuū ñáyuu cájica, jíin jéē ní jejniñu ña nuū hermano cácadíje, jíin jéē ní chindéé ñáhán ña ñayuu cándoho jñūndóho, jíin jéē ni sáha ña tāca gá jniñu vāha.

¹¹ Te tācá ñahan viuda jeē iyó suchí gá, chi ma soó ró síhvī ña nuū lista. Chi sanaa te nducú ña jeē cúsiñī ni maá-ni ña, te ma cóndíhvī ni ña síquī Cristo, chi cuu ni ña condeca tucu ña tēe. ¹² Te súcuan jecondee cuēchi síquī ña, chi tu ní squícu ña jeē ni jéjnūhun ña ná ni jecosō síhvī ña nuū lista. ¹³ Te suni caca cuu ña tācá-ni vehe te quee cúxí ña. Te nasūu máni jeē cáca cúxí ña, chi suni síquī jeē sajnúhún ña, te quívi nduu ña cahān ña jñūhun jeē tu íyó vāha jeē cahán ña. ¹⁴ Jeē yúcuan cúni rī jeē tācá ñahan viuda jeē iyó suchí, na nándāha ña, te scuéhnu ña sēhe, te coto vāha ña vehe ña, návāha ñayuu cácuu contra ma cúu cahān i síquī ña. ¹⁵ Chi sava ñahan viuda je ni cajica yátá ña te sáha ña jniñu jeē cuní Satanás.

¹⁶ Te núu ñin tēe chí ñin ñahan cándíje, núu íyó ñahan viuda vehe i, te na cóto máá i ña. Te ma cóndee gasto ña síquī grupo ñayuu cácadíje, návāha cuu cuāha vāha i nuū ñahan viuda jeē tu ndé ñin coto ña.

¹⁷ Te tāca tée jéhnū cándito ñayuu cácadíje, na jécunaā doble yāhu de, te núu cándíhvī ni de cástéēn de cánacani vāha de jñūhun ya. ¹⁸ Chi cúu nájñūhun cáhán tutu íi: Ma cánda stíquī caxīn tī trigo, núu ma cuáha ró jéē cáji tī. Te suni cáhán: Tēe jeē sájniñu tátú, jíni ñúhún quiyāhu de, áchí.

¹⁹ Ma cuajnúhún ró te núu jéquin ñayuu cuēchi síquī ñin tēe jéhnū cándito ñayuu cácadíje te núu tu íyó úu chí únī testigo. ²⁰ Te núu cásaña ñayuu cuēchi, te cánuú cúxeēn rō nuū i, jíto jínuú ndíhi ñayuu, návāha na cónso iyo sava ga i. ²¹ Te cáhán níhin ri jíin ró, jíto máá Yaā Dios jíin Jítoho yō Jesucristo jíin táca ndajéhé yā jeē ní nacāji ya: Squícu vāha ró jniñu yáha, te ma sáha ró cuenta ndese cúu ñin ñin i, chi ñnuú-ni sándaā rō síquī ndíhi-ni i. ²² Ma cáni yachī rō ñin tēe jeē condiso jniñu de nuū ñáyuu cácadíje, chi xíhna gā coto ndee rō de. Chi sanaa te stívi de, te cuēchi de suni condee síquī rō jíin de. Te coto ró máá ró jeē ma quívi ró jíin jniñu neé.

²³ Te síquī jeē núu-ni núu-ni cúhú chíji ró, te ma cóho ga rō máni ndute, chi suni coho ró jecu vino.

²⁴ Cuēchi sava ñayuu chi je íyó ndijin nde ná tu quívi i nuū cúndaā cuēchi i. Te cuēchi sava ga i chí cúcuéé te natūu nahín. ²⁵ Te suni súcuan tācá jniñu vāha, chí íyó ndijin. Te vēsú ná tu natūu jniñu vāha ún, te ma cúu quisāhi ní cáni, chí natūu nahín.

6

¹ Tāca ñayuu cácuu mozo, na cóo yíñúhún váha i nuū patrón i, návāha ma cahán neé ñayuu siquī Yaā Dios jíin síquī jnūhun ya jeē castéén yō. ² Te mozo jeē yíhi nuū patrón cá candíje, ma cáni ni i jeē cūhva-ni sáha yíñúhún i nuū de siquī jeē hermano cá candíje cácuu de. Chi sa cuajniñu vāha ga i nuū de, chi tēe cándíje tēe manī i jíin cúu tāca tēe un jēe sájniñu i nuū. Jnūhun yáha stéén rō te stíhvī ni rō i.

Siquī jeē chiñúhún váha yó yá te cusī ni yō jíin cūhva jeē névāha-ni yó

³ Te núu ndé tēe stéén de jnūhun tú ndaā jeē tu quíjnāhan jíin jnūhun vāha ndaā maá Jítoho yō Jesucristo, jíin jnūhun ni steén Yaā Dios jeē cá candíje yó, ⁴ núu súcuan te máni tēe ndúxí tēe tu jécūhun cuiñi ni cúu de. Chi cánéé xínī de, chi máni cúni de tejnāhan de siquī tāca jnūhun stéén de. Te tācá un sáha jeē cá cucuésún ni, jíin jēe cátejnāhan, jíin jēe cácahān ndevāha, jíin jēe cájeni neé ni siquī jnāhan, ⁵ jíin jēe máni cástāhān jnāhan. Súcuan cásaħa tēe jeē ní ndunéé xínī, jeē tu cájini jnūhun ndaā. Te cájeni ni de jeē nihín de cuehē xūhun síquī jnūhun cá candíje de stéén de. Na cújiyo ró núu ñayuu cándāa súcuan. ⁶ Te jendaá jeē yóhyo vāha quéndōo yó te núu chíñúhún váha yó yá, te núu cúsiñi ni yō jíin cūhva jeē névāha-ni yó. ⁷ Chi tú na vé ni cácu yó jíin ñayīvi yáha, ni tú na vé condiso yó quíhīn yō jíin núu na cúu yō. ⁸ Te núu íyó jēe cáji yō jeē cusúcún yó, te na cúsiñi ni yō jíin yúcuan-ni. ⁹ Chi ñayuu jeē cuní cucúcá, chi yachī quívi i cuēchi jeē jíto ndee jexeén i. Te quívi i jíin cuehē jniñu cánéé jniñu stívi jēe ndíyo ni i. Te tācá un sáha jeē tívi ñayuu te jnahnū ndetū i. ¹⁰ Chi jeē ndíyo ni yō xūhún, yūcuan sáha jeē quejéé tāca jniñu neé. Te sava ñayuu jeē ndíyo ni xūhún, ni castóo i jnūhun cá candíje i, te ni canihīn i cuehē ndasí jnúndóho.

Jeē na ndúcu ndéyí yó siquī jnūhun cándíje yó

¹¹ Te rōhó chi tēe jéjñiñu nuū Yaā Dios cúu ró, te cunu ró coto ró tāca cuēchi yáha. Te condiquīn rō jniñu ndaā, te chíñúhún váha ró Yaā Dios, te candíje vāha ró, te cundáhu ni rō jnāhan ró, te cuandeyí ni rō, te coo víta ni rō. ¹² Te nducú ndéyí ró siquī jnūhun cándíje yó yá. Te cuiñi nihín ró jíin jnūhun jeē ni níhīn tahu yō cotecu yō ní cáni. Chi jeē yúcuan cúu jeē ní cana ya rohó, te cáji ní cahān rō jeē vāha cándíje ró yá, jíto jnúu cuehē ñayuu. ¹³ Te cáhán nihín ri jíin ró, jíto máa Yaā Dios, Yaā jeē sáha jeē técu tācá-ni, jíin Jesucristo, Yaā jeē cáji ní cahān yā ni nacani ya jnūhun vāha nuū Poncio Pilato. ¹⁴ Squícu vāha ró jniñu ndácu ya nuū rō, te ma stívi ró sáha ró, návāha ma cahán ñayuu cuēchi siquī rō. Te súcuan sáha ró ní ndé quívi ndíji Jítoho yō Jesucristo. ¹⁵ Chi quíji ndijin yā maá quívi jeē ní jeni Yaā Dios. Te Yaā Dios chí máa ĩn-ni ya cúu Yaā yóhyo ndetū, te jñí ya ndíhi poder. Te cúu ya Rey nuū tāca rey, jíin Jítoho nuū tāca jítoho. ¹⁶ Te máñúhún-ni ya cúu jeē iyó ní cáni. Te ndéé yá ĩn lugar nuū ndí ndaxín, nuū ma cúu quívi yó. Te ni ĩn ñayuu ñayīvi yáha tu ní jíto cuiñi i nuū yā, te ni ma cúu coto i nuū yā. Te ní cáni na cóo yíñúhún yó nuū yā, chí jñí máa yá poder ní cáni. Amén.

¹⁷ Te cahān rō jíin ñayuu cucá ndajniñu ñayīvi yáha, jēe ma cúndúxí i. Te ma ténuu i xūhún i, chí yachī naa ún. Chi sa suhva na ténuu i jeē coo vāha i sáha Yaā Dios, Yaā técu, chí máa yá jēhe cuehē yā tācá-ni jeē cúsiñi ni yō jíin. ¹⁸ Te ndacu ró jniñu nuū i jeē na sáha vāha i, chí jeē sacúcá ndije i máa i cúu jeē sáha i tācá jniñu vāha. Te na cúu i ñayuu vāha ni jeē cuáha i jeē cúu jnāhan i. ¹⁹ Te súcuan caya i cuehē jniñu vāha jeē coo cúcá i nuū yā ní tiempo jeē quíji. Te nihín tahu i cotecu i ní cáni.

Jniñu sándíhi ndácu Pablo nuū Timoteo

²⁰ Te rōhó Timoteo, condito ró tāca jniñu ní chihi ya ndaha ró. Te ma quívi nduu rō jíin tāca jnūhun cáhá-ni, cuenta ñayīvi yáha, jíin tāca jnūhun stáhu jēe cácahān i jeē jnūhun ndíchí ndaá cúu. ²¹ Chi sava ñayuu cándiquīn tāca jnūhun yáha, ni cajica yátá i ni castóo i jnūhun cá candíje i ya.

Te ñúhún ni rī jeē Yaā Dios na sáha ga yā jeē vāha rōhó. Súcuan na cóo. Amén.

CARTA UU JEE NI TEE SAN PABLO APOSTOL NUU TIMOTEO

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū jeē nácani ri jnūhun jeē ni jéjnūhun ya jeē cótecu yō ní cáni siquī jeē yíhi yó ndaha Cristo Jesús. ² Te tée ri carta yáha cuájeē nuū rō Timoteo, chi cúu ro nájñūhun sēhe ri jeē maní rí jíin. Te ñūhun ni rí jeē Tatá yō Yaā Dios jíin Jítóho yō Jesucristo, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo siñ ni rō.

Jeē nácani de jnūhun Cristo

³ Níní tu náā ni rí cacān tahu rí jehē rō nuū Yaā Dios nduú ñuú, te nácuatáhú rí nuū yā jeē siquī rō. Chi nuū maá yá jejníñu ri, nájñūhun ni casáha tāca jíi rí, te íyó ndoo ánuá rí nuū yā. ⁴ Te núcūhun ni rí jeē ni ndáhyū rō ná ni quenda ri cuahān rí. Te cúu ni rí ndacoto jnáhan yó, návāha cusñ ndasí ni rí. ⁵ Te núcūhun ni rí jeē váha ndije cándíje rō Cristo, nájñūhun ni candíje náná jéhnú rō Loida, jíin náná rō Eunice xíhna gā. Te cúcáhnu ni rí jeē suni súcuan cándíje máá rō vijna.

⁶ Te jeē yúcuan nástíhví ni rí rohó jéē na cóndihvī gā ni rō jíin táhū jeē ni jéhe Yaā Dios nuū rō jeē nácani rō jnúhun ya. Te tahū un ní nihīn rō ná ni tee ri ndaha ri xinī rō. ⁷ Chi Espíritu jeē ni jéhe Yaā Dios nuū yō, tu sáha jeē yūhu yó nacani yó jnúhun, chi sa sáha jeē iyó fuerza ini yō, jíin jéē cundáhú ni yō jnáhan yó, jíin jéē ndító íyó xinī yō. ⁸ Núu súcuan te ma cúcanu rō nacani ndaā rō jnūhun máá Jítóho yō. Te suni ma cúcanu rō jeē siquī máá rí jeē íne ri vecāa siquī jnúhun ya. Chi sa cuāha rō jnúhun ndoho rō jíin rí siquī jeē cánacani yó jnúhun jnáma ya yohó, núu ndese ni jéhe Yaā Dios fuerza ini yō. ⁹ Chi ni jnama ya yohó, te ni cana ya yohó jéē coo ndoo ánuá yō cuajníñu yó núu yā. Te tu ní cána ya yohó siquī jeē váha ni sáha yó, chi siquī jeē ní tee ni maá yá jeē cundáhú ni yā yohó jéē yíhi yó ndaha Cristo Jesús. Chi nde ná tu jecōo ñayīví, te je cundáhú ni yā yohó. ¹⁰ Te vijna jeē ní quenda ndijin Jesucristo, Yaā jnáma yóhó, te ni steén cají Yaā Dios jeē cundáhú ni yā yohó. Chi máá Cristo ni snāā yā poder cuehyī jéhni yóhó, chi jíin jnúhun jnáma ya yohó ni steén cají yá nuū yō jeē cótecu yō ní cáni chi ma jnahnú ndetū yō.

¹¹ Te ni jeni Yaā Dios ruhū jeē nácani ri jnūhun ún, te ni tají yá ruhū cúu ri apóstol jeē steén rí nuū ñáyuu tācá nación jeē tu jíin jnúhun ya. ¹² Te siquī un cúu jeē ndóho ri tāca jnúndóho yáha íne ri vecāa. Te tu cúcanu rí, chi jíin rí ndese Yaā cúu Yaā candíje ri, te cúcáhnu ni rí jeē cúu coto ya jniñu jeē ní chihi ya ndaha ri nde vijna te nde quivī ndíji ya.

¹³ Te cuiñi nihīn rō jíin táca jnúhun ya jeē steén ndaā, suu jnúhun jeē ni steén rí nuū rō. Te caca rō jíin jnúhun cándíje yó, te cundáhú ni rō jnáhan rō siquī jeē yíhi rō ndaha Cristo Jesús. ¹⁴ Te condito rō táca jniñu váha jeē ní chihi ya ndaha rō, sáha poder máá Espíritu Santo jeē ndeé ini yō.

¹⁵ Je jíin rō jeē tāca ñáyuu cáyūcu Asia ni castóo i ruhū. Te uū i cúu Figelo jíin Hermógenes. ¹⁶ Te jíicán tahu rí jeē cundáhú ni Jítóho yō ñáyuu vehe Onesíforo, chi cuehē jíinu ni nanihīn ni rí ni sáha de, te tu ní cúcanu de siquī rí jeē ní ine ri vecāa. ¹⁷ Chi sa suhva ná ni quiji de ñuu Roma, te ni nanducú yúcún de ruhū nde ni nanihīn de ruhū. ¹⁸ Te jíicán tahu rí jeē máá Jítóho yō cundáhú ni yā de quivī ndíji ya. Te je jíin váha máá rō ndese yóhyo ni chindéé ñáhán de ruhū ná ni cahīyo ri ñuu Efeso.

Jeē cúu yó nájñūhun soldado vāha nuū Jesucristo

2

¹ Núu súcuan te róhó, séhē mání, na cóo fuerza ni rō siquī jeē yíhi rō ndaha Cristo Jesús te sáha ya jeē váha róhó. ² Te tāca jnúhun jeē ní jini rō ní cahān rí, jíto jíinúu ñáyuu cuehē, jnúhun ún na nástéén rō nuū tēe cásquícu vāha, návāha suni cuu steén tucu máá de nuū sáva ga i.

³ Te róhó na cuándeyí ni rō coto rō jnúndóho, chi cúu rō nájñūhun ñin soldado vāha nuū Jesucristo. ⁴ Ni ñin soldado jeē íin nuū guerra, tu sájñéñu de máá de jíin jniñu máá de,

chi cánuú jeē sāha de máni máá jéē ndácu tēe ní tejníñu de. ⁵ Te suni súcuan tēe cásíquí deporte, ma nihín de premio te núu tú condihví ni de cosíquí váha de máá modo chíjniñu. ⁶ Te tēe sájniñu nihin ñuhun, máá de cúu jeē nihín xihna gā jeē cuáha itu. ⁷ Nacani ni rō síquī jeē cahán rī, te máá Jítóho yō sāha ya jeē jécūhun ni rō síquī ndíhi.

⁸ Te cocuhun ndasí ni rō Jesucristo, Yaā ní quiji yucūn rey David, te ni natecu yā mēhñu ndíyi, nájnūhun cáhán jnūhun jnáma ya yohó jéē nácani rī. ⁹ Te jeē síquí jnūhun un ndóho rī jnūndóho, te nde ni cajihni i ruhū íne rī vecāa nájnūhun ñn tēe ni sāha cuēchi xeēn. Te jnūhun Yaā Dios chi ma cúu cuhni i jeē ma cuité núu. ¹⁰ Núu súcuan te jéndeýí ni rī jító rī tāca jnúndóho yáha síquí jeē cundáhú ni rī ñayuu jeē ní nacāji ya, návāha suni cācu máá i jeē quívi i ndaha Cristo Jesús, te quihñ i nuū cujéñu i ní cáni. ¹¹ Chi ndaā cahán jnūhun yáha:

Núu vēsú na cúu yō jeē síquí yā, te suni cotecu yō jíin yá,

¹² te núu cuandeyí ni yō ndoho yó, te suni ndacu yó jniñu jíin yá.

Te núu ma cuajnúhún yó yā, te suni ma cuajnúhún yá yohó.

¹³ Te vēsú tu squícu vāha yó, te máá yá chi máni squícu ya, chi tu cúu sáfalta yā, chi squícu ya jeē ni cáhān yā.

Tēe sájniñu squícu vāha jíin jnúhun ya

¹⁴ Jnūhun yáha na nástíhví ni rō ñayuu, te cahān nihin ro jíin i, jító máá Jítóho yō, jeē ma téjñáhan i síquī tāca jnúhun sáa-ni. Chi tu ndé jéjniñu cuítí, chi sa stívi ñáyuu jíni sōho. ¹⁵ Te nducú ndéýí ró jeē cuajnúhún Yaā Dios rohó, jéē cúu ró tēe sájniñu squícu vāha jíin jnúhun ya, návāha ma cúcanu rō nuū yā síquī ní ñn, chi vāha nacani ró jnúhun ndaā yā. ¹⁶ Te ma quívi nduu rō jíin táca jnúhun sáa-ni ñayívi yáha, chi suu sāha jeē ndúcuehē gā jniñu néé quívicoo ñayuu cácahān. ¹⁷ Te tāca jnúhun cástéén i chi cúu nájnūhun ñn ndíhyi xeēn jeē sacáhú gá cuahān. Te Himeneo jíin Fileto cúu uū tēe jeē casáha súcuan. ¹⁸ Chi tēe un ní cajica yátá de nuū jnúhun ndaā, te cácahān de jeē jé ni cuu ni canatecu ndíyi. Te súcuan cásaca nuu de xiní sava ñayuu cácañdije. ¹⁹ Te Yaā Dios ni jeni ya ñayuu máá yá, te íyó cutú ndaā i jeē ma cáca yátá i, nájnūhun yósó núu tútu ñi: Je jíni Jítóho yō Yaā Dios tāca ñáyuu jeē yíhi ndaha máá yá. Te suni cáhān: Tāca ñáyuu jeē ndácunehen síhví Cristo, na cújiyo i nuū jniñu néé, áchí.

²⁰ Te ini ñn vehe cáhnu íyó cuéhē cohō, nasūu máni cohō oro cohō plata, chi suni cohō yujnu cohō ñuhun. Te íyó jéē fino te íyó jéē corriente. ²¹ Te núu ñn ñayuu sándoo i máá i jeē quénda i nuū tācá jniñu néé, te cuu i nájnūhun ñn cohō fino. Te coo ndoo coo ñi i nuū Jítóho yō, te nihñ jniñu i ndese cúni máá yá. Te coo tūhva i jeē sāha i tācá jniñu vāha.

²² Núu súcuan te cunu ró coto ró táca jéē tú vāha jeē cándiyo ni tēe suchí. Te condiquñ rō jniñu ndaā, jíin jnúhun cándije ró yá, jíin jnúhun cúndáhú ni, jíin jnúhun coyūcu máni jíin jnáhan. Te súcuan sāha ró ndé jíin táca ñáyuu ndoo ánuá jeē ndácunehen síhví máá Jítóho yō. ²³ Te ma quívi nduu rō jíin táca jnúhun cánéé íi jeē tu íyó cájí, chi je jíni rō jeē sāha jeē tejñáhan ñayuu. ²⁴ Te mozo máá Jítóho yō, tú vāha jeē tejñáhan de, chi sa suhva cánuú jéē coo vāha ni de jíin táca ñáyuu. Te coo vāha ni de stéén de, te cuandeyí ni de jíin i. ²⁵ Te jíin jéē víta ni de te caní ichí de ñayuu nihni ni. Chi sanaa te nacani ni i sāha Yaā Dios, te jecūhun ni i ndese íyó jnúhun ndaā. ²⁶ Te nducájí ni i te cācu i nuū jexeén jeē ní jniñ ún i, chi ni cundeyí jíin i jeē sāha i jeē cuní máá.

Síquī ndese coo ñayuu sāha néé quíví cuándíhi

3

¹ Te suni na jécūhun ni rō jeē quíví cuándíhi te quee quíví coo jnūndóho. ² Chi coo ñayuu jeē chíñúhún máá, te ndiyo ni i xūhún, te sátéýí i máá i, te sándúxí i máá i. Te cahān neé i síquī Yaā Dios, te cuníhni ni i nuū tatá i nuū naná i, te ma nácuatáhú i, te ma chíñúhún i Yaā Dios. ³ Te ma cóo maní i jíin jnáhan i ni ma cundáhú ni i. Te sájnuhún i, te ma cúu casi i tāca jéē ndíyo néé ni i, te yōhyo xeēn coo i, te quití ni i coto i tācá jniñu vāha. ⁴ Te suni nastúu i jnáhan i, te ma yūhú i sāha i cuēchi, te coo ndúxí ndasí i, te nducú

i jeē cúsī ni maá-ni i, te ma nducú i quīvi i nuū Yaā Dios. ⁵ Te sáha-ni i jeē chiñúhún i ya, te casi i nuū poder yā jeē ma sáma modo i.

Ma quívi nduu rō jíin ñáyuu casáha súcuan. ⁶ Chi sava tēe ún quīvi de vehe te stáhú de tǎcá ñahan cánée jée iyó ndasí cuéchi. Te yachī quīvicoo ña jíin táca jnúhun tú ndaā jeē cúsī ni ña jíin. ⁷ Te vésú niní scuáha ña na-ni jnúhun, te tu cúu cuítī jecūhun ni ña jnúhun ndaā yā. ⁸ Te nájnuhun ni casáha tēe tásí Janes jíin Jambres jenahán, jeē ní canducú de casi de nuū Moisés, suni súcuan sáha tēe ún, chi nducú de casi de nuū jnúhun ndaā. Chi coo nee jeē níjnūni de, chi ma candíje ndije de jnúhun cándíje yó. ⁹ Te ma quée jniñu sáha de, chi cuni tǎca ñáyuu jeē tēe cánée xíní cácuu de, nájnuhun ni cajini ñayuu jeē ni íyo néé xíní ndíndúú tēe jeē ní nducú casi nuū Moisés.

*Jniñu sándi*hi ndácu Pablo nuū Timoteo

¹⁰ Te róhó chi je ni cutūhva vāha ró ndese stéén rī, ndese jíca ndaā rī, ndese tēe ni rī sáha ri, ndese cándíje ri yā, ndese née ri paciencia, ndese cúndáhú ni rī jnáhan ri, jíin ndese jéndeyí ni rī. ¹¹ Chi ni cajito xeēn ñayuu ruhū, te ni ndoho ri jnúndóho. Te jíin rō tǎca jée ní ndoho ri ñuu Antioquía, ñuu Iconio, jíin ñuu Listra. Te jíin rō ndese ni cajito xeēn i ruhū. Te máá Jítóho yō ni jnama ya ruhū nuū ndíhi ún. ¹² Chi ndaā cúu jeē tǎca ñáyuu jeē ndíhvī ni cuajniñu vāha nuū Cristo Jesús, ndoho i jeē coto xeēn ñayuu i. ¹³ Te ñayuu casáha jniñu néé jíin ñáyuu castáhú, chi sa víhyá gā cocuu i jíin jniñu néé, chi stáhú i ñayuu, te suni candíje máá i jnúhun stáhú.

¹⁴ Te róhó chi sa cuiñi níhin ró jíin jée ní cutūhva ró jíin jée ní cucáhnu vāha ni rō. Chi jíin rō ndese ñayuu cúu jeē ní castéén nuū rō. ¹⁵ Chi nde ná lulí ró, te je jíin rō ndese cáhán tutu íi jeē steén nuū rō ndese candíje ró jeē ni jíin Cristo Jesús jehē rō návāha cācu ró. ¹⁶ Te ní tutu íi cúu jnúhun jeē ni cáhān Yaā Dios, te vāha níhin jniñu jeē steén nuū yō, jeē cahán nuū yō, jeē náchuhun ichí yóhó, jíin jée scuéhnu yóhó jíin jniñu ndaā, ¹⁷ návāha tēe cánejniñu nuū Yaā Dios, ije ni de te coo tūhva vāha de sáha de tǎca jniñu vāha.

4

¹ Te cáhán rī jíin ró, jíto Yaā Dios jíin Jítóho yō Jesucristo, Yaā quiji ndacu jniñu, te sándaā yā jniñu ñayuu cátecu jíin ñáyuu ní cajihí. ² Cáhán níhin ri jeē na nácani ró jnúhun ya, te stíhvī ni rō i candíje i. Te níiní sáha ró súcuan núu núne i chí vésú tu núne i. Te sáha ró jée na jécūhun ni i, te cahān rō nuū i, te caní ichí váha ró i, te jíin cuéhē paciencia steén rō nuū i. ³ Chi quee tiempo jeē ma cuájnuhún cuítī ñayuu jnúhun ya jeē steén ndaā vāha, chi sa cuajnúhún i jnúhun cúsī ni maá i, te nducú i cuéhē maestro jeē steén nuū i máni jnúhun jeē nújnahan ni i cuni nahín i. ⁴ Te cujiyo i nuū jnúhun ndaā, te condíhvī ni i tǎca jnúhun jeē maá cuento-ni cúu. ⁵ Te róhó chi níiní coo ndito ni rō, te cuandeyí ni rō jíin jnúndóho, te condíhvī ni rō nacani ró jnúhun jnáma ya yohó, te squícu vāha ró jíin jniñu ya jeē sáha ró.

⁶ Te ruhū chi je ni socō rī maá rí jeē cúu rī, te je cuacuyajni quívi cuu rī. ⁷ Te je ni cundeyí rí jeē ní nducú ndeyí rí siquí jniñu vāha, te je ni jínu ni jíca rí ñayívi yáha, te tu ní siáá rí jnúhun cándíje ri yā. ⁸ Te vijna je íyó tūhva premio jeē níhin rí siquí jeē ní jíca ndaā rí. Chi Jítóho yō cuāha ya un núu rí maá quívi sándaā yā jniñu, chi máá yá cúu juez ndaā. Te nasūu núu maá ñn ruhū cuāha ya, chi suni cuāha ya nuū tǎca ñáyuu jeē cúu ni i jeē ndíji ya chi maní i jíin yá.

Jeē cána Pablo quiji Timoteo nuū de

⁹ Nducú ndeyí ró quiji yachī rō nuū rī. ¹⁰ Chi Demas ni stóo de ruhū, chi ndíyo ni de ndajniñu ñayívi yáha, te cuahān de ñuu Tesalónica. Te Crescente chi cuahān de Galacia, te Tito cuahān de Dalmacia. ¹¹ Te máá ñn na Lucas íne jíin rí. Te jeē quíji ró, te condeca ró Marcos quiji ró jíin de, chi vāha cuajniñu de jeē chindée ñahán de ruhū jíin jniñu ya. ¹² Tíquico ni tají rí de cuahān de ñuu Efeso. ¹³ Te jeē quíji ró, te condaha ró cotón jeē ni stóo ri vehe Carpo ñuu Troas. Te suni condaha ró tǎca libro, te jeē cánuú gá cúu tǎca tutu ní tee máá rí.

¹⁴ Alejandro, tēe cúu herrero, yōhyo xeēn ni sáha de jíin rí. Te máá Jítóho yō cuāha ya yāhu de jeē súcuan ní sáha de. ¹⁵ Te condito ró máá ró nuū de, chi yōhyo ni cuu de contra siquī jnúhun cástéén yó.

¹⁶ Te ná ni ine ri jeē xíhna ñúhún nuū tāca tóhō, te tú ni ñn tēe ní índichi jíin rí, chi ndíhi de ni castóo de ruhū. Te ñúhun ni rī jeē Yaā Dios cone cáhnu ni yā nuū de. ¹⁷ Te vēsú súcuan te máá Jítóho yō ni chindéé ñáhán yá ruhū, te ni jēhe ya fuerza ini rī, te súcuan ni sínu ri ni nacani ndíhi ri jnúhun jnáma ya yohó, ni cajini nahín ñáyuu tācá nación tu jíin jnúhun ya. Súcuan ni jnama Jítóho yō ruhū nuū tāca tēe xeēn. ¹⁸ Te jnama ga yā ruhū nuū tācá jniñu néé, te condito ya ruhū nde quívi ri andívi núū ndácu ya jniñu. Te na cáhán yō jeē yóhyo luu cújéhnu ya níí cáni. Amén.

Saludo jíin bendición jeē sándíhí

¹⁹ Te cahān rō jeē sándeyí ni Prisca jíin Aquila, jíin ñáyuu vehe Onesíforo, achí rí. ²⁰ Erasto ni quendōo de ñuu Corinto. Te ni quendōo Trófimo ñuu Mileto, te cúhú de. ²¹ Te condíhvī ni rō quiji ró nde ná tu quejéé vico míjin. Sándeyí ni rō, achí Eubulo jíin Pudente jíin Lino jíin Claudia jíin táca gá hermano.

²² Te ñúhun ni rī jeē maá Jítóho yō Jesucristo na cóo ya jíin ró, te Yaā Dios sáha ga yā jeē váha róhó jíjnáhan ró. Súcuan na cóo. Amén.

CARTA JEE NI TEE SAN PABLO APOSTOL NUU TITO

¹ Máá rí cúu Pablo, mozo Yaā Dios jíin apóstol Jesucristo, chi ni tají Yaā Dios ruhū jeē scándíje ri ñayuu ní nacāji ya, návāha jecūhun ni i jnūhun ndaā yā jeē candíje yó, ² te cocuhun ni i jeē cótecu i nńí cáni. Chi nde ná tu jecōo ñayívi te ni jejnūhun Yaā Dios jeē cótecu yō, te íyó ndaā jnūhun ni cahān yā. ³ Te vijna jeē ní quee tiempo ni jeni ya, te stéén cají yá jnūhun ya nuū yō. Te ni tejníñu ya ruhū ni ndacu ya jniñu jeē nácani ri jnūhun ya ún. Chi Yaā jnáma yóhó cúu ya. ⁴ Te tée ri carta yáha cuájeē nuū rō Tito, chi nájñuhun sēhe ri cúu ndije ró síquī jeē ínuú-ni cándíje yó yá. Te ñúhun ni rī jeē Tatá yō Yaā Dios jíin Jítóho yō Jesucristo, Yaā jnáma yóhó, na sáha ga yā jeē váha róhó, te cundáhú ni yā rohó, te sáha ya jeē coo ndeyí coo sīñ ni rō.

Jniñu ya jeē ni sáha Tito nde isla Creta

⁵ Te ni stóo ri rohó ndé isla Creta, návāha sándaā rō síquī jniñu jeē cúmani gā cundaā, te caní ró táca tée jéhu condito ñayuu cáncandíje tēcá ñuu, nájñuhun ni ndacu ri jniñu nuū rō. ⁶ Te tée jéhu un cánuú jeē ma cóo ni ññ jeē nihín ñayuu cuēchi síquī de. Te cánuú coo ññ-ni ñasíhí de. Te sēhe de cánuú cuu i sūchi cáncandíje jeē ma nihín ñayuu cuēchi síquī i jeē tu sáha vāha i chí jéē níhni ni i nuū de. ⁷ Chi tée cáncandíje jeē ma níhni ñayuu cáncandíje, cánuú caca ndaā de chi cáncandíje jniñu de síquī jniñu Yaā Dios. Te ma satéyí de máá de, ma quití yachí ni de, ma cúu de tée nájini, ma cuajnáhan de, te ma ndíyo ni de xūhún. ⁸ Chi sa cánuú jéē níni cuāha núu de vehe nuū ñayuu cáncandíje, te níni sáha de jniñu váha, te ndito coo xiní de, te coo de tée ndaā, te coo ndoo ánuá de, te casi de modo jeē cuní maá de. ⁹ Te cánuú cuiñi níhin de jíin jnúhun ndaā jeē ni scuáha de, návāha cuu stíhví ni de ñayuu jíin táca jnúhun ndaā vāha, te suni cuu sáha de jeē jecūhun ni ñayuu cáncandíje, te casi i yuhu i.

¹⁰ Chi íyó cuéhē ñayuu níhni ni, te cástéén i inga modo jéni ni maá i jeē súcuan cācu ñayuu, te stáhú i ñayuu. Te jnáhan yó hebreo cúu jeē vihyá gā casáha súcuan. ¹¹ Te cánuú jéē casi rō yuhu táca tée ún, chi cástéén de jnūhun jeē tu íyó váha stéén de, chi cuní de níhni de xūhun síquī ún. Te súcuan sáca nuu de xiní ndíhi ñayuu tēcá vehe.

¹² Te ññ tée isla Creta jeē nácani jnūhun, ni cahān de síquī jnáhan ñuu de: Jnáhan yó ñayuu Creta, chi máni ñayuu stahú cácuu i, te nájñuhun quití xéén casáha i, te máni ndíhví ni i caji cuéhē i, te cúxí i, áchí de. ¹³ Te ndaā cúu jnūhun ni cahān tée ún. Jeē yúcuan na cúxeēn rō nuū i, návāha ndaā vāha na cáncandíje i. ¹⁴ Te ma sáha i cuenta táca jnúhun ni catava jnáhan yó hebreo, jeē maá cuento-ni cúu, ni ma síquī i jniñu cáncandíje tée ni quendacoo nuū jnúhun ndaā.

¹⁵ Te ñayuu jeē ní ndundoo jeē níjnūní, máni modo iyó ndoo íyó váha jéni ni i jíto i tēcá-ni. Te ñayuu tu cáncandíje jeē tu ní ndundoo jeē níjnūní, máni jéni ni i ññ modo tú ndoo tú vāha síquī táca jéē jíto i. Chi nde jeē níjnūní i jíin ánuá i íyó jnéhén. ¹⁶ Te vésú cáncandíje i jeē jíni i Yaā Dios, te jíin jniñu casáha i te jíni yō jeē tú ndije i. Chi ñayuu ndevāha ñayuu níhni ni cácuu i, te tu cúu sáha i ni ññ jniñu váha.

Jnūhun ya jeē steén ndaā vāha

2

¹ Te máá ró chi níni na cáhán rō táca jnúhun jeē quijnáhan jíin jnúhun ya jeē steén ndaā vāha. ² Te cahān rō jíin táca tée jéhu jeē na cóo cají ni de, te sáha yíñúhún de, te ndito coo xiní de, te candíje níhin de jnūhun cundáhú ni yā de, te cundáhú ni de jnáhan de, te cuandeyí ni de. ³ Te suni súcuan tēcá ñahan jéhu, na sáha yíñúhún ña, te ma sajnúhún ña, te ma nájini ña. Te na stéén ña táca jéē váha. ⁴ Te na stéén ña nuū tēcá ñahan súchí jéē coo maní ña jíin yí ña jíin séhe ña. ⁵ Te ndito coo xiní ña, te coo ndoo ánuá ña, te coto vāha ña jniñu vehe ña, te coo vāha ni ña, te cuatáhú ña nuū yí ña, návāha ma cahán neé ñayuu síquī jnúhun Yaā Dios.

⁶ Te suni súcuan st̄hví ni rō tāca tēe suchí jeē ndito na cóo xinī de. ⁷ Te rōhó, cuu rō ñn ejemplo nuū de jeē sāha ró tāca jniñu váha. Te jeē steén rō nuū de te ndaā steén rō te coo ndije ni rō. ⁸ Te ndaā vāha steén rō, návāha ma cúu cahān ñayuu siquī. Te súcuan te cucanu ñayuu cácuu contra, chi ma cúu cahān i ni ñn cuēchi siquī rō.

⁹ Te cahān rō jíin ñáyuu cácuu mozo jeē na cuátáhú i nuū patrón i, te na sāha i tācá jniñu jeē nújnahan ni de, te ma cahán maá i núu ndácu de jniñu nuū i. ¹⁰ Te ma sacuíhná i ndajniñu de, chi na cúu i ñayuu ndaā ndije, návāha jíin táca jniñu jeē sāha i, te cuni tāca ñáyuu jeē yóhoyo luu cúu jnūhun jeē steén siquī Yaā Dios, Yaā jnáma yóhó.

¹¹ Chi vijna je ni steén Yaā Dios ndese sāha ya jeē váha ñayuu, chi cúní yā jnama ya ndíhi ñayuu ñayíví. ¹² Te jnūhun jeē váha ni yā jíin yó, suu steén nuū yō jeē na síáá yō jniñu néé jíin táca jéē ndíyo néé ni yō. Te ndito na cóo xinī yō ini ñayíví yáha, te caca ndaā yō, te chiñúhún váha yó Yaā Dios. ¹³ Te suni steén nuū yō jeē cocuhun ni yō jeē quéndōo ndetū yō jeē quíji máá quíví jéhnú jeē quéndá ndijin Yaā Dios, Yaā cujéhnú ndasí, suu Jesucristo, Yaā jnáma yóhó. ¹⁴ Chi ni socō yā maá yá jehē yō, návāha jnama ya yohó núu táca jniñu néé, te sándoo ndíhi ya anuá yō jeē cuu yó ñáyuu maá yá, te condíhvī ni yō sāha yó jniñu váha.

¹⁵ Tāca jnūhun yáha cánuú steén rō, te st̄hví ni rō i, te cahān rō nuū i, chi súcuan ndíso jniñu ró. Te ma cuáha ro jnūhun jeē sajéē ni ni ñn i nuū rō.

Ndese cánuú sāha ñayuu cácandíje

3

¹ Te na nást̄hví ni rō i jeē cuatáhú váha i nuū tēe cácujehnú jíin tēe cándiso jniñu ñuu. Te na squícu i jniñu cándacu de, te coo ñamā ni i sāha i tācá jniñu váha. ² Te ma cahán neé i siquī ni ñn ñayuu, te coyūcu mání i jíin ñáyuu, te coo vāha ni i, te coo vītá ni i jíin ndíhi ñayuu.

³ Chi máá yó suni ni cuu yó ñáyuu canéé jeē tu jécūhun ni nde saá, te ni cacuníhni ni yō nuū Yaā Dios. Te ni cacandíje yó táca jnūhun tú ndaā, te ni cajejniñu sáa-ni yó núu tāca jéē ní ndiyo néé ni yō jíin na-ni jniñu ni cusī ni yō. Te ni cajica yó jíin jniñu néé jíin jnūhun cuésún ni. Chi ni cajito uhū ñayuu yohó, te ni cajito uhū yō i. ⁴ Yūcuán na te Yaā Dios, Yaā jnáma yóhó, ní steén yā jeē váha ni yā te cúndáhú ni yā ndíhi ñayuu ñayíví. ⁵ Te ni jnama ya yohó, te tú na jniñu váha ní cásáha yó jéē jnáma ya yohó, chi sa siquī jeē ní cundáhú ni yā yohó. Chi ni nacate ya anuá yō, te súcuan ni nacacu jeé yó, te ni ndujeé yó ni sāha ya jíin máá Espíritu Santo. ⁶ Te yóhoyo ni cunuú Espíritu Santo ini anuá yō, jeē ni sāha Yaā Dios jeē jíin Jesucristo, Yaā jnáma yóhó. ⁷ Te súcuan te ni ndahva yā cuēchi yó síquī jeē váha ni yā, te nihīn tahu yō cotecu yō ní cáni, nájñūhun ñūhun ni yō.

⁸ Ndaā cúu jnūhun yáha, te cúní rī jeē niní cáhān nīhin ro táca jnūhun yáha, návāha ñayuu cácandíje Yaā Dios, na condíhvī ni i cocuu i jíin jniñu váha. Chi íyó váha tāca jéē yáha, te níhín jniñu jeē quéndōo vāha ánuá ndíhi ñayuu. ⁹ Te ma quíví nduu rō jíin táca jnūhun cánéé íi, jíin jnūhun siquī ndese vēji tāca jíi yō, jíin táca jnūhun sāha jeē cátejñáhan i cácahān i jeē cánuú squícu yó ley Moisés. Chi máni jnūhun cāhá-ni jeē tu níhín jniñu cúu.

¹⁰ Te núu íyó ñáyuu jeē sāha jeē ndusín ini ñayuu cácandíje, te cahān rō nuū i ñn uū jínu, te núu ma chúhun ni i, te quenehen ró i. ¹¹ Chi jíin rō jeē ñn ñayuu sāha súcuan, st̄ví ndasí i chi jíin i jeē tú vāha sāha i, te jeē yúcuan jécondée cuēchi siquī i.

Jeē cána Pablo quiji Tito nuū de

¹² Te jeē tají rí Artemas chí Tíquico cuajeē de, yūcuán na te nducú ndéyí ró quiji ró núu rī ñuu Nicópolis, chi je ni cundaā ni rī jeē yúcuan condee rī tiempo mijin. ¹³ Te condíhvī ni rō chindéé ñáhán ró Zenas, tēe cúu abogado, te suni súcuan Apolos. Chi cuáha ró jéē jíni ñúhún de jeē quíngoo ga de ichi nuū quihín de. Te coto ró jéē ma cúmaní ni ñn nuū de. ¹⁴ Te ñayuu cáhiin jíin yó, cánuú cutūhva i sāha i tācá jniñu váha, te chindéé ñáhán i ñayuu cúmaní nuū, návāha ma cótecu saá-ni i.

Saludo jín bendición jeē sándhí

¹⁵ Tāca ñáyuu cáyūcu jín rí yáha, cácahān i jeē sándeyí ni rō. Te cahān rō jeē achí rí jeē sándeyí ni ñayuu jīñā jeē maní yō jín síquī jeē cácaandíje yó. Te ñúhun ni rī jeē na sáha ga Yaā Dios jeē váha róhó jíjnáhan ró. Súcuan na cóo. Amén.

CARTA JEE NI TEE SAN PABLO APOSTOL NUU FILEMON

¹ Máá rí cúu Pablo, te íne ri vecāa jeē siquí jnúhun Cristo Jesús. Te jíin hermano yō Timoteo cátee ri carta yáha cuájeē nuū rō Filemón. Chi cúu ró tée jeē cáhiyo maní rī jíin, chi chindéé ñájnáhan ró jíin rí siquí jníñu Yaā Dios. ² Te suni cátee ri carta yáha nuū ñáyyuu cácdíje cándutútú ini vehe ró, te suni nuū hermana yō Apia, jíin núu Arquipo, tēe chindéé ñájnáhan jíin yó siquí jníñu cánducú ndéyí yó jíin. ³ Te cáñuhun ni rī jeē Tatá yō Yaā Dios jíin Jítóho yō Jesucristo, na sáha ga yā jeē váha róhó jíjnáhan ró, te sáha ya jeē coo ndeyí coo sī ni rō.

Tēe cúndáhú ni te cándíje vāha cúu Filemón

⁴ Te jeē jicán tahú rī nuū Yaā Dios te tu náa ni rī cacān tahú rī jehē rō, te níní nácuatáhú rí nuū yā jeē siquí rō. ⁵ Chi níhín rī jnúhun jeē váha cándíje ró jnúhun cúndáhú ni Jítóho yō Jesús rohó, te cúndáhú ni rō tāca ñáyyuu yíhi ndaha Yaā Dios. ⁶ Te jicán tahú rī jeē ñáyyuu ni cacandíje siquí jeē candíje máá ró, na jécūhun vāha ga ni i siquí tāca jēē váha jeē sáha ya yohó jeē jíin Cristo Jesús. ⁷ Chi cúsiñ ndasí ni rī te íyó ndeyí ni rī, hermano, siquí jeē cúndáhú ni rō ñáyyuu cácdíje. Chi máá ró ni sáha jeē ní ndusiñ ni i.

Jeē jicán Pablo ñn favor jehē Onésimo

⁸ Núu súcuan te cáhán ndahú rí jíin ró, vēsú cuu ndacu ri nuū rō ndese cánuú sáha ró, chi cúu ri apóstol Cristo. ⁹ Te tuú chi sa cáhán ndahú rí jíin ró siquí jeē cáhiyo maní yō. Te cúndáhú ni rō ruhū sáha ró jēē cuní ruhū Pablo, chi je jéhnú ri, te íne ri vecāa jeē siquí jnúhun Cristo Jesús. ¹⁰ Te cáhán ndahú rí jíin ró jehē mozo rō Onésimo jeē ní jeen ró te ni jinu. Te vijna te cúu i nájnūhun sēhe ri, chi ni scándíje ri i ini vecāa yāhá.

¹¹ Te nde saá chi tu ní cúu i mozo squícu nuū rō, chi ni jinu i. Te nde vijna chi vāha cuajníñu i nuū rō jíin núu rī. ¹² Te nátají rí i najeē i nuū rō. Núu súcuan te cahān vāha ró jíin i, te sáha ró cuenta jeē nájnūhun máá rí ni najinū, chi yōhyo maní rī jíin i. ¹³ Te cusī ni rī núu jeē na cúu quendō i jíin rí yāhá, návāha cuajníñu i nuū rī lugar maá ró níní jēē íne ri vecāa jeē siquí jnúhun vāha ya. ¹⁴ Te tu ní cuní rī sáha ri súcuan, chí nde cuāha máá ró jnúhun. Chi nasūu jēē safuerza rī rohó, chi jeē váha ni rō te sáha ró favor jíin rí, nájnūhun cúsiñ ni maá ró. ¹⁵ Chi sanaa te jeē siquí yáha cúu jeē ní jinu i ni cujiyo i nuū rō jecu-ni tiempo, suu návāha ví quendō i jíin ró sáha Yaā Dios. ¹⁶ Te vijna tuá cúu i ñn mozo jeē ní jeen ró, chi ni nduu i ñn jeē váha ga, suu ñn hermano jeē maní rō jíin. Te ruhū chí yōhyo maní rī jíin i, te nagā ni cuu máá ró jeē ma cóo maní rō jíin i. Te nasūu jēē maní rō jíin ñn tēe súcuan-ni, chí siquí jeē cúu i ñn hermano jeē candíje nuū Jítóho yō.

¹⁷ Te núu sáha ró cuenta jeē ruhū cúu jnáhan ró cándíje, núu súcuan te cahān vāha ró jíin i jeē jinú i nuū rō, nájnūhun jeē ruhū cahān rō jíin. ¹⁸ Núu na-ni falta ni sáha i nuū rō, chí núu táu i nuū rō, te cacān rō chunaa maá rí. ¹⁹ Ruhū Pablo, jíin ndaha máá rí tēe ri yāha jēē maá rí nachunaa. Súcuan cáhán rī vēsú cuu cahān rī jeē sa máá ró táu nuū rī sáha ró jēē cúsiñ ni rī siquí jeē ni scándíje ri rohó te ni cācu ánuá rō. ²⁰ Núu súcuan, hermano, sáha ró favor yáha jíin rí siquí jeē candíje ró Jítóho yō. Sáha ró jēē ndusiñ ni rī, siquí jeē cúu ró hermano candíje Cristo.

²¹ Te tēe ri yáha núu rō, chí cúcáhnú vāha ni rī jeē cuatáhú ró, te nde vihyá gā sáha ró vēsú jeē ni jicān rī. ²² Te suni jicān rī jeē sátūhva ró núu cóndee rī, chí ñúhun ni rī jeē quénda ri yāhá te jeē rī nuū rō sáha Yaā Dios siquí jeē cájicān tahú rō jehē rī.

Saludo jíin bendición jeē sándíhí

²³ Epafras, tēe íne jíin rí vecāa jeē siquí jnúhun Cristo Jesús, cáhán de jeē sándeeyí ni rō. ²⁴ Te suni súcuan cácahān Marcos, jíin Aristarco, jíin Demas, jíin Lucas, tēe cáchindéé ñájnáhan jíin rí siquí jníñu ya.

²⁵ Te ñúhun ni rī jeē Jítóho yō Jesucristo na sáha ga yā jeē váha róhó jíjnáhan ró. Súcuan na cóo. Amén.

CARTA JEE CUAHAN NUU ÑAYUU HEBREO

Jeē ní tají Yaā Dios Sēhe ya ni nacani ya jnūhun

¹ Tijní jínu te tijní modo ni cahān Yaā Dios jín táca jíí yō nde jenahán, chi ni tají yá tēe ni canacani jnūhun ya. ² Te vijna te tiempo cuándihí yāha ní tají yá maá Sēhe ya ni nacani ya jnūhun nuū yō. Te jín Sēhe ya ni sáha ya ñayīvi jín táca gá, te ndiví jeē iyó ní chihi ya ndaha Sēhe ya. ³ Te Sēhe ya yōhyo luu cújéhnú ya, nájñūhun luu cújéhnú maá yá. Te ndihí ndese cúu maá yá, suni súcuan cúu Sēhe ya. Te jín poder jnūhun ni cahān Sēhe ya te iyó cutú ndihí-ni. Te ni sándoo ya yohó táca cuéchi yó, te sáa te ni cucōo ya lado váha mesa maá Yaā cujéhnú nde andiví.

Jeē cujéhnú ga Sēhe Yaā Dios vēsú tācá ndajéhé yā

⁴ Te ni ndujéhnú ndasí gá Sēhe ya vēsú tācá ndajéhé andiví, chi ni nihīn yā tahū jeē ndiso ya jniñu jéhnú ndasí gá vēsú jniñu cándiso ndajéhé. ⁵ Chi súcuan ni cahān Yaā Dios jín Sēhe ya, te nasūu jín ndajéhé yā:

Máa ró cúu Sēhe ri,
te vijna te ni sajehnú ri rohó jéē cúu ri Tatá rō.
Te suni ni cahān yā jnūhun Sēhe ya, te nasūu jnúhun ndajéhé yā:

Máa rí cúu Tátá nuū Sēhe ri,
te máa i cúu Sēhe nuū rī.

⁶ Te suni ná ni tají yá Sēhe ya cujéhnú, ni quiji ini ñayīvi yāha, te ni cahān yā:
Ndhí ndajéhé rī na chíñúhún i Sēhe ri.

⁷ Te ni cahān tucu ya jnūhun ndajéhé yā:
Nájñūhun quée tachí, súcuan cájica ndajéhé rī sáha ri,
te tācá un jéē cájejniñu nuū rī, nájñūhun yáñuhūn cácuu.

⁸ Te jnūhun Sēhe ya chi sa suhva cáhán yā:
Máa ró cúu Yaā Dios, te ndacu ró jniñu ní cáni,
te jniñu ndácu ró, máni jniñu ndaā cúu.

⁹ Cúsī ni rō jín jniñu váha, te jíto uhū rō jniñu néé.
Jeē yúcuan ruhū, Yaā Dios maá ró, ni sáha ri
jeē yóhyo ga cúsī ni rō vēsú tāca gá jeē iyó andiví.

¹⁰ Te suni cáhán yā:
Máa ró cúu Jitoho, te nde xīhna ñúhún ni sáha ró jéē ni jécōo ñayīvi.
Te andiví chi suni jeē ni sáha ró cúu.

¹¹ Te tācá un chi naa, te máa ró chi ní cáni iyó ró.
Te tācá un chi cutúhú nájñūhun cutúhú ñin sahma,

¹² te nacaquin jnahnū rō te nasama ró jíjnáhan.
Te máa ró chi ma sáma cuítí rō,
te quiví cótecu rō ma ndihí cuítí.

¹³ Te súcuan ni cahān tucu yā jín Sēhe ya, te nasūu jín ndajéhé yā:
Cucōo ró lado váha ri nuū cujéhnú ró,

te na sáha ri jeē quende rō poder tāca jéē cájito uhū rohó.

Achí yá. ¹⁴ Te tācá ndajéhé yā chi mozo-ni cácuu, te tájí yá cuangoo jeē chindéé ñáhán ñáyuu jeē nihín tahū jeē jnama ya.

Jeē ma cúhuun ni yō jín jnúhun jnáma ya yohó

2

¹ Núu súcuan te cánú jéē váha ga chuhun ni yō tāca jnúhun ya jeē ní cajini yó, chi núu tuú te sanaa te scuíta yó. ² Chi nde jenahán ní jejniñu ya ndajéhé yā ni cacastūhun jnúhun ya, te ni cajini ñayuu jeē iyó ndáa. Te ñayuu nihni ni jín ñáyuu tu ní cájendetū jnūhun ún, vetū-ni ni canihīn i castigo. ³ Te núu súcuan ni cuu, te yóhó, ¿ndese cācu yó

núu ma chúhun ni yō jnūhun cánuú gá jeē jnáma ya yohó? Chi xihna gā maá Jítóho yō ni nacani ya jnūhun yáha, te sáa te tēe jeē ní cajini nahín ni canacani ndaā tucu máa de nuū yō. ⁴ Te Yaā Dios suni ni chindéé ñáhán yá de jeē ní canacani de jnūhun ya. Chi ni sáha ya jiín de jeē ní casáha de sñin sñin jniñu jéhu jeē nahán náa ni yō jító yó poder yā. Te suni ni jēhe ya Espiritu Santo yā nuū ñin ñin yó, ndese ni nujnahan ni maá yá sáha yó.

Jeē ní nduu Jesús jnáhan ñayuu

⁵ Te Yaā Dios nasūu núu ndajéhé yā ni jēhe ya jnūhun jeē condiso jniñu siquī ñayīvi jéē quíji, chi sa suhva nuū Séhe ya Cristo ni jēhe ya. Te siquī ñayīvi un cúu jeē cahán rī yāhá. ⁶ Chi suhva yósó núu tútu jeē ni cáhān David jiín yá:

¿Na vé cúu ñayuu jeē ñúhun ni ní i?

Te ndíhvī ni ní síquī i, te máa ñáyuu cúu i.

⁷ Chi jecu-ni tiempo ni sáha ní jeē núu i nuū tācá ndajéhé ni.

Yūcuán na te sajéhu ní i te squéndōo yñúhún ní i,

te cani ní i jeē ndacu i jniñu nuū tāca jéē ni sáha ní.

⁸ Te ndíhi jeē iyó chi sáha ní jéē cujéhu i siquī.

Achí tutu. Te jeē ni sáha Yaā Dios jeē cujéhu i siquī ndíhi, núu súcuan te ma quéndōo ni ñin jeē ma cújéhu i siquī. Te vēsú súcuan te vijna te ná tu coto yó jéē cujéhu i siquī ndíhi jeē iyó. ⁹ Te jeē jini yō vijna cúu Jesús, Yaā jeē ní nduu núu jecu-ni tiempo nuū tācá ndajéhé yā. Chi ni ndoho ya jeē ni jíhi yā jehē yō, te jeē yúcuan ní ndujéhu luu tucu ya, te ndíhi cáhiyo yñúhún núu yā. Chi jeē váha ni Yaā Dios jiín yó, jeē yúcuan ní jihī Jesús jehē yō.

¹⁰ Te ndíhi jeē iyó chi cuenta Yaā Dios cúu, chi máa yá ni sáha. Te suni ndéca ya cuehē ndasí séhe ya jeē quihín i andívi núu luu cujéhu i jíin yá. Te váha níhín jniñu jeē ni jēhe ya jnūndóho nuū Jesús, chi jeē ní ndoho ya súcuan te cuu condeca váha ya ñayuu ní jnama ya. ¹¹ Chi Jesús jeē ni sándoo ya i te máa i jeē ní candundoo i, chi ñin-ni Tátá i jíin yá. Te jeē yúcuan tu cúcanu Jesús jeē cahán yā hermano yā jíin i, vēsú ndasí núu i. ¹² Chi yósó núu tútu jeē ni cáhān yā jíin Tátá yā:

Cachi na jnúhun ní núu tācá hermano na,

te mēhñu núu cándutútú i cata ná ndese cújéhu ní.

¹³ Te suni cáhān yā nájñuhun cácahān hermano yā:

Ruhū chi cándíje ri yā.

Te cáhān tucu yā:

Yáha íne ri jíin táca gá séhe Yaā Dios jeē ni jēhe ya nuū rī.

Achí Jesús.

¹⁴ Te nájñuhun cácacu ñayuu jeē cúu i yiqui cúñu, suni súcuan ni cacu Jesús, návāha cuu yā jehē yō. Te súcuan ni snāā yā poder jexeén jeē squívi ñayuu nuū cuéchi te jíhi i. ¹⁵ Te ni cacu ya súcuan návāha cuu quenehen ya tāca ñáyuu chíji jnūhun jeē yuhú i cuu i. Chi ní vida i ndóho i sáha ún. ¹⁶ Te jendaá tu ní quíji ya jeē chindéé ñáhán yá tācá ndajéhé yā, chi sa suhva jeē chindéé ñáhán yá ñayuu cácañíje jeē ní nduu yucūn Abraham. ¹⁷ Jeē yúcuan ní jini ñúhún nduu inuú yá jíin táca hermano yā, návāha cuu ya sutū cujéhu jeē squícu váha ya tācá jniñu jehē i nuū Yaā Dios. Chi ni cundáhú ni yā i, te ni ndahva yā cuéchi i jeē ni sócō yā maá yá jehē i. ¹⁸ Chi suni máa yá ni ndoho ya jeē ní jito ndee jnūndóho ya, te jeē yúcuan cuu chindéé ñáhán yá ñayuu jeē jító ndee jnūndóho i.

Cújéhu ga Jesús vēsú Moisés

3

¹ Hermano, ni cana Yaā Dios rohó, te cácuu ró ñáyuu ndoo máa yá. Núu súcuan te na nácani váha ni rō siquī Cristo Jesús, Yaā cúu apóstol jeē ní tejniñu Yaā Dios, te suni cúu ya sutū cujéhu siquī jnúhun cácañíje yó. ² Chi ni squícu váha ya nuū Yaā Dios, Yaā ní tee jniñu un síquī yā, nájñuhun ni squícu váha Moisés nuū ñáyuu jeē ni cáhān Yaā Dios jeē cácuu i ñayuu vehe ya. ³ Chi cújéhu ndasí gá Jesús vēsú Moisés, nájñuhun cújéhu

ndasí gá tēe sáha vehe nasūu máá vehe. ⁴ Chi tēcá vehe íyó tēe ni sáha. Te máá Yaā Dios cúu jeē ni sáha tāca jēe iyó. ⁵ Te Moisés ni squícu vāha de jíin jniñu jeē ní cuu de mozo ni condito de ñayuu vehe Yaā Dios. Te ni castūhún de siquī tāca jnúhun jeē steén yā tiempo quiji. ⁶ Te Cristo chi sa cúu ya maá Séhe jeē ndácu jniñu nuū ñáyuu vehe Tátá yā, te vāha squícu ya jeē ni jéjnūhun ya nuū i. Te suni máá yó cácuu ñayuu vehe ya, te núu na cuññi nihin yó jíin jnúhun cándíje yó ndé quivī sándihí, te núu cúsi ni yō jeē ñúhun ni yō tāca jēe vāha jeē coo.

Jnúhun jeē ndetātu ñáyuu Yaā Dios

⁷ Núu súcuan te na chúhun ni yō jeē cahán Espíritu Santo nuū tútu i:

Vijna te núu cuni sōho ró jēe cahán Yaā Dios,

⁸ te ma cúnihni ni rō nájnūhun ni cacunihni ni ñayuu jenahán.

Chi tu ní cájendetū i nuū yā ná ni cajica i nuū ñúhun téhé.

⁹ Chi yūcuan ní casáha jíi rō jniñu jeē ni quítī ni rī, achí yá, vēsú ni cajito i tēcá jniñu ni sáha ri uū xico cuiyā.

¹⁰ Jeē yūcuan ní quítī ni rī jíin ñáyuu tiempo un.

Te ni cahán rī jeē máni jeē castóo i ichi ndaā, chi tu cácuu i condiquīn i jnúhun ri.

¹¹ Te jeē yūcuan ní quítī ni rī, te ni cahán teyí rí jeē ma quívicoo cuiiti i nuū ndetátú i sáha ri.

Achí yá.

¹² Núu súcuan hermano, coto má conéé ánuá ni iin ró jēe cáca yátá ró jeē tuá candíje ró Yaā Dios, Yaā técu. ¹³ Chi sa suhva tāca quivī na stíhví jnáhan ni rō, níní gá iyó tiempo, návāha ma cúnihni ni ni iin ró te stáhú róhó sáha ró cuéchi. ¹⁴ Te núu na cuññi nihin yó ndé quivī sándihí jíin jnúhun jeē ní quejéé yó jíin, yūcuán na te cuu yó jnáhan Cristo.

¹⁵ Chi cáhán tutu:

Vijna te núu cuni sōhó ró jēe cahán Yaā Dios,

te ma cúnihni ni rō nájnūhun ni cunihni ni ñayuu jenahán.

Achí. ¹⁶ ¿Te ndé-ni cúu ñayuu jeē ní jini jnúhun ya te ni cunihni ni? Suu ndihí ñayuu jeē ni scácu Moisés jeē ní quendacoo Egipto. ¹⁷ ¿Te ndé-ni cúu ñayuu jeē ni quítī ni yā nuū uū xico cuiyā? Suu ñayuu jeē ní casáha cuéchi, te ni cajihí i nuū ñúhun téhé. ¹⁸ ¿Te ndé-ni i cúu jeē ni cáhán teyí yá jeē ma quívicoo cuiiti i nuū ndetátú i sáha ya? Suu máá ñáyuu jeē tu ní cájendetū nuū yā. ¹⁹ Núu súcuan te jíin yō jeē tu ní cúu quívicoo i nuū ndetátú i, siquī jeē tu ní cáccandíje i ya.

4

¹ Te níní íyó gá jnúhun jeē ni jéjnūhun ya jeē quívicoo ñayuu nuū ndetátú i sáha ya, te na cónso iyo yó jēe ma stívi yó, návāha tú coo jíin sava ró jēe ma nihín rō quivī rō.

² Chi suni máá yó ni cajini sōho yó jnúhun jeē jnáma ya yohó, nájnūhun ñayuu jenahán un. Te nuū máá i tu ní jéjníñu jnúhun ni cajini i ún, siquī jeē tu ní cáccandíje i. ³ Te yóhó jēe cáccandíje, máá yó cúu jeē quívicoo yó núu ndetātu yó. Te siquī ñáyuu tu cáccandíje ni cahán yā suhva:

Jeē yūcuan ní quítī ni rī, te ni cahán teyí rí

jeē ma quívicoo cuiiti i nuū ndetátú i sáha ri.

Te súcuan ni cahán yā vēsú je íyó túhva nuū ndetátú i nde ná ni jecōo ñayiví. ⁴ Chi súcuan yósó jnúhun nuū tútu i siquī quivī uxá:

Ni sínu Yaā Dios tāca jēe ni sáha ya, te ni ndetātu yá quivī uxá.

⁵ Te suni nuū tútu un yósó tucu:

Ma quívicoo cuiiti i nuū ndetátú i sáha ri.

Achí yá. ⁶ Núu súcuan te sava ñayuu chi quívicoo nahín i nuū ndetátú i. Te ñayuu jenahán jēe ní cajini jnúhun jeē jnáma ya i, tu ní quívicoo i siquī jeē tu ní cájendetū i nuū yā. ⁷ Jeē yūcuan ní jeni tucu ya inga quivī jeē quívicoo ñayuu, te quivī un cúu vijna. Chi ná ni

yāha cuehē tiempo jeē ni cāhān yā jíin ñáyuu jenahán, te yósó nuū tútu jeē ni sáha ya jeē suni ni cahān David suhva:

Vijna te núu cuni sōho ró jēē cahán yā,
te ma cúnihni ni rō núu súcuan.

Achí tutu. ⁸ Te nde jenahán ní squívi Josué ñayuu Israel un ñuu nuū ndetātú i. Te tu ní cúu squívi de i nuū ndetātu ánuá i sáha ya. Chi núu súcuan te ma cahán gā Yaā Dios jíin táca ñáyuu jeē vijna cúu quívi jeē quívicoo i nuū ndetātú i. ⁹ Núu súcuan te íyó túhva nahín ñn nuū ndetātu ñáyuu Yaā Dios, nájnūhun ni ndetātu máá yá. ¹⁰ Chi ñayuu jeē quívicoo nuū ndetātú i jíin yá, chi ndetātú i jeē ní casájniñu i, nájnūhun ni ndetātú Yaā Dios nuū jniñu ni sáha máá yá. ¹¹ Núu súcuan te na ndúcú ndéyí yó quívi yó núu ndetātu yó un, te ma sáha ni ñn yó cuéchi jeē ma cándije yó, nájnūhun ni casáha i nde saá.

¹² Chi jnūhun Yaā Dios ndíto técu te íyó poder. Chi cúu nájnūhun ñn espada jeē xeén ndíndúú lado, chi nástúu cáji ndese íyó jēē níjnūní yō jíin ánuá yō, nájnūhun sáha espada jeē jéhnde te nástúu nuū ñujnáhan yiqui jíin meque. Te jnūhun ya nástúu ndíhi ndese jéni ni yō jíin ndese cúní yō sáha yó. ¹³ Te tu íyó ni ñn jeē yísahí jeē tu jíiní maá Yaā jeē náquihin cuenta, chi ndíhi-ni jíiní vāha ya, te ndíhi-ni túu ndijin nuū yā.

Jesús cúu sutū cujéhnu ga

¹⁴ Te cánevāha yó ñn sutū cujéhnu ga, te je ni ndaa ya ni ndívi ya nuū iyó Yaā Dios. Te Jesús Sēhe Yaā Dios cúu ya. Jeē yúcuan na cuíñi níhin yó jíin jnúhun jeē ní cándije yó.

¹⁵ Chi névāha yó ñn sutū cujéhnu jeē jíto ndáhú yóhó jeē tu fuerza yō squícu vāha yó. Chi nájnūhun ndóho yó jēē jíto ndee jexeén yohó, suni súcuan ni ndoho ya jeē ní jito ndee un yá, vésú tú cuítí cuéchi ya. ¹⁶ Núu súcuan te ma yūhu yó, chi na quívi yó yuhu mesa yā, cúu jeē cacān tahú yō. Chi maní yā jíin yó, te cúndáhú ni yā yohó, te siquí jeē vāha ni yā te chíndéé ñáhán yá yohó táca jínu jeē jíiní ñúhún yó.

5

¹ Chi tāca sūtū jeē ní cujéhnu jenahán, ni nacāji Yaā Dios de mēhñu ñáyuu, te ni jeni ya de jeē cuíñi de nuū yā jehē ñayuu, te socō de ndajniñu jíin quítí nuū yā jeē siquí cuéchi i. ² Te cuu cahān vítá de jíin ñáyuu tu jécūhun ni jíin ñáyuu castívi, chi máá de suni tú na fuerza ini de squícu vāha de. ³ Jeē yúcuan cúu jeē suni cánuú sócō de quítí nuū yā jeē siquí cuéchi máá de, nasūu máá-ni jeē siquí cuéchi ñayuu.

⁴ Te ni ñn tēe tu cúu sájéhnu de máá de jeē cuu de sutū cujéhnu, chi sa máá Yaā Dios cúu jeē nacāji ya de, nájnūhun ni nacāji ya Aarón nde jenahán. ⁵ Te suni súcuan Cristo, tu ní sájéhnu ya máá yá jeē cuu ya sutū cujéhnu, chi sa Yaā Dios ni sáha, chi ni cahān yā jnūhun yāha:

Máá ró cúu Sēhe ri,
te vijna te ni saájéhnu ri rohó jēē cúu ri Tatá rō.

⁶ Te suni cāhán tucu ya nuū tútu ñi:

Níí cáni cúu ró sūtū,
nájnūhun sutū Melquisedec jenahán.

⁷ Te Cristo, ná ni condee ya ñayívi, te ni jicān tahú yā, te nde ni ndahyū yā te ni ndahyū cohó yá. Te ni cahān ndahú yá jíin Yaā Dios, Yaā jeē cúu jnama ya jeē ma cúu yā nuú. Te siquí jeē yíñúhún ní chíñúhún yá Yaā Dios, te ni chindéé ñájnañan Yaā Dios jíin yá nuū jnūndóho ún. ⁸ Chi vésú Sēhe Yaā Dios cúu ya, te ni jendetū yā ni ndoho ya ini ñayívi, te súcuan ni jini yā ndese cúu jnūhun jendetū. ⁹ Te ná ni cuu ni squícu ndíhi ya jeē ní jendetū yā, te ni cucutú jnúhun jeē jnama ya táca ñáyuu jendetū nuū yā, te cotecu i níí cáni. ¹⁰ Chi ni jeni Yaā Dios yā jeē cúu ya sutū cujéhnu nájnūhun sutū Melquisedec.

Siquí jeē ma cáca yátá i

¹¹ Te íyó cuéhē jnūhun jeē castūhun rí siquí tāca jēē yāha. Te yíí cúu jeē jécūhun ni rō sáha ri, siquí jeē tu cáconi rō chuhun ni rō. ¹² Te je ni cunahán cácañdije ró, te jíiní ñúhún jēē cúu ró tēe stéén nuú. Te tuú chi sa cájini ñúhún tucu máá ró tēe stéén nuú rō táca jnúhun Yaā Dios jeē tú yíí cuítí. Chi sa ni canduu ró nájnūhun sūchi yíquín jēē jíiní

ñúhún caxin i, chi ná tu ije i caji i jeē ndáva. Súcuan cácuu ró chi ná tu ije ró jíin jnúhun yí gá. ¹³ Chi núu máni máá nájñuhun sūchi yíquín jéxin cácuu ró, núu súcuan te tu cúu jecūhun vāha ni rō jñuhun ndaā. ¹⁴ Te ñayuu jeē jé ni ije, chi cáyeji i jeē ndáva, cúu jeē ní cutūhva vāha i te je cúu nácāji i jeē vāha jíin jéē neé.

6

¹ Núu súcuan te na yāha yó núu tāca jnúhun Cristo jeē tú-ni yí, te na quíhín yō nuū jnúhun yí gá, návāha na íje vāha ni yō jíin jnúhun ya. Te ma ndejéé tucu yó jíin jnúhun jeē ni scuāha yó xíhna gā, suu jñuhun jeē nácani ni yō stóo yo cuéchi yó jéē cúu yō sáha, jíin jéē candíje yó Yaā Dios, ² jíin síquī jeē jéndute, jíin síquī jeē soó ndaha xinī ñáyuu, jíin síquī jeē nátecu ndīyí, jíin síquī jeē jnahnú ndetū ñayuu ní cāni. ³ Núu súcuan te na yāha yó núu tāca jéē yāha te quīvī yó núu jnúhun yí gá, te núu cuāha Yaā Dios jñuhun.

⁴ Chi íyo ñáyuu jeē jé ni jecūhun ni i, te je ni jini i tāca jéē jéhe Yaā Dios, te je ni quīvī i nuū jnúhun stéén Espíritu Santo, ⁵ te suni je ni jini i jñuhun vāha Yaā Dios jíin ndese coo poder yā tiempo quiji. ⁶ Te ñayuu un núu caca yátá i, te ma cúu ga ndejéé jeé i jeē nácani ni i. Chi jeē cáca yátá i cúu nájñuhun jeē nácanni tucu i Sēhe Yaā Dios jicā cruz, te cájehe i jñuhun canu yā cájito ñayuu. ⁷ Te ñayuu chi cácuu i nájñuhun ñuhun jeē cúun vāha saū nuū te ndóyo vāha. Te núu cánecoo jeē vāha caji tēe cásājniñu, yūcuán na te cúsi ni Yaā Dios jíin. ⁸ Te núu máni iñu yóquin jíin yucū sajnéñu cánecoo nuū, núu súcuan te tu jéjñiñu cuiñi, te squéndōo íi yā, te ñin quivī te cayū. Súcuan jnahnū ndetū ñayuu cájica yátá.

Jeē ñuhun ni yō tāca jéē vāha jeē coo

⁹ Te máá ró jijnáhan ró hermano, vēsú cácahān rī súcuan jíin ró, te cácuahnu ni rī jeē cácuu ró ñayuu cuiñi ñihin, chi ñayuu ni jnama ya cácuu ró. ¹⁰ Te Yaā ndaā cúu Yaā Dios, te tu náa ni yā jniñu cásáha ró. Chi síquī jeē cáhīyo manī rō jíin yá te ni cacundáhú ni rō hermano rō cácadíje, te ni cachindéé ñáhán ró i, te súcuan cásáha ró ndé vijna. ¹¹ Te cácuu rī jeē niní súcuan sáha ga ná ñin ná ñin ró ndé quivī sándihí, chi jeē sáha ró súcuan te ñihin rō ndihí jeē cáñuhun ni rō. ¹² Te cácuu rī jeē ma cúhuun ni rō, chi sa ndacu ró ñayuu cácadíje jeē jíin paciencia cándetu i, te jeē yúcuan níhín tahu i tāca jéē ni jéjñuhun ya.

¹³ Chi quivī jeē ni jéjñuhun Yaā Dios nuū Abraham, te ni ndacunehen ya maá yá jeē ni jéjñuhun téyí yá, chi tuá na inga ndacunehen ya jeē cujéhnu ga vēsú maá yá jeē cuu testigo yā. ¹⁴ Te ni cahān yā: Jendaá ndije jeē vāha ndasí sáha ri jíin ró, te sáha ri jeē nducuehē ndasí yúcūn rō, achí yá jíin Abraham. ¹⁵ Te jíin paciencia ni condetu de, te súcuan te ni ñihin de jeē ní jéjñuhun ya. ¹⁶ Te núu cáhán teyí ñáyuu, te ndacunehen i síhví ñin jeē cujéhnu ga vēsú maá i. Te núu íyo ñin jñuhun jeē tu cácadíje jnāhan, te núu ñin tēe cáhán teyí de jíin síhví Yaā Dios, yūcuán na te jécuiñi jeē cátejñáhan. ¹⁷ Te suni súcuan Yaā Dios, chi ni jéjñuhun téyí yá nuū ñáyuu jeē cuāha ya tahu i. Chi ni cuni yā jeē cucáhnu vāha ni i jeē ma nácani yátá ni yā síquī jeē ni jéjñuhun ya nuū i. ¹⁸ Chi ma nácani yátá cuiñi ni yā síquī jnúhun jeē ni cáhān yā uū jínu, ñin jeē ni jéjñuhun ya, te inga jeē ni cáhān teyí tucu ya síquī suni jñuhun ún. Chi tu stáhú cuiñi yā. Te jeē yúcuan máá yó jeē ní tūhva yó yá, chi yōhōyo íyo ndeyí ni yō, te cáñuhun teyí ni yō jeē síquī ya jeē ni cáhān yā. ¹⁹ Te síquī jeē súcuan ñuhun ni yō, te suu sáha jeē quéndōo ñihin ánuá yō jíin jnúhun ya, te quéndōo ndaā ni yō, nájñuhun quéndōo ñihin barco jeē jñí gancho yuū. Te sáha jeē cúu quivī yó andiví núu íi gā, nájñuhun cuarto íi gā jeē ni íyo ichi yátá sahma ni ndita caa ini vehe íi jenahán. ²⁰ Te ini yūcuán chi xíhna gā Jesús ni quivī, návāha nune ya ichi quivícoo yó. Te jeē yúcuan ní cāni cúu ya sutū cujéhnu nájñuhun sutū Melquisedec.

Jeē cúu Jesús sutū nájñuhun Melquisedec

7

¹ Te máá Melquisedec ni cuu de rey ñuu Salem, te ni cuu de sutū nuū Yaā Dios, Yaā cujéhnu téyí. Te ni jéjñahan de Abraham ná ni nandicó Abraham jeē ní cundeyí de ni

cajejnáhan de jíin táca rey. Te ni jicān tahu de jehē Abraham. ² Te tāca úxī ndajniñu jeē ní quende Abraham nuū tāca rey un, ni jēhe de ñin ñin siquī un nuū Melquisedec. Te síhvi Melquisedec cuní cahān: rey jeē sāha jniñu ndaā. Te suni nání de rey Salem, te jnūhun Salem cuní cahān: jeē iyó ndeyí síñ ni. Te jeē yúcuan suni nání de: rey jeē sāha jeē iyó ndeyí síñ ni ñayuu. ³ Te tu cáhán tutu jnūhun tátá de ni náná de ni tāca jíí de. Ni tu cáhán nuū ni cacu de, ni nuū ni jihī de. Chi cúu de nájñūhun Jesús, Sēhe Yaā Dios, chi ñí cáni cúu de sutū.

⁴ Te condēhe jíjnáhan ró náa jéhnū ni cuu Melquisedec, chi jíí jéhnū yó Abraham ni jēhe de ñin ñin siquī tāca jēē uxí nuū de siquī tāca jēē ní quende de nuū rey un. ⁵ Te jíiní yō jeē tāca úxī ndajniñu ni canihīn ñayuu, ni cajēhe i ñin ñin siquī un ní caquihin tēe cácuu sutū yucūn Leví, nájñūhun cáhán ley Moisés. Te ni caquihin de nuū ñáyuu cácuu jnāhan de, chi ñin-ni yucūn Abraham cácuu de jíin i. ⁶ Te Melquisedec nasūu yúcūn Leví cúu de, te vēsú súcuan te ni quihin de ñin ñin siquī tāca jēē uxí nuū Abraham. Te suni ni jicān tahu de jehē Abraham, vēsú cúu Abraham tēe jeē ni jéjnūhun ya nuū. ⁷ Te jíiní vāha yó jēē tēe cújéhnū ga cúu jeē jicān tahu jehē tēe núu ga. ⁸ Te ñayīvi yáha chi tāca sūtū cáquihin de ñin ñin siquī tāca jēē uxí nuū ñáyuu, vēsú cácuu te tēe cájihī. Te Melquisedec suni ni quihin de, te máá de chi cáhán tutu iī jeē técu de. ⁹ Te suni cuu cahān yō jeē Leví, tēe jeē ní quihin ñin ñin siquī tāca jēē uxí nuū ñáyuu, suni nájñūhun nuū maá de ni quihin Melquisedec ñin ñin siquī tāca jēē uxí. Chi jeē ni jēhe Abraham nuū Melquisedec, suu cúu nájñūhun jeē suni ni jēhe de jeē siquī Leví jíin ndihī ga yucūn de jeē quíji. ¹⁰ Chi yucūn Abraham cúu Leví, te vēsú ná tu cacu de quivī jeē ni jéjnahan Melquisedec Abraham, te nájñūhun jeē ni jēhe máá de cúu jeē ni jēhe Abraham.

¹¹ Te yucūn Leví ni cane sutū Aarón jíin táca gá sutū ní quijicoo. Te ni castéén de ley yā nuū ñáyuu Israel jenahán. Te núu ní cúu sāha de jeē quendōo ndaā ñayuu jíin ley un núu, te tuá cánuú jeē núcuññī inga clase sutū lugar Aarón jíin yúcūn de. Te inga clase sutū cúu Cristo jeē cúu ya nájñūhun sutū Melquisedec. ¹² Te núu núcuññī inga clase sutū, te suni cánuú sāma ley siquī yucūn de. ¹³ Núu súcuan te ni sāma ley un, chi cáhán tutu iī jeē Jítóho yō Jesús cúu inga clase sutū ún, te ni cacu ya chíji inga yucūn. Te yucūn ní quiji ya ún, tú ni ñin ní cúu sutū. ¹⁴ Chi jíiní vāha yó jēē chíji yucūn Judá ni cacu Jítóho yō. Te yucūn ún chi tu ní cáhán cuiti Moisés jeē cánecoo sutū.

¹⁵ Te cájí cúu jeē ní núcuññī Cristo jeē cúu ya inga clase sutū nájñūhun sutū Melquisedec. ¹⁶ Te tu cúu ya sutū jeē ní cacu chíji yucūn Leví nájñūhun cáhán ley jenahán. Chi cúu ya sutū siquī jeē ndíso ya poder cotecu yā ñí cáni te ma cúu cuiti yā. ¹⁷ Chi súcuan ni cahān Yaā Dios jnūhun ya:

Ñí cáni cúu ró sūtū,
nájñūhun sutū Melquisedec.

¹⁸ Núu súcuan te jniñu jeē ní ndacu ley jenahán siquī sutū, chi ni naa vijna, chi tu ní níhín jniñu quendōo ñí cáni. ¹⁹ Chi ley Moisés tu ní sāha jeē quendōo ndaā ñayuu. Te ni nihīn yō ñin jnūhun vāha ga jeē ñúhun ni yō jeē ndáhva Cristo cuēchi yó, te súcuan ni cuyajni yó núu Yaā Dios.

²⁰ Te jíin jēē ni cáhán teyí Yaā Dios te cúu Jesús sutū. ²¹ Chi tāca gá tēe ún, nasūu jíin jnūhun jeē ni cáhán teyí yá ní cúu de sutū. Te Jesús chi ni cahān teyí Yaā Dios jeē cuu ya sutū, chi súcuan cáhán tutu:

Ni cahān teyí máá Jítóho yō Yaā Dios, te ma nácani yátá ni yā:

Ñí cáni cúu ró sūtū,
nájñūhun sutū Melquisedec.

Achí yá. ²² Núu súcuan te jíin Jesús ni cucutú ñin contrato vāha ga vēsú ley jenahán. ²³ Te tāca gá sutū ún, chi ni iyó cuehē de, chi siquī jeē cájihī de te tu ní cúu cuññī de ñí cáni.

²⁴ Te Jesús chi cúu ya sutū jeē cuññī ñí cáni, chi técu yā ñí cáni. ²⁵ Jeē yúcuan ndíso jniñu ya jnama ya ñayuu quíjicoo nuū Yaā Dios, cotecu i ñí cáni. Chi ñí cáni técu yā te cáhán yā jehē i jíin Yaā Dios.

²⁶ Núu súcuan te vāha ndasí sutū cujéhnū cúu Jesús, jeē nájñūhun jíni ñúhún yó. Chi sutū iī cúu ya, te tú na cuēchi ya, te íyó ndoo ya, te tu cúu ya jnáhan ñayuu casáha cuēchi, te cujéhnū téyí yá nde nuū sucún gá andiví. ²⁷ Te máá yá tu jíni ñúhún sáha ya nájñūhun ni casáha sutū cácujehnū jenahán, jeē ndiquiví ni casocō de quití siquī cuēchi máá de xihna gā, te sáá te siquī cuēchi ñayuu. Chi ññ jñu-ni ni socō yā máá yá jehē yō, te ni cuu-ni. ²⁸ Chi ni jeni ley Moisés tāca sūtū cujéhnū jeē tú na fuerza squícu vāha. Yūcuán na te cuéé gá te ni cahān teyí Yaā Dios. Te jíni jéē ni cáhān teyí yá, te ni jeni ya Sēhe ya jeē cúu ya sutū cujéhnū, te sutū ndaā sutū vāha cúu ya ñí cáni.

Jeē ndíso jñíñu Cristo siquī ññ contrato jeé

8

¹ Núu súcuan te jñūhun cánuú gá jeē jé ni cahān rī cúu yāhá: Névāha yó ññ sutū cujéhnū nájñūhun ni cahān rī, te ndéé yá lado vāha mesa nuū ndácu jñíñu máá Yaā cujéhnū nde andiví. ² Te vijna te cúu ya sutū nde andiví, jeē cúu ndije lugar iī jeē ni sáha máá Jítóho yō Yaā Dios, nasūu ñayuu. Chi tu cáa nájñūhun vehe iī jenahán jeē ní casáha ñayuu. ³ Te tāca sūtū cujéhnū ni jeconaa de jeē socó de ndajñíñu jíni quití nuū Yaā Dios. Núu súcuan te Jesucristo suni ni jini ñúhún jeē socó yā jeē cúu ya sutū. ⁴ Te núu ní íyo ga yā ini ñayiví, te ni ma quiñáhan jeē cúu ya sutū jíni táca gá sutū, chi níni cásocō gā de quití nájñūhun cáhān ley Moisés. ⁵ Te jñíñu casáha de, tu quíñáhan jíni jéē iyó andiví. Chi cúu ññ muestra-ni jeē steén siquī andiví. Te cúu nájñūhun jeē ni cáhān Yaā Dios jíni Moisés quiví ní quejéé de sáha de vehe iī jenahán: Coto vāha ró jéē sáha ró táca ndajñíñu nájñūhun jíto jeē ni steén rī nuū rō nde xiní yúcu, áchí Yaā Dios jíni de. ⁶ Te vijna te sáha Cristo jñíñu jéhnū ndasí gá vēsú jeē casáha tāca sūtū ún, chi ndíso jñíñu ya siquī contrato jeé jéé yóhyo vāha ga, chi ndíso jñūhun jéhnū ga jeē ni jéjñūhun Yaā Dios.

⁷ Chi contrato ley xihna ñúhún, núu jeē ni sáha jeē quée vāha jñíñu núu, te tuá cánuú jéé cóo contrato uū. ⁸ Chi ñayuu jenahán un jéé tu ní cáquendōo ndaā, suhva ni cahān Yaā Dios jíni i, áchí tutu:

Quiji quiví jeē nasáha ri ññ contrato jeé

jíni ñáyuu Israel jíni ñáyuu Judá, áchí Jítóho yō Yaā Dios.

⁹ Te ma cóo nájñūhun contrato jeē ni sáha ri jíni jí i jenahán,

quiví jeē ní jñí ri ndaha de jíñáhan de,

te ni quenehen ri de ini nación Egipto.

Chi tu ní cásquícu vāha de jíni contrato ley rī.

Jeé yúcuán tuá ni táñúhún rí de, áchí Yaā Dios.

¹⁰ Núu súcuan te suhva coo contrato jeē nasáha ri jíni ñáyuu Israel,

nde na quíji quiví yúcuán, áchí Jítóho yō Yaā Dios:

Sáha ri jeé jécūhun ley rī nuū jeē níjñūní i,

te suni ini anuá i tee ri jñūhun ley rī.

Te cuu ri Yaā Dios máá i,

te máá i cuu ñayuu máá rí.

¹¹ Te tuá jíni ñúhún steén i nuū jnáhan i nuū ñáni i,

návāha cuni i ndese Yaā cúu Jítóho i.

Chi ndíhi i cuni ndese Yaā cúu ri,

nde ñayuu núu ga jíni ndé ñayuu cujéhnū ga.

¹² Chi cone cáhnu ni rī nuū i jeē ní casáha i jñíñu néé,

te ni ma núcūhun ga ni rī cuēchi ni casáha i.

Achí Yaā Dios. ¹³ Te jeē ni cáhān yā jeē cuáha ya ññ contrato jeé cúu jeē ní cachi yā jeé tuá cuajñíñu contrato xihna ñúhún. Te ññ jeē ní cutúhú jéé tuá jeñíñu, chi jíni yō jeé je yajni naa.

Vehe iī ñayiví yáha ní steén ndese cáa andiví

9

¹ Te ndaā chi contrato xīhna ñúhún ní ndacu jniñu ndese chiñúhún i ya, jíin ndese coo ñin vehe ñi ini ñayiví yáha. ² Te ni cuvāha vehe ñi ún, te ni ñyo uū cuarto. Te cuarto xīhna ñúhún jēē naní cuarto ñi, ni ñin candelero oro jíin mesa oro jíin pan ñi. ³ Te ni ñyo sahna jeē ndíta caa jeē ndihyú inga cuarto jeē naní cuarto ñi ndasí gá. ⁴ Te ini un ní ñyo ñin altar oro nuū cayú sūje cútú, jíin yéjnū jeē ñúhun contrato ley, te máni oro cúu ñí síquī yejnú. Te ini yejnū un íne ñin tijehēn oro jeē ñúhun maná jeē ní cuun andiví. Te suni íne vara Aarón jeē ní nane numa, jíin tabla yuū jeē yosó jnúhun contrato ley. ⁵ Te síquī yejnú un ní cahīin ndindúú figura ndajéhé querubín jeē steén jeē íne Yaā Dios. Te ni sáha cuandahū síquī tapa yejnū nuū ni cóso yuyú ñíñi jeē ndáhva cuēchi. Te tu núne yó cáhān gā yō síquī tāca yúcuan vijna.

⁶ Te ná ni jínu tācá un, te núu-ni núu-ni quívicoo sutū ini cuarto xīhna ñúhún jēē casáha de jniñu jeē cúu de sutū. ⁷ Te ini cuarto uū, chí tu cúu quívicoo na-ni sutū jíin inga ñayuu, chí máñúhún-ni sutū kujéhnū ga cúu jeē quíví, te suni ñin-ni vuelta jeē cuiyá. Te suni ma cúu quíví de núu tú ñíñi quití jeē socó de nuū Yaā Dios jeē síquí cuēchi máa de jíin síquī cuēchi ñayuu. ⁸ Te jíin yúcuan steén Espíritu Santo nuū yō jeē ná ni ñyo ga cuarto ñi xīhna ñúhún ini ñayiví, te tu ní núne ichi jeē quíví ñayuu ini lugar ñi ndasí jeē cúu andiví. ⁹ Chi tāca yúcuan cúu jeē ni steén ndese cúu tiempo vijna. Chí jeē ní casocō i ndajniñu jíin quití nuū Yaā Dios, chí tu ní cúu cuití sáha jeē quéndōo ndoo ánuá ñayuu ní casocō ún. ¹⁰ Chi tācá un ní steén máni síquī yiquí cúñu yō, ndese caji yō, ndese coho yó, ndese ndundoo yó. Te ni jejniñu máa-ni nde ni quiji Cristo jíin ñin modo vāha ga.

¹¹ Chi vijna je ni quiji Cristo, te cúu ya sutū kujéhnū ga jeē ndíso jniñu ya síquī tāca jēē vāha jeē ní quiji vijna. Te cúu ya sutū ini lugar ñi nde andiví jēē kujéhnū ga te vāha ga vēsú cuarto ñi jenahán. Te nasūu jēē ní casáha ñayuu cúu, chí nasūu cuenta ñayiví yáha cúu. ¹² Te jeē ni quíví ya ini lugar ñi ndasí gá nde andiví, te nasūu jíin ñíñi ndixúhú ni ñíñi becerro, chí jíin ñíñi máa yá ni quíví ya, ni socō yā ñin jínu-ni jeē ñí cáni. Te súcuan ni jnama ya yohó jēē cótecu yō ñí cáni. ¹³ Chi nde jenahán te ñíñi stíquī jíin ñíñi ndixúhú jíin yāa becerro jeē ni cáyū nuū altar, ni cacosō yuyú de síquī ñayuu jeē tu íyó ndoo ánuá i, te súcuan ni ndundoo i nuū yā. ¹⁴ Te núu ni nihīn jniñu ñíñi tācá quití ún, te nagā ni cuu ñíñi máa Cristo. Chí Yaā ndoo cúu ya, te ni socō yā máa yá nuū Yaā Dios, ni sáha Espíritu jeē iyó ñí cáni. Te ñíñi yā nácate ánuá yō nuū jniñu néé jēē cúu yō sáha. Te súcuan te cuu cuajniñu yó núu Yaā Dios, Yaā técu.

¹⁵ Jeē yúcuan cúu jeē ndíso jniñu ya síquī ñin contrato jeé. Chí ni jihí yā, te súcuan ni quende yā cuēchi ni casáha ñayuu ná ni ñyo i chíji contrato xīhna ñúhún. Te ñayuu jeē cána Yaā Dios i quívicoo i ndaha ya, nihīn i tahū i jeē cóo ñí cáni, nájnūhun ni jejniñun ya. ¹⁶ Chí cúu nájnūhun núu sáha ñin tēe acta jeē cahán síquī tahū, te nde na cúu de te níhín jniñu. ¹⁷ Chí núu técu gā tēe ni sáha, te tu níhín jniñu. Te nde núu ni jihí de, te sáa te jéjniñu. ¹⁸ Te suni súcuan contrato xīhna ñúhún, suni ni jini ñúhún cucutú jíin ñíñi quití ní jihí. Te contrato jeé chí ni cucutú jíin ñíñi Cristo jeē ni jihí yā. ¹⁹ Chí ná ni cuu ni cachi Moisés tācá jniñu ndácu contrato ley un núu ndivii ñayuu, te ni quihin de ñíñi becerro jíin ñíñi ndixúhú jíin ndute, te jíin ixi cácuéhé jíin yúcū hisopo ni cosō yuyú de síquī libro ley jíin síquī ndivii ñayuu. ²⁰ Te ni cahān de: Yāha cúu ñíñi jeē cúcutú contrato ley jeē ní sáha Yaā Dios jíin yó, achí de. ²¹ Te suni ñíñi un ní cosō yuyú de nde máa vehe ñi jíin tāca ndajniñu ni cajejniñu de jeē cáchiñúhún de ya. ²² Te je yajni ndihí ndajniñu, chí cáhān ley un jeē jíni ñúhún ndundoo jíin ñíñi. Te núu ma cáti ñíñi te ma cóne cáhnu ni yā nuū cuēchi núu.

Jeē ni sócō Cristo máa yá jeē quénde yā cuēchi

²³ Núu súcuan te tācá ndajniñu un jēē cácuu muestra tāca jēē iyó andiví, ni jini ñúhún ndundoo jíin ñíñi quití. Te tāca máa jēē iyó andiví, chí ni jini ñúhún ndundoo jíin ñíñi Cristo jeē yóhyo vāha ga. ²⁴ Te Cristo chí tu ní quíví ya ini lugar ñi jeē ní casáha ñayuu, chí ñin muestra-ni ni cuu un jēē steén ndese íyó lugar ñi ndije nde andiví. Chí máa andiví ní quíví ya, te vijna íne ya nuū Yaā Dios jeē cahán yā jehē yō. ²⁵ Te máa sūtū kujéhnū ga

quívi de tāca cuíyā ini cuarto iī gā jeē socó de niñī quiṭi. Te Cristo tu ní sócō yā maá yā cuehē jínu, chi ñn jínu-ni. ²⁶ Chi núu jeē súcuan te cánuú jéē cuehē jínu ndoho ya nde ná ni jecōo ñayīví te nde vijna núu. Te tuú chi sa tiempo cuándihi yāhá ni quenda ndijin yā ñn jínu-ni jeē ní cáni, ni socō yā maá yā jeē ní quende yā cuēchi. ²⁷ Te nájnūhun ni cundaā jeē cúu tāca ñáyuu ñn jínu-ni, yūcuán na te sándaā Yaā Dios jniñu i, ²⁸ suni súcuan Cristo ni jihī yā ñn jínu-ni jeē ní sócō yā maá yā jeē ní quende yā cuēchi cuehē ñayuu. Yūcuán na te ndiji ya inga jínu, te nasūu jéē socó tucu ya maá yā jeē quēnde yā cuēchi, chi sa suhva jeē jnáma ya ñayuu jeē cándetu i jeē ndíji ya.

10

¹ Chi ley Moisés ni cuu ñn muestra-ni tāca jéē váha jeē ní quiṭi jíin Cristo, ñn jeē steén-ni ndese coo máá jéē váha. Jeē yúcuan tu cúu cuiṭi sáha ley un jéē quéndōo ndaā ñayuu jeē quíjicoo i nuū Yaā Dios jeē cásocō i quiṭi nuū cuiyá nuū cuiyá. ² Chi núu ní cúu sáha ley un jéē quéndōo ndaā i, te jecuiñī jeē cásocō i quiṭi núu. Chi núu ní cúu, te ñn jínu-ni te je ni quéndōo ndoo ánuá ñayuu cásocō ún, te ma yūhu gá anuá i jeē ní sáha i cuēchi núu. ³ Te tuú chi jeē cásocō i quiṭi ún tāca cuíyā, sa sáha jeē núcūhun ni i cuēchi i. ⁴ Chi niñī stíqui jíin níñī ndixúhú, ma cúu cuiṭi quende cuēchi.

⁵ Jeē yúcuan ná ni quiṭi Cristo ini ñayīví, te ni cahān yā jíin Yaā Dios: Jeē jéñi i quiṭi jíin jéē jéhe i ofrenda nuū ní, chi tu ní núnahan ni ní. Te ni sátūhva ní yiqui cúñu maá ná jeē socó na.

⁶ Te tu ní cúsiñi ni ní jéē jéñmu i quiṭi te sócō i ti jeē ndúndoo cuēchi i núu.

⁷ Yūcuán na te ni cahān ná: Yāha véji ná jéē squícu ná jniñu jeē núnahan ni ní, Tátā Yaā Dios.

Chi súcuan je yósó jnúhun na núu tútu.

Achí Jesús. ⁸ Xihna gā ni cahān yā jeē tu ní núnahan ni Yaā Dios te tu ní cúsiñi ni yā jeē jéñi i quiṭi te jéhe i ofrenda, jíin jéē jéñmu i ti te sócō i ti jeē ndúndoo cuēchi i núu, nájnūhun ndácu ley jenahán jniñu. ⁹ Te ni cahān gā yā: Yāha véji ná jéē squícu ná jniñu jeē núnahan ni ní, Tátā Yaā Dios. Te jeē ní cahān yā súcuan, te ni sáha ya jeē jecuiñī jeē cásocō i quiṭi, chi ni socō yā maá yā. ¹⁰ Te ni sáha Yaā Dios jeē iyó ndoo iyó íi yō nuū yā siquī jeē ní sáha Jesucristo jeē núnahan ni Yaā Dios, suu jeē ní sócō yā yiqui cúñu yā ñn jínu-ni jeē ní cáni.

¹¹ Te tāca sūtū ún ndiquivī ni cahān de ni cajejniñu de nuū yā, te cuehē jínu cájehni de suu quiṭi jeē socó socó de. Te tācá un chi ma cúu cuiṭi quende cuēchi. ¹² Te Cristo chi ñn jínu-ni jeē ní cáni ni socō yā maá yā jeē siquī cuéchi yó. Te sáa te ni cucōo ya lado váha Yaā Dios nuū cujéñu ya. ¹³ Te yúcuan ndétu ya vijna nde quiṭi quiṭi jeē quēnde yā poder tāca jéē jíto uhū nuū yā. ¹⁴ Chi jeē ní sócō yā maá yā ñn jínu-ni, te ni sáha ya jeē ní cáni quéndōo ndaā ñayuu ni sándoo ya. ¹⁵ Te máá Espíritu Santo suni cáji cáhán yā siquī jnúhun yáha, chi xihna gā cahán yā:

¹⁶ Suhva coo contrato jeē nasáha ri jíin i, nde na quiṭi quiṭi yúcuan, achí Jítoho yō Yaā Dios:

Sáha ri jeē jécūhun ley rī ini anuá i, te suni nuū jeē níjnūni i tee ri jnúhun ley rī.

¹⁷ Yūcuán na te cáhán gā yā:

Ma núcūhun cuiṭi gā ni rī tāca cuéchi jíin jniñu néé ní casáha i.

Achí yá. ¹⁸ Núu súcuan te núu je ni ine cáhnu ni yā nuū cuéchi yó, te tuá cánuú jéē socó gā yō jeē siquī cuéchi yó.

Jeē ní nune ichi quívi yó núu Yaā Dios

¹⁹ Jeē yúcuan hermano, ma ñn jeē cáni ni yō, chi cuu quiṭi yó lugar iī ndasí ndé nuū iyó Yaā Dios, siquī jeē ní jeti niñī Jesucristo. ²⁰ Chi ni nune ya ñn ichi jéē jéē cótecu yō ní cáni sáha ya. Chi ná ni jihī yā te ni tahndē sahna ndíta caa jeē ndihyú lugar iī ndasí gá ini vehe iī. Te súcuan ni steén Yaā Dios jeē nune quívi yó lugar iī ndasí gá nuū iyó yá. ²¹ Te Jesús cúu sūtū cujéñu ndasí jeē ndíto yóhó ñáyuu cácuu sēhe Yaā Dios. ²² Núu

súcuan te na quívicoo yó núū Yaā Dios, te na cóo ndije ndaā anuá yō, te na cándíje nīhin yó jéē iyó ndaā ndīhi jnūhun ya. Chi jíin níñī Cristo ni ndundoo ánuá yō nuū tāca cuéchi ni casáha yó, nájnūhun ni ndundoo yó núū yā jeē ní jendute yó jíin ndute. ²³ Te na cuíñi nīhin yó jíin jnūhun jeē cácahān yō jeē ñúhun ni yō jeē sáha ya jeē váha jíin yó. Te ma cáca yátá yó, chi váha squícu máá Yaā Dios jeē ni jéjnūhun ya nuū yō. ²⁴ Te na nácani ni yō ndese stīhvī jnáhan ni yō jeē cundáhú gá ni yō jnáhan yó, jíin jéē sáha yó jniñu váha. ²⁵ Te níni na ndútútú yó chiñúhún yó yā, te ma cúhuun ni yō nájnūhun casáha sava i, chi sa víhyá gā na stīhvī jnáhan ni yō, chi je cájini yō jeē cuácuyajni quívī ndíji ya.

²⁶ Te núu je ni jecūhun ni yō te ni jetáhú yó jnūhun ndaā, te núu máni sáha sáha-ni yó cuéchi, núu súcuan te tuá na inga iyó jéē cúū siquī cuéchi yó. ²⁷ Chi sa quéndōo máni ga jnūhun xeēn siquī yō jeē quiñi quívī juicio te quiñi yáñuhūn xeēn jeē cayū ñayuu jeē cájito uhū i ya. ²⁸ Ñayuu squéhichī ley Moisés, te núu uū chí únī ñayuu cahán cuéchi siquī i, te cuu nahín i, te tuá na jnūhun cúndáhú ni iyó. ²⁹ Te nagā ni cuu jeē ma ndóho xeēn gā ñayuu jeē squéhichī i máá Séhe Yaā Dios, chi nájnūhun jeē jeñú níñnu i siquī yā. Te sáha i jeē tu ndé jéjníñu níñī yā jeē ní jeti siquī contrato jeē ndúndoo i nuū yā nuú. Te súcuan sáha ndeváha i nuū maá Espíritu Yaā Dios jeē sáha jeē váha yóhó. ³⁰ Chi je jíin yō jeē ni cáhān maá yá: Máá rí sáha jeē ndutahū i siquī cuéchi i, máá rí cuāha castigo i, áchí Jítóho yō. Te suni cáhān: Máá Jítóho yō sándaā yā siquī cuéchi ñayuu yā. ³¹ Núu súcuan te xeēn ndasí cúu jeē quívi ñayuu ini ndaha Yaā Dios, Yaā técu, jeē ndútahū i siquī cuéchi i.

³² Te na núcūhun ni rō ndese ni cuu ichi yátá, nde náa sá ní quejéé ró caca ró jíin luz yā, te ni cajendeyí ni rō ni candoho ró tíjni jnūndóho xeēn. ³³ Chi sava ró ní cacahān neé i nuū rō te ni castóho i róhó ní cajito ñayuu. Te sava ga rō ni cajēhe ró jnūhun cuiñi ró jíin ñayuu ni candoho súcuan. ³⁴ Chi ni cacundáhú ni rō ñayuu ní cahīin vecāa jeē siquī yā, te ni cacusiñi ni rō vésú ni caquende ñayuu ndajníñu ró. Chi ni casáha ró cuenta jeē ndé andíví cánevāha ró ñin tahū jeē váha ndasí gá jeē coo ní cáni. ³⁵ Núu súcuan te ma siaá rō jnūhun jeē ní candíje ndije ró jéē váha ni yā, chi cuehē ndasí táhū nīhin rō siquī ún. ³⁶ Chi cánuú jéē cuándeyí ni rō návāha sáha ró jéē nújnahan ni Yaā Dios, te nīhin rō jeē ni jéjnūhun ya. ³⁷ Chi cáhān tutu i:

ñin núnúu-ni te ndee Yaā ndíji, te ma cucuéeé yá.

³⁸ Te ñayuu jeē ní ndahva rī cuéchi i, cotecu i jeē candíje i jeē sáha ri jehē i.

Te núu na cáca yátá i, te ma cúsiñi ni rī jíin i.

Achí Yaā Dios. ³⁹ Te yóhó tu cácuu yó jnáhan ñayuu cájica yátá jeē jnahnú ndetū i. Chi sa cácaandíje yó jéē nīhín tahū yō cotecu anuá yō.

Siquī jnūhun cándíje

11

¹ Te jeē candíje yó, suu cúu jeē cúndaā ndije ni yō jeē nīhín yō tāca jéē ñúhun ni yō, jíin jéē jíin váha yó jéē iyó ndije tāca jéē tu cájito yó núū vijna. ² Te ñayuu jenahán chi ni jejnúhún yá i siquī jeē súcuan ni cacandíje nīhin i.

³ Siquī jeē candíje yó cúu jeē jécūhun ni yō jeē ni sáha Yaā Dios ñayívi jíin jnūhun ni cahān-ni ya. Te jíin poder Yaā Dios jeē tu jíto yó núū, ni jecōo tāca jéē jíto yó núū.

⁴ Ni candíje Abel jeē sáha ya jehē de, te jeē yúcuan ní socō de jeē váha ga nuū Yaā Dios vésú Caín. Te jeē yúcuan ní jejnúhún yá jeē iyó ndaā de, chi ni jetáhú yá jeē ni sócō de quití nuū yā. Te vésú ni jihí de, te cáhān gā ejemplo de jíin yó nde vijna, chi ni candíje ndaā de.

⁵ Ni candíje Enoc jeē sáha ya jehē de, te jeē yúcuan ní naquihin ya de cuahān de andíví, te tu ní jíhí de. Te tu ní cánanihín ñayuu de, chi ni ndoñúhún-ni de ni sáha ya. Te áchí tutu jeē nde ná tu naquihin ya de te ni cusíñi ni yā jíin táca jéē ni sáha de. ⁶ Te núu tu cándíje yó jéē sáha ya jehē yō, te tú na modo cusíñi ni Yaā Dios jíin yó. Chi ñayuu jeē cuní quívicoo ndaha ya, cánuú jéē candíje ndaā i jeē iyó yá jíin jéē cuáha ya tahū nuū ñayuu jeē nducú i candíje i ya.

⁷ Te Noé ni candíje de jeē sāha Yaā Dios jehē de, ná ni castūhun yá nuū de jeē coo jnūndóho jeē ná tu coto de jeē coo. Te jeē yúcuan ní jendetū de ni sāha de barco cáhnu jeē naní arca, návāha cācu de jíin ní vehe de. Te jeē súcuan ni candíje de, te ni cane cuēchi siquī ñayuu jeē tu ní candíje i ya. Te ni ndahva yā cuēchi de siquī jeē ní candíje de jeē sāha ya jehē de.

⁸ Te Abraham ni candíje de jeē sāha ya jehē de, te jeē yúcuan ní jetáhú de ná ni cahān yā jíin de jeē quihín de ñn lugar nuū cuáha ya cuu tahū de. Te ni quenda de cuahān de, vēsú tu jíin de ndé nuū quihín de. ⁹ Ni candíje de jeē sāha ya jehē de, te jeē yúcuan ní condee tatú de nuū ñūhun jeē ni jéjnūhun ya jeē cuáha ya nuū de. Te ni condee de vehe ññi, te suni súcuan Isaac jíin Jacob, chi sēhe de ún suni ñnuú níhīn tahū i jíin de jeē ni jéjnūhun ya. ¹⁰ Chi ni ñūhun ni de condee de máá ñuu andiví jéē iyó cutú cimientu, te máá Yaā Dios ni jequin yā ni sama ya ñuu ún.

¹¹ Te suni ni candíje máá Sara jeē sāha ya jehē ña, te jeē yúcuan ní nihīn ña fuerza jeē ní jecūhun sēhe ña. Chi nde ná ni yāha ndasí cuiyā ña, te ni cacu ñn sēhe yí ña, chi ni candíje ña jeē squícu Yaā Dios jeē ni jéjnūhun ya. ¹² Te súcuan ni cuu jeē ni táhū cuehē ñayuu ni sāha ñn-ni Abraham, vēsú je jéhnū ndasí de. Te yucūn de ni nducuehē ndasí, nájñūhun quimi andiví, jíin ññti yumar, jeē ma cúu cuiti cahu yó.

¹³ Te tāca tēe candíje un, ní cajihī de. Te vēsú tu ní cájito de jeē ni jéjnūhun ya, te ni cajini vāha de jeē cóo, te ni cacusi ñi de jeē cóto de ñnga tiempo. Te súcuan ni cacahān de jeē ñáyuu ñuu jicá ñáyuu tatú cácuu de ini ñayiví yáha. ¹⁴ Te tāca tēe jeē cahān súcuan, chi stēen cají de jeē nducú de ñn ñuu jeē cúu andiví núu cúu ñuu maá de. ¹⁵ Chi núu jeē cánacani ni de siquī ñúu nuū ní quendacoo de, te iyó modo jeē nándicó cóo de te núu jeē cácuu de núu. ¹⁶ Te tuú chi ni cacuu ndasí ni de coyūcú de ñnga ñuu vāha ga jeē cúu ñuu andiví. Jeē yúcuan tu cúcanu Yaā Dios jeē naní yá Yaā Dios de jíjnāhan de, chi je ni sātūhva ya ñn ñuu nuū cóyūcú de.

¹⁷ Ni candíje Abraham jeē sāha ya jehē de, te jeē yúcuan ní jehēn de jíin Isaac jeē socó de i, ná ni jito ndee ya de. Te ni iyo tūhva de jeē socó de sēhe de un jéē mañúhún ni i nuū de, vēsú ni nihīn de jñūhun jeē ni jéjnūhun ya suhva siquī i: ¹⁸ Isaac cúu tēe jeē squejéé rí yucūn rō quihīn, achí jñūhun ni jejnūhun ya. ¹⁹ Te ni sāha de cuenta jeē cúu nastécu Yaā Dios i. Te nájñūhun súcuan ni cuu, chi cuu cahān yō jeē nájñūhun ni jihī i te ni natecu i nuū de, chi ni jesi-ni ya jeē ma cáhni de i.

²⁰ Ni candíje Isaac jeē sāha ya jehē de, te jeē yúcuan ní cahān de jeē vāha tahū nihīn sēhe de Jacob jíin Esaú tiempo quiji. ²¹ Te suni súcuan ni candíje Jacob, te jeē yúcuan, náa je yajni cuu de te ni cahān de jeē vāha tahū nihīn ndindúú sēhe yí José. Te yítuu de vara de, ni chiñúhún de Yaā Dios. ²² Te suni súcuan ni candíje José, te jeē yúcuan, náa cuacuyajni cuu de, te ni cahān de jeē tāca yucūn Israel, ñn quiví quendacoo i nación Egipto. Te ni ndacu de jniñu jeē chindūji i yiqui de ñuu nuū quívicoo i.

²³ Te ná ni cacu Moisés, te tátá i náná i ni cacandíje de jeē sāha ya jehē de, te jeē yúcuan ní cacondito sāhí de i unī yoō. Chi ni cajito de jeē lúu cáa i, te tu ní cáyūhú de siquī acta jeē ni sāha rey jeē na cúu tāca súchi yí. ²⁴ Te suni súcuan ni candíje Moisés, te jeē yúcuan ná ni jehnu de te tuá ni jéhe de jñūhun cuu de sēhe ñahan cúu sēhe sáhí rey Egipto. ²⁵ Chi sa ni cuu ni de ndoho de jíin táca jñāhan de ñayuu Yaā Dios, nasūu jéē cusí ni de jecu-ni tiempo jíin cuéchi. ²⁶ Chi ni sāha de cuenta jeē núu cahān neé ñayuu siquī de jeē siquí Cristo, te yúcuan sāha jeē cucá ndasí gá de ndíhi jeē ndíso jñūhun Yaā Dios, vēsú jeē nihín de ndíhi ndajniñu cúcá iyó nación Egipto. Chi ni ñūhun ni de jeē cuáha ya tahū de. ²⁷ Te jeē súcuan ni candíje de, jeē yúcuan ní quenda de nación Egipto cuahān de. Te tu ní yúhú de jeē quití ni rey nuū de. Chi ni ñn nihín de siquī jniñu sāha de, chi ni sāha de cuenta jeē je jíto de nuū Yaā jeē tu cúu coto yó núu vijna.

²⁸ Te jeē súcuan ni candíje de, te jeē yúcuan ní cahān de jeē na cáhni ñayuu londe pascua. Te ni ndacu de jniñu jeē na cóso yuyú i ññtī tī yehyí i, návāha núu na quíji ndajéhe jeē cáhni yā tāca sēhe nuú ñáyuu Egipto, te ma cáhni yā sēhe nuú ñáyuu Israel. ²⁹ Te siquī jeē ní cacandíje ñayuu Israel jeē sāha ya jehē i, te ni cayāha-ni i mēhñu Mar Rojo, chi ni

nune ya te ni natūu-ni ñuhun íchi. Te suni súcuan ni cacuni tēe Egipto yāha de núú, te ni nandihyū-ni ndute siquī de ni cajihī de.

³⁰ Ni cacandije soldado jeē sāha ya jehē de, te jeē yúcuan ní cotúú jeē ní condúú ndihyú ñuu Jericó, ná ni cajicó ndúú de uxā quiṽi. ³¹ Te Rahab, vēsú ñahan tíjni ni ni cuu ña, te ni candije ña jeē sāha ya jehē ña. Te ni chindéé ñáhán ña tēe Israel jeē ní quijicoo ni condéhé yuhu ndese íyó ñuu ña. Te jeē yúcuan tu ní jhí ña jíin ñáyuu nihni ni ñuu ña ún.

³² ¿Te ndé jnúhun ga cahān rī núu súcuan? Chi tuá na tiempo jeē nácani ga rī jnúhun Gedeón jíin Barac jíin Sansón jíin Jefte jíin David jíin Samuel jíin táca tēe ni canacani jnúhun ya nde jenahán. ³³ Ni cacandije de jeē sāha ya jehē de jíinánhan de, te jeē yúcuan ní cacundeyí de ni canajñi de tēcá ñuu náhnu, te vāha ni candacu de jniñu nuū, te ni chindéé ñáhán yá de nájñuhun ni jejnúhun ya. Te nuū sava de ni jesí Yaā Dios yuhu ndícaha jeē tu ní cáyeji tī de. ³⁴ Te sava de tu ní cáyú de sāha ñuhūn jeē cayú xeēn. Te sava de ni cācu de jeē tu ní jhí de jíin espada. Te sava de ni nanihīn ni de náa tuá fuerza de núú, te ndacuī teyí ní iyo de nuū guerra, te ni cacundeyí de siquī soldado tēcá ñuu jicá jéé jíto uhū ún de. ³⁵ Te sava ñahan ni natecu sēhe ña jeē ni jhí i.

Te sava ga ñayuu chi sa suhva ni candoho xeēn i nde ni cajihī i. Te tu ní cájēhe i jnúhun jeē siaá i jnúhun ya te cācu i, chi ni catee ni i jeē natecu i coyūcu váha ga i andiví. ³⁶ Te sava ga i ni casácatā ñayuu nuū i, te ni cacani ñayuu i, te nde ni caconuhñi cadena i ni cahīin i vecāa. ³⁷ Te ni cajēhe yuū xinī i, te ni cajehnde i jíin sierra, te ni cajito ndee i jíin jnúndóho, te ni cajehni i jíin espada. Ni cajica cuu i cháha chúcuan, te máá ñi lánchi máá ñi ndíxuhú ní cañuhun i. Ni candoho ndáhú i, ni cajito i jnúndóho, ni castóho ñayuu i. ³⁸ Vāha ndasí ñáyuu ni cacuu i jeē tú cuiti ñayuu ñayīvi súcuan, te vēsú súcuan te ni casáha ñayuu jeē ní cajica cuu i nuū ñuhun téhé jíin chíji yucu, ni cahīin i yaū cava jíin yáū ñuhun. ³⁹ Te táca ñáyuu yáha, vēsú ni jejnúhún yá i jeē ní cacandije nihin i jeē sāha ya jehē i, te tu ní cájito i nuū jeē ni jéjnúhun ya. ⁴⁰ Chi ni sátūhva Yaā Dios ñi jniñu váha ga, te suu cúu jeē sāha Cristo jíin yó, návāha ñi cáhnu-ni nihin yō tahū yō jíin i, te jeē yúcuan cúu jeē ná tu nihin i ndihī tahū i.

Jeē na cócunuū yō nuū maá ñi-ni Jesús

12

¹ Te íyó cuéhē ndasí ñáyuu un jéé ní cacandije nihin i jeē sāha ya jehē i, te nájñuhun ni jicó ndúú i yóhó, cástéén gā i nuū yō nde vijna jeē suni súcuan na cándije yó. Núu súcuan te suni máá yó, na téjiyo yó táca jéé sajnéñu jíin cuéchi jeē ni cáan yó jíin. Te na cuándeyí ni yō cunu yó jíin carrera jeē ni jéhe ya jeē cunu yó. ² Te na cócunuū vāha yó Jesús, Yaā jeē ni scándije yóhó te sāha ya jeē íje vāha yó jíin jnúhun ya nde jīnu ije yó. Chi máá yá ni jendeyí ni yā ni ndoho ya jicā cruz. Te vēsú jnúhun canu cúu jeē súcuan cuu yā, te tu ní sāha ya cuenta. Chi ni ñuhun ni yā jeē sa cusī ndasí ni yā ná ni cuu ni ndoho ya. Yūcuán na te ni cucōo ya lado váha mesa nuū ndácu Yaā Dios jniñu.

³ Te na nácani ni rō ndese ni jendeyí ni yā ni ndoho ya jeē ni sāha ndevāha ñayuu iyó cuéchi jíin yá. Te súcuan te ma cuíta ró ni ma ndínuu ni rō jíin jnúndóho. ⁴ Chi ni ná tu ndoho ró jéé ndé cuu rō jeē cánducú ndeyí ró snāā rō cuéchi. ⁵ Te sanaa te je ni canaa ni rō jnúhun cáhán tutu i, jeē stihví ni Yaā Dios rohó jéé cácuu ró séhe ya:

Séhē, ma quití ni rō jeē snahnú Jitoho yō rohó,
te ni ma ndínuu ni rō núu cáhán yā nuū rō.

⁶ Chi Jitoho yō snahnú yā ñayuu jeē maní yā jíin,
te jéhe ya castigo táca jéé náquihin ya cuu séhe ya.

Achí tutu. ⁷ Núu súcuan te na cuándeyí ni rō jeē snahnú Yaā Dios rohó, chi sāha ya jíin ró nájñuhun sāha tátá jíin séhe. Chi tú na séhe íyó jéé tu snahnú tátá i. ⁸ Te núu ma snahnú yā rohó, nájñuhun ndóho táca séhe, núu súcuan te nájñuhun séhe ndáhú cácuu ró, nasūu séhe ndije ya. ⁹ Te tátá yō ñayīvi yáha, suni ni snahnú de yóhó, te ni iyo yíñuhún yó jíin de. Te nagā ni cuu jeē ma cuándetū yō nuū maá Tátá yō andiví jeē snahnú yā yohó, te

cotecu yō ní cáni. ¹⁰ Te ndaā chi máá de ni casnáhnú de yóhó jecu-ni quivī, ndese ni cuu ni maá de. Te máá yá chi snáhnú yā yohó ñn modo jeē quéndōo vāha ga yō, návāha coo ndoo yó nájñuhun íyó ndoo máá yá. ¹¹ Te ndaā chi tu cácusñ ni yō maá hora jeē ndóho yó castigo, chi sa cúcuíhyá ni yō. Te cúcuéé gá te cuni yō jeē ní quendōo ndaā yō te coo ndeyí sñ ni yō jeē ni snáhnú yā yohó.

Siquī ñáyuu jeē casquéhichī i jñuhun cáhán Yaā Dios

¹² Núu súcuan te ma cóo ró nájñuhun tēe ni cuíta íi ndaha te quisí i xinī yití, chi sa ndacuī na sáha ró máá ró nuū jnúndóho. ¹³ Te sáha ró ichi ndóó caca ndaā rō, návāha nduvāha róhó jéē tu fuerza ini, jeē cácuu ró nájñuhun tēe chácua jeē tu cúu caca vāha.

¹⁴ Te na cóndihvī ni rō jeē condee manī rō jíin táca ñáyuu, jíin jéē cóo ndoo coo íi rō nuū yā. Chi ma cúu coto ni ñn ñáyuu nuū maá Jítóho yō te núu tu íyó ndoo i. ¹⁵ Te coto má cáca yátá ni ñn ró te scuíta ró jnúhun jeē sáha Yaā Dios jeē vāha róhó, návāha tú cuu ró nájñuhun ñn yucū uvuá jeē stívi te sáha daño jíin cuéhē ñáyuu. ¹⁶ Te ni ñn ró ma cáca jnéni. Te ni ma cóo jéē ni rō nuū Yaā Dios, nájñuhun ni íyo Esaú. Chi máá ñn cohō ndeyu ni jicān de nuū ñáni de, ni sama de jíin derecho de jeē cúu de sūchi núu, te súcuan ni xícó de derecho de. ¹⁷ Te cájini rō jeē cucuéeé gá te ni cuni de jeē na cáhán tatá de jeē vāha tahū nihñ de, te tu ní cúu, chi tuá ni táñúhún Yaā Dios de. Chi tu ní níññ jniñu jeē ní nacani ni de, vēsú ni nducú ndeyí de te nde ndahyú de.

¹⁸ Te róhó jíjnáhan ró tu ní quíjicoo ró núu íyo cúu, nájñuhun íyo ni cuu máá yucu nuū ni jéhe ya ley yā nuū ñáyuu Israel. Chi ni cane yáñuhñ yucu Sinaí, te nee lúchi jnúu jító, te queé tachí xeén. ¹⁹ Te ni jecu trompeta, te ni cahān Yaā Dios. Te ñáyuu jeē ní cajini sōho jeē cahān yā, ni cacahān ndahú i jeē ma cahān gā yā jíin i. ²⁰ Chi tu ní cúndeyí i jíin jnúhun jeē ní ndacu ya jniñu nuū i, chi ni cahān yā: Vēsú ñn quití-ni núu quiví tī yucu yáha, jíni ñúhún cuu tī jíin yúu chí jíin lanza, achí yá. ²¹ Te siquī jeē íyo ndasí cúu jeē cájito i ún, te ni cahān Moisés: Quisí i ruhū jeē yuhú rí, achí de.

²² Te vijna róhó jéē cá candíje, tu ní quíjicoo ró núu yúcu yúcuan. Chi sa suhva nuū maá yucu Sion jíin núu maá ñuu Yaā Dios, Yaā técu, ni quivícoo ró. Te ñuu un cúu Jerusalén jeē iyó andiví, nuū cáhīyo tútu cuéhē ndasí mil ndajéhé cáchiñúhún Yaā Dios. ²³ Te ni quivícoo ró núu cáyūcu tútu ñáyuu cá candíje jeē cácuu sēhe Yaā Dios, jeē iyó lista i andiví. Te ni quivícoo ró núu Yaā Dios, Yaā sándaā jniñu ndñhi ñáyuu, jíin núu cáhīyo ánuá ñáyuu vāha jeē jé ni squéndōo ndaā yā i. ²⁴ Te suni nuū maá Jesús, Yaā ndíso jniñu siquī contrato jeē ní quivícoo ró. Te yahu ndasí gá jniñu sáha niññ yā jeē ni jéti jeē ndáhva cuēchi yó, nasūu níññ Abel jeē ni jicān cuēchi.

²⁵ Núu súcuan te coto má squéhichī rō jñuhun jeē cahān yā jíin ró jijnáhan ró. Chi ñáyuu jeē tu ní cájetáhú ná ni cahān yā jíin i ñayiví yáha, tu ní cáca i. Te xeén gā ndoho yóhó te núu ma cuatáhú yó nuū yā jeē cahān yā nde ichi ándiví núu súcuan. ²⁶ Te nde saá ní quisí i ñayiví jéē ni cáhān yā. Te vijna chi cáhān yā: ñn na jínu quisí ri ñayiví, te nasūu máá-ni ñayiví, chi suni táca jéē ñn andiví, achí yá. ²⁷ Te jñuhun yáha jéē cahān, ñn na jínu, chi cúní cahān jeē téjiyo ya táca jéē tu íyó cutú, suu jeē ní cuvāha, návāha na quéndōo jeē cóo cutú ní cáni. ²⁸ Núu súcuan te cuāha Yaā Dios ñn ñuu nuū yō jeē cóo cutú ní cáni. Te jeē yúcuan, na nácuatáhú yó nuū yā, te na chíñúhún yó yā, te na cóo yññúhún yó, návāha cusñ ni yā jíin yó. ²⁹ Chi Yaā Dios máá yó cúu nájñuhun ñn ñuhñ jeē snáā ndñhi jeē neé.

Ndese sáha yó te cusñ ni Yaā Dios

13

¹ Ma jécuiññ rō jijnáhan ró jéē cundáhú ni rō hermano rō cá candíje. ² Conahán ró jeē cánuú cuáha núu ró vehe nuū ñáyuu cájica. Chi íyó jínu jeē súcuan ni cajēhe núu ñáyuu vehe, te tu ní cájini i jeē nuū maá ndajéhé andiví ní cajēhe núu i vehe.

³ Te conahán ró chindéé ñáhán ró ñayuu cáhiin vecāa, chi sáha ró cuenta jeē nájñuhun cáhiin cáhnu ró jíin i vecāa. Te suni nacani ni rō jehē jnáhan ró jéē cándoho i sáha ñayuu, chi núu súcuan coo jíin máá ró te suni ndoho ró.

⁴ Coo yíñúhún ró síquī jnúhun quíjnáhan ñayuu, te ma cosíquí ndéē jnáhan ró. Chi máá Yaā Dios sándaā yā cuēchi ñayuu tijni ni jíin ñayuu casíquí ndéē jnáhan.

⁵ Te ma ndíyo ni rō xūhún, chi na cóo sīñ ni rō jíin jéē cánevāha ró. Chi máá yá ni cahān: Ma siaā cuiti rī rohó, ni ma stóo cuiti rī rohó, áchí yá. ⁶ Núu súcuan te ma ñin jeē cáni ni yō, chi cuu cahān yō:

Máá Jítoho rī chindéé ñáhán yá ruhū,
te ma yūhu rí núu na vé cuní ñayuu sáha i jíin rí.
Achi yō.

⁷ Te na núcūhun ni rō tācá pastor rō, jeē ní castéén de jnúhun Yaā Dios nuū rō. Te sáha vāha ro cuenta ndese ni nihīn jníñu jeē ní casáha de, te na ndácu ró de jeē ní cacandíje de jeē sáha ya jehē de.

⁸ Te Jesucristo chi ñin-ni cáa ya ichi yátá jíin vijna jíin ní cáni. ⁹ Núu súcuan te ma cuáha ró jnúhun candíje ró táca jnúhun jeē sīn cáhán jeē tu quíjnáhan jíin jnúhun máá yá. Chi íyó váha jeē na íje ánuá yō sáha jnúhun jeē váha ni yā jíin yó. Te tu jíni ñúhún yó jnúhun jeē tajnúni síquī jeē yéji yō, chi tu níhīn jníñu cuiti jíin ñayuu cáhiin jíin.

¹⁰ Te máá yó chi cánevāha yó ñin jeē ni sócō máá jéhē yō, cúu Cristo. Te tāca sūtū jeē cásocō gā de modo jeē cahán ley jenahán, tú na vé nihīn de nuū yā jeē ni sócō yā máá yá. ¹¹ Te sūtū cujéhnu ga, ná ni socō de ñíñī tācá quiti ini cuarto iī gā jeē síquí cuēchi, te yíqui cúñu tī ni cajehmu de ichi yátá ñuu. ¹² Te suni súcuan ni ndoho máá Jesús ichi yátá ñuu, návāha jíin níñī máá yá te sándoo ya ñayuu. ¹³ Núu súcuan te ma cóo ñnuú gá ni yō jíin ñayuu tu cacandíje, chi nájñuhun quihīn yō jíin yá ichi yátá ñuu, te na ndóho yó jíin yá jeē sácata i. ¹⁴ Chi ñayivi yáha tu íyó ñuu nuū coo yó ní cáni, chi sa cánducú yó máá ñuu nuū cóyūcu yó quivī quíji. ¹⁵ Núu súcuan te jeē jíin Jesucristo te níni na cáhán yō jeē yóhoyo cújéhnu Yaā Dios, chi suu cúu nájñuhun ñin jeē socó yō nuū yā, suu jeē nácuatáhu yó nuū yā. ¹⁶ Te ma náa ni rō sáha vāha ró núu jnáhan ró, te cuáha ró jéē cúmanī nuū i. Chi nájñuhun ñin jeē cásocō rō nuū Yaā Dios cúu tāca jéē yáha, te cúsiñ ni yā jíin.

¹⁷ Te cuandíje ró núu tēe cácuu pastor rō, te cuandetū rō nuū de. Chi cándito de róhó jéē quéndōo vāha ánuá rō, chi cájini de jeē cánuú nacuāha de cuenta nuū yā. Te condihvī ni rō sáha vāha ró, návāha cusīñ ni de síquī rō te ma cucuíhyá ni de síquī rō. Chi núu tu súcuan te ma cóo jeē váha jíin ró.

¹⁸ Te cacān tahu rō jehē rī jijnáhan ri. Chi vāha íyó ni anuá rī jeē tú na cuēchi ri. Chi cácuu rī caca yíñúhún rí jíin táca jniñu. ¹⁹ Te suni cáhán ndahú rí jíin ró jeē cacān tahu ndasí ró jehē máá rí, návāha cuáha ya jnúhun jeē yachí gā cuajeē tucu ri nuū rō.

Bendición jíin saludo jeē sándíhí

²⁰ Te máá Yaā jeē jéhe jnúhun ndeyí sīñ ni nuū yō, ni nastécu yā Jitoho yō Jesucristo mēhñu ndíyi. Te Jesús cúu pastor cujéhnu jeē ndíto ñayuu cácuu nájñuhun lanchi ya. Chi jíin níñī yā ni sácutu yá contrato jeé yá jeē coo ní cáni. ²¹ Te ñúhún ni rī jeē Yaā Dios na sáha ya jeē ije ni rō jijnáhan ró, návāha cuu sáha ró táca jniñu vāha ndese nújnahan ni yā. Te ñúhún ni rī jeē jíin fuerza Jesucristo jeē ndeé yá ini yō, na sáha Yaā Dios jeē cuu yó ñayuu cúsiñ ni yā jíin. Te na cáhán yō jeē yóhoyo luu cújéhnu ya ní cáni. Amén.

²² Hermano jijnáhan ró, cáhán ndahú rí jíin ró jeē cone cáhnu ni rō jeē stihví ni rī rohó jíin jecu-ni jnúhun ni tee ri nuū carta yáha. ²³ Te cástūhun rí jeē hermano yō Timoteo, je ni quenda de vecāa. Te núu yachí quiji de yāhá, te cuajecoo ndindúu rí nuū rō coto jnáhan yó.

²⁴ Te cahān rō jíin táca tēe cácuu pastor rō jíin táca hermano cacandíje jeē sándeeyí ni de, áchí rí. Te ñayuu Italia suni cacāhān i jeē sándeeyí ni rō.

²⁵ Te ñúhún ni rī jeē na sáha ga Yaā Dios jeē váha róhó jijnáhan ró. Súcuan na cóo. Amén.

CARTA JEE NI TEE SANTIAGO NUU ÑAYUU CACANDIJE

¹ Máá rí cúu Santiago, mozo Yaā Dios jíin Jítóho yō Jesucristo. Te tée ri carta yáha cuájeē nuū rohó ñáyuu cacandije jeē cácuu ró ndihúxí uū yucūn Israel, te ni cajitē núu ró níí ñáyiví. Sándeyí ni rō jijnáhan ró.

Yaā Dios sáha jeē jécūhun ni yō

² Ñánī mánī, na cúsiī ndasí ni rō jijnáhan ró núu quiji tijni tāca jnūndóho siquī rō. ³ Chi cájini rō jeē núu jíto ndee jnūndóho róhó núu cacandije vāha ró, te yūcuan sáha jeē cútūhva ró cuándeyí ni rō. ⁴ Te na cuándeyí ni rō nde ije vāha ró jíin, návāha cuu sáha ró ndihi jniñu vāha, te ma cúmanī jeē squícu vāha ró núu yā.

⁵ Te núu ndé ñin ró cúmanī jecūhun ni rō caca ndíchí ró jíin jnúhun Yaā Dios, na cácan rō nuū yā, te sáha ya jeē jécūhun ni rō. Chi sáha ya ndihi jeē cájicān ñayuu, te tu cúxeēn yā nuū i jeē jicān i. ⁶ Te jeē jicān rō, te cánuú candije ró jéē sáha ya jeē jicān rō, te ma cáni siquí ni rō. Chi ñayuu jéni siquí ni, cúu i nájnūhun ndute mar jeē ndóna jísó cóyo cuahān cháha chúcuan sáha tachī. ⁷ Ñayuu ún ma cáni ni i jeē sáha Jítóho yō jeē jicān i. ⁸ Chi ñayuu jeē jéni ñin jéni uū ni, chi mánī násāma ni i jíin tāca jniñu cásāha i.

⁹ Tācá hermano ndahú, na cúsiī ni de jeē sáha Yaā Dios jeē kujénu de. ¹⁰ Te hermano cucá, na cúsiī ni de núu ni ndundáhú de. Chi tāca tée cucá, yachī naa jeē cucá de, nájnūhun náā ita yucū. ¹¹ Chi núu ni cane niāndii te cújihní, te íchí-ni yucū, te cóyo-ni ita, te náā-ni jeē lúu cáa. Te suni súcuan ndoho tāca tée cucá níni sá jícu de jíin jniñu de.

Siquī jeē jíto ndee jnūndóho yóhó

¹² Yōhyo ndetū tēe jeē jéndeyí ni de núu jíto ndee jnūndóho de. Chi núu je ni cundeyí de jíin, te nihīn de premio jeē kujénu de cotecu de níí cáni. Chi súcuan ni jejnūhun Yaā Dios jeē cuáha ya nuū ñáyuu jeē maní jíin yá. ¹³ Núu ñin ñayuu jicān ini i jeē sáha i cuēchi, te ma cáni ni i jeē nuū Yaā Dios vēji jeē jicān sáha i cuēchi. Chi ni ñin ma cúu cuiñi sáha jeē quívi Yaā Dios cuēchi, te ni máá yá tu squívi ya ni ñin ñayuu nuū cuēchi. ¹⁴ Chi sa suhva jeē ndíyo néé ni maá i, suu sáha jeē jicān ini i sáha i cuēchi, te scānda ini i chi stáhú un i. ¹⁵ Te jeē ndíyo néé ni i, yūcuan quéjéé cuēchi. Te cuēchi ún, núu je ni cunihin, te sáha jeē jnahnú ndetū ñayuu. ¹⁶ Núu súcuan te ma stívi ró canī ni rō jijnáhan ró, ñánī mánī.

¹⁷ Tāca jéē cútahū yō jeē vāha jeē lúu íyó, chi vēji nde andiví núu maá Yaā Dios, Yaā ni sáha tāca jéē ndíndēe ñin andiví. Te máá yá tu násāma cuiñi ini yā nájnūhun násāma nduva jíin cuándahū. ¹⁸ Te ni sáha ya jeē cótecu yō níí cáni, chi ni candije yó jnúhun ndaā yā. Te ni nduu yó nájnūhun sēhe nuú yá nuū tāca gá sēhe ya jeē quíji, chi súcuan ni nujnahan ni yā sáha ya.

Siquī ndese chiñúhún ndāā yō yā

¹⁹ Núu súcuan te tāca róhó ñánī mánī, ñama na chúsohó ró jnúhun ya, te sa suhva ma cahán yachī rō, ni ma quití yachī ni rō. ²⁰ Chi ñayuu cáquití ni, tu sáha i jniñu ndaā jeē cuní Yaā Dios. ²¹ Núu súcuan te na siáá rō tācá jniñu jnéhén jíin jniñu néé jéē ni cáyā jíin ró. Te na cóo vītá ni rō te cuatáhú ró jnúhun ya jeē ni quívi ini anuá rō. Chi jnúhun un ndíso poder jeē cācu ánuá rō.

²² Te na squícu ró jéē steén jnúhun ún, te nasūu máá jéē cúni sōho ró súcuan-ni, chi núu súcuan te cástáhú ró maá ró, chi tu níhín jniñu núu tu squícu ró. ²³ Chi tēe jeē jíni sōho de jnúhun ya súcuan-ni, te tu squícu de, cúu de nájnūhun ñin tēe jeē jíto de nuū espejo ndese cáa nuū de. ²⁴ Te jíto vāha de nuū de, te cuahān-ni de, te náā ni de ndese cáa nuū de. ²⁵ Te núu ñin tēe tu náā ni de jnúhun jíni sōho de, chi sa suhva chúhun vāha ni de jeē cahán maá ley ndaā Jesús jeē ni sáha libre yohó, te núu cuiñi nihin de jíin, te squícu de jeē ndácu, yūcuán na te quéndōo ndetū de jíin jniñu vāha jeē sáha de.

²⁶ Te núu ndé ñin ró jéni ni rō jeē chiñúhún vāha ró Yaā Dios, te núu tu ndíto ró yáá ró, núu súcuan te stáhú ró maá ró, te tu ndé jéjníñu jeē chiñúhún ró yā. ²⁷ Ñayuu jeē

chiñúhún ndoo chíñúhún ndáā i máá Tátá yō Yaā Dios, chi jniñu yáha sáha i: Chíndéé ñáhán i sūchi ní caquendōo ndáhú jíin ñahan ní caquendōo ndáhú, núu na-ni jnūndóho íyó. Te tu sájnéhén i ánuá i jíin jniñu neé íyó ñáyiví.

Ma cúhichī ni yō coto yó ñayuu ndahú

2

¹ Ñánī mánī, cá candíje ró Jítóho yō Jesucristo jeē cujéhnu luu ya. Núu súcuan te ma sáha ró cuenta ndese cúu ñin ñin ñayuu, chi ñnuú sáha ró jíin ndíhi i. ² Chi íyó jínu quívi ñin tēe ini vehe nuū cándutútú ró, te yíhi xehyu oro ndaha de, te ñúhun de sahma váha. Te suni íyó jínu quívi ñin tēe ndáhú, te ñúhun de sahma tahndé. ³ Te tú vāha núu sáha yíñúhún ró jíin tēe ñúhun sahma váha, te cahān rō jíin de: Cucōo ní lugar váha yāhá. Te cahān rō jíin tēe ndáhú: Yūcuán cuiñi ní, chí yáha cucōo ní nuū ñúhun, achi rō. ⁴ Chi núu cásáha ró súcuan, te tu jéni vāha ni rō síquī jnáhan ró, chi sñin sáha ró jíin tēe cúcá jíin tēe ndáhú.

⁵ Ñánī mánī, chusóhó ró jnūhun cáhán rī: Yaā Dios ni nacāji ya ñayuu ndahú ini ñáyiví yáha jéē cóo cúcá i jíin jnúhun cá candíje i ya, te nihīn i tahū i ñuu nuū ndácu ya jniñu. Chi ni jejnūhun ya cuāha ya un núu ñáyuu jeē maní jíin yá. ⁶ Te máá ró chi sa suhva cájēhe ró jnúhun canu ñayuu ndahú. ¿Te á násūu tēe cúcá cúu jeē castáhú róhó síquī jeē nihín de xūhun ró, te yachi jéquin de cuēchi síquī rō nuū tohó? ⁷ Te suni cácahān neé de síquī Cristo, te suu sñhví máá yá cúu jeē cánani ró cristiano.

⁸ Vāha cásáha ró te núu cásquícu ndije ró máá jnúhun jéhnu ga jeē cahán ley, nájnūhun yósó núu tútu ii: Cundáhú ni rō jnáhan ró nájnūhun cundáhú ni rō maá ró, achí. ⁹ Te núu sñin sáha ró jíin ñáyuu cucá jíin ñáyuu ndahú, núu súcuan te cuēchi cásáha ró, te jéconde cuēchi síquī rō jeē stívi ró ley Yaā Dios. ¹⁰ Chi núu ñin ñayuu stívi i ñin-ni jniñu ndácu ley, te vésú na squícu i ndíhi ga, te nájnūhun ni stívi i ndíhi ley, te ndíhi un jéconde cuēchi síquī i. ¹¹ Chi Yaā jeē ni cáhān jeē ma cósíquí ndéē jnáhan ró, suni ni cahān yā jeē ma cáhni rō ndīyi. Te vésú tu ní cásquí ndéē jnáhan ró, te núu ni jehni rō ndīyi, núu súcuan te je ni stívi ndíhi ró ley. ¹² Te tāca jéē cahán rō jíin jéē sáha ró, chi sáha ró cuenta jeē sándaā yā ndíhi un jíin máá ley Jesús jeē ni sáha libre rohó. ¹³ Chi quívi sándaā yā jniñu, te ñayuu jeē tu ní cundáhú ni jnáhan, suni ma nihín i jnūhun cundáhú ni. Te ñayuu ni cundáhú ni jnáhan, cusñi ni i jeē ní ndahva yā cuēchi i máá quívi sándaā yā jniñu.

Tu jéjníñu jeē candíje yó núu tu squícu yó

¹⁴ Ñánī mánī, núu cáhán ñin tēe jeē candíje de jeē sáha ya jehē de, te núu tu sáha de jniñu váha, ¿te ndé jéjníñu jeē candíje de ún? ¿A cuu cācu ánuá de jíin jéē cahán-ni de jeē candíje de, te núu tu sáha de jniñu váha? ¹⁵ Te núu ñin hermano yō chí hermana yō, cúmani sahma i jíin jéē cáji i tāca quívi, ¹⁶ te núu ñin ró cáhán jíin i: Cuandeyí ni rō, te cusúcún váha ró te caji vāha ró, achi rō jíin i, te núu tu ní jéhe ro jéē jíni ñúhún i cotecu i, ¿te ndé jéjníñu jeē cahán rō súcuan? ¹⁷ Te suni súcuan cúu jeē núu achí ró jeē candíje ró jeē sáha ya jehē rō, te núu tu sáha ró jniñu váha, núu súcuan te tu ndé jéjníñu cuiñi jeē cahán-ni ró jéē candíje ró.

¹⁸ Te sanaa te cahān ñin ñayuu: Róhó chi cándíje ró jéē sáha ya jehē rō, te ruhū chi sáha ri jniñu váha. ¿Na jíin stéén rō jeē candíje ró jeē sáha ya jehē rō, te núu tú na jniñu váha sáha ró? Te ruhū chi sáha ri jniñu váha te súcuan stéén rī jeē candíje ri jeē sáha ya jehē rī. ¹⁹ Ndaā chi cándíje ró jeē íyó ñin-ni Yaā Dios. Te va íyó váha núu súcuan. Te tachí chi suni súcuan cá candíje, te cáquísí i jeē cáyūhú, chi tu cásáha jniñu váha. ²⁰ ¿Te naun tu jécūhun ni rō? ¿A tu jíni rō jeē núu tu sáha ró jniñu váha, te tu ndé jéjníñu cuiñi jeē cahán rō jeē candíje ró? ²¹ Te jíi yō Abraham, ni ndahva yā cuēchi de síquī jeē ni sáha de jniñu váha. Chi ni jetáhú de jeē ni cáhān yā jeē cahni de sēhe de Isaac socō de i nuū altar. ²² Te jécūhun ni rō jeē síquī jeē ní candíje de jeē sáha ya jeē ni jéjnūhun ya nuū de, jeē yúcuan ní jetáhú de jeē ni cáhān yā jeē socó de sēhe de. Te jeē ní jetáhú de, suu ni steén jeē candíje ndije de jeē sáha ya jeē ni jéjnūhun ya nuū de. ²³ Te súcuan ni cundaā jnūhun

cáhán tutu iī: Abraham ni candíje de jeē ni jéjnūhun ya nuū de, te jeē yúcuan ní ndahva yā cuēchi de, áchí tutu. Te ni conaní de amigo Yaā Dios.

²⁴ Núu súcuan te je ni cajini rō jeē ndáhva Yaā Dios cuēchi ñayuu jeē casáha i jniñu váha síquī jeē cáccandíje i jeē sáha ya jehē i, te nasūu máá jéē cahán-ni i jeē candíje i. ²⁵ Te suni súcuan Rahab, vēsú ñahan tǵjni ni ni cuu ña xihna gā, te ni ndahva yā cuēchi ña síquī jeē ni sáha ña jniñu váha. Chi ni jēhe núu ña vehe nuū tāca mozo ni tají Josué, te ni chuhichí ña de ینگا ichi, návāha cācu de nuū tēe cánducú cahni de. Te jeē yúcuan ní ndahva Yaā Dios cuēchi ña. ²⁶ Te ñin ñayuu núu tuá anuá i nuū yiqui cúñu i, te ndīyi cúu i. Te suni súcuan núu cándíje yó jeē sáha ya jehē yō, te núu tu sáha yó jniñu váha, te nájñūhun ndīyi cúu yó.

Jñūhun síquī yaá yó

3

¹ Ñánī mánī, ma cáni ni cuehē rō cuu ró maestro steén jñūhun ya. Chi cájini rō jeē yóhó jéē steén jñūhun, cuehē gā cuēchi ndenehen ya síquī yō. ² Chi ndīhi yó stívi cuéhē jniñu. Te núu ñin tēe cuu condito de yáá de jeē ma stívi de jíin ni ñin jeē cahán de, núu súcuan te yōhyo vāha tēe cúu de, te suni cuu condito de ní gá de jeē ma stívi de. ³ Chi cúu nájñūhun jeē chíhi yó freno yuhu caballo, te súcuan snáhnú yō ní tǵ jeē quihín tǵ jíin yó ndé nuū cuní yō. ⁴ Te suni súcuan tāca barco, vēsú náhnū ndasí, te vēsú ñihin chūndahá táchī, te jíin ñin timón lulí-ni te cuu scuícó tēe scáca, te quihín de jíin ndé nuū cuní de. ⁵ Te suni súcuan cúu yáá yó, chi vēsú lulí-ni, te cuehē teyí sáha yó jíin. Te suni jíin yō jeē ñin ñuhūn lulí cuu jñi jeē cayú ñin yucu cáhnū ndasí. ⁶ Te suni súcuan yáá yó, chi sáha nájñūhun ñin ñuhūn, chi scuíquín cuehē teyí jniñu néé. Te yáá yó cúu ñin parte lulí yiqui cúñu yō, te sáha jeē quívi ní yó cuēchi. Te infierno cúu jeē scuíquín jñūhun néé jíin yáá yó, te yáá yó scuíquín cuehē jniñu néé ní tiempo jeē iyó yó ini ñayívi. ⁷ Te ñayuu chi cuu snáhnú i tācá quiti jíin saa jíin cóo jíin quiti ñūhun nuū mar, te je ni snáhnú i cuehē tǵ. ⁸ Te ni ñin ñayuu ma cúu condito i yáá i. Chi ñin jeē neé jéē ma cúu condito i cúu. Te nájñūhun yuhu cóo jeē ñūhun chitú veneno jeē jéñi, súcuan cúu yáá yó. ⁹ Jíin yáá yó chíñúhún yó Tatá yō Yaā Dios, te suni jíin yáá yó cahán ndevāha yo síquī ñayuu jeē ni sáha ya ánuá i nájñūhun íyó máá yá. ¹⁰ ñin-ni yuhu cáne jñūhun chíñúhún yó yá jíin jñūhun cáhán ndevāha yó. Ñánī mánī, tu íyó váha cuiti jeē súcuan. ¹¹ ¿A ñin-ni tesōcó cáne ndute váha jíin ndute úvuá, chí naún? ¹² Ñánī mánī, ¿á cuu cuun ndehē oliva xiní yújnu higo, te á cuu cuun ndehē higo xiní yoyúcú uva, chí naún? Te suni súcuan ñin tesōcó ma cúu cane ndute úhvua jíin ndute váha.

Jñūhun ndíchí jéē véji nuū Yaā Dios

¹³ Te núu ndé ñin ró ndíchí te jécūhun vāha ni, núu súcuan te jíin jéē jíca ndaā rō steén rō jeē súcuan cúu ró. Te na cóo suchí ni rō modo jeē jéhe jñūhun ndíchí yá. ¹⁴ Te núu cáccuésún teyí ni rō te ndúcú ró jéē cujéñu máá ró, núu súcuan te ma cutéyí ró cani ni rō jeē ndíchí ró. Chi suu cúu jeē stahú ró, te cúu ró contra síquī jñūhun ndaā. ¹⁵ Chi ñayuu cándāa súcuan, nasūu núu Yaā Dios véji jeē ndíchí i. Chi cuenta ñayívi, jíin cuenta anuá neé ñayuu, jíin cuenta maá jéxeén cúu. ¹⁶ Chi nuū iyó ñayuu cucuésún ni jíin ñayuu nducú jéē cujéñu máá, suni yúcuan íyó jñūhun sáca núu jíin táca jniñu néé. ¹⁷ Te jñūhun ndíchí jeē véji nuū Yaā Dios, núu ni sáha jeē ní ndundíchí ñayuu, yūcuán na te íyó ndoo ánuá i. Te suni yúcu maní i jíin jnáhan i, te vítā ni i, te tú ñihni ni i. Te cúndáhú ni i jnáhan i, te sáha i jniñu váha. Te suni íyó ndāa i, te tu stáhú i. ¹⁸ Te ñayuu cáyūcu mánī jíin jnáhan, jíin jñūhun maní casáha i tācá jniñu ndaā, te nanihín i jeē quéndōo ndaā i.

Jeē ma cutóo ni yō jeē iyó ini ñayívi

4

¹ ¿Te ndese quéjéé jéē cájejnáhan ró jíin jéē cátejñáhan ró? Quéjéé síquī jeē cándiyo néé ni rō, te yōhyo scánda ini anuá rō. ² Chi cándiyo ni rō, te tu cánevāha ró, te suu sáha

jeē cájehni rō ndīyī. Cándiyo ni rō jeē névāha jnāhan ró, te tu níhín rō, te suu sáha jeē cátejnhāhan ró te cájejnāhan ró. Te tu cánihīn rō jeē cuní rō, chi tu cájicān rō nuū Yaā Dios. ³ Te núu cájicān rō, te tu cánihīn rō, chi tu cájicān vāha ró, chi mání jeē cusī ni maá ró cúu jeē cájicān rō nuū yā. ⁴ Ñayuu castoo Yaā Dios cácuu ró. ¿A tu cájini rō jeē núu cutóo ni rō jeē iyó ini ñayīví, yūcuan cúu jeē cájito uhū rō Yaā Dios? Chi ñayuu jeē cutóo ni jeē iyó ñayīví, ndúu i ñayuu jíto uhū nuū Yaā Dios. ⁵ Te tu cáhān saá-ni jnūhun yáha jéē yosó núu tútu iī: Máa Espíritu jeē ni jéhe Yaā Dios jeē ndeé ini yō, cúcuñí ni yā jeē súcuan casáha yó, chi manī yā jíin yó, achí. ⁶ Te jeē váha ni Yaā Dios, te jéhe ya fuerza ini yō jeē ma sáha yó súcuan. Chi cáhān tutu iī: Yaā Dios jési yā nuū ñayuu casáha téyí máa, te vāha ni yā chindéé ñāhān yá ñayuu casáha suchí máa, áchí. ⁷ Núu súcuan te cuandētū rō nuū Yaā Dios. Te cuiñi níhín ró jéē ma cuátáhú ró jexeén, te cunu coto róhó jíjnāhan ró. ⁸ Manī gā coo ró jíin Yaā Dios, te víhyá gā steén yā jeē manī yā jíin ró. Róhó jéē casáha cuēchi, na sándoo ró máa ró, stóo ró cuēchi. Te róhó jéē cácuuni rō coo manī rō jíin Yaā Dios níni jéē cácuuni rō cutóo ni rō jeē iyó ini ñayīví, na sándoo ró ánuá rō jeē tuá coo ró súcuan. ⁹ Na jnāhuhū ni rō, te cucuíhyá ni rō, te na ndáhyú rō siquī jeē iyó cuēchi ró. Te vēsú ni cajecū rō, te vijna na ndáhyú cohó ró. Te vēsú ni cacusī ni rō, te vijna na ndúcuíhyá ni rō. ¹⁰ Na sásuchí ró maá ró nuū Yaā Dios, te sájéhnū ya rohó.

Ma cóndihvī ni yō siquī cuēchi jnāhan yó

¹¹ Hermano jijnāhan ró, ma cahán neé ró siquī jnāhan ró. Chi tēe jeē cahán neé siquī jnāhan, chí jéē ndīhvī ni siquī cuēchi jnāhan, nájñūhun jeē siquí ley yā cahán neé de, chi tu squícu de ley jeē cundáhú ni yō jnāhan yó, te nájñūhun cáhān de jeē tu iyó ndáa ley yā. Te núu cáhān rō jeē tu iyó ndáa ley yā, núu súcuan te nasūu jéē squícu ró, chi sa jeē cahán rō siquī. ¹² Iyó ñn-ni Yaā jeē ni jéhe ley, te máa-ni ya cúu jeē sándaā siquī cuēchi. Te jnama ya ñayuu cácadíje te snáhnū ndetū yā ñayuu tu cácadíje. Núu súcuan ¿te na jniñu ndíso ró jéē sándaā rō siquī jnāhan ró?

Tú vāha jeē satéyí yó maá yó

¹³ Vijna te cáhān rī jíin róhó jéē cácahān: Vijna chí sájnē te quihīn yō ñuu yúcuān, te coyūcu yó ñn cuiyā, te cuaan yó xíco yó, te nihīn yō siquī, achí ró. ¹⁴ Te tu jíni cuítī rō ndese coo sajnē. ¿Chi na vé va víhí cúu vida rō? Cúu nájñūhun ñn vicō nūhūn jéē ñn núnúu-ni núcūhun, te yūcuān na te ndéchí-ni cuahān. ¹⁵ Chi sa vāha ga na cáhān rō: Núu cúní máa Jítoho yō te cotecu yō te sáha yó jéē yáha chí jéē yúcuān, achí rō. ¹⁶ Te sa suhva mání cácutéyí ni rō cácahān rō. Te tú vāha jeē súcuan cácutéyí ni rō. ¹⁷ Te núu ñn ñayuu jíni i sáha i jniñu vāha, te núu tu sáha i, te cuēchi cúu núu súcuan.

Jñūhun cáhān nuū tēe cúca

5

¹ Te cáhān rī jíin táca róhó tēe cúca, jéē na ndáhyú rō te ndahyū cohó ró siquī jñūndóho jeē quíji nuū rō. ² Chi ndajniñu cúca cánevāha ró, je téhyú. Te sahma vāha ró, je tēe tíquixín. ³ Te oro jíin plata cánevāha ró, chi je cáne xehyu. Te xehyu un steén jeē ní casáha ró jniñu stáhú jíin xūhun ró. Te yūcuan cúu jeē ndúnihīn cuēchi siquī rō, nájñūhun ñn ñuhūn jeē snáa yíqui cúñu rō. Chi ni cacaya cuehē rō ndajniñu vāha quivī cuándihī yáha. ⁴ Te táca tēe ni cajehnde trigo rō, tu ní cáchunaa vāha ró yáhu de. Te vijna cácana jee de nuū Yaā Dios, Yaā cúu Jítoho nuū táca ndajéhé andiví, jeē súcuan ni casáha ró. Te jíni sōho ya jeē cácana jee tēe ni cajehnde ún. ⁵ Cátecu vāha ndasí ró ini ñayīví yáha, te casáha ró táca jéē cácusī ni maá ró. Te cájito yúcún ró maá ró, te cúu ró nájñūhun quítī néñu jeē ndétu quivī cúu. ⁶ Te ni catee ró cuēchi siquī ñayuu ndaā, te nde ni cajehni rō i. Te tu ní cúu casí i jeē casáha ró.

Jeē na cóo paciencia ni yō te cacān tahu yō

⁷ Hermano, núu súcuan te coo paciencia ni rō condetu ró ndé quivī ndíji máa Jítoho yō. Tēe sájniñu ñuhun, cánuú coo paciencia ni de condetu de nde quíji saū néhen jíin

sāu néñu isa, te sáa te nihīn de nunī váha jeē jéhe itu. ⁸ Te suni súcuan coo paciencia ni rō, te ndeyí coo ni rō condetu ró, chi cuacuyajni ndee maá Jítóho yō. ⁹ Te ma cahán sōo ró siquī jeē sáha jnáhan ró, hermano, návāha ma jécondee cuēchi siquī rō. Chi maá Yaā jeē sándaā cuēchi, je yajni ndiji ya. ¹⁰ Nánī mánī, conahan ró jijnáhan ró ndese ni casáha tēe ni canacani jnūhun maá Jítóho yō nde jenahán, chi ni cacuu de ñn ejemplo nuū yō. Chi vēsú ni candoho de, te ni ñyo paciencia ni de. ¹¹ Te cáhán yō jeē ñáyuu cájendeyí ni jíin jnúndóho, ndetū cúu i sáha Yaā Dios. Chi ni cajini ró jnúhun ndese ni jendeyí ni Job jíin jnúndóho, te suni cájini rō jeē yóhyo vāha ga ni quendōo de ni sáha maá Jítóho yō ná ni yāha jnúndóho. Chi yōhyo cúndáhú ni yā yohó, te vāha ndasí ni yā jíin yó.

¹² Nánī mánī, jeē cánuú gá cúu jeē ma cahán cāha ró síhví Yaā Dios jíin jnúhun cácahān teyí ró. Ma cahán rō verdad de Dios, Yaā ndeé andiví, ni ma cahán rō verdad de Dios, Yaā chíí ñayví, te ni ñn ga jnūhun súcuan ma cahán teyí ró. Chi núu cahān rō jeē cuu, te súcuan-ni cahān rō. Te núu cahān rō jeē tuú, te súcuan-ni cahān rō, ma scāa gā rō cahān rō, návāha ma ndénehen Yaā Dios cuēchi siquī rō.

¹³ Te núu íyó ñn ró jéē ndóho jnúndóho, te na cácan tahu rō. Te núu íyó ñn ró jéē cúsi ni, te na cáta ró yaa jeē chíñúhún ró yá. ¹⁴ Te núu íyó ñn ró jéē cuhú, te na cána ró tēe jéhnu cándito ñayuu cácandíje. Te na cácan tahu de jehē ñayuu cuhú. Te jíin síhví maá Jítóho yō na chíhi de aceite i. ¹⁵ Te núu cácandíje de jeē sáha Jítóho yō jeē cájicān tahu de, yūcuán na te jnama ya ñayuu cuhú. Chi nasávāha ya i, te núu ni sáha i cuēchi, te cone cáhnu ni yā nuū i. ¹⁶ Núu súcuan te nacani ndaā rō cuēchi ró núu jnáhan ró, te cacān tahu rō jehē jnáhan ró návāha nduvāha ró jíjnáhan ró. Chi núu ñn tēe ndaā ndíhví ni de jícan tahu de, te yōhyo vāha níhín jníñu, chí sáha ya jeē jícan de. ¹⁷ Chi Elías, tēe ni nacani jnūhun Yaā Dios jenahán, suni ñn tēe jeē nájnūhun íyó maá yó ni cuu de. Te ni jícan tahu ndasí de jeē ma cúun saū, te tu ní cúun saū unī cuiyā iñū yoō. ¹⁸ Yūcuán na te ni jícan tahu tucu de, te ni cuun saū, te ni canecoo tucu tāca jéē jéhe ñuhun.

¹⁹ Nánī mánī, núu ñn ró ni stóo ichi ndaā, te núu inga rō nachuhichí ró jnáhan ró, ²⁰ núu súcuan te cuni rō jeē núu ni nachuhichí ró tēe ni quívi cuēchi, te je ni jnama ró de jeē jnahnú ndetū de núu, te súcuan íyó jnúhun cáhnu ni nuū cuehē cuēchi de.

CARTA HN JEE NI TEE SAN PEDRO APOSTOL NUU ÑAYUU CACANDIJE

¹ Máá rí cúu Pedro, apóstol jeē ní tají Jesucristo, te tée ri carta yáha cuájeē nuū rohó ñáyuu ní cajitē núu, te cáyūcu jíca ró nñí Ponto, Galacia, Capadocia, Asia, jíin Bitinia. ² Te máá Tátá yō Yaā Dios ni nacāji ya rohó, chi súcuan ni tee ni yā nde ná tu jecōo ñayīví. Te jíin Espíritu Santo ni sáha ya jeē iyó ndoo iyó íi rō cájetáhú ró núū yā, te ni nacate ya anuá rō jíin nññí Jesucristo. Te ñúhun ni rī jeē na cáyá gā tāca jéē váha jeē sáha ya rohó, jíin jéē coo ndeyí coo sñ ni rō jijnáhan ró.

Jeē ñúhun ni yō tāca jéē váha jeē cóo andiví

³ Na cáhán yō jeē yóhoyo cújéhnū Yaā Dios, Yaā cúu Tátá maá Jítóho yō Jesucristo. Chi ni cundáhú ndasí ni yā yohó, te ni sáha ya jeē ní nacacu jeé yó, siquī jeē ní natecu Jesucristo mēhñu ndíyí. Te jeē yúcuan níní cañuhun ni yō tāca jéē váha jeē coo. ⁴ Chi nihin rō tahū jeē ñúhun váha ini andiví jeē cúu ró jíjnáhan ró. Te tahū un má náā cuítí, ni ma tíví cuítí, ni ma ndíhi cuítí. ⁵ Chi cacandíje ró jéē sáha Yaā Dios jehē rō, te jeē yúcuan ndíto ya rohó jíin poder yā, návāha jnama ya rohó quívī sándñíhí, chi ni sándaā yā jeē súcuan coo.

⁶ Jeē yúcuan cácusñ ndasí ni rō, vēsú cájito ró cuéhē ndinuū jnūndóho jecu-ni quívī. ⁷ Chi nájnūhun jeē stuhvá ñayuu oro jíin ñúhūn, jító ndee i núu jeē váha cúu, suni súcuan cánuú coto ndee jnūndóho róhó núu cacandíje nihin ró chí tuú. Chi jeē cacandíje nihin ró, chi yahu ndasí gá cúu vēsú oro, ndajññu jeē náā. Te yúcuan cúu jeē cuajnúhún yá rohó, te sájéhnū ya rohó, te squéndōo yññúhún yá rohó quívī quenda ndijin Jesucristo.

⁸ Te vēsú tu ní cájito ró núū yā, te cáhīyo maní ndasí ró jíin yá. Te cacandíje nihin ró yá vēsú tu cájito ró núū yā vijna. Te yóhoyo luu cácusñ ndasí ni rō, chi nde tuá níhín cuítí yō jnūhun castūhun yó ndese cúsní ni yō. ⁹ Te nihin tahú rō jeē cācu ánuá rō, chi jeē yúcuan cúu jeē cacandíje ró.

¹⁰ Te tēe ni canacani jnūhun Yaā Dios nde jenahán, ni cananducú yúcún de ni cacajnūhun váha de siquī jnūhun ndese jnama ya yohó. Te ni cacachi de ndese sáha Yaā Dios jeē váha róhó jíjnáhan ró. ¹¹ Chi nde ná tu coo, te ni steén Espíritu Cristo nuū de jíjnáhan de ndese quiiji jnūndóho siquī Cristo jíin ndese luu ndujéhnū tucu ya jeē yáha jnūndóho ún. Te ni cananducú yúcún de jeē na jécūhun ni de ndé quívī quiiji Cristo te ndese coo tāca jéē ní cáhān maá Espíritu jeē ndeé ini de. ¹² Te ni steén Yaā Dios nuū de jeē násūu máá de coto jniñu jeē ní canacani de ún, chi sa máá yó cúu jeē cóto. Te vijna je ni cajini sōho máá ró jnūhun ún, chi tāca tēe nácani jnūhun jnama ya yohó, ni canacani de nuū rō, ni sáha poder Espíritu Santo jeē ní quiiji ichi andiví. Te jnūhun ún chi nde maá ndajéhe Yaā Dios cánanducú návāha na jécūhun ni.

Cúni yā jeē coo ndoo ánuá yō

¹³ Jeē yúcuan ndito na cóo xinī rō jijnáhan ró, te cájí coo ni rō. Te cocuhun ndasí ni rō jeē nihín rō tāca jéē váha jeē sáha Yaā Dios rohó quívī quenda ndijin Jesucristo. ¹⁴ Te na cúu ró séhe jeē cájetáhú váha. Te ma sáha ga rō tācá jniñu jeē ní cacusñ ni rō sáha ró nde ná tu jecūhun ni rō jnūhun Yaā Dios. ¹⁵ Chi sa suhva na cóo ndoo ánuá rō jíin táca jniñu cásáha ró, chi Yaā ní cana róhó, Yaā iyó ndoo cúu ya. ¹⁶ Chi súcuan cáhán tutu íi: Na cóo ndoo ró jíjnáhan ró, chi ruhū iyó ndoo ri, achí yá.

¹⁷ Te núu cácahān rō Tátá rō jíin Yaā Dios, núu súcuan te na cáca yññúhún ró nuū yā tāca quívī jéē cájica ró ñayīví yáha. Chi máá yá sándaā siquī ndese ni casáha ññ yó, te tu sáha ya cuenta ndese cúu ññ yó, chi ñnuú sáha ya jíin ndíhi yó. ¹⁸ Chi ni jnama ya rohó núū tācá costumbre jeē ní cajequin jíi rō, jeē ní cajejññu cāha ró núū. Te cájini váha ró jéē yahu cúu jeē ní jnama ya rohó. Chi tu ní chúnaa yā jíin ndajññu jeē náā, nájnūhun oro jíin plata, ¹⁹ chi sa suhva jíin nññí Cristo jeē yáhu ndasí gá cúu. Chi ni socō yā máá yá nájnūhun ññ londe, quiiti iyó váha iyó ndoo. ²⁰ Chi jeē yúcuan ní jeni Yaā Dios

maá Cristo nde ná tu jecōo ñayīvī, te ni cane ndijin Cristo maá tiempo cuándihī yáha, návāha quendōo vāha ánuá rō jijnáhan rō. ²¹ Te jeē jíin Cristo te cácanđije rō Yaā Dios. Chi ni sáha Yaā Dios jeē ní natecu yā mēhñu ndíyi jíin jéē ní ndujéhnu ya. Te jeē yúcuan cácanđije rō Yaā Dios, te cáñuhun ni rō coto rō yá.

²² Te vijna chi je ni candundoo ánuá rō, chi ni cajetáhú rō jnūhun ndaā ni sáha Espíritu jíin rō, návāha cundáhú ndije ni rō hermano cácanđije. Núu súcuan te na cúndáhú ndasí ni rō jnáhan rō nde jíin ini jíin ánuá rō. ²³ Chi je ni canacacu jeé rō, te nasūu chíji yucūn ñayuu jeē cúu. Chi sa jnūhun Yaā Dios jeē ndíto técu ní cáni ni sáha jeē ní nacacu rō.

²⁴ Chi súcuan cáhán tutu i:

Nájnūhun yucū cúu ndihī tāca ñáyuu, chi jecu-ni quivī técu i.

Te nájnūhun ita yucū cúu jeē cujéhnu i.

Chi íchí-ni yucū, te ndáhvā-ni ita.

²⁵ Te jnūhun Jítoho yō Yaā Dios, sa quéndōo ní cáni.

Achí tutu. Te jnūhun un cúu máá jnúhun jnáma ya yohó jéē ní canacani ri nuū rō.

2

¹ Núu súcuan te na siáá rō tācá jniñu néé, tāca jéē stahú, jéē tú ndije, jeē cucuésún ni, jíin jéē sajnúhún síquī jnáhan. ² Te nájnūhun sūchi yíquín sá ní cacu jeē jéxin te jéhnu, súcuan na cóndihvī ni rō scuáha rō jnúhun ndaā yā, návāha cuehnu rō jíin te cácu ánuá rō. ³ Chi je cájini rō jeē yóhyo vāha ni maá Jítoho yō.

Cristo cúu nájnūhun yuū yítuu vehe

⁴ Núu súcuan te manī gā coo rō jíin náhan rō jíin Jítoho yō Cristo. Chi cácuu rō nájnūhun templo nuū ndeé Yaā Dios, chi ndeé yá ini anuá rō. Te Cristo cúu nájnūhun ñn yuū cánuú gá jeē yítuu yiquī templo, te sáha ya jeē cótecu rō ní cáni. Te ñayuu vēsú ni casquéhichī i ya, te Yaā Dios chi je ni nacāji ya Cristo chi cánuú ndasí yá, nájnūhun nacāji yó ñn yuū váha jeē quítuu yiquī vehe. ⁵ Te máá rō chi cácuu rō nájnūhun ñn ñn yuū jeē cúvāha templo Yaā Dios, te cotecu rō ní cáni. Te na cuáha rō jnúhun jeē sama ya rohó jíin náhan rō jéē cúvāha templo yā, cúu jeē ndeé Espíritu yā ini anuá rō nájnūhun ini ñn templo. Te suni cúni Yaā Dios jeē cuu rō sūtū cáhīyo ndoo cájejniñu nuū yā. Chi síquī jeē ni sáha Jesucristo jehē rō, te na sócō rō maá rō jeē cuajniñu rō núu yā sáha rō tāca jniñu váha jeē núnahan ni Yaā Dios. ⁶ Chi súcuan cáhán tutu i:

Vijna te nde ñuu rī Sion jéquin rī ñn yuū jeē cánuú gá jeē quítuu yiquī vehe,

chi ni nacāji ri yā nájnūhun ñn yuū váha jeē cánuú téyí.

Te ñayuu jeē candíje i ya, jnama nahín yá i.

Achí Yaā Dios, áchí tutu. ⁷ Te máá rō jeē cácanđije rō, chi yuū váha jeē cánuú téyí cúu ya nuū rō. Te nuū ñayuu tu cácanđije chi tuú, chi sa cúndaā jeē cahán tutu i:

Máá yúu jeē ní casquéhichī tēe cásama vehe,

suu cúu yuū cánuú gá yítuu yiquī vehe.

⁸ Te suni cúndaā jnūhun jeē cahán tutu síquī ñayuu tu cácanđije:

Cúu ya nájnūhun ñn yuū jeē cácachihī i jehē i,

nájnūhun toto jeē cotúú i sáha.

Achí. Chi jeē cácachihī i jehē i cúu jeē casániñni ni i nuū jnúhun ya. Te je ni cundaā jeē jnahnú ndetū i síquī jeē cáacunihni ni i.

Jnūhun ñayuu maá Yaā Dios

⁹ Te máá rō cácuu ñayuu jeē ní nacāji Yaā Dios. Te suni cácuu rō sūtū cájejniñu nuū maá Yaā cúu Rey, te ñayuu cáhīyo ndoo, jíin ñayuu maá yá cácuu rō. Súcuan ni sáha Yaā Dios rohó návāha nacani rō jnúhun ndese yóhyo jéhnu jniñu sáha ya, chi máá yá ni cana rohó ná ni coyūcu rō nájnūhun nuū néē. Te ni squívicoo ya rohó núu luz yā jeē yóhyo vāha stéén yā ini anuá rō. ¹⁰ Chi nde saá te nasūu ñayuu Yaā Dios cácuu rō, te vijna je ni nduu rō ñayuu maá yá. Te nde saá chi ná tu cundáhú ni yā rohó, te vijna je cúndáhú ni yā rohó jíin náhan rō.

Jeē cuajniñu vāha yó núū Yaā Dios

¹¹ Ñānī mánī, ini ñayīvi yáha cácuu ró nájnūhun ñayuu ñuu jicá jéē cájica cuu tátú. Núu súcuan te cáhán ndahú rí jíin ró jéē ma sáha ró táca jniñu jeē ndíyo néé ni rō jíin modo maá ró. Chi táca un cájejnáhan jíin ró, ndúcú jéē jnahnū ndetū anuá rō. ¹² Te ndaā na cáca ró méhñu ñáyuu tu jíin jnūhun Yaā Dios. Chi vēsú cácahān i siquī rō, nájnūhun cácahān i siquī ñáyuu casáha jniñu néé, te núu na cóto i jniñu vāha casáha ró, te quivī sándaā Yaā Dios jniñu te cahān i jeē yóhoyo cújéhnū ya.

¹³ Jeē siquī maá Jítoho yō te cuatáhú ró nuū tāca tóhō cándiso jniñu nuū ñáyuu. Cuatáhú ró nuū maá rey, chi tēe cújéhnū ga cúu de. ¹⁴ Te cuatáhú ró nuū tāca gobernador jeē ní jeni rey návāha stóho de ñayuu casáha jniñu néé te cuajnúhún de ñayuu casáha jniñu vāha. ¹⁵ Chi cúní Yaā Dios jeē sáha ró jniñu vāha, te jeē súcuan sáha ró te tāca ñáyuu canéé jéē tu cájecūhun ni, casi i yuhu i.

¹⁶ Te na cáca ndaā rō jeē cácuu ró ñáyuu ni nduu libre anuá, te nasūu jéē ní nduu libre rō jeē sáha ró jniñu néé. Chi sa cácuu ró mozo Yaā Dios, te cuajniñu vāha ró núū yā. ¹⁷ Coo respeto rō nuū tāca ñáyuu. Cundáhú ni rō hermano cácañje. Conso iyo ró núū Yaā Dios. Coo yíñúhún ró nuū maá rey.

Jeē na ndóho yó jéhē jnāhan yó nájnūhun ni ndoho Cristo

¹⁸ Róhó jéē cácuu mozo, cuatáhú ró nuū patrón rō, te coo respeto rō nuū de. Te nasūu máa-ni nuū tēe vāha ni jíin tēe vītá ni, chi suni nuū tēe xeēn ni. ¹⁹ Chi ñin jeē vāha cúu núu jéndeýí ni ñin tēe jeē stóho cáha ñáyuu de siquī jeē squícu de nuū Yaā Dios. ²⁰ Chi núu cástóho i róhó jéē casáha ró cuéchi, te ni ñin ma cuajnúhún róhó núu jéndeýí ni rō jíin jeē ndóho ró. Te núu cástóho i róhó jéē casáha ró jniñu vāha, te núu jéndeýí ni rō jíin, yāha cúu jeē vāha jeē nújnahan ni Yaā Dios. ²¹ Chi jeē yúcuan cúu jeē ní cana ya rohó jíjnahan ró. Chi suni máa Cristo ni ndoho ya jeē siquī rō, te súcuan ni cuu ya ñin ejemplo nuū rō jeē na ndóho ró jéhē jnāhan ró, te súcuan condiquin rō ichi ya. ²² Te máa yá tú cuiti na cuéchi ní sáha ya, ni tú cuiti na jnūhun stáhú ní cáhán yā. ²³ Ná ni cacahān neé i nuū yā, te tu ní nácahān neé yá. Te ná ni castóho i ya, te tu ní téjnahan ya jíin i, chi sa ni chihi ya maá yá ndaha Yaā Dios, Yaā sándaā vāha siquī ndíhi ún. ²⁴ Te ni condiso máa Cristo cuéchi yó jíin yiqui cúñu yā ná ni jihí yā jicā cruz, návāha quenda yó chíji cuéchi te caca ndaā yō. Chi ni tují yā, te jeē yúcuan ní canduvāha ánuá rō. ²⁵ Chi ni casana ró nájnūhun lanchi, te vijna je ni candicó ró ni ndívicoo ró núū Cristo, Yaā cúu pastor rō te ndíto vāha ya anuá rō.

Ndese cánúú coyūcu vāha yíi jíin ñasihi

3

¹ Suni súcuan róhó ñasihi jíjnahan ró, cuatáhú ró nuū yíi ró, návāha núu cúu de tēe tu cándíje jnūhun ya, te cuu scándíje ró de, jeē tuá niní jíin jéē cahán rō, chi máa jíin jéē casáha vāha ró. ² Chi cuni de jeē cájica ndaā rō te cáhīyo respeto rō. ³ Te jeē casáha luu ró máa ró, chi nasūu máni máa ichi síquī rō sáha ró, jeē sáha luu ndasí ró xiní rō, chí jéē cúhun ró síquī oro chí sahma vāha ga. ⁴ Chi sa nducú ró jeē quéndōo luu ánuá rō, te coo luu ró ñin modo jeē ma náā cuiti, suu jeē cóo vītá ni rō te coo nahín ni rō. Chi yāha cúu jeē yahu ndasí gá nuū Yaā Dios. ⁵ Chi ñahan ní cahīyo ndoo ánuá nde jenahán, suni súcuan ni casáha luu ña ánuá ña. Chi ni cañuhun ni ña Yaā Dios, te ni cajetáhú ña nuū yíi ña. ⁶ Te súcuan ni sáha Sara, chi ni jetáhú ña nuū yíi ña Abraham, te ni cahān yíñúhún ña jíin de. Te róhó jíjnahan ró, núu sáha vāha ró te núu ma yūhu ró ni ñin, yūcuán na te coo ró nájnūhun ni iyo Sara.

⁷ Te suni súcuan róhó yíi, na cóo vītá ni rō jíin ñasihi ró. Te yíñúhún coo ró jíin ña, siquī jeē núu ga fuerza ña vēsú rohó, te suni siquī jeē inuú ní canihin tahu rō cotecu rō níhí cáni siquī jeē vāha ni Yaā Dios. Te súcuan sáha ró návāha tú casi nuū jnūhun jícan tahu rō.

Jnūhun ñayuu cándoho siquī jeē cájica ndaā

⁸ Núu súcuan te ìnuú na cáni ni rō jijnáhan ró, te cucuíhyá ni rō jeē ndóho jnáhan ró, te cundáhú ni rō i nájnūhun ñani rō. Te na cóo manī rō te cani suchí ni rō. ⁹ Núu cásáha neé ñáyuu jíin ró, te ma nasáha neé ró jíin i. Te núu cácahān neé i nuū rō, te ma nácahān neé ró núu i. Chi sa suhva cacān tahu rō jeē na quéndōo vāha i. Chi Yaā Dios ni cana ya rohó jéē suni súcuan quendōo vāha ró. ¹⁰ Chi súcuan cáhán tutu ìi:

Ñayuu cácu ni cotecu vāha te cusī ni tāca quívi,
na cóto i yuhu i jeē ma cáhán neé i,
te na cóto i jeē ma cáhán i jnūhun stáhú.

¹¹ Na cújiyo i nuū jniñu neé, te na sáha i jniñu váha.
Na ndúcú i coyūcu mánī i, te na cóndihvī ni i jíin.

¹² Chi máá Jítóho yō ndító ya ñayuu ndaā,
te jíni nahín yá jeē cájicān tahu i.

Te ñayuu casáha jniñu neé, chi tu jétáhú yá i.
Achí tutu.

¹³ Te ni ìin ma sáha neé jíin ró te núu mánī jniñu váha cándihvī ni rō sáha ró. ¹⁴ Te vésú núu ndóho ró síquī jeē cájica ndaā rō, te yōhyo ndetū cácu ró. Núu súcuan te ma yūhu ró coto ró i, ni ma cunéé ni rō. ¹⁵ Chi sa jíin ini jíin ánuá rō chiñúhún ró máá Jítóho yō Cristo. Te níni coo tūhva ró nastío cuñí vīta ró te cahān yñúhún ró jíin ñáyuu jeē castíhí rohó síquī tāca jéē cáñuhun ni rō. ¹⁶ Te caca ndaā rō jeē tú na cuēchi condee anuá rō, návāha ñayuu cácahān neé síquī rō, cucanu i jeē ni stáu yáhu i rohó jéē cájica ndaā rō chi cácañíje ró Cristo. ¹⁷ Chi núu cúní Yaā Dios te vāha ga jeē ndóho ró síquī jeē casáha ró jniñu váha vésú síquī núu sáha ró jniñu neé.

¹⁸ Chi máá Cristo suni ni ndoho ya, te ìin jínu-ni ni jihī yā jeē síquī cuéchi ndíhi yó. Yaā vāha cúu ya, te ni ndoho ya jehē yohó ñáyuu ní casáha jniñu neé, návāha quívicoo yó núu Yaā Dios sáha ya. Chi ni jihī yíqui cúñu yā, te ánuá yā chi técu-ni ní cáni. ¹⁹ Te ná ni jihī yā te ni jehēn anuá yā ni nacani ya jnūhun nuū anuá ñayuu cáyindihyū. ²⁰ Chi nde jenahán tu ní cájetáhú i, ná ni iyo paciencia ni Yaā Dios te ni condetu ya níni sáha Noé barco jeē naní arca. Te jíin arca un ní cácu jecu-ni ñayuu, chi unā-ni i ní cácu nuū ndúte. ²¹ Te nájnūhun ni cacācu i nuū ndúte, súcuan cúu jeē jéndute yó vijna te cácu ánuá yō. Te jeē jéndute yó, nasūu jéē ndúndoo yíqui cúñu yō, chi sa jeē jicán yō nuū Yaā Dios jeē ndúndoo ánuá yō. Te súcuan te cácu yó, chi ni cundúú yó jíin Jesucristo nuū jnūhun ni natecu yā. ²² Te ni ndaa ya cuanuhun yā andíví, te ndéé yá ichi ndávāha Yaā Dios nuū cujéhnu ya. Te tācá ndajéhé andíví, jíin jéē cándacu jniñu, jíin jéē cájni poder, cájendetū nuū yā.

Jeē na cuájniñu yó jíin táhū jeē ni jéhe ya nuū yō

4

¹ Núu súcuan te nájnūhun ni ndoho Cristo jehē yō jíin yíqui cúñu yā, suni súcuan na táva ni máá ró ndoho ró. Chi ñayuu jeē ní ndoho jíin yíqui cúñu, tuá sáha i cuéchi. ² Núu súcuan te ní tiempo jeē cuahán gā rō, na sáha ró jniñu jeē cúní Yaā Dios, te ma sáha ga rō jniñu jeē ndíyo neé ni rō jíin modo máá ró. ³ Chi nde ní véji ró, te ni casáha ró cuéhe cuéchi jeē cánujnahan ni rō síquī jeē tu ní cájini rō jnūhun Yaā Dios. Te tiempo un mánī máá jéē neé ni casáha ró, te ni candiyo ni rō tāca jéē neé, ni canajīni ró, ni casáha ró vico neé, ni cajihí ndasí ró nuū víco ró, te ni cachiñúhún ró ídolo jeē ni cáhān Yaā Dios jeē ma chíñúhún yó. ⁴ Te cácu neé ni i jeē tuá cájica ró jíin i jeē sáha ró táca cuéchi xeēn jíin i. Te jeē yúcuan cúu jeē cácahān neé i síquī rō. ⁵ Te máá i chi ìin quívī te nacuaña i cuenta nuū máá Yaā jeē iyó tūhva ya sándaā yā jniñu ñayuu técu jíin ñáyuu ní cajihí. ⁶ Chi jeē yúcuan suni ni quiji jnūhun vāha ya nuū tāca ndíyi ná ni cotecu i. Te ni cundaā síquī cuéchi ni casáha i ñayívi yáha, nájnūhun cundaā síquī ndíhi ñayuu, návāha nacani ni i te cotecu anuá i ní cáni nájnūhun técu Yaā Dios.

⁷ Te je cuacuyajni quívī jeē náā tāca jéē iyó. Núu súcuan te ndito na cóo xinī rō jijnáhan ró, te condihvī ni rō cacān tahu rō. ⁸ Te jeē cánuú gá cúu jeē cundáhú ndasí ni rō jnáhan

ró. Chi núu cundáhú ni yō jnáhan yó, te íyó jnúhun cáhnu ni nuū cuehē cuēchi. ⁹ Sáha vāha ró jíin ñayuu jeē jinú i vehe ró, te ma cúxii ni rō. ¹⁰ Tāca ró cuajníñu ró núu jnáhan ró, núu ndese íyó máá táhū rō jeē ni jéhe Yaā Dios jeē cuajníñu ró núu yā. Te squícu vāha ró jíin táhū jeē sñin sñin ni jéhe ya nuū ñin ñin ró. ¹¹ Núu tahū jeē nácani ró jnúhun cúu, te na cáhán rō nájñuhun jeē maá Yaā Dios cahán. Te núu tahū jeē chindéé ñáhán ró jnáhan ró cúu, te na sáha ró jíin fuerza jeē ni jéhe ya nuū rō, návāha jíin ndihi jeē casáha ró te cahán ñayuu jeē yóhoyo cújéhnu Yaā Dios siquī jeē ni sáha ya jíin Jesucristo. Te na cáhán yō jeē luu cújéhnu Cristo te jñí ya poder ní cáni. Amén.

Jeē ndóho yó síquī jeē candíje yó Cristo

¹² Ñánī mánī, núu vēji jñundóho xeēn jeē coto ndee rohó, te ma cunéé ni rō cani ni rō jeē maá ró ni nihin jñundóho xeēn gā. ¹³ Chi sa cusñi ni rō jeē cándoho ró jecu jñundóho jeē ní ndoho Cristo, návāha suni cusñi ndasí ni rō quivī quénda ndijin yā jeē cujéhnu luu ya. ¹⁴ Te yóhoyo ndetū rō te núu cácahán neé i nuū rō siquī jeē cáncandíje ró Cristo. Chi máá Espíritu Yaā Dios jeē cujéhnu ndasí, ndéé yá ini rō. Máá i chi cácahán neé i síquī yā, te máá ró chi cáchiñúhún ró yā. ¹⁵ Te núu ndoho ró, te na ndóho ró síquī jeē cáncandíje ró Cristo. Te ma ndóho ró síquī tāca cuéchi nájñuhun cándoho ñayuu jéhni ndíyi, ñayuu sacuíhná, ñayuu sáha jniñu neé, jíin ñayuu quívī nduu nuū jniñu jnáhan jeē tu cánuú quívī nduu. ¹⁶ Te sa núu ñin ró ndóho siquī jeē candíje ró Cristo, te ma cúcanu rō, chi sa nacuatáhú ró nuū Yaā Dios siquī jeē cúu ró cristiano.

¹⁷ Chi je ni jinū quivī jeē quejéé sándaā Yaā Dios cuéchi, te xihna gā ñayuu cácuu sēhe ya sándaā yā cuéchi. Te núu xihna gā cuéchi máá yó quejéé yá sándaā yā, núu súcuan te xeēn gā coo jeē ndénehen ya cuéchi siquī ñayuu jeē tu ní jétáhú jnúhun vāha ya. ¹⁸ Te núu yóhoyo yí cácu ñayuu vāha, núu súcuan ¿te ndese cácu ñayuu casáha jniñu neé jíin táca cuéchi? ¹⁹ Núu súcuan te róhó jéé cándoho siquī jeē súcuan cúní Yaā Dios, ma jécuiñi rō sáha ró jniñu váha, te na chíhi ró máá ró ndaha máá Yaā jeē ni sáha róhó, chi squícu ya jeē ni jéjñuhun ya.

Jeē jéhe de consejo ñayuu cáncandíje

5

¹ Vijna te na cáhán rī jíin táca róhó téé jéhnu cándito ñayuu cáncandíje, chi suni téé jéhnu ndíto ñayuu cáncandíje cúu máá rí. Te cúu ri testigo jeē ní jito ri ndese ni ndoho Cristo. Te suni ndujéhnu ri jíin ró sáha Cristo quivī quénda ndijin yā. ² Na cóto yúcún ró ñayuu jeē ndee jniñu ró condito ró, jeē cácuu i nájñuhun lanchi Yaā Dios. Te na cúsiñi ni rō condito ró i, chi súcuan cúní Yaā Dios. Te nasūu síquī jeē sáfuerza yā rohó, ni nasūu síquī jeē nihín rō xūhún, chi sa siquī jeē cúní rō cuajníñu ró. ³ Te nasūu jéé ndacu nihin ró jniñu nuū ñayuu cándito ró, chi sa nducú ró cuu ró ñin ejemplo nuū i jeē cácuu i lanchi ya. ⁴ Yūcuán na te quivī quénda ndijin maá Yaā cúu Pastor cujéhnu nuū rohó téé cácuu pastor lanchi ya, te cuāha ya premio nuū rō jijnáhan ró jéé yóhoyo luu te ma náā cuítí.

⁵ Te suni róhó táca téé suchí, na cuándetū rō nuū táca téé jéhnu jíñā. Te ndihi róhó ñayuu cáncandíje, cuándetū rō nuū jnáhan ró, te cani suchí ni rō. Chi suhva cáhán tutu: Yaā Dios jési yā nuū ñayuu casáha téyí máá, te vāha ni yā chindéé ñáhán yá ñayuu casáha suchí máá.

Achí. ⁶ Núu súcuan te na cáni suchí ni rō, chi cáyihí ró ndaha Yaā Dios jeē jñí poder. Te sájéhnu ya rohó, na jínú maá quívī. ⁷ Tāca jéé cáncani ndasí ni rō siquī, chihi ró ndaha máá yá te máá yá coto, chi ndíto ya rohó.

⁸ Te cájī na cóo xiní rō te ndíto coo ni rō. Chi jexeén jeē jíto uhū rohó, jíca cuu ndúcú squívī róhó jíjñáhan ró núu cuéchi. Te xeēn gā sáha vēsú ndicaha jeē íyo ndáhyú. ⁹ Te cuiñi nihin ró jéé ma cúndeyí jexeén jíin ró, te nihin candíje ró jnúhun cundáhú ni yā rohó. Chi cájini rō jeē suni súcuan cándoho hermano rō jeē cáyūcu ní cáhnu ñayíví. ¹⁰ Te núu ni jinū jeē ndoho ró jecu-ni tiempo, te Yaā Dios chí sáha ya jeē ije vāha ni rō jíin jnúhun ya, jíin jéé cuiñi nihin ró, te cuāha ya fuerza ini rō, te quendōo cutú ró ní cáni.

Chi máá yá cúu jeē sáha tāca jéē váha yóhó, te ni cana ya yohó jéē cujéhnu luu yó jíin yá ní cáni, siquī jeē nduú yó jíin Jesucristo. ¹¹ Te na cáhán yō jeē yóhyo luu cújéhnu ya te jní ya poder ní cáni. Amén.

Saludo jeē sándihí

¹² Jíin rī jeē Silvano cúu ñin hermano jeē squícu vāha. Te máá de cuajeē nuū rō jíin carta yáha jéē ní tee ri jecu jnūhun. Te jíin yáha stíhví ni rī rohó, te cáhán rī jíin ró jeē ndaá cúu jeē tāca jéē váha ni sáha Yaā Dios rohó, suu stéén nuū rō jeē cundáhú ndije ni yā rohó. Te na cuñi níhin ró jíin jnúhun yáha.

¹³ Ñayuu cá candije jeē cáyūcú ñuu Babilonia, jeē ní nacāji ya i nájñūhun ni nacāji ya rohó, cáhān i jeē sándeýí ni rō. Te Marcos, tēe cúu nájñūhun sēhe ri, suni sūcuan cáhán de. ¹⁴ Te núu na cáhán rō jíin jnáhan ró, te techūhu mánī rō ndaha i.

Te na cóo ndeyí coo sī ni ndihí ró jéē cáyihí ró ndaha Jesucristo. Sūcuan na cóo. Amén.

CARTA UU JEE NI TEE SAN PEDRO APOSTOL NUU ÑAYUU CACANDIJE

¹ Máá rí cúu Simón Pedro, te cúu ri mozo Jesucristo, te cúu ri apóstol jeē ní tají yá. Te tée ri carta yáha cuájeē nuū rō jijnáhan ró, jeē ni sáha Yaā Dios jeē inuú-ni jíin rí jijnáhan ri ni canihin rō jnūhun luu váha jeē cácanđije yó yá. Chi Yaā ndaā cúu Yaā Dios, suu máá Jesucristo jeē jnáma yóhó. ² Te ñūhun ni rī jeē na sáha ga yā jeē váha ndasí róhó jíin jéē yóhyo coo ndeyí coo siñ ni rō siquī jeē cájecūhun vāha ni rō ndese Yaā cúu Yaā Dios jíin Jítoho yō Jesús.

Siquī ndese cánuú coo ñayuu cácanđije

³ Te Yaā Dios, jíin poder yā ni jēhe ya nuū yō tāca jéē sáha jeē cúu caca ndaā yō nuū yā jíin jéē chiñúhún váha yó yá. Chi ni steén yā maá yá nuū yō, chi cúu ya Yaā jeē ní cana yóhó, siquī jeē yóhyo cújéhnū ya jíin tāca jniñu jéhnū sáha ya. ⁴ Jeē yúcuan ní jejnūhun ya tāca jéē yóhyo jéhnū yóhyo vāha sáha ya yohó, návāha jíin tāca ún te nduu ró nájñūhun íyó máá yá, te cācu ró núū jniñu jeē cándiyo néé ni ñayuu casáha i ini ñayivi yáha. ⁵ Núu súcuan te na ndúcú ndeyí ró jíin jnūhun yáha. Te jeē cácanđije ró, te siquī ún na chisóó ró jeē caca ndaā rō. Te jeē cájica ndaā rō, te siquī ún chisóó ró jeē cóndihví ni rō jecūhun vāha ni rō. ⁶ Te siquī ún chisóó ró jeē casi rō modo jeē cuní maá ró. Te siquī ún chisóó ró jnūhun cuandeyí ni rō, te siquī ún chisóó ró jeē chiñúhún váha ró Yaā Dios. ⁷ Te siquī ún chisóó ró jeē cóo manī rō jíin jnāhan ró, te siquī ún chisóó ró jeē cundáhu ni rō jnāhan ró.

⁸ Chi núu cayā tācá jniñu yáha jíin ró, te suu sáha jeē ma cótecu saá-ni ró, chi sa quee vāha jniñu sáha ró, síquī jeē cájecūhun ni rō ndese Yaā cúu Jítoho yō Jesucristo. ⁹ Te ñayuu jeē tu casáha jniñu yáha, nájñūhun jeē cáhīyo cuáá i, chi tu jécūhun ni i jnūhun ya, te je ni naa ni i jeē ni sándoo ya i tāca cuéchi ni casáha i ichi yátá. ¹⁰ Jeē yúcuan na ndúcú ndeyí ró hermano, návāha coo seguro jeē ní cana ya rohó jíin jéē ní nacāji ya rohó. Chi núu sáha ró tāca jniñu yáha, te ma cáca yátá cuíti rō. ¹¹ Yūcuán na te nune vāha ichi quivi ró ini ñuu maá Jítoho yō Jesucristo, Yaā jnáma yóhó, nuū ndácu ya jniñu ní cáni.

¹² Jeē yúcuan ma jécuiñi rī sáha ri jeē núcūhun ni rō tāca jnūhun yáha, vēsú je cájini rō te cáhīin nihin ró jíin jnūhun ndaā jeē cácanđije ró. ¹³ Chi jéni ni rī jeē iyó váha stíhví ni rī rohó vijna técu gā rī, návāha nucūhun ni rō. ¹⁴ Chi máá Jítoho yō Jesucristo ni castūhun yá nuū rī jeē tuá cotecu nahán rí ñayivi yáha. ¹⁵ Jeē yúcuan na ndúcú ndeyí gā rī stíhví ni rī rohó, návāha núu je ni jihī rī, te níni nucūhun ni rō tāca jnūhun yáha.

Jeē ní cajito de jeē cújéhnū Cristo

¹⁶ Ná ni castéén rī jnūhun máá Jítoho yō Jesucristo nuū rō, ndese ndiji ya jíin poder yā, te tu ní cácahān rī ñin cuento-ni jeē ní catava ndichí ñayuu. Chi ná ni cahīyo ri jíin yá xinī yúcu, te ni cajito jíin núū rī jeē tucu ni nduu ya jeē ní nduluu jéhnū ya. ¹⁷ Chi ni cajini rī jeē Tatá yō Yaā Dios ni cahān yñúhún yá jíin Jesús, te ni sajeñu ya Jesús. Chi ichi ándiví ní quiji jnūhun luu, ni cahān Yaā Dios: Yāha cúu Sēhe ri jeē maní ndasí rí jíin, te cúsiñ ni rī jíin, áchí yá. ¹⁸ Te ni cajini sōho ri jnūhun un jéē ni cáhān ichi ándiví, chi ni cahīin ri jíin máá Jítoho yō xinī yúcu ñi ún.

¹⁹ Te súcuan cájini yō jeē iyó ndáa ndije tāca jnūhun ni catee tēe ni canacani jnūhun ya nde jenahán. Te vāha jeē na chúhun ni rō jnūhun un jijnáhan ró, chi suu cúu nájñūhun ñin luz jeē cayú nuū néé, nde na cúndijin quivi ndíji ya, te steén yā ini anuá rō nájñūhun jeē ndíndéé lucero. ²⁰ Te xihna gā na jécūhun ni rō jeē ni ñin jnūhun cáhán tutu ñi, nasūu jéē súcuan-ni ni cajeni ni tēe cúu. ²¹ Chi tāca tée ndoo jeē ní canacani jnūhun ya nde jenahán, tu ní cácahān cuíti de jnūhun jeē cúu ni maá de. Chi sa suhva ni canacani de jnūhun Yaā Dios jeē ni steén Espíritu Santo nuū de.

Siquī tēe cástéén jnūhun stáhú
(Judas 4-13)

2

¹ Te mēhñu ñáyuu Israel ún suni ni cahīyo tēe ni canacani jnūhun stáhú. Te suni súcuan coo tēe stéén jnūhun stáhú méhñu ró. Te squívi de jnūhun stáhú jéē tívi ñáyuu sáha. Te ni ma cuajnúhún de Jitoho yō jeē jnáma ya de, te súcuan sáha de jeē jnahnū ndetū yachī de. ² Te cuehē ñayuu condiquīn i modo neé jéē castéén de. Te sáha de jeē cahán neé ñáyuu siquī jnūhun vāha ya jeē cúu ichi ndaā. ³ Te siquī jeē cándiyo ni de xūhún, te quende de xūhun ró siquī jnūhun stáhú stéén de nuū rō. Te tu quíxín jnūndóho jnahnū ndetū de, chi nde jenahán je ndétu jnūhun ndonda ya siquī cuéchi de.

⁴ Chi tu ní íne cáhnu ni Yaā Dios nuū tācá ndajéhé yā jeē ní casáha cuēchi, chi sa ni jnaa yā infierno cáyindihyū nuū neé, cánuhnī jíin cadena. Te ni chindihyū yā nde quivī sándaā yā siquī. ⁵ Te suni tu ní íne cáhnu ni yā nuū ñáyuu jenahán, chi sa ni scúun ya saū xeén siquī ñáyuu ni casáha neé un. Te máa-ni Noé, tēe ni nacani jnūhun ndaā, ni scácu ya de jíin úxā gā ñayuu. ⁶ Te suni ni ndonda ya siquī cuéchi ñayuu ñuu Sodoma jíin ñuu Gomorra, te ni cayū ñuu i ni nduu máá yāā na. Te súcuan cúu i ñin ejemplo nuū tāca gā ñayuu sáha neé jéē quíji ga. ⁷ Te ni scácu ya Lot, chi tēe ndaā ni cuu de, te ni cucuíhyá ndasí ni de ni jito de jniñu neé ní casáha ñayuu neé un. ⁸ Chi tēe váha un ní condee de mēhñu ñáyuu ún, te ndiquivī ni nacani cuíhyá ni de jeē ní jini sōho de ni jito de tācá jniñu neé ní casáha i. ⁹ Núu súcuan te máá Jitoho yō chi jnáma ya ñayuu cáchiñúhún núu yā, te núu vēji jnūndóho siquī i. Te chíndihyū yā ñayuu casáha neé, návāha ndoho i castigo quivī sándaā yā cuéchi i.

¹⁰ Te víhyá gā stóho ya tēe casáha jniñu jnéhén jéē ndíyo neé ni de, te cácuu jéē ni de siquī jniñu ndácu máá Jitoho yō. Nihni ndasí ni de, te cáhundeyí ni de sáha de jeē cácuu maá de, te tu cáyūhú de cahán ndevāha de siquī tāca jéē cácujuhnu nuū sucún. ¹¹ Te ni máá ndajéhé jeē cáhiin nuū Jitoho yō, vēsú cácujuhnu ga yā jíin fuerza jíin jniñu ndíso ya, te tu cácahán ndevāha ya siquī tāca jéē cácujuhnu ún.

¹² Te tēe ún chi cácuu de nájnūhun quitī yúcu jéē ni jéconaā tī jíin modo sáha tī, te cátahū tī návāha nihīn ñayuu tī cahni i tī. Chi cácahán neé de siquī tāca jéē tu cájecūhun ni de. Te cuu de nájnūhun jíiní tācá quitī ún. ¹³ Te jeē ní castóho de ñayuu, suni súcuan nanihīn de ndoho de. Te cácusī ni de jíin táca jéē cácajni ni de, te casáha de tācá jniñu jeē cándiyo neé ni de. Te cácuu de tēe quini jeē casáha jniñu cúcanu ñayuu. Te jeē cándutútú de jíin ró vico ró, te níiní cácusī ni de jíin jniñu neé jniñu stáhú.

¹⁴ Te cándiyo ni de cájito de ñahan, te tu cájecuīñī de sáha de cuéchi. Te cástáhú de ñayuu tahya ni. Chi ni cacāan de jíin jnūhun ndíyo ni de tācá ndajniñu. Te tēe jnahnū ndetū cácuu de. ¹⁵ Te ni casana de, chi ni castóo de jnūhun jeē cúu ichi ndaā. Te ni candiquīn de modo Balaam, tēe ni nacani jnūhun nde jenahán, séhe Beor. Chi tēe un ní cusī ni de nihīn de xūhun síquī jnūhun neé jéē cahán de. ¹⁶ Te ñin burro ni cahán tī nájnūhun ñin ñayuu, vēsú quitī ñihín cúu tī. Te ni cahán tī nuū tēe ún, te súcuan ni jesi tī jeē ma quihín de cahán de tāca jnūhun neé stívi.

¹⁷ Te tāca tēe súcuan chi cácuu de nájnūhun tesōco íchi, nájnūhun vicō jeē stehí táchī. Te jnahnū ndetū de quívicoo de nuū neé nuū lúchi jnúu coyūcú de nñí cáni. ¹⁸ Chi yōhyo cásándúxí de máá de jíin jnūhun cácahán saá-ni de. Te cánducú de squívi tucu de sava ñayuu nuū jniñu neé jniñu ndíyo ni. Te súcuan cástáhú de ñayuu jeē sa ní quenda i ni cācu i nuū ñáyuu casáha jniñu neé. ¹⁹ Te cácahán de jeē cáhiyo libre i sáha i ndese-ni cúní maá i, te ni máá de tu cáhiyo libre de, chi cácuu de mozo nuū cuéchi, chi máni jniñu jnéhén casáha de. Chi tācá jniñu jeē cúndeyí jíin ñin tēe jeē sáha de, suu yūcuan ndúu de mozo nuū. ²⁰ Chi núu je ni cajini de ndese Yaā cúu máá Jitoho yō Jesucristo, Yaā jnáma yóhó, te núu súcuan ni quenda de ni cācu de nuū jniñu jnéhén íyó ini ñayiví, te yūcuán na te núu ndívicoo tucu de nuū jniñu un jéē cúndeyí tucu jíin de, núu súcuan te neé gá quendō de jeē sándihí vēsú jeē xihna ñúhún. ²¹ Chi vāha ga núu jeē tu ní cájini de

jnūhun ichi ndaā nuú, vēsú jeē ní cajini de, te stóo tucu de jniñu ndoo jeē ní ndacu ya nuū de. ²² Chi cūndaā jíin de nájñūhun cáhán ñin jñūhun jenahán: Ina ni nacaji tī jeē ní ndujen ti. Te quīnī ní ndundoo, ni nacuchi tucu tī ndehyū, achí.

Siquī jeē ndíji Jitoho yō

3

¹ Ñánī mánī, yāha cúu carta uū jeē téé ri nuū rō. Te jíin ndīndúú carta yáha cúní rī jeē nacani ni rō siquī ndíhi jeē váha ndaā jeē jéni ichí rí rohó. ² Te na núcūhun ni rō tāca jñūhun jeē ní canacani tēe ndoo Yaā Dios nde jenahán, jíin jniñu ní ndacu máá Jítoho yō, Yaā jnáma yóhó. Te suu cúu jeē ní castéén tēe cácuu apóstol nuū rō.

³ Te xīhna gā jñūhun yáha na jécūhun ni rō: Jeē nuū cuándíhi quivī te quijicoo tēe sácatā siquī jñūhun ndaā yā, chi sáha de tācá jniñu néé jéé ndíyo ni maá de. ⁴ Te cahān de jíjnáhan de: ¿Najehē cúu jeē tu ndíji Cristo nájñūhun ni jejnūhun ya? Chi nde quivī ní cajihī jíi yō te nde vijna, tu ndé sáma cuitī ndíhi jeē iyó ndé ná ni jecōo ñayīví, achí de. ⁵ Chi tu cácuu de jecūhun ni de jeē ndé jenahán ní cuvāha andiví jíin jñūhun ni cahān Yaā Dios. Te ni ndacu ya jniñu jeē na cuvāha ñayīví jíin ndute, te mēhñú ndute ni nane ñuhun íchi. ⁶ Te suni jíin ndute ni naa ñayīví jenahán, chi ni ndaa ndute jeē ní cuun saū xeén. ⁷ Te suni súcuan jíin jñūhun ni cahān Yaā Dios ni sātūhva ya jeē cayú andiví jíin ñayīví iyó vijna. Chi máá quivī juicio te cayū ndíhi, te jnahnū ndetū ñayuu ni casáha néé.

⁸ Te suni ma náā ni rō jñūhun yáha, ñánī mánī: Jeē nuū máá Jítoho yō chi ñin quivī cúu nájñūhun mil cuiyā, te mil cuiyā cúu nájñūhun ñin quivī-ni. ⁹ Chi nasūu jéé cucuée máá Jítoho yō siquī jñūhun ni jejnūhun ya, nájñūhun cájeni ni sava ñayuu. Chi sa suhva iyó paciencia ni yā nuū yō, chi tu cúní yā jeē jnahnú ndetū ni ñin yó, chi sa cúní yā jeē ndíhi yó nacani ni yō stóo yó cuéchi yó.

¹⁰ Te quivī ndíji máá Jítoho yō, ñin sanaa-ni te quee, nájñūhun ñin sanaa-ni te quee ñacuīhná jecuáā. Te quivī ún chi ñihīn ndasí andiví, te naa-ni. Te ndíhi jeē iyó andiví chi naa sáha ñuhūn. Te ñayīví jíin táca jéé iyó ini, ndíhi cayū.

¹¹ Te núu súcuan naa tācá un, te cánuú ndasí jéé coo ndoo ánuá rō te chiñúhún váha ro yá jíjnáhan ró. ¹² Te condetu ró te condíhvī ni rō jeē na quee yachī quivī ndíji Yaā Dios. Te quivī ún cayū andiví te naa-ni, te tāca jéé iyó chi ndute sáha yáñuhūn. ¹³ Te máá yó chi cándetu yó andiví jéé jíin ñayīví jéé, chi súcuan ni jejnūhun Yaā Dios. Te yūcuán chi máni jniñu ndaā jíin jniñu váha coo.

¹⁴ Núu súcuan, ñánī mánī, níni jéé cándetu ró jéé squícu tācá jniñu yáha, te na ndúcú ndéyí ró návāha quivī ndíji ya te nihīn yā rohó jéé cáyūcu mánī rō, te coo ndoo ró jéé tú na cuéchi ró. ¹⁵ Te na jécūhun ni rō jeē siquī jeē iyó paciencia ni maá Jítoho yō, jeē yúcuan cácu yó. Chi hermano yō Pablo jeē maní yō jíin, suni súcuan ni tee de nuū rō, chi súcuan ni steén Yaā Dios jñūhun ndíchí yá nuū de. ¹⁶ Te cáhán de siquī jñūhun yáha núu tāca carta jeē ní tee de. Te nuū carta de un iyó jecu jñūhun jeē yí jécūhun ni yō. Te ñayuu tu jécūhun ni jíin ñayuu tu íje jíin jñūhun cándíje, cánasama i modo steén jñūhun yí un, nájñūhun násama i jeē cahán sava ga tutu iī. Te súcuan sáha i jeē jnahnú ndetū máá i.

¹⁷ Te rōhó ñánī mánī, vijna te je ni cajini rō ndese coo tācá jniñu yáha. Núu súcuan te coto má condiquīn rō jñūhun stáhú cástéén ñayuu casáha néé. Chi núu tuú te snāā rō jñūhun cáhiin nihīn ró jíin. ¹⁸ Chi sa na cóndíhvī gā ni rō cuni rō ndese Yaā cúu máá Jítoho yō Jesucristo, Yaā jnáma yóhó. Te na íje ga ni rō jíin jñūhun cúndáhú ni yā rohó. Te na cáhán yō jeē yóhyo luu cújéhnu ya nde vijna jíin ní cáni. Súcuan na cóo. Amén.

CARTA HN JEE NI TEE SAN JUAN APOSTOL NUU ÑAYUU CACANDIJE

Jnūhun cotecu yō nī cāni

¹ Jnūhun cátee ri cuajeē nuū rō jijnáhan ró cúu jnūhun máa Yaā jeē je íyó ndé ná tu jecōo tāca jéē iyó. Te ni cajini sōho ri jeē ni cáhān yā, te ni cajito jínūū rī yā, chi ni cajito vāha ri nuū yā, te ni cajni ri yā. Te máa yá cúu Jnūhun cotecu yō nī cāni. ² Chi Yaā yáha jéē sáha ya jeē cótecu yō, ni quenda ndijin yā. Te cácahān rī jnūhun ya, chi ni cajito rī yā. Te cácastūhun rī nuū rō jijnáhan ró síquī Yaā cúu Jnūhun cotecu yō nī cāni, Yaā ni condee jíin Tátá yō Yaā Dios, te ni quenda ndijin yā nuū rī jijnáhan ri. ³ Jeē ní cajito ri jíin jéē ní cajini sōho ri, yūcuan cúu jeē cácastūhun rī nuū rō, návāha coo inuú ni rō jíin yó jijnáhan yó. Te jendaá chi cáhiyo inuú ni yō jíin máa Tátá yō Yaā Dios jíin Séhe ya Jesucristo. ⁴ Te jnūhun yáha cátee ri cuajeē nuū rō, návāha cusī teyí ni rō jijnáhan ró.

Yaā Dios cúu luz

⁵ Te yāha cúu jnūhun ni steén Jesucristo nuū rī, te vijna cácastūhun rī nuū rō: Yaā Dios cúu luz, chi yōhyo ndaā yā, te tú cuiti na jniñu néé íyó jíin yá. ⁶ Núu cácahān yō jeē cáhiyo inuú ni yō jíin yá, te núu cájica yó nájñūhun nuū néé jeē sáha yó jniñu néé, núu súcuan te cástáhú yó, te nasūu jniñu ndaā casáha yó. ⁷ Te núu cájica yó jíin luz yā jeē casáha yó jniñu ndaā, nájñūhun íyó máa yá jíin luz yā jeē sáha ya jniñu ndaā, yūcuán na te cáhiyo inuú ni yō jíin táca jnáhan yó. Te niñi máa Séhe ya Jesucristo sándoo yóhó núu ndiñi cuēchi yó.

⁸ Núu cácahān yō jeē tú na cuēchi yó, te cástáhú yó máa yó jeē jéni ni yō súcuan, te tu ñūhun jnūhun ndaā ini yō. ⁹ Te núu nacani ndaā yō cuēchi yó núu yā, te cone cáhnu ni yā nuū cuēchi yó, te sándoo ya yohó ndiñi jeē neé casáha yó. Chi jíin yō jeē Yaā vāha Yaā ndaā cúu ya. ¹⁰ Te núu cácahān yō jeē tú na cuēchi yó, te nájñūhun sáha yó jéē Yaā stahú cúu ya, te tu cándije ndije yó jnúhun ya.

Cristo cúu Yaā cahán jehē yō

2

¹ Tāca jnúhun yáha tée ri cuajeē nuū rohó jéē cácuu ró nájñūhun sēhe ri, návāha ma sáha ró cuēchi jijnáhan ró. Te núu ndé ñn ró ní sáha cuēchi, te íyó máa Yaā cahán jehē yō nuū máa Tátá yō Yaā Dios. Jesucristo Yaā ndaā cúu ya. ² Te ni socō yā máa yá jeē ndahva yā cuēchi yó, te nasūu cuēchi máa-ni yó, chi suni cuēchi ñayuu nī ñáyiví.

³ Núu squícu yó jniñu ndácu Yaā Dios nuū yō, jíin yūcuan cúcáhnu ni yō jeē jíin ndije yó ndese Yaā cúu ya. ⁴ Te núu cáhán ñn ñayuu: Ruhū chi jíin rī ndese Yaā cúu ya, te núu tu squícu i jniñu ndácu ya, núu súcuan te stáhú i, te tu cáhán i jnūhun ndaā. ⁵ Te sa ñayuu squícu jnūhun ya, je ni ije vāha ni i jeē maní i jíin yá. Súcuan te cuni yō núu ndúú yó jíin yá chí tuú. ⁶ Núu cáhán ñn ñayuu jeē nduú i jíin yá, cánuú jéē caca ndaā i nájñūhun ni jica Jesucristo.

Jniñu jéé ndácu ya nuū yō

⁷ Hermano, nasūu ñn jniñu jéé ndácu ri nuū rō jeē cahán rī jeē na cundáhú ni rō jnáhan ró. Chi jniñu jeē je cájini rō nde ná ni quejéé ró candíje ró cúu. Te jniñu yáha jeē ndácu ya, vēji nde jenahán, te suu cúu jnūhun ni cajini sōho ró ndé quiví ní quejéé ró candíje ró. ⁸ Te vēsú súcuan, te níin jniñu jéé cúu, te jniñu ndaā cúu nuū Cristo jíin núu máa ró jijnáhan ró. Chi je cuayāha jniñu néé jéé iyó núu néé, te je steén máa luz ndaā ini anuá yō vijna.

⁹ Núu ñn ñayuu cahán i jeē jíca i jíin luz yā, te núu jíto uhū i jnáhan i, ñayuu ún chi jíca ga i nájñūhun nuū néé jíin cuéchi. ¹⁰ Te ñayuu jeē cundáhú ni jnáhan, chi jíca i jíin luz yā, cúu jeē sáha i jniñu vāha. Te ni ñn ma cúu sáha jeē quíví i cuēchi. ¹¹ Te ñayuu jíto

uhū jnáhan, chi íyó i nuū néē, te jíca i nuū néē. Te tu jíní i ndé chi quíhín i, chi nuū néē un ní jesi jeē tu jécūhun ni i.

¹² Róhó jéē cácuu sēhe, téé ri jnūhun yáha cuájeē nuū rō, chi jeē siquí Jesucristo te ni ine cáhnu ni Yaā Dios nuū cuéchi ró. ¹³ Róhó tátá jijnáhan ró, suni téé ri nuū rō, chi cájini rō ndese Yaā cúu Yaā iyó ndé xihna ñúhún. Róhó téé suchí jijnáhan ró, suni téé ri nuū rō, chi ni cacundeyí ró jeē tu ní cúu squívi jexeén rohó cuéchi.

Róhó jéē cácuu sēhe, téé ri jnūhun yáha cuájeē nuū rō, chi cájini rō ndese Yaā cúu máá Tátá yō Yaā Dios. ¹⁴ Róhó tátá jijnáhan ró, suni téé ri nuū rō, chi cájini rō Yaā iyó ndé xihna ñúhún. Róhó téé suchí jijnáhan ró, suni téé ri nuū rō, chi cáhiin nihin ró, te cácandíje ró jnūhun Yaā Dios, te ni cacundeyí ró síquí jexeén.

¹⁵ Ma cutóó ni rō siquí ñayívi, ni tāca jéē iyó ini ñayívi. Chi núu ndé ñáyuu cutóó ni i siquí ñayívi, ñayuu ún tu íyó mání i jínín Tátá yō Yaā Dios. ¹⁶ Chi tāca jéē cúu cuenta ñayívi, nasūu ndé nuū Tátá yō Yaā Dios vēji, chi cuenta ñayívi cúu. Te yūcuan cúu tāca jéē cájini ni yō jeē cuní modo neé máá yó, jínín jéē ndíyo ni yō jeē jíto yó núu, jínín jéē sandúxí yó máá yó siquí ndajniñu névaha yó. ¹⁷ Te cuandíhi ñayívi jínín táca jéē ndíyo neé ni yō. Te ñayuu casáha jeē cuní máá Yaā Dios, chi cotecu i ní cáni.

Jnūhun ndaā jínín jnūhun stáhú

¹⁸ Róhó jéē cácuu nájnuhun sēhe ri, cáhán rī jínín ró jeē cuandíhi quiví. Te je ni cajini jnūhun ró jéē quíji máá téé cuu contra siquí Cristo. Te nde vijna je ni canecoo cuehē téé jeē cácuu contra siquí Cristo. Te jeē yūcuan jínín yō jeē cuandíhi quiví. ¹⁹ Mēhñu máá yó ni quendacoo de, te nasūu jnáhan yó cácandíje cácuu de. Chi núu jeē jnáhan yó cácuu de, te quendōo de jínín yó nuú. Te ni quenda de cuango de, návaha cuni cají yó jéē násūu jnáhan yó cácuu ndíhi de.

²⁰ Te máá ró jijnáhan ró, chi Cristo ni jēhe ya Espíritu Santo, ndeé yá ini anuá rō, te jeē yūcuan cájini rō jnūhun ndaā. ²¹ Núu súcuan te téé ri yáha cuájeē nuū rō, siquí jeē cájini rō jnūhun ndaā, nasūu síquí jeē tu cájini rō. Te cájini rō jeē tú na jnūhun stáhú íyó nuū jnūhun ndaā.

²² ¿Ndeé ñn cúu jeē cahán mání jnūhun stáhú? Suu téé jeē cahán jeē Jesús, tu cúu ndije ya Cristo, Yaā ní tají Yaā Dios. Yūcuan cúu téé jeē cúu contra siquí Cristo, chi tu jéjnuhún de máá Tátá yō Yaā Dios jínín Séhe ya. ²³ Tāca ñáyuu jeē tu jéjnuhún i Séhe ya, suni tu íyó máá Tátá jínín i. Te ñayuu jeē jejnuhún i Séhe ya, suni íyó máá Tátá jínín i.

²⁴ Núu súcuan te chuhun vāha ni rō máá jnūhun ni cajini sōho ró ndé jeē xihna ñúhún. Te núu ñúhún vāha ni rō jnūhun ní cajini sōho ró ndé jeē xihna ñúhún, yūcuán na te suni ndúú ró jínín máá Tátá yō jínín Séhe ya. ²⁵ Te yáha cúu jnūhun jeē ni jéjnuhun Jesucristo nuū yō: jeē cótecu yō ní cáni sáha ya.

²⁶ Jnūhun yáha ní tee ri nuū rō jeē cástūhun rí siquí ñáyuu cánducú stáhú róhó. ²⁷ Te máá ró jijnáhan ró, chi ni jēhe Jesucristo Espíritu Santo, ndeé yá ini anuá rō. Te jeē yūcuan tu jínín ñúhún jéē steén ni ñn ñayuu nuū rō ndé vé cúu jendaá, chi máá Espíritu cúu jeē steén ndíhi nuū rō, te steén yā jnūhun ndaā, chi tu stáhú cuítí yā. Núu súcuan te caca ndúú ró jínín Cristo, nájnuhun steén Espíritu nuū rō.

²⁸ Séhē jijnáhan ró, vijna te na cáca ndúú ró jínín Cristo, návaha núu na quénda ndijin yā, te ma yūhu yó, ni ma cúcanu yō nuū yā quiví ndíji ya. ²⁹ Chi je cájini rō jeē Yaā ndaā cúu Jesucristo, te suni na jécūhun ni rō jeē tāca ñáyuu casáha jniñu ndaā, sēhe Yaā Dios cácuu i.

Jnūhun ñayuu cácuu sēhe Yaā Dios

3

¹ Nacā jeē yóhoyo ni cundáhú ni Tátá yō Yaā Dios yohó, chi ni nihín yō jnūhun cuu yó séhe ya, te suu cúu ndije yó. Jeē yūcuan, ñáyuu ñayívi tu cájini i jeē cúu yó séhe ya, chi tu jínín i ndese Yaā cúu máá yá. ² Nání mání, vijna te cúu yó séhe Yaā Dios, te ná tu cuni yō ndese coo yó ní cáni. Te je jínín yō jeē quiví quénda ndijin Jesucristo, te nduu yó

nájnūhun íyó máá yá, chi coto yó núū yā ndese íyó yá. ³ Te tāca ñáyuu jeē súcuan ñūhun ni i, chi sándoo i ánuá i, nájnūhun íyó ndoo Jesucristo.

⁴ Te ñayuu casáha cuēchi, chi stívi i ley Yaā Dios. Chi núu sáha yó cuēchi, te stívi yó ley yā. ⁵ Te je cájini rō jeē ní quiji Jesucristo ini ñayívi návaha quende yā cuēchi yó. Te máá yá tú na cuēchi ya. ⁶ Te tāca ñáyuu jeē nduú i jíin yá, tu cájica i jíin cuēchi. Te tāca ñáyuu cájica jíin cuēchi, tu jíin i ya, ni tu jécūhun ni i ndese Yaā cúu ya. ⁷ Séhē jijnáhan ró, coto ró jéē ma stáhu ni ñin i róhó. Chi na jécūhun ni rō jeē ñáyuu casáha jniñu ndaā, máá i cácuu ñayuu ndaā, nájnūhun íyó ndaā maá yá. ⁸ Te ñayuu casáha cuēchi, máá i cácuu sēhe jexeén. Chi jexeén cúu jeē sáha cuēchi vēji nde jeē xíhna ñūhún. Jeē yúcuan ní quiji Séhe Yaā Dios, jeē snáā yā tācá jniñu néé sáha jexeén.

⁹ Ni ñin ñayuu jeē cúu sēhe Yaā Dios, tu jíca i jíin cuēchi, chi ni sáha Yaā Dios jeē ní nduú i nájnūhun íyó máá yá. Te ma cúu ga caca i jíin cuēchi, chi sēhe Yaā Dios cácuu i. ¹⁰ Súcuan cuni yō ndé ñin cúu sēhe Yaā Dios jíin séhe jexeén: Tāca ñáyuu jeē tu sáha jniñu ndaā, jíin jéē tu cúndáhú ni jnáhan, nasūu séhe Yaā Dios cúu i.

Jeē na cúndáhú ni yō jnáhan yó

¹¹ Yáha cúu jnūhun jeē ní cajini sōho ró ndé jeē xíhna ñūhún: jeē na cúndáhú ni yō jnáhan yó. ¹² Te ma sáha yó nájnūhun ni sáha Caín, jeē ní cuu de sēhe jexeén, te ni jehni de ñani de. ¿Te najehē ni jehni de ñani de? Siqūi jeē ñani de ni sáha jniñu ndaā te máni jniñu néé ní sáha máá de.

¹³ Hermano jijnáhan ró, ma cunéé ni rō te núu ñayuu ñayívi cáquitī ni i nuū rō. ¹⁴ Te máá yó chi siqūi jeē cundáhú ni yō jnáhan yó, súcuan jíin yō jeē jé ni cācu yó jéé cótecu yō ní cáni. Te ñayuu jeē tu cúndáhú ni jnáhan, íyó i jíin jnúhun jnahnū ndetū i. ¹⁵ Chi tāca ñáyuu quití ni nuū jnáhan, nájnūhun ñayuu jéjni ndīyi cúu i. Te cájini rō jeē ñáyuu jéjni ndīyi, ma nihín tahu i cotecu i ní cáni. ¹⁶ Jeē ni jíhī Cristo jehē yō, yūcuan cúu jeē steén cají ndese cúu jnūhun cúndáhú ni. Te máá yó, chi suni súcuan jíin ñūhún cundáhú ni yō jnáhan yó vēsú na cúu yō jehē i. ¹⁷ Te núu névaha yó jéé cótecu yō ñayívi, te núu jíin yō jeē cúmani nuū jnáhan yó, te núu tú cundáhú ni yō i cuāha yó jéé jíin ñūhún i, núu súcuan ¿te á íyó máni yō jíin Yaā Dios, chi naún? ¹⁸ Séhē jijnáhan ró, ma cundáhú ni yō jíin máá jnúhun cáhán-ni yó, chi sa suhva na cúndáhú ndije ni yō nde jíin jniñu sáha yó.

Ndese cucáhnu ni yō jeē váha sáha yó núu Yaā Dios

¹⁹ Te súcuan cundaā ni yō jeē squícu yó jnúhun ndaā, te cucáhnu ni yō jeē váha sáha yó núu yā. ²⁰ Chi núu ánuá yō tú váha sáha siqūi jeē iyó cuēchi yó, te Yaā Dios chi cújéhnu ga yā vēsú anuá yō, te jíin ndīhi ya tācá un. ²¹ Núu súcuan ñánī máni, núu váha sáha ánuá yō siqūi jeē tú na cuēchi yó, yūcuán na te cucáhnu ni yō jeē váha sáha yó núu Yaā Dios. ²² Te tāca jéé cacán yō nuū yā, te sáha ya jeē cahán yō, chi squícu yó jniñu ndácu ya te sáha yó jniñu jeē cúsiñi ni yā. ²³ Te yáha cúu jniñu ndácu ya: jeē na cándije yó jéé ni sáha Séhe ya Jesucristo jehē yō, jíin jéé na cúndáhú ni yō jnáhan yó, nájnūhun ni ndacu ya jniñu nuū yō. ²⁴ Te tāca ñáyuu squícu jniñu ndácu Yaā Dios, nduú i jíin yá, te ndéé yá ini anuá i. Te jíin máá Espíritu jeē ni jéhe ya jeē ndeé ini anuá yō, jíin yúcuan te jíin yō jeē ndeé Yaā Dios ini yō.

Jnūhun jeē vēji nuū Espíritu jíin jnúhun cáhán contra Cristo

4

¹ Ñánī máni, ma candije ró táca téé jéé cácahán de jeē jíin Espíritu Yaā Dios cánacani de jnūhun. Chi sa suhva coto ndee rō de, núu nde nuū Yaā Dios vēji jnūhun cácahán de, chí tuú. Chi ini ñayívi je ni canecoo cuehē téé cánacani jnūhun stáhu, te cácahán de jeē ndé nuū Yaā Dios vēji. ² Te súcuan nacuni rō ndé-ni i cúu jeē jíin Espíritu Yaā Dios cahán: tāca ñáyuu jeē cácahán ndaā jeē ní quiji Jesucristo, ni nduú ya téé, máá i cúu jeē jíin Espíritu Yaā Dios cácahán. ³ Te tāca ñáyuu jeē tu cácejnúhún jeē súcuan ni nduú ya

tēe, máá i chi nasūu jíin Espíritu Yaā Dios cácahān i. Chi sa suhva cácuu i contra siquī Cristo. Te je ni cajini jnūhun ró jéē quíjicoo ñayuu súcuan, te vijna je cáhīyo i ini ñayīví.

⁴ Séhē jijnáhan ró, máá ró cácuu sēhe Yaā Dios, te je ni cacundeyí ró siquī téē castáhú un. Chi jéhnū ga cúu poder máá Yaā jeē ndeé ini rō, vēsú poder máá jéē ndeé jíin ñáyuu ñayīví jéē castáhú. ⁵ Máá i cácuu cuenta ñayīví, te jeē yúcuan cácahān i jnūhun cuenta ñayīví. Te ñayuu cácuu cuenta ñayīví, cájini nahín i jnūhun ún. ⁶ Te máá yó chi sēhe Yaā Dios cácuu yó. Te ñayuu jeē cájini i ndese Yaā cúu Yaā Dios, máá i cájini nahín i jnūhun cácahān yō. Te ñayuu jeē násūu séhe Yaā Dios cácuu, máá i tu cájini nahín i jnūhun cácahān yō. Te súcuan nacuni yō ndé-ni cúu jeē cahán jnūhun ndaā jíin ndé-ni cúu jeē cahán jnūhun stáhú.

Máni jnūhun cundáhú ni iyó jíin Yaā Dios

⁷ Nánī mánī, na cundáhú ni yō jnáhan yó, chi jnūhun cundáhú ni, nde nuū Yaā Dios vēji. Te tāca ñáyuu cundáhú ni jnáhan, chi sēhe Yaā Dios cúu i, te jíin i ndese Yaā cúu Yaā Dios. ⁸ Te ñayuu jeē tu cundáhú ni jnáhan, tu jíin i ndese Yaā cúu Yaā Dios, chi máni jnūhun cundáhú ni iyó jíin Yaā Dios. ⁹ Súcuan ni steén Yaā Dios ndese cundáhú ni yā yohó, chi ni tají yá Sēhe ya ni quiji ini ñayīví yáha, vēsú mañúhún-ni ya iyó, návāha cotecu yō ní cáni sáha ya. ¹⁰ Te yáha cúu jnūhun cundáhú ni: nasūu jéē xíhna máá yó ni íyo manī yō jíin Yaā Dios, chi sa suhva máá yá cúu jeē ní cundáhú ni yā yohó. Te ni tají yá Sēhe ya ni quiji, návāha socō yā máá yá jeē quende yā cuēchi yó.

¹¹ Nánī mánī, núu súcuan ni cundáhú ni Yaā Dios yohó, te suni súcuan cánuú jeē cundáhú ni yō jnáhan yó. ¹² Ni ñin ñayuu tu ní jíto cuiti nuū Yaā Dios. Te núu cundáhú ni yō jnáhan yó, te ndeé Yaā Dios ini anuá yō, te je ni ije vāha ni yō jíin jnūhun cundáhú ni. ¹³ Te máá Espíritu Santo jeē ni jéhe ya jeē ndeé ini yō, máá yá steén jeē nduú yó jíin Yaā Dios, te ndeé Yaā Dios ini yō. ¹⁴ Te ni cajito ri te cácastūhun rí jeē máá Tátá yō ni tají yá Sēhe ya ni quiji návāha jnama ya ñayuu ñayīví. ¹⁵ Te núu ndé ñáyuu jejnúhún i jeē Séhe Yaā Dios cúu Jesús, te ndúu i jíin Yaā Dios, te Yaā Dios ndeé yá ini i.

¹⁶ Te máá yó, je ni jini yō te ni candíje yó jéē cundáhú ni Yaā Dios yohó. Chi máni jnūhun cundáhú ni iyó jíin Yaā Dios. Te ñayuu cundáhú ni jnáhan, ndúu i jíin Yaā Dios, te ndeé yá ini anuá i. ¹⁷ Te súcuan cúu jeē íje vāha ni yō jíin jnūhun cundáhú ni, návāha ma yūhu yó quiví sándaā yā jniñu yó. Chi nájnūhun cundáhú ni Cristo, suni súcuan cándaā máá yó ini ñayīví yáha. ¹⁸ Te núu manī yō jíin yá, te tu yúhú yó nuū yā. Chi núu ni ije yó jíin jnūhun manī yō jíin yá, te tú na siquī yuhú yó nuū yā. Chi jnūhun yúhú un cúu jeē yuhú yó ndoho yó castigo. Jeē yúcuan ñayuu cáyūhú chi ná tu ije vāha i jíin jnūhun manī i jíin yá.

¹⁹ Te yóhó chi manī ndasí yó jíin Yaā Dios, chi xíhna gā máá yá ni cundáhú ni yā yohó. ²⁰ Te núu ñin ñayuu cahán i jeē maní i jíin Yaā Dios, te núu quítí ni i nuū jnáhan i, núu súcuan te ñayuu stahú-ni cúu i. Chi núu ñin ñayuu tu íyo mánī i jíin jnáhan i jeē jíto i nuū, te ni ma cúu coo maní i jíin Yaā Dios jeē tu jíto i nuū yā. ²¹ Chi je ni ndacu ya jniñu yáha nuū yō: Ñayuu jeē maní i jíin Yaā Dios, suni na cóo maní i jíin jnáhan i.

Jeē cundeyí yó siquī jeneé íyo ini ñayīví

5

¹ Tāca ñáyuu jeē cácañíje i jeē Jesús cúu Cristo, Yaā ní tají Yaā Dios, máá i cácuu sēhe Yaā Dios. Te ñayuu maní jíin Yaā cúu Tátá, suni cácañíje ni i ñayuu cácuu sēhe ya. ² Súcuan jíin yō jeē cundáhú ni yō ñayuu cácuu sēhe ya, núu maní yō jíin yá te squícu yó jniñu ndácu ya. ³ Chi jeē squícu yó jniñu ndácu Yaā Dios cúu jeē maní yō jíin yá. Te jniñu ndácu ya chi tú vēyi. ⁴ Chi tāca ñáyuu cúu sēhe Yaā Dios, cundeyí i siquī jeneé íyo ini ñayīví. Te jeē candíje yó jéē cundáhú ni yā yohó, yúcuan cúu fuerza jeē sáha jeē cundeyí yó. ⁵ Máá-ni ñayuu jeē candíje jeē Jesús cúu Sēhe Yaā Dios, máá i cúu jeē cundeyí siquī jeneé íyo ini ñayīví.

Jnūhun cáhán ndaā siquī Séhe Yaā Dios

⁶ Te jeē ní quiji Jesucristo ini ñayīví, chi ni jendute ya jíin ndute, te ni jeti ññī yā jeē ni jíhi yā jehē yō. Te nasūu máá ñn-ni jeē ní jendute ya jíin ndute, chi suni ni jeti ññī yā. Te máá Espíritu Yaā Dios cahán ndaā siquī yā, chi nuū máá Espíritu vēji jnūhun ndaā. ⁷ Chi ini andiví íyó únī jeē cácahān ndaā siquī jnúhun yáha: máá Yaā cúu Tátá, jíin Yaā cúu Jnūhun, jíin Espíritu Santo. Te ndínuní yá, chi ñn-ni cúu ya. ⁸ Te ini ñayīví suni íyó únī jeē steén ndaā: máá Espíritu, jíin jéē ní jendute Jesús, jíin jéē ní jeti ññī yā. Te ndínuní yáha, chi ñnuú-ni stéén siquī yā. ⁹ Te cájetáhú yó jnūhun cácahān ndaā tēe, te jéhu ga cúu jnūhun cáhān máá Yaā Dios. Te jnūhun ni cahān yā cúu jnūhun siquī Séhe ya. ¹⁰ Nayuu cácañdije jeē Sēhe Yaā Dios cúu Jesús, je ni cacundaā ni i jnūhun yáha jeē ni cáhān Yaā Dios. Te ñayuu jeē tu cácañdije jeē ni cáhān Yaā Dios, nájnūhun cásáha i jeē Yaā stahú cúu ya, chi tu cácañdije i jnūhun ni cahān ndaā yā siquī Séhe ya. ¹¹ Te jnūhun ndaā un cúu jeē ni sáha ya jeē cótecu yō ñí cáni, te Sēhe ya ndíso jnūhun cotecu yō. ¹² Nayuu jeē iyó Séhe ya jíin i, je ni nihín tahú i cotecu i. Te ñayuu jeē tu íyó Séhe ya jíin i, ma nihín tahú i cotecu i.

Jnūhun consejo jeē sándñí

¹³ Jnūhun yáha tēe ri nuū rohó ñayuu cácañdije Sēhe Yaā Dios, návāha cucáhnu ni rō jeē ni nihín tahú rō cotecu rō ñí cáni.

¹⁴ Te cúcáhnu ni yō Yaā Dios, chi jíiní yō jeē núu na vé jicán yō nuū yā jeē suni cúní maá yá, te jíiní nahín yá jeē jicán yō. ¹⁵ Te núu jíiní yō jeē jíiní nahín yá jeē jicán yō, núu súcuan te suni jíiní yō jeē sáha ya jeē jicán yō.

¹⁶ Núu ñn ñayuu jíiní i jeē sáha jnáhan i cuēchi jeē násūu cuēchi jeē jnahnú ndetū i cúu, te na cácan tahú i nuū Yaā Dios, te cuāha ya jnūhun cotecu jnáhan i, te núu nasūu cuēchi jeē sáha jeē jnahnú ndetū i cúu. Iyó cuēchi jeē jnahnú ndetū i sáha, te tu cáhān rī jeē cacán tahú rō jehē ñayuu sáha cuēchi súcuan. ¹⁷ Tācá jniñu néé cúu cuēchi, te íyó cuēchi jeē násūu jéē jnahnú ndetū i cúu.

¹⁸ Te jíiní yō jeē tāca ñayuu cácuu sēhe Yaā Dios, tu jíca i jíiní cuēchi. Chi Yaā cúu Sēhe Yaā Dios, ndíto vāha ya i. Te tú na vé cúu sáha jexeén jíin i.

¹⁹ Te jíiní yō jeē séhe Yaā Dios cácuu yó. Te ñayuu ñí ñayīví yíhi i ndaha jexeén.

²⁰ Te suni jíiní yō jeē ní quiji Sēhe Yaā Dios, te ni sáha ya jeē jécūhun ni yō, návāha cuni yō ndese Yaā cúu máá Yaā ndaā. Te ndúu yó jíiní Yaā ndaā, suu jíiní máá Séhe ya Jesucristo. Máá yá cúu ndije Yaā ndaā, te máá yá sáha jeē cótecu yō ñí cáni. ²¹ Séhē jijnáhan ró, na cújiyo ró núu tāca jéē násūu Yaā ndaā cúu. Súcuan na cóo. Amén.

CARTA UU JEE NI TEE SAN JUAN APOSTOL

Jnūhun ndaā jín jnúhun cúndáhú ni

¹ Máá ná cúu tēe jéhnú ndíso jníñu, te tēe ná carta yáha cuájeē nuū ni jēē cúu ní hermana ni nacāji Yaā Dios, jín núū séhe ní jijnáhan i. Te manī na jín ní jijnáhan ní sáha jnūhun ndaā yā, te nasūu máá-ni ná, chi suni tāca ñáyuu jiní jnūhun ndaā. ² Te manī na jín ní jijnáhan ní síquī jeē cá candíje yó jnúhun ndaā yā jeē iyó ini anuá yō, te coo jín yó ní cáni. ³ Te ñúhun ni na jēē Tatá yō Yaā Dios jín Séhe ya Jitoho yō Jesucristo, na sáha ga yā jeē váha níhín, te cundáhú ni yā níhín, te sáha ya jeē coo ndeyí coo síñ ni ní, jín jnúhun ndaā jín jnúhun cúndáhú ni.

⁴ Yōhoyo ni cusī ni ná, chi ni jini na jēē sava sēhe ní cájica i jín jnúhun ndaā, nájñūhun ni ndacu máá Tátá yō Yaā Dios jniñu nuū yō. ⁵ Hermana, cáhán ndahú ná jín ní jeē na cúndáhú ni yō jnáhan yó. Te jnūhun tēe ná yáha cuájeē nuū ní, nasūú ññ jniñu jéé sá ndacu ya cúu, chi jniñu ní ndacu ya nuū yō nde ná ni quejéé yó candíje yó cúu. ⁶ Te jeē cundáhú ni yō jnáhan yó cúu jeē caca yó nájñūhun ni ndacu ya jniñu nuū yō. Te jniñu ní ndacu ya cúu jeē caca ní jín jnúhun cúndáhú ni, nájñūhun ni cajini sōho ní ndé ná ni quejéé ní candíje ní.

Siquī tēe cástáhú

⁷ Chi cuehē tēe cástáhú ni canecoo de ní ñáyiví, te tu cájejnúhún de jeē ní quiiji Jesucristo ni nduu ya tēe. Te tēe tu cájejnúhún súcuan, cácuu de tēe stáhú, te cácuu de contra síquī Cristo. ⁸ Coto ní jēē ma snāā ni táhū síquī jniñu váha ni casáha ní, chi sa suhva jeē na níhín ni ndíhi tahū ní.

⁹ Núu ndé ñáyuu jñí ñga jnūhun, te tu quéndōo i jín jnúhun ni steén Cristo, núu súcuan te tu íyó Yaā Dios jín i. Te ñayuu quéndōo jín jnúhun ni steén Cristo, chi íyó Tátá yō jín i, te suni íyó Séhe ya jín i. ¹⁰ Te núu jinū ññ ñayuu vehe ní, te núu tu quíjnáhan jnūhun stéén i jín jnúhun yáha, te ma cuáha ní jnúhun condee i vehe ní, ni ma cahán ni jnúhun ndeyí ni jín i. ¹¹ Chi ñayuu cahán jnūhun ndeyí ni jín i, chíndéé ñájñáhan jín i síquī jniñu néé casáha i.

Jnūhun sandíhí

¹² Iyó cuehē gā jnūhun cahān na jín ní jijnáhan ní, te tu cúní na tee ná núu tútu jín tinta. Chi ñúhun ni na cuájeē ná coto jnáhan yó, te ndajnūhun yó, návāha cusī ndasí ni yō.

¹³ Tāca séhe cuhū ní, ñahan jeē suni ni nacāji ya, cácahān i jeē sándeýí ni ní. Súcuan na cóo. Amén.

CARTA UNI JEE NI TEE SAN JUAN APOSTOL

Jeē jejnūhún de tēe nání Gayo

¹ Máá rí cúu tēe jéhnū ndíso jníñu, te tēe ri carta yáha cuájeē nuū rō, amigo Gayo, chi manī rī jíin ró sáha jnūhun ndaā.

² Nánī mánī, jícan tahu rī jeē vāha na quíhín tācá jniñu sáha ró, jíin jēē na cóo vāha ró, nájnūhun íyó vāha ánuá rō jíin jnūhun ya. ³ Yōhyo ni cusī ni rī ná ni quecoo sava hermano te ni cacastūhún de nuū rī ndese vāha squícu ró táca jniñu ndaā, chi jíca ndaā rō. ⁴ Tuá na inga sáha jeē cúsi gā ni rī, chi mánī jeē nihín rī jnūhun jeē cájica ndaā ñayuu cácuu nájnūhun sēhe ri siquī jeē ni scándije ri i.

⁵ Nánī mánī, yōhyo vāha sáha ró jēē chindéé ñáhán ró tācá hermano, te víhyá gā núu tēe ñuu jicá cácuu de. ⁶ Chi tēe un ní canacani de jnūhun nuū ñáyuu cácadíje yāhá, ndese cúndáhú ni rō de. Te jícan rī jeē chindéé ñáhán gá rō de, núu na vé jíni ñúhún de jeē caca ga de ichi nuū quíhín de, nájnūhun nújnahan ni Yaā Dios. ⁷ Chi tēe un ní quendacoo de cájica de siquī jniñu Jesucristo. Te tú na vé cáquihin de nuū ñáyuu jeē tu jíni jnūhun Yaā Dios. ⁸ Jeē yúcuan cánuú coto yó de, chindéé ñáhán yó de jeē canacani de jnūhun ndaā.

Siquī jeē tú vāha sáha Diótrefes

⁹ Je ni tee ri ñin carta nuū ñáyuu cácadíje jíñā. Te Diótrefes, tu jétáhú de jnūhun cáhán rī, siquī jeē cuní de cujéhnū máá de nuū i. ¹⁰ Jeē yúcuan, núu na jéé rī te cahán rī nuū de siquī jniñu sáha de, chi yōhyo sájnūhún de te cáhán de jnūhun stáhú síquī rī jijnáhan ri. Te nasūu máá yúcuan-ni sáha de, chi suni tu jétáhú de tācá hermano jéngoo nuū de, te jési de jeē ma cuátáhú ñáyuu nuū tācá hermano un. Te ñayuu cájetáhú nuū hermano un, quénehen de i nuū cándutútú ñayuu cácadíje.

¹¹ Nánī mánī, ma ndácu ró ñáyuu casáha jniñu néé, chi sa suhva ñayuu casáha jniñu vāha. Chi sēhe Yaā Dios cácuu ñayuu casáha jniñu vāha. Te ñayuu casáha jniñu néé, tu cájini i ndese Yaā cúu Yaā Dios.

Jeē cácahān i jeē vāha sáha Demetrio

¹² Tāca ñáyuu chi cácahān i jeē vāha sáha Demetrio. Te jniñu ndaā jeē sáha de, stéén jeē tēe ndaā cúu de. Te suni súcuan cácahān maá rí, te cájini rō jeē iyó ndaā jnūhun cáhán rī.

Jnūhun sandíhí

¹³ Iyó cuéhē gā jnūhun cahán rī jíin ró, te tu cuní rī tee ri jíin tinta jíin pluma. ¹⁴ Chi ñúhún ni rī cuajeē yachī rī coto jnáhan yó, te ndajnūhun yó.

¹⁵ Te ñúhún ni rī jeē na cóo ndeyí coo sī ni rō. Tācá amigo yō yāha cácahān i jeē sándeyí ni rō. Te suni cahán rō jíin ñin ñin amigo jíñā jeē sándeyí ni i, áchí rí, te cocahān yō.

CARTA JEE NI TEE SAN JUDAS APOSTOL NUU ÑAYUU CACANDIJE

¹ Máá rí cúu Judas ñani Jacobo, te mozo Jesucristo cúu ri. Te tée ri carta yáha cuájeē nuū rohó ñáyuu jeē ní cana máá Tátá yō Yaā Dios, te ni sáha ya jeē iyó ndoo íyó íi rō nuū yā jeē cácuu ró ñáyuu manī yā jíín. Te Jesucristo ndíto vāha ya rohó jéē cáyihí ró ndaha ya. ² Te ñúhun ni rī jeē na cúndáhú gá ni yā rohó, te sáha ya jeē coo ndeyí coo sī ni rō, te coo manī ndasí yá jíín ró, te na ndúcuehē gā tāca jéē yáha núu rō.

Siquī tēe cástéén jnūhun stáhú
(2 Pedro 2.1-17)

³ Ñánī manī, yōhyo ní cuu ni rī tee ri nuū rō siquī jnúhun ni jnama ya rohó jíín rúhū jijnáhan yó. Te ni jini rī jeē cánuú gá tee ri carta jeē stíhví ni rī rohó návāha nducú ndéyí ró jeē ma cási ñayuu nuū jnúhun cácandíje yó. Te jnūhun ún chi je ni jēhe ya ñn jíinu-ni nuū tāca ñáyuu maá yá. ⁴ Chi sava tēe ni castáhú de rohó ní quīvicoo de mēhñu ró. Te tēe ún chi nde jenahán je cáhán tutu íi jeē jnahnú ndetū de siquī jníñu cása de. Cácuu de tēe ndevāha, chi cácahān de jeē vāha ni Yaā Dios, te jeē yúcuan vetū-ni sáha de jniñu néé, cácahān de. Te tu cájejnúhún ndije de Jítoho yō Jesucristo jíín Yaā Dios, jeē mañúhún-ni ya cujéhnu nuū yō.

⁵ Te vijna chi vēsú je cájini vāha ró, te cúní rī jeē na núcūhun ni rō ndese ni sáha máá Jítoho yō. Chi ni jnama ya ñayuu Israel jenahán, ni chindéē ñájnáhan ya i jeē ní jinu i ini ñuu tatú Egipto cuahān i. Te vēsú súcuan te cuéé gá te ni snáā yā sava i jeē tu ní cácandíje i. ⁶ Te suni nucūhun ni rō siquī ndajéhé yā jeē ní castóo jniñu ndíso, te ni castóo nuū ní ndeē andíví. Te Yaā Dios ni chindihyū yā jijnáhan, te cándetu nde quiji quiví cáhnu jeē sándaā yā jniñu. Te cánuhñí jíín cadena, cáyūcu ní cáni nuū cunú núu néé. ⁷ Te suni ni stóho ya ñayuu ñuu Sodoma jíín ñuu Gomorra jíín sava ga ñuu jeē ní íyo yajni, chi suni ni casáha néé i nájnūhun ni casáha tācá ndajéhé un ndé jenahán gá. Te máá i ni cajica jnéni i te ni casáha i tāca cuéchi néé ndasí. Te ni canihñi i castigo ñuhūn jeē cayú ní cáni, te súcuan cúu i ñn ejemplo nuū ndíhi ñayuu.

⁸ Te tēe cástáhú jeē ní quīvicoo mēhñu ró, vēsú cájini de jeē súcuan ni sáha ya, te cájeni cāhá ni de, te casáha jnéhén de yiqui cúñu de, te cásquéhichí ni de tēe cándacu jniñu Jítoho yō, te cácahān ndevāha de siquī tāca jéē cácujeñu nuū sucún. ⁹ Te nasūu súcuan ní sáha ndajéhé Miguel, vēsú ndajéhé cujéhnu ga cúu ya. Chi tu ní cáhán ndevāha ya ni tu ní ndácunehen ya cuéchi siquī jexeén ná ni casásáhán jnáhan ya jíín jexeén un jeē siquí yiqui cúñu Moisés ná ni jihí de. Chi suhva-ni ni cahān yā: Máá Yaā Dios, Yaā cúu Jítoho, cuxeēn yā nuū rō, ni achi Miguel. ¹⁰ Te tēe cástáhú yáha chi cácahān neé de siquī tāca jéē tu cájecūhun ni de. Te tāca modo cánevāha de siquī jeē sá cáa de, nájnūhun quiti yúcu jéē sá cáa tí, suu yúcuan sáha jeē jnahnú ndetū de.

¹¹ Nacā xeēn ndoho de núu súcuan, chi tu cájetáhú de Yaā Dios, nájnūhun jeē tu ní jétáhú Caín. Te siquī jeē cácuu de nihñi de xūhún te cástéén de jnūhun stáhú, nájnūhun ni sáha Balaam. Te jnahnū ndetū de nájnūhun Coré, tēe ni jihí siquī jeē ní cunihni ni de. ¹² Tēe yáha núu cándutútú de jíín ró jeē cáyeji manī rō, te casáha de jniñu cúcanu rō. Chi cáyeji cájihí sī ni de, te tu casáha de cuenta ndese caji ñga ñayuu, chi máni máá de ndíhví ni de caji vāha de. Te cácuu de nájnūhun vicō íchi jéē stechí táchí. Te suni cácuu de nájnūhun yujnu jeē tu jéhe ndehē maá tiempo. Te cácuu de nájnūhun yujnu jeē ní quenda nde jíín yoho, te tú cuiti gā na modo nane numa. ¹³ Te nájnūhun jeē jisó cóyo ndute mar te cáne tíñū, súcuan jícu de jíín jniñu néé jéē cúu jnūhun canu. Te cácuu de nájnūhun quimi jeē ní sana ichí. Te je íyó túhva nuū néé nuū lúchi jnúu coyúcu de ní cáni.

¹⁴ Te jeē ní yāha iñū yucūn Adán, te ni cacu Enoc, te ni nacani de jnūhun jeē ni steén Yaā Dios nuū de siquī tāca tēe yāha, áchí de: Máá Jítóho yō ni steén yā nuū rī jeē ìn quivī te quiji ya jíin cuéhē mil ñayuu maá yá. ¹⁵ Te sándaā yā jniñu tāca ñayuu, te snáhnú ndetū yā tāca ñayuu casáha néé. Chi máni jniñu néé casáha i siquī jeē canéé máá i, te cácahān i cuehē jnūhun ndevāha siquī yā. Ni achi Enoc. ¹⁶ Tāca tēe yāha máni cácahān sōó de, te cácahān de siquī ñayuu. Te máni jeē cúshī ni maá de cánducú de. Te cácahān de jeē tēe téyí cácuu de, te cácahān yíñúhún de jíin ñayuu návāha nihīn de jecu nuū i.

Jeē stihví ni Judas ñayuu cácahān

¹⁷ Te máá ró jijnáhan ró ñánī mánī, na núcūhun ni rō jnūhun jeē jé ni canacani tēe cácuu apóstol maá Jítóho yō Jesucristo. ¹⁸ Chi ni cacahān de: Nde nuū cuándihī quivī te quiijicoo tēe sácata siquī jnúhun ndaā yā, te sáha de tācá jniñu néé jēe ndíyo ni maá de. Súcuan ni cacastūhún apóstol. ¹⁹ Tēe un cúu jeē casásín ñayuu. Te máni cándihví ni de tāca jēe cutíndí ni maá de, chi tu ndéé Espíritu yā jíin de.

²⁰ Te máá ró ñánī mánī, na íje vāha ni rō jíin jnúhun ndoo ndasí jēe cácahān ró. Te cacān tahu rō jíin fuerza Espíritu Santo. ²¹ Te quendōo nihīn ró jíin jnúhun jeē cundáhú ni Yaā Dios rohó. Te condetu ró quivī jeē cótecu rō ní cáni sáha máá Jítóho yō Jesucristo siquī jeē cundáhú ni yā rohó.

²² Te sava ñayuu jeē cájeni siquī ni, nducú ró modo scandíje ró i. ²³ Te sava ga i chi nducú ndéyí ró jeē cácu i nuū cuéchi i, jeē nájnūhun stáa ró i nuū ñuhún. Te cundáhú ni rō i jnama ró i, te coto ró máá ró, te cuquini ni rō coto ró nde sahma i jeē ní cujnéhén jíin jniñu néé casáha i.

Jnūhun cújéhnu Yaā Dios ní cáni

²⁴ Te Yaā Dios chi máñúhún-ni máá yá cúu Yaā ndichí, Yaā jnama yóhó. Te íyó poder yā jeē coto ya rohó jēe ma quivī ró cuéchi, jíin jēe sáha ya jeē cuíñi ró núū ndíndēe yá, te quivī ún coo ndoo ró núū yā, te cusī ndasí ni rō sáha ya. ²⁵ Te na cáhán yō jeē yóhyo luu cújéhnu ya siquī jeē ni sáha ya jíin Jítóho yō Jesucristo. Te na cáhán yō jeē cujéhnu téyí yá, te ndácu ya jniñu jíin poder jeē ndíso ya nde jenahán ndasí jíin ndé vijna jíin ndé ní cáni. Súcuan na cóo. Amén.

JNIÑU QUIJI JEE NI JITO NDIJIN SAN JUAN

Jeē ni stéén Jesucristo tācá jniñu quiji

¹ Jnūhun yáha cúu jeē ní cachi Yaā Dios nuū Jesucristo ndese coo tācá jniñu quiji, nāvāha nacastūhun yá nuū ñáyuu cávandíje jeē cácuu i mozo yā. Te stéén yā nuū i tācá jniñu jeē yachī coo. Te ni tají yá ndajéhé yā ni quiji ya ni steén ndijin yā jniñu un núū ruhū Juan jeē cúu ri mozo yā. ² Te máá rí cástūhun ndāā rī siquī tāca jéē ní jito ri ún, te nácani ndāā rī jnūhun Yaā Dios jíin jnúhun jeē ní cahān ndāā Jesucristo.

³ Yōhyo ndetū ñayuu cahu tutu yáha, te suni yōhyo ndetū ñayuu cuni nahín jeē cáhu ñayuu tāca jnúhun yáha jeē ní cachi Yaā Dios, te chuhun ni i. Chi je cuacuyajni quivī coo tācá jniñu yósó núū tútu yáha.

Jeē téé Juan carta nuū ndihúxá grupo ñayuu cávandíje

⁴ Máá rí cúu Juan, te téé ri jnūhun yáha cuájee nuū rohó, ndihúxá grupo ñayuu cávandíje jeē cáyūcu Asia. Te ñúhun ni rī jeē maá Yaā Dios na sáha ga yā jeē váha rohó jíināhan ró, te sáha ya jeē coo ndeyí coo sīh ni rō. Chi máá yá cúu Yaā iyó vijna, te ni iyo ya ní cáni, te coo ya ní cáni. Te ñúhun ni rī jeē suni súcuan sáha ndihúxá Espíritu jeē cáhīin ya yuhu mesa nuū ndácu Yaā Dios jniñu. ⁵ Te ñúhun ni rī jeē suni súcuan sáha Jesucristo, Yaā cahán ndāā tāca jnúhun. Te xīhna gā maá yá ni natecu mēhñu ndíyi. Te cújehnu ya nuū tāca rey jeē iyó ñayiví. Te máá yá cúndáhú ni yā yohó, te ni nacate ya yohó núū cuéchi yó jíin níñi yā. ⁶ Te ni sáha ya jeē ní nduu yó rey jíin sūtū cájejniñu nuū Tatá yā Yaā Dios. Te na cahán yō jeē yóhyo luu cújehnu ya te jnī ya poder ní cáni. Amén.

⁷ Cuni sōho jíināhan ró, chi ndiji Cristo jíin vícō. Te ndivii ñayuu coto i nuū yā, te nde jíin ñáyuu jeē ní castújí i ya. Te tāca raza ñayuu níh cáhnu ñayiví ndahyū i jeē tu ní cávandíje i ya. Súcuan nahín coo.

⁸ Suhva cáhán maá Jítoho yō, Yaā jnī ndihi poder: Máá rí cúu nájñūhun letra A xīhna ñúhún jíin letra Z jeē sándihí na, chi máá rí ni squejéé ndihi te máá rí sínu, áchí máá Yaā iyó vijna, te ni iyo ya ní cáni, te coo ya ní cáni.

Jeē ní jito Juan jeē cújehnu luu Cristo

⁹ Máá rí cúu hermano rō Juan jíināhan ró. Te inuú-ni ndóho ri jnūndóho jíin ró siquī jeē cávandíje yó Jesucristo, te inuú-ni ndácu Yaā Dios jniñu nuū yō, te inuú-ni jéndeyí ni yō sáha Jesucristo. Te siquī jeē ní nacani ri jnūhun Yaā Dios jíin jéē ní cachi ndāā rī jnūhun Jesucristo, jeē yúcuan ní cajñi i ruhū cuenta preso, te ni cachune i ruhū isla jeē naní Patmos. ¹⁰ Te ñin domingo ni jito ndijin rī jeē ni stéén maá Espíritu Santo nuū rī. Te ni jini sōho ri ñin jeē cána jee nihin ichi yátá rī nájñūhun jeē tívi trompeta. ¹¹ Te ni cahān jíin rí:

Máá rí cúu nájñūhun letra A xīhna ñúhún jíin letra Z jeē sándihí na, chi máá rí cúu Yaā iyó ndé xīhna ñúhún te coo ri ní cáni. Te na téé ró núū ñin tutu tāca jéē cóto ró, te tají ró quihīn nuū ndihúxá grupo ñayuu cávandíje jeē cáyūcú i níh cáhnu Asia, suu ini ñuu Efeso, jíin ñuu Esmirna, Pérgamo, Tiatira, Sardis, Filadelfia, jíin Laodicea. Achí.

¹² Yūcuán na te ni ndicó cóto ri jeē cóto ri ndé ñin cúu jeē cahán jíin rí. Te ná ni ndicó cóto ri te ni jito ri uxā candelero oro. ¹³ Te mēhñú ndihúxá candelero un índichi maá Yaā ní nduu tēe. Te ñúhun ya ñin sahma cáni jeē jinú nde nuū jehé yā. Te núhni ñin cinturón oro jicā yā. ¹⁴ Te ixi xíní yā chi yaa nájñūhun ixi lánchi, nájñūhun yuhvā volcán. Te tinūu ya ndíndēe nájñūhun yáñuhūn. ¹⁵ Te jehé yā xínú jíto nájñūhun cāa cuaán jéē ni ndúhvā nuū horno. Te níhñin ndasí cáhán yā, nájñūhun níhñin cuehē yūte náhnu. ¹⁶ Te ndaváha ya jnī ya uxā quīmi. Te yuhu ya quénda jeē cáa nájñūhun espada jeē xeén ndíndúú lado, te suu cúu jnūhun ya jeē niní sándaā yā siquī cuéchi. Te nuū yā cáa nájñūhun niāndii jeē nándii ndaxín.

¹⁷ Te ná ni jito ri yā te ni cotúú rí nuū jéhē yā nájñuhun jeē ni jíhī rī. Te ni soó yá ndaváha ya síquī rī, te ni cahān yā:

Ma yūhu ró. Máá rí cúu Yaā iyó ndé xihna ñúhún te coo ri ní cáni. ¹⁸ Te Yaā técu cúu ri. Chi ni jíhī rī te ni natecu rī, te vijna chi técu rī ní cáni. Te máá rí jñí poder síquī cuéhyī jéhni ñayuu jíñ síquī lugar nuū cáyūcu ánuá ndīyi. ¹⁹ Núu súcuan te tee ró núu tútu tāca jéē ní jito ró, jeē cúu vijna jíñ jéē cóo ichi núu. ²⁰ Te yāha cúu jñuhun sāhi síquī ndihúxá quīmi ni jito ró jñí ndaváha ri, jíñ síquī ndihúxá candelero oro. Ndhúxá quīmi ún cúu nájñuhun ndihúxá jeē cácujuhnu nuū ndihúxá grupo ñayuu cácujuhne. Te ndihúxá candelero cúu nájñuhun ndihúxá grupo ñayuu cácujuhne.

Jñuhun cuahān nuū ndihúxá grupo ñayuu cacandíje:

Jñuhun cuahān ñuu Efeso

2

¹ 'Tee ró jñuhun yáha na quíhín nuū jeē cujéhnú nuū ñáyuu cácujuhne ñuu Efeso: Súcuan cáhán ruhū, Yaā jeē jñí ndihúxá quīmi jíñ ndaváha ri, te jíca cuu ri mēhñú ndihúxá candelero oro. ² Je jíñ rī tācá jñiñu váha casáha ró, jeē cándihvī ni rō síquī jñuhun ri, jíñ jéē cájendeyí ni rō. Te jíñ rī jeē tu cájēhe ró jñuhun quīvicoo ñayuu casáha néé méhñu ró. Te jíñ rī jeē ní cajito ndee rō tēe cástáhú jeē cácahān de jeē cúu de apóstol, te ni cajini rō jeē tée stáhú cácuu de. ³ Te ni cajendeyí ni rō ni candoho ró jñúndóho, te tu ní ndínúu ni rō jeē cácuu ndasí ró jíñ jñiñu ri. ⁴ Te vésú súcuan te íyó jecu jeē cahān rī nuū rō, chi tuá cáhiyo manī váha ró jíñ rí nájñuhun ni íyo manī rō jíñ rí quivī jehé. ⁵ Núu súcuan te nucūhun ni rō ndese ni castóo ró jñuhun jeē ni íyo manī rō jíñ rí, te nacani ni rō, te na sáha ró nájñuhun ni casáha ró ndé quivī ún. Te núu ma nacani ni rō, te yachī jeē rī te stáa ri candelero rō nuū ín, cúu jeē ma cuñi ga rō jíñ ñáyuu cácujuhne. ⁶ Te vésú súcuan te íyó ññ jeē váha casáha ró, chi tu cánujnahan cuíti ni rō cájito ró jñiñu néé casáha ñayuu cándiquín jñuhun jeē steén Nicolás. Te suni máá rí tu nujnahan cuíti ni rí jito ri. ⁷ Ñayuu iyó sóho na chúsóhó i jeē cahān maá Espíritu Santo jíñ táca grupo ñayuu cácujuhne. Tāca ñáyuu jeē cúndeyí síquī jeneé, cuāha ri jñuhun caji i ndehē jeē cúun xiní yújnu jeē sáha jeē cótecu i ní cáni. Te yujnu un ín nuū jardín Yaā Dios nde andiví, áchí yá.

Jñuhun cuahān ñuu Esmirna

⁸ 'Te tee ró jñuhun yáha na quíhín nuū jeē cujéhnú nuū ñáyuu cácujuhne ñuu Esmirna: Súcuan cáhán ruhū, Yaā jeē iyó ndé xihna ñúhún te coo ri ní cáni, te ni jíhī rī te ni natecu rī. ⁹ Je jíñ rī tācá jñiñu váha casáha ró, jíñ jñúndóho cándocho ró, jíñ jéē cándocho ndáhú ró. Te vésú súcuan te cúcá ró ndihí jeē ndíso jñuhun ri. Te jíñ rī jeē cácahān neé ñayuu síquī rō jijnáhan ró. Ñayuu un cácahān i jeē ñáyuu hebreo, ñayuu maá Yaā Dios cácuu i, te tuú chí cástáhú-ni i, chi sa ñayuu yíhi ndaha Satanás cácuu i. ¹⁰ Te ma yūhú cuíti rō tāca jéē ndoho ró. Chi jexeén je yajni sáha jeē quīvicoo sava ró vecāa jeē cóto ndee rohó jijnáhan ró, te ndoho ró jñúndóho uxī quivī. Te na cuñi ñihin ró ndé cuu rō, te cuāha ri premio jeē cótecu rō ní cáni. ¹¹ Ñayuu iyó sóho na chúsóhó i jeē cahān maá Espíritu Santo jíñ táca grupo ñayuu cácujuhne. Tāca ñáyuu jeē cúndeyí síquī jeneé, ma ñihín i jñúndóho jeē jñahnú ndetū i cuu i vuelta uū, achí yá.

Jñuhun cuahān ñuu Pérgamo

¹² 'Te tee ró jñuhun yáha na quíhín nuū jeē cujéhnú nuū ñáyuu cácujuhne ñuu Pérgamo: Súcuan cáhán ruhū, Yaā jeē névāha espada jeē xeén ndíndúú lado, te suu cúu jñuhun ri jeē sándaā rī síquī cuéchi. ¹³ Je jíñ rī tācá jñiñu váha casáha ró, te jíñ rī jeē cáyūcu ró méhñu ñáyuu jeē ndácu Satanás jñiñu nuū. Te vésú súcuan te cáhiin ñihin ró jíñ jñuhun ri, te tu ní cánayūhu ró jeē cácujuhne ró rúhū, ni quivī ni jíhī Antipas, tēe ni squícu váha ni nacani ndaā jñuhun ri. Chi ñuu rō cáyūcu ñáyuu cájejníñu nuū Satanás, te ni cajehni i Antipas. ¹⁴ Te vésú súcuan te íyó jecu jeē cahān rī nuū rō jijnáhan ró. Chi méhñu róhó

ñáyuu ñuu Pérgamo iyó sava ñayuu cándiquin jnūhun ni steén Balaam. Chi tēe un ní steén de nuū Balac ndese squívi de ñayuu Israel cuēchi jeē cáji i jeē ni sócō nuū ídolo jíin jeē cosíquí ndēē jnáhan i. ¹⁵ Te suni iyó sava ñayuu mēhñu ró jeē cácdandíje ga i jnūhun ni steén Nicolás, te jnūhun ún chi tu nújnahan cuíti ni rī. ¹⁶ Núu súcuan te nacani ni rō síquī cuéchi ró. Chi núu tuú te yachī jeē rī jíin espada jeē quénda yuhu ri, te suu cúu jnūhun ri jeē sándaā rī síquī cuéchi. Te jíin yúcuan te stóho ri ñayuu jeē candíje ga jnūhun néé un. ¹⁷ Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cácdandíje. Táca ñáyuu jeē cúndeyí síquī jeneé, scáji rī i maná jeē yísáhí ichi ándiví. Te suni cuāha ri ñin yuū cuijín núu i, te nuū ún condee ñin síhví jée, te ni ñin ñayuu ma cúní síhví un, chi máá-ni i jeē nihín. Achí yá.

Jnūhun cuahān ñuu Tiatira

¹⁸ Te tee ró jnūhun yáha na quíhín nuū jeē kujéhu nuū ñáyuu cácdandíje ñuu Tiatira: Súcuan cáhán ruhū, maá Séhe Yaā Dios jeē ndíndēe tñūu rí nájnūhun yáñuhūn. Te jehē rī xíñú jíto nájnūhun cāa cuaán jéē ni ndúhvā. ¹⁹ Je jíin rī tǎcá jniñu váha cásáha ró, chi cácdandíje níhin ró rúhū, te cájejniñu ró núu rī, te cájendeyí ni rō. Te jíin rī jeē vihyá gā cásáha ró vijna vēsú nde quiví jehé. ²⁰ Te vēsú súcuan te íyó jecu jeē cahán rī nuū rō. Chi íyó ñin ñahan mēhñu ró jéē naní Jezabel, te cájēhe ró jnūhun stéén ña nuū rō. Te áchí ña jeē nacani ña jnūhun Yaā Dios. Te tuú chi jíin jnūhun stéén ña te stáhú ña ñayuu cácdandíje jeē cácuu i mozo rī. Te sáha ña jeē casíquí ndēē jnáhan i, jíin jéē cáyeji i jeē ni sócō nuū ídolo. ²¹ Te ni jēhe ri tiempo jeē na nacani ni ña, te tu cúní ña nacani ni ña stóo ña jeē casíquí ndēē ña. ²² Núu súcuan te na sáha ri jeē jécāva ña jíin cuéhyí. Te táca ñáyuu casíquí ndēē jíin ña, suni cuāha ri jnūndóho xeēn nuū i, te núu ma nacani ni i stóo i jniñu néé nájnūhun sáha ña. ²³ Te sáha ri jeē cúu ñayuu jeē ni scándíje ña. Te súcuan cuni táca grupo ñayuu cácdandíje jeē maá rí cúu Yaā jíin ndíhi ndese cāa jeē níjnūnί jíin ánuá ñayuu. Te cuāha ri yāhu ñin ñin ró núu ndese ni casáha ró. ²⁴ Te sava ga rō jeē cáyūcú ñuu Tiatira, jeē tu ní cájetáhú jnūhun stéén ñahan ún, ni tu ní cájniñu ró jnūhun jeē cácahān i jeē jnūhun sáhi gá Satanás cúu, jíin máá ró cahán rī jeē ma tée ga rī inga jniñu síquī rō. ²⁵ Chi máá-ni jeē na quéndōo níhin ró jíin jnūhun ndaā cácdandíje ró, te quendōo níhin ró jíin ndé quiví ndíji ri. ²⁶ Táca ñáyuu jeē cúndeyí síquī jeneé, jíin jéē squícu vāha jniñu cúní rī nde vijna te nde quiví sándíhí, sáha ri jeē kujéhu i ndacu i jniñu nuū tǎcá nación, ²⁷ nájnūhun ni sáha Tátá rī jeē kujéhu ri ndacu ri jniñu. Te ndacu níhin i jniñu nuū tǎcá nación. Te nájnūhun cúun yúú i quísi tahu, súcuan squéhichí i ñayuu tu cájendetū nuū rī. ²⁸ Te sáha ri jeē coto i ruhū jeē luu kujéhu ri quenda ndijin rī, nájnūhun jíto i lucero jeē cáne cúndijin. ²⁹ Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cácdandíje. Achí yá.

Jnūhun cuahān ñuu Sardis

3

¹ Te tee ró jnūhun yáha na quíhín nuū jeē kujéhu nuū ñáyuu cácdandíje ñuu Sardis: Súcuan cáhán ruhū, maá Yaā jeē névāha ndíhúxá Espíritu Yaā Dios jíin ndíhúxá quími. Je jíin rī tǎcá jniñu cásáha ró, te cácahān ñayuu jeē cátecu rō, te nuū rī chi nájnūhun ndíyi cácuu ró. ² Na nátahū ni rō, te ndejéē níhin ró jíin jniñu jeē jecu na iyó te ndúcú naa. Chi je jíin rī jeē tu squícu vāha vāha ró núu Yaā Dios. ³ Te na núcūhun ni rō táca jnūhun jeē ní castéén nuū rō. Te cuatáhú ró jnūhun ún te nacani ni rō síquī cuéchi ró. Chi núu tú natahū ni rō, te cuajeē rī nuū rō ñin sanaa-ni nájnūhun jeē ñin sanaa-ni te quíji ñacuíhñá, te ma cúní rō na hora jinū rī nuū rō. ⁴ Te vēsú súcuan te íyó nahín jecu rō ñuu Sardis jeē tu ní cásáha ró cuéchi, jeē cúu nájnūhun jeē tu ní sájnehén ró sahma ró. Jeē yúcuan cuijín yaa coo sahma ró caca ró jíin rí, chi ñayuu vāha cácuu ró. ⁵ Chi táca ñáyuu jeē cúndeyí síquī jeneé, cuāha ri sahma cuijín yaa cuhun i. Te ma ndáhva rī síhví i nuū libro jeē yosó síhví ñáyuu cotecu ní cání. Te cuajnúhún rí i nuū Tatá rī jíin núu tǎcá ndajéhé

yā. ⁶ Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cácadíje. Achí yá.

Jnūhun cuahān ñuu Filadelfia

⁷ Te tee ró jnúhun yáha na quíhín nuū jeē cujéhnú nuū ñáyuu cácadíje ñuu Filadelfia: Súcuan cáhán ruhū, Yaā ndoo Yaā ndaā, te névāha ri ndacáa rey David. Te máá rí núne jeē quívi ñayuu nuū ndácu ri jniñu, te ni ñin ma cúu casi, te máá rí jési, te ni ñin ma cúu nune. ⁸ Je jíin rí tācá jniñu váha cásáha ró. Te ni nune ri nájnūhun ñin yéhyí quívicoo ró, te ni ñin ma cúu casi. Chi vésú jecu-ni fuerza rō iyó, te ni cacandíje ró jnúhun ri, te tu cájesi rō yuhu ró jeē cácadíje ró rúhū. ⁹ Te iyó sava ñayuu yáhi ndaha Satanás, te cácahān i jeē ñáyuu hebreo, jíin ñáyuu maá Yaā Dios cácuu i, te tuú chi cástáhú-ni i. Núu súcuan te sáha ri jeē jécóo i nuū rō te jecuññi yití i nuū rō, te cuni i jeē maní rí jíin ró. ¹⁰ Te váha ni casquícú ró jnúhun ní cahān rí jeē cuándeýí ni rō. Te jeē yúcuan jnama ri rohó quíví jeē quíji ñin jnūndóho xeēn síquī ñáyuu ñí cáhnu ñayíví, jéé cóto ndee ún i jíjnáhan i. ¹¹ Te yachí ndiji ri. Núu súcuan te quendōo ñihin ró jíin jnúhun cácadíje ró, návāha ni ñin ma quénde premio rō. ¹² Tāca ñáyuu jeē cúndeýí síquī jeneé, sáha ri jeē cuu i nájnūhun síhñ yuū luu ini templo Yaā Dios maá rí. Te ma cújiyo i nuū ndeé yá un. Te tee ri síhví Yaā Dios maá rí jneē i, jíin síhví jéé máá rí, jíin síhví ñuu Yaā Dios maá rí. Te ñuu un cúu Jerusalén jeé, te cuun quiji ichi ándiví ndé nuū Yaā Dios maá rí. ¹³ Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cácadíje. Achí yá.

Jnūhun cuahān ñuu Laodicea

¹⁴ Te tee ró jnúhun yáha na quíhín nuū jeē cujéhnú nuū ñáyuu cácadíje ñuu Laodicea: Súcuan cáhán ruhū, maá Yaā cúu jnūhun ndaā, Yaā cúu testigo váha jeē cahán ndaā. Te máá rí ni sáha ndíhi jeē ni cáhān Yaā Dios jeē na jécōo. ¹⁵ Je jíin rí tācá jniñu cásáha ró. Te cácuu ró nájnūhun jeē tú mijin ni tú jihní, cúu jeē jecu-ni cácadíje ró jnúhun ri, te ni tu cájito uhū rō ni tu cándihví ni rō síquī. Te nacā jeē váha núu jeē mijin ró chí jéé jihní ró nuú. ¹⁶ Te tuú chi máá yívixi-ni ró, chí ni tu cájito uhū rō ni tu cándihví ni rō síquī. Te jeē yúcuan squéhichí ri rohó nájnūhun ñin jeē tésíhi rí jeē séyūhu rí jeē tu nújnahan ni rí. ¹⁷ Te cácahān rō jeē cucá ró, te quéndōo váha ró, te tu cúmaní ni ñin nuū rō. Te tu cásáha ró cuenta jeē cuécá íi cándoho ró, te ndáhú ndasí ró, te cácuáá ró, te máá ññ lí rō. Te tāca jéé yáha cúni cahān jeē tu cácadíje váha ró. ¹⁸ Núu súcuan te cáhán rí jíin ró jeē nuū rí cuaan ró oro jeē ni ndúhvā nuū ñuhún te ni nduu máá nene, te suu cúu jeē sáha ri jeē coo cúcá ndije ró ndíhi jeē ndíso jnūhun ri. Te nuū rí cuaan ró sahma cuijín cuhun ró, návāha tú cucanu rō jeē máá ññ lí rō, cúu jeē quéndōo ndaā rō sáha ri. Te cuaan ró tájnā nuū rí, quíví tinūu ró, návāha ndundijin tinūu ró, cúu jeē jecūhun ni rō jnūhun ri. ¹⁹ Tāca ñáyuu jeē cundáhú ni rí, chí cáhán rí nuū i te stóho ri i, návāha na chúhun ni i. Núu súcuan te na cóndihví ni rō jíjnáhan ró, te nacani ni rō jeē stóo ró cuéchi ró. ²⁰ Cuni sōho, chí íin ri yehyí ánuá rō te cáhán rí. Te núu ndé-ni róhó cuni sōho te nune ró yéhyí ánuá rō, te quíví ri caji rí staā jíin ró, te suni caji maá ró jíin rí. Te suu cúu jeē cóndee rí anuá rō. ²¹ Tāca ñáyuu jeē cúndeýí síquī jeneé, cuāha ri jnūhun conene i jíin rí nuū mesa nuū ndácu ri jniñu. Chí máá rí suni ni snāā rí poder jeneé, te ni cucōo ri jíin Tátá rí nuū mesa nuū ndácu ya jniñu. ²² Ñayuu iyó sóho na chúsóhó i jnūhun jeē cahán maá Espíritu Santo jíin táca grupo ñayuu cácadíje. Achí yá.

Tāca jéé cáyucú andíví cáchiñúhún núu yā

4

¹ Yūcuán na te ni ndacoto ri, te ni jito ri jeē núne ñin yéhyí andíví, te máá Yaā jeē ni cáhān jíin rí jeē xíhna ñúhún, ni cahān tucu jíin rí nájnūhun jeē tívi trompeta. Te ni cahān:

Caa quiji ró yáha, te na stéén rí nuū rō tācá jniñu jeē cóo ichi núu gā, achí yá.

² Te máá Espíritu Santo ni scóto-ni ya ruhū. Te ni jito ri jeē andiví íin ìn mesa nuū ndácu jniñu, te néne máá yá nuū mesa un. ³ Te máá yá jeē néne yūcuan cáa ya nájnūhun ndíndēé ìn yuū quiyi ndí chí ìn yuū cuehé ndí. Te ìn ticō vēhnde ní jicó ndúū yuhu mesa yā, te ndíndēé nájnūhun ìn yuū cuí ndí. ⁴ Te xiin mesa yā ni jito ri jeē ní jicó ndúū ocō cuñ gā mesa nuū ndácu jniñu. Te nuū mesa un néne ocō cuñ tēe jéhu cándiso jniñu. Te cáñuhun de sahma cuijín yaa, te xini de cáñuhun corona oro. ⁵ Te nde nuū mesa nuū ndácu ya jniñu ndíndēé taja te níhìn te cáhán taja. Te ichi núú mesa yā ìn ndíhúxá Espíritu Yaā Dios, jeē cáa nájnūhun uxā yiti náhnu jeē cayú ñuhūn. ⁶ Te ichi núú mesa yā ún suni íyó nájnūhun ìn mar jeē jito quiyi nájnūhun vidrio.

Te xiin mesa yā un ní jicó ndúū cuñ jeē técu. Te íyó cuéhē tinū nñ cáhnu ichi núú jín ichi yátá un. ⁷ Te ìn jeē técu un cáa nájnūhun ndícaha. Te ìnga cáa nájnūhun stiquí. Te jeē uní chi néne nuū tēe. Te jeē cuñ chi cáa nájnūhun yaha chócó jēé jicó núú tachí. ⁸ Te ndicúún jeē técu un íyó íñū ndijēn jeē ìn ìn. Te máni máá tinū cúu nñ cáhnu nde jín nñ chíji ndijēn. Te nduú ñuú tu jécuiñ cuiti jeē cahán:

Yaā ì Yaā ndoo ndasí
 cúu máá Jítoho yō Yaā Dios, Yaā jñí ndíhi poder,
 Yaā íyó vijna, te ni íyo yá nñ cáni, te coo ya nñ cáni.
 Achí.

⁹ Chi máni jeē cácahān ndicúún un jēé cujéhu ndasí máá Yaā jeē néne nuū mesa, Yaā jeē técu nñ cáni cuiti. Te yíñúhún cácahān un jín yá, te nácuatáhú núú yā. ¹⁰ Te tāca jínu jeē casáha súcuan, te ndíhócó cuñ tēe jéhu cándiso jniñu, cájecuiñ yiti de nuū Yaā jeē técu nñ cáni cuiti, cáchiñúhún de ya. Te cástáa de corona de, cájequin de ichi núú jehé mesa yā. Te cácahān de:

¹¹ Jítoho ná te Yaā Dios na cúu ní.
 Te vāha ndasí Yaā cúu ní jēé cácahān i jeē luu cújéhu ní,
 te cáhíyo yíñúhún i nuū ní, te jñí ní ndíhi poder.
 Chi máá ní ni sáha ndíhi jeē íyó,
 te siquí jeē súcuan ni cuu ni maá ní te ni jecōo ndíhi.
 Achí de jíjnāhan de.

Jeē ní nune Londe Yaā Dios tutu

5

¹ Yūcuán na te ni jito ri jeē Yaā néne mesa jeē ndácu jniñu, ndaváha ya jñí ya ìn tutu cáni jeē ní tuu. Te yósó jnúhun ndíndúú lado tutu ún, te ndíhyú jín úxā sello. ² Te ni jito ri ìn ndajéhé yā jeē ndíso poder, te ni cahān jee:

¿Ndé ìn cúu tēe vāha ndasí jeē cóndiso jniñu cahnde sello te nune tutu yáha? áchí ndajéhé yā.

³ Te ni andiví ni ñayiví ni jeē íyó chíji ñayiví, tu ní íyo ni ìn jeē cóndiso jniñu nune tutu ún, ni jeē cóto nuū. ⁴ Te ni ndahyū ndasí rí, chi tu ní íyo ni ìn jeē cóndiso jniñu nune te cahu tutu ún, ni jeē cóto nuū. ⁵ Yūcuán na te ni cahān ìn tēe jéhu un jín rí:

Ma ndahyú rō, chi íyó ìn Yaā ndíso jniñu jeē cahnde yā ndíhúxá sello ndíhyú tutu, te nune ya. Te máá yá chi íyó cuéhē poder yā, nájnūhun jeē íyó cuéhē fuerza ìn ndícaha. Te ni cacu ya chíji yucūn Judá, jeē cúu yucūn rey David. Te ni snāā yā poder tāca jéneé.

⁶ Yūcuán na te ni jito ri Yaā jeē cúu Londe Yaā Dios jeē ní cajehni i te ni natecu. Te Londe un íin ya nuū íin mesa Yaā Dios, mēhñú ndicúún jeē técu, jín tēe jéhu cándiso jniñu. Te íyó úxā ndiquí jín úxā tinū Londe ún. Te tinū un cúu ndíhúxá Espíritu Yaā Dios jeē ní tají yá ni jengoo nñ cáhnu ñayiví. ⁷ Te Londe un ní jequihin ya tutu jeē jñí ndaváha Yaā jeē néne nuū mesa. ⁸ Te ná ni quihin ya tutu ún, te ndicúún jeē técu jín ndíhócó cuñ tēe jéhu cándiso jniñu, ni cajecuiñ yiti núú yā. Te ná ìn ná ìn tēe jéhu un cándaha yaa jeē naní arpa, jín cóhō cūu oro jeē ñuhun chitú súje cutú. Te sūje cutú un cúu máá táca jnúhun jeē cájicān tahu ñayuu yíhi ndaha Yaā Dios. ⁹ Te ni cajita de ìn yaa jeé, te suhva cáhán:

Vāha ndasí Yaā cúu ní jéē quihin ní tutu te cahnde ni sello jeē ndihyú.

Chi ni cajehni i níhín, te jíin níñī ni ní nacuaan ní ñayuu mēhñu táca raza, tācá yuhu, tācá ñuu, tācá nación, návāha cuu i ñayuu Yaā Dios.

¹⁰ Te ni sáha ní jéē cuu i rey jíin sūtū nuū Yaā Dios, te ndacu i jniñu ini ñayīví.

Achí de cájita de.

¹¹ Te ni jito ga rī, te ni jini sōho ri jeē cácahān cuehē ndajéhé yā jeē ní cajicó ndūū xiin mesa yā, jíin xiin ndicúún jeē técu, jíin xiin tēe jéhnu cándiso jniñu. Te iyó cuehē ndasí millón ndajéhé un. ¹² Te suhva ni cacahān jee ya:

Vāha ndasí Yaā cúu Londe jeē ní cajehni i.

Te jeē yúcuan jniñi ya poder, te yōhyo cúcá yá, te yōhyo ndíchí yá, te ndíso ya cuehē fuerza, te cáhīyo yíñúhún ndihī nuū yā, te luu cújéhnu ya, te cácahān i jeē váha ndasí Yaā cúu ya.

Achí.

¹³ Te suni ni jini sōho ri jeē cácahān ndihī jeē ni sáha Yaā Dios jeē iyó ini andiví jíin ini ñayīví jíin chíji ñayīví jíin ini mar. Te ndivii un ní cacahān:

Cúsīñi ni yō cahán yō jeē yóhyo váha Yaā cúu máá Yaā néne mesa nuū ndacu ya jniñu, jíin Yaā cúu Londe Yaā Dios.

Te na cóo yíñúhún yó núu yā, chi cújéhnu luu ya, te jniñi ya poder ní cání cuiti.

Achí.

¹⁴ Te ni cacahān ndicúún jeē técu:

Súcuan na cóo, áchí.

Te ndihóco cuñ tēe jéhnu cándiso jniñu ni cajecuiñi yití de, te ni cachiñúhún de nuū Yaā jeē técu ní cání cuiti.

Siquī ndihúxá sello

6

¹ Yūcuán na te ni jito ri jeē Yaā cúu Londe Yaā Dios, ni jehnde yā ñin jeē uxá sello un. Te ni jini sōho ri jeē cahán ñin jnáhan ndicúún jeē técu ún, nájñuhun cahán taja:

Nehen te cuni rō.

² Te ni ndacoto ri, te ni jito ri ñin caballo cuijín. Te jeē yosó síquī tī un ndáhá ñin arco jeē stáva nduva. Te ni jecūhun ñin corona xinī. Te ni quenda ni jejnáhan, te ni cundeyí síquī ndihī.

³ Yūcuán na te Londe un ní jehnde yā sello uū. Te ni jini sōho ri jeē cahán ñnga jnáhan ndicúún jeē técu:

Nehen te cuni rō.

⁴ Te ni quenda ñin caballo cuehé, te jeē yosó síquī tī ndíso jniñu jeē snáa jñuhun cáyūcu manī ñayuu ñayīví, te quejéé i cahni jnáhan i. Te ni nihīn ún ñin espada cáhnu.

⁵ Yūcuán na te Londe un ní jehnde yā sello unī. Te ni jini sōho ri jeē cahán ñnga jnáhan ndicúún jeē técu:

Nehen te cuni rō.

Te ni ndacoto ri, te ni jito ri ñin caballo jnuú. Te jeē yosó síquī tī ndáhá ñin balanza jeē chícuāha, chi coo jnamā xeēn. ⁶ Te mēhñú ndicúún jeē técu un ní jini sōho ri ñin jeē cahán:

Máá ñin kilo-ni trigo nihīn i jíin yáhu i jeē sájniñu i ñin quivī. Te núu cebada, te unī-ni kilo nihīn i jíin yáhu i jeē sájniñu i ñin quivī. Te aceite jíin vino chi ma sáha ró jéé cúmanī. Achí.

⁷ Yūcuán na te Londe un ní jehnde yā sello cuñ. Te ni jini sōho ri jeē cahán tucu ñnga jnáhan ndicúún jeē técu:

Nehen te cuni rō.

⁸ Te ni ndacoto ri, te ni jito ri ñin caballo cuaán yaa, te jeē yosó síquī tī cúu máá cuéhyī jéhni ñayuu. Te ichi yátá un ndíquín máá jnúhun jeē quívi ñayuu lugar nuū cáyūcu ánuá ndíyi. Te ndíndúú un cándiso jníñu jeē ndónnda síquī ñin jeē ndicúún parte ñayívi, te cuu sáha jeē cúu ñayuu jíin guerra, jíin jnámā, jíin cuéhyī xeén, jíin táca quití xeén jeē iyó ñayívi.

⁹ Yūcuán na te Londe un ní jehnde yā sello uhūn. Te chíji altar cáhnu ni jito ri anuá ñayuu jeē ní cacandíje jnúhun Yaā Dios te ni canacani ndaā i jnúhun ya, te síquī yūcuan ní cajehni ñayuu i. ¹⁰ Te ni cacana jee ánuá un:

Jitoho ná Yaā Dios, maá ní cúu Yaā ndoo te vāha squícu ní jéē ni jéjnūhun ní. ¿Te nasaa ga tiempo coo te sándaā ni jéhē ná, te nacuaāha ní jéē ndútahū ñayuu ñayívi jéē ní cajehni sáñá? áchí.

¹¹ Yūcuán na te ni jēhe ya sahma cuijín cuhun i jíjnáhan i, te ni cahān yā jíin i jeē na ndétātú i jecu gā tiempo. Chi íyó gá hermano i jeē cájejniñu nuū yā, jeē suni jíni ñúhún cuu i návāha jínu número i, áchí yá.

¹² Yūcuán na te Londe un ní jehnde yā sello iñū. Te ni jito ri jeē ni jnáa ndasí. Te ni cujnuú níandii nájnūhun ñin sahma jnúú. Te ní yóō ni nduu nájnūhun niñí. ¹³ Te quími andívi ní ñingoyo nuū ñúhun nájnūhun ñingoyo ndehē yíhí yujnu higo sáha tachí níhin. ¹⁴ Te andívi ní cujiyo cuahān nájnūhun jeē nátuu ñin tutu cáhnu. Te táca yucu jíin táca isla ni cujiyo cuangoō inga lado. ¹⁵ Te táca rey ñayívi, jíin jéē cácujeñnu, jíin jéē cucá, jíin táca capitán, jíin jéē cándiso poder, jíin mozo jeē ní cajeen ñayuu, jíin téé casájniñu cuenta maá, ní cachisāhi máá ini yaū cava jíin méhñu cava chíji yucu. ¹⁶ Te ni cacahān i jíin yucu jíin cava:

Ndicó cáva síquī rī, na quísāhi rí návāha tú coto máá Yaā néne mesa ndácu jniñu, jíin Yaā cúu Londe jeē cuáha ya castigo xeēn ruhū. ¹⁷ Chi ni quee maá quívi cáhnu jeē cuáha ya castigo, ¿te ndé ñin canda condichi nuū yā? achí i jíjnáhan i.

Ñayuu tāca yúcūn Israel jeē ni jécondee sello jneē

7

¹ Te ná ni cuu jniñu yáha, te ni jito ri cuūn ndajéhé yā jeē cáhīn ndicúún lado ñayívi. Te cájesi yā nuū ndicúún tachí, návāha ma queé nuū ñúhun ni nuū mar ni nuū ní ñin yujnu. ² Te suni ni jito ri inga ndajéhé yā, vēji ichi núū cáne niāndii. Te ndáhá yá sello Yaā Dios, Yaā técu. Te ni cahān jee ya jíin ndicúún ndajéhé un jéē ndíso jníñu jeē sáha daño nuū ñúhun íchi jíin núū mar:

³ Ma sáha ró daño nuū ñúhun ni nuū táca yujnu ni nuū mar, chi nde na téé yó sello jneē tāca ñáyuu cájejniñu nuū Yaā Dios yō.

⁴ Te ni jini sōho ri jeē achí jéē iyó ciento uū xico cuūn mil ñayuu jeē ni jécondee sello jneē. Te ñayuu un cácuu tāca yúcūn ñayuu Israel. ⁵ Te íyó úxī uū mil ñayuu cácuu yúcūn Judá jeē ni jécondee sello, jíin úxī uū mil yúcūn Rubén, jíin úxī uū mil yúcūn Gad, ⁶ jíin úxī uū mil yúcūn Aser, jíin úxī uū mil yúcūn Neftalí, jíin úxī uū mil yúcūn Manasés, ⁷ jíin úxī uū mil yúcūn Simeón, jíin úxī uū mil yúcūn Leví, jíin úxī uū mil yúcūn Isacar, ⁸ jíin úxī uū mil yúcūn Zabulón, jíin úxī uū mil yúcūn José, jíin úxī uū mil yúcūn Benjamín. Ndihi yúcūn yáha cúu jeē ni jécondee sello.

Ñayuu cuehē jeē cáñuhun sahma cuijín

⁹ Te ná ni cuu jniñu yáha te ni ndacoto ri, te ni jito ri cuehē ndasí ñáyuu. Te cúu i ñayuu táca nación jíin táca raza jíin táca yuhu jíin táca ñuu. Te cáhīn i nuū mesa nuū ndácu Yaā Dios jniñu jíin núū maá Yaā cúu Londe. Te síquī jeē cuehē ndasí i, te ni ñin ma cúu cahu nasaa i cúu. Te cáñuhun i sahma cuijín, te cándahá i ñuū. ¹⁰ Te ni cacana jee i: Yaā Dios maá yó cúu jeē ní jnama yóhó, Yaā jeē néne nuū mesa jeē ndácu jniñu, jíin Yaā cúu Londe Yaā Dios.

Achí i jíjnáhan i. ¹¹ Te ndíhi ndajéhé ni cajicó ndúū yā cáhiin ya xiin mesa Yaā Dios, jíin xiin tēe jéhnú cándiso jníñu, jíin xiin ndicúún jeē técu. Te ni cajecuiñi yiti yá ni cachiñúhún yá Yaā Dios ichi núū mesa yā. ¹² Te ni cacahān yā:

Amén. Cúsī ni yō cahán yō jeē yóhyo vāha Yaā cúu Yaā Dios maá yó.

Te luu cújéhnú ya te ndíchi yá.

Te na nácuatáhu yó nuū yā, te na cóo yíñúhún yó núū yā.

Chi jní ya poder, te ndiso ya cuehē fuerza jeē ní cáni cuiti. Amén.

Achí táca ndajéhé yā.

¹³ Yūcuán na te ni cahān iin tēe jéhnú un jíin rí:

¿Ndé ñayuu cúu yāha jéé cáñuhun sahma cuijín, te ndé chi véjicoo i?

¹⁴ Te ni cahān rí jíin de:

Maá ní cúu jeē jini, Tátā.

Te ni cahān de jíin rí:

Yāha cácuu ñayuu jeē ní cayāha i jeē ní cajito i jnūndóho xeēn. Te ni canacate i sahma i jíin níñi maá Londe, te ni nduyaa vāha, cúu jeē ní ndundoo ánuá i ni sáha ya. ¹⁵ Jeē yúcuán cúu jeē cáhiin i nuū mesa nuū ndácu Yaā Dios jniñu, te cájejniñu i ini templo yā ndúú ñuú. Te Yaā jeē néne nuū mesa, coto ya i jeē quéndōo vāha i nuū yā. ¹⁶ Te ma cúu gā i sōco, te ma jichí gā i ndute. Te ma cayú gā i nuū niāndii, ni ma ndóho ga i jeē jihni.

¹⁷ Chi máá Yaā cúu Londe jeē néne nuū mesa jeē ndácu jniñu, coto ya i nájnūhun jeē cúu i lanchi ya. Te condeca ya i quihīn yā jíin i nuū cáne ndute jeē cótecu i sáha. Te Yaā Dios nacuaa yā ndute núu i jíjnáhan i, te ma ndahyú gā i. Achí téé jéhnú ún.

Siqui sello uxā jíin cohō cúu oro

8

¹ Te Londe un ní jehnde yā sello uxā jeē ndihyú tutu ún, te nayúu-ni ni iyo ini andiví nájnūhun sava hora. ² Te ni jito ri ndihúxá ndajéhé jeē cáhiin nuū Yaā Dios. Te ni cajéhe uxā trompeta nuū ndajéhé un. ³ Yūcuán na te ni quee inga ndajéhé, ndáhá yá iin cohō cúu oro, te ni jecuiñi yā nuū altar. Te ni jéhe cuehē sūje cutú núu yā, návāha socō yā jíin jnúhun cájicān tahu ndíhi ñayuu cácañdije Yaā Dios. Te ni socō yā nuū altar oro jeē índichi ichi núu mesa nuū ndácu Yaā Dios jniñu. ⁴ Te nuū cohō cúu jniñi ndajéhé un ní cane ñuhmā sūje cutú, ni caa nuū Yaā Dios nde jíin jnúhun cájicān tahu ñayuu cácañdije Yaā Dios. ⁵ Yūcuán na te ni quihīn ndajéhé un cohō cúu un. Te ni scutú yá tīcua ñuhūn jeē cayú nuū altar. Te ni jete yā nde ini ñayiví. Te ni sáha jeē ni cáhān taja, te ni níñi, te ni ndindēé taja, te ni jnāa.

Jnúhun siquī trompeta

⁶ Yūcuán na te ndihúxá ndajéhé jeē cándāhá ndihúxá trompeta, ni casátūhva ya jeē tiví yā.

⁷ Te ndajéhé iin ni tiví yā trompeta. Te ni cuun níñi ini ñayiví jíin níñi jeē ni sácā núu jíin níñi. Te ni cayū iin jeē uní parte ñayiví, jíin iin jeē uní parte yujnu, jíin iin jeē uní parte ite cuí.

⁸ Te ndajéhé uū ni tiví yā trompeta. Te iin nájnūhun iin yucu cáhnu jeē cayú ñuhūn ni ñingava cuahān nuū mar. Te iin jeē uní parte mar ni nduu níñi. ⁹ Te ni jihí iin jeē uní parte quití ñuhūn nuū mar. Te ni naa cuehē barco, chi iin iin jeē táca úní ni naa.

¹⁰ Te ndajéhé uní ni tiví yā trompeta. Te ni ñingava iin quimi cáhnu ichi ándiví, te cáyú nájnūhun cáyú iin yiti cáhnu. Te ni ñingava siquī iin iin jeē táca úní yūte jíin núu cáne ndute. ¹¹ Te quimi un nání quimi uvuā. Te iin jeē uní parte ndute ni cuu uvuā. Te ni cajihí cuehē ñayuu ni sáha jeē ní cuu uvuā ndute ún.

¹² Te ndajéhé cuūn ni tiví yā trompeta. Te iin jeē uní parte niāndii jíin yóo jíin quimi ni tiví. Te ni ndunee iin jeē uní parte i, te tuá ni cúndijin iin jeē uní parte ndúú jíin ñuú.

¹³ Te ni ndacoto ri, te ni jini sōho ri jeē cána jee iin ndajéhé yā jeē ndáva cuahān sava andiví:

Nacā xeēn gā ndoho ñayuu cáyūcú ini ñayīví, chi je yajni cuecu unī gā trompeta jeē tivī unī gā ndajéhé, achí yá.

9

¹ Te ndajéhé uhūn ni tivī yā trompeta. Te ni jito ri jeē ichi ándiví ní ñingava ñin quīmi nde ini ñayīví. Te nuū quīmi un ní jēhe ndacáa jeē núne tūhnchi cúnú ndasí. ² Yūcuán na te ni nune un tūhnchi, te ni cane ñuhmā ni caa nájñūhun ñuhmā ñin ñjñū cáhnu. Te ñuhmā un ní sáha jeē ní cunee niāndii jíin ñí núū tachí. ³ Te nuū ñuhmā un ní canecoo tíca ndicuéhyí, ni jítē núu tí ñí cáhnu ñayīví. Te ni jēhe ya jñūhun jeē sáha tí nájñūhun cásáha tisuhma xeēn jeē iyó ini ñayīví. ⁴ Te ni ndacu ya jñiñu nuū tí jeē ma sáha tí daño ite jíin yúcū cuí jíin yujnu, chi máni ñayuu jeē tu ndéé sello Yaā Dios jñeē i cúu jeē tuu tí. ⁵ Te tu ní jēhe ya jñūhun jeē cáhni tí ñayuu, chi máni jeē stóho tí i uhūn yoō. Te sáha tí jeē jetú i nájñūhun jeē jetú ñayuu jeē túu tisuhma i. ⁶ Te quivī ún nducú ndasí ñayuu modo cuu i, te ma nihín i modo. Te vésú cuní i cuu i, te tú na modo cuu i.

⁷ Te tíca ndicuéhyí un cáa tí nájñūhun caballo jeē cáhīyo tūhva quingoo nuū cuájñahan. Te xinī tí ñūhun nájñūhun corona oro. Te née tí nuū té. ⁸ Te íyó ixi tí jeē cáa nájñūhun ixi xíní ñahan. Te jñūhun tí cáa nájñūhun jñūhun ndícaha. ⁹ Te ñí tí ndihyú nájñūhun sahma cáa. Te ññin ndijēn tí nájñūhun ññin jeē cuángoo cuehē caballo nuū guerra cáñuhun tí carreta. ¹⁰ Te suhmā tí ndíso iñu nájñūhun tisuhma. Te jíin súhmā tí cuu stóho tí ñayuu uhūn yoō. ¹¹ Te íyó ñin jeē cujéñnu nuū tí, te suu cúu ndajéhé jexeén jeē ndító tūhnchi cúnú ndasí un. Te ndajéhé un yuhu hebreo naní Abadón, te yuhu griego naní Apolión, jeē cuní cahān maá jéē snáa.

¹² Je ni yāha ñin jñūndóho, te íyó úu gā jñūndóho jeē quíji.

¹³ Te ndajéhé iñū ni tivī yā trompeta. Te ni jini sōho ri ñin jñūhun jeē ni cáhān nde mēññū ndicúun yiquí altar oro jeē íin nuū Yaā Dios. ¹⁴ Te ni cahān un jíin ndajéhé iñū jeē ndahá trompeta:

Nandají ró ndicúun ndajéhé jeē nuhní yuhu yúte cáhnu jeē naní Eufrates, achí.

¹⁵ Te ni nandají ndicúun ndajéhé un, návāha cahni ñin jeē uní parte ñayuu ñayīví. Chi je cáhīyo tūhva ndajéhé un jeē siquí maá hora jíin quívī jíin yóō jíin cuíyā jeē cóo súcuan.

¹⁶ Te ni jini sōho ri jeē achí jéē iyó úu ciento millón soldado jeē cáyoso caballo.

¹⁷ Te ni steén gā yā nuū rī, te ni jito ndijin rī tācá caballo. Te tēe cáyoso siquí tí cáñuhun de camisa cāa jeē cuehé, jeē ndeé, jíin jéē cuaán. Te xinī caballo un cándāa nájñūhun xinī ndícaha. Te yuhu tí quénda ñuhūn jíin ñúhmā jíin azufre. ¹⁸ Te jíin únī jeē quénda yuhu caballo un, te ni jihī ñin jeē uní parte ñayuu, suu jíin ñúhūn jíin ñúhmā jíin azufre. ¹⁹ Chi yuhu tí jíin súhmā tí iyó fuerza jeē cáhni tí ñayuu. Chi suhmā tí cándāa nájñūhun coō, te íyó xíní, te jíin yúcuan stóho tí ñayuu.

²⁰ Te sava ga ñayuu jeē tu ní jíhí jíin táca jñūndóho yāha, tu ní nácani ni i stóo i ídolo jeē ní casáha i. Te tu ní stóo i jeē cáchiñúhūn i tāca táchi jíin ídolo jeē ní cuvāha jíin oro jíin plata jíin cáa cuaán jíin yúū jíin yujnu. Te tācá un chi tu cúu coto, ni tu cúu cuni sōho, ni tu cúu caca. ²¹ Te ni tu ní cánacani ni i stóo i jeē jéñni i ndíyí, jíin jéē satásí i, jíin jéē jíca jnéni i, jíin jéē sacuíhná i.

Ndajéhé jeē ndahá libro lulí

10

¹ Te ni jito ri inga ndajéhé yā jeē ndíso poder, ni cuun ya ichi ándiví. Te ñúsúcun yá vicō, te xinī yā ñūhun ticō vēhndé. Te nuū yā ndíndēe nájñūhun niāndii, te sñin ya cáa nájñūhun uū sñin jeē cáa ná cáa ñuhūn. ² Te ndáhá yá ñin libro lulí jéē núne. Te ni jeni ya jehē váha ya nuū mar, te jehē jecó yá nuū ñūhun íchi. ³ Te ni cana jee téyí yá, nájñūhun jeē ndahyú ndícaha. Te ná ni cana jee ya, te ni cacahān uxā taja. ⁴ Te ná ni cacahān uxā taja, te je íyó tūhva ri jeē té ri jñūhun un núú. Te ni jini sōho ri ñin jñūhun ichi ándiví jeē ni cáhān jíin rí:

Chuvāha ró táca jñūhun jeē ní cacahān uxā taja ún, te ma steén rō, ni ma téé ró, achí.

⁵ Yūcuán na te ndajéhé jeē ní jito ri jeē ín nuū mar jíin núū ñúhun, ni ndonehen ya ndaha váha ya ichi ándiví. ⁶ Te ni ndacunehen ya síhví máá Yaā jeē técu ní cáni, Yaā ni sáha andiví jíin ñáyiví jíin mar jíin táca ndíhi jeē iyó ini. Te jíin síhví yá un ní cahān teyí ndajéhé:

Ma cucuéé gá jeē jíinu ñayiví. ⁷ Chi núu na quéjéé ndajéhé uxā tiví yā trompeta, yūcuán na te squícu-ni Yaā Dios jnūhun sāhi yá, nájnūhun ni castūhun yá nuū tāca mozo yā, tēe ni canacani jnūhun ya nde jenahán, áchí ndajéhé.

⁸ Yūcuán na te máá jéé ní jini sōho ri jeē ni cáhān ichi ándiví, ni cahān tucu jíin rí:

Cuáhán te quihin ró libro lulí jéé núne jeē ndahá ndajéhé jeē ín nuū mar jíin núū ñúhun, áchí.

⁹ Te ni jehēn rī nuū ndajéhé un, te ni jicān rī jeē na cuáha ya libro lulí un núū rī. Te ni cahān yā:

Quihin te caji rō. Chi vixí sáha ini yuhu ró nájnūhun ndūxi, te chíji ró chi cuhiyá sáha, áchí yá.

¹⁰ Yūcuán na te ni quihin ri libro lulí jeē ndahá ndajéhé yā, te ni yeji rī. Te vixí ni sáha ini yuhu ri nájnūhun ndūxi. Te ná ni cuu ni yeji rī, te ni jitē iyá ni rī. ¹¹ Te ni cacahān jíin rí:

Cánuú jéé nacani tucu ró jnúhun Yaā Dios, ndese coo síquī ñayuu cuehē ñuu jíin cuéhē nación jeē sīn sīn yuhu, jíin síquī cuehē rey cándacu jniñu, áchí jíin rí.

Siquí uū testigo yā

11

¹ Yūcuán na te ni cajēhe ñin yujnu nuū rī, jeē cúu ñin cūhva jeē chícuāha. Te ni cacahān jíin rí:

Ndocuññ te chicuāha ró templo cáhnu Yaā Dios jíin altar, te cahu ró nasaa ñayuu cúu jeē cáchiñúhún núū yā yūcuán. ² Te ma chícuāha ró patio yatā templo. Chi je ni jēhe ya nuū ñayuu tācá ñuu jicá. Te coyūcú i ini ñuu iī yāhá, te uū xico uū yoō cueñū i síquī ñuu.

³ Te tají rí uū testigo rī jeē nácani jnūhun ri mil uū ciento unī xico quiví. Te cuhun de sahma ndáyí jéé cáncucúhyá ni de síquī cuéchi ñayuu, achí yá.

⁴ Te ndíndúú testigo un cúu nájnūhun ndíndúú yujnu olivo jíin ndíndúú candelero jeē ín nuū Yaā Dios, Yaā chíí ñayiví. ⁵ Te na-ni ñayuu núu nducú sáha ndevāha jíin ndíndúú testigo un, te quenda ñuhūn yuhu ndíndúú de, te cayū ndíhi ñayuu cájito uhū i de. Te súcuán cuu tāca ñayuu jeē nducú sáha ndevāha jíin de. ⁶ Te íyó poder ndíndúú testigo un jéé cási de jeē ma cúun saū ñí tiempo jeē nácani de jnūhun ya. Te suni íyó poder de sáha de jeē nduu ñíñ tācá ndute. Te cuu stíví de ñayiví jíin ndínuū jnūndóho, núu nasaa jíinu cáncuni de. ⁷ Te ná ni jínu ni canacani de jnūhun ya, yūcuán na te quenda quití xéén jeē néne tūhñchi ún. Te cuajnáhan jíin ndíndúú de, te cundeyí jíin de, te cahni de. ⁸ Te ndíyi ún cava nuū yáhu ñuu cáhnu nuū ní cajehni i máá Jítóho yō jicā cruz. Te ñuu un cácahān yatá i jeē ñuu Sodoma jíin Egipto cúu, síquī jeē xeēn cuéchi íyó ñuu ún. ⁹ Te ñayuu tācá ñuu, tāca yúcūn, tācá yuhu, tācá nación, chi coto i jeē cáva ndíndúú ndíyi un unī quiví yosáva, te ma cuáha i jnūhun jeē quíndūji. ¹⁰ Te ñayuu ní cáhnu ñayiví cusñ ndasí ni i jeē ní cajihí de, te sáha i vico, te cuāha i regalo nuū jnáhan i. Chi ndíndúú téé ni canacani jnūhun ya ún, ní casáha de jeē ní candoho ndasí ñayuu ñayiví. ¹¹ Te jeē yáha unī quiví yosáva ún, te Yaā Dios sáha ya jeē nastáa tachí de, te ndonda-ni de. Te yūhú ndasí ñayuu coto i jeē ní canatecu de. ¹² Yūcuán na te cuni sōho de jeē cána jee ichi ándiví:

Caa ró quijicoo ró ndé yāhá, áchí.

Te ndaa de mēhñu vícō quingoo de andiví, cuni ñayuu cájito uhū i de. ¹³ Te máá hora un jnáa ndasí, te ndicó cáva naa ñin jeē uxí parte ñuu ún. Te jíin ñujnáa ún cuu uxā mil ñayuu. Te tāca gá ñayuu jeē ndóo, yūhú ndasí i, te cahān i jeē cujéhnu Yaā Dios jeē ndeé andiví.

¹⁴ Súcuán yáha jnūndóho uū, te yachí coo jnūndóho unī.

Siquí trompeta uxā

¹⁵ Te ndajéhé uxā ni tiví yā trompeta. Te ni jini sōho ri ni cacahān jee ichi ándiví. Te súcuan ni cacahān:

Tācá nación ñayiví je ni nuquihí ndaha máá Jítóho yō Yaā Dios
jín Cristo jeē ní tají yá.

Te ndacu ya jniñu ní cáni cuíti.

Achí.

¹⁶ Yūcuán na te ndihóco cuñ tēe jéhu cándiso jniñu jeē cánene de mesa de ichi núu
Yaā Dios, ni cajecuiñi yití de, ni cachiñúhún de ya. ¹⁷ Te ni cacahān de:

Na cútahū na núu ní, Tātā Yaā Dios,

chi máá ní jniñi ndihí poder,

te cúu ní Yaā iyó vijna, te ni iyo ní ní cáni, te coo ní ní cáni.

Te ni najniñi ní ndivii jeē iyó,

te jín poder ni ní quejéé ní ndácu ní jniñu nuū.

¹⁸ Ñayuu tācá nación ni caquití ni i siquí ní.

Te vijna chi ni quee quiví jeē cuáha ní castigo i,

jín jéé sándaā ní jniñu tāca ndíyi.

Te cuáha ni táhū nuū tāca mozo ni jéé ní canacani jnūhun ní,

jín núu tāca ñayuu cájejniñu nuū ní, jín ñayuu cáchiñúhún núu ní,

cúu ñayuu cácujeñu jín jéé tuú.

Te vijna te snáhnú ndetū ni ñayuu castívi ñayiví.

Achí de jíjnahan de.

¹⁹ Yūcuán na te ni nune templo Yaā Dios jeē iyó andiví. Te ni cajito ñayuu jeē yúcuan
íne yejnū jeē ñúhun contrato yā. Te ni ndindéé taja, te níhin, te cáhán taja, te ni jnāa, te
ni cuun xeēn ñiñí.

Jnūhun ñahan jín cóo cáhnu

12

¹ Yūcuán na te ini andiví ní cane ñn jeē nahán náa ni yō jító yó: ñn ñahan jeē ñúhun
ña niāndii najnūhun sahna, te ín jehē ña siquí yoó, te ñúhun ñn corona xiní ña jeē ndeé
uxí uū quimi. ² Te ñúhun sēhe ña. Te ni ndahyū cohó ña jeē ndóho ña jénde chíji ña
jeē scácu ña i. ³ Yūcuán na te ini andiví ní cane tucu inga jeē náa ni yō jító yó: ñn coō
cuhé cáhnu ndasí. Te iyó úxā xiní tī jín úxí ndiquí tī. Te ndihúxá xiní tī ñúhun corona.

⁴ Te jín súhmā tī ni stáa tī ñn jeē uní parte quimi jeē iyó andiví, te ni síngoo tī ini ñayiví.
Te ni ine tī nuū ñahan jeē scácu sēhe ún, ndétu tī cocó tī sēhe ña jeē jé yajni cacu i. ⁵ Te
ni scácu ña ñn sēhe yí, te sūchi un ní jeconaa jeē ndácu níhin i jniñu nuū ndivii nación.

Yūcuán na te ni ndoñúhún sēhe yí ña ún, ni ndaa i cuahān i nde nuū ín mesa Yaā Dios
nuū ndácu ya jniñu. ⁶ Te ñahan un ní jinu ña cuahān ña nde nuū ñúhun téhé núu iyó ñn
lugar jeē ni sātúhva Yaā Dios. Te yūcuán condee ña nihín ña jeē cáji ña mil uū ciento uní
xico quiví.

⁷ Yūcuán na te ni cajejnáhan ini andiví. Chi ndajéhé jéhu ga jeē naní Miguel jín táca
ndajéhé jeē cácuu mozo nuū yā, ni cajejnáhan jín cóo cáhnu. Te coō un jín táca ndajéhé
maá, ni cajejnáhan jín yá. ⁸ Te tu ní cácuñdeyí tī, te tuá ní cúu coyūcu tī andiví. ⁹ Súcuan
ni cuu jeē ní quenehen ya coō cáhnu un jéé iyó ndé jenahán ndasí. Te nání tī jexeén jín
Satanás, te máá tī cúu jeē stahú ndihí ñayuu ñayiví. Te ni scáne ya tī nde ini ñayiví jín
táca ndajéhé tī.

¹⁰ Yūcuán na te ni jini sōho ri ñn jnūhun jeē cahán jee ichi ándiví:
Je ni quee quiví jeē jínu jnama ya yohó, jín jéé steén ndijin yā jeē jniñi ya poder, jín
jéé ndácu ya jniñu, jín jéé ndíso jniñu máá Cristo jeē ní tají yá. Chi je ni quenehen ya
maá jéé cahán cuēchi siquí tācá hermano yō. Chi nduú ñuú ni cahán cuēchi siquí i nuū
Yaā Dios maá yó. ¹¹ Te ni cacundeñi i siquí Satanás un, ní sáha jnūhun jeē ni jíhí Yaā cúu
Londe, jín jéé ní cacahān ndaa i jnūhun Yaā Dios, jín jéé tu ní cundáhu ni i máá i, chi ni
jēhe i jnūhun candíje i vēsú núu cuu i jeē siquí yā. ¹² Núu súcuan te na cúsiñ ndasí ni tāca
róhó jéé cáyucú andiví. Te nacā xeēn ndoho tāca róhó jéé cáyucú ini ñayiví jín núu mar.

Chi ni cuun jexeén ni jinū nuū rō jijnáhan ró. Te quití xeén ni, chi jíní jeē tuá coo cuehē gā tiempo jeē stahú ñayuu. Achí.

¹³ Te ni jini coō cáhnu ún jéē ni scáne ya maá cuahān ini ñayīví, te ni jinu ti jíin ñahan ní scácu sēhe yíí, jeē xeén sáha ti jíin ña núú. ¹⁴ Te ni cajēhe uū ndijēn yaha chócó cáhnu nuū ñahan ún, návāha ndava ña quihīn ña lugar ña nuū ñúhun téhé, te cācu ña nuū coō ún. Te yūcuán condee ña unī cuiyā yosáva, te nihīn ña jeē cáji ña. ¹⁵ Te yuhu cóo un ní cane ndute nájnūhun ñin yūte cáhnu, cuahān yatā ña návāha jneni ña. ¹⁶ Te máá ñuhun chi ni chindéé ñáhán ñahan ún, chi ni nune-ni, te ni nungoo yūte jeē ní cane yuhu cóo ún. ¹⁷ Yūcuán na te xeén ni quití ni coō cáhnu ni jito ti ña. Te cuahān tī cuajnáhan ti jíin táca gá sēhe ña, suu ñayuu casquícu jniñu ndácu Yaā Dios te cácanđíje vāha i jnūhun Jesucristo.

Jnūhun siquī uū quití xéén

13

¹ Te ni indichi rī yumár. Te ni jito ri jeē ní cane ñin quití xéén ini mar. Te íyó úxā xinī tī jíin úxī ndiquí ti. Te ndihúxí ndiquí ti ñúhun corona. Te ndihúxá xinī tī ndeé ñin síhví néé jéē quití ni Yaā Dios sáha. ² Te quití xéén jeē ní jito ri ún, cáa ti nájnūhun cuiñī, te ndaha ti cáa nájnūhun ndaha oso, te yuhu ti cáa nájnūhun yuhu ndícaha. Te nuū quití un ní jēhe coō cáhnu poder maá jíin mesa nuū ndácu máá jniñu. Te ni sáha jeē kujéhnu ndasí quití ún. ³ Te ni jito ri jeē ni tújī ñin xinī tī, jeē jé yajni cuu tī nuú. Te ni nduvāha ti jeē ni tújī tī. Te nahán ní naa ni ñayuu ñí cáhnu ñayīví ní jito i, te ni cajetáhú i nuū tī. ⁴ Te ni cachiñúhún i coō cáhnu siquī jeē ni sáha ti jeē kujéhnu ndasí quití xéén un, te suni ni cachiñúhún i quití xéén un. Te ni cacahān i:

Tú ni ñin jeē kujéhnu nájnūhun quití yáha, te tú ni ñin cundeyí cuajnáhan jíin tī, áchí i jijnáhan i.

⁵ Te tu ní jési ya jeē cahān tī jeē quití téyí cúu ti, jíin jéē cahán ndevāha ti siquī yā. Te ni nihīn jniñu ti jeē ndácu ti jniñu uū xico uū yoō. ⁶ Te ni quejéé tī ni cahān ndevāha ti siquī Yaā Dios, jíin síquī síhví yá, jíin síquī nuū ndeé yá, jíin síquī tāca jéē iyó andiví. ⁷ Te tu ní jési ya jeē cuajnáhan ti jíin ñayuu maá Yaā Dios, te cundeyí tī jíin i. Te suni ni nihīn jniñu ti jeē ndácu ti jniñu nuū ñayuu tāca yúcūn, tācá ñuu, tācá yuhu, tācá nación. ⁸ Te ñayuu ñí cáhnu ñayīví jéē tu yósó síhví i nuū tútu, ni cachiñúhún i quití xéén un. Te Yaā cúu Londe jeē ní cajehni i, máá yá névāha tutu un jéē yosó síhví ñayuu cotecu ñí cáni, te je yósó síhví i nde quiví ni jécōo ñayīví.

⁹ Ñayuu iyó sóho na chúsóhó vāha i jnūhun cahān rī yāhá. ¹⁰ Tāca ñayuu jeē sáha jeē quívi jnáhan vecāa, suni vecāa cone máá i. Te tāca ñayuu jeē jéhni jnáhan jíin espada, suni jíin espada cuu maá i. Núu súcuan te ñayuu maá Yaā Dios chi jíní ñúhún cuandeyí ni i jíin jnúndóho te ma jécuiñī i candíje i jnūhun cúndáhú ni yā i.

¹¹ Yūcuán na te ni jito ri inga quití xéén jeē ní cane chiji ñuhun. Te íyó uū ndiquí ti jeē cáa nájnūhun ndiquí lánchi. Te nájnūhun tachī coō cáhnu, súcuan tachī cahán tī. ¹² Te nájnūhun ndácu quití xéén xīhna ñúhún jniñu, suni súcuan ndácu quití uū ún jniñu, ñin ti nuū quití xīhna ñúhún. Te quití uū sáha ti jeē chiñúhún táca ñayuu ñí cáhnu ñayīví nuū quití xīhna ñúhún, quití ní tújī jeē jé yajni cuu tī te ni nduvāha ti. ¹³ Te quití uū suni sáha tācá jniñu jéhnu jeē nahán náa ni yō jíto yó. Chi ni scúun ti ñuhūn ichi ándiví ní quiji ini ñayīví, ní cajito ñayuu. ¹⁴ Te ni stahú tī ñayuu ñayīví jíin táca jniñu jéhnu jeē ni níhīn tī poder jeē sáha ti, jíto jíinúú quití xīhna ñúhún. Te ni ndacu ti jniñu jeē na sáha ñayuu imagen quití xīhna ñúhún, quití ní tújī jíin espada, jeē jé yajni cuu tī te ni nduvāha ti. ¹⁵ Te quití uū ni nihīn tī poder jeē chutáchí tī xijni imagen quití xīhna ñúhún, návāha cuu cahān, te cahni tāca ñayuu jeē tu cájetáhú i chiñúhún i máá. ¹⁶ Te tāca ñayuu kujéhnu jíin ñayuu tu kujéhnu, tāca ñayuu cucá jíin ñayuu ndahú, tāca ñayuu sájniñu cuenta maá jíin mozo jeē ní cajeen ñayuu, ni sáha ti jeē ni jécondee ñin jnunī ndavāha i chí jnéē i. ¹⁷ Te ni ñin ñayuu ma cúu cuaan i xícó i te núu tu ndíso i jnunī jeē cúu síhví tī chí jnúni número jeē cúu síhví tī. ¹⁸ Jnūhun ndíchí cúu jeē cahán rī yāhá: Tāca ñayuu jécūhun vāha ni cuu

tava i cuenta número quití xéén un, chi número un cúu síhví ìn tēe. Te número un cúu ìñū ciento unī xico ìñū.

Yaa jeē cájita 144,000 ñayuu

14

¹ Yūcuán na te ni ndacoto ri, te ni jito ri jeē ìn máá Yaā cúu Londe xinī yucu Sión. Te cáhiin ciento uū xico cuūn mil ñayuu jíin yá. Te jneē i ndéé síhví máá yá jíin síhví Tátá yā Yaā Dios. ² Te ni jini sōho ri jeē ñhìn ndasí ichi ándiví, nájñuhun jeē jíca cuehē yūte chí jeē cahán ñhìn taja. Te jeē ñhìn un sáha nájñuhun jeē cátee cuehē ñayuu yaa jeē naní arpa. ³ Te cáhiin i ichi núu mesa nuū ndácu Yaā Dios jniñu, jíin núu ndicúún jeē técu, jíin núu ndihócó cuūn tēe jéhnū cándiso jniñu. Te ni cajita i ìn yaa jeé. Te ni ìn ñayuu tu cúu cutūhva i yaa ún, chi máni máá ciento uū xico cuūn mil ñayuu jeē ní jnama ya i ini ñayiví. ⁴ Te tāca tēe yáha cácuu jeē tu ní casáha cuēchi jíin ñahan casáha néé, chi tēe ndoo ánuá cácuu de. Te cándiquin de Londe ndé-ni cúu-ni nuū cuahán yā. Chi ni jnama ya de ini ñayiví, te máá de cácuu tēe jeē xíhna gā ni cacandíje nuū Yaā Dios jíin núu Yaā cúu Londe. ⁵ Te tú cuiti na jñuhun stáhú cácahān de, chi tēe ndoo ánuá cácuu de, cáhiin de nuū mesa Yaā Dios.

Jñuhun jeē ní cacahān ndinúní ndajéhé yā

⁶ Yūcuán na te ni jito ri ìnga ndajéhé yā jeē ndáva cuahān sava andiví. Te ndíso ya jñuhun jeē jnama Yaā Dios ñayuu cotecu i ñí cáni. Te ni nacani ya jñuhun un núu tāca ñayuu ñí cáhnu ñayiví, nuū ñayuu tācá nación, tāca yúcūn, tācá yuhu, tācá ñuu. ⁷ Te ni cahān jee ya:

Conso ìyo ró núu Yaā Dios, te na cáhán rō jeē yóhyo cújéhnū ya, chi je ni quee quiví jeē sándaā yā siquī rō ndese ni casáha ró. Te na chíñúhún ró yā, chi máá yá ni sáha andiví jíin ñayiví jíin mar jíin tāca núu cáne ndute, áchí ndajéhé yā.

⁸ Yūcuán na te ndíquin ìnga ndajéhé yā vēji, te ni cahān yā:

Je ni naa ì ñuu teyí Babilonia. Chi ni sáha jeē ñayuu tācá nación casíquí ndéē i Yaā Dios jeē ní castóo i ya te cándiquin i ídolo jíin tāca jniñu néé, áchí ndajéhé uū.

⁹ Yūcuán na te ndíquin ìnga ndajéhé unī vēji, te ni cahān jee ya:

Xeēn coo siquī ñayuu cáchiñúhún quití xéén jíin imagen tī, te jéhe i jñuhun condee jnunī tī jneē i chí ndaha i. ¹⁰ Chi nihīn i castigo xeēn siquī cuéchi ni casáha i, chi quití ni Yaā Dios nuū i, te tuá cone cáhnu ni yā. Te ndoho i nuū cayú ñuhūn jíin azufre, coto tācá ndajéhé Yaā Dios jíin Yaā cúu Londe. ¹¹ Te ñuhmā nuū cándoho i cánda ñí cáni cuiti. Te nduú ñuu tu ndétátú ñayuu cándoho ún jeē ní cachíñúhún quití xéén jíin imagen tī, jíin jéē ni jécondee jnunī síhví tī. ¹² Jeē yúcuan ñayuu maá Yaā Dios jeē casquícu i jniñu ndácu ya te cacandíje vāha i Jesús, cánuú jéē cuándeýí ni i. Achí ndajéhé unī.

¹³ Yūcuán na te ni jini sōho ri ìn jñuhun ichi ándiví jéē ni cáhán jíin rí:

Tee ró jñuhun jeē cahán rī jíin ró yāhá: Nacā jeē ndetū tāca ñayuu cacandíje Jitoho yō jeē cájihī vijna jíin ndé ñí cuahān yō. Jendaá chi ndetátú i jeē ní casáha i jniñu vāha, te jniñu i un má nāā chi sáha jeē quendō vāha i ñí cáni, áchí Espiritu.

Jeē ní nastútú yá ñayuu ñayiví

¹⁴ Yūcuán na te ni ndacoto ri, te ni jito ri ìn vicō cuijín. Te nuū vicó un néne Yaā ní nduu tēe. Te xinī yā ñuhun corona oro, te ndáhá yá ìn hoz xeēn. ¹⁵ Te ni quenda ìnga ndajéhé yā ini templo, te ni cana jee, te cáhán jíin Yaā néne nuū vicó un:

Cahnde ni jíin hoz ní, te nastútú ní ñayuu ñayiví. Chi je ni quee quiví jeē nastútú ní i nájñuhun táhndé trigo jeē jé ni cuaan, áchí.

¹⁶ Yūcuán na te Yaā néne nuū vicó ni nastútú yá ñayuu vāha ini ñayiví, nájñuhun táhndé trigo jíin hoz.

¹⁷ Yūcuán na te ni quenda ìnga ndajéhé yā ini templo jeē iyó andiví, te suni ndáhá yá ìn hoz xeēn. ¹⁸ Te nde nuū altar ni quenda tucu ìnga ndajéhé, te ndíso jniñu ya siquī ñuhūn altar. Te ni cana jee ya, te cáhán yā jíin ndajéhé jeē ndahá hoz xeēn:

Cahnde rō jíin hoz xeēn rō, te nastútú ró ñayuu casáha néé ini ñayíví, nájnūhun jeē cájehnde i chutū ndehē uva jeē jé ni jichi, áchí.

¹⁹ Te ndajéhé un ní jehnde yā jíin hoz yā, te ni nastútú yá ñayuu casáha néé ini ñayíví, nájnūhun ndútútú ndéhē uva. Te ni jnaa ya i nuū nihín i castigo xeēn Yaā Dios, nájnūhun jnáa i ndehē uva nuū taxín. ²⁰ Te ni jēhe ya castigo i yatā ñúū, te ni jica niñí i nájnūhun ndūxi uva. Te ni ndaa ni jinū cūhva jeē sucún yuhu caballo, te ni jica cuahān nde unī ciento kilómetro.

Ndihúxá ndajéhé jíin ndihúxá jnūndóho jeē sándihí

15

¹ Te ni jito ri inga jniñu jéhnū ichi ándiví jéé náā ni yō jíto yó. Chi cáhīin uxā ndajéhé yā jeē cuāha ndihúxá jnūndóho sandihí na. Te jeē jínu ndihúxá jnūndóho yáha, te jínu jeē cuáha Yaā Dios castigo xeēn síquī cuéchi.

² Te suni ni jito ri ñin jeē cáa nájnūhun mar, te cáa nájnūhun vidrio jeē ndíndēe nájnūhun ñuhūn. Te yumar un cáhīin ñayuu ni cacundeyí síquī quití xéén jíin imagen tí, jíin jéé tu ní cáquihin i jnūnī número jeē cúu síhví tí. Te cándāhá i yaa jeē naní arpa jeē ni jéhe Yaā Dios nuū i. ³ Te cájita i yaa jeē ní tava Moisés, tēe cúu mozo Yaā Dios, jíin yaa maá Yaā cúu Londe. Te súcuan cáhān yaa ún:

Yōhyo náā ni na cájito ná ndihí jniñu jéhnū teyí jéé sáha ní,
Tátā Yaā Dios, chi jnī ní ndihí poder.
Te máni jniñu ndaā jniñu váha sáha ní,
jeē cúu ní Rey nuū tācá nación.

⁴ Tú ni ñin i iyó jéé ma cónso iyo i nuū ní, Tátā Yaā Dios.

Te ndihí i cahān nahín i jeē yóhyo cújéhnū ní.
Chi máñuhún ni máá ní cúu Yaā ndoo Yaā i.
Te quijicoo ñayuu tācá nación, chiñuhún i níhín,
chi je ni cajini i jeē ndaā vāha sáha ní táca jniñu.
Achí i cájita i.

⁵ Yūcuán na te ni ndacoto ri, te ni jito ri jeē ini ándiví núne cuarto iñi ini templo nuū íne tabla yuū jeē yosó ley yā. ⁶ Te ini templo un ní quendacoo ndihúxá ndajéhé jeē cándiso jniñu síquī ndihúxá jnūndóho. Te cáñuhun ya sahama fino iyó ndoo te xíñú. Te núhni cinturón oro jicā yā. ⁷ Te ñin jnáhan ndicúun jeē técu ni jéhe ñin ñin cohō oro nuū ndihúxá ndajéhé un. Te ini cohō un ñuhūn chitú castigo xeēn jeē ni jéhe Yaā Dios, Yaā técu ní cáni. ⁸ Te ni chitú ndí ñuhmā ini templo, te suu ni steén jeē yóhyo cújéhnū Yaā Dios jíin poder jnī ya. Te ni ñin tu ní cúu quívi ini templo, chi nde na ndíhi ndihúxá jnūndóho jeē cuáha ndihúxá ndajéhé yā.

Síquī ndihúxá cohō jeē ñuhūn castigo

16

¹ Yūcuán na te ini templo ni jini sōho ri ñin jnūhun cáhān jee jíin ndihúxá ndajéhé yā: Cuangoo te catí ró síquī ñayíví ndihúxá cohō jeē ñuhūn castigo xeēn jeē ni jéhe Yaā Dios, achí.

² Te cuahān ndajéhé ñin, te ni jeti ya cohō yā síquī ñayíví. Te tāca ñayuu jeē ndeé jnūnī quití xéén un jíin jéé cáchiñuhún imagen tí, ni canecoo ndíhyi xeēn jeē jetú ndasí.

³ Te ndajéhé uū ni jeti ya cohō yā nuū mar, te ndute mar ni nduu nájnūhun niñí ndíyi. Te ni cajihí tācá quití jeē ñuhūn ini mar.

⁴ Te ndajéhé unī ni jeti ya cohō yā ini tāca yúte jíin táca núū cáne ndute, te ni nduu niñí. ⁵ Te ni jini ri jeē cahān ndajéhé jeē ndíso jniñu síquī ndúte:

Tátā Yaā Dios, maá ní cúu Yaā ndoo Yaā i, Yaā iyó vijna, te ni iyo ní ní cáni. Te ndaā sáha ní jeē súcuan ni ndonda ní síquī cuéchi i. ⁶ Chi ni casáha i jeē ní jeti niñí ñayuu ndoo ní jíin ñayuu ní canacani jnūhun ní. Te vijna chi ni sáha ní jéé cájihí i niñí, chi ñayuu casáha jniñu néé cácuu i, jeē cánuú ndoho i súcuan.

⁷ Te ni jini sōho ri jeē cahán inga nde nuū altar:

Tátā Yaā Dios, máá ní cúu jeē jn̄í nd̄ihi poder. Te jniñu váha jniñu ndaā ni sáha ní jeē ní ndonda ní síquī cuéchi i. Achí.

⁸ Te ndajéhé cuūn ni jeti ya cohō yā síquī n̄ándii, te ni jēhe Yaā Dios jnūhun jeē ndujl̄h̄ní ndasí n̄ándii návāha cayū ñayuu. ⁹ Te xeēn ndasí ní cayū tāca ñáyuu. Te vēsú súcuan te tu ní cánacani ni i stóo i cuēchi i, ni tu ní cacahān i jeē cujéhnu Yaā Dios. Chi sa suhva ni cacahān ndevāha i síquī yā jeē ni jēhe ya tācá castigo yáha nuū i.

¹⁰ Te ndajéhé uhūn ni jeti ya cohō yā nuū mesa nuū ndácu quit̄i xéén jniñu. Te ni cunee n̄í cáhnu nuū ndácu t̄i jniñu. Te cánacaȳh̄i ñáyuu yuhu i jeē cájetū ndasí i. ¹¹ Te vēsú súcuan te tu ní cánacani ni i stóo i jniñu néé cásáha i. Chi sa ni cacahān ndevāha i síquī Yaā Dios andiv̄í síquī jeē cájetū ndasí i j̄ín nd̄l̄hyi xeēn cándoho i.

¹² Te ndajéhé iñū ni jeti ya cohō yā síquī yúte cáhnu jeē naní Eufrates. Te ni ichi nd̄ihi ndute yūte ún, návāha nune ñin ichi jeē quijicoo tāca rey ichi núū cáne niāndii.

¹³ Te ni jito ri jeē ini yuhu coō cáhnu j̄ín ini yuhu quit̄i xéén j̄ín ini yuhu máá tée nácani jnūhun stáhú ní canecoo un̄i tach̄i jeē cáa nájñūhun sáhvá. ¹⁴ Te tach̄i ún chi ndajéhé jexeén cácuu, te cásáha jniñu jéhnu jeē náa ni ñayuu cájito i. Te ni quendacoo tach̄i un̄i jēē nastútú tāca rey n̄í cáhnu ñaȳiv̄i, jēē cuajnáhan de síquī Yaā Dios quiv̄i jeē nd̄iji ya. Te máá yá cúu jeē jn̄í nd̄ihi poder. ¹⁵ Cuni sōho j̄ijnáhan ró, chi sanaa ni rō te nd̄iji ri, nájñūhun jeē ñin sanaa-ni te quij̄i ñacuñhá. Te nacā jeē ndetū ñayuu jeē ndito ni i, te nd̄ito yúcún i sahma i, návāha ma cáca vichí lí i, cúu jeē tú na cuéchi coo síquī i jeē cucanu i nuū tāca ñáyuu, achí yá. ¹⁶ Te ni canastútú tách̄i un̄i tāca rey, ni candutútú ñin lugar jeē yuhu hebreo naní Armagedón.

¹⁷ Te ndajéhé uxā ni jeti ya cohō yā nuū tach̄i. Te ini templo andiv̄í j̄ín núū mesa nuū ndácu ya jniñu, ni cane ñin jnūhun jeē ni cáhān jee:

Je ni j̄inu, áchí.

¹⁸ Yūcuán na te ni ndindēé taja, te n̄h̄in, te cáhān taja, te ni jnāa ndasí. Chi nde n̄í cáni jeē iyó ñáyuu ñaȳiv̄i, tu ní jnāa n̄ihin ndasí nájñūhun jeē ni jnāa ni jito ri. ¹⁹ Te máá ñuu cujéhnu Jerusalén, ni cus̄in ni nduu un̄i parte, te n̄í cáhnu ñaȳiv̄i ni naa tāca ñuu. Te ñuu teȳí Babilonia, chi ni sáha nahín yá jeē ní ndutahū i castigo xeēn, chi ni quit̄i ndasí ni yā síquī cuéchi i. ²⁰ Te ni naa tāca isla, te suni yucu tuá gā. ²¹ Te ichi ándiv̄í ní cuun ñ̄ñ̄í náhnu síquī ñayuu, jeē véȳi nde uū xico kilo. Te ni cacahān ndevāha ñayuu síquī Yaā Dios jeē ní cuun ndasí ñ̄ñ̄í, chi ñin jnūndóho xeēn ni cuu.

Jeē ndonda ya síquī ñuu neé Babilonia

17

¹ Yūcuán na te ni quiji ñin jnāhan nd̄ihúxá ndajéhé jeē ní candāhá nd̄ihúxá cohō ún, te ni cahān yā j̄ín rí:

Nehen, te na stéén r̄i nuū rō ndese coo castigo síquī maá ñahan jnéní jeē cúu ñuu cujéhnu íne nuū iyó cuéhē ndute. ² Chi tāca rey ñaȳiv̄i nájñūhun ni casíquí ndéé de j̄ín ñahan ún, cúu jeē ní castóo de Yaā Dios te cándiqūin de jnūhun néé ní steén ña. Te ni sáha ña jeē ñáyuu n̄í cáhnu ñaȳiv̄i, nájñūhun náj̄ini i te casíquí ndéé i Yaā Dios cúu jeē ní castóo i ya te cásáha ndasí i cuéchi. Achí ndajéhé yā.

³ Te ni sáha ga Esp̄ritu Santo jeē ní jito nd̄ijin r̄i, te ndajéhé yā un cuáhān yā j̄ín rí nde nuū ñūhun téhé. Te ni jito ri ñin ñahan, yósó ña ñin quit̄i xéén cacuéhé. Te n̄í cáhnu t̄i ndéé jnūhun néé jéē quit̄i ni Yaā Dios sáha. Te íyó úxā xin̄i t̄i j̄ín úx̄i nd̄iqui t̄i. ⁴ Te ñahan un ñūhun ña sahma nd̄ih̄í j̄ín sahma cuehé, te suni ñūhun ña síquī oro j̄ín yūū luu j̄ín perla jeē ndeé yahu. Te ndáhá ña ñin cohō oro jeē ñūhun chitú j̄ín jniñu néé ndasí j̄ín jniñu jnehén jéē j̄ica jnéní ña. ⁵ Te jneē ña ndéé ñin s̄h̄v̄i jéē cúu ñin jnūhun s̄h̄í, te suhva cáhān: Yāha cúu ñuu teȳí Babilonia, jeē cúu nájñūhun náná tāca jéē cájica jnéní j̄ín jéē casáha néé ndasí ini ñaȳiv̄i, áchí. ⁶ Yūcuán na te ni jini r̄i jeē ñahan un náj̄ini ña jeē nájñūhun ni j̄ihi ña ñ̄ñ̄í ñayuu maá Yaā Dios j̄ín n̄ñ̄í ñayuu ni cajih̄i síquī jeē ní

canacani ndaā i jnūhun Jesús. Te nahán ní naa ni rī ni jito ri ña. ⁷ Yūcuán na te ni cahān ndajéhé un jíin rí:

¿Naun nāā ni rō jito ró? Na cástūhun rí nuū rō ndese cúní cahān jnūhun sāhi síquī ñahan un jíin quití xéén yosó ña, jeē iyó úxā xinī tī jíin úxī ndiquí tī. ⁸ Quití xéén jeē ní jito ró, chí ni cotecu tī, te vijna chi tuá tī. Te ndenda tucu tī ini tūhñchi cúnú, te yūcuán na te quihñ tī nuū jnahnú ndetū tī. Te ñayuu cáyūcu ñí cáhnu ñayīví, naa ni i coto i nuū quítí un jéē ní cotecu tī te ni jihī tī, te natecu tucu tī. Te cácuu i ñayuu jeē tu yósó síhví i nuū tútu jeē yosó síhví ñáyuu cotecu ñí cáni jeē ni jécósó síhví i nde quivī ni jécō ñayīví.

⁹ Tāca ñáyuu jécūhun vāha ni, cuu tava i cuenta ndese cúu: Ndihúxá xinī tī cácuu nájñūhun uxā yucu nuū néne ñahan ún. ¹⁰ Te ndihúxá xinī tī suni cácuu nájñūhun uxā rey. Te uhñ rey un je ni naa jeē ndácu de jniñu, te ñin de ndácu jniñu vijna, te inga de chí ná tu quiji de. Te núu na quíji de te jecu-ni tiempo coo de. ¹¹ Te quití xéén jeē ní cotecu te tuá iyó tī vijna, máá tī cuu rey unā. Te ñin jnáhan ndihúxá rey un cúu tī. Te suni quihñ tī nuū jnahnú ndetū tī.

¹² Te ndihúxí ndiquí jeē ní jito ró cúu nájñūhun uxī rey, te ná tu ndacu de jniñu jíjnáhan de. Te máá de jíin quití xéén un, chí nihñ jniñu de cuu de rey jecu-ni tiempo. ¹³ Te ndihúxí rey un chí squíjnáhan de jñūhun, te nacūaha de poder de jíin jniñu ndíso de nuū quití xéén un návāha ndacu tī jniñu. ¹⁴ Te cuajnáhan de jíin Yaā cúu Londe. Te Yaā cúu Londe quende yā poder de jíjnáhan de. Chí máá yá cúu Jitoho nuū tāca jítoho, te máá yá cúu Rey nuū tāca rey. Te ñayuu cáhiin jíin yá, chí ni nacāji Yaā Dios i te ni cana ya i, te cásquícu vāha i. Achí ndajéhé un.

¹⁵ Te ni cahān gā yā:

Cuehē ndute jeē ní jito ró núu néne ñahan jíca jnéni, suu cúu ñayuu cuehē tācá ñuu, tācá yuhu, tācá nación. ¹⁶ Te ndihúxí ndiquí jeē ní jito ró jéē névāha quití xéén un, suu cácuu rey jeē coto uhū de ñahan jíca jnéni un. Te sáha de jeē quendōo ndáhú ña te quendōo vichí lí ña. Te caji de cūñu ña te cahmu de ña nuū ñuhún. ¹⁷ Chí Yaā Dios scánda ya ini de jeē na sáha de jniñu cúní yā. Te squíjnáhan de jñūhun jeē nacūaha de jniñu ndíso de nuū quítí xéén un, ndacu tī jniñu nde na squícu tāca jnúhun ni cahān Yaā Dios. ¹⁸ Te ñahan jeē ní jito ró cúu máá ñuu teyí jéē cujéñnu nuū tāca rey ñayīví. Achí ndajéhé un.

Siquí jeē naa ñuu Babilonia

18

¹ Yūcuán na te ni jito ri jeē ní cuun inga ndajéhé yā ni quiji ichi ándiví. Te cújéñnu ndasí yá. Te jeē ndíndēe yá te ni ndíndēe núu ñayīví. ² Te ni cana jee ya:

Je ni naa íi ñuu teyí Babilonia. Te ni nduu vehe tāca táchi, nuū ñuhun ndinuū tachí neé, jíin táca téji, quití quíni jeē tu nújnahan ni yō. ³ Chí ñuu un cúu nájñūhun ñin ñahan ndevāha, te ni sáha ña jeē ñáyuu tācá nación, nájñūhun nájini i te cásiquí ndéē i Yaā Dios, cúu jeē ní castóo i ya te cásaña ndasí i cuēchi. Te tāca rey ñayīví, nájñūhun ni casíquí ndéē de jíin ñahan ún jeē ní cajetáhú de jñūhun néé ní steén ña. Te ñayuu ñí ñayīví jéē cájeen cáxicó, ní cacucúca i jíin cuéhē jeneé jeē ní nevāha ña.

⁴ Yūcuán na te ni jini sōho ri inga jñūhun jeē ni cáhān ichi ándiví:

Máá ró jeē cácuu ró ñáyuu maá rí, quendacoo ró ini ñuu jñā, návāha ma quíví nduu rō jíin táca cuēchi jeē sáha ña, te návāha ma ndóho ró jnúndóho xeñ jeē ndoho ña. ⁵ Chí ni cayā cuehē ndasí cuēchi ña, nájñūhun ñin montón cáhnu ndasí jéē ní cusúcún ndé ándiví. Te vijna te nduxeñ Yaā Dios siquí cuēchi ña. ⁶ Stóho ró ña nájñūhun ni sáha ña jeē ní ndoho sava ga ñayuu. Te nachunaa rō nuū ña doble jnúndóho jeē ni jéhe ña nuū inga ñayuu. Te sáha ró jeē nandicó cóo doble siquí ña vésú jeē ni sáha ña siquí inga ñayuu. ⁷ Te yōhyo ni satéyí ña máá ña, te cúca ndasí ní cotecu ña. Te suni jíin cúhva yúcuan nacūaha ró jéē ndóho xeñ ndasí ña. Chí jéni ni ña: Yāha néne ri ndácu ri jniñu, te tu cúu ri ñahan viuda, te ma quíji cuítí jnúndóho ndoho ri, achí ña. ⁸ Jeē yúcuan cúu jeē

ɪn quiv̄i-ni te quiji cuehē jnūndóho siqūi ña. Chi cuu nd̄iyi, te cucuíhyá ndasí ni ña, te coo jnamā, te cayū ña nuū ñuhún. Chi yōhyo íyó poder maá Jítóho yō Yaā Dios, Yaā ní ndonda siqūi cuéchi ña, áchí.

⁹ Te tāca rey ñayiv̄i jéē ní casíquí ndéē de jíin ña te ni cotecu cucá ndasí de jíin ña, ndahyū de te ndahyū cohó de coto de jeē cánda ñuhmā cayú ña. ¹⁰ Te cuiñi jícá de chi yūhú de coto de jeē súcuan ndoho ña castigo. Te cahān de jíjnáhan de:

Nacā jeē xeēn ndóho ró, ñuu cujéhnū Babilonia, chi yá-ni ñuu teyí ní cuu ró núú. Te vijna chi ɪn núnúu-ni te ni quee castigo jeē náā rō, achi de jíjnáhan de.

¹¹ Te tāca tée ñayiv̄i jéē cájeen cáxícó ñuu ún, ndahyū de te ndahyū cohó de jehē. Chi tuá ndé ɪn cuaan ndajniñū cáxícó de. ¹² Te ndajniñū cáxícó de un cúu oro, plata, yuū luu jíin perla jeē ndeé yahu, jíin sahma fino jíin sahma seda jeē ndihí jíin jéē cuehé. Te suni tācá yujnu jeē as̄n jéen xicō, jíin táca ndajniñū luu jeē ni sáha jíin marfil jíin yujnu lúu jeē ndeé yahu jíin cáa cuaán jíin cáa hierro jíin yúu cuijín luu. ¹³ Te suni cáxícó de canela jíin táca jíhyo as̄n jíin súje cutú jíin súje uvuā jíin táca perfume jíin vino jíin aceite jíin harina fina jíin trigo. Te suni cáxícó de quit̄i ndíso jíin lanchi jíin caballo jíin carreta, te nde ñayuu cáxícó de jeē sájniñū sáa-ni i. ¹⁴ Te cahān de jíin ñuu ún:

Ni cujiyo ndihí ndajniñū cúcá jeē ní nujnahān ndasí ni rō. Te tāca jéē lúu jeē váha jeē ní cotecu cucá ró, chi ni naa ndihí, te ma nánih̄in cuiñi gā rō, achi de jíjnáhan de.

¹⁵ Te tāca tée ni cajeen ni caxícó ní cacucúca jéē siqūi ndajniñū ñuu ún, chi cuiñi jícá de jeē yūhú de coto de castigo coo ñuu ún. Te ndahyū de te ndahyū cohó de. ¹⁶ Te cahān de jíjnáhan de:

Nacā jeē xeēn ndóho ñuu teyí yáha. Chi ni cuu nájnūhun ɪn ñahan jeē ni ñúhun sahma fino, sahma ndihí jíin jéē cuehé. Te ni ñuhun ña siqūi oro jíin yúu luu jíin perla jeē ndeé yahu. ¹⁷ Te vijna te ɪn núnúu-ni te ni naa ndihí tācá ndajniñū váha ún, achi de jíjnáhan de.

Te cuiñi jícá táca tée cáscaca barco, jíin ñayuu cuángoo nuū barco, jíin tée casájniñū ini barco, jíin táca gá tēe casájniñū nuū mar. ¹⁸ Chi coto de ñuhmā jeē cayú ñuu ún, te cana jee de jíjnáhan de:

¿Ndé íne ga ñuu teyí jéē cujéhnū nájnūhun ni íyo ñuu yáha? achi de.

¹⁹ Te cosō de ticachā ñuhun xiní de jeē cácuquíhyá ni de. Te ndahyū de te ndahyū cohó de. Te cana jee de jíjnáhan de:

Nacā jeē xeēn ndóho ñuu teyí yáha. Chi jíin ndajniñū cúcá jeē ní íyo ñuu un ní cacucúca táca ñayuu cánevāha barco cájica nuū mar. Te vijna te ɪn núnúu-ni te ni naa ndihí-ni, achi de.

²⁰ Te na cúsiñ ni tāca róhó jéē cáyucú andiví, siqūi jeē ní naa ñuu ún. Te na cúsiñ ni rohó, táca tée apóstol, jíin tée canacani jnūhun Yaā Dios, jíin ñayuu maá Yaā Dios. Chi ni sáha néé ñuu un síqūi rō jíjnáhan ró, te jeē yúcuan ní ndonda Yaā Dios siqūi, achi de.

²¹ Yūcuán na te ɪn ndajéhé ndíso poder, ni quihin ya ɪn yuū cáhnu nájnūhun ɪn yōso cáhnu, te ni scāne ya ini mar. Te ni cahān yā:

Nájñūhun ni naa yōso yáha, suni súcuan naa Babilonia, ñuu cujéhnū téyí. Te ma núcoo cuiñi gā jeē cóto yó núú. ²² Te ni cahān yā jíin ñuu ún: Ini calle rō ma cúni sōho cuiñi gā ñayuu jeē scáta i yaa arpa jíin flauta jíin trompeta. Te suni ma cóo cuiñi gā ñayuu casáha tācá ndajniñū. Te suni ma cúni sōho ga i jeē nh̄in tācá molino rō. ²³ Te ni ɪn lámpara ma sáha ga jeē cúndijin nuū rō. Te ni ma cúni sōho ga i vico jeē cácusñ ni ñahan tēe nándāha mēh̄nu ró. Te ñayuu ní cajeen ni caxícó nuū rō, ni cacujéhnū ndasí i ini ñayiv̄i. Te ni stahú ró ñayuu tācá nación jíin jniñū tasí jíin jniñū mágica. Achí ndajéhé un.

²⁴ Te ñuu un ní nih̄in castigo xeēn, chi siqūi ñuu un ndeé cuéchi jeē ní jeti niñi tāca tée ní canacani jnūhun Yaā Dios, jíin táca ñayuu maá yá, jíin táca gá ñayuu ní cajehni i ní cáhnu ñayiv̄i.

19

¹ Te ná ni cuu tāca jéē yáha, te ni jini sōho ri jeē cahān jee cuehē ndasí ñayuu ini andiví:

Yōh̄yo cújéhn̄u Yaā Dios. Chi Yaā Dios maá yó cúu jeē ní jnama yóh̄ó.
Te máá yá cújéhn̄u ndasí, te máá yá jn̄í nd̄ih̄i poder.

² Te ndaā te vāha sándaā yā tācá jniñu,
chi ni ndonda ya síquī cuéchi ñuu neé cújéhn̄u ún.
Chi ni st̄iv̄i un ñáyuu ñí cáhn̄u ñaȳiv̄i jíin̄ jnúhun cásiquí ndéē Yaā Dios.
Te ni sáha ya jeē ní ndutahū ñuu un síquī jeē ní jehni tāca mozo yā.
Achí i jíjnáhan i.

³ Te ni cacahān tucu i:

Yōh̄yo cújéhn̄u ya. Chi ñí cáni canda ñuhmā ñuu un jéē cayú, achí.

⁴ Te ndihóco cuñ̄n tēe jéhn̄u cándiso jniñu, jíin̄ ndicúún jeē técu, ni cajecuiñ̄i yití de,
te ni cachiñúhún de Yaā Dios, Yaā néne nuū mesa ndácu jniñu. Te ni cacahān:

Amén. Súcuan na cóo. Yōh̄yo cújéhn̄u ya.

⁵ Te nde nuū mesa nuū ndácu ya jniñu ni cahān ñin̄ jnúhun:

Róh̄o jéē cájéjniñu nuū Yaā Dios,
jíin̄ róh̄o jéē cándiso ñyo nuū yā,
jeē cácujehn̄u jíin̄ jéē tu cácujehn̄u,
na cáhán rō jeē yóh̄yo vāha Yaā cúu ya.
Achí.

Vico jeē nándāha Yaā cúu Londe

⁶ Te ni jini sōho ri jeē cácahān ñayuu cuehē ndasí, te ñh̄in̄ nájñuhun ñh̄in̄ cuehē yūte,
te nájñuhun jeē cahán ñh̄in̄ taja. Te ni cacahān:

Yōh̄yo cújéhn̄u ya. Chi Jitoho yō Yaā Dios, Yaā jn̄í nd̄ih̄i poder,
vijna te ndácu ñh̄in̄ ya jniñu.

⁷ Te na cúsiñ̄i ni yō, te siñ̄ ndasí na cóo ni yō,
te na cáhán yō jeē yóh̄yo cújéhn̄u ya.

Chi ni quee quiv̄i jeē nándāha máá Yaā cúu Londe.

Te je íyó túhva ñahan nandāha jíin̄ yá, te suu cúu ñayuu maá Yaā Dios.

⁸ Te ni nih̄in̄ ña jnúhun cuhun ña sah̄ma fino jeē ndóo ndasí te xíñú.

Achí i jíjnáhan i. Te sah̄ma fino un cúu tācá jniñu ndaā jeē casáha ñayuu maá Yaā Dios.

⁹ Te ni cahān ndajéhé yā jíin̄ rí:

Tee ró jnúhun yáha: Nacā jeē ndetū tāca ñáyuu jeē ní cana ya quingoo vico nándāha
Yaā cúu Londe.

Te ni cahān gā ndajéhé un jíin̄ rí:

Tāca jnúhun yáha cúu jnúhun ndaā ni cahān Yaā Dios, achí yá.

¹⁰ Te ni jecuiñ̄i yití rí nuū jehé ndajéhé un jéē chiñúhún rí yā nuú. Te ni cahān yā jíin̄
rí:

Ma sáha ró súcuan. Chi ruhū suni mozo Yaā Dios cúu ri, nájñuhun máá ró jíin̄ táca
hermano rō jeē cácañdije vāha jnúhun Jesús. Sa suhva nuū maá Yaā Dios chiñúhún ró.
Achí yá.

Chi jnúhun síquī Jesús cúu jeē cácahān ndaā ñayuu cánacani jnúhun Yaā Dios.

Yaā yosó síquī caballo cuijín

¹¹ Yūcuán na te ni jito ri jeē núne andiv̄i. Te ni cane ñin̄ caballo cuijín, te Yaā yosó síquī
t̄i naní yá Yaā ndaā, Yaā squícu, chi squícu ya jeē ní jéjn̄uhun ya. Te ndaā sándaā yā jniñu
te ndaā ndón̄da ya síquī tāca jéneé. ¹² Te tinūu yá ndíndēe nájñuhun yáñuhūn. Te xin̄i
yā ñúh̄un cuehē corona. Te yosó ñin̄ síhv̄i yá jeē maá-ni ya cúu jeē jin̄i. ¹³ Te ñúh̄un ya ñin̄
sah̄ma jeē ni ñúndaji nuū ñiñí, te naní yá Jnúhun Yaā Dios. ¹⁴ Te tācá ndajéhé yā jeē iyó
andiv̄i, cáyosō caballo cuijín, cándiquin̄ yatā yā. Te cáñuhun sah̄ma fino cuijín íyó ndoo.
¹⁵ Te ini yuhu máá Yaā jeē yosó síquī caballo, quenda jeē cáca nájñuhun ñin̄ espada xeñ.
Te espada un cúu jnúhun ya jeē stóho ya ñayuu tācá nación. Te ñh̄in̄ ndacu ya jniñu
nuū i. Te sándaā yā síquī cuéchi i nájñuhun jeē jeñú síquī ndehē uva cájexin̄. Te cuāha
ya castigo xeñ ndoho i jeē quití ni yā síquī cuéchi i. Chi máá yá jn̄í nd̄ih̄i poder. ¹⁶ Te

sahma ya jíin s̄h̄in ya yosó jnúhun yáha: Rey nuū tāca rey jíin Jítóho nuū tāca jítoho, áchí.

¹⁷ Yūcuán na te ni jito ri ñin ndajéhé yā jeē ñin nuū n̄ándii. Te ni cana jee ya xinī tācá quití ndáva nuū tachí:

Ndutútú ró quijicoo ró cuxíni ró ñin vico cáhnu sáha Yaā Dios. ¹⁸ Te caji rō cūñu tāca rey jíin capitán jíin tée téyí, jíin cúñu tācá caballo jíin tée ni cayosō siquī t̄i. Te suni caji rō cūñu tāca gá ñayuu, cúu ñayuu casájniñu cuenta maá jíin mozo jeē ní cajeen ñayuu, cúu ñayuu cácujuhnu jíin ñáyuu tu cácujuhnu. Achí ndajéhé yā.

¹⁹ Yūcuán na te ni jito ri maá quití xéén jíin táca rey ñayīvi jíin cuéhē soldado de. Te ni candutútú de jeē cuajnáhan de jíin máa Yaā yosó caballo jíin táca ndajéhé yā. ²⁰ Te ni jniñi ya quití xéén cuahān t̄i preso jíin tée ni nacani jnúhun stáhú jeē ni sáha tācá jniñu jéhu jeē ní jito jíinú quití xéén. Chi jíin jniñu jéhu un cúu jeē ni stáhú de tāca ñáyuu jeē ní cajēhe jnúhun condiso jnunī quití xéén, jíin jéē ní cachiñúhún imagen t̄i. Te quití xéén un jíin tée ni nacani jnúhun stáhú un, cátecu nd̄indúú te ni scáne ya nuū laguna ñuhūn jeē cayú jíin azufre. ²¹ Te jíin espada jeē cáne yuhu Yaā yosó caballo ni cajihī tācá soldado quití xéén un. Te tācá quití ndáva nuū tachí ni candutú chíji t̄i ni cayejí t̄i cūñu de jíjnáhan de.

Siquī mil cuiyā

20

¹ Te ni jito ri jeē ní cuun ñin ndajéhé yā ichi ándiví. Te ndáhá yá ndacáa jeē núne tūhnchi cúnú ndasí. Te suni ndáhá yá ñin cadena cáhnu. ² Te ni jniñi ya maá cóo cáhnu jeē iyó ndé jenahán ndasí, te nání t̄i jexeén jíin Satanás. Te ni jihni yā jeē conuhnī mil cuiyā. ³ Te ni scáne ya ini tūhnchi cúnú ndasí. Te ni jesi vāha ya, te ni sácutú yá yuyáú, návāha ma stahú gá un ñáyuu tācá nación, chi nde na jínu mil cuiyā. Te jeē yáha mil cuiyā ún, yūcuán na te cánúú jéē ndajī caca cuu jecu na tiempo.

⁴ Te ni jito ri tāca mesa nuū ndácu jniñu, te yūcuán cáyūcu táca ñáyuu jeē ní canihīn jniñu i sándaā i jniñu. Te suni ni jito ri anuá tāca ñáyuu jeē ní cajehnde xinī i siquī jeē ní canacani i jnúhun Jesús jíin jnúhun Yaā Dios. Te tu ní cachiñúhún i quití xéén jíin imagen t̄i, ni tu ní cájēhe i jnúhun jeē cóndee jnunī t̄i jneē i chí ndaha i. Te ni jito ri jeē ní nátecu i te ni candacu i jniñu jíin Cristo mil cuiyā. ⁵ Yāha cúu nd̄iyi jeē nátecu xihna gā. Te tāca gá nd̄iyi, tu ní cánatecu i, chi nde jeē jínu mil cuiyā. ⁶ Te nacā jeē ndetū tāca ñáyuu ndoo ánuá jeē nátecu xihna gā. Chi ma cúu cuiti i vuelta uū. Te cuu i sutū nuū Yaā Dios jíin núu Cristo, te ndacu i jniñu jíin yá mil cuiyā.

⁷ Te jeē jínu mil cuiyā ún, te ndajī Satanás te quenda nuū ȳndihyū. ⁸ Te stáhú tucu ñayuu tācá nación ñí cáhnu ñayīvi. Te stáhú ñayuu ñuu Gog jíin Magog. Te sáha jeē ndutútú táca soldado ñuu un jéē cuajnáhan de. Te coo cuehē ndasí de nájñuhun ñt̄í yumar. ⁹ Te cuite núu de quingoo de ñí cáhnu ñayīvi. Te cuicó ndúú de ñuu nuū cáyūcu ñáyuu maá Yaā Dios, ñuu jeē maní yā jíin. Te Yaā Dios chi scúun ya ñuhūn ichi ándiví, te cayū nd̄ihí de. ¹⁰ Te jexeén jeē ni stáhú táca ñáyuu ún, chi scáne ya quihīn nuū laguna ñuhūn jeē cayú jíin azufre. Te yūcuán chi xihna gā ni scáne ya quití xéén jíin tée ni nacani jnúhun stáhú. Te yūcuán ndoho ndúú ñuu ñí cáni cuiti.

Jeē sándaā yā jniñu nuū mesa cuijín

¹¹ Yūcuán na te ni jito ri ñin mesa cuijín cáhnu, te néne máa Yaā ndácu jniñu. Te ñayīvi jíin ándiví ni ndoñúhún cuahān jeē ní jito ya nuū, chi tuá ni cúu quendōo nuū yā. ¹² Te ni jito ri tāca nd̄iyi, jeē ní cujéhu jíin jéē tu ní cujéhu, cáhīn nuū Yaā Dios. Te ni sáha ya jeē núne tāca libro, te suni ni nune inga libro jeē yosó s̄h̄v̄i ñáyuu cotecu ñí cáni. Te ni sándaā yā siquī tāca nd̄iyi ún, núu ndese jniñu ni casáha i jíin ndese yósó núu tāca libro un. ¹³ Te tāca nd̄iyi jeē ní cajihī nuū mar, ni nanecoo. Te suni ni nanecoo tāca nd̄iyi jeē ní cajihī i, jeē íne i máa lugar nuū cáyūcu ánuá nd̄iyi. Te ni sándaā yā siquī, núu ndese ni casáha ñin ñin i. ¹⁴ Yūcuán na te cuehyī jéhu ñayuu jíin lugar nuū cáyūcu ánuá nd̄iyi, ni snāā yā ni scáne ya cuangoo nuū laguna ñuhūn. Te jeē ndóho ñayuu nuū laguna ñuhūn,

yūcuan cúu jeē cúu i vuelta uū. ¹⁵ Te yūcuan ní scáne ya tāca ñáyuu ni casáha jniñu néé jeē tu yósó sǎhví i nuū libro jeē yósó sǎhví ñayuu cotecu ní cáni.

Andiví jée jíin ñáyiví jée

21

¹ Yūcuán na te ni jito ri andiví jée jíin ñáyiví jée. Chi andiví jíin ñáyiví xǎhna ñúhún ni naa. Te suni tuá mar. ² Te ruhū Juan, ni jito ri ñuu i jeē cúu Jerusalén jeé. Te ñuu un ní cuun vēji ichi ándiví núu néne Yaā Dios. Te ñuu ún luu cáa nájnūhun ñin ñahan jeē ni sátūhva ña ni cucutú ña jeē nándāha ña jíin yí ña. ³ Te ni jini sōho ri ñin jnūhun jeē ni cáhān jee ichi ándiví:

Condēhé, chi vijna te ndée Yaā Dios mēhñu ñáyuu. Te condee yā jíin i jíināhan i, te cuu i ñayuu maá yá. Te maá yá condee yā jíin i jeē cúu ya Yaā Dios i. ⁴ Te nacuaa yā ndute tǎnúu i jíināhan i. Te ma cúu gā ñayuu, ni ma ndahyú gā i, ni ma cucuíhyá gā ni i, ni ma jetú gā i. Chi je ni yāha tāca jnúndóho jeē ni íyo, áchí.

⁵ Yūcuán na te ni cahān maá Yaā néne nuū mesa:

Condēhé, chi nasáha jeé rí tāca jée iyó, áchí yá.

Te suni ni cahān yā:

Tee ró jnúhun yáha. Chi tāca jnúhun yáha cúu jnūhun jeē jiní ndije ró jée ndaā cúu.

⁶ Te ni cahān gā yā:

Je ni jinu. Maá rí cúu nájnūhun letra A xǎhna ñúhún jíin letra Z jeē sándǎhí na, chi maá rí ni squejéé ndíhi te maá rí sínu. Te tāca ñáyuu cájichí, súcuan-ni cuāha ri coho i ndute cáne jeē cótecu i ní cáni. ⁷ Tāca ñáyuu jeē cúndeyí síquī jéneé, nihin i ndíhi jeē yáha cuu tahū i. Te cuu ri Yaā Dios i, te cuu i sēhe ri. ⁸ Te tāca ñáyuu jeē cáyūhú ndoho síquī jnúhun ri, jíin ñáyuu tu cácandíje, jíin ñáyuu casáha jniñu néé, jíin ñáyuu cájehni ndíyí, jíin ñáyuu cájica jnéni, jíin ñáyuu casáha tásí, jíin ñáyuu cáchiñúhún ídolo, jíin táca ñáyuu castáhú, ñayuu ún chi quívicoo i laguna ñuhún jeē cayú jíin azufre. Te yūcuan cúu jeē cúu i vuelta uū.

Jerusalén jeé

⁹ Yūcuán na te ni quiji ñin jnáhan ndíhuxá ndajéhe jeē ní candāhá ndíhuxá cohō jeē ni ñúhún chitú ndíhuxá jnúndóho sandǎhí. Te ni cahān yā jíin rí:

Nehen, te na stéén rí nuū rō ñahan jeē nándāha ña cuu ña ñasíhí Yaā cúu Londe, áchí yá.

¹⁰ Te ni sáha ga Espíritu Santo jeē ní jito ndijin rí, te ndajéhe un ní jeca ya ruhū cuahān yā jíin rí xini ñin yucu cáhnu súcún. Te ni steén yā nuū rí maá ñuu ií cujéhnu jeē cúu Jerusalén, te ni cuun vēji nde andiví núu néne Yaā Dios. ¹¹ Te ndíndēé ndasí ñuu un nájnūhun ndíndēé Yaā Dios. Te xíñú nájnūhun xíñú ñin yuū luu jeē ndeé yahu ndasí, nájnūhun yuū cuijín jeē quiyí nájnūhun vidrio. ¹² Te yuhu ñúu un ní jicó ndúu ñin jeē cáhnu súcún ndíhyú ñuu ún. Te íyó úxí uū yehyí. Te tāca yéhyí un íin ñin ndajéhe yā. Te tāca yéhyí un yósó sǎhví ndíhuxí uū yucūn Israel. ¹³ Te lado nuū cáne niāndii iyó úní yehyí. Te lado norte suni íyó úní yehyí. Te lado sur suni íyó úní yehyí. Te lado nuū queé niāndii suni íyó úní yehyí. ¹⁴ Te íyó úxí uū yuū náhnu jeē cúu cimientu maá jée ndíhyú ñuu ún. Te tāca yúu un yósó sǎhví ndíhuxí uū apóstol maá Yaā cúu Londe.

¹⁵ Te ndajéhe jeē ni cáhān jíin rí, ndáhá yá ñin yujnu oro jeē chícuaāha yá ñuu un jíin táca yéhyí jíin maá jée ndíhyú ñuu ún. ¹⁶ Te ñuu ún chi ñin cūhva-ni cúu ndicúun lado. Chi jeé cáni jíin jée jité, inuú-ni cúu. Te ndajéhe un ní chícuaāha yá ñuu un jíin yujnu ún. Te née uū mil uū ciento kilómetro jeē ñin ñin lado. Te inuú-ni cūhva jeé cáni, jeé súcún, jíin jée jité. ¹⁷ Te suni ni chícuaāha yá maá jée ndíhyú ñuu ún, te née uní xico cuūn metro jeé súcún. Te yūcuan cúu cūhva jejníñu ñayuu, jeé suni jéjníñu ndajéhe un.

¹⁸ Te maá jée ndíhyú ñuu un ní cuvāha jíin yúu cuijín quiyí. Te ñuu ún chi maá nene oro cúu, te cáa nájnūhun vidrio quiyí. ¹⁹ Te tāca yúu jeē cúu cimientu maá jée ndíhyú ñuu ún, ní cucutú jíin ndínuū yuū luu jeē ndeé yahu. Yuū ñin cúu yuū cuijín quiyí. Te jeé uú cúu yuū ndeé ndí. Te jeé uní cúu yuū pinto. Te jeé cuūn cúu yuū cuí ndí. ²⁰ Te jeé

uhún cúu yuū pinto jeē ñúhun raya. Te jeē inú cúu yuū cuehé pinto. Te jeē uxá cúu yuū cuaán quiyi. Te jeē uná cúu yuū cuí ndéé. Te jeē in cúu yuū cuaán ndíí. Te jeē uxí cúu yuū cuí cujín. Te jeē uxí in cúu yuū cuehé cuaán. Te jeē uxí uū cúu yuū ndihí ndíí. ²¹ Te ndihúxí uū yehyí un cácuu uxí uū perla jeē ndeé yahu. Te in in yéhyí cúu in in perla. Te máá nene oro cúu calle cáhnu ñuu ún, te quiyi nájnūhun vidrio.

²² Te tú na templo ni jító ri ini ñuu ún, chi nń cáhnu ñuu un ndéé máá Jítóho yō, Yaā jnń ndihi poder, jíin Yaā cúu Londe. ²³ Te ñuu ún tu jíni ñúhún cundijin jíin luz niāndii jíin yōō. Chi jeē ndíndēe máá Yaā Dios cúu jeē cundijin ñuu ún. Te luz ñuu un cúu máá Yaā cúu Londe. ²⁴ Te ñayuu tācá nación ñayīvi jēē ní jnama ya, caca i jeē cundijin luz ñuu un núu i. Te tāca rey ñayīvi quijicoo de ñuu ún, quindecá de tācá ndajniñu jeē ndeé yahu jíin jēē cujéhnu de sáha. ²⁵ Te tāca yéhyí ñuu ún ma cóndihyū cuiti nduú, chi tú na jecuāa coo. ²⁶ Te ini ñuu ún quijicoo ñayuu tācá nación, quindecá i tācá ndajniñu jeē ndeé yahu jíin jēē cujéhnu i sáha. ²⁷ Te ma quívicoo cuiti ni in jeē jnehén. Ni ma quívicoo ñayuu casáha jniñu néé jíin jēē castáhu. Chi quívicoo máni máá ñayuu jeē yosó síhvi i nuū libro jeē yosó síhvi ñayuu cotecu nń cáni, jeē névaha Yaā cúu Londe.

22

¹ Yūcuán na te ndajéhé yā ni steén yā nuū rī in yūte íyó ndoo. Te ndute un sáha jeē cótecu yō nń cáni. Te xínú nájnūhun vidrio, te cáne nuū mesa nuū ndácu Yaā Dios jniñu jíin Yaā cúu Londe. ² Te jíca yūte ún sava mēhñu calle cáhnu ñuu ún. Te ndíndúú lado yuyúte un yíhi yujnu jeē cótecu yō nń cáni sáha. Te yujnu un jéhe ndehē uxí uū jínu jeē in cuiyā, chi tāca yōō cúun ndehē. Te ndaha yúcu i cúu tajná jeē ndúvaha ñayuu tācá nación. ³ Te tācá-ni jeē ni cáhān yā jeē násūu jēē váha cúu, ma cóo ini ñuu ún. Te ini ñuu ún cuiñi máá mesa nuū ndácu Yaā Dios jniñu jíin Yaā cúu Londe. Te ñayuu cácañde jeē cácuu i mozo yā, chiñúhún i ya. ⁴ Te coto i nuū yā, te condee síhvi yá jneē i. ⁵ Te ma cóo ga jecuāa ñuu ún. Te ñayuu cáyūcu yúcuán tuá jíni ñúhún i jeē cundijin lámpara nuū i, ni jeē cundijin niāndii. Chi jeē ndíndēe máá Jítóho yō Yaā Dios cúu jeē cundijin nuū i. Te ndacu i jniñu nń cáni cuiti.

Jeē cuacuyajni ndiji Cristo

⁶ Yūcuán na te ni cahān ndajéhé un jíin rí:

Tāca jnúhun yáha cúu jnúhun jeē jíni ndije ró jēē ndaā cúu. Te Jítóho yō Yaā Dios, máá yá sáha jíin téé cánacani jnúhun ya jeē jíin Espíritu yā cánacani de. Te suu máá yá ni tají yá ndajéhé yā návaha steén nuū ñayuu cácuu mozo yā tācá jniñu jeē yachí coo.

⁷ Ndiji yachí rí, achí yá.

Te nacā jeē ndetū ñayuu chusóhó jnúhun Yaā Dios jeē yosó núu tútu yáha.

⁸ Te ruhū Juan, ni jini sōho ri tāca jnúhun yáha, te ni jito ri tācá jniñu yáha. Te ná ni jini sōho ri ni jito ri, yūcuán na te ni jecuiñi yití rí nuū jehé máá ndajéhé jeē ni steén tācá jniñu yáha núu rí, jeē chiñúhún rí yā nuú. ⁹ Te ni cahān ndajéhé un jíin rí:

Ma sáha ró súcuán. Chi ruhū suni mozo Yaā Dios cúu rí, nájnūhun máá ró jíin táca hermano rō jeē cánacani jnúhun ya, jíin ndihi ñayuu cájetáhu jnúhun yosó nuū tútu yáha. Sa suhva nuū máá Yaā Dios chiñúhún ró. Achí yá.

¹⁰ Te ni cahān gā ndajéhé un jíin rí:

Ma chísāhi ró tāca jnúhun Yaā Dios jeē yosó núu tútu yáha, chi je cuacuyajni tiempo jeē cúndaā ndihi. ¹¹ Te ñayuu casáha jniñu néé, na sáha ga máá i jniñu néé. Te ñayuu jnehén ánuá, na quéndōo máá i súcuán. Te sa ñayuu casáha jniñu ndaā, na sáha ga i jniñu ndaā. Te ñayuu cáhiyo ndoo ánuá, na cáca ndoo ga i súcuán. Achí ndajéhé un.

¹² Jendaá jeē ndiji yachí rí, achí Jesús. Te quiji ri jíin táhū cuāha ri nuū in in ñayuu, núu ndese jniñu ni casáha i. ¹³ Máá rí cúu nájnūhun letra A xihna ñúhún jíin letra Z jeē sándihí na, chi íyó rí nde xihna ñúhún te coo ri nń cáni.

¹⁴ Nacā jeē ndetū ñayuu jeē jéhe i jnúhun ndundoo ánuá i nájnūhun ndúndoo sahma. Chi cuu caji i ndehē yujnu jeē sáha jeē cótecu i nń cáni, te cuu quívicoo i yéhyí ñuu i ún.

¹⁵ Te ichi fuera ñuu ún cuiñi ñayuu tu cácañde, jíin ñayuu casáha tásí, jíin ñayuu cájica

jnéní, jíín ñáyuu cájehni ndīyī, jíín ñáyuu cáchiñúhún ídolo, jíín ñáyuu cácusī ni stahú jnánhan.

¹⁶ Máá rúhū Jesús, ni tají rí ndajéhé rī návāha castūhun yá tāca jnúhun yáha nuū tāca grupo ñayuu cácandíje. Te máá rí ni sáha jeē ni íyo rey David, te ni quiji ri nuū yucún David. Te cúu ri nájñūhun lucero ndíndēe cáne cúndijin. Achí yá.

¹⁷ Te máá Espíritu Santo jíín máá ñahan jeē nándāha jíín Yaā cúu Londe, cácahān: Nehen, quívicoo ró ndaha ya, achí.

Te tāca ñáyuu jeē jíni sōho, suni na cáhán i:

Nehen, quívicoo ró ndaha ya.

Te tāca ñáyuu cájichī jeē cáconi i coho i, na quívicoo i ndaha ya, te súcuan-ni na cóho i ndute jeē cótecu i ní cáni sáha.

¹⁸ Te tāca ñáyuu jíni sōho jnūhun Yaā Dios jeē yosó núū tútu yáha, cáhán níhin ri jíín i: Núu ndé ñáyuu chisóo i nuū jnúhun cáhán tutu yáha, te Yaā Dios chisóo yá jnūndóho cáhán tutu yáha, ndoho i. ¹⁹ Te núu ndé ñáyuu quende i jecu jnūhun cáhán tutu yáha, te Yaā Dios quende yā tahū i jeē yosó núū libro jeē yosó síhví ñayuu cotecu ní cáni, te ma nihín i tahū i ini ñuu ī ún. Te tutu yáha cúu jeē cahán siquī tāca un.

²⁰ Te Yaā jeē ni cáhān tāca jnúhun yáha, suhva cáhán yā:

Jendaá jeē ndiji yachī rī, achí yá.

Amén. Súcuan na cóo. Jítoho ná Jesús, jícan tahu na jéē ndíji yachī ní.

²¹ Te ñúhun ni rī jeē Jítoho yō Jesucristo na sáha ga yā jeē váha róhó jíjnánhan ró. Amén.